

প্রথম প্রতিশ্রুতি

আশাপূর্ণা দেবী



বাংলা সাহিত্যে আশাপূর্ণা দেবীর অভ্যুদয় একটি বিশিষ্ট ঘটনা। তাঁর তীক্ষ্ণ দৃষ্টি ও ক্ষুব্ধতার লেখনী বাঙ্গালীর সংসারজীবনের উপরকার বর্ণনা মোহজাল ছিন্‌বিছিন্ন করে তার যে সত্যকার রূপ দেখিয়েছেন, তা ইতিপূর্বে কোন লেখক বা লেখিকা দেখতে কি দেখাতে সাহস করেন নি। কোনো প্রচলিত ধারণা ও বিশ্বাসকেই লেখিকা যাচাই না করে গ্রহণ করতে রাজী হন নি, আর তার ফলে বিশ্বাসমুগ্ধ বহু পাঠককেই সুকঠিন আঘাত পেতে হয়েছে তাঁর লেখা পড়তে। তাঁর সভ্যদৃষ্টির নিকষে টেকে নি প্রায় কোনটাই—অধিকাংশ ক্ষেত্রেই আপাত-মূল্যবান অলঙ্কারের ভিতরকার কেমিক্যাল সোনা ও বুটো পাথরের যথার্থ চেহারাটা বেরিয়ে পড়েছে।..... কিন্তু শুধুই কি জীবনের অসত্য ও অমলিন দিকটাই দেখেছেন লেখিকা? না, তা দেখেন নি। তাহলে আজ এই গ্রন্থের নামিকা সত্যবতীর সৃষ্টি বা কল্পনা সম্ভব হত না। বাংলার সমাজ ও সংসারের অন্তঃপুরে গত শতবর্ষে যে অভাবনীয় ও অকল্পনীয় পরিবর্তন ঘটে গিয়েছে—বহু অসমসাহসিক বীরান্ননার বুকের রক্তই তা ঘটতে পেরেছে; তারা নিজেরা জ্বলে আলোকিত করে দিয়ে গেছে জীবনের প্রশস্ত রাজপথ, আত্মবলির মূল্যে হুলে দিয়ে গেছে মহৎ সম্ভাবনার সিংহদ্বার। লেখিকার আবির্ভাব যেমন বিশ্বয়কর তেমনি বাংলা কথাসাহিত্য ক্ষেত্রে 'প্রথম প্রতিশ্রুতি'র আবির্ভাবও একটি স্বর্ণাণী ঘটনা। বাঙ্গালী পাঠক-পাঠিকা তথা সমগ্র বাংলাভাষাভাষী জনতা চিরদিন এই উপন্যাসখানির জন্য লেখিকার কাছে কৃতজ্ঞ ও স্বাধী বোধ করবেন সন্দেহ নেই। বহু গুণী ও জ্ঞানী পাঠকের মতে—তিনি যদি মাত্র এই একটি গ্রন্থই রচনা করতেন, তাহ'লেও বঙ্গবাণীর সভায় তাঁর আসন স্থায়ী ও বরণীয় হয়ে থাকত।

২৪শে পৌষ ১৩১৫, ইং ৮ই জানুয়ারী ১৯০৯
গুজুবীর উত্তর কলকাতার পটলভাসার মামার
বাড়িতে আশাপূর্ণা দেবীর জন্ম। সমাজের কঠিন
নিয়মে মাতৃভাষায় বিদ্যাশিক্ষার বা পাঠাভ্যাসের
সুযোগ পান নি। তা সত্ত্বেও একদিনে তাঁর পড়ার
বাসনা ছিল অদম্য এবং অন্যাদিকে মাতৃসান্নিধ্যে
জেগেছিল সাহিত্য ও জীবন সঞ্চয়ে এক
অনুসন্ধিৎসা। প্রথম লেখা শুরু কবিতা দিয়ে এবং
১৩২৯ সালে 'শিওসাবী' পত্রিকায় তা প্রকাশিত
হয়েছিল। এরপরে আর তাঁকে অপেক্ষা করতে
হয়নি। প্রথম সাহিত্য পুরস্কার পেয়েছিলেন
একটি কবিতা প্রতিযোগিতায় মাত্র পনেরো বছর
বয়সে। এই সময় তাঁর জীবনের দিক পরিবর্তন
হল। কুম্ভনগর-নিবাসী কালিদাস গুপ্তর সঙ্গে
তিনি বিবাহসূত্রে আবদ্ধ হন। প্রথম ছোটদের
বই-এর প্রকাশ ১৩৪৫ সালে (ছোট ঠাকুরদার
কাশীযাত্রা) এবং বড়দের জন্য লেখা উপন্যাস
(প্রেম ও প্রয়োজন) প্রথম প্রকাশিত হয়
১৯৫১ সালে। এরপর আর থেমে থাকে নয়,
শেষ নিঃশ্বাস পড়ার পূর্বসূহৃত পর্যন্ত তাঁর কলম
থেমে থাকে নি। বাংলা ২৭শে আষাঢ় ১৪০২,
ইং ১৩ই জুলাই ১৯৯৫ তিনি লোকান্তরিতা হন।



প্রথম প্রতিশ্রুতি

আশাপূর্ণা দেবী

রবীন্দ্র পুরস্কার : ১৩৭২

জ্ঞানপীঠ পুরস্কার : ১৩৮৪



মিত্র ও ঘোষ পাবলিশার্স প্রাঃ লিঃ

১০ শ্যামাচরণ দে স্ট্রীট, কলকাতা-৭৩

প্রথম প্রকাশ, ফাল্গুন ১৩৭১
চতুশতাব্দীর ১৭শ মুদ্রণ, ভাদ্র ১৪০৯

প্রচ্ছদপট :
অঙ্কন — আশু বন্দ্যোপাধ্যায়
মুদ্রণ — চয়নিকা প্রেস

PRATHAM PRATISRUTI
A novel by Ashapura Devi. Published by
Mitra & Ghosh Publishers Pvt. Ltd.,
10 Shyama Charan Dey Street, Kolkata-700 073

ISBN : 81-7293-206-5

মিত্র ও ঘোষ পাবলিশার্স প্রাঃ লিঃ, ১০ শ্যামাচরণ দে স্ট্রীট, কলকাতা-৭০০ ০৭৩ হইতে
এস. এন. রায় কর্তৃক প্রকাশিত ও এসসি অফসেট, ৩০/২বি হরমোহন ঘোষ লেন,
কলকাতা-৮৫ হইতে সন্দীপ চট্টোপাধ্যায় কর্তৃক মুদ্রিত

উৎসর্গ

নিভৃত লোকে বসে যারা রেখে গেছেন প্রতিশ্রুতির
স্বাক্ষর, সেই বরণীয়া ও স্মরণীয়াদের উদ্দেশে—

‘বহির্বিশ্বের ভাঙাগড়ার কাহিনী নিয়ে রচিত হয় বিগত কালের ইতিহাস। আলো আর অন্ধকারের পৃষ্ঠপটে উচ্চকিত সেই ধ্বনিমুখর ইতিহাস পরবর্তীকালের জন্য সঞ্চিত রাখে প্রেরণা, উন্মাদনা, রোমাঞ্চ। কিন্তু স্তিমিত অন্তঃপুরের অন্তরালেও কি চলে না ভাঙাগড়ার কাজ? যেখান থেকে রং বদল হয় সমাজের, যুগের, সমাজ মানুষের মানসিকতার। চোখ ফেললে দেখা যায় সেখানেও অনেক সঞ্চয়। তবু রচিত ইতিহাসগুলি চিরদিনই এই অন্তঃপুরের ভাঙাগড়ার প্রতি উদাসীন। অন্তঃপুর চিরদিনই অবহেলিত। বাংলাদেশের সেই অবজ্ঞাত অন্তঃপুরের নিভূতে প্রথম যারা বহন করে এনেছেন প্রতিশ্রুতির স্বাক্ষর, এ গ্রন্থ সেই অনামী মেয়েদের একজনের কাহিনী।

তুচ্ছ দৈনন্দিনের পৃষ্ঠপটে আঁকা এই ছবি যদি বহন করে রাখতে পেরে থাকে বিগত কালের সামান্যতম একটি টুকরোকে, সেইটুকুই হবে আমার শ্রমের সার্থকতা।

লেখিকা

॥ এ গ্রন্থে বর্ণিত চরিত্রগুলির পরিচয় ॥

মূল চরিত্র

সত্যবতী

রামকলী—	সত্যবতীর বাবা	ভুবনেশ্বরী—	সত্যবতীর মা
জয়কলী—	" ঠাকুর্দা	দীনতারিণী—	" ঠাকুমা
কুঞ্জ—	" জ্যাঠামশাই	কাশীশ্বরী	" পিস্ঠাকুর
জটা—	" পিসির ছেলে	মোক্ষদা	— " পিস্ঠাকুর
নবকুমার—	" স্বামী	শিবজায়া	— " জ্যাতিঠাকুমা
নীলাস্বর বাঁড়ুয্যে—	" শ্বশুর	নন্দরানী	— " জ্যাতিঠাকুমা
সাধন—	" বড় ছেলে	নিভাননী	— " মামী
সরল—	" ছোট ছেলে	সুকুমারী	— " মামী
ফেলু বাঁড়ুয্যে—	রামকালীর শ্বশুর	এলোকেশী—	সত্যবতীর শাশুড়ী
রাসবিহারী—	কুঞ্জর বড় ছেলে	পুণ্যি—	সত্যবতীর সমবয়সী পিসি
নেড়ু—	" ছোট ছেলে	খেঁদি—	" বাল্যবান্ধবী
ভবতোষ—	নবকুমারের শিক্ষক	সুবর্ণ—	" মেয়ে
নিতাই—	বন্ধু	সেজপিসি—	জটার মা
লক্ষ্মীকান্ত বাঁড়ুয্যে—	পাটমহলের জমিদার	শশীতারা—	কুঞ্জর বোন
শ্যামাকান্ত—	ঐ জমিদার-পুত্র	অভয়া—	" স্ত্রী
রাখহরি ঘোষাল	— ঐ প্রতিবেশী	সারদা—	রাসুর বৌ
দয়াল মুখুয্যে	—	পটলী—	রাসুর দ্বিতীয় স্ত্রী
নগেন—	কাটোয়ার যুবক	শঙ্করী (কাটোয়ার বৌ)—	কাশীশ্বরীর
বিদ্যারত্ন—	রামকালীর ভক্তিজাজন পণ্ডিত		নাতবৌ
গোবিন্দ গুপ্ত—	" আশ্রয়দাতা	বেহলা—	শ্যামাকান্তের স্ত্রী
পটলী ঘোষাল	—	জাবিনী—	নিতাইয়ের স্ত্রী
বিপিন লাহিড়ী	— " প্রতিবেশী		
মুকুন্দ মুখুয্যে—	সৌদামিনীর স্বামী	মুক্তকেশী—	এলোকেশীর সহইয়ের মেয়ে
তুষ্টি—	গোয়ালা	সৌদামিনী—	এলোকেশীর ভাগ্নী
রঘু—	তুষ্টির নাতি	সুহাস—	শঙ্করীর মেয়ে
বিন্দে—	ওঝা		
গোপেন—	রাখাল	সাবিপিসি, রাখুর মা, নাপিত-বৌ, দত্তগিন্ধী	ফ্যান্ড ঠাকুরপণ ইত্যাদি ।

সত্যবতীর গল্প আমার লেখা নয়। এ গল্প বকুলের খাতা থেকে নেওয়া। বকুল বলেছিল, “একে গল্প বলতে চাও গল্প, সত্যি বলতে চাও সত্যি।” বকুলকে আমি ছেলেবেলা থেকে দেখছি। এখনও দেখছি। বরাবরই বলি, “বকুল, তোমাকে নিয়ে গল্প লেখা যায়।” বকুল হাসে। অবিশ্বাস আর কৌতূকের হাসি। না, বকুল নিজে কোনদিন ভাবে না— তাকে নিয়েও গল্প লেখা যায়। নিজের সষকে কোন মূল্যবোধ নেই বকুলের, কোন চেতনাই নেই।



বকুলও যে সত্যিই পৃথিবীর একজন এ কথা মানতেই পারে না বকুল। সে শুধু জানে, সে কিছুই নয়, কেউই নয়। অতি সাধারণের একজন, একেবারে সাধারণ।— যাদের নিয়ে গল্প লিখতে গেলে কিছুই লেখবার থাকে না। বকুলের এ ধারণা গড়ে ওঠার মূলে হয়তো ওর জীবনের বনেনদের তুচ্ছতা। হয়তো এখন অনেক পেয়েও শৈশবের সেই অনেক কিছু না পাওয়ার ফোভটা আজও রয়ে গেছে তার মনে। সেই ফোভই স্তিমিত করে রেখেছে তার মনকে। কুণ্ঠিত করে রেখেছে তার সত্তাকে। বকুল সুবর্ণলতার অনেকগুলো ছেলেমেয়ের মধ্যে একজন। সুবর্ণলতার শেষদিকের মেয়ে। সুবর্ণলতার সংসারে বকুলের ভূমিকা ছিল অপরাধীর। অজানা কোন এক অপরাধে সব সময় সজ্জ হতে থাকত হে বকুলকে, এ যেন বিধি-নির্দেশিত বিধান।

বকুলের শৈশব-মন গঠিত হয়েছিল তাই অদ্ভুত এক আলোছায়ার পরিমণ্ডলে। যার কতকাংশ শুধু ভয় সন্দেহ আতঙ্ক ঘৃণা, আর কতকাংশ জ্যোতির্ময় রহস্যপূর্ণ উজ্জ্বল চেতনায় উদ্ভাসিত। তবু মানুষকে ভাল না বেসে পারে না বকুল। মানুষকে ভালবাসে বলেই তো—

কিন্তু থাক, এটা তো বকুলের গল্প নয়। বকুল বলেছে, “আমার গল্প যদি লিখতেই হয় তো সে আজ নয়। পরে।” জীবনের দীর্ঘপথ পার হয়ে এসে বুঝতে শিখেছে বকুল, পিতামহী প্রপিতামহীর ঋণশোধ না করে নিজের কথা বলতে নেই।

নিভৃত গ্রামের ছায়াঙ্ককার পুষ্করিণীই ভরা বর্ষায় উপচে উঠে নদীতে গিয়ে মিশে স্রোত হয়ে ছোট্টে। সেই ধারাই ছুটে ছুটে একদিন সমুদ্রে গিয়ে পড়ে। সেই ছায়াঙ্ককারের প্রথম ধারাকে স্বীকৃতি দিতে হবে বৈকি।

আজকের বাংলাদেশের অজস্র বকুল-পারুলদের পিছনে রয়েছে অনেক বছরের সংগ্রামের ইতিহাস। বকুল-পারুলদের মা দিদিমা পিতামহী আর প্রপিতামহীদের সংগ্রামের ইতিহাস। তারা সংখ্যায় অজস্র ছিল না, তারা অনেকের মধ্যে মাত্র এক-একজন। তারা একলা এগিয়েছে। এগিয়েছে খানা ডোবা ডিঙিয়ে পাথর ভেঙে কাঁটাঝোপ উপড়ে। পথ কাটতে কাটতে হয়তো দিশেহারা হয়েছে, বাসে পড়েছে নিজেরই কাটা-পথের পথ জুড়ে। আবার এসেছে আর একজন; তার আরক্ণ কর্মভার তুলে নিয়েছে নিজের হাতে। এমনি করেই তো তৈরী হল রাস্তা। যেখান দিয়ে বকুল-পারুলরা এগিয়ে চলেছে। বকুলরাও খাটছে বৈকি। না খাটলে চলবে কেন? শুধু তো পায়ে চলার পথ হলেই কাজ শেষ হল না।

রথ চলার পথ চাই যে!

সে পথ কে কাটবে কে জানে? সে রথ কারা চালাবে কে জানে?

যারা চালাবে তারা হয়তো অলস কৌতূহলে অতীত ইতিহাসের পাতা উল্টে দেখতে দেখতে সত্যবতীকে দেখে হেসে উঠবে।

নাকে নোলক, আর পায়ে মল পরা আট বছরের সত্যবতীকে।

বকুলও একসময় হাসত।

এখন হাসে না। অনেকটা পথ পার হয়ে বকুল পথের মর্মকথা বুঝতে শিখেছে। তাই যে সত্যবতীকে বকুল কোনোদিন চোখেও দেখে নি, তাকে দেখতে পেয়েছে স্বপ্নে আর কল্পনায়, মমতায় আর শ্রদ্ধায়।

তাই তো বকুলের খাতায় সত্যবতীর এমন স্পষ্ট চেহারা আঁকা রয়েছে।

নাকে নোলক, কানে 'সার' মাকড়ি, পায়ে ঝাঁঝের মল, বৃন্দাবনী-ছাপের আটহাতি শাড়িপরা আট বছরের সত্যবতী। বিয়ে হয়ে গেছে বছরখানেক আগে—এখনও ঘরবসত হয় নি। অপ্রতিহত প্রতাপে পাড়াসুদ্ধ ছেলেমেয়ের দলনেত্রী হয়ে যথেষ্ট খেলে বেড়ায়। সত্যবতীর মা ঠাকুমা জেঠী পিসী এঁটে উঠতে পারে না ওকে।

পারে না হয়তো সত্যবতীর যথেষ্টচারের ওপর ওর বাপের কিছু প্রশ্রয় আছে বলে।

সত্যবতীর বাপ রামকালী চাটুয্যে, চাটুয্যে বামুনের ঘরের ছেলে হলেও ব্রাহ্মণ-জনোচিত পেশা তাঁর নয়। অন্য শাস্ত্রপালা বেদ-বেদান্ত বাদ দিয়ে তিনি বেছে নিয়েছেন আয়ুর্বেদ। ব্রাহ্মণের ছেলে হয়েও কবিরাজী করেন রামকালী। তাই গ্রামে ওঁর নাম 'নাড়ীটেপা বামুন'। ওঁর বাড়ির নাম 'নাড়ীটেপার বাড়ি'।

রামকালীর প্রথম জীবনটা ওঁর অন্য সব ভাই আর অন্যান্য জ্ঞাতীগোত্রের চাইতে ভিন্ন। কিছুটা হয়তো বিচিত্রও। নইলে ওই আধাবয়সী লোকটার ওইটুকু মেয়ে কেন? সত্যবতী তো রামকালীর প্রথম সন্তান। সে যুগের হিসেবে বিয়ের বয়স একেবারে পার করে ফেলে তবে বিয়ে করেছিলেন রামকালী। সত্যবতী সেই পার হয়ে যাওয়া বয়সের ফল।

শোনা যায় নিতান্ত কিশোর বয়সে বাপের ওপর অভিমান করে বাড়ি থেকে পালিয়েছিলেন রামকালী। কারণটা যদিও খুব একটা ঘোরালো নয়, কিন্তু কিশোর রামকালীর মনে বোধ করি সেটাই বেশ জোরালো ছাপ মেরেছিল।

কি একটা অসুবিধেয় পড়ে রামকালীর বাবা জয়কালী একদিনের জন্যে সদ্য উপবীতধারী পুত্র রামকালীর উপর ভার দিয়েছিলেন গৃহদেবতা জনার্দনের পূজা-আরতির। মহাহৎসাহে সে ভার নিয়েছিল রামকালী। তার আরতির ঘটধর্মনিতে সেদিন বাড়িসুদ্ধ লোক 'ত্রাহি জনার্দন' ডাক ছেড়েছিল। কিন্তু উৎসাহের চোটে ভয়ঙ্কর একটা ভুল ঘটে গেল। মারাখক ভুল।

রামকালীর ঠাকুমা ঠাকুরঘর মার্জনা করতে এসে টের পেলে সে ভুল। টের পেয়ে ন্যাড়া মাথার উপর কদমছাঁট চুল সজারুর কাঁটার মত খাড়া হয়ে উঠল তাঁর। ছুটে গিয়ে ভাইপোর অর্থাৎ রামকালীর বাবা জয়কালীর কাছে প্রায় আছড়ে পড়লেন।

"সর্বনাশ হয়েছে জয়!"

জয়কালী চমকে উঠলেন "কি হয়েছে পিসী? ছেলেপুলেকে দিয়ে ঠাকুরসেবা করলে যা হয় তাই হয়েছে। সেবা-অপরাধ ঘটছে। রেমো জনার্দনকে ফল-বাতাসা দিয়েচে, জল দেয়নি।"

চড়াং করে সমস্ত শরীরের রক্ত মাথায় গিয়ে উঠল জয়কালীর। "অ্যা" করে একটা আর্তনাদ-ধ্বনি তুললেন তিনি।

পিসী একটা হতাশ নিঃশ্বাস ফেলে সেই সুরেই সুর মিলিয়ে বললেন, "হ্যাঁ! জানি না এখন কার কি অদৃষ্টে আছে! ফুল তুলসীর ভুল নয়, একেবারে তেঁস্তার জল!"

সহসা জয়কালী পায়ের খড়মটা খুলে নিয়ে চিৎকার করে উঠলেন, "রেমো! রেমো!"

চিৎকারে রামকালী প্রথমটায় বিশেষ আতঙ্কিত হয় নি, কারণ পুত্র-পরিজনদের প্রতি স্নেহ-সম্ভাষণও জয়কালীর এর চাইতে খুব বেশী নিম্নগ্রামের নয়। অতএব সে বেলের আঁঠার হাতটা মাথায় মুছতে মুছতে পিতৃসকাশে এসে দাঁড়াল।

কিন্তু এ কী! জয়কালীর হাতে খড়ম!

রামকালীর চোখের সামনে কতকগুলো হলদ রঙের ফুল ভিড় করে দাঁড়াল।

"ভগবানকে স্মরণ কর রেমো", জয়কালী ভীষণ মুখে বললেন, "তোমার কপালে মৃত্যু আছে।"

রামকালীর চোখের সামনে থেকে হলদ রঙের ফুলগুলোও লুপ্ত হয়ে গেল, রইল শুধু নিরঙ্কর অন্ধকার। সেই অন্ধকার হাতড়ে একবার খুঁজতে চেষ্টা করল রামকালী কোন অপরাধে বিধাতা আজ তার কপালে মৃত্যুদণ্ড লিখেছেন। খুঁজে পেল না, খোঁজবার সামর্থ্যও রইল না। সেই অন্ধকারটা ক্রমশ রামকালীর চৈতন্যের উপর ঝাঁপিয়ে পড়ল।

"জনার্দনের ঘরে আজ পূজা করেছিলি তুই না?"

রামকালী নীরব।

পূজার ঘরেই তা হলে কোনো অপরাধ সংঘটিত হয়েছে। কিন্তু কই? কি? যথারীতি হাত-পা ধুয়ে তার পৈতেয় পাওয়া চেলির জোড়টা পরেই তো ঘরে চুকেছিল রামকালী। তারপর? আসন। তারপর? আচমন। তারপর? আরতি। তারপর—ঠাই করে মাথায় একটা ধাক্কা লাগল।

“জল দিয়েছিল ভোগের সময় ?”

এই প্রশ্নটি পুত্রকে করছেন জয়কালী খড়মের মাধ্যমে ।

দিশেহারা রামকালী আরও দু-দশটা ধাক্কার ভয়ে বলে বসল—“হ্যাঁ, দিয়েছি তো!”

“দিয়েছিল ? জল দিয়েছিল ?” জয়কালীর পিসী যশোদা একেবারে নামের বিপরীত ভঙ্গীতে বলে উঠলেন, “দিয়েছিল তো সে জল গেল কোথায় রে হতভাগা ? গেলস একেবারে শুকনো ?”

প্রশ্নকর্তী ঠাকুমা ।

বুকের গুরু-গুরু ভাবটা কিঞ্চিৎ হাল্কা মনে হল, রামকালী ক্ষীণস্বরে বলে বসল, “ঠাকুর খেয়ে নিয়েছে বোধ হয়!”

“কী ? কী বললি ?” আর একবার ঠক্ করে একটা শব্দ, আর চোখে অন্ধকার হয়ে যাওয়ার আরও গভীরতম অনুভূতি ।

“লক্ষ্মীছাড়া, শুয়োর বন্দুরা! ঠাকুর জল খেয়ে নিয়েছে ? শুধু ভূত হও নি তুমি, শয়তানও হয়েছে । ভয় নেই প্রাণে তোমার ? ঠাকুরের নামে মিছে কথা ?”

অর্থাৎ মিথ্যা কথাটা যত না অপরাধ হোক, ঠাকুরের নামের সঙ্গে জড়িত হয়ে ভীষণ অপরাধে পরিণত হয়েছে । রামকালী ভয়ের বশে আবারও মিছে কথা বলে বসে, “হ্যাঁ, সত্যি বলছি । ঠাকুরের নামে দিব্যি । দিয়েছিলাম জল ।”

“বটে রে হারামজাদা! বামুনের ঘরে চাঁড়াল! ঠাকুরের নামে দিব্যি ? জল দিয়েছিস তুই ? ঠাকুর জল খেয়ে ফেলেছে ? ঠাকুর জল খায় ?”

মাথার মধ্যে জ্বলছে ।

রামকালী মাথার জ্বলায় অস্থির হয়ে সমস্ত ভয়-ডর ভুলে বলে বসল, “খায় না জানো তো দাও কেন ?”

“ও, আবার মুখে মুখে চোপা!” জয়কালী আর একবার শেষবেশ খড়মটার সত্ববহার করলেন । করে বললেন, “যা দূর হ, বামুনের ঘরের গরু! দূর হয়ে যা আমার সুমুখ থেকে!”

এই ।

এর বেশী আর কিছুই করেন নি জয়কালী । আর এরকম ব্যবহার তো তিনি সর্বদাই সকলের সঙ্গে করে থাকেন । কিন্তু কিসে যে কি হয়!

রামকালীর চোখের সামনে থেকে যেন একটা পর্দা খসে গেল ।

চিরদিন জেনে আসছে জনার্দন বেশ একটু দয়ালু ব্যক্তি, কারণে-অকারণে উঠতে বসতে বাড়ির সকলেই বলে, “জনার্দন, দয়া করো! কিন্তু কোথায় সে দয়ার কণিকামাত্র!

রামকালী যে মনে মনে প্রাণ ফাটিয়ে চিৎকার করে প্রার্থনা করল, “ঠাকুর এই অবিশ্বাসীদের সামনে একবার নিজমূর্তি প্রকাশ করো, একবার অলক্ষ্য থেকে দৈববাণী করো, ওরে জয়কালী, কৃথা ওকে উৎপীড়ন করছিস । জল আমি সত্যই খেয়ে ফেলেছি । একমুঠো বাতাসা খেয়ে ফেলে বড্ড তেঁটা পেয়ে গিয়েছিল ।”

নাঃ, দৈববাণীর ছায়ামাত্র নেই ।

সেই মুহূর্তে আবিষ্কার করল রামকালী, ঠাকুর মিথ্যে, দেবতা মিথ্যে, পূজোপাঠ প্রার্থনা— সবই মিথ্যে, অমোঘ সত্য শুধু খড়ম ।

পৈতের সময় তারও একজোড়া খড়ম হয়েছে । তার উপযুক্ত ব্যবহার কবে করতে পারবে রামকালী কে জানে!

অথচ এই দণ্ডে সমস্ত পৃথিবীর উপরই সে ব্যবহারটা করতে ইচ্ছে করছে ।

“পৃথিবীতে আর থাকব না আমি ।”

প্রথমে সংকল্প করল রামকালী ।

তারপর ক্রমশ পৃথিবীটা ছেড়ে চলে যাবার কোনো উপায় আবিষ্কার করতে না পেরে মনের সঙ্গে রফা করল ।

পৃথিবীটা আপাতত হাতে থাক্, ওটা তো যখন ইচ্ছেই ছাড়া যাবে । ছাড়বার মত আরও একটা জিনিস রয়েছে, পৃথিবীরই প্রতীক যেটা ।

বাড়ি ।

বাড়িই ছাড়বে রামকালী ।

জন্মে আর কখনও জনার্দনের পূজো যাতে না করতে হয় ।

তখন 'নাড়ীটেপার বাড়ি' নাম হয় নি, আদি ও অকৃত্রিম 'চাটুয়ে বাড়ি'ই ছিল। সকলের শ্রদ্ধা-সমীহেরও আধার ছিল। কাজেই বেশ কিছুদিন গ্রামে সাড়া পড়ে রইল, চাটুযোদের ছেলে হারিয়ে যাওয়া নিয়ে।

গ্রামের সমস্ত পুকুরে জাল ফেলা হল। গ্রামের সকল দেবদেবীর কাছে মানসিক মানা হল। রামকালীর মা রোজ নিয়ম করে ছেলের নামে ঘাটে প্রদীপ ভাসাতে লাগল, জয়কালী নিয়ম করে জনার্দনের ঘরে তুলসী চড়াতে লাগলেন, কিছুই হল না।

ক্রমশ সকলে যখন প্রায় ভুলে গেল চাটুযোদের রামকালী বলে একটা ছেলে ছিল, তখন গ্রামের কোনো একটা যুবক একদিন ঘোষণা করল, রামকালী আছে। সে মুকুন্দদাবাদে গিয়েছিল, সেখানে নিজের চোখে দেখে এসেছে রামকালী নবাব বাড়ির কবরেজ গোবিন্দ গুপ্তর বাড়িতে রয়েছে, তার সাকারেদি করে কবরেজি শিখছে।

শুনে ফ্যাল ফ্যাল করে তাকিয়ে রইলেন জয়কালী। ছেলের বেঁচে থাকার খবর, আর ছেলের জাত যাওয়ার খবর, যুগপৎ উন্টোপাট্টা দুটো খবরে তিনি ভুলে গেলেন, আনন্দে হেঁইকার করতে হবে কি শোকে হাহাকার করতে হবে!

ছেলে বদ্যিবাড়ির ভাত খাচ্ছে, বদ্যিবাড়ির আশ্রয় গ্রহণ করেছে, এ তো মৃত্যুসংবাদেরই সামিল। অথচ রামকালী এযাবৎ মরে নি, একথা জেনে প্রাণের মধ্যে কী যেন ঠেলে ঠেলে উঠছে। কী সে? আনন্দ? আবেগ? অনুতাপের যন্ত্রণা-মুক্তির সুখ?

গ্রামের সকলের সঙ্গে পরামর্শ করতে লাগলেন জয়কালী। অবশেষে রায় বেরোল, জয়কালীর নিজের একবার যাওয়া দরকার। সরেজমিনে তদন্ত করে দেখে আসুন প্রকৃত অবস্থাটা কি! তা ছাড়া সেই লোক প্রকৃতই রামকালী কিনা— তাই বা কে জানে! যে দেখেছে সে তো নিকট-আত্মীয় নয়, চোখের ভ্রম হতে কতক্ষণ?

কিন্তু পরামর্শ শুনে জয়কালী আকাশ থেকে পড়লেন— "আমি যাব? আমি কি করে যাব? জনার্দনের সেবা ফেলে আমার কি নড়বার জো আছে?"

রামকালীর মা, জয়কালীর দ্বিতীয় পক্ষ দীনতারিণী শুনে কেঁদে ভাসাল। মুখে এসেছিল, বলে, "জনার্দনই তোমার এত বড় হল?"

বলতে পারল না সাহস করে, শুধু চোখের জল ফেলতে লাগল।

অবশেষে অনেক পরিকল্পনান্তে স্থির হল, জয়কালীর এক ভাগ্নে যাবে, বয়স্ক ভাগ্নে। তার সঙ্গে জয়কালীর প্রথম পক্ষের বড় ছেলে কুঞ্জকালী যাবে।

কিন্তু এই গুণ্ডাম থেকে মুকুন্দদাবাদে যাওয়া তো সোজা নয়! গরুর গাড়ি করে গঞ্জে গিয়ে খোঁজ নিতে হবে কবে নৌকা যাবে মুকুন্দদাবাদ। তারপর আবার চাল চিড়ে বেঁধে নিয়ে গরুর গাড়িতে তিন ক্রোশ রাস্তা ভেঙে নৌকের কিনারে গিয়ে ধর্না পাড়া।

খরচও কম নয়।

জয়কালী ভাবলেন, খরচের খাতায় বসানো সংখ্যা আবার জমার খাতায় বসাতে গেলে ঝঞ্ঝাট বড় কম নয়। এত ঝঞ্ঝাটের দরকারই বা কি ছিল? রাগ হল সেই ফাজিল ছোকরাটার ওপর; যে এসে খবর দিয়েছে। যে এত ঝঞ্ঝাট বাধানোর নয়ক।

রামকালী তো খবচ হয়েই গিয়েছিল। ওই ফাজিলটা এসে খবর না দিলে আর—

কিন্তু দরকার ছিল রামকালীর মার দিক থেকে, তাই সব ঝঞ্ঝাট পুইয়ে ভাগ্নেকে আর ছেলেকে পাঠালেন জয়কালী। আর কদিন পরে তারা এসে জানাল খবর ঠিক। রামকালী নিঃসন্তান গোবিন্দ বদ্যির পুথি হয়ে রাজার হালে আছে, এর পর নাকি পাটনা যাবে। এদের কাছে বলেছে একেবারে রাজবন্দি হয়ে টাকার মোট নিয়ে দেশে যাবে, তার আগে নয়।

শুনে যাদের বেশী ঈর্ষা হল, তারা বলল, "এমন কুলাঙ্গার ছেলের মুখদর্শন করতে নেই। তা ছাড়া ও তো জাতিচ্যুত।"

যাদের একটু কম ঈর্ষা হল, তারা বলল, "তবু বলতে হবে উদ্যোগী পুরুষ! আর জাতিচ্যুতই বা হবে কেন? কুঞ্জ তো বলছে নাকি জেনে এসেছে গোবিন্দ গুপ্ত রামকালী চাটুযোর জন্যে কোন এক বামুনবাড়িতে ভাতের ব্যবস্থা করে রেখেছে।"

গ্রামে আবার কিছুদিন এই নিয়ে আলোচনা চলল। এবং যখন এসব আলোচনা ঝিমিয়ে গিয়ে ক্রমশ আবার সবাই রামকালীর নাম ভুলতে বসল, তখন একদিন রামকালী সশরীরে হাজির হল টাকার বস্তা নিয়ে।

গোবিন্দ গুপ্ত পরামর্শ দিয়েছেন, “তোমার আর রাজবন্দ্য হয়ে কাজ নেই বাপু, রাজ্যে এখন ভেতরে ভেতরে ঘুণ ধরতে বসেছে, নবাবের নবাবী তো শিকয়ে উঠেছে। আমার এই দীর্ঘকালের সঙ্গত অর্থরাশি নিয়ে দেশে পালিয়ে গিয়ে নিজে নবাবী করো গে। আমরা স্ত্রী-পুরুষ উভয়ে কাশীবাসে মনঃস্থির করেছি!”

অগত্যা চলে এসেছে রামকালী।

গঞ্জের ঘাট থেকে নিজের পালকি করে।

গোবিন্দ গুপ্তের পালকিটাও পেয়েছে রামকালী। নৌকায় চাপিয়ে নিয়ে এসেছে।

কিন্তু তখন জয়কালী মারা গেছেন এই এক মস্ত আপসোস।

বাবাকে একবার দেখাতে পারল না রামকালী, সেই তাড়িয়ে দেওয়া ছেলেটা মানুষ হয়ে ফিরল।

॥ দুই ॥



গঞ্জে মেলায় যেমন লোক দল বেঁধে ‘পাঁচপেয়ে গরু’ দেখতে ছোট্টে, তেমনি করে দেশের সমস্ত লোক আসতে লাগল রামকালীকে দেখতে। রামকালী মনে মনে বিব্রত হলেও সকলকে যথোচিত মান্য করল এবং ব্যয়োজ্যেষ্ঠ সকলকে একজোড়া করে ধুতি ও নগদ টাকা দিয়ে প্রণাম করল।

ঘরে ঘরে সবাই বলাবলি করতে লাগল, “উঃ, কী উঁচু নজরটাই হয়ে এসেছে!” অনেকে নিজের নিজের চিরদিন বাড়ি বসে থাকা ছেলেগুলোর দিকে তাকিয়ে তাকিয়ে নিঃশ্বাস ফেলল।

তবু কিছুদিন একটু জাতে-ঠেলা জাতে-ঠেলা হয়ে থাকতে হয়েছিল বৈকি রামকালীকে। বারবাড়িতে শুভ, খেত, বাড়ির ছোট্ট ছেলেপুলে দৈবাৎ কেউ রামকালীকে ছুঁয়ে ফেললে তাকে কাপড় ছাড়ানো হত। কিন্তু রামকালীই একদিন গ্রামকর্তাকে ডেকে সালিশ মানল।

এটা কেন হবে ?

একটি দিনের জন্যে সে বৈদ্যের অনুগ্রহ করে নি, এক দিনের জন্যে কোন অনাচার করে নি, শুধু শুধু পতিত হয়ে থাকতে হবে কেন আর ?

গ্রামকর্তার মাথা চুলকে হেঁ হেঁ করতে লাগলেন, স্পষ্ট কিছু বলতে পারলেন না। কারণ ছোঁড়াটা নাকি রাজবন্দ্য গোবিন্দ গুপ্তের সমস্ত বিদ্যে আর সমস্ত টাকা হাতিয়ে নিয়ে এসেছে।

তাছাড়া ছোঁড়ার হাতটা দরাজ।

কর্তাদের হেঁ হেঁ করার অবসরে রামকালী নিজের বক্তব্য ব্যক্ত করল, “দেখুন আমার গুরুব ওষুধ ডেকে কথা কয়। আমি তাঁর কিছু-কিঞ্চিৎ আশীর্বাদও তো পেয়েছি। সে বিদ্যে আমার জন্মভূমির, আমার পাড়াপড়শীর, আমার জাতি-গোত্রের কাজে লাগুক এই আমি চাই। তবে যদি আপনারা তা না চান, তা হলে আবার আমাকে গ্রামের বাস উঠিয়ে চলে যেতে হবে।”

এবার গ্রামকর্তারা হাঁ হাঁ করে উঠলেন। সত্যিই তো, কথাটা তো উড়িয়ে দেবার নয় ? সকলেরই একদিন না একদিন ‘নিদেনকাল’ আছে।

ওঁদের ‘হাঁ-হাঁ’র অবসরে রামকালী বললে, “এই যে একটি পুকুর কাটাবার ইচ্ছে হয়েছে, সেই উপলক্ষে ‘গ্রাম-ভোজন’ দেব আশা করে বসে আছি, সে আশা তা হলে পূরণ হবে না!”

এঁরা আবার দ্বিধাশূন্য হয়ে ‘সে কি ? সে কি ?’ করে উঠলেন।

আর ইতাবসরে ফেলু বাঁড়ুয়্যে এক চাল চেলে বসলেন। কি এক সংস্কৃত শ্লোক আউড়ে বললেন হেসে হেসে, “জানো তো, উপযুক্ত বয়সে বিবাহ-সংস্কার না হলে কন্যা যেমন অরক্ষণীয়া হয়, পুরুষও তেমনি পতিত হয়।”

রামকালী মাথা নীচু করে বললে, “বয়স প্রায় ত্রিশ পার হতে চলল, এ বয়সে কে আমাকে কন্যাদান করবে ?”

ফেলু বাঁড়ুয়্যে বীরদর্পে বলে উঠলেন, “আমি করব। এতে আমার ভায়েরা আমাকে জাতে ঠেলেন তো ঠেলুন।”

ফেলু বাঁড়ুয়্যেকে জাতে ঠেলা! জাতের যিনি মাথা!

‘হাঁ-হাঁ’র শ্রোত বইতে লাগল সভায়।

আর ফেলুর চালাকি দেখে মনে মনে সবাই নিজেদের গালে মুখে চড়াতে লাগল। মেয়ে আর কার ঘরে নেই!

এরই কিছুদিন পরে ফেলু বাঁড়ুয়োর ন’ বছরের মেয়ে ‘ভূবি’ বা ভুবনেশ্বরীর সঙ্গে বিয়ে হয়ে গেল রামকালীর।

বহুদিন এত ঘটনার বিয়ে হয় নি গ্রামে।

কারণ রামকালী নাকি নিজে পাঁচ-পাঁচটা টাকা লুকিয়ে ওর মা দীনতারিণীর হাতে গুঁজে দিয়েছিল ঘটা করতে।

এই বেহায়ামিটা যথেষ্ট নিন্দনীয় সন্দেহ নেই, কিন্তু ঘটনার ‘মাছমোত্তা’গুলো অনিন্দনীয় ছিল।

অতএব রামকালী পুনশ্চ সমাজে প্রতিষ্ঠিত হয়ে গেল। অনুমতি পেল বাড়ির মধ্যে গিয়ে খাবার শোবার।

যাক, তার পরও তো কাটল কতকাল।

সেই ‘ভূবি’ বড় হল, ঘর-বসত হল, পনোরো-ঘোলো বছরের ‘ভরা-নদী’ হল। তার পর তো সত্যবতী।

বুড়ো বয়সের প্রথম সন্তান বলেই হয়তো বাপের কাছে কিছু প্রশ্রয় আছে সত্যবতীর।

॥ তিন ॥



দীনতারিণী নিরামিষ ঘরে রান্না করছিলেন, সত্যবতী দাওয়ার নীচের ‘ছাঁচতলা’য় এসে দাঁড়াল। উঁচু পোতার ঘর। দাওয়ার কিনারাটা সত্যবতীর নাকের কাছাকাছি, পায়ের বুড়ো আঙুলের ওপর সমস্ত দেহভারটা দিয়ে ডিঙি মেরে গুলি বাড়িয়ে সত্যবতী তার স্বভাবসিদ্ধ মাজাগলায় ডাক দিল, “অ ঠাকুরমা, ঠাকুরমা!”

নিরামিষ হেঁসেলের দ্বাণ্ডায় ওঠবার অধিকার সত্যবতীর কেন, বাড়ির কারোরই নেই, কেবলমাত্র যাঁরা নিরামিষে অধিকারী তাঁদেরই আছে। মেটে দাওয়ার একশেষে কোণা থেকে ঝাঁজ কেটে সিঁড়ি বানানো হয়েছে, আর সে সিঁড়ি ঞ্কে পায় পায় এগিয়ে যাওয়া পথ হয়েছে একেবারে

‘ঘাট’ বরাবর। দীনতারিণী, দীনতারিণীর সৈজজা শিবজায়া, দীনতারিণীর দুই ননদ কাশীশ্বরী আর মোক্ষদা— মাত্র এঁরাই এই পথে পদক্ষেপের অধিকারিণী। ঘড়া নিয়ে ঘাটে যান এবং স্নান সেবের ঘড়া ভরে ভিজ্ঞে কাপড়ে পায় পায় এসে একেবারে ওই সিঁড়ি কটি দিয়ে স্বর্ণে উঠে পড়েন। ওই রান্নাঘরের দেওয়ালেই তাঁদের কাচাকাপড় ঝকোয়, কারণ রাত্রে তো আর এঘরে রান্নার পাট নেই। ঘর নিকোনোর কাজেও কিছু আর অছ্যুতরা কেউ এসে ঢুকবে না। সে কাজ মোক্ষদার। এঁটোসকড়ির ব্যাপারে মোক্ষদা বোধ করি স্বয়ং ভগবানকেও সম্পূর্ণ বিশ্বাস করতে পারেন না। কাজেই সে কাজ নিজের হাতে রাখেন। তা ছাড়া মোক্ষদাই বয়সে সব চেয়ে ছোট, অন্যান্যরা সকলেই তাঁর গুরুজন, অতএব সকলের খাওয়ার শেষে তাঁরই ‘ডিউটি’।

রান্নার দায়িত্ব দীনতারিণীর, মোক্ষদার ওপর সে রান্নার বিপুলতা রক্ষার দায়িত্ব। বাকি দু’জন ‘যোগাড়ে’। তা অবিশ্যি যোগাড়ের কাজটাও কম না। প্রয়োজনটা চারজনের হলেও আয়োজনটা অন্তত দশজনের মত হয়।

কিন্তু এসব কথা থাক।

আসলে ছেলেপুলের এ উঠোনে পা দেবারও হুকুম নেই, কিন্তু সত্যবতীকে কেউ এঁটে উঠতে পারে না। ও যখন তখন দাওয়ার নিচে থেকে নাক বাড়িয়ে হাঁক পাড়ে, “অ-ঠাকুরমা” অথবা “অ-পিসঠাকুরমা!”

দীনতারিণী ওর গলা পেয়েই নিজের গলাটা বাড়িয়ে দরজা দিয়ে উঁকি মেরে বলেন, “এই মলো যা, এ ছুঁড়ি কি দস্যি গো! আবার এসেছিস? বেরো বেরো, ছোটঠাকুরঝি দেখতে পেলে আর রক্ষে রাখবে না!”

সত্যবতী ঠোট উল্টে বলে, “ছোটঠাকুরমার কথা বাদ দাও। তুমি শোন না একটু!”

সত্যবতী দীনতারিণীর “উপায়ী” ছেলের মেয়ে, তা ছাড়া সত্যর বিয়ে হয়ে গেছে, কাজেই খুব ‘দূর-ছাইটা’ ওর কপালে জোটে না। তাই ওর আবদারে অগত্যই দীনতারিণী একটু ডিঙি মেরে দাওয়ায় এসে দাঁড়ালেন। ইশারায় বললেন, “কি চাই?”

সত্যবতী পিঠের দিকে গোটানো হাতটা ঘুরিয়ে একখানা ছোট মাপের কচি মানপাতা মেলে ধরে চুপি চুপি বলে “একটা জিনিস দাও না!”

“এই মরেছে, এখন আবার জিনিস কি রে ? এখন কি কিছু রান্না হয়েছে ? আর হলেও তোর সেজঠাকুরমার ‘গোপালে’র ভোগের আগু আগে দিয়েছি, টের পেলে কুরুক্ষেত্র করবে না ?”

“আগু চাই নি, আগু চাই নি, ভালমন্দ রেন্ধে নিজেরাই খেয়ো বাবা, আমাকে একমুঠো পান্তাভাত দাও দিকি!”

“পান্তাভাত ?”

দীনতারিণী আকাশ থেকে পড়লেন। আর সঙ্গে সঙ্গে যেন পাতাল ফুঁড়ে উঠলেন মোক্ষদা। রনে সপসপে ভিজে থান, কাঁখে ভরন্ত কলসী।

এইটা বোধ করি মোক্ষদার তৃতীয় দফা স্নান।

যে কোন কারণেই হোক, চাল ধুতে কি শাক ধুতে ঘাটে গেলেই মোক্ষদা একবার সবস্ত্র স্নান সেরে নেন। দাওয়ার পৈঠে দিয়ে কখন যে উঠে এসেছেন, ঠাকুরমা নাতনী কারো চোখে পড়ে নি, চোখ পড়লো একেবারে সশরীরিণীর উপর।

দীনতারিণী অপ্রতিভের একশেষ, সত্যবতী বিরক্ত।

আর মোক্ষদা ?

তিনি হাতেনাতে চোর ধরে ফেলা ডিটেকটিভের মতই উল্লসিত।

“আবার তুই এখনে!” খনখনে গলায় প্রশ্ন করেন মোক্ষদা।

সত্যবতী দ্বিধা আমতা আমতা করে বলে, “বাঃ রে, আমি কি তোমাদের দাওয়ায় উঠেছি ?”

“দাওয়ায় উঠিস নি, বলি সর্কড়ি রাস্তা মাড়িয়ে এসে সেই পায়ে ওই উঠানে তো পা দিয়েছিস! তুলসী গাছে জল দিতে উঠানে নামতে হবে না আমাদের ?”

সত্যবতী গৌজ গৌজ করে বলে, “নামবার সময় জে দশঘড়া জল না ঢেলে নামো না, তবে আবার অত কি ?”

“মুখে মুখে চোপা করিসনে সত্য, অব্যাস ভাল কর”, মোক্ষদা ঘড়াটাকে দুম করে রান্নাঘরের চৌকাঠের ওপাঠে বসিয়ে আঁচল নিংড়ে নিংড়ে পায়ের কাদা ধুতে ধুতে বলেন, “বাপের সোহাগে যে একেবারে খিন্দী পদ পেয়ে বসে আছিস, বলি সর্কড়ি রাস্তা মাড়িয়ে এসে সেই পায়ে ওই উঠানে তো পা দিয়েছিস! আর কদিন খিন্দীনাচ নেচে বেড়াবি ? মেয়ে ফেটে আর দুটো-চারটে বছর, তা’পর গলায় রসুড়ি দিয়ে টেনে নিয়ে যাবে না ? তখন করবি কি?”

প্রতি কথায় এই ‘পরের ঘরে’ যাওয়ার বিভীষিকা দেখিয়ে দেখিয়ে জন্ম করার চেষ্টাটা দু-চক্ষের বিষ সত্যবতীর। বরং তাকে ওরা ধরে দু-খা মারুক, সহ্য হবে। কিন্তু ওই পরের ঘরের খোঁটা সয় না। অথচ ওইটাই যেন এদের প্রধান ব্রহ্মাণ্ড। সত্যবতী তাই বিরক্তভাবে বলে, “করবো আবার কি!”

“কি আর করবি ? উঠতে বসতে শাউড়ীর ঠোনা খাবি। ওই পটলা ঘোষালের ভাইপো-বৌটার মতন ঠোনা খেতে খেতে গালে কালসিটে পড়ে যাবে।”

সত্যবতী বয়েস-ছাড়া ভঙ্গীতে ঝঙ্কার দিয়ে বলে ওঠে, “ছিষ্টি সংসারের লোক তো আর পটলকাকার ভেজের মতন দজ্জাল নয়!”

“ওমা ওমা, শোন কথা মেয়ের”, মোক্ষদা হস্তেলের রং নিটোল টাইট হাত দু’খানা নেড়ে বললেন, “তা বলবি বৈকি! বো’ব দোষ হলো না, দোষ হলো শাউড়ীর। অব্যাস চোপাবাজ বোকে কি করবে শুনি ? টাটে বসিয়ে ফুল-চন্দন দিয়ে পূজো করবে ?”

“আহা পূজো করা ছাড়া আর কথা নেই যেন! একটু ভাল চোখে চাইতে পারে না! দুটো মিষ্টি কথা বলতে পারে না!”

“ও মাগো!” মোক্ষদা খনখনে গলায় হেসে উঠে বলেন, “ভেতরে ভেতরে মেয়ে পাকার ধাড়ি হয়েছে! দেখবো লো দেখবো, ভোর শাউড়ী কি মধুঢালা কথা কইবে! কত সোনার চক্ষে দেখবে!... সে যাক, বলি পান্তাভাতের কথা কি বলছিলি ?

এতক্ষণ চুপ ছিলেন, এবারে দীনতারিণী হাসেন।

হেসে ফেলে বলেন, “ও আমার কাছে এসেছে পান্তাভাত চাইতে।”

“পান্তাভাত চাইতে এসেছে!” মোক্ষদা সহসা যেন ফেটে পড়েন, “আমাদের হেঁসেলে পান্তা চাইছে, আর তুমি সেই গুনে গা পাতলা করে হাসছ নতুন মেজাবৌ ? আর কত অহ্লাদ দেবে নাতনীকে ? পরকাল যে ঝরঝরে হয়ে যাচ্ছে! বলি শ্বশুরবাড়ি গিয়ে যদি বিধবার হেঁসেল থেকে দুটো পান্তা চেয়ে বসে, তারা বলবে কি ? একথা ভাববে না যে, আমরা বুঝি গপগপ করে বাসিহাড়ির ভাতগুলো গিলি! বলো বলবে কি না ?”

“তাই কখনো কেউ বলে ছোটঠাকুরঝি!” দীনতারিণী কথাটা হাল্কা করতে একটু কাষ্টহাসি হেসে বলেন, “ছেলে-বুদ্ধি অজ্ঞানে কি না বলে!”

“ছেলে-বুদ্ধি! ও মা লো! সোয়ামীর ঘর করতে পাঠালে ও এখন ছেলের মা হতে পারে, বুঝলে নতুন মেজবৌ!” মোক্ষদা কাঁধ থেকে গামছাখানা নিয়ে জোরে জোরে ঝাড়তে ঝাড়তে বলে, “মেয়ের বাক্য-বুলি শোন না তো কান দিয়ে? সোহাগেই অন্ধ! এই তোকে সাবধান করে দিচ্ছি সত্য, খবরদার পাঁচজনের সামনে এমনি বেকাঁস কথা বলে বসবি না! পাড়াপড়শী উনুনমুখীরা তো মজা দেখতেই আছে, এমন কথাটা শুনলে ঠিক বলবে আমরা বাসি হাঁড়িতে খাই!”

হঠাৎ হি-হি করে হেসে ওঠে সত্যবতী, হেসে বলে, “লোকে বললেই বা! বললে কি তোমার গায়ে ফোকা পড়বে!”

মোক্ষদা নেহাৎ মেয়েটাকে ছুঁতে পারবেন না, তাই নিজের গালেই একটা চড় মেরে বলেন, “শুনলে নতুন মেজবৌ, তোমার নাতনীর আস্পন্দার কথা? বলে কি না ‘লোকে বললেই বা! ডাক শাস্তরের কথা, ‘যাকে বললো ছি, তার রইলো কি?’ আর বলে কি না—”

সেরেছে!

দীনতারিণী ভাবেন মোক্ষদা একবার মুখ ধরলে তো আর রক্ষে নেই! দুর্দান্ত স্বাস্থ্য মোক্ষদার, দুবস্ত ক্ষিদে-তেষ্ঠা, সেই ক্ষিদে-তেষ্ঠা চেপে রেখে তিন পহর বেলায় জল খায়, বেলা গড়িয়ে অপরাহ্ন বেলায় ভাত, সকালের দিকে শরীরের মধ্যে ওর খাঁ খাঁ ঝাঁ ঝাঁ করতে থাকে। তাই কথার চোটে থরহরি করে ছাড়়ে সবাইকে।

প্রসঙ্গটা তাই তাড়াতাড়ি পরিবর্তন করেন দীনতারিণী, “হ্যাঁ লা সত্য, সকালবেলা জলপান খাস নি? অসময়ে এখন পান্ডাপান্ডের খৌজ?”

“আহা কী বুদ্ধির ছিরি!” সত্য বেঁজে ওঠে, “আমি যেন খাবো! কেঁচো আর পান্ডাভাত দিয়ে টোপ ফেলবো!”

“কি করবি?” দীনতারিণীর আগেই মোক্ষদা দুই চোখ কপালে তোলেন, “কি করবি?”

“টোপ ফেলবো, টোপ! মাছের টোপ! পেয়েছ শুনে? নেড় আমায় কঞ্চি চেঁচে খু-ব ভালো একটা ছিপ করে দিয়েছে, ঝিড়িকির পুকুরে মাছ ধরবে।”

“সত্য!” মোক্ষদা যেন ছিটপিটিয়ে ওঠেন, “ছিপ ফেলে মাছ ধরবি তুই? খুব নয় বাপসোহাগী আছিস, তাই বলে কি সাপের পাঁচপা দেখেছিস? মেয়েমানুষ ছিপ ফেলে মাছ ধরবি?”

সত্য ঝাঁকড়া চুলে মাথা ঝাঁকিয়ে বলে, “আহা! ছোটঠাকুরঝি কী বাক্যের ছিরি! মেয়েমানুষ মাছ ধরে না? রাজা খুড়িমারা ধরে না? ও বাড়ির পিসিরা ধরে না?”

“আ মরণ মুখপোড়া মেয়ে! ওরা ছিপ ফেলে মাছ ধরে? ওরা তো গামছা হাঁকা দিয়ে চুনোপুঁটি তোলে!”

“তাতে কি!” সত্য হাতের মানপাতাখানা দাওয়ার গায়ে আছড়াতে বলে, “গামছা দিয়ে ধরলে দোষ হয় না, ছিপ দিয়ে ধরলেই দোষ! চুনোপুঁটি ধরলে দোষ হয় না, বড় মাছ ধরলেই দোষ! তোমাদের এসব শাস্তর কে লিখেছে গা?”

“সত্য!” দীনতারিণী কড়া স্বরে বলেন, “একফোঁটা মেয়ে, অত বাক্য কেন লা? ঠিক বলেছে ছোটঠাকুরঝি, পরের ঘরে গিয়ে হাড়ির হাল হবে এর পর!”

“বাবা বাবা! দুটো পান্ডা চাইতে এসে কী খোয়ার! যাচ্ছি আমি আঁশ হেঁসেলের ওদের কাছে। যাবো কি? সেখানে তো আবার বড় জেঠি! গুলি ভাঁটার মতন চাউনি! খেঁদীদের বাড়ি থেকে নিলেই হত তার চেয়ে!”

“কি বললি! খেঁদীদের বাড়ি থেকে ভাত? কায়েত-বাড়ির ভাত নিয়ে ঘাঁটবি তুই?”

“খোঁটেছি নাকি? বাবা! বাবা! ফি হাত তোমাদের খালি দোষ আর দোষ! আচ্ছা যাচ্ছি আমি ও হেঁসেলেই। কিন্তু যখন ইয়াবড় মাছ ধরবো তখন দেখো।”

বলে সত্য আছড়ানোর চোটে চিরে চিরে যাওয়া মানপাতাটা হাত থেকে ছুঁড়ে ফেলে দিয়ে চলে যায় দাওয়ার কোণ-বরাবর ধরে ও মহলে।

সেখানে বিরাট এক কর্মকাণ্ড চলেছে অহরহ। দিনে দু'বেলায় দুশো আড়াইশো পাত পরে।

সেখানেও এমনিই উঁচুপাতার রান্নাঘর, তবে দাওয়ায় উঠতে তেমন বাধা নেই। বেপরোয়া উঠে গেল সত্য। আর এদিক ওদিক তাকিয়ে দাওয়ার কোণ থেকে একখানা খালি নারকেলের মালা কুড়িয়ে নিয়ে রন্ধনশালায় দরজার সামনে এসে দাঁড়িয়ে সাহসে ভর করে ডাকলো, “বড় জেঠি!”



সারাদিন গুমোটের পর হঠাৎ একচিলতে ঠাণ্ডা হাওয়া উঠল। গা জুড়িয়ে এল, কিন্তু প্রাণে জাগছে আতঙ্ক। সময়টা খারাপ, চৈত্রের শেষ। ঈশাণ-কোণে মেঘ জমেছে, তার কাণ্ডা ছায়া আধখানা আকাশকে যেন ঘোমটা পরিয়ে দিল। যেন একটা দূরস্ত দৈত্য হঠাৎ পৃথিবীর ওপর ঝাঁপিয়ে পড়বার আগের মুহূর্তে পায়তাতাড়া কষছে।

মাঠের ঘাটে পথে পুকুরের যে যেখানে বাইরে ছিল, তারা ঘন ঘন আকাশের দিকে তাকাতে তাকাতে হাতের কাজ চটপট সারতে শুরু করল।

আর বাতাসে বাতাসে তরঙ্গ তুলে গ্রামের এ-প্রান্ত থেকে ও-প্রান্ত অবধি ছড়িয়ে পড়ল একটানা একটা সানুনাসিক স্বরের ধূয়ো। সে স্বর ধাপে ধাপে চড়ছে, মাঝে মাঝে খান্দে নামছে। তার ভাষাটা এই “সুধী আঁ-য়! সুন্দরী আঁ-য়! মুংলী আঁ-য়! লক্ষ্মী আঁয়!”

ঝড়ের আশঙ্কায় গৃহপালিত অবোলা জীবগুলিকে গোচারণ ভূমি থেকে গোহালে ফেরার আহ্বান জানানো হচ্ছে।

সত্যবতী জানে না ঝড়ের আগের মুহূর্তে কিংবা সন্ধ্যার আগে গরুগুলোকে যখন ডাক দেওয়া হয়, তখন নাকিসুরে ডাকা হয় কেন ও জানে এই নিয়ম। অবিশ্যি যারা ডাকে, তারা নিজেরাই বা আট বছরের সত্যবতীর চাইতে বেশী কি জানে? তারাও জ্ঞানাবধি দেখে আসছে গরুকে সাঁঝ-সন্ধ্যায় ঘরে ফিরিয়ে আনবার সময় আকাশ-বাতাস কাঁপিয়ে যে আহ্বানটা জানানো হয়, সেটার সুর সানুনাসিক। কে জানে কোন কালে কোন বেরপ্রাণ্ড গরু মানুষের ভাষা শিখে ফেলে, মানুষের কাছে তার পছন্দ-অপছন্দ নমুনাটা জানিয়েছে কিনা। বলেছে কিনা “এই সানুনাসিক স্বরটাই আমার রুচিকর।”

আপাতত দেখা যাচ্ছে এই অবোলা জীবগুলি এ-প্রান্ত ও-প্রান্ত ধূয়োতে সচকিত হয়ে দ্রুতগতিতে গোহালমুখী হচ্ছে। তারাও গলা তুলে আকাশটিকে দেখে নিচ্ছে একবার একবার।

সত্যবতী একটা সংবাদ বহন করে দ্রুতগতিতে বাঁড়ঘো-পাড়া থেকে বাড়ির দিকে আসছিল, তবু আশেপাশে ধূয়ো শুনে অভ্যাসবশে গলার সুর চড়িয়ে হাঁক পাড়ল, “শ্যামলী আঁ-য়! ধবলী আঁ-য়!”

আমবাগানের গুদিক দিয়ে রামকালী ফিরছিলেন রায়পাড়া থেকে পায়ে হেঁটে।

পালকিটি ধার দিয়ে আসতে হয়েছে রায়পাড়ায়।

গ্রাম-বৃদ্ধ রায়মহাশয়ের অবস্থা খারাপ, খবর পেতে নাড়ী দেখতে গিয়েছিলেন রামকালী। নাড়ীর অবস্থা দেখে গঙ্গাযাত্রার ব্যবস্থা দিলেন, আর ব্যবস্থা দিয়েই পড়লেন বিপাকে।

রায়মহাশয়ের ছেলেরা দুজনেই গত হয়েছে, আছে তিন নাতি কিন্তু তাদের এমন সঙ্গতি নেই যে পালকিভাড়া দিয়ে আর চারটে বেহারাকে মজুরি জলপানি দিয়ে ঠাকুরদার গঙ্গাযাত্রা করাবে। অথচ অমন নিষ্ঠাবান সদাচারী প্রাচীন মানুষটা ঘরে পড়ে মরবে? এটাই বা চোখে দেখে সহ্য করা যায় কি করে? আর গেলে ত্রিবেণীর গঙ্গাই উত্তম। ‘গঙ্গাযাত্রা’র ঘোষণা শুনেই রায়মহাশয়ের নাতিরা যেই মুখ চাওয়া-চাওয়ি করল, সঙ্গে সঙ্গেই বলতে হল রামকালীকে, “পালকির জন্যে চিন্তা ক’রো না, আমার পালকিতেই যাবেন রায় কাকা।”

নাতিরা অস্ফুটে একবার বলল, “আপনাকে রোগী দেখতে দূরে দূরে যেতে হয়, পালকিটা দিলে—”

রামকালী গঞ্জীর হাস্যে বললেন, “তবে নয় ঠাকুরদাকে কাঁধে করেই নিয়ে যাও! তিন নাতি রয়েচ উপযুক্ত!”

বয়োজ্যেষ্ঠর পরিহাসবাক্যে হেসে ফেলবে এমন বেয়াদপির কথা অবশ্য ভাবাই যায় না, কাজেকাজেই তিনজনে ঘাড় চুলকোতে লাগল। আর ওরই মধ্যে যে বড়, সে সাহসে ভর করে বলল, “ভাবছিলাম গো-গাড়ি করে—”

“ভাবটা খুব উচিত হয় নি বাপু!” রামকালী বলেন, “গো-বাড়ি চড়িয়ে নিয়ে গেলে ওই বিরেনকই বছরের জীর্ণ ঝাঁচাখানা কি আর প্রাণপাখি সমেত গঙ্গা পর্যন্ত পৌছবে? পাখি ঝাঁচাছাড়া হয়ে উড়ে যাবে। আমিও ওঁর সন্তানতুল্য বাপু, তোমাদের সন্ধ্যাচ করবার কিছু নেই। তাছাড়া চটপট ব্যবস্থার দরকার, কখন কি হয় বলা যায় না।”

রায়মশাইয়ের ঘোলাটে চোখ দুটো থেকে দু'ফোঁটা জল গড়িয়ে পড়ল। তিনি শিরাবহুল ডানহাতখানা আশীর্বাদের ভঙ্গীতে তুলে বললেন, “জয়ন্তু।”

বাইরে এসে রামকালী পালকিবেহারা কটাকে নির্দেশ দিলেন, “পালকিটা আর মিথ্যে বয়ে নিয়ে যাবি কেন, ওটা এখানেই থাক, তোরা বাড়ি গিয়ে খেয়ে-দেয়ে নে গে। শেষ রাতে উঠে চলে আসবি। আর দেখ, বাড়ি থেকে কালকের সারাদিনের মতন জলপান নিয়ে আসবি, বুঝলি ? আর শোন, তোরা এখন এখানে কিছু কাজকর্মের প্রয়োজন আছে কিনা দেখ। আমি বাড়ি ফিরছি।”

জোর পায়েই ফিরছিলেন রামকালী, কারণ বেরিয়েই দেখেছিলেন ঈশাণ কোণে মেঘ। পালকি চড়ে রুগ্নী দেখতে যান বলে যে রামকালী হাঁটতে অনভ্যস্ত তা নয়। প্রতিদিন ব্রাহ্মমূহুর্তে উঠে, প্রাতঃকৃত্য সেরে ক্রোশ-দুই হেঁটে আসা তাঁর নিত্যকর্মের প্রথম কর্ম। তবে হ্যাঁ, রোগীর বাড়ি যাওয়ার কথা আলাদা, সেখানে মান-মর্যাদার প্রশ্ন।

পথ সংক্ষেপের জন্য বাগানের পথ ধরেছিলেন, কিন্তু আমবাগানের কাছবরাবর আসতেই ঝরাপাতা আর ধুলোর ঝড় উঠল। রামকালী তাড়াতাড়ি বাগানের মাঝামাঝি থেকে বেরিয়ে কিনারায় এলেন, আর আসতে না আসতেই থমকে দাঁড়িয়ে পড়লেন। গলা কার ?

সত্যর না ?

হ্যাঁ, সত্যরই তো মনে হচ্ছে।

যদিও ঝড়ের সোঁ সোঁ শব্দের বিপরীতে শব্দটা হওয়ায় বুঝতে সামান্য সময় লেগেছিল, কিন্তু সে সামান্যই। তা ছাড়া গরু দুটোর নামও পরিচিত। শ্যামলী ধবলী রামকালীর বাড়িরই গরু। গরু অবিশ্যি চাটুয্যেদের একগোহাল আছে, কিন্তু এই গরু দুটি বিশেষ সুলক্ষণযুক্ত বলে রামকালীর বড়ই প্রিয়। সময় পেলেই রামকালী নিজে হাতে ওদের মুখে ঘাস ধরে দেন, গায়ে হাত বুলোন। বাড়ির কুমারী মেয়েরা শ্যামলী ধবলীকে নিয়েই “গোকাল ব্রত” করে মোক্ষদা তাদের কাছ থেকে সংগৃহীত গোময় দ্বারাই সম্যক বিশুদ্ধতা রক্ষা করে চলে।

কান খাড়া করে ধ্বনির মূল উৎসের দিকটা অনুমান করে নিলেন রামকালী, তারপর দ্রুতপায়ে এগিয়ে গিয়ে ধরে ফেললেন কন্যাকে। সত্যবতী তখন ধুলোর আঁচটে থেকে চোখ রক্ষা করতে আঁচলের কোণটা দু'হাতে মুখের সামনে তুলে ধরে ছুটছিল।

“যাচ্ছিস কোথায় ?”

জলদগম্বীর স্বরে হাঁক দিলেন রামকালী।

সত্যবতী চমকে মুখের ঢাকা খুলে।

যদিও সকলেই সত্যবতীকে ‘বাপ-সোহাগী’ আখ্যা দেয় এবং সত্যিই সত্যবতী রামকালীর বিশেষ আদরিণী,—তা ছাড়া পয়মস্ত মেয়ে বলে রামকালী মনে মনে বেশ একটু সমীহও করেন তাকে, তাই বলে সামনাসামনি যে কোন আদর-আদিখ্যেতার পাট আছে তা নয়। কাজেই বাবার গলা শুনেই সত্যবতীর ‘হয়ে গেছে’!

রামকালী আর একবার প্রশ্ন করেন, “এমন সময়ে একা গিয়েছিলি কোথায় ?”

সত্যবতী ক্ষীণ কণ্ঠে বলে, “সেজপিসীর বাড়ি।”

সত্যবতী যাকে সেজপিসী আখ্যা দিল তিনি হচ্ছেন রামকালীর খুড়তুতো বোন, এ গ্রামেই স্বতন্ত্রবাড়ি। এ গ্রামেই বাস।

রামকালী ভুরু কঁচকে বলেন, “অত দূরে আবার একা একা যাবার দরকার কি ? সঙ্গে কেউ নেই কেন ?”

এইজন্যই সত্যবতীর ‘বাপসোহাগী’ আখ্যা।

চড় নয়, চাপড় নয়, নিদেন একটা কানমলাও নয়। শুধু একটু কেফিয়ত তলব।

সত্যবতী এবার সাহস পেয়ে বলে, “না একা কেন, পুণ্ডিয়াপিসি আর নেড়ু ছিল। তারপর আমি তোমাকে ডাকতে ছুটতে ছুটতে আসছি।”

“আমাকে ডাকতে ছুটতে ছুটতে আসছিস ?” রামকালী ভুরু কঁচকে বলেন, “কেন ? আমায় কি দরকার ?”

সত্যবতী এবার পূর্ণ সাহসে ডর করে সোৎসাহে বলে, “জটাদার বৌ যে মর-মর। নাড়ী ছেড়ে গেছে। তাই সেজপিসী কেঁদে বললে, ‘যা সত্য, একবার মেজদাকে ডেকে নিয়ে আয়, যেখানে পাস।’ তা আমি রায়পাড়া গিয়ে শুনলাম তুমি এই মাস্তুর চলে এসেছ!”

“আবার রায়পাড়াও গিচ্ছিলি! নাঃ, বিপদ করলে দেখছি। জটার বৌয়ের আবার হঠাৎ কি হল যে নাড়ী ছেড়ে যাচ্ছে ?”

“যাচ্ছে কি বাবা”, সত্য আরও উৎসাহ সহকারে বলে, “গেছে। সেজপিসী চোঁচাচ্ছে, বুক চাপড়াচ্ছে আর বালিশ বিছানা সরিয়ে নিচ্ছে।”

“আঃ কি যে বলে! চল দেখি গে।” রামকালী বলেন, “ঝড় উঠে পড়ল, এখুনি বিষ্টি আসবে, কি মুশকিল! হয়েছিল কি?”

“কিছু নয়। সেজপিসী বললে, রান্নাবান্না সেরে যেই খেতে বসেছে জটাাদার বৌ, আর অমনি জটাাদা পান চেয়েছে! জটাাদার বৌ বলেছে, ‘পান ফুরিয়ে গেছে’, ব্যস বাবু মহারাজের রাগ হয়ে গেছে। দিয়েছেন ঠাই ঠাই করে পিঠের ওপর লাখি। আর অমনি জটা-বৌঠান কাঁসিতে মুখ খুবড়ে—” হঠাৎ খুক খুক করে হেসে ওঠে সত্যবতী।

“হাসছিস যে!”

ধমকে উঠলেন রামকালী। বিরক্ত হলেন। কী অসভ্য হচ্ছে মেয়েটা! হাসির কি সময় অসময় নেই? বললেন, “মানুষ মরছে দেখে হাসতে হয়? এই শিক্ষাদীক্ষা হচ্ছে?”

সত্যবতী নিতান্তই হেসে ফেলেছিল, এখন বাপের ধমকে সামলে নিয়ে মুখটা ম্লান করবার চেষ্টা করে বলে, “সেজপিসী বলছিল যেই না ধাক্কা খাওয়া অমনি কুমড়ো গড়াগড়ি হয়ে দাওয়া থেকে উঠোনে পড়ে গেল!” কষ্টে হাসি চেপে ফের বলে সত্যবতী, “জটাাদার বৌ অনেক ভাত খায় না বাবা! তাই অত মোটা!”

“আঃ!” বলে বিরক্তি প্রকাশ করে তাড়াতাড়ি এগোতে থাকেন রামকালী।

সত্যবতীও হাঁটায় কিছ কম দড় নয়। বাপের সঙ্গে সমানই এগোতে থাকে।

রামকালী জটার বৌয়ের জন্য সহানুভূতিতে যতটা না হোক, জটার ব্যবহারে মনে মনে অভ্যস্ত বিরক্তি বোধ করেন। হতাভাগা বামনের ঘরের গরু, পেটে ‘ক’ অক্ষরের আঁচড় নেই, গাঁজা-গুলি সবতেই ওস্তাদ। আবার বংশছাড়া বিদ্যে হয়েছে, বৌ-ঠেঙানো! ‘জটা’ ফটা’র বাপ তো অমন ছিল না! বরং রামকালীর গুণবতী বোনই লোকটাকে সারাজীবন জ্বালিয়ে পুড়িয়ে খেয়েছেন!

কে জানে কী কী ভাবে বেটকরে লেগেছে, সত্যিই যদি মরে-টরে যায়, দত্তুরমত ফ্যাসাদে পড়তে হবে।

সত্যবতীর কথা ভুলে গিয়ে আরও জেরে পা চালান রামকালী। সত্যবতী এবার দৌড়তে শুরু করে। হেরে যাবে না সে।

চোখ কপালে উঠে স্থির হয়ে গেছে, মুখে ফেনা ভেসে সে ফেনা শুকিয়ে উঠেছে। হাত পা ঠাণ্ডা পাথর।

সন্দেহ আর নেই, সমস্ত লক্ষণই স্পষ্ট। ভুলসীতলায় শুইয়ে দেওয়া হয়েছে ইতিমধ্যেই। অবশ্য কষ্ট করে আর ঘর থেকে বয়ে আনতে হয় নি, লাখি খেয়ে গড়িয়ে তো উঠোনেই পড়েছিল ভুলসীতলার কাছবরাবর। দণ্ডখানেকের মধ্যেই বেতারবার্তায় সারা পাড়ায় সংবাদ রটে গেছে এবং পাড়া ঝাঁটিয়ে মহিলাবৃন্দ এসে জড়ো হয়েছেন, আসন্ন ঝড়ের আশঙ্কা তুচ্ছ করে।

ব্যাপারটা তো কম রংদার নয়, দৈনন্দিন বৈচিত্র্যশূন্য জীবননাট্যের মধ্যে এমন একটা জোরালো দৃশ্য দর্শনের সৌভাগ্য জীবনে কবার আসে?

প্রথমে সমস্ত জনতার মধ্যে উঠল একটা চাপা উত্তেজনার আলোড়ন, “জটা নাকি বৌটাকে একেবারে শেষ করে ফেলেছে!” তারপর ‘হায় হায়’। জটা সম্পর্কে মন্তব্যগুলিও এখন আর জটার মার কান বাঁচিয়ে হচ্ছে না। কারণ স্পষ্ট কথা বলে নেবার মত এ-হেন সুযোগই বা কার জীবনে কবার আসে?

“সত্যি শেষ হয়ে গেছে? ছি ছি ছি, কী খুনে দসি়া ছেলে গো!” “ধন্য সন্তান পেটে ধরেছিল মাগী! আচ্ছ জটাটাই বা এত পোঁয়ার হল কোথা থেকে? ওদের বাপ তো ভালমানুষ ছিল!” ... “হল কোথেকে? তুমি আর জ্বালিও না ঠাকুরবি, বলি গর্ভধারিণীটি কেমন? এ হচ্ছে খালের গুণ!” “আহা হাবাগোবা নিপাট ভাল মানুষ বৌটা, মা-বাপের বাছা, বেঘোরে প্রাণটা গেল!” এমন নানাবিধ আলোচনা চলতে থাকে। একটা মেয়েমানুষের জন্যে, এর চাইতে আর কত বেশী দরদ আশা করা যায়?

প্রতিবেশিনীদের আক্ষেপোক্তিগুলো নীরবে হজম করতে বাধ্য হচ্ছিলেন জটার মা, কারণ আজ তিনি বড় বেকায়দায় পড়ে গেছেন। তাই সমস্ত মন্তব্য চাপা পড়ে যায় এমন সুরে মড়াকান্নাটা জুড়ে দেন তিনি, বুক চাপড়ে চাপড়ে মর্মভেদী রুদয়বিদারক ভাষায় ইনিয়ে বিনিয়ে।

বাড়ির কাছাকাছি আসতে না আসতেই শুনতেই পেলেন রামকালী খুড়তুতো ছোটবোনের সেই পাজরভাঙা শোকগাথা, “ওরে আমার ঘরের লক্ষ্মী ঘর ছেড়ে আজ কোথায় গেল রে! ওরে সোনার পিতিমেকে বিসর্জন দিয়ে আমি কোন্ প্রাণে ফের সংসার করব রে! ওরে জটা, তোর যে নগরে না উঠতেই বাজারে আগুন লাগল রে!”

সত্যবতী বলে উঠল, “যাঃ, সর্বনাশ হয়ে গেল!”

দ্রুত পদক্ষেপটা হঠাৎ স্তিমিত হল, ভুরুটা একবার কুঁচকোলেন রামকালী। যাক তা হলে হয়েছে গেছে! তবে আর তিনি গিয়ে কি করবেন? এখন জটা হতভাগার কপালে কত দুর্গতি আছে, কে জানে!

হঠাৎ ভয়ানক বকমের একটা চিৎকার উঠল, বোধ করি ফিনিশিং টাচ। “ওরে বাবা রে, আমার কী সর্বনাশ হল রে! কী রাজের রাজা বৌ এনেছিলাম রে!”

রামকালী পায়ে পায়ে এগোতে এগোতে সহসা দরজার কাছাকাছি এসেই ঘুরে দাঁড়িয়ে বললেন, “যাক, সত্যিই শেষ হয়ে গেছে তা হলে! সত্য তুই বাড়ি যা।”

সত্যবতী কাঠ!

“বাড়ি! একলা?”

“কেন একলা কেন, নেড়ু আর পুণ্য এসেছিল বললি না?”

সত্যবতী ভয়ে ভয়ে বলে, “এসেছিল তো, আর কি এখন যাবে তারা?”

“যাবে না? যাবে না মানে? ওদের ঘাড় যাবে! দেখ কোথায় আছে। আমাকে তো আবার এদের এদিক দেখতে হবে।”

কৈফিয়ত দিয়ে কথা রামকালী কদাচ কাউকে বলেন না, কিন্তু সত্যর কাছে সামান্য একটু সহজ রামকালী।

সত্যবতী গুটি গুটি এগিয়ে একবার পিসীর উঠানের ভিত্তর গিয়ে দাঁড়ায়, এদিক ওদিক তাকিয়ে নেড়ু পুণ্য কারও দেখা না পেয়ে ফিরে এসে ম্লান মুখে বললো, “ওদের কাউকে দেখতে পাচ্ছি না!”

“কেন, গেল কোথায় সব?”

“কি জানি!” সত্য আস্তে আস্তে সাহসে ডর ফিরে প্রাণের কথাটা বলে ফেলে, “বাবা, তুমি তো মরা বাঁচাতে পার!”

“মরা বাঁচাতে? দূর পাগলী!”

সত্য ম্রিয়মাণ ভাবে বলে, “তবে মেলাকে বলে!”

“লোকে বলে? কি বলে?” অন্যমনস্ক ভাবে মেয়ের কথার জবাব দিয়ে রামকালী এদিক ওদিক তাকাতে থাকেন, যদি একটা বেটাছেলের মুখ চোখে পড়ে। এসে যখন পড়েছেন তিনি, দায়িত্ব এড়িয়ে চলে যেতে তো পারেন না। জটাদের তেমন বাঁশঝাড় না থাক, রামকালীর বাগান থেকেই বাঁশ কেটে আনতে হুকুম দেবেন। কিন্তু কই? কে কোথায়? বাড়ির ভিতর থেকে সুর উঠছে নানা রকম, বাইরেটা শূন্য স্তব্ধ!

ভালর মধ্যে আকাশটা য় হঠাৎ মেঘ উড়ে গিয়ে দিব্যি পরিষ্কার হয়ে উঠেছে, আর বোঝা যাচ্ছে সন্ধ্যার এখনো দেরি আছে।

হঠাৎ সত্যবতী একটা অসমসাহসিক কাণ্ড করে বসে, বাপের একখানা হাত দু হাতে চেপে ধরে রুদ্ধকণ্ঠে বলে ওঠে, “বলে যে কবরেজ মশাই মরা বাঁচাতে পারেন! দাও না বাবা একটুখানি ওষুধ জটাদার বৌকে!”

রামকালী এই অবোধ বিশ্বাসের সামনে খতমত খেয়ে সহসা কেমন অসহায় অনুভব করেন। তাই ধমকে ওঠার পরিবর্তে মাথা নেড়ে বলেন, “ভুল বলে মা! কিছুই পারি নে! মিথ্যে অহঙ্কারে কতকগুলো শেকড়-বাকড় নিয়ে নাড়ি আর লোক ঠকাই!”

সত্যবতী এ কথার সুর ধরতে পারল না, পারার কথাও নয়, বুঝল এ হচ্ছে বাবার রাগের কথা। কিন্তু আপাতত সে মরীয়া। যা থাকে কপালে, বাবার হাতে যদি ঠেঁজনি খাওয়া থাকে তাই খাবে সত্য, কিন্তু সত্যবতীর চেষ্টায় জটাদার বৌটা যদি বাঁচে! তাই চোখ-কান বুজে সে বাবার গায়ের চাদরের খুঁটা টেনে বলে ফেলে, “তোমার পায়ে পড়ি বাবা, জন্মের শোধ একটু ওষুধ দাও না। আহা, বিনি চিকিৎসেয় মারা যাবে জটাদার বৌ!”

মরার পর যে আর চিকিৎসা চলে না, এ কথা আর মেয়ের কাছে ব্যাখ্যা করতে পারলেন না রামকালী। শুধু একটা নিঃশ্বাস ফেলে ফের ঘুরে দাঁড়িয়ে বললেন, “চল দেখি।”

জমজমাট নাটকের মধ্যখানে যেন হঠাৎ আসরের চাঁদোয়া ছিড়ে পড়ল। কবরেজ মশাইয়ের গলা-খাঁকারি না ?

হ্যাঁ, তাই বটে। বিশালকায় সুকান্তি পুরুষ দরজার সামনে দাঁড়িয়ে। সঙ্গে সঙ্গে সত্যর শানানো গলা বেজে উঠেছে, “বাবা বলছেন, ভিড় ছাড়তে হবে!”

পাড়ার মহিলারা মাথায় কাপড় টেনে চূপ করে গেলেন। শুধু জটা-জননী ডুকরে উঠলেন, “ও মেজদা গো, আমার জটা আজ লক্ষীছাড়া হল গো!”

“খাম্।” যেন একটা বাঘ হুঙ্কার দিল, “তোর জটা আবার লক্ষীছাড়া না ছিল কবে ? একেবারে শেষ করে ফেলেছে তো ?”

ভির সরে গেছে, কবরেজ মশাই ভাগ্নে-বোয়ের কাছে গিয়েও যতটা সত্ত্ব ছোঁয়া বাঁচিয়ে হেঁট হয়ে দু আঙুলে নাড়িটা টিপে ধরেন, আর মুহূর্তকাল পরেই চমকে ওঠেন।

যাক, সব রং-তামাশা ফক্কিকার!

শুধু নাটকের একটা দৃশ্যই জখম নয়, আগাগোড়া নাটকটাই খতম! বেহবারঙে লঘুক্রিয়া'র এহেন উদাহরণ আর কখনও কেউ দেখেছে না শুনেছে ? জটার বোয়ের এই আচরণটা যেন ধাষ্ট্যমোর চরম, ক্ষমার অযোগ্য! ছি ছি, মেয়েমানুষের প্রাণ বলে কি এমনই কাঠ-পরমায়ু হতে হয় গো ? তবে এ মেয়েমানুষের কপালে যে অশেষ দুঃখ তোলা আছে, তাতে আর কারও মতভেদ থাকে না। মরে গিয়ে তুলসীতলায় শুয়ে আবার চারদণ্ড পরে ঘরে উঠে শোয়, ঢক্ ঢক্ করে একবাটি গরম দুধ গেলে, এমন মেয়েমানুষের খবর এর আগে এঁরা অন্তত কেউ পান নি!

“ছি ছি, কী যেন্না! পুরুষের প্রাণ হলে আর এই স্বর্ণসিন্দুরটুকু জিতে ঠেকিয়েই চোখ খুলতে হত না!”... “কিন্তু যাই বল, জটার বৌ খুব খেল দেখালো বটে!”... “এইবার শাশুড়ী মাগীর হাতে যা খোয়ার হবে টের পাচ্ছি, মাগীর যা অপমান্য হয়েছে আজ!”... “কিন্তু যাই বলো, তুলসীতলা থেকে এমন হুঁট করে ঘরে তোলাটা ঠিক হয় নি, একটা অঙ্গ-প্রাচিস্তির-টাচিস্তির করা কোর্তব্য ছিল।”... “কে জানে বাবা, সত্যি বেঁচে ছিল না কোন অবিদেবতায় ভর করল! আমার তো কেমন সন্দ হচ্ছে!”... “খাম সেজবৌ, সাজসজ্জায় একা স্কট-পথে যাই, ভাবলে গা ছম্ ছম্ করবে। কিন্তু চাউনিটা একটু কেমন কেমনই লাগল!”... “সি না, ওসব কিছু না, কবরেজ মশাই তো বললেনই, আচমকা ধাক্কা খেয়ে ভির্মি গেছল!”

“নে বাবা চল চল, ছিষ্টি-সংসারের কাজ পড়ে, নাহক পাঁচ দণ্ড সময় বুখা নষ্ট হল।”... “জটার মার আদিখ্যেতাটা দেখলি ? যেন বৌ মরে বুক একেবারে ফেটে যাচ্ছিল!”... “দেখেছি। দেখতে আর বাকী কিছুই নেই। বুক যদি ফেটেছে, বৌ জীইয়ে ওঠায়! বড় আশায় ছাই পড়ল। ভাবছিল তো বেটা তার ‘ভাগ্যমান’ হল। আবার এখুনি তার বে দিয়ে, দানসামগ্রী গয়নাপত্তর ঘরে তুলবে!”

বাক্যের স্রোত আর ধামে না।

ঘাটে পথে, আপন বাড়ির চৌহদ্দির মধ্যে বাক্যের বৃশাবন বসে যায়। এত বড় একটা ঘটনাকে এত সহজে জুড়িয়ে ফেলতে হচ্ছে কারুরই হচ্ছে না; জটার মাকে ‘পেড়ে ফেলবার’ এত বড় সুবর্ণ সুযোগটাও মাঠে মারা গেল। জটার বোয়ের উপর কিছুতেই আর প্রসন্ন হতে পারছেন না কেউ, বৌটা যেন সবাইকে বড় রকমের একটা ঠকিয়েছে। জ্ঞাতি খুড়শাশুড়ী খবর পেয়েই আঁচলের তলায় লুকিয়ে আলতাপাতা আর সিঁদুরগোলা এনেছিলেন, যাতে প্রথম সিঁদুর দেওয়ার বাহাদুরিটা তাঁরই হয়। সেগুলো এখন ঘাটে ভাসিয়ে এলেন। যতই হোক, মড়ার জন্যে আনা তো! তা রাগটা তাঁরই বেশী হচ্ছে জটার বউয়ের ওপর!

না, নাম কেউ জানে না, জানবার চেষ্টাও করে না—‘জটার বৌ’ এই তার একমাত্র পরিচয়, এরপর শেষ পরিচয় হবে ‘অমুকের মা’। তবে আর নামে দরকার কী ? নামে দরকার নেই, কিন্তু তার কথায় সকলেরই দরকার আছে। সেই দরকারী কথাগুলোর মধ্যে হঠাৎ জ্ঞাতি খুড়শাশুড়ী বলে উঠলেন, “আমাদের বাপের বাড়ির দেশ হলেও বৌকে আর ঘরে উঠতে হত না, ওই গোয়ালে কি টেকশেলে জীবন কাটাতে হত!”

দু'একজন মুখ-চাওয়াচাওয়ি করলেন, জীবন নিয়ে বিচারটা কেন ?

খুড়শাশুড়ী ফের রায় দেন, “একে তো তুলসীতলায় বার করা, তা'পর আবার কত বড় অনাচার তাবো, মামাশ্বস্তরের ছোঁয়াচ খাওয়া! কবরেজ মশাই যখন নির্ভরসায় নাড়ী টিপে ধরলেন, তখনই তো আমি হ্যাঁ। অবিশ্যি উনি ভেবেছিলেন মরেই গেছে। আর মরে গেলে সৎকারের আগে দেহস্কন্ধি তো

একটা করতেই হত। কিন্তু এ যে একেবারে জলজ্যান্ত জীইয়ে উঠল! প্রাচীরের না করলে কি করে চলবে ?”

বহু গবেষণান্তে স্থির হল, মামাশ্বশুর-স্পর্শের পাতকস্বরূপ একটা প্রায়শ্চিত্ত জটার বৌকে করতেই হবে, তা ছাড়া মরে বাঁচার পাতকে আর একটা। নইলে জটার মাকে 'পতিত' থাকতে হবে। বেচারী অপরাধিনী তো অচেতন্য। জটার মাও জটাকে খুঁজে বেড়াচ্ছেন, কাজেই একতরফা ডিক্রী হয়ে যায়।

কিন্তু সত্যবতী এসবের কিছুই জানে না। ও এক অদ্ভুত পৌরবের আনন্দে ছলছল করতে করতে বাবার সঙ্গে সঙ্গে বাড়ি ফেরে।

উঃ, রাগ করে বাবা কি উল্টো কথা বলছিলেন! বলছিলেন কিনা “চিকিচ্ছে-টিকিচ্ছে কিছু জানি না।” —সাধে কি আর সত্য অত দুঃসাহস করে বাবাকে হাতে ধরে বলেছিল একটু ওষুধ দিতে, তাই না বেচারী বৌটা বাঁচল! আহা সত্য যখন শ্বশুরবাড়ি যাবে, তখন যদি সত্যার বর (মুখে অলঙ্কো একটু হাসি ফুটে ওঠে) অমনি মেরে সত্যাকে মেরে ফেলে বেশ হয়। বাবা খবর পেয়ে গিয়ে একটিমাত্র স্বর্ণসিন্দুর মধু দিয়ে মেড়ে খাইয়ে দেবেন, আর একটু পরেই সত্য চোখ খুলে সবাইকে দেখে তাড়াতাড়ি মাথায় ঘোমটা টেনে ফেলবে।

উঃ, কী মজাই হবে তা হলে!

দেশসুদ্ধ লোকের তাক লেগে যাবে সত্যার বাবা রামকালী কবরেরজের গুণের মহিমায়। বাপ রে বাপ, সোজা বাবা তার! গায়ের আর কোন্ মেয়েটার এমন বাপ আছে ?

হাসির কথা ভাবতে ভাবতে হঠাৎ সশব্দে হেসে ফেলা সত্যার বরাবরের রোগ।

রামকালী চমকে প্রশ্ন করলেন, “কী হল ? হাসলি যে?”

সত্য কষ্টে সামলে নিয়ে ঢোক গিলে বলল, “এমনি!”

“তোর ওই ‘এমনি’ হাসিটা একটু কমা দিকি!” প্রায় সহাস্যেই বলেন রামকালী, “নইলে এর পর শ্বশুরবাড়ি গিয়ে ওই জটার বৌয়ের দশা হবে তোর!”

মনটা বড় প্রসন্ন রয়েছে, এই সামনে রুত্তি, না-হক কতগুলো ঝগাট-ঝামেলায় পড়তে হত, জটার বৌ তার হাত থেকে বাঁচিয়েছে। ব্যাপের মনের প্রসন্নতার কারণটা অনুমান করতে না পারলেও প্রসন্নতাকে অনুধাবন করতে পারে সত্যবতী এবং তারই সাহসে প্রায় উজ্জ্বলিত ভাবে বলে, “ওই জন্যেই হাসলাম। আমি মরে গেলে তুমি বেশ গিয়ে বাঁচিয়ে দেবে!”

“হুঁ, বটে!” বলেন স্বল্পভাষী রামকালী।

রামকালী নিঃশব্দে হনহন করে খানিকটা অগ্নসর হয়ে যান এবং সত্যবতী ব্যাপের সঙ্গে ভাল রাখতে প্রায় ছুটতে থাকে।

হঠাৎ একসময় থেমে রামকালী বলেন, “মরে গেলে স্বয়ং ভগবান এসেও কিছু করতে পারেন না, বুঝলি ? জটার বৌ মরে নি।”

“মরে নি!” সত্য একটু আনমনা হয়ে যায়, “মরাটা তা হলে আর কোন্ রকম ?” হঠাৎ চিন্তার গতি বদলায়, সত্য সোৎসুকে বলে, “কিন্তু বাবা, তুমি গিয়ে নাড়ি দেখে স্বর্ণসিন্দুর না কি না খাওয়ালে ওই রকম মরা-মরা হয়েই তো থাকত জটাদার বৌ! আর সবাই মিলে বাঁশ বেঁধে নিয়ে গিয়ে পাকুড়তলার শ্মশানে পুড়িয়ে দিয়ে আসত!”

রামকালী একটু চমকালেন।

আশ্চর্য! এতটুকু মেয়ে, এত তলিয়ে ভাবে কি করে ? আহা মেয়েমানুষ তাই সবই বৃথা। এ মগজটা যদি নেড়ুটার হত! তা হল না—আট বছরের হাতী এখনও ‘অ আ ই’তে দাগা বুলোচ্ছে। নেড়ু রামকালীর দাদা কুঞ্জর শেষ কুড়োত্তি। তেরোটা ছেলেমেয়ে মানুষ করার পর চৌদ্দটার বেলায় রাশ একেবারে শিখিল হয়ে গেছে কুঞ্জ আর তার পরিবারের। ছেলেটা বামনের গরু হবে আর কি!

কিন্তু মেয়ে-সন্তানের বোধ করি এত বেশী তলিয়ে ভাবতে শেখাও ভাল নয়, তাই রামকালী ঈষৎ ধমকের সুরে বলেন, “থাম থাম, মেলা বকিস নি, পা চালিয়ে চল! গহীন অন্ধকার হয়ে গেছে দেখছিস!”

“অন্ধকার ? হুঁ!” সত্যবতী স-তাচ্ছিল্যে বলে, “অন্ধকারকে আমি ভয় করি নাকি ? এর চাইতে আরও অনেক অনেক অন্ধকারে বাগানে গিয়ে পৈঁচার চোখ গুনি না!”

“অন্ধকারে কী করিস ?” চমকে ওঠেন রামকালী।

সত্য ধমমত খেয়ে বলে, “ইয়ে আমি একলা নয়, নেডু আর পুণ্ডিপিসীও থাকে। পেঁচার চোখ গুনি।”

হঠাৎ রামকালী হা-হা করে হেসে ওঠেন।

অনেকক্ষণ ধরে দরাজ গলায়। এই মেয়েকে আবার ধমকাবেন কি, শাসন করবেন কি!

নির্জন পথে অন্ধকারের গায়ে সেই গম্ভীর গলায় দরাজ হাসি যেন স্তরে স্তরে ধ্বনিত হতে থাকে।

বাড়ঘোদের চণ্ডীপগুপ থেকে উৎকীর্ণ হয়ে ওঠেন দু-একটি গ্রাম্য শ্রৌট।

“বদ্যি চাটুয্যের গলা না?”

“হ্যাঁ, তাই তো মনে হচ্ছে!”

“একলা অমন অন্ধকারে হাসি কেন?”

“একলা কি আর! নিশ্চয় খিঙ্গী মেয়েটা সঙ্গে আছে। নইলে আর—”

“ওই এক মেয়ে তৈরি করছেন রামকালী। ও মেয়ে নিয়ে কপালে দুঃখ আছে।”

“আর দুঃখ! টাকার ছালা ঘরে, ওর আবার দুঃখ! শুনছি নাকি বর্ধমানের রাজার কাছ থেকে লোক এসেছিল কাল, রাজার সভা—কবরেজ হবার জন্যে সাধতে!”

“তাই নাকি? কই গুনি নি তো? তা হলে গায়ের মায়ী কাটাল এবার চাটুয্যে!”

“না না, শুনছি যাবে না।”

“বটে! তবু ভাল। তোমায় বললে কে?”

“কুঞ্জর বড় ছেলেটা বলছিল।”

“হুঁ ভালই, এ বলসে আবার বিদেশে গিয়ে রাজদরবারে চাকরি! তবে রামকালীর মতিগতি বড় বেয়াড়া, অত বড় খিঙ্গী মেয়েকে এতটা বাড় বাড়তে দেওয়া উচিত হয় না, পাড়ার ছেলেগুলো ওর খেলুড়ি!”

“হ্যাঁ, গাছে চড়তে, সাঁতার কাটতে, মাছ ধরতে বেটাছেলের দশগুণ ওপরে যায়।”

“এটা একটা গৌরবের কথা নয় খুড়ো। যতই হোক মেয়েছেলে, তায় আবার একটা মানিয়মান ঘরের বৌ হয়েছে। তারা টের পেলে ও বৌকে ঘরে নিতে বেকে বসবে না!”

“একটা কলঙ্ক রটিয়ে দিতেই বা কতক্ষণ?”

বদ্যি চাটুয্যের ও তার খিঙ্গী মেয়ের আলোচনায় চণ্ডীমগুপ ভারাক্রান্ত হয়ে ওঠে। যাকে সামনে সমীহ করতে বাধ্য হতে হয়, তাকে আড়ালে নির্দেশ করতে না পেলে বাঁচবে কেমন করে মানুষ!

এইসব সমালোচনার প্রধানা পাত্রী ভুখন বাবার পিছন পিছন ছুটছে আর মনে মনে আকুল প্রার্থনা করছে, “হেই ভগবান, আমার পা-টা বাবার মতন লম্বা করে দাও নাগো, তা হলে বাবার মতন হাঁটি, হেরে যাই না!”

হেরে যেতে একান্ত আপত্তি সত্যবতীর।

কোন ক্ষেত্রে কোথাও হার মানবে না এই পণ।

“এই পুণ্ডি, ছড়া বাঁধতে পারিস?”

চিলেকোঠার ছাদের ওপর সত্যবতীর ‘খেলাঘর’। প্রধান খেলুড়ি রামকালীর জ্ঞাতিখুড়োর মেয়ে পুণ্ডিবতী। সত্য তাকে পাঁচজনের সামনে সভ্যতা করে ‘পুণ্ডিপিসী’ বললেও, নিজের এলাকায় পুণ্ডিই বলে।

“বাবুই পাখীর বাসা আনতে পারিস?” অথবা “কাঁচপোকা ধরতে পারিস?” কিংবা “সাঁতরে তিনবার বড় দীঘি পানাপার হতে পারিস?” এ ধরনের পরীক্ষামূলক প্রশ্ন প্রায়ই করে সত্য, কিন্তু ছড়া বাঁধতে পারিস কিনা, এহেন প্রশ্ন একেবারে আনকোরা নতুন!

পুণ্ডি বিষমভাবে বলে, “ছড়া! কিসের ছড়া?”

“জটাদার নামে ছড়া, বুঝলি? ছড়া বেঁধে গা-সুদ্ধ সব ছেলেমেয়েকে শিখিয়ে দেব, জটাদাকে দেখলেই তারা হাততালি দিয়ে ছড়া কাটবে।”

“হি হি হি!”

জটাদারের দুর্দশার চিত্র কল্পনা করে দুজন দূলে দূলে হাসতে থাকে।

অতঃপর পুণ্ডিবতী একটা পাল্টা প্রশ্ন করে, “খুব তো বললি, বলি মেয়েমানুষকে আবার ছড়া বাঁধতে আছে নাকি?”

“বাঁধতে নেই?” সহসা অগ্নিমূর্তি ধরে সত্য, “কে বলেছে তোকে নেই? মেয়েমানুষ! মেয়েমানুষ! মেয়েমানুষ যেন মায়ের পেটে জন্মায় না, বানের জলে ভেসে আসে! অত যদি মেয়েমানুষ-মেয়েমানুষ করবি তো আমার সঙ্গে খেলতে আসিস নে।”

পুণ্যি মুচকি হেসে বলে, “আহা, মশাই রে! আর জোর বর যখন বলবে ?”

“কি বলবে ?”

“ওই মেয়েমানুষ!”

“ইস, বলবে বৈকি! দেখিয়ে দেব না! আমি ওই জটাধার বৌয়ের মত হব ভেবেছিস ? কক্ষনো না। দেখ না, ছড়া বেঁধে জটাদাকে কী উৎপাত করি!”

পুণ্যি ঈষৎ সমীহভাবে বলে, “কিন্তু কি করে বাঁধবি ?”

“কি করে আবার! কথক ঠাকুর যেমন আখর দেন তেমনি করে। একটুখানি তো বেঁধেছি, শুনবি?”

“বেঁধেছিস! অ্যা! বল না ভাই, বল না।”

সত্যি আত্মস্থভাবে চেখে চেখে তেঁতুল খাওয়ার ভঙ্গীতে বলে—

“জটাানা, পা গোদা

যেন ভৌদা হাতী,

বৌ-ঠেজানো দাদার পিঠে

ব্যাঙে মারুক লাখি।”

“ওরে সত্যি ?” পুণ্যি সহসা ডুকরে ওঠে সত্যকে জড়িয়ে ধরে, “তুই কী রে! এরপর তো তুই পয়ার বাঁধতে শিখবি রে ?”

সেটাও যেন সত্যর কাছে কিছু নয় এমন ভাবে বলে, “সে যখন শিখব তখন শিখব, এখন এটা যে-যেখানে আছে সবাইকে শিখাতে হবে, বুঝলি ? আর জটাদাকে দেখলেই—হি হি হি হি!”

॥ পাঁচ ॥

রোদে পিঠটা চিন্‌চিন্‌ করছে অনেকক্ষণ থেকে, হঠাৎ যেন হ-হ করে জ্বলে উঠল। ওঃ, বকুলগাছের ছায়াটা দাওয়া থেকে সরে গেছে! বেলা তা হলে কম হয় নি! বিপদে পড়লেন মোক্ষদা, হাত জোড়া, অথচ পিঠের কাপড়টা সরে গিয়ে সরাসরি রোদটা পিঠের চামড়ায় লাগছে। নিজে দেখতে পাচ্ছেন না মোক্ষদা, আর কেউ কাছে থাকলে দেখতে পেত মোক্ষদার হস্তেল-রঙা পিঠটার কুঁকশ ফোকাপড়ার মত লাল হয়ে উঠেছে।

নাঃ, তসর থানখানা না পরে ভিজে থানখানা পরে আমতেল মাখতে বসলেই হত। ভিজে কাপড়ে যেন দেহের দাহ অনেকটা নিবারণ হয়। কানার্টু ভারী ভারী পাথরের খোরা দুখানা খানিকটা টেনে নিয়ে গিয়ে সরে দাওয়ার খুঁটির ছায়াটুকুতে পৃষ্ঠরক্ষা করতে গেলেন মোক্ষদা।

সমুদ্রে তৃণখণ্ড। তাছাড়া রোদ এখন দৌড়চ্ছে, এখনি খুঁটির ছায়া সরবে।

হঠাৎ মোক্ষদা একটা সত্যি আবিষ্কার করে বসলেন। সারা বছরটাই রোদে পুড়ে পুড়ে মরেন তিনি। এই তো কচি আমের আমতেল, এর পরই বাখড়া বাঁধা আমের গুড়-আম, মসলা-আম, তার পরেই পড়ে যাবে আমসত্ত্বর মরসুম। আর সে মরসুমকে সামলে তোলা তো সোজা নয়। আমসত্ত্বর পালা চুকতে চুকতেই অবশ্য বর্ষা নামে, সেই দু-তিনটে মাসই শুধু রোদে পোড়ার ছুটি, বর্ষা শেষ হতেই দুর্গোৎসবের সুর ওঠে। দুর্গোৎসবের আগে সারা ভাঁড়ারটাতেই তো ঝাড়া বাছা রোদে দেওয়ার ধুম চলে, তারপর পড়ে তিলের নাড়ুর ধুম।

বদ্যি চাটুয্যের বাড়ির দুর্গোৎসবের তিলের নাড়ু একটা বিখ্যাত ব্যাপার, হাতে বাগিয়ে ধরে কামড় দিতে পারা যায় না এত বড় নাড়ু! পক্ষান্ন আনন্দ নাড়ু মুড়কির মোয়া সবই কবরেজ-বাড়ির বিখ্যাত, কিন্তু সে সব তো তবু পাঁচহাতের ব্যাপার, নিত্যন্ত প্রতিমার ভোগের উপযুক্ত সেরকতক জিনিস গঙ্গাজলে ভোগের ঘরে তৈরী হলেও বিরাট অংশটায় অনেকে হাত লাগায়। কিন্তু তিলের নাড়ুটি সম্পূর্ণ মোক্ষদার ডিপার্টমেন্ট। কারণ তিলের নাড়ুর অমন হাত নাকি—শুধু এ গ্রামে কেন—এ তলাটে নেই। তা সেই নাম কি আর অমনি হয়েছে, আগাগোড়া নিজের হাতে রাখেন বলেই না এদিক ওদিক হতে পায় না! বস্তা বস্তা তিল তো এসে হাজির হল, তার পর ? সেই তিল ঝাড়া-বাছা, নিখুঁত করে ধুয়ে নিপাট করে রোদে শুকিয়ে ঝুনো করা, টেকিতে কোটা, প্রকাণ্ড পেতলের সরাসরি চড়িয়ে গুড় জ্বাল দিয়ে দিয়ে নিটুট নিশ্চিন্দ্রি ধামায় সেই তিলচুর মেখে মেখে তাড়াতাড়ি গরম



থাকতে থাকতে নাড়ু পাকিয়ে ফেলা, এর কোনটা নিজের হাতে না করলে চলে ? একবার বুঝি তিলটা কুটেছিল সেজবৌতে আর বড়বৌমাতে, সেবার তো নাড়ু 'দিয়ে' মজল। আগাগোড়া খোসায় ভর্তি। রঙও হল তেমনি কেলে-কিষ্টি। রামকালী নাড়ু দেখে হেসেছিলেন, প্রশ্ন করেছিলেন, 'এ নাড়ু কার তৈরী ?'

সেই থেকে সাবধান হয়ে গেছেন মোক্ষদা। টেকির গড়ের কাছে কাউকে একটু বসানো ছাড়া আর সব একা করেন।

দুর্গাপূজের রোদে পোড়া তো শুধুই তিলের নাড়ু নয়, বাড়ি বাড়ি নেমস্তন্নর কথা বলতে যাওয়া, গুরুপুরুতের বাড়ি সিধে দিতে যাওয়া সে সবও তো মোক্ষদার ডিউটির মধ্যেই। কারণ তিনি ঝিউড়ি মেয়ে। কাশীশ্বরীও কতকটা করেছেন আগে আগে, কিন্তু ইদানীং তিনি রোগে কেমন জবুথবু হয়ে গেছেন। মাঠঘাট ভেঙে রোদে রোদে ঘুরে কাজ উদ্ধার করার সামর্থ্য নেই। মোক্ষদাই সব করেন, আর দিনে অন্তত বার চোন্দ-পনেরো স্নান করেন।

কেন কে জানে, আজ রোদের কথাটাই বার বার মনে পড়ছে মোক্ষদার। মনে হল পূজার ঝঞ্ঝাট কাটতে না-কাটতেই তো বড়ির মরসুম। বছরে বারো-চোন্দ মণ বড়ি লাগে। আঁশ-নিরামিষ দুদিকের শ্রয়োজনের দায়টা পোহানো হয় এই দিকেই, কারণ বড়িও তো আম-কাসুন্দির মতই শুদ্ধাচারের বস্তু। আর শুদ্ধাচারের ব্যাপারে কাকে দিয়ে নিশ্চিত হবেন মোক্ষদা নিজেকে ছাড়া ?

বড়ি দিতে দিতে মোক্ষদার হস্তেল রঙ কালসিটে মেরে যায়। তবে জিনিস যা হয় তাক লাগাবার মত। ডাকসাইটের হাত। সাবধানীও খুব মোক্ষদা, কাউকে ছুঁতেই দেন না সাধ্যপক্ষে, বড় বড় তিজলে ভরে সরাচাপা দিয়ে 'সাজায় তুলে রাখেন, সময়মত বার করে দেন। কত তার স্বাদ। কুমড়া বড়ি, খাস্তা বড়ি, পোস্ত বড়ি, তিলের বড়ি, জিরের বড়ি, ঝালমশলার বড়ি, টকে-সুজয় দিতে মটর-খেসারির বড়ি—ব্যবহার অনেক।

ওই মধ্যে মূলোর বড়িটা আবার আলাদা রাখতে হয়, মাঘ মাসে পাছে ভুলে খাওয়া হয়ে যায়। মাঘ মাসে মূলো খাওয়া আর গোমাংস খাওয়ানো তো ত্রুষ্ণ কিছু নেই।খুঁটির রোদটা সরে গেছে, পিঠটা আবার চিনচিন করছে। মনটাও যেন চিনচিন করছে।

বড়িপর্ব সারা হতেই আসে কুল, আসে তৈতল।

কবে তবে রোদে পোড়ার ছুটি ?

সারা বছর ধরে এই রোদে পোড়ার দায়িত্ব মোক্ষদাকে দিয়েছে কে, এ কথা কে বলবে ? তবে মোক্ষদা জানেন এটা তাঁরই দায়িত্ব।

আমতেল মাখা একটা সময়সাপেক্ষ কাজ। চটকে চটকে তেলে-আমে মিশোতে হবে তো ? হয়েছে এতক্ষণে, এবার রাইসরষের মিহিগুঁড়ো ছড়িয়ে দিয়ে ক্রমাগত রোদ খাওয়ানো।

কোমরটা টান করে উঠে পড়লেন মোক্ষদা, পিঠের জ্বালা-করা জায়গাটা নড়াচড়া পেয়ে আর একবার হু-হু করে উঠলো। কিন্তু কী আশ্চর্য, সরষে গুঁড়োবার জন্যে রান্নাঘরে এসে ঢুকতেই মনটা 'হ-হ' করে উঠলো কেন ?

ঘরে ঢুকেই হঠাৎ কেমন বোকার মত দাঁড়িয়ে পড়লেন মোক্ষদা। ঘরটা আজ এত বড় দেখাচ্ছে কেন ? কই, এমন তো কোন দিন দেখায় না! বরং ভাত বাড়ার সময় পরস্পরের গা বাঁচিয়ে ব্যবধান রেখে ঠাই করতে তো জায়গার অকুলানই লাগে।

ঘরের মধ্যে তো রোদ নেই, তবু এই ছায়ামুখীতল প্রকাণ্ড লম্বা ঘরখানা যেন ওই রোদে খাঁ খাঁ প্রকাণ্ড উঠোনটার মতই ঝাঁ ঝাঁ খাঁ খাঁ করছে। আর সেই খাঁ খাঁ করা ঘরের এক প্রান্তে বড় বড় দুটো উনুন তাদের মাজাঘষা নিকোনো চুকোনো চেহারার নিয়ে স্তব্ধ হয়ে বসে আছে বহু অকথিত শূন্যতার প্রতীকের মত।

উনুন দুটোকে আজ আঙনের দাহ সহ্য করতে হবে না। ওরা হয়তো এই নিরীলা ঘরে স্তব্ধ হয়ে বসে নিজেদের শূন্যতার পরিমাপ করবার অবকাশ পাবে।

আজ ওদের ছুটি। আজ এদের একাদশী।

মোক্ষদার ছুটি নেই কেন ?

ঘরের নর্দমার কাছবরাবর একটা জলভর্তি ঘড়া বসানো থাকে—নেহাৎ সময়-অসময়ের জন্যে। মোক্ষদাই শেষবারের স্নানের পর এনে রেখে দেন।

তেল-তেল হাতটা ঘড়া কাত করে ধুয়ে নিয়ে মোক্ষদা হঠাৎ আছড়া আছড়া জল নিয়ে সজোরে ছুঁড়ে ছুঁড়ে মারতে লাগলেন, পিঠের রোদে চিনচিনে জায়গাটার জ্বলুনি একটু ঠাণ্ডা হোক। দূর ছাই,

হাত ধুয়ে পুকুরে গেলেই হত, তবু একবার গা-মাথা ভিজিয়ে আসা যেত। গায়ের চামড়াটা খানিক ভিজলেও যেন ভেতরের তেষ্টটা খানিক কমে।

একাদশীর দিন 'তেষ্টা' কথাটা মনে আনাও পাপ। এ কি আর জানেন না মোক্ষদা? তায় আবার তাঁর মত বয়স-ভাঁটিয়ে-মাওয়া শক্তপোক্ত মজবুত বিধবার! কিন্তু মনে করব না' বললেও মনে যদি এসে যায়, সে পাপকে ভাড়ানো যায় কোন অস্ত্রে?

রোদ লাগলে বোশেখ-জষ্টির দুপুরে তেষ্টটা জানান দেয় বেশী। কিন্তু উপায় কি? আজকেই যে যত রাজ্যের বাড়তি কাজ করবার পরম দিন। আজকের মতন এমন অখণ্ড অবসর আর ক'দিন জোটে?

রাইসরষের সন্ধানে কুলুঙ্গীতে তুলে রাখা রঙিন ফুলকাটা ছোট ছোট ছোবা হাঁড়ির একটা পাড়লেন মোক্ষদা। সব হাঁড়িতে একেবারে সম্বৎসরের মশলা ঝেড়ে বেছে তুলে রাখা হয়, আর নিত্য প্রয়োজনে দুটি দুটি বার করে কাচা ন্যাকড়ার কোণে কোণে পুঁটলি বেঁধে রাখা হয়। শুধু এরকম অনিন্য প্রয়োজনেই মূল ভাঁড়ারে হাত পড়ে।

একটা পাথরবাটিতে আন্ডাজমত সরষে ঢেলে নিয়ে শিল পেতে বসতে যাচ্ছিলেন মোক্ষদা, হঠাৎ দরজার কাছে শিবজায়ার গলা বেজে উঠল, "কালে কালে কি হল গো, এ যে কলির চারপো পুরল দেখছি! আমাদের দিগ্বী অবতার মেয়ের আস্পন্দার কথাটা শুনেছ ছোট্টাকুরঝি?"

দিগ্বী অবতার মেয়ের আস্পন্দার ইতিহাস শোনার আগেই ভাজের আস্পন্দায় রে-রে করে ওঠেন মোক্ষদা, "উঠানের পায়ে তুমি দাওয়ায় উঠলে সেজবৌ? আর ওইখানেই আমার আচারের খোরা! বলি তোমরা সুদ্ধ যদি এরকম যবন হও—"

শিবজায়া ঈষৎ রুগ্নভাবে বললেন, "তোমার এক কথা ছোট্টাকুরঝি, উঠানের পায়ে দাওয়ায় উঠে আসব আমি অমনি অমনি! এই দেখ পায়ে গোবর লেগে। হাতে করে একনাদ এনে পৈঠের নীচেয় ফেলে সেই গোবর দু'পায়ে মাড়িয়ে তবেই না উঠেছি!"

নিতান্তপক্ষে পুকুরে নেমে পা ধুয়ে আসা যদি অসম্ভব হয়, তা হলে অনুকল্প হিসেবে এই ব্যবস্থা দিয়ে রেখেছেন মোক্ষদা। তবু সেজবৌয়ের আশ্বাসব্যাপীতে তেমন নিশ্চিন্ত হলেম না। সন্দিক্ত সুরে বললেন, "বলি গোবরটা নিজেদের তো? নাকি আর কারুদের ঘরের এঁটোকাঁটা খাওয়া গরুর?"

"শোন কথা—" জেরা থামানোর চেষ্টায় বলে ওঠেন শিবজায়া, "তোমাদের উঠানে আবার অপরের গরুর গোবর আসবে কোথ থেকে?"

কিন্তু থামাতে চাইলেই কি সব জিনিস থামে? মোক্ষদার জেরাও থামল না। তিনি একটু কটুহাস্যে বলে উঠলেন, "ও মা লো! আমাদের উঠানে অন্যের গরুর গোবর আসবে কোথ থেকে? তোমার কথা শুনে মাঝে মাঝে মনে হয় সেজবৌ, তুমি যেন এইমাতুর মায়ের পেট থেকে পড়লে!"

শিবজায়া ননদকে খুব ভয় করলেও, তবু ছোট ননদ। তাই বিবক্ত সুরে বলে ফেলেন, "নাও বাবা, তোমার কাছে আসাই দেখছি ঝকমারি! গোবিন্দবাড়ি থেকে ফিরতে পথে আমাদের কীর্তিমান মেয়ের কীর্তির কথা শুনে হাঁ হয়ে গেলাম, তাই, থাক গে—"

মোক্ষদা এতক্ষণে একটু নরম হন। প্রায় সন্ধির সুরেই বলেন, "কেন, কী আবার করল কে? সত্য বুঝি?"

"তবে আবার কে!" শিবজায়া ঔদাসীন্য ত্যাগ করে মহোৎসাহে পুরনো সুর ধরেন, "সত্য ছাড়া আর কার এত বৃকের পাটা হবে? হারামজাদী নাকি জটীর নামে ছড়া বেঁধে পাড়ার গুষ্টিসুদ্ধ ছেলেমেয়েকে শিখিয়ে দিয়েছে, আর গাঁসুদ্ধ ছেলিপিলে জটাকে কি জটীর মাকে দেখলেই ঝোপেঝাড়ের আড়াল থেকে গুনিয়ে গুনিয়ে তাই আওড়াচ্ছে। জটীর মা তো রেগে গাল দিয়ে শাপশাপান্ত করে একাকার!"

শেষ পর্যন্ত সবটুকু শোনবার জন্যে ধৈর্য ধরে চূপ করে তাকিয়েছিলেন মোক্ষদা, এবার ডুক কুঁচকে তীক্ষ্ণসুরে বলে ওঠেন, "ছড়া বেঁধেছে মানে কি?"

"মানে কি, তাই কি আমিই আপে বুঝতে পেরেছিলাম? মেয়েমানুষ যে আবার ছড়া বাঁধে বাপের জন্মেও গুনি নি। তা'পর পথে আসতে আসতে দেখি একপাল ছোঁড়া হি হি করে হাসতে হাসতে বলছে, 'জটা মোটা পা গোদা—' ভেঙুচি কেটে আরও সব কত কি পয়্যার ছন্দ বলতে বলতে যাচ্ছে!"

মোক্ষদা আরও ডুক কুঁচকে বলেন, "ছড়া বেঁধেছে সত্য?"

"তবে আর বলছি কি!"

“ওই মেয়ে হতেই এ বংশের মুখে চুনকালি পড়বে—” মোক্ষদা এবার শিলটা পাততে পাততে বলেন, “রামকালী চন্দর এখন বুঝছেন না, এর পর টের পাবেন, যখন শ্বশুরঘর থেকে ফেরত দিয়ে যাবে। ভেঙেচি-কাটা ছড়া বোধ হয় জটা বৌ ঠেঙিয়েছিল বলে!”

“তবে না তো কি?” বলি পরিবারকে আবার না মারে কোন্ মন্দ? চলানি বৌ অমনি তিলকে তাল করে দাঁতকপাটি লাগিয়ে পাড়ায় লোক-জ্ঞানাজ্ঞানি করে ছাড়লেন। জটার মা বলছে, ছোঁড়াগুলোর জ্বালায় নাকি জটা বেচারি ঘরের বার হতে পারছে না, কি গেরো বল দেখি!”

মোক্ষদা ঘস্ ঘস্ করে শিলে সরষে রগড়াতে রগড়াতে বলেন, “হাতের কাজটা মিটিয়ে নিয়ে যাচ্ছি আমি বৌমার কাছে। ভাল করে সমঝে দিয়ে আসছি। মায়ের আসকরা না থাকলে মেয়ে কখনও এত বড় বেয়াড়া হয়? পাড়ার ছোঁড়াদের সঙ্গেই বা রাতদিন এত মক্ষরা কিসের? একটা কলঙ্ক রটে গেলে তখন রামকালীর মুখটা থাকবে কোথায়? পয়সাওলা বলে তো সমাজ রেয়াৎ করবে না!”

শিবজায়ার কাজ কিছুটা সিদ্ধ হল।

বড় জায়ের নাতনী বিরুদ্ধে ছোট নন্দকে কিছুটা তাতাতে পেরেছেন। শেষবেশ বলেন, “তুমি যাই আছ ছোট ঠাকুরঝি, তাই এখনও সংসারে একটা হক্ কথা হয়, নইলে আমরা তো ভয়ে কাঁটা!”

“ভয় আবার কিসের?”

মোক্ষদা দুম্ করে শিলটা তুলে ফেলে বলেন, “ভয় করব ভৃতকে, ভয় করব ভগবানকে। মানুষকে ভয় করতে যাব কেন? বিধবা পিসিকে ভাত দিয়ে পুষছে বলে যে হক্ কথা শুনতে হবে না রামকালীকে, এ তুমি ভেবো না সেজবৌ! সে যাক্, জটার বোর প্রাচিন্তিরে কিছু ব্যবস্থা হয়েছে?”

“ওমা, তুমি শোন নি সে কথা? প্রাচিন্তিরে তো করবে না!”

“করবে না?”

“না। রামকালী নাকি ভটচায়েকে শাসিয়েছে, প্রাচিন্তিরে বিধান দিলে তাকে গাঁ-ছাড়া করবে!”

“তার মানে?” আকাশ থেকে পড়লেন মোক্ষদা।

“মানে বোঝ! অহমিকা আর কি! আমি গায়ের মার্খা, আমি যা খুশি তাই করব!”

“হঁ।”

মোক্ষদা সরষে-গুঁড়ো-ছড়ানো আচারের খোঁরা দুটো দুম্ করে ঘরে তুলে ঘরের কপাটটা টেনে শেকল তুলে দিয়ে বলেন, “যাচ্ছি, দেখছি পয়সার বাড় কত বেড়েছে রামকালীর! সত্য আছে বাড়ি?”

“বাড়ি! দুপুরবেলা বাড়ি থাকবই মেয়ে বটে সে! কোথায় আগানে-বাগানে ঘুরে বেড়াচ্ছে! বে’ওলা মেয়ের এত বুকের পাটা, এতখানি বয়সে দেখি নি কখনও!”

তসরখানা শুছিয়ে পরে উঠোন পার হয়ে খর খর পায়ে বেড়ার দরজা খুলে পথে পড়লেন মোক্ষদা। ফিরে তো স্নান করতেই হবে, একবার কেন—কতবার, কিন্তু এসবের একটা হেস্তনেস্ত দরকার।

জগতের কোথাও কোনও অনাচার ঘটবে, এ মোক্ষদা বরদাস্ত করতে পারবেন না।

কিন্তু ও কী?

একটু এগোতেই থমকে দাঁড়াতে হল।

বজ্রাহতের মতই থমকানি।

দেখলেন একখানা তেপেড়ে শাড়িতে গাছকোমর বেঁধে, একরাশ রক্ষ চুল উড়িয়ে একহাঁটু ধুলো মেখে একদল ছেলেমেয়ের সঙ্গে আমবাগানের মাঝখান দিয়ে চলেছে সত্যি হি-হি করতে করতে আর সমঝের কি যেন একটা ছড়ার মতই আওড়াতে আওড়াতে।

দাঁতে দাঁত চেপে আরও একটু এগিয়ে গেলেন। মোক্ষদা, দলের পিছন দিকে একটা গাছের আড়ালে দাঁড়িয়ে সবটা শুনতে চেষ্টা করলেন। হি-হি হাসির চোটে সব শোনা যায় ছাই! তবু বালক-কণ্ঠের শানানো সুর, আর বার বার উচ্চারণ করছে, কাজেই ক্রমশ সবটাই কর্ণগোচর থেকে মর্মগোচর হয়ে যায়।

শুনতে পেলেন ঝাঁজে ঝাঁজে হাসি ছড়ানো সেই ছড়া—

“জটাদাদা পা গোদা

যেন ভোদা হাজী,

বৌ-ঠেঙানো, দাদার পিঠে

ব্যাঙে মারে লাখি ।
 জটা জটা পেট মোটা—
 ভাত মারবার ধাড়ী,
 দেখব মজা কেমন সাজা
 যাও না স্বস্তরবাড়ি ।”

বলতে বলতে চলে গেল ওরা ।

মোক্ষদা স্তম্ভিত হয়ে দাঁড়িয়ে রইলেন ।

না, ভাইপোর মেয়ের কবিত্বশক্তির পরিচয়ে অভিভূত হয়ে নয়, স্তম্ভিত হলেন এ মেয়ের ভবিষ্যৎ ভেবে । একে তিনি শাসন করতে এসেছেন! এর পরে আর একে শাসন করে শায়েস্তা করবার সাধ তাঁর নেই; শুধু এইটে মনে মনে অনুধাবন করলেন—একে নিয়ে চিরকাল জ্বলে-পুড়ে মরতে হবে তাঁদেরই, কারণ স্বস্তরবাড়ি থেকে তো মারতে মারতে খেদিয়ে দেবেই!

কাপজের চিলতেয় মোড়া গোটাকতক ওষুধে বড়ি আঁচলের গিট থেকে খুলতে খুলতে সত্য তার শানানো গলাটাকে কিষ্কিৎ নামিয়ে বলল, “এই নাও বৌ, কি যেন বটিকা! বাবা বলে দিলেন সকাল সন্ধ্যা একটা করে বটিকা পানের রস দিয়ে খেতে, গায়ে বল পাবে ।”

আর গায়ে বল!

মনের বল তো সমুদ্রের তলায় । ভয়ে বুক কেঁপে খর-খর । জটার বৌ কাতর করুণ কণ্ঠে ফিসফিস করে বলে, “হেই ঠাকুরঝি, তোমার পায়ে ধরি, ওষুধ তুমি নিয়ে যাও । ওষুধ খাচ্ছি দেখলে ঠাকুরুণ আর আমাকে আস্ত রাখবেন না!”

সত্য গিন্নির মত গালে হাত দিয়ে বলে, “ওমা, শোনো বিত্তান্ত! দেহ দুকল হয়েছে, মিনি-মাগনায় ওষুধ পাচ্ছ, খেলে শাউড়ী তোমায় মেরে ফেলবে? তুমি যে তাজ্জ্বব করলে গা!”

“দোহাই গো ঠাকুরঝি, একটু আস্তে—” প্রায় কাঁদে কাঁদে মুখে বলে জটার বৌ, “তোমার দুটি পায়ে পড়ছি, ঠাকুরুণের কানে গেলে পুকুরে ডুবে মরা ছাড়ি আর গতি থাকবে না আমার ।”

সত্য এবার একটু গুছিয়ে বসে, বসে অবাক গল্পায় আস্তে আস্তে বলে, “কী শুনলে গো?”

“ওই যে মেরে ফেলার কথা বললে! জ্বলো তো ভাই সমস্ত? মামাঠাকুর ওষুধ পাঠিয়ে দিয়েছেন, আর সেই ওষুধ আমি খাচ্ছি! ওরে বাপরে! এই দেখ ঠাকুরঝি, আমার বুকের ভেতর কেমনতর টেকির পাড় পড়ছে!”

জটার বৌয়ের ওই ব্যাধের তাড়া খাওয়া হরিণের চোখের মত চোখ আর ঘুঁটের ছাইয়ের মত । পাণ্ডটে-রঙা মুখের দিকে তাকিয়ে দেখতে দেখতে হঠাৎ কেমন চিন্তাশীল দেখায় সত্যবতীকে । কিছুক্ষণ চুপ করে থেকে ওষুধগুলো ফের আঁচলে বাঁধতে বাঁধতে বলে, “আচ্ছ তা হলে ফেরত নে যাই ।”

ফেরত!

মামা ঠাকুরের কাছে!

আর এক ভয়ে বুকের রক্ত হিম হয়ে আসে জটার বৌয়ের । আর এবার আর কাঁদো কাঁদো নয়, ভ্যাক করে কেঁদেই ফেলে । “ও সত্য ঠাকুরঝি, তোমার পা-ধোওয়া জল খাই, তোমার কেনা গোলাম হয়ে থাকি, ও বড়ি মামাঠাকুরকে ফেরত দিতে যেও না!”

ফেরত দিতে যেও না!

হঠাৎ সত্য তার নিজের স্বভাবসিদ্ধ হাসি হেসে ওঠে, “এই সেরেছে! ব্যায়রামে পড়ে দেখছি তোমার ভীমরতি ধরেছে বৌ! শাউড়ীর ভয়ে ওষুধ খাবে না, আবার ফেরতও দেবে না, তবে বড়িগুলো কি আমি খেয়ে নেব? দাও, তা হলে একখোরা পানের রস করে দাও, সবগুলো একসঙ্গে গুলে গিলে ফেলি ।”

জটার বৌ এবার মনের কথা খুলে বলে । শাউড়ীর অসাম্বন্ধে ওষুধ খাবার সাহস তার নেই, বলে কয়ে সাম্বন্ধে খাবার তো আরোই নেই, অতএব—

অতএব পুকুরের জলে!

“পুকুরে?”

সত্যর চোখে আগুন জ্বলে ওঠে । “বাবার দেওয়া বড়ি স্বয়ং ধনস্তরী, তা জান? এ বড়ির অপমান করলে, ধনস্তরীর অপমান তা জান?”

“তবে আমি কী করি?”

ফুঁপিয়ে ফুঁপিয়ে কাঁদতে থাকে জটার বৌ।

সত্য ওর অবস্থা দেখে কাতর না হয়ে পারে না, একটু ভেবেচিন্তে বলে, “তা হলে নয় এক কাজ করি, পিসীকেই দিয়ে যাই, বলি বাবা পাঠিয়ে দিয়েছেন। বাবা অবিশ্যি বলেছিলেন পিসীকে দিস না, তা হলে খেতে দেবে না, ফেলে দেবে। তুতিয়েপাতিয়ে কাকুতি-মিনতি করে বলে যাই।

উঠে দাঁড়ায় সত্য, আর সঙ্গে সঙ্গে ওর কাপড়ের একটা খুঁট ধরে ছমড়ে প্রায় ওর পায়ে পড়ে জটার বৌ, “ও ঠাকুরঝি, তার চাইতে তুমি আমার গলায় পা দিয়ে মেরে রেখে যাও, আঁশবটি দে’ কেটে রেখে যাও আমায়।”

সত্য আবার বসে পড়ে।

একটা নিঃশ্বাস ফেলে বলে, “আচ্ছা বৌ, তোমাদের এত ভয় কিসের বলতে পার?”

॥ ছয় ॥

হুম্ হুম্ হুম্।



শুধু হাঁটু পর্যন্ত আটফাটা পা-গুলোই নয়, জিতে-মুখেও ধুলো বেটে যাচ্ছে বেহারাগুলোর। জ্যেষ্ঠের দুপুর আর দুর্ভাগ্য মোঠো রাস্তা। খানিক খানিক পথ তো একেবারে ধু-ধু প্রান্তর, গাছ নেই ছায়া নেই। পথ সংক্ষেপের জন্য মাঝে মাঝে মাঠ ভাঙতে হচ্ছে বলেই লোকগুলো যেন আরও একেবারে জেরবার হয়ে যাচ্ছে। চারটে লোক পালা করে কাঁধ বদলে ছুটছে, তবু থেকে থেকে ঝিমিয়ে যাচ্ছে।

কিন্তু রামকালীরও তো আর এখন পাল্কি-বেহারাগুলোর ওপর দরদ দেখাবার উপায় নেই। অজি চার দিন গাঁ ছাড়া, “তো ধর যো ধর” না হলেও হাতে কটা রুগী ছিল, কে জানে কেমন আছে সে কটা!

গিয়েছিলেন জীরেটের জমিদারবাড়িতে রুগী দেখতে। শুধু তো এক-আধখানা গায়ে নয়, দশখানা গাঁ অবধি নামডাক বদিয়া চাটুঘোর।

রাজার আদরে রেখেছিল ওরা, আর্কুপুয়ে ধরে সাধছিল আরও দুটো দিন থেকে যাবার জন্যে। রাজী হন নি রামকালী। বলে এসেছেন, “প্রয়োজন নেই, যে ওষুধ দিয়ে গেলাম এতেই রুগী তিন দিনে উঠে বসবে। তবে পথ্যাপাশ্যক্রিয়া ব্যবস্থা দিয়ে যাচ্ছি সেটি নিষ্ঠার সঙ্গে পালন করা চাই।”

কবিরাজ মশাই পথে খাবেন বলে ওরা একঝড়ি “কলমের আম” ওঁর পাল্কির মধ্যে তুলে দিয়েছে, আপত্তি শোনে নি। পাঁ ছড়াতে অনবরত ঝুঁটিটা পায়ে ঠেকছে আর বিরক্তি বোধ করছেন রামকালী। এই এক আপদ! পথে তিনি কিছু খান না, একথা ওরা মানতে চাইল না। স্বয়ং জমিদার মশাই দাঁড়িয়ে তুলিয়ে দিলেন। তবু মুখ কাটা ডাব গোটাচারেক পাল্কিতে তুলতে দেন নি রামকালী, বলেছিলেন, “ব্যায়রাগুলো তা হলে আপনার বাগানের এই ফলটলগুলোই বয়ে নিয়ে যাক রায়মশাই, আমি পদব্রজেই যাই!”

সম্পূর্ণ তৈরী আম, জ্যেষ্ঠের দুপুরের ঝলসানি হাওয়ায় একেবারে শেষ তৈরি হয়ে উঠে, থেকে থেকে মিষ্ট সুবাস ছড়াচ্ছিল। রামকালী বিরক্ত হচ্ছিলেন, আর বেহারাগুলো যেন অন্তর দিয়ে সেই সুবাসটুকুই লেহন করছিল। আর ভাবছিল ডাব চারটে পাল্কির বাঁকে বাঁকে নিলেই বা ক্ষতি কি ছিল? তবু তো “কেটির জীবের” ভোগে লাগত।

অন্যমনস্ক হয়ে বোধ হয় ঝিমিয়ে এসেছিল তারা। হঠাৎ চমকে উঠল কর্তার হাঁকে।

পাল্কি থেকে মুখ বাড়িয়ে রামকালী হাঁকছেন, “ওরে বাবা সকল, ঘুমিয়ে পড়িস নে, একটু পা চালা।”

কথাটা শেষ করেই হঠাৎ সুর-ফেঁর্তা ধরলেন কবরেজ, “এই দাঁড়া দাঁড়া, আস্তে কর, পেছনে হঠাৎ যেন আর একটা পাল্কির শব্দ পাচ্ছি।”

চার বেহারার আটখানা পা থমকে দাঁড়াল।

হ্যাঁ, শব্দ একটা আসছে বটে পিছন থেকে। হঠাৎই আসছে। হুম্ হুম্ আওয়াজটা ক্রমশই স্পষ্ট হচ্ছে।

প্রধান বেহারা গদাই ভুঁইমালী পাল্কির বাঁক থেকে ঘাড় সরিয়ে পিছন সড়কের দিকে তাকিয়ে উৎফুল্ল কণ্ঠে বলে ওঠে, “আজ্ঞে কর্তামশাই, নিয়্যাস বলেছেন বটে! পাল্কিই একটা আসছে, মনে নিচ্ছে কোন বিয়ের বর আসছে!”

বিয়ের বর!

রামকালী পাল্কি থেকে গলাটা আরও একটু বাড়িয়ে এবং সে গলার স্বরটাকে অনেকখানি বাড়িয়ে বলেন, “বিয়ের বর এ খবরটা আবার চট করে কে দিয়ে গেল তোকে?”

গদাই ভুইমালী মাথা চুলকে বলে, “পাল্কির কপাটে হলুদ ছোগানো ন্যাকড়া ঝুলছে দেখতে পাচ্ছি কর্তা, ব্যায়রাগুলোর পরনে লালছোপু খেটে!”

খেঁটেটা হচ্ছে ধুতির সংক্ষিপ্ত সংস্করণ। আরও অনেক শ্রমজীবীদের মত পাল্কি-বেহারাদের পুরো ধুতি পরা চল না। জোটেই বা কই? ছালার মত মোটা সাতহাতি খেঁটেই তাদের জাতীয় পোশাক। লোকের বাড়ি কাজে-কর্মে বিয়ে-পৈতেয় লাল রঙে ছোগানো ওই ধুতি মাঝে মাঝে তাদের জোটে। এতে সুবিধেটা খুব। মাস তিন-চার ‘ক্ষার’ না কেচে চালানো হয়।

লাল হলুদ রঙটাই শুধু নয়, ক্রমশ মানুষগুলোও স্পষ্ট হচ্ছে। গদাই আরও একটা উৎফুল্ল আবিষ্কার করে, “পশ্চাতে গো-গাড়িও আসছে কত্তা, বলদের গলার ঘণ্টি শুনতে পাচ্ছি। এ আর বরযাত্রীর না হয়ে যায় না। ইদিকেই কোথাও বে। উই পাশের গাঁর সড়ক দিয়ে বেরিয়েছে।”

“পাল্কি নামা!” গম্বীর কণ্ঠে হুকুম করেন রামকালী।

দেখা দরকার প্রকৃত ঘটনা গদাইয়ের আন্দাজ অনুযায়ী কিনা। আর এও জানা দরকার যদি সত্যিই তাই হয়, কে এমন দুর্বিনীত আছে তাঁর গ্রামে, যে ব্যক্তি মেয়ের বিয়ে দিতে বসেছে, অথচ রামকালীকে জানায় নি! আর এ গ্রামের যদি নাও হয়, খোঁজ নেওয়াও চাই, গ্রামের ওপর দিয়ে বর-যাত্রী নিয়ে যাচ্ছে কোথায়!

রামকালীর মনে যাই থাক, বেহারাগুলো একটুখানির জন্যেও বাঁচল। একটা পাকুড় গাছতলায় পাল্কি নামিয়ে, খানিক তফাতে গিয়ে কাঁধের গামছা ঘুরিয়ে বাতাসে খেতে লাগল।

কত্তামশায়ের চোখের সামনে তো আর বাতাস খাওয়া চলেনি!

কিছুক্ষণ পরেই দূরবর্তী পাল্কি অদূরবর্তী এবং ক্রমশ নিকটবর্তী হল।

রামকালী বেরিয়ে পড়ে কাঁধের মটকার চাদরখসি গুছিয়ে কাঁধে ফেলে রাজোচিত ভঙ্গীতে দাঁড়িয়ে জলদগম্বীর কণ্ঠে হাঁক দিলেন, “কে যায়?”

পাল্কি থামল। না থেমে এগিয়ে যাবার সাধ্য কার আছে, এই কণ্ঠকে উপেক্ষা করে?

পাল্কি থামল।

বর আর বরকর্তা এতে সমাসীন। বরকর্তার সঙ্গে সঙ্গে কিশোর বরটিও সভয়ে একটু মুখ বাড়াল।

ওই দীর্ঘকায় গৌরকান্তি পুরুষ মাটিতে নেমে দাঁড়িয়ে, অতএব কে পাল্কি চড়ে বসে থাকতে পারে তাঁর সামনে?

সে পাল্কি থেকেও নামলেন বরকর্তা।

করজোড়ে বললেন, “আপনি আজ্ঞে?”

রামকালীর কিছু তখন ভুরু কুঁচকেছে, তীক্ষ্ণ দৃষ্টির শরসন্ধান চলছে পাল্কির মধ্যে। অভ্যাবসশতই দুই হাত তুলে প্রতি-নমস্কারের ভঙ্গীতে বললেন, “আমি রামকালী চাটুয্যে।”

“রামকালী চাটুয্যে!”

ভদ্রসন্তান বিহ্বল হয়ে—না আত্মগত, না প্রশ্নসূচক, কেমন যেন আলগা ভাবে উচ্চারণ করলেন, “কবরেজ!”

“হ্যাঁ। ছেলেটির কপালে চন্দন দেখলাম মনে হল, বিবাহ নাকি!”

সে ভদ্রলোক রামকালীর চাইতে ছোট না হলেও বিনয়ে কীটানুকীটের মত ছোট হয়ে পায়ের ধুলো নিয়ে বলেন, “আজ্ঞে হ্যাঁ। ওঃ, কী পরম ভাগ্য আমার যে এই শুভযাত্রায় আপনার দর্শন পেলাম।”

রামকালীর দৃষ্টির সেই শরসন্ধান বন্ধ হল না, তবু মৃদু হেসে বললেন, “চেনেন আমায়?”

“আহা! আপনাকে চেনে না এ তল্পাটে এমন অভাগা কে আছে? তবে নাকি চাক্ষুষ দর্শনের সৌভাগ্য ইতিপূর্বে হয় নি। রাজু, বেরিয়ে এসে পায়ের ধুলো নাও!”

“থাক থাক, বিয়ের বর!” রামকালী স্বভাবসিদ্ধ গম্বীর গলায় প্রশ্ন করলেন, “আপনার পুত্র?”

“আজ্ঞে না, ভ্রাতৃপুত্র। পুত্র আমার কনিষ্ঠ সহোদরের। সে আছে পেছনে গো-যানে। আরও সব আত্মকুটুম্ব আসছেন তো!”

“হঁ, কন্যাটি কোথাকার ?”

“আজ্ঞে এই যে ‘পাটমহলে’র। পাটমহলের লক্ষ্মীকান্ত বাঁড়ুয়োর পৌত্রী—”

“লক্ষ্মীকান্ত বাঁড়ুয়োর পৌত্রী ? রামকালী যেন সহসা সচেতন হলেন, “তাই নাকি ? আপনারা কোথাকার ? আপনার ঠাকুরের নাম ?”

“আমরা বলাগড়ের। ঠাকুরের নাম ঈশ্বর গঙ্গাধর মুখোপাধ্যায়, পিতামহের নাম ঈশ্বর গুণধর মুখোপাধ্যায়, আমার নাম—”

“ধাক, আপনার নামে প্রয়োজন নেই। তা হলে আপনারা মুখুটি কুলীন ? তা হাবভাব এমন যজমেনে ভট্টাচার্যের মতন কেন ? কিন্তু সে যাক, দুটো কথা আছে আপনার সঙ্গে। বর নিয়ে বেরিয়েছেন কখন ?”

‘যজমেনে ভট্টাচার্য’ শব্দটায় ঈষৎ ক্ষুব্ধ হয়ে পাত্রের জেঠা গম্ভীরভাবে বলেন, “আত্মদায়িক শ্রাদ্ধের পর।”

“সে তো বুঝলাম, কিন্তু সেটা কত বেলায় ?”

“এই এক প্রহরটাক আগে হবে।”

“হঁ! পাত্রের কপালের ঐ চন্দনরেখা কি সেই তখনকারই নাকি ?”

চন্দনরেখা!

এ আবার কেমন প্রশ্ন!

পাত্রের জেঠা নানাবিধ প্রশ্নের সম্মুখীন হবার জন্য প্রস্তুত হচ্ছিলেন, কিন্তু পাত্রের কপালের চন্দনরেখাঙ্কনের কালনির্ণয়ের মত এমন অদ্ভুত প্রশ্নের জন্য নিশ্চয় প্রস্তুত ছিলেন না। তাই অবোধের মত বলেন, “কি বলছেন ?”

“বলছি, ছেলের কপালে এই যে চন্দন পরানো হয়েছে, ওটা কি সেই যাত্রাকালেই ?”

“আজ্ঞে হ্যাঁ, তা তো নিশ্চয়ই।” পাত্রের জেঠা সোৎসাহে বলেন, “যাত্রাকালে মেয়েরা যেমন পরিয়ে দেয় তেমনি দেওয়া হয়েছে, আমাদের বাড়ির মেয়েদের বুঝলেন কিনা এসন ব্যাপার খুব নামডাক আছে। পাড়া থেকে ডাকতে আসে পিঁড়ি আলপনা দিতে, শ্রী গড়তে, বর কনে সাজাতে—”

রামকালী ওই পাল্কির দিকে তাকায় তাকাতে আবার কেমন অন্যমন্য হয়ে পড়েছিলেন, ইত্যবসরে পঞ্চাবতী গোরুর গাড়ি দুখানি এসে পড়েছে। পাল্কি নামানো এবং অপর এক পাল্কির আরোহীর সঙ্গে বাক্যবিন্যাসের ব্যাপার দেখে ঈষৎ ঘাবড়ে গিয়ে বরের বাপও নেমে এসে দাঁড়িয়েছেন।

অন্যমন্য রামকালী একটা দীর্ঘনিশ্বাস ফেলে গাড়ি স্বরে বলেন, “আমি আপনাকে একটা অনুরোধ করছি মুখুজ্যে মশাই, আপনি যাত্রা স্থগিত করুন।”

যাত্রা স্থগিত করুন!

বিবাহযাত্রা! হাঁ করে তাকিয়ে থাকেন বরের জেঠা আর বরের বাপ। লোকটা পাগল না শয়তান! না কনের বাড়ির সঙ্গে গভীরতম কোন শত্রুতা আছে ?

ওদিকে ঘুম ছুটে যাচ্ছে বেহারাদের, রোদুরটা অসহনীয় হয় উঠেছে। দু পাল্কির বেহারার অদূরে দাঁড়িয়ে পরস্পর বাক্যবিনিময় করে ব্যাপারটা অনুধাবন করার চেষ্টা করতে ঘন ঘন এদিকে তাকাচ্ছে কখন পাল্কি তোলায় ডাক পড়ে।

ব্যাপারটা যে একটা কিছু হচ্ছে, এ অনুমান করে ইত্যবসরে গরুর গাড়ি থেকে এক ব্যক্তি লাফিয়ে নেমে পড়েছেন, যিনি হচ্ছেন বরের পিসে; গাড়ির ছইয়ের মধ্যে গলদঘর্ম হয়ে আসতে আসতে এমনিতেই মেজাজ তাঁর চড়ে উঠেছিল, নেমেই যাত্রা স্থগিতের কথা শুনে তেলেবেতনে জুলে উঠে বললেন, “কে মশাই আপনি ? ভাঙুচি দেবার আর জায়গা খুঁজে পান নি ? যাত্রা করে বর বেরিয়েছে, পথের মাঝখানে দাঁড় করিয়ে ভাঙুচি দিচ্ছেন ?”

মুখুজ্যে ভ্রাতৃত্ব ভগ্নীপতির এ হেন দুর্বিনয়ে বিচলিত হয়ে তাড়াতাড়ি বলে ওঠেন, “আঃ গান্ধুলী মশাই, কাকে কি বলছেন ? ইনি কে তা জানেন ?”

“জানতে চাইনে মুখুয্যে, থামো ভূমি। যে ব্যক্তি এ হেন অর্বাচীনের ন্যায় কথা কয়—”

“চোপরাও!” হঠাৎ যেন ঘুমন্ত বাঘ জেগে উঠে গর্জে উঠল, “চোপরাও বামনের ঘরের কুমাণ্ড!”

“মুখুজ্যে!” চোঁচিয়ে উঠল বাঘের পর খেঁকশিয়াল, “দাঁড়িয়ে অপমানিত হবার জন্যে তোমার ছেলের বিয়ের বরযাত্র হয়ে আসিনি। ইতি বোধ হয় তোমার কোন বড় কুটুম্ব ? তা একে নিয়েই বিয়ে দেওয়াও গে, আমি চললাম।”

“আহাহা, করেন কি গান্ধুলী মশাই! ইনি হচ্ছেন আমাদের সাতখানা গাঁয়ের মাথা কবিরাজ চাটুয্যে মশাই। অবশ্যই অনিবার্য কোন কারণে ইনি যাত্রা স্থগিতের আদেশ—”

“কবরেজ চাটুয্যে! আঁ!”

গান্ধুলীর কাছার কাপড় আলগা হয়ে পড়ে, তিনি সহসা আধবিঘটক জিভ বার করে সে জিভে দাঁতে কেটে, দু হাতে দু কান মলে বয়সের মর্যাদা ভুলে প্রণাম করে বসেন।

রামকালী প্রণামরতের প্রতি দৃকপাত মাত্র না করে সমান স্থৈর্যের সঙ্গে বলেন, “হ্যাঁ, অনিবার্য কারণেই বলছি মুখ্য্যে মশাই, যাত্রা স্থগিত রাখুন! নইলে অকারণ আপনাদের পুত্রের বিবাহযাত্রা স্থগিত রাখতে বলব, এমন অর্বাচীন সত্যিই আমি নই।”

বড় মুখ্য্যে দু হাত কচলে বলেন, “আজ্ঞে তা আর বলতে! মানে ইয়ে লক্ষ্মীকান্তবাবুর বংশে কোন দোষ—”

“আঃ মুখ্য্যে মশাই, অনুগ্রহ করে আমাকে অত ইতর ভাববেন না। আমি বলছি পুত্রের বিয়ে দিতে গিয়ে আপনি বিপদে পড়বেন। আপনার পুত্র অসুস্থ।”

পুত্র অসুস্থ! এ আবার কি প্যাচের কথা!

এ যে দেখছি সমুদ্রের দিক থেকে পাথর ছুটে আসা! এ পাথরের আশঙ্কা তো ছিল না!

কন্যাপক্ষ কোন গোলমাল আছে, এবং ইনি অবশ্যই কন্যাপক্ষের কোন ‘বিশেষ হিতৈষী’, এইটাই ভাবছিলেন মুখ্য্যেরা। যেটা স্বাভাবিক। তা নয়, পথের মাঝখানে আটকে এ কী উল্টোটা চাপ!

“পুত্র অসুস্থ! বলেন কি কবিরাজ মশাই? এ যে একটা অসম্ভব কথা বলছেন। অমন সুস্থ সহজ পুত্র আমার। উপবাসে ও মধ্যাহ্নকালের উত্তাপে বোধ করি ঈষৎ শুষ্ক দেখাচ্ছে!” ছোট মুখ্য্যে কাতরভাবে বলেন।

“না, শুষ্ক দেখাচ্ছে না।” রামকালী জলদগম্বীর স্বরে বলেন, “বরং বিপরীত। রীতিমত রসস্থই দেখাচ্ছে, লক্ষ্য করলেই টের পাবেন। আমি গোড়াতেই লক্ষ্য করেছিলাম, এবং আপনাকে নিবৃত্ত করার সংকল্প নিয়েই আটকেছি। ছেলোটের চেহারায় আমি শিরঃশূলী-সান্নিপাতিকের লক্ষণ দেখতে পাচ্ছি। বিবাহসভায় নিয়ে গিয়ে সন্ধটে পড়বেন। বাড়ি ফিরে যান, কন্যার বাড়িতে সংবাদ দিন।”

বরের পিসে পূর্ব বিনয় ভুলে গিয়ে রুখে গঠেন, “ভালা খামেলা করলে তা দেখছি। আজ বিবাহ, রাত্রির প্রথম প্রহরে লগ্ন, এখন ছেলেকে বাড়ি ফিরিয়ে নিয়ে যাব, আর কন্যাপক্ষকে সংবাদ দেব পাত্র অসুস্থ? এ কি ছেলের হাতের মোরা নাকি? বুঝতে পারছি আপনি কন্যাপক্ষের একজন মন্ত হিতৈষী!”

রামকালীর গৌর মুখ রোদের তাতে এমনিতেই লাল টকটকে হয়ে উঠেছিল, এবার আগুনের মত গনগনে দেখাল।

তবু উত্তেজিত হলেন না।

স-ভাচ্ছিল্যে গান্ধুলীর প্রতি একটা কটাক্ষপাত করে বললেন, “হ্যাঁ ঠিক বলেছেন, বিশেষ হিতৈষী। লক্ষ্মীকান্ত বাঁড়ুয্যে মশাই আমার মাতুলের সতীর্থ পিতৃতুল্য। তাঁর পৌত্রীটি যে বিবাহরাত্রেই বিধবা হয় এটা আমার অভিপ্রেত হতে পারে না।”

নির্মল নির্মেঘ আকাশ থেকে যেন বজ্রপাত ঘটল।

এ কী সর্বনেশে অলক্ষণের কথা!

এ কী অভিশাপ, না অপ্রকৃতিস্থ মস্তিষ্কের প্রলাপ? মুখ্য্যে গলার পৈতে হাতে জড়িয়ে “হাঁ হাঁ” করে উঠলেন।

রামকালী নিবাত নিরুপ দীপশিখা, —কঠিনহৃদয় বিচারক অপরাধীর প্রতি মৃত্যুদণ্ডদেশ দিয়েও যেমন স্থির থাকে, তেমনি অচল অটল স্থির হয়ে দাঁড়িয়ে রইলেন।

অভিশাপ দেওয়া হল না, পৈতে হাত থেকে ছেড়ে মুখ্য্যেরা কেঁদে উঠলেন, “এ কী বলছেন কবরেজ মশাই?”

“কি করব বলুন, আমি মুখের উপর স্পষ্ট বলতে চাই নি, আপনারাই বললেন। শুনুন, যদি হিত চান, এখনও পুত্রকে তার জননীর কাছে নিয়ে যান। স্পষ্ট দেখতে পাচ্ছি স্বয়ং ‘কাল’ ওর শিয়রে দাঁড়িয়ে। আর বেশী বাক্যব্যয়ে সময়ের অপচয় করবেন না, তাছাড়া আপনারা উচাটন হলে পুত্র বিহ্বল হবে।”

কিন্তু মুখুয্যেরাও তো রক্তমাংসের মানুষ। ওদের বিশ্বাস—অবিশ্বাস দিয়ে তৈরী মন। যে ছেলে পাল্কির মধ্যে দিবা বসে রয়েছে, মাঝ-মাঝে মুখ বাড়িয়ে দেখেও নিচ্ছে কী হচ্ছে এখানে, যার কপালে এখনও চন্দনের রেখা জ্বলজ্বল করছে, আর গলার মালা থেকে সুগন্ধ বিকীর্ণ করছে, সামান্য একটা মানুষের কথায় বিশ্বাস করে বসবেন যে সে ছেলের শিয়রে শমন দাঁড়িয়ে! আর সেই কথায় বিশ্বাস করে একটা নিরীহ ভদ্রলোককে মরণান্তক সর্বনাশের গহ্বরে নিক্ষেপ করে মৃতের মত 'যাত্রা-করা' বর নিয়ে ফিরে যাবেন! বাঁড়ুয্যেদের হবে কি? কন্যা ভ্রষ্টালগ্না হওয়া মৃত্যুর চাইতে কি কিছু কম?

না, এ অসম্ভব! নিশ্চয় এ কোন চক্রান্ত!

হয় এই চাটুয্যের সঙ্গে লক্ষ্মীকান্ত বাঁড়ুয্যের ঘোরতর কোন শত্রুতা আছে, নচেৎ এই লোকটা আদৌ চাটুয্যেই নয়! কোন ক্ষাপাটে বামন! তবু এই ব্যক্তিত্বের প্রভাবের সামনে কেমন যেন সব গুলিয়ে যাচ্ছে। আর সন্তানের সম্পর্কে অত বড় অভিশাপ-সদৃশ্য বাণী!

ছোটমুখুয্যে একবার অদূরবর্তী পাল্কির দিকে তাকিয়ে রুদ্ধশ্বাস-বক্ষে বলেন, “আমি তো রোগের কোন লক্ষণ দেখছি না কবরেজ মশাই!”

রামকালী একটু বিবাদব্যঞ্জক হাসি হাসেন, “তা দেখতে পেলো তো আমার সঙ্গে আপনার কোন প্রভেদ থাকত না মুখুয্যে মশাই! আসুন, এদিকে সরে আসুন। দেখছেন তাকিয়ে ছেলের ললাটে ওই চন্দনরেখা? সদ্য চন্দনের মত আর্দ্র! অথচ বলছেন এক প্রহরকাল আগে চন্দন পরানো হয়েছে! তাহলে সে চন্দন এতক্ষণে শুকিয়ে খড়ি হয়ে যাবার কথা। হয় নি। কারণ চোরা সান্নিপাতিকে সর্বশরীর রসস্থ হয়ে উঠেছে—”

“এই কথা!” হঠাৎ পাত্রের জেঠা হেসে ওঠেন, “কবিরাজ মশাই, খুব সম্ভব পথশ্রমে আপনি কিছু অধিক ক্লান্ত, তাই লক্ষণ নির্ণয়ে ভুল করছেন। গ্রীষ্মকালে ঘাম-নির্গমের দরুন চন্দন শুকিয়ে ওঠবার অবকাশ পায় নি, এই তো কথা! ওহে বেয়ারারা, চল চল। পাল্কি ওঠাও। শুভযাত্রায় এ কী বিপত্তি!”

লক্ষণ নির্ণয়ে ভুল করেছেন রামকালী। রামকালীর নিজেরই মাথার শিরা ফেটে যাবে নাকি!

একবার নিজের পাল্কির দিকে অঙ্গসর হতে উদ্যত হলেন রামকালী, কিন্তু আবার কি ভেবে থমকে দাঁড়িয়ে আরও ভারী গলায় বললেন, “সুনু মুখুয্যে মশাই, রামকালী চাটুয্যের লক্ষণ নির্ণয়ে ভুল হয়েছে, এ কথা যদি অন্য কোন ক্ষেত্রে উচ্চারণ করতেন, সে ওদ্ধত্যের সমুচিত উত্তর পেতেন। কিন্তু এখন আপনার সঙ্কট সময়, ওদিকে বাঁড়ুয্যেরাও বিপন্ন, তাই মার্জনা পেয়ে গেলেন। লক্ষ্মীকান্ত বাঁড়ুয্যের বাড়ি এখনই সংবাদ দেওয়া প্রয়োজন, এবং সে কাজ আমাকেই করতে হবে। প্রয়োজন হলে পাল্কি ছেড়ে দিয়ে ঘোড়া নিতে হবে। তবে আপনাকে শেষ সাবধান কথা জানিয়ে যাচ্ছি, ছেলেটির মাথার শিরা ছিড়ে ভিতরে রক্তক্ষরণ শুরু হয়েছে, চোখের শিরার রং এবং রগের শিরার স্ফীতির দিকে লক্ষ্য করলে আপনিও ধরতে পারবেন। মনে হচ্ছে খানিক বাদেই বিকার শুরু হবে। জানানো আমার কর্তব্য বলেই জানিয়ে দিলাম। বলছিলেন না লক্ষণনির্ণয়ে ভুল! ঈশ্বরের কাছে প্রার্থনা করছি, রামকালী কবরেজের বিচারে যেন ভুলই হয়ে থাকে। রোদের ঘামকে ‘কালঘাম’ ভাবার ভ্রান্তিই তার হয়েছে, এই যেন হয়। আর কি বলব! আচ্ছা নমস্কার।ওরে গদাই, তোলা পাল্কি। পা চালিয়ে একবার বসিরের ওখানে চল দিকি, ঘোড়াটাকে নিতে হবে।”

পাল্কি চলতে শুরু করেছে হঠাৎ ছুটে এলেন ছোট মুখুয্যে, প্রায় ডুকরে কেঁদে চীৎকার করে উঠলেন, “কবরেজ মশাই, এত বড় সর্বনাশের কথা বললেন যদি তো একটু গুণ্য দিলেন না?”

রামকালী গভীর বিষণ্ণ ভাবে হাতটা একটু নেড়ে সে হাত কপালে ঠেকিয়ে বললেন, “দেবার হলে আপনাকে বলতে হত না, আমি নিজেই দিতাম। কিন্তু এখন আর স্বয়ং ধনুত্তরীর বাবারও সাধ্য নেই।”

ও পাল্কিতে তখন বড় মুখুয্যে উঠে পড়ে বিরক্তভাবে বলে ওঠেন, “দুর্গা দুর্গা, যত সব বিঘ্ন! যাত্রাকালে কার মুখ দেখে বেরোনো হয়েছিল! কোথা থেকে এক উৎপাত জুটে, —এই রাজু, অমন চুলছিল কেন? গরমে কষ্ট হচ্ছে?”

রাজু রক্তবর্ণ দুটি চোখ মেলে বলে, “না জেঠামশাই, গুণু বড্ড শীত করছে।”



আঁচল ডুবিয়ে নাড়া দিয়ে দিয়ে তলার জল ওপরে আর ওপরের জল তলায় করছিল ওরা তগু জল শেতল করতে। বেলা পড়ে এসেছে, তবু পুকুরের জল টগবগিয়ে ফুটছে, এ জলে নেমে ঝাঁপাই ঝড়লে গা ঠাণ্ডা হবার বদলে দাহই হয়, তবু জলের আকর্ষণ তাই বেলা পড়তেই জলে পড়া চাই পাড়ার নবীনাকুলের।

চাটুয্যে-পুকুরের জল 'তোল মাটি ঘোল' করছিল পুণ্ডি টেপি পুঁটি খেঁদি প্রমুখ নবীনারা। সত্য কেন এখনো এসে হাজির হয়নি তাই ভাবছে ওরা আর অনুপস্থিত সত্যর সন্তোষ বিধানের জন্যেই বোধকরি জল শেতল করার অভিযানটা এত জোর কদমে চালাচ্ছে। সত্য ওদের প্রাণপতুল।

সত্য কি শুধুই তাদের দলনেত্রী ?

ভগবান জানেন কোন্ গুণে সত্য সকলের হৃদয়নেত্রীও। 'সত্য'-বিহীন খেলা ওদের শিবহীন দক্ষ্যজেরই সামিল। পুকুরে ঝাঁপাই ঝোড়ার ব্যাপারে সত্যই রোজ অগ্রণী, তাই ওরা বার বার ফুটন্ত জলকে তলা-ওপর করতে করতে এ গুকে প্রশ্ন করছিল, "সত্যর কি হল রে ?" "ঘরে তো দেখলাম না ?" "বলেছিল তো ঠিক সময়ে দেখা হবে।" "বাগানে কোথাও আছে নাকি এখনো ?" "দূর, একা একা কি আর বাগানে ঘুরবে ? বে'ওলা মেয়ে, ভয় নেই পরাণে ?" "ভয়! সত্যর আবার ভয়! দেখিস ও শ্বগুরবাড়ি গিয়ে শাউড়ী পিসশাড়ীডীকেও ভয় করবে না।" "তা আশ্চর্য্য নেই, ও যা মেয়ে!"

সত্য যে তার সমস্ত সখী-সঙ্গিনীদের প্রাণের দেবতা তার প্রধান কারণ বোধ হয় সত্যর এই নির্ভীকতা। নিজের মধ্যে যে গুণ নেই, যে সাহস নেই, সে গুণ সে সাহস অন্যের মধ্যে দেখতে পেলে মোহিত হওয়া মানুষের স্বভাবধর্ম। নির্ভীকতা-স্বাভীতও আরও কত গুণ আছে সত্যর। খেলাধুলোর ব্যাপারে সত্যর উদ্ভাবনী শক্তির জুড়ি নেই, বল আর কৌশল দুই-ই তার অন্যের চাইতে বেশি একশ' গুণ। মোটামোটা একটা গাছের কান্নে সুড়িকে দড়ি বেঁধে একা আনা সত্যবতীর পক্ষে আদৌ অসম্ভব নয়, আবার সেই গাছের গুঁড়িকে সুড়িয়ে পুকুরের জলে ফেলে ডিঙি বানানোও সত্যর কৌশলেই সম্ভব।

এর ওপর আবার 'পয়ার' বাঁধা!

পয়ার বাঁধার পর থেকে পাড়ার সমস্ত ছোট ছেলে-মেয়েই তো সত্যর পায়ে বাঁধা পড়েছে।

সেই সত্যর জন্য জল শেতল করছে ওরা এ আর বেশী কথা কী! কিন্তু সত্যর এত দেরি কেন ? এদিকে যে এদের মেয়াদ ফুরিয়ে আসছে। ঠাকুমা-পিসিমা একবার চৈতন্য পেয়ে খোঁজ করলেই তো 'হয়ে' গেল!

নেহাৎ নাকি ঠিক এই সময়টুকুই অভিভাবিকাদলের কিঞ্চিৎ দিবানিদ্রার সময়, তাই এদের এই অব্যাহ স্বাধীনতা। হ্যাঁ, এই পড়ন্ত বেলাতেই গিন্ধীরা একটু গড়িয়ে পড়েন। সারা বছর তো নয়, (মেয়েমানুষের দিবানিদ্রার মত অলক্ষুণে ব্যাপার আর কি আছে সংসারে ?) নেহাৎ এই আমের সময়টা।

আমের যে একটা 'নেশা' আছে।

গিন্ধীরা বলেন, "আমের মদ"।

আম খাও বা না খাও, এ সময়ে শরীর টিস্ টিস্ করবেই। অবশ্য না খাওয়ার প্রশ্ন ওঠেই না। আম-কাঁটাল আবার কে না খায় ? হরু ভট্টাচার্যের মার মত কে আর আম-হেন বস্তুকে জগন্নাথের নামে উৎসর্গ করতে পারে ? হরু ভট্টাচার্যের মা সেবার শ্রীক্ষেত্র গিয়ে এই কাণ্ড করে এসেছেন, 'ক্ষেত্রর করার' পর জগন্নাথকে ফল দিতে হয় বলে আম ফলটি দিয়ে এসেছেন। মনের আক্ষেপে সেবার হরু ভট্টাচার্য আমবাগান বেচে দিতে চেয়েছিলেন। বলেছিলেন, "মার ভোগেই যদি না লাগল তো, আমবাগানে আমার দরকার ?" তা ভট্টাচার্যের মা ছেলেকে হাতে ধরে বুঝিয়ে ঠাণ্ডা করেছিলেন, বলেছিলেন, "বাবা, আজন্মকাল তো খেয়ে এলাম তবু খাওয়ার লালসা যোচে না, তাই বলি যে দবিত্যে এত আসক্তি, সেই দবিত্যই জগন্নাথকে উচ্ছৃঙ্খ্য করব। তাই বলে তুই বাগান নষ্ট করবি ? ছেলেপুলে খাবে না ?"

ছেলেপুলে বুড়ো যুবো আমের ভক্ত সবাই। আমের মরশুমে দিনে এককুড়ি দেড়কুড়ি আম খাওয়া তো কিছুই না।

অবশ্য সব আম সবাই খায় না।

অর্থাৎ পায় না।

সংসারের সদস্যদের শ্রেণী হিসেবেই আমার শ্রেণী হিসেব করে ভাগ হয়। কর্তাদের নৈবেদ্যে লাগে “জোর কলম” গোলাপখাস, ফীরসাপাতি, নবাব পছন্দ, বাদশা ভোগ, চাউশ ফজলী ইত্যাদি, গিন্গীদের জন্যে সরানো থাকে পেয়ারাফুলি, বেলসুবাসী, কাশীর ছিনি, সিদুরেমেষ।

আর বৌ কি ছেলেপুলেদের ভাগ্যে জেটে রাশির আম। তা রাশি রাশি না পেলে যাদের আশ মিটবে না তাদের জন্যে রাশির বরাদ্দ ছাড়া আর কি বরাদ্দ হতে পারে? বাড়ির ঝুড়ি-ঝুড়িতেই কি ওদের আশা মেটে? দু বেলাই জলখাবার ঝুড়ি ঝুড়ি তো পায়, কারণ গিন্গীরা প্রকৃতির এই দক্ষিণ্যের সময় মুড়ি ভাজা পর্বতি থেকে কিঞ্চিৎ রেহাই নেন। কিন্তু হলে কি হবে, বাড়ি থেকে “মধুকুলকুলি” আমার পাহাড় শেষ করেই ওরা তক্ষুণি ছোটে হয়তো বা ‘বৌ পালানে’ কি “বাঁদর ভায়া-চাঁকা” আমার বাগানে। বাঘা তেঁতুলের বাবা জাতীয় সেই আমগুলি পার করার সহায় হচ্ছে মুঠো মুঠো নুন। অবিশ্যি তুচ্ছ হলেও বস্তুর সঞ্চার করতে বালক-বাহিনীকে বিশেষ বেগ পেতে হয়, কারণ ওর আশ্রয়স্থল যে একেবারে রান্না-ভাঁড়ারে। যা নাকি সম্পূর্ণ গিন্গীদের এলাকা। আর যে গিন্গীরা হচ্ছেন একেবারে সহানুভূতিহীনতার প্রতীক। ছেলেপুলেদের সব কিছুতেই তো তাঁরা ঝড়গহস্ত। নুন একটু চাইতে গেলেই প্রথমটা একেবারে তেড়ে মারতে আসবেন জানা কথা! তবে নাকি ছেলেগুলোর খুব ভাগ্যের জোর যে প্রায় সব সময়ই ওরা ওনাদের অস্পৃশ্য। কাজেই মারতে আসলেও মারতে পারেন না। তার পর বহুবিধ কাকুতি-মিনতির পর যদি বা দেবেন তো, সে একেবারে সোনার ওজনে। দেবেন আর সঙ্গে সঙ্গে বলবেন “যাচ্ছিস তো টুক বিষ আমগুলো গিলতে? ঘরে এত খায় তবু আশ মেটে না গা! কী রাক্ষুসে পেট গো, কী লক্ষীছাড়া দিশে! মরবি মরবি, রক্ত-আমাশা হয়ে মরবি। সবগুলো একসঙ্গে ‘মনসাতলা’য় যাবি। যত সব পাপগুলো একপ্তর জুটেছে।”

গালমন্দ-বিহীন লবণ?

সে ওরা কল্পনাও করতে পারে না।

তবে সত্য আগে আগে চরণ মুদির দোকান থেকে বেশ খানিকটা সঞ্চার করে আনতে পারত, কিন্তু ইদানীং অর্থাৎ বড় হয়ে ইস্তক মুদির দোকানে ভিক্ষে করতে যেতে লজ্জা করে। বড় জোর দূরে দাঁড়িয়ে থেকে নিতান্ত একটা শিশুকে লেপিয়ে দেয়।

কবরেজের মেয়ে বলে সমাজে সত্যের কিছুটা প্রতিষ্ঠা আছে।

সে প্রতিষ্ঠার মর্যাদাটাও তো রাখতে হয়?

আজ দুপুরে আমবাগান-পর্বে সত্য ছিল, তার পর কখন একসময় যেন বাড়ি চলে গিয়েছিল।

যেদি একটু কল্পনা-প্রবণ, তাই সে বলে, “সত্যর স্বপ্নরবাড়ি থেকে কেউ আসে নি তো?”

“দূর! স্বপ্নরবাড়ি থেকে আবার শুধু শুধু কেউ আসবে কেন? আর আসেও যদি, সত্যর সঙ্গে কি? যে আসবে সে তো চণ্ডীমণ্ডপে বসবে।”

সহসা পুঁটি চোঁচিয়ে ওঠে, “আসছে আসছে!”

“আসছে! বাবা, ধড়ে পেরাণ পাই।”

“এত দেরি কেন রে সত্য? আমরা সেই কখন থেকে জল ঠাণ্ডা করছি!”

সত্য বিনাবাক্যে গম্ভীর ভাবে ঘাটের পৈঠের ভাঙাচোরা বাঁচিয়ে জলে নামে।

“কি রে সত্য, মুখে কথা নেই যে? বাবা, আজ এত পায়-ভারী কেন রে তোর?”

সত্য একমুখ জল নিয়ে কুলকুচো করে ঠোঁট বাঁকিয়ে বলে “পায়-ভারী আবার কী! মনিষ্যির রীত-চরিত্তির দেখে যেনা ধরে গেছে!”

“ওমা, কেন রে? কাকে দেখে? কার কথা বলছিস?”

সত্য জুলন্ত স্বরে বলে, “বলছি আমাদের জটাদার বৌয়ের কথা। গলায় দড়ি! গলায় দড়ি! মেয়েজাতের কলঙ্ক!”

সত্যর বয়স ন বছর, অতএব সত্যর পক্ষে এ ধরনের বাক্যবিন্যাস অসম্ভব, এমন কথা ভাববার হেতু নেই। শুধু সত্য কেন—নেহাৎ ন্যাকাহাবা মেয়ে ছাড়া, সে আমলে আট-ন বছরের মেয়েরা এ ধরনের বাক্যবিন্যাসে পোক্তই হত! না হবে কেন? চার বছর বয়স থেকেই যে তাকে পরের বাড়ি

প্রথম প্রতিশ্রুতি—৩

যাওয়ার তালিম দেওয়া হত, আর বয়স্কদের মহলেই বিচরণের ক্ষেত্র নির্বাচন করা হত। সে ক্ষেত্রে 'শিশু' বলে কোন কথাই বাদ দেওয়া হত না তাদের সামনে।

কাজেই সত্য যদি কারো উপর খাপুপা হয়ে তাকে 'মেয়েজাতের কলঙ্ক' বলে অভিহিত করে থাকে, আশ্চর্য হবার কিছু নেই।

পুণ্ডি তাড়াতাড়ি প্রশ্ন করে ওঠে, "কেন রে, কি হয়েছে?"

"যম জানে!" বলে প্রথমটা খানিকক্ষণ যমের উপর ভার ফেলে রেখে, অতঃপর সত্য মুখ খোলে, 'জন্মে আর ওর মুখ দেখছি না! ছি ছি! গেছলাম! বলি আহা, সোয়ামীর শাউড়ীর ভয়ে রোগের ওষুধটুকু পর্যন্ত খেতে পায় না, যাই একবার দেখে আসি কেমন আছে। সেজপিসী তারকেশ্বর গেছে শুনেছি, মনটা তাতেই আরও খোলসা ছিল। ওমা, গিয়ে ঘেন্নায় মরে যাই, কী দুঃস্বপ্নবিশি, কী দুঃস্বপ্নবিশি!"

এরা শঙ্কিত দৃষ্টি মেলে তাকিয়ে থাকে, না জানি কোন ভয়ঙ্কর কাহিনী উদ্ঘাটন করে বসে সত্য।

শুধু পুণ্ডি ভয়ে ভয়ে বলে, "কি দেখলি রে?"

"কি দেখলাম? বললে পেতায় করবি? দেখি কিনা ঘরে জটাধা বসে, আর বৌ কিনা তাকে পান সেজে দিচ্ছে, আর হাসি-মস্করা করছে।"

জটাধা?

খৈদি পুঁটি সকলে একযোগে বলে ওঠে, "ও হরি! এতেই তোর এত রাগ! শাউড়ী বাড়ি নেই, তাতেই বুকের পাটাটা বেড়েছে আর কি।"

"বুকের পাটা বেড়েছে বলে পান সেজে খাওয়াবে? হাসি-মস্করা করবে?" সত্য যেন ফুলতে থাকে।

পুণ্ডি আরও ভয়ে বলে, "তা পরপুরুষ তো আর নয়? নিজের সোয়ামী—"

"নিজের সোয়ামী!" সত্য ঝটপট বার-দুই কুলকুচো কঁপে বলে, "খ্যাংরা মারো অমন সোয়ামীর মুখে! যে সোয়ামী লাখি মেরে যমের দক্ষিণ দোরে পাঠায় তার সঙ্গে আবার হাসি-গপ্প? গলায় দিতে দড়ি জোটে না? আবার আমায় কি বলেছে জানিস? 'আমার সোয়ামী আমায় মেরেছে, তোমায় তো মারতে যায় নি ঠাকুরঝি? তোমার এত গায়ে জ্বালা কেন যে ছড়া বেঁধে গালমন্দ করতে আস?' এর পর আবার আমি ওর মুখ দেখব?"

আঁচলটাকে গা থেকে খুলে জোরে জোরে জলের ওপর আছড়াতে থাকে সত্য।

সখীবাহিনী কিষ্কিৎ বিপদে পড়ে।

ওরা অভিযুক্ত আসামিনীকে খুব একটা দোষ দিতে পারে না, কারণ স্বামী একদা একদিন বেদম মেরেছে বলে যে জন্মে আর সে স্বামীকে পান সেজে খাওয়ানো চলবে না, এতটা কঠোর ক্ষমাহীন মনোভাব তাদের পক্ষে আয়ত্ত করা শক্ত। অথচ সত্যর কথার প্রতিবাদ চলে না, সত্যর কথায় সমর্থন না করলে চলে না।

কিন্তু ও কি! ও কি! ও কিসের শব্দ!

হঠাৎ বুদ্ধি ওদের বিপদে রক্ষা করলেন মধুসূদন। পুকুরপাড়ের রাস্তায় তালগাছের সারির ওদিকে যেন অশ্বক্ষুরধনি ধনিত হল।

ঘোড়ার ক্ষুরের শব্দ না?

ঘোড়ায় চড়ে কে আসে?

পুণ্ডি তড়বড় করে ঘাটে উঠে এগিয়ে দেখে পড়ি তো মরি করে ছুটে আসে, "এই সত্য, মেজদা!"

মেজদা!

অর্থাৎ রামকালী!

সত্য অবিস্থাসের হাসি হেসে মুখ ভেঙিয়ে বলে ওঠে, "স্বপ্ন দেখছিস নাকি? বাবা না জিরেটে গেছে?"

"আহা, তা সেখেনে তো আর বাস করতে যায় নি? আসবে না?"

ইত্যবসরে ক্ষুরধনি একবার কিছুটা নিকটবর্তী হয়েই ক্রমশ দূরবর্তী হয়ে যায়।

সত্য গলা বাড়িয়ে একবার দেখতে চেষ্টা করে, তারপর নির্লিপ্তভাবে বলে, "যেমন তোমার বুদ্ধি! বাবা বুদ্ধি ঘোড়ায় চড়ে জিরেটে গেছল? নাকি পালকিটা মাঝরাস্তায় ঘোড়া হয়ে গেল!"

পাল্কি! তাও তো বটে! পুণ্য দ্বিধায়ুক্ত হয়ে বলে, “আমি কিন্তু সদ্য দেখলাম মেজদা আর মেজদার ঘোড়াটা। বাড়ির দিকেই তো গেল।”

তা গেল বটে। তবে কি হঠাৎ জীরেটের সেই রুগীর ‘নেয়-দেয়’ অবস্থা ঘটেছে! তাই হঠাৎ কোন মোক্ষম ওষুধের দরকার পড়েছে? যার জন্যে পাল্কি রেখে ঘোড়ায় চড়ে ছুটে আসতে হয়েছে চিকিৎসক রামকালীকে?

খঁদি বলে, “যাই হোক বাপু সত্য, ভূই বাড়ি যা। কবরেজ জ্যাঠা ভিন্ন এ গেরামে ঘোড়াতেই বা চড়বে কে?”

এ কথাও খাটি।

ঘোড়া আর আছেই বা কার? এ অঞ্চলে কালেকশ্বিনে বর্ধমান রাজের কোন কর্মচারী কি কোম্পানির কোন লোক ঘোড়ার পিঠে চড়ে আসে, নইলে ঘোড়া কে কোথায় পাচ্ছে?

ঘাট থেকে উঠে পড়ে সত্য-বাহিনী।

এখন প্রথমটা সকলেরই সত্য-ভবনে অভিযান। কারণ ঘোড়া-রহস্য ভেদ না করে কে স্থির থাকতে পারবে?

ভিজ়ে কাপড়ে জল সপসপিয়ে আর মলের গোছা বাজিয়ে ওরা রওনা হল, কিন্তু এ কী তাজ্জব! এ যে একেবারে রূপকথার গল্পর মত!

সত্যদের বাড়ির কাছাকাছি পৌঁছতে না পৌঁছতে হাঁ হয়ে দেখে ওরা রামকালী ফের ফিরে যাচ্ছেন ঘোড়া হাঁকিয়ে, শুধু এবারে বাড়তির মধ্যে তাঁর পিছনে পিঠ আঁকড়ে আর একজন বসে।

সে জনটি হচ্ছে সত্যর বড়দা।

রামকালী চাটুয্যের বৈমাত্র ভাই কুঞ্জবেহারীর বড় ছেলে-বাসবিহারী।

পুণ্যের কথাই সত্যি বটে। অধারোহী ব্যক্তি রামকালীই। কিন্তু এ নিয়ে এখন আর বাহাদুরি ফলায় না পুণ্য, শুধু হাঁ করে অনেকক্ষণ ঘোড়ার পায়ে দাপটে ঠিকরে ওঠা ধুলোর ঝড়ের দিকে তাকিয়ে থেকে নিঃশ্বাস ফেলে বলে, “ব্যাপার কি বল তো?”

“আমিও তো তাই ইনতাম করছি।” সত্য স্ববাক ভাবে বলে, “ওষুধ নিতে আসবে যদি বাবা, তো বড়দাকে পিঠে বেঁধে নিয়ে যাবে কেন?”

“সেই তো কথা!”

প্রচণ্ড গরম, তবু সপসপে ভিজ়ে কাপড়ের ওপর হাওয়ার ডানা বুলিয়ে যাওয়ার দরুন গা-টা কেমন সিরসির করে এল। সত্য এবার হাঁ করে ভাব করে বিচক্ষণের সুরে বলে, “নে নে চল, দোরে দাঁড়িয়ে গুলতুনি করে আর কি হবে? বাড়ি গেলেই টের পাব, কি হয়েছে! তোর যা, ভিজ়ে কাপড় ছেড়ে আয়। আমি দেখি গিয়ে কি হয়েছে!”

কি হয়েছে!

যা হয়েছে তা একেবারে সত্যর হিসেবের বাইরে। শুধু সত্যর কেন, সকলেরই হিসেবের বাইরে। ঘোড়ায় চড়ে ঝড়ের বেগে এসে সমগ্র সংসারটার উপর যেন প্রকাণ্ড একখানা পাথর ছুড়ে মেরে ফের ফিরে গেছেন রামকালী। সেই পাথরের আঘাত সহজে কেউ সামলাতে পারছে না।

সত্য ভেতরবাড়ির উঠানে ঢুকে দেখল, উঠানের মাঝখানে বসানো মরাই দুটোর মাঝখানে যে সরু জমিটুকু, সেইখানে দাঁড়িয়ে আছে বড়জেষ্টী, ঠিক যেন কাঠের পুতুলটি, আর দাওয়ায় পৈঠেয় গলে হাত দিয়ে কাঠ হয়ে বসে তার ঠাকুমা। এবং দাওয়ার ওপর জটলা বেঁধে বাড়ির আর সবাই। শুধু যা পিসঠাকুমাই অনুপস্থিত।

অবশ্য সেটাই। স্বাভাবিক, কারণ তিনি এই যবনচারী দাওয়ায় কখনো পা ঠেকান না। এ দাওয়ায় রাস্তা-বেড়ানো ছেলেপুলে ওঠে, কর্তাদের খড়ম ওঠে।

পিসঠাকুমা না থাক, আর সবাই তো জটলা করছে। কেন করছে? অথচ কারো মুখে বাক্য নেই কেন? ফিসফিস কথা, ঘোমটার ভেতর হাত-মুখ নাড়ানাড়ি। সত্য ঠাকুমার যতটা সম্ভব গা বাঁচিয়ে গা ঘেঁষে বসে পড়ে সাবধানে ইশারায় প্রশ্ন করে, “কি হয়েছে গো ঠাকুমা?”

দীনতারিণী নীরব।

অভঃপর সত্য সরব।

“ও ঠাকুমা, বাবা অমন করে ছুটে এসেই আবার কোথায় গেল?”

দীনতারিণী মৌন।

“কী গেরো! কথার উত্তর দিচ্ছ না কেন গো ? ও ঠাক্‌মা, বাবা জীরেট থেকে অমন হাঁপাতে হাঁপাতে ঘোড়া ছুটিয়ে এলই বা কেন, আবার ছুটলই বা কেন ? অ ঠাক্‌মা, বলি তোমাদের সব বাকি হারে গেল কেন ?”

একবারও দীনতারিণীর ঠোট নড়ে না, তবে ঠোট নাড়েন তাঁর সেজজা শিবজায়া। শুধু ঠোট নয়, সহসা পা মুখ সব নড়িয়ে তিনি বলে ওঠেন, “বাকি হারে যাবার মতন কাণ্ড ঘটলে আর হরবে না? তোর বাবা যা অভাবনী কাণ্ড করে গেল ?”

“বাবা বাবা, খুলেই বল না স্পষ্ট করে! বাবা জীরেট থেকে ঘোড়া ছুটিয়ে এসেই তক্ষুনি আবার কোথায় গেল ?”

“অ, তবে তো দেখেইছিস। তবে আর ন্যাকা সাজছিস কেন ? রাসুকে নে গেল তোর বাবা বে দিতে।”

“বে দিতে! ধোৎ!” সত্য পরিস্থিতির মর্যাদা ভুলে হি হি করে হেসে গড়িয়ে পড়ে “আহা, আমায় যেন ন্যাকা পেয়েছে সেজঠাক্‌মা, তাই পাগল বোঝাচ্ছে। বড়দার বুঝি বে দিতে বাকি আছে ? বলে ছেলের বাবাই হয়ে গেল বড়দা!”

“গেল তায় কি ?” এবার হঠাৎ দীনতারিণী মৌন ভঙ্গ করে নাতনীকে ধমকে ওঠেন, “বড় তো দেখছি ট্যাকটেকে কথা হয়েছে তোর ? ছেলের বাবা হলে আর বে করতে নেই ? মহাভারত অশুদ্ধ হয়ে যায় ?”

সত্য উত্তর দেবার আগে শিবজায়াই সাংসারিক মাৎস্যন্যায় ভুলে ফস্ করে বড়জায়ের মুখের ওপর বলে বসেন, “মহাভারত অশুদ্ধর কথা হচ্ছে না দিদি, তবে এও বলি রামকালী যে একেবারে কাউকে চোখে কানে দেখতে দিলে না, চিলের মত ছোঁ মেরে নে গেল ছেলেটাকে, বালস-পোয়াতি বৌটা, যাত্রাকালে সোয়ামীকে একবার দূর থেকে চোখের দেখাটুকু পর্যন্ত দেখতে পেল না, এটা কি ভাল হল ?”

কখন যে ইতিমধ্যে মোক্ষদা এসে দাঁড়িয়েছেন এপাশের বেড়ার দরজা দিয়ে, এবং আলোচনার শেষাংশটুকু শুনে নিয়েছেন, সে আর কেউ টের পায় নি। মোক্ষদার খান ধুতি গুটিয়ে হাঁটুর ওপর তোলা, কাঁধে গামছা অর্থাৎ স্নানে যাচ্ছেন মোক্ষদা। অবিশ্যি স্নানে যাচ্ছেন বলেই যে এই ‘ভেতর বাড়ির’ অর্থাৎ শয়নবাড়ির উঠানে তিনি পা দিয়েছেন তা নয়, তবে আজকের কথা স্বতন্ত্র। আজকের উত্তেজনায় অত মরণ-বাঁচন জ্ঞান রাখলে চক্ষে-স্না, আজ নয় ঘাটে দু-দশটা ডুব দিয়ে ফের দীঘিতে ডুব দিতে যাবেন, তবে এদের মজলিশে খোঁপ দেওয়াটা দরকার।

মোক্ষদা সেজভাজের কথাটুকু শুনেই পেয়েছেন, এবং তাতেই সমগ্র নাটকটি অনুধাবন করে ফেলেছেন। তাই তিনি তিন আঙুলে হেঁটে খানিকটা এগিয়ে এসে গলা বাড়িয়ে বলে ওঠেন, “কী বললে সেজবৌ, কী বললে ? আর একবার বল তো শুনি ?”

শিবজায়া অবশ্য আর একবার বললেন না, শুধু মাথার কাপড়টা অল্প টেনে মুখটা একটু ফেরালেন।

মোক্ষদা একটু বিষ-হাসি হেসে বলেন, “বলতে অবিশ্যি আর হবে না, কানে প্রবেশ করেছে সবই। তবে ভাবছি সেজবৌ তুমি হঠাৎ এমন ভট্‌চাখিয়া হয়ে উঠলে কবে থেকে ? যাত্রাকালে রাসুর আমাদের পরিবারের সঙ্গে চোখাচোখি হয় নি এই আক্ষেপে মরে যাচ্ছে তুমি ? কলি আর কত পুণ্ড হবে ? চারকাল হয়ে তো কলি এখন উপচোচ্ছে। শুভকাজে যাত্রাকালে লোকে ঠাকুর-দেবতার পট দেখে বেরোয়, গুরুজনের চরণ দর্শন করে বেরোয় এই তো জানি, জেনে এসেছি এতকাল। পরিবারের বদন দর্শন না করে বেরোলে জাত যায়, এটা তুমিই প্রথম শোনালে সেজবৌ।”

শিবজায়া ননদকে ভয় করলেও এতজনের মাঝখানে হেরে যেতে রাজী হন না, তাই বলে ওঠেন, “রাসুর কথা আমি বলি নি ছোট্টাকুরঝি, বড় নাভ-বৌয়ের কথা বলছি। আবাগী জানল না শুনল না আচমকা মাথায় পাহাড় পড়ল, আপনার সোয়ামী একা আপনার থাকতে থাকতে একবার শেষ দেখাও দেখতে পেলে না; সেই কথা হচ্ছে।”

মোক্ষদা সহসা খলখলিয়ে হেসে ওঠেন, “অ সেজবৌ, আর কেন ঘরে বসে আছ ? যাত্রার পালা বাঁধ না। সত্য পয়ার বেঁধেছে—তুমিই বা বাকি থাক কেন ? যা তোমাদের মতিগতি দেখছি, এ আর গেরস্ত-ঘরের যুগ্মি নয়। বুড়া-মাগী তুমি, চারকাল গিয়ে এককালে ঠেকেছে, লজ্জা এল না ও কথা মুখে আনতে ? সোয়ামী কি মগ্গা মিঠাই, যে একলা আস্তাটা না খেতে পেলে পেট ভরবে না, ভাগ হয়ে গেলে প্রাণ ফেটে যাবে ? ছি ছি! একটা ভন্দরলোকের কত বড় বিপদ থেকে উদ্ধার করতে ছুটল রামকালী, আর তার কাজের কিনা ব্যাখ্যানা বসেছে!”

বড়দের এই বাক্যযুদ্ধের মাঝখানে সত্য হাঁ করে তাকিয়েছিল, মোক্ষদার কথা শেষ হতেই হঠাৎ ঠাকুমার কোলের গোড়া থেকে উঠে সরে এসে বলে বসে, “সেজ ঠাকুমা তো ঠিকই বলেছে পিস্ঠাকুমা। নিযাস বাবার অন্যায় হয়েছে।”

বাবার অন্যায়! সন্দেহযুক্ত নয়, একেবারে ‘নিযাস’!

উঠানে কি বাজ পড়ল!

কলিকাল শেষ হয়ে কি প্রলয় এল!

॥ আট ॥

দুঃসংবাদের সঙ্গে সঙ্গেই অন্দরে কান্নার রোল উঠল। এ কী হরিষে বিষাদ! এ কী বিনামেঘে বজ্রাঘাত! এমন দুর্ঘটনা আর কবে কার সংসারে ঘটেছে? এত বড় সর্বনাশের কল্পনা দুঃস্থপুণ্ড কে কবে করেছে?

এই তো এইমাত্র মেয়ে কলাতলায় শিলে দাঁড়িয়ে মান করে ‘আইবুড়ো মুচি’ ভেঙে, গায়ে-হলুদের দরুন কোরা লালপাড় শাড়িটুকু পরে চুল বাঁধতে বসেছে, পাড়ার শিল্পী মহিলার বাক ‘কনে’র কেশ-রচনায় কে কত নৈপুণ্য দেখাতে পারেন তারই আলোচনায় অন্দরের দালান মুখর করে তুলেছেন, হঠাৎ বাইরের মহল থেকে আগুনের হল্কার মত এই সংবাদ এসে ছড়িয়ে পড়ল।

পরিণামে? দাবানল!

অতি বড় অবিশ্বাস্য হলেও এ যে বিশ্বাস না করে উপায় নেই। কারণ সংবাদ এনেছেন আর কেউ নয় স্বয়ং রামকালী। যার সম্পর্কে বিন্দুমাত্রও সন্দেহ পোষণ করা অসম্ভব। নচেৎ মিথ্যা দুঃসংবাদ রটনা করে বিয়ে ভঙুল করে দিয়ে মজা দেখবে এমন আশ্বীয়েও অভাব নেই। কিন্তু ইনি হচ্ছেন রামকালী।

কাজেই সংবাদ মিথ্যা হতে পারে, এমন আশার কণিকামাত্রও নেই। নাঃ, কোন আশাই নেই। তা ছাড়া কবরেজ নিজের চোখে দেখে এসেছেন পাত্রের শিয়রে শমন।

অতএব কোরা শাড়ি জড়ানো স্বস্তির আষ্টেকের সেই হতভম্ব মেয়েটাকে ঘিরে প্রবল দাপটে কান্নার যা রোল উঠেছে তাতে ভয়ে মেয়েটার নাড়ি ছেড়ে যাবার যোগাড় হচ্ছে।

বিয়ের দিন যাত্রা-করা-বর মৃত্যুরোগ নিয়ে যাত্রা ভঙ্গ করে বাড়ি ফিরে গেলে এবং বিয়ের লগ্ন ভ্রষ্ট হলে এমন কি সর্বনাশ সংঘটিত হতে পারে, সেটা বেচারার বুদ্ধির অগম্য, অনিষ্ট যদি কিছু হয় সে নয় তার ঠাকুদার হবে, তার কি?

কিন্তু তার কি, সে কথা সে কিছু না বুঝলেও মহিলার দল তাকে ধরে নাড়া দিয়ে দিয়েই তারস্বরে চেঁচিয়ে চলেছেন, “ওরে পটলী, তোর কপালে এমন ছাই পোরা ছিল, একথা তো কেউ কখনও চিন্তে করি নি রে। ওরে লগ্ন-ভ্রেষ্ট মেয়ে গলায় নিয়ে আমরা কী করব রে! ওরে এর চাইতে তোকেই কেন শমনে ধরল না রে, সে যে এর থেকে ছিল ভাল!” ওঁরা লুটোপুটি করতে থাকেন, আর পটলী কাঠ হয়ে বসে থাকে। বসে বসে শুধু এইটুকু বিচার করতে পারে সে যে এত সব কাণ্ডকারখানা কিছুই হত না, যদি পটলীই রাতারাতি ওলাউঠো হয়ে মরত!

ওদিকে চণ্ডীমণ্ডপে লক্ষ্মীকান্ত বান্ধুয়ে মাথায় হাত দিয়ে পাথরের পুতুলের মত বসে আছেন, আর সেই পুতুলের মস্তিষ্কের কোষে কোষে ধ্রুনিত হচ্ছে, “এ কী করলে ভগবান! এ কী করলে ভগবান!”

রামকালী চলে যাওয়ার পর থেকে লক্ষ্মীকান্ত আর একাটও কথা বলেন নি, অপর কেউ তাঁকে সোধোদন করতে সাহস পায় নি। ওদিকে বড় ছেলে শ্যামকান্তও বিস্ত্র মুখে ঘাটের ধারে শিবতলায় গিয়ে বসে আছে চুপচাপ, বাপের দিকে যাবার সাহস তার নেই। তার জামাই হচ্ছে বটে কিন্তু বয়সটা আর তার কি? এখনও তো তিরিশের নিচে। বাপকে সে যমের মত ভয় করে।

পটলীর মা বেহুলাও মুখ লুকিয়েছে ভাঁড়ার ঘরের কোণে। নিজেকেই তার সব চেয়ে অপরাধিনী মনে হচ্ছে। নিশ্চয়ই মহাপাপিষ্ঠা সে, নইলে তার মেয়ের বিয়ের ব্যাপারেই এত বড় দুর্লক্ষণ দুর্ঘটনা! সকলেই ফিসফাস বলাবলি করছে মেয়ে নাকি তার আশু রাক্ষুসী, তাই বাসায় না উঠতেই সোয়ামীটার মাথা কড়মড়িয়ে চিবিয়ে খেল। থাকুক এখন বেহুলা চিরজন্ম ওই দ’পড়া সর্বনাশী মেয়েকে গলায় গেঁথে। জাত ধর্ম কুল সবই গেল, রইল শুধু আমরণ যম-যন্ত্রণা।...

হ্যাঁ, বিয়ের রাতে বর-কিডাট কি আর হয় না ? ছাঁদনাতলা থেকেও বর উঠে যেতে দেখেছে অনেকে, কিন্তু সে সব অন্য কারণে। হয়তো 'পণের' টাকা ঠিক সময়ে হাজির করতে না পারার জন্যে বচসার ফলে, নয়তো বা কোন হিতৈষীর দ্বারা কোন পক্ষের 'কুলের' ঘাটতির কথা প্রকাশ হয়ে পড়ায়, অথবা কন্যাপক্ষের কনেকে বদলে ফেলে কালো কুশ্রী কনে গছিয়ে দেবার চেষ্টার ফলে, বচসা থেকে হাতাহাতি মারামারি হতে হতে বরপক্ষ রেগে-টেগে বর উঠিয়ে নিয়ে যায়। কিন্তু তখন তার পারাপারও হয়ে যায়।

কারণ লগ্নভ্রষ্ট হয়ে গেলেই মেয়ে চিরকালের মত আধাবিধবা হয়ে বাপের ঘরে বসে থাকবে, এই আক্ষেপে পাড়ার কেউ না কেউ করুণাপরবশ হয়ে কোমর বেঁধে লেগে গিয়ে রাতারাতি অন্য পাত্রের যোগাড় করে আনেন। অতএব ভদ্রলোকের জাত মান রক্ষা পায়।

কিন্তু এ যে একেবারে বিপরীত কাজ! এ যে সদ্য রাক্ষসী কন্যা!

এ ছেন পতিঘাতিনী মেয়ের জন্যে আপনার ছেলেকে ধরে দেবে এমন মহানুভব ত্রিভঙ্গতে কে আছে ?

না, বেহুলার এই মেয়ের জন্যে রাতারাতি পাত্রসংগ্রহ হওয়ার আশা দুরাশা। রামকালী কবরেজ অবশ্য একটু নাকি আশ্বাস দিয়ে গেছেন, "চেপ্টা দেখছি" বলে; কিন্তু বোঝাই তো যাচ্ছে সেটা সম্পূর্ণ স্তোকবাক্য! এত বড় দুঃসংবাদটা বাড়ি বয়ে এসে দিয়ে গেলেন, মুখটা একটু হেঁট হল তো, তাই একটা অলীক স্তোক দিয়ে পালিয়ে গেলেন।

বেহুলা বোকা হতে পারে, কিন্তু একটু বুদ্ধি ধরে।

হায় মা ভগবতী, পটলী যে এত বড় অপয়া মেয়ে এ কথা তো কোনদিন বুঝতে দাও নি ? ফুলের মত দেখতে মেয়ে, বাড়ির প্রথমা সন্তান, সকলের আদরের আদরিণী আগানে-বাগানে হেসে খেলে বেড়িয়েছে এতদিন, ইদানীং সম্প্রতি ডাগরটি হয়েছে বলেই যা বাড়ির মধ্যে আটক ছিল। তা যেমন সুন্দরী তেমনি হাস্যবাদনী, কে বলতে পেরেছে এ মেয়ে সর্বনাশী রাক্ষসী ?

শ্বশুরঠাকুর তো বলেন পটলীর নাকি দেবগণ, তবে ? দেবগণ কন্যে রাক্ষসগণের কপাল পেল কি করে ? আর শুধুই কি আজ ? ও মেয়ে যদি ঘরে থাকে সংসার তো ছারখারে যাবে।

মানদার পিসী তো স্পষ্টই বললেন সে কথা "কে নেবে মা ও মেয়েকে ? কার বাসনা হবে সংসারটা ছাড়ে-গোপ্তায় দিই ? ও চিরটা কাল এই দ'পড়া হয়ে পড়ে থাকবে আর ঠাকুন্দার সংসারটা চিবিয়ে চিবিয়ে খাবে, এই আর কি!"

বেহুলা ডুকরে কেঁদে ওঠে।

কাঁদতে কাঁদতে বলে, "হে মা ওলাই বিবি, হে মা শেতলা, পটলীকে তোমরা নাও, ওর যেন এ ভিটেতে তেরান্তির না পোহায়।"

মাটিতে হুমড়ি খেয়ে পড়ে কাঁদতে থাকে বেহুলা।

কাঁদছে সবাই।

বাড়ির গিন্নী থেকে শুরু করে বিচুলিকাটুনি বাম্ব্দী মাগীটা পর্যন্ত। পরের দুগুখে কাঁদবার এত বড় সুযোগ জীবনে ক'বার আসে ?

কাঁদছে না শুধু পটলী, যে হচ্ছে এই বিবাহকিডাট নাটকের প্রধানা নায়িকা। সে শুধু অনেকক্ষন কাঠ হয়ে বসে থেকে সবে এইমাত্র ভাবতে শুরু করেছে বিয়েটাই যদি না হয়, তা হলে এখনও পটলীকে উপুসী রেখেছে কেন এরা ? কেন কেউ একবারও বলছে না, "ওরে তোরা তবে এখন পটলীকে দুটো মতিচুর কি দেদোমগা দিয়ে জল খেতে দে।" পটলীর বুক থেকে পেট অবধি যেন মাঠের ধুলোর মতো শুকনো লাগছে।

কিন্তু পটলীর মুখে বুক ধুলো বেটে যাচ্ছে, এ তুচ্ছ খবরটুকু ভাবতে বসবার সময় কার আছে ? বরং পটলীর ওপর রাগে ঘৃণায় রি রি করছে সবাই!

শ্যামকান্ত বার দুই-তিন পুকুরপাড়ের দিক থেকে এসে উঁকি মেরে বাবাকে দেখে গেছে এবং যতবারই দেখেছে বাবা তামাক খাচ্ছেন না, বাবার হাতে হাঁকো নেই, ততবারই তার প্রাণটা ফেটে চৌচির হয়ে যাচ্ছে, কিন্তু সাহস করে তামাক সেজে এনে সামনে ধরে দেবে এত বুকের বল নেই, অপেক্ষা শুধু পাড়ার কোন বিজ্ঞ ব্যক্তি এসে পড়েন। হয়তো তেমন কেউ এলে লক্ষ্মীকান্তের মৌনভঙ্গ হবে।

নিজের যতবড় বিপত্তিই হোক, মানীর মান অবশ্যই রাখবেন লক্ষ্মীকান্ত।

কিন্তু পাড়ার উদ্ভলোকদের আর আসতে বাকী আছে কার ? তাঁরা তো সবাই একে একে এসে গেছেন ।

বেলা পড়ে এল ।

অর্থাৎ সর্বনাশের সময় ঘনিয়ে এল ।

এ হেন সময় শ্যামকান্তর প্রার্থনা পূর্ণ হল । এলেন রাখহরি ঘোষাল । রীতিমত বয়স্ক ব্যক্তি, অপেক্ষাকৃত দূরের পাল্লায় থাকেন, তাই এতক্ষণে এসে উঠতে পারেন নি । তিনি এসে নীরবে খড়ম খুলে ফরাসে উঠে বসলেন, ট্যাক থেকে শামুকের খেলের নস্যাদানি বার করে দু'টিপ নিলেন, তারপর ধীরে-সুস্থে বললেন, “ব্যাপার তো সব-ই শুনলাম লক্ষ্মীকান্ত, কিন্তু তুমি এভাবে মচ্ছিভক্ত হয়ে বসে থাকলে তো চলবে না ।”

লক্ষ্মীকান্ত বাঁড়ুয্যে বয়সের সম্মান রাখতে জানলেও ঘোষাল-ব্রাহ্মণের পায়ের ধুলো তো আর নেবেন না, তাই মাথাটা একটু নিচু ভাব করে ক্লান্ত স্বরে নেপথ্যের দিকে গলা বাড়িয়ে বলেন, “ওরে কে আছিস, ঘোষাল মশাইকে তামাক দিয়ে যা ।”

“থাক থাক, ব্যস্ত হতে হবে না ।” রাখহরি ঘোষাল বলেন, “সন্ধ্যা তো আগতপ্রায়, এখন কি করবে স্থির করলে ?”

“স্থির আর আমি কি করব ঘোষাল মশাই,” লক্ষ্মীকান্ত হতাশভাবে বলেন, “স্বয়ং যজ্ঞেশ্বরই যে যজ্ঞ পণ্ড করতে বসলেন—”

“তা বলে তো ভেঙে পড়লে চলবে না লক্ষ্মীকান্ত, কোমর বাঁধতে হবে । কন্যাকে নির্দিষ্ট লগ্নে পাত্রস্থ করতেই হবে । লগ্ন কখন ?”

“মধ্যরাত্তির পর ।”

“উত্তম কথা । সব কিছু পাচ্ছ তুমি । আমি বলি কি, কুম্মি আমার সঙ্গে একবার দয়ালের ওখানে চল—”

“দয়াল ? দয়াল মুখুয্যে ?”

“হ্যাঁ, দেখ যদি হাতেপায়ে ধরে রাজী করান্তে পারো । এমনিতেই তো কালবিলম্ব হয়ে গেছে ।”

লক্ষ্মীকান্ত বিস্মিত দৃষ্টি মেলে বলেন, “মুখুয্যে মশায়ের কাছে কার আশায় যাব ঠিক বুঝতে পারছি না তো ঘোষাল মশাই ?”

“কার আশায় আবার লক্ষ্মীকান্ত, তুমি নেহাৎ শিশু সাজছ দেখছি । মুখুয্যের আশাতেই যাবে । নইলে রাতারাতি আর তোমার স্ব-ঘর পাত্র পাচ্ছ কোথায় ?”

লক্ষ্মীকান্ত কাতর মুখে বললেন, “মুখুয্যে মশায়ের সঙ্গে পটলীর বিয়ে ? পলটীকে আপনি দেখেছেন ঘোষাল মশাই ?”

“দেখেছি বৈকি,” রাখহরি একটু রসিকহাসি হাসেন, “নাতনীকে তোমার দেখলে ওর নাম গিয়ে মূনিরও মন টলে, ‘ঘরে’ মিললে আমিই এই বয়সে টোপের মাথায় নিতে চাইতাম । মুখুয্যেও তোমার গিয়ে, বয়স হলে কি হয়, রসিক ব্যক্তি । সেই সেদিনও পথে পটলীকে দেখে বলছিল—”

রাখহরি একটু থামেন ।

লক্ষ্মীকান্ত কিষ্কিৎ বিরক্তভাবে বলেন, “কি বলছিলেন ?”

“আহা দুখ কিছু নয়, তামাশা করে বলছিল, “বাঁড়ুয্যের নাতনীটিকে দেখলে হচ্ছে হয় আমার তৃতীয় পক্ষটিকে ত্যাগ করে ফেলে ফের ছাঁদনাতলায় গিয়ে দাঁড়াই ।”

লক্ষ্মীকান্ত এবার ঘোরতর বিরক্তির স্বরে বলেন, “এ প্রসঙ্গ ত্যাগ করুন ঘোষাল মশাই ।”

“বটে ? ও!” রাখহরি সঙ্গে সঙ্গে উঠে দাঁড়ান, “বুঝতে পারি নি, কলি পূর্ণ হতে এখনও কিছু বিলম্ব আছে ভেবেছিলাম । যাক শিক্ষা হয়ে গেল । আর যাই করি কারুর হিত করবার চেষ্টা করব না ।”

লক্ষ্মীকান্ত এবার ব্রহ্ম কাতরতায় বলে ওঠেন, “আপনি অযথা কুপিত হবেন না ঘোষাল মশাই, আমার অবস্থাটা বিবেচনা করুন । মুখুয্যে মশাই আমার চাইতেও প্রায় চার পাঁচ বৎসরের বয়োধিক, তা ছাড়া হাঁপানি রোগগ্রস্ত ।”

“হাঁপানিটা যমরোগ নয় লক্ষ্মীকান্ত,” রাখহরি সতেজে বলেন, “আয়ুর্বেদমতে ওটা হচ্ছে জীওজ ব্যাধি । তাছাড়া বয়সের কথা যা বলছ ওটা কোন কথাই নয়, পুরুষের আবার বয়স! বরং মুখুয্যের আর দুটি পত্নীর ভাগ্য-প্রভাবে তোমার ঐ অলক্ষণ্য পৌত্রীটির বৈধব্য-যোগ খণ্ডন হয়েও যেতে পারে ।”

“কিন্তু ঘোষাল মশাই—”

“থাক, কিন্তু তে আর কাজ কি লক্ষ্মীকান্ত ? তবে এটা জেনো, নিজেকে সমাজের শিরোমণি ভেবে যতই তুমি নির্ভয়ে থাক, এর পর অর্থাৎ তোমার ওই পৌত্রীকে নির্দিষ্ট লগ্নে পাত্রস্থ করতে না পারলে সদব্রাহ্মণেরা তোমার গৃহে জলগ্রহণ করবেন কিনা সন্দেহ। এই দুঃসময়ে অপোগণ্ড একটা ছুঁড়ির বুড়ো বর যুবো বরের ভাবনা তুমি ভাবতে বসছ, কুলমর্যাদা ধর্মসংস্কার জাতি-মান এসব বিন্দুত হচ্ছে, এ একটা তাজ্জব বটে!”

“ঘোষাল মশাই আপনি আমায় মার্জনা করুন, বরং পটলীকে নিয়ে আমি কাশীবাসী হব—”

“তা হবে বৈকি,” রাখহরি একটু বিষহাসি হেসে বলেন, “বে-মালিক সুন্দরী যুবতীর পক্ষে কাশীর মত উপযুক্ত স্থান আর কোথায় আছে ? নাতনী হতে কাশীবাসের সংস্থানটাও তোমার হয়ে যাবে লক্ষ্মীকান্ত।”

“ঘোষাল মশাই!” লক্ষ্মীকান্ত বিন্যুতবেগে উঠে দাঁড়িয়ে বলেন, “আপনি আমার গুরুজনতুল্য, তাই এযাত্রা রক্ষা পেয়ে গেলেন। নচেৎ—”

“নচেৎ কি করতে লক্ষ্মীকান্ত, “বিন্দুপহাস্যে মুখ কুঁচকে রাখহরি বলে ওঠেন, “নচেৎ কি মারতে নাকি ?”

শোধ নেবার দিন এসেছে, শোধ নেবেন বৈকি ঘোষাল। ঘোষাল-বামুনদের প্রতি লক্ষ্মীকান্ত বাঁড়ুয়ের অন্তঃসলিলা তাম্বিল্য ভাবটা তো আর অবিদিত নেই রাখহরির। যতই বিনয়ের ভাব দেখাক বাঁড়ুয়ে, ওর চোখের দৃষ্টিতেই সেই উকনীচ ভেদাভেদটা ধরা পড়ে যায়। আজ সেই প্রতিশোধ নেবার সময় এসেছে, ছাড়বেন কেন রাখহরি ?

“ঘোষাল মশাই, আমাকে রেহাই দিন।” দুই হাত জোড় করে লক্ষ্মীকান্ত বলেন, “ভগবান যদি আমার জাতি ধর্ম রক্ষা করতে ইচ্ছুক থাকেন, লগ্নের আগেই উপযুক্ত পাত্র পেয়ে যাব, নচেৎ মনে করব—”

“লগ্নের আগেই উপযুক্ত পাত্র!” রাখহরি আর একবার বিন্দুপহাস্যে মুখ বাঁকিয়ে বলেন, “পাত্রটিকে বোধ হয় স্বয়ং তিনি বৈকুণ্ঠ থেকে পাঠিয়ে দেবেন!”

লক্ষ্মীকান্ত কী একটা উত্তর দিতে উদ্যত হচ্ছিলেন, সহসা শ্যামকান্ত নিজের স্বভাববিরুদ্ধ উত্তেজনায় ছুটে এসে বলে, “বাবা, কবরেজ চীটুয়ে মশাই আসছেন ঘোড়ায় চেপে পিছনে কাকে যেন নিয়ে।”

“অ্যা! নারায়ণ!”

লক্ষ্মীকান্ত উঠে দাঁড়াতে গিয়ে বসে পড়েন।

॥ নয় ॥

আসর-সাজানো বরাসনে বসবার সময় আর ছিল না, হুড়মুড়িয়ে একেবারে কলতলায় খেউরী করিয়ে স্নান করিয়ে নিয়ে সোজা নিয়ে যেতে হবে সম্প্রদানের পিঁড়িতে। সেই পিঁড়িতেই ধান দুর্বো আর আংটি দিয়ে ‘পাকা দেখা’ অনুষ্ঠানের প্রথটা পালন করে নিতে হবে।

অবিশ্যি সারাদিনে অন্তত বার পাঁচ-ছয় চর্বচোষ্য করে খেয়েছে রাসু, কিন্তু কি আর করা যাবে! এরকম আকস্মিক ব্যাপারে ওসব মানার উপায় কোথায় ? বলে কত মেয়েরই বিয়ে হয়ে যাচ্ছে ‘ওঠ ছুঁড়ি তোর বিয়ে’ করে। এই তো লক্ষ্মীকান্তরই এক জগতি ভাইপোর মেয়ের বিয়ে হল সেবার ধুমন্ত মেয়েটাকে মাঝরাতে টেনে তুলে। গ্রামের আর কার বাড়িতে বর এসেছিল বিয়ে করতে, তার পর যা হয়। কোথা থেকে যেন উঠে পড়ল কন্যেপক্ষের কুলের খোঁটা, তা থেকে বচসা অপমান, পাত্র উঠিয়ে নিয়ে যাওয়া।

যাক সে কথা, মূল কথা হচ্ছে, আকস্মিকের ক্ষেত্রে চর্বচোষ্য খেয়েও বিয়ের পিঁড়িতে বসা যায়। কথা হচ্ছে—এখন রাসুকে নিয়ে।

রাসুর অবস্থাটা কি ?

সে কি এখন খুব একটা অন্তর্দন্দে পীড়িত হচ্ছে ?

তীব্র একটা যন্ত্রণা, ভয়ঙ্কর একটা অনুতাপ, প্রবল একটা মানসিক বিদ্রোহের আলোড়ন রাসুকে ছিন্নভিন্ন করছিল ? বলা নেই কওয়া নেই, হঠাৎ এই চিলের মত ছৌ মেরে উড়িয়ে ঘোড়া ছুটিয়ে এনে



আরও একটা সাতপাকের বন্ধনে বন্দী করে ফেলবার চক্রান্তে কাকার ওপর কি রাগে ক্ষিপ্ত হয়ে উঠছিল রাসু ?

না, রাসুর মুখ দেখে তা মনে হচ্ছে না।

বলির পাঠার অবস্থা ঘটলেও ভয়ে বলির পাঠার মত কাঁপছিলও না রাসু, শুধু কেমন একটা ভাবশূন্য ফ্যালফ্যেলে মুখে নিজের নির্দেশিত ভূমিকা পালন করে চলছিল সে।

হ্যাঁ, এই আকস্মিকতার আঘাতে বেচারি রাসুর শুধু মুখটাই নয়, মনটাও কেমন ভাবশূন্য ফ্যালফেলে হয়ে গিয়েছে। সেখানে সুখ-দুঃখ ভাল-মন্দ দ্বিধা-দ্বন্দ্ব কোন কিছুই সাড়া নেই।

সে-মনে ধাক্কা লাগল স্ত্রী-আচারের সময়। সে ধাক্কাই খানিকটা সাড় ফিরল।

সে সাড়ে মনের মধ্যে একটা ভয়ানক কষ্ট বোধ করতে থাকল রাসু।

সাত এয়োতে মিলে যখন মাথায় করে শ্রী, কুলো, বরণডালা, আইহাঁড়ি, চিতের কাঠি, ধূতরো ফলের প্রদীপ সাজানো থালা ইত্যাদি নিয়ে বরকনেকে প্রদক্ষিণ করছিল, ধাক্কাটা লাগল ঠিক তখন।

এয়োদের অবশ্য একগলা করে ঘোমটা, কিন্তু তার মধ্যেও 'আদল' বলে একটা কথা আছে। যে বৌটির মাথায় বরণডালা, আর আদলটা ঠিক সারদার মতন, যদিও দিনের বেলা হঠাৎ সারদার মুখটা দেখলে রাসু ঠিক চিনতে পারবে কিনা সন্দেহ, তবুও আদলটা চেনে। ওই রকম বেগুনী রঙের জমকালো একখানা চেলিও যেন সারদাকে মাঝে মাঝে পরতে দেখেছে রাসু। পাড়ার কারুর বিয়ে-টিয়েতে কি সিংহবাহিনীর অঞ্জলি দেবার সময়।

দেখেছে অবিশ্যি নিতান্ত দূর থেকে, আর ভাল করে তাকাবার সাহসও হয় নি। কারণ রাতদুপুরের আগে, সমস্ত বাড়ি নিশুতি না হওয়া পর্যন্ত কাছাকাছি আসবার উপায় কোথা ? আর তখন তো সারদা সাজসজ্জা গহনাগাঁটির ভারমুক্ত। তা ছাড়া সারদা ঘরে ঢুকেই কোণের প্রদীপটা দেয় নিভিয়ে। বলে, "কে কমনে থেকে দেখে ফেলে যদি!"

অবিশ্যি দেখবার পথ বলতে কিছুই নেই। রামকণ্ঠী চাটুয্যের বাড়ির দরজা-কপাট তো আর পাড়ার পাঁচজননের মত আমকাঠের নয় যে ফাটা-ফুটো থাকবে, মজবুত কাঁঠালকাঠের লোহার পাতমোরা দরজা। দরজার কড়া-ছেকলগুলোই ঝোঁক করি ওজনে দু'পাঁচ সের। আর জানলা ? সে তো জানলা নয়, গবাক্ষ। মানুষের মাথা ছাড়াশো উচুতে ছোট ছোট খুপরি জানলা, সেখানে আর কে চোখ ফেলবে ? তবু সাবধানের মার নেই।

গ্রীষ্মকালে অবশ্য পুরুষরা এ রকম চাঁপা ঘরে শুতে পারেন না, তাঁদের জন্যে চণ্ডীমণ্ডপ কিংবা ছাতে শেতলপাটি বিছিয়ে রাখা হয়। জিজ্ঞেস গামছা দিয়ে মুছে মুছে। সেখানে তাকিয়া যায়, হাতপাখা যায়, গাড়ু গামছা যায়, 'বয়ে' নিয়ে যায় রাখাল ছেলেটা কি মুনিখটা। কর্তাদের অসুবিধে নেই।

প্রাণ যায় বাড়ির মহিলাদের, আর নববিবাহিত যুবকদের। তারা প্রাণ ধরে বারবাড়িতে শুতে যেতে পারে না, অথচ ভেতরবাড়ির ঘরের ভিতরের ঘোমটাও প্রাণান্তকর।

তবে সারদার মত বৌ হলে আলাদা। সারদা এই গ্রীষ্মকালে সারারাত্তির পাখা ভিজিয়ে বাতাস করে রাসুকে।

প্রাণের ভেতরটা হঠাৎ কেমন মোচড় দিয়ে উঠল রাসুর। গতকাল রাত্রেও সারদা সেই পতিসেবার ব্যতিক্রম করে নি। রাসু মায়া করে বার বার বারণ করছিল বলে কচি ছেলেটার পরমের ছুতো করে নেড়েছে সারদা। আর সব চেয়ে মারাত্মক কথা, যেটা মনে করে হঠাৎ বুকটা এমন মুচড়ে মুচড়ে উঠছে রাসুর, মাত্র কাল রাত্তিরেই সারদা তাকে ভয়ানক একটা সত্যবন্ধ করিয়ে নিয়েছিল।

বাতাস দিতে বারণ করার কথায় চুপি চুপি হেসে বলেছিল সারদা, "এত ভো মায়া, এ মায়ার পরিচয় প্রকাশ করতে পারবে চেরকাল!"

রাসু ঠিক বুঝতে পারে নি, একটু অবাক হাসি হেসে বলেছিল, "চিরকাল কি গরম থাকবে ?"

"আহা তা বলছি নে। বলছি—", রাসুর বৃকের একবারে কাছে সরে এসে সারদা বলেছিল, "সতীনজ্বালার কথা বলছি। তখন কি আর মায়া করবে ? বলবে কি 'আহা ওর সতীনে বড় ভয়!'"

রাসু যতটা নিঃশব্দে সন্তব হেসে উঠেছিল, হেসে বলেছিল, "হঠাৎ দিবাশ্বপ দেখছ নাকি! সতীনজ্বালা আবার কে দিলে তোমায়া!"

"দেয় নি, দিতে কতক্ষণ ?"

"অনেকক্ষণ! আমার অমন দু-চারটে বৌ ভাল লাগে না। দরকারও নেই!"

সারদা তবু জেরা ছাড়ে নি, "আর আমি বুড়া হয়ে গেলে ? তখন তো দরকার হবে!"

রাসু ভারি কৌতুক অনুভব করেছিল, আবার হেসে ফেলে বলেছিল, "এ যে দেখি 'হাওয়ার সঙ্গে মনান্তর'! তুমি বুড়া হয়ে যাবে, আর আমি বৃষ্টি জোয়ান থাকব ?"

“আহা, পুরুষ ছেলে কি আর অত সহজে বুড়ো হয় ? তা ছাড়া ঠাকুরের জ্যেষ্ঠ ছেলে, দেখতে সোন্দর । এত পয়সাওলা মানুষ তোমরা, কত ভাল ভাল সম্বন্ধ আসবে তোমার, তখন কি আর আমার কথা—”

হঠাৎ আবেগে কেঁদে ফেলেছিল সারদা ।

অগত্যই নিবিড় করে কাছে টেনে নিয়ে বৌকে আদর সোহাগ করে ভোলাতে হয়েছে রাসুকে । বলতে হয়েছে, “সাধে কি আর বলেছি হাওয়ার সঙ্গে মনান্তর ! কোথায় সতীন তার ঠিক নেই, কাঁদতে বসলো! ওসব ভয় করো না ।”

আরও অনেক বাক্য বিনিময়ের পর পতিব্রতা সারদা স্বামীকে আশ্বাস দিয়েছিল, “তা বলে তোমাকে আমি এমন সত্যবন্দী করে রাখছি নে যে আমি মরে গেলেও ফের 'বে' করতে পারবে না । আমি মলে তুমি একটা কেন একশটা 'বে' করো, কিন্তু আমি বেঁচে থাকতে নয় ।”

“নয়, নয়, নয়! হল তো ?” তিন সত্যি করেছিল রাসু ।

মাত্র গতরায়ে ।

আর আজ সেই রাসু, এই টোপের চেলি পরে কলাতলায় দাঁড়িয়ে আছে, এই মাস্তুর যে গিন্নীমানুষটা বরণ করছিল সে বলে উঠেছে, “কড়ি দিয়ে কিনলাম, দড়ি দিয়ে বাঁধলাম, হাতে দিলাম মাকু, একবার 'ভ্যা' কর তো বাপু!”

একটা মানুষকে কতবার কেনা যায় ?

বাঁধা জিনিসটাকে আবার কি ভাবে বাঁধা যায় ?

হায় ভগবান, রাসুকে এমন বিড়ম্বনায় ফেলে কি সুখ হল তোমার ?

আহা, রাসু যদি ঠিক আজকেই গায়ে না থাকত! রুগী দ্বিদিমাকে দেখতে এমন তো মাঝে মাঝে গাঁ ছেড়ে ভিন্গায়ে যায় রাসু । আজই যদি তাই হত! যদি দ্বিদিমা বুড়ী টেসে গিয়ে ওখানেই আজ আটকে ফেলত রাসুকে!

যদি ঠিক এই সময় জ্ঞাতিগোস্তর কেউ মরে গিয়ে ঝুঁশাচ ঘটিয়ে রাখত রাসুদের! যদি রাসুরও এদের সেই বরটার মতন আচমকা একটা শক্ত অসুস্থ করে বসত!

তেমন কোন কিছু ঘটলে তো আর বিয়ে হতে পারত না!

কন্যাদায়গম্ভ বিপন্ন ভদ্রলোকের বিপদের কথা মনের কোণেও আসে না রাসুর, মরুক চুলোয় যাক ওরা, রাসুর এ কী বিপদ হল!

এ যদি কাকা রামকালী না হয়ে স্বাধী কুঞ্জবেহারী হত! বাবা যদি বলত, “ভদ্রলোকের বিপদ উপস্থিত রাসু, দ্বিধা-দ্বন্দ্বের সময় আর নেই, চল ওঠ ।” তা হলেও হয়ত বা রাসু খানিক মাথা চুলকোতে বসত!

কিন্তু এ হচ্ছে যার নাম মেজকাকা, যার হুকুমের ওপর আর কথা চলে না ।

অনেক 'যদি'র শেষে অবশেষে হতাশচিত্ত রাসু এ কথাও ভাবল, “আর কিছুও না হোক, যদি গতরায়ে রাসু গ্রীষ্মের কারণে 'বারবাড়িতে' গুতে যেত! তা হলে তো ওই সত্যবন্দীর দায়ে পড়তে হত না তাকে!

এর পর কি আর জানে কোন দিন কোন ব্যাপারে রাসুকে বিশ্বাস করতে পারবে সারদা ? বিশ্বাস করতে পারবে, এক্ষেত্রে রাসু বেচারাও সারদার মতই নিরুপায় ? কোন হাত ছিল না তার! নাঃ, বিশ্বাস করবে না সারদা, বলবে, “বোঝা গেছে বোঝা গেছে! বেটাছেলেদের আবার মন-মায়া! বেটাছেলের আবার তিন-সত্যি!”

কিন্তু কথাই কি আর কখনো কইবে সারদা ? হয়তো জীবনে আর কথা কইবে না রাসুর সঙ্গে, নয়তো দুঃখে অভিমানে মনের ঘেন্নায়— হঠাৎ রাসুর মনঃক্ষে বিশালকায় “চাটুয্যোপকুরের” কাকচক্ষু জলটার দৃশ্য ভেসে ওঠে ।

মনের ঘেন্নায় আজ রাগ্তিরেই সারদা কিছু একটা করে বসবে না তো!

বুকের ভেতরটা কে যেন খুঁচিয়ে খুঁচিয়ে চিরে চিরে নুন দিচ্ছে । রাসু বুঝি আর চূপ করে থাকতে পারবে না, বুঝি হাউমাউ করে টেঁচিয়ে উঠবে ।

না, টেঁচিয়ে ওঠে নি রাসু, তবে মুখের চেহারা দেখে কন্যাপক্ষের কে একজন বলে উঠল, “বাবাজীর কি শরীর অসুস্থ বোধ হচ্ছে ?”

আবার বিয়ের বরের শরীর অসুস্থ!

লক্ষীকান্ত একবার এই হিতৈষী-সাজা দুর্মুখটার দিকে ভুরু কঁচকে তাকালেন, তারপর গম্ভীর কণ্ঠে আদেশ দিলেন, “ওরে কে আছিস, আর একখানা হাতপাখা নিয়ে আয় দিকি, নতুন নাতজামাইয়ের মাথার দিকে বাতাসটা একটু জোরে জোরে দে।”

জোর জোর বাতাসে মুখের চেহারাটা রাসুর সত্যি একটু ভাল দেখাল। আর না দেখালেই বা কি, ততক্ষণে তো বিয়ে সাজ হয়ে গেছে, বরকনেকে “লক্ষীর ঘরে” প্রণাম করিয়ে বাসরে বসাতে নিয়ে যাচ্ছে সবাই ধরে ধরে, পায়ের গোড়ায় ঘটি ঘটি জল ঢালতে ঢালতে।

সেখানে আবারও তো সেই সেবারের মতন উপদ্রব হবে! সারদার বাপের বাড়ির সেই সব মেয়েমানুষদের বাক্যি আর বাচালতা মনে করলে রাসুর এখনো হৃৎকম্প হয়।

আবার তেমনি ভয়ঙ্কর একটা অবস্থার মুখোমুখি গিয়ে দাঁড়াতে হচ্ছে এখন রাসুকে!

সম্পূর্ণ অসহায়, সম্পূর্ণ নিরস্ত্র।

হঠাৎ রাসু দার্শনিকের মত নিজের ব্যক্তিগত দুঃখজ্বালা ভুলে একটা বিরাট দর্শনের সত্য আবিষ্কার করে বসে!

মানুষ কি অদ্ভুত নির্বোধ জীব!

এই কুশ্রী কদর্যতাকে হচ্ছে করে জীবনে বার বার সেধে নিয়ে আসে, বার বার নিজেকে কানাকড়িতে বিকোয়!

পরদিন সকালে এখানে ‘বৌছত্র’ আঁকা হচ্ছিল।

ইচ্ছে-শখের বিয়ের মত নিখুঁত করে বাহার করে না হোক নিয়মপালাটা তো বজায় রাখতে হবে ?

আর এত বড় উঠোনটায় যেমন-তেমন করে একটু আলপনা ঠেকাতেও এক সের পাঁচ পো চাল না ভিজোলে চলবে না।

তা সেই পাঁচপো চালই ভিজিয়ে দিয়েছিলেন রামকালীর খুড়ী নন্দরাণী। রামকালীর নিজের খুড়ী নয়, জেঠততো খুড়ী। সংসারের যত কিছু নিয়মলক্ষণ স্মিতিকিতের কাজের ভার নন্দরাণীর আর কুঞ্জর বৌয়ের উপর। কারণ ওরাই দুজন হচ্ছে একেবারে ‘অখণ্ডপোয়াতি’। কুঞ্জর বৌয়ের তো সাতটি ছেলেমেয়েই শ্বেষ্টের কালে খোসমেজাজে বাহাল জন্মিয়তে টিকে আছে।

নন্দরাণীর অবশ্য মাত্র দু-তিনটিই।

সে যাক, বিয়ের ব্যাপারে নিয়মপালার কাজের সব কিছুই যখন নন্দরাণীর দখলে— তখন এক্ষেত্রেই বা তার ব্যতিক্রম হবে কেন? কাজেই রাসুর এই বিয়েটাকে মনে মনে যতই অসমর্থন করুন নন্দরাণী, পুরো পাঁচপো আতপ চালই ভিজিয়ে দিয়েছিলেন তিনি উঠানে ‘বৌছত্র’ আঁকতে। দুধেআলতার প্রকাণ্ড পাথর বসিয়ে তাকে কেন্দ্র করে আর ঘিরে ঘিরে দ্রুতহস্তে ফুল লতা শীখ পল্ল একে চলেছিলেন নন্দরাণী; সাজ হতে কিছুকিঞ্চিৎ দেরি আছে এখনও, সহসা রাখাল ছোড়া ঘর্মান্ত কলেবরে ছুটেতে ছুটেতে এসে উঠানের দরজায় দাঁড়িয়ে আকর্ণবিস্তৃত হাস্যে জানান দিল, “বরকনে এয়েলো গো! আমি উই-ই দীঘির পাড় থেকে দেখতে পেয়েই ছুটে ছুটে বলতে এনু।”

“তা তো এলো—” নন্দরাণী বিপন্নমুখে এদিক ওদিক তাকিয়ে ঈষৎ উচ্চকণ্ঠে বলে ওঠেন, “দিদি, বরকনে এসে পড়ল শুনছি—”

বরকনে! এসে পড়ল!

দীনতারিণী কুটনো ফেলে ছুটে এলেন, “এখুনি এসে পড়ল ? রামকালীর কি এতেও তাড়াহড়ো?”

“বারবেলা পড়বার আগেই বোধ করি নিয়ে এসেছেন রামকালী।”

যদিচ ভাসুরপো, তথাপি ধনে-মানে এবং সর্বোপরি বয়সে বড়। কাজেই নন্দরাণী রামকালী সম্পর্কে ‘ছেন’ দিয়েই বাক্যবিন্যাস করেন। এখনো করলেন।

দীনতারিণী “বারবেলা” শব্দটায় মনকে স্থির করে নিয়ে বললেন, “তা হবে। তা তোমাদের ‘নেমকম্বর’ সব প্রস্তুত ?”

নন্দরাণী আরও ব্যস্ত হাতে হাতের কাজ সারতে সারতে বলেন, “প্রস্তুত তো একরকম সবই, কিন্তু দুধটা যে ওখলাতে হবে! সেটা আবার এখন কে করবে ?”

দুধ! তাই তো!

ওখলানোর দরকার বটে!

বৌ এসে সদ্য উথলে পড়া দুধ দেখলে, সংসার নাকি ধন-ধান্যে উথলে ওঠে।

দীনতারিণী উদ্ভিগ্ন মুখে প্রশ্ন করলেন, “বড় বৌমা কোথায় গেলেন ?”

“বড় বৌমা ? সে তো রান্নাশালে! তাড়াহুড়ো করে একঘর বেঁধে রাখতে হবে তো! বৌ এসে দৃষ্টি দেবে।”

বড় বৌমা অর্থ রাসুর মা। তাকে তাই বলে তো নন্দরাণী।

কারণ নন্দরাণী বয়সে রাসুর মার সমবয়সী হলেও মানে বড়, সম্পর্কে খুড়-শাওড়ী, কাজেই ‘বৌমা’।

যাই হোক, কুঞ্জর বৌ রান্নাশালে।

অতএব দুধ ওথলাতে আর কাউকে দরকার। ওদিকে বর-কনে আগতপ্রায়।

দীনতারিণী মনচক্ষে চারিদিক তাকিয়ে নেন, আর কে আছে ? অখণ্ডপোয়াতি সোয়ামীর প্রথম পক্ষ!

দ্বিতীয় তৃতীয় পক্ষ দিয়ে তো আর পুণ্যকর্ম হবে না ?

কে আছে ?

ওমা, ভাবার কি আছে ?

সারদাই তো আছে!

তাকেই ডাক দেওয়া হোক তবে। একা ঘরের কোণে বসে রয়েছে মনমরা হয়ে, কাজকর্মে ডাকলে তবু মনটা অন্যমনস্ক হবে— তা ছাড়া নতুন লোক নির্বাচনের সময়ই বা কোথা ?

সত্য উঠোন পার হচ্ছিল তীরবেগে, দীনতারিণী তাকেই ডাক দিলেন, “এই সত্য, ধিস্টী অবতার! যা দিকিন, বড় নাভবৌমাকে ডেকে আন দিকিন শীগগির, বরকনে এসে পড়ল পেরায়, দুধ ওথলাতে হবে।”

“বৌকে ? বড়দার বৌকে ডেকে দেব ?” সত্য দুই হাত উল্টে বলে, “বৌ কি আর বৌতে আছে ? ভোর থেকে মাটিতে পড়ে কেঁদে কেঁদে মরছে!”

“কেঁদে কেঁদে মরছে ?” দীনতারিণী বিরক্ত কণ্ঠে বলে, “উঠোন, “একেবারে মরছেন’ কেন, এতে মরবার কি হল ? ওমা, শুভদিনে ইকি অলক্ষণে কাণ্ড! যা শীগগির ডেকে আন।”

সত্য এদিক ওদিক তাকিয়ে বলে, “কে বাবা ডাকতে যায়! তুমি তো বললে কাঁদবার কি হয়েছে? বলি নিজের যদি হত ? সতীন আছে কাঁদবে না, আহ্লাদে উর্ধ্ববাহ হয়ে নাচবে মানুষ! হাঁ! কই, কোথায় কি আছে তোমাদের ? আমিই দিচ্ছি দুধ জ্বাল দিয়ে!”

“তুই ? তুই দিবি দুধ জ্বাল ?”

“কেন, দিলেই বা!” সত্য সোৎসাহে বলে, “পিসঠাকুমা যে সেবার খুস্তির দিদির বিয়েতে বলল, সত্যর বছর ঘুরে গেছে, এখন এয়োডালায় হাত দিতে পারে!”

বছর ঘুরে অর্থাৎ বিয়ের বছর ঘুরে।

সেটা আর স্পষ্টস্পষ্টি উচ্চারণ করল না সত্য।

দীনতারিণী সন্দিগ্ধ সুরে বলেন, “বছর ঘুরলেই বুঝি হল ? ঘরবসত না হলে—”

“জানি নে বাবা। রাখো তোমাদের সন্দ। আমি এই হাত দিলাম।”

বলেই সত্য দাওয়ার পাশে দুখানা ইট পাতা উনুনের উপর জ্বালে বসানো ছোট্ট সরি চাপা মাটির হাঁড়িটার নিচে ফুঁ দিতে শুরু করে।

ঘুঁটের আগুন জ্বলছে ধিকি ধিকি, ফুঁ পেড়ে দু-চারখানা নারকেলপাতা ঠেলে দিলেই জ্বলে উঠবে দাউ দাউ করে। তা গোছালো মেয়ে নন্দরাণী নারকেল পাতার গোছাও এনে রেখেছেন পাশে।

সত্যর সকল কাজই উদ্দাম।

তার ফুঁয়ের দাপটে বরকনে আসার আগেই দুধ ওথলাতে শুরু করল। উথরে ধোঁয়া ছড়িয়ে ভেসে গেল গড়িয়ে পড়ে।

দীনতারিণী হাঁ হাঁ করে উঠলেন, “ওরে একটু রয়ে-বসে, নতুন বৌ ঢোকা মাস্তুর যেন দেখতে পায়।”

কথা শেষ হবার আগে বাইরের উঠোনে শাঁখ বেজে উঠল।

অর্থাৎ শুভাগমন ঘটেছে নতুন বৌয়ের।

মোক্ষদা শাঁখ হাতে দাঁড়িয়ে ছিলেন বাইরে। আজ পূর্ণিমা, বিধবাদের ঘরে রান্নার ঝামেলা নেই, কোন এক সময় আমকাঁঠাল ফল মিষ্টি খেলেই হবে। কাজেই আজ ছুটি মোক্ষদাদের।

ছুটিই যদি, তবে ছোট্টাছুটি না করবেন কেন মোক্ষদা ? স্বান তো করতেই হবে জল খাবার আগে ?

তাই মোক্ষদাই অগ্রণী হয়ে বারবাড়ির উঠোনে দাঁড়িয়ে আছেন। আছেন শাঁখ হাতে নিয়ে।

শুভকর্মে বিধবারা সমস্ত কর্মে অধিকারী হলেও, এই একটি কর্মে তাদের অধিকার আছে, সমাজ অথবা সমাজপতিরা বোধ করি এটুকু আর কেড়ে নেন নি, ক্ষ্যামা-ঘেন্না করে ছেড়ে দিয়েছেন। শোক আর উল্লু।

অতএব সেই অধিকারটুকুর সম্যক সদ্ব্যবহার করতে থাকেন মোক্ষদা রাসুর দ্বিতীয় অভিযানান্তে প্রত্যাবর্তন উপলক্ষ্যে।

দীনতারিণী উদ্ভবী হয়ে এগিয়ে যেতে যেতে চমকে উঠে বলেন, “অমন করে ফুঁ দিচ্ছিস যে সত্য ? পোড়ালি বুঝি ?”

সত্য তাড়াতাড়ি সত্য গোপন করে ফেলে বলে, “পোড়াবো কেন, হুঁ!”

“তবে হাতে ফুঁ পাড়ছিস কেন ?”

“এমনি।”

“যাক এবার উনুনে ফুঁ পাড়, ঢোকার সময় যেন আর একবার দুধটা ফেঁপে ওঠে, তা উঠেছে, বৌ পয়মস্ত হবে। সেবার বরং—”

কথা শেষ হবার আগেই রামকালীর গভীর কণ্ঠনিদাদ ধ্বনিত হল, “তোমাদের ওই সব বরণ-টরণ তাড়াতাড়ি সেরে ফেলো ছোটপিসী, পিছনে পিছনে পাড়া ঝেঁটিয়ে অবগুষ্ঠনবতীর দল।

বিয়েটা যেভাবে আর যে অবস্থাতেই ঘটে থাকুক, বৌভাতের যজ্ঞি একটা করতেই হবে। আমোদ-আহ্লাদের প্রয়োজনে নয়, ‘সমাজ-জানিত’ করবার প্রয়োজনে। খামকা একদিন “হুঁট” করে লক্ষ্মীকান্ত বাঁড়ুয়োর পৌত্রী এসে চাটুয্যোবাড়ির অন্তরে সামিল হল, কাকে-পক্ষীতে টের পেল না, এটা তো আর কাজের কথা নয়। তার প্রবেশটা যে বৈধ, এ খবরটুকুর একটা পাকা দলিল তো থাকা চাই।

দলিল আর কি! লিখিত পড়িত তো কিছু নয়। সেই-সবুদুও নয়, মানুষের স্বরণ-সাক্ষ্যই দলিল। তা সেই স্বরণ-সাক্ষ্য আদায় করতে হলে গ্রাম-সমাজকে একদিন গলবস্ত্রে ডেকে এনে উত্তম ফলার খাইয়ে দেওয়া ছাড়া অন্য উপায় কি ?

তা ছাড়া বাঁড়ুয়োদের মেয়ে যে চাটুয্যো পরিবারভুক্ত হল, তার স্বীকৃতিটাও তো দিতে হবে ? ‘বৌভাতে’র যজ্ঞিতে নতুন বৌয়ের হাত দিয়ে স্মৃতি পরিবেশন করিয়ে জ্ঞাতিকুটুম্বের কাছ থেকে সেই স্বীকৃতি নেওয়া।

অতএব বিয়েতে যজ্ঞির আয়োজন করা করলেই নয়। আগে থেকে বিলিবন্দেজ নেই, ছট্কারি করে বিয়ে, তাই ভোজের আয়োজনেও ছুঁড়াছড়ি লেগে গেছে। অনুগত জনের অভাব নেই রামকালীর, দিকে দিকে লোক ছড়িয়ে দিয়েছেন। জনাইতে মনোহরার বায়না গেছে, বর্ধমানে মিহিদানার। তুই গয়লাকে ভার দেওয়া হয়েছে দে-এর, আর ভীমে জেলেকে ডেকে পাঠিয়েছেন মাছের ব্যবস্থা করতে। কোন্ পুকুরে জাল ফেলবে ক-মণ তোলা হবে, এই সব নির্দেশ দিচ্ছিলেন রামকালী, সহসা সেই আসরে এসে উপস্থিত হলেন মোক্ষদা।

এ তল্লাটে রামকালীকে ভয় করে না এমন কেউ নেই, বাদে মোক্ষদা। রামকালীর মুখের উপর হক কথা শুনিয়ে দেবার ক্ষমতা একা মোক্ষদা রাখেন। নইলে দীনতারিণী পর্যন্ত তো ছেলেকে সমীহ করে চলেন।

অবিশ্যি ভাবা যেতে পারে রামকালীকে হক কথা শুনিয়ে দেবার সুযোগটা আসে কখন ? যে মানুষটা কর্তব্যপালনে প্রায় জটিলহীন, তাকে দু’কথা শুনিয়ে দেবার কথা উঠছে কি করে ?

কিন্তু ওঠে।

মোক্ষদা ওঠান। কারণ মোক্ষদার বিচার নিজের দৃষ্টিভঙ্গী দিয়ে। রামকালীর মতে যেটা নিশ্চিত কর্তব্য, প্রায়শই মোক্ষদার মতে সেটা অনর্থক বাড়াবাড়ি।

তবে অধিকাংশ ক্ষেত্রেই ‘হক কথা’র কারণ হয়ে দাঁড়ায় সত্যবতী। হবে না-ই বা কেন ? রামকালী যদি এমন মেয়ে গড়ে তোলেন যেমন মেয়ে ভু-ভারতে নেই, তাহলে আর কথা শোনানোয় মোক্ষদার দোষ কি ? সৃষ্টিছাড়া ওই মেয়েটাকে তাই যখন-তখন তার বাপের সামনে হাজির করে ন ভূতো ন ভবিষ্যতি করতেই হয় মোক্ষদাকে।

আজও তাই রামকালীর দরবারে একা আসেন নি মোক্ষদা, এনেছেন সত্যবতীকে সঙ্গে করে। সত্যবতীও এসেছে বিনা প্রতিবাদে। অবশ্য প্রতিবাদে লাভ নেই বলেই হয়তো এই অপ্রতিবাদ। অথবা হয়তো এটা তার নির্ভীকতা।

ভীমে জেলের উপস্থিতির কালটুকু অবশ্য নিঃশব্দে দাঁড়িয়েছিলেন মোক্ষদা। কথার শেষে ভীম রামকালীকে 'দগুৰং হয়ে প্রেণাম' করে চলে যাবার পরক্ষণেই মোক্ষদা যেন বাঁপিয়ে পড়লেন।

“এই নাও রামকালী, তোমার গুণের অবতার কন্যের হাতের চিকিচ্ছে করো এবার। আর চেরটা কালই করতে হবে তোমাকে, এ মেয়েকে তো আর স্বস্তরঘর থেকে নেবে না।” একটু দম নিলেন মোক্ষদা।

মোক্ষদা দম নেবার অবকাশে রামকালী মৃদু হেসে বলেন, “কি ? কি হল আবার ?”

“হয়েই তো আছে সমস্তক্ষণ”, মোক্ষদা দুই হাত নেড়ে বলেন, “উঠতে বসতেই তো হচ্ছে। কাটছে ছিঁড়ছে ছড়ছে। এই আজ দেখ মেয়ের হাতের অবস্থা। পুড়িয়ে-ঝুড়িয়ে এতখানি এক ফোকা! আবার বলে কি ‘বলতে হবে না বাবাকে, এমনি সেরে যাবে’। দেখো তুমি নিজের চক্ষে।”

ইত্যবসরে রামকালী মেয়ের হাতখানা তুলে ধরে শিহরিত হয়েছেন।

“কী ব্যাপার ? এ কি করে হল ?”

কি করে হয়েছে শুধোও—ওকেই শুধোও। মেয়ের গুণের কথা এত বলি, কথা কানে করো না তো! তবে তোমাকে এই বলে রাখছি রামকালী, এই মেয়ে হতেই তোমার ললাটে দুঃখ আছে।”

কথাটা নতুন নয়, বহু ব্যবহৃত। কাজেই রামকালী যে বিশেষ বিচলিত হন এমন নয়। তবে বাইরে গুরুজনকে সমীহ করবার শিক্ষা রামকালীর আছে, তাই বিচলিত ভাবটা দেখান।

“নাঃ, মেয়েটাকে নিয়ে—! আবার কি করলি ? এত বড় ফোকা পড়ল কিসে ?”

“দুখ ওখলানো হচ্ছে গো। কালকে যখন রেসো বৌ নিয়ে এসে ঢুকল, উনি গেলেন পাতা জ্বলে দুখ ওখলাতে! আর এও বলি, এত বড় বুড়ো ধিস্টী মেয়ে, এটুকু করতে হাতই বা পোড়ালি কি বলে ?”

রামকালী মেয়ের হাতের অবস্থাতা নিরীক্ষণ করে ঈষৎ গম্ভীর হয়ে মেয়ের উদ্দেশ্যেই বলেন, “আগুনের কাজ তুমি করতে গেলে কেন ? বাড়িতে আর লোক ছিল না ?”

সত্য ঘাড় নিচু করে বলে, “বেশী জ্বালা করছে না বাবা।”

“জ্বালা করার কথা হচ্ছে না, করলেও সে জ্বালা নিরীক্ষণের ওষুধ অনেক আছে। জিজ্ঞেস করছি, তুমি আগুনে হাত দিতে গেলে কেন ?”

সত্য এবার ঘাড় তোলে। তুলে সহসা নিজের ভঙ্গীতে তড়বড় করে বলে ওঠে, “আমি কি আর সাথে আগুনে হাত দিয়েছি বাবা, বড়বৌয়ের মুখ চেয়েই দিয়েছি। আহা বেচারী, একেই তো সতীনকাঁটার জ্বালা তার ওপর আবার দুখ ওখলাবার হুকুম। মানুষের প্রাণ তো!”

সত্যর এই পরিষ্কার উত্তরপ্রদানে একা রামকালীই নয়, মোক্ষদাও তাজ্জ্বব বনে যান। এ কী সর্বনেশে মেয়ে গো! ওই হোমরাচোমরা বাপের মুখের ওপর এই চোটপাট উত্তর! গালে হাত দিয়ে নির্বাক হয়ে যান মোক্ষদা। কথা বলেন রামকালীই। দুই জু কুঁচকে ঝাঝালো গলায় বলেন, “সতীনকাঁটার জ্বালাটা কি জিনিস ?”

“কি জিনিস সে কথা তুমি তোমার মেয়ের কাছেই এবার শেখো রামকালী!” মোক্ষদা সত্যবতীর আগেই তীক্ষ্ণ বিদ্রূপের স্বরে বলেন, “আমরা এতখানি বয়সে যা কথা না শিখেছি, এই পুটকে ছুঁড়ী তা শিখেছে! কথার ধুকড়ি!”

সত্য এই সব উল্টোপাল্টো কথাগুলো দু'চক্ষের বিষ দেখে। কেন রে বাপু, যখন যা সুবিধে তখন তাই বলবে কেন ? এই এশুকুণি সত্যকে বলা হলো ‘বুড়ো ধিস্টী’, আবার এখন বলা হচ্ছে ‘পুটকে ছুঁড়ী’! সবই যেন হচ্ছে-খুশী!

রামকালী পিসীর দিকে একনজর তাকিয়ে নিয়ে জলদগম্ভীর স্বরে কন্যাকে পুনঃপ্রশ্ন করেন, “কই, আমার কথার জবাব দিলে না ? বললে না সতীনকাঁটা কি জিনিস আর তার জ্বালাটাই বা কী বস্তু ?”

কী বস্তু সে কথা কি ছাই সত্য জানে ? তবে বস্তুটা যে খুব একটা মর্মবিদারি দুঃখজনক, সেটা বোধ করি জন্মান্বার আগে থেকেই জানে। তাই মুখটা যথাসম্ভব করুণ করে তুলে বলে, “সতীন মানেই তো কাঁটা বাবা! আর কাঁটা থাকলেই তার জ্বালা আছে! বড়বৌ-এর প্রাণে তো এখন তুমি সেই জ্বালা ধরিয়ে দিলে—”

“থামো!” হঠাৎ ধমকে উঠলেন রামকালী। বিচলিত হয়েছেন তিনি, বাস্তবিকই বিচলিত হয়েছেন এতক্ষণে। বিচলিত হয়েছেন মেয়ের ভবিষ্যৎ ভেবে নয়, সহসা মেয়ের অন্তরের মলিনতার পরিচয় পেয়ে।

এ কী ?

এ রকম তো ধারণা ছিল না তাঁর ছিল না হিসাবের মধ্যে। এটা হল কোন্ ফাঁকে? সত্যবতীর বহুবিশ নিন্দাবাদ তাঁর কানে এসে ঢোকে, সে-সব তিনি কখনোই বড় একটা গ্রাহ্য করেন না। কল্পেন না শুধু মেয়ের স্বভাব-প্রকৃতিতে একটা নির্মল তেজের প্রকাশ লক্ষ্য করে। সত্যর হৃদয়ে হিংসা-দ্বেষের ছায়ামাত্র নেই, এইটাই জমা ছিল হিসাবের খাতায়, এহেন নীচ হিংসুটে কথাবার্তা শিখে ফেলল সে কখন? কিন্তু বাড়তে দেওয়া ঠিক নয়, শাসনের দরকার।

তাই আরও বাঘ-গর্জনে বলে ওঠেন, “কেন, সতীন কিসে এত ভয়ঙ্করী হল? সে এসে ধরে মারছে তোমাদের বড়বৌকে?”

বার বার বাঘা-হুমকিতে সত্যবতীর চোখে জল উপচে এসে পড়ছিল, কিন্তু সহজে হার মানে না সে। আর কাঁদার দৈন্যটা প্রকাশ হয়ে পড়বার ভয়ে কষ্টে ঘাড় নিচু করে ধরা গলায় বলে, “হাতে না মারুক, ভাতে মারছে তো? বড়বৌ একলা একেশ্বরী ছিল, নতুন বৌ হঠাৎ উড়ে এসে জুড়ে বসল—”

“আ, ছি ছি ছি!”

রামকালী শিউরে স্তব্ধ হয়ে গেলেন। মুখ দেখে মনে হল, সত্যবতী যেন সহসা তাঁর যত্নে আঁকা একখানি ছবিকে মুচড়ে দুমড়ে ছিঁড়ে ফেলে দিয়েছে।

এই ফাঁকে মোক্ষদা আবার একহাত নেন, “ওই শোনো! শোনো মেয়ের কথার ভঙ্গিমে! সাধে বলি কথার ভঙ্গিয়া! বুড়ো মাগীদের মতন কথা, আর ছেলেপেলের মতন দসি্যাচালি! হরখড়ি অবাক করে দিচ্ছে কথার জ্বালায়!”

রামকালী পিসীর আক্ষেপে কান না দিয়ে তিক্তবিরজ স্বরে বললেন, “এমন ইতর কথাবার্তা কোথা থেকে শিখেছ? ছি ছি ছি! লজ্জায় মাথা কাটা যাচ্ছে আমার। উড়ে এসে জুড়ে বসা মানে কি? এক বাড়িতে দুটি বোন থাকে না? সতীনকে ‘কাঁটা’ না ভেবে বোন বলে ভাবা যায় না?”

বাবা এত ঘেন্না দেওয়ার পর অবশ্য সত্যবতীর সম্বন্ধে প্রচেষ্টাই ব্যর্থ হয়। একসঙ্গে অগ্নুন্তি ফোঁটা ঝর ঝর করে ঝরে পড়ে চোখ থেকে গালে, গাল থেকে মাটিতে। পড়তেই থাকে, হাত তুলে মোছে না সত্য।

রামকালী চাটুখ্যে আর একবার বিচলিত হন সত্যবতীর চোখে জল! এটা যেন একটা অদৃষ্টপূর্ব দৃশ্য মনে হচ্ছে। মনে হল ঘেন্নাটা বোধ করি একটু বেশী দেওয়া হয়ে গেছে।

ঔষধে মাত্রাধিক্য, রামকালীর পক্ষে শোচনীয় অপরাধ। মনে পড়ল, মেয়েটার হাতের ফোকাটাও কম জ্বালাদায়ক নয়। এখনি প্রতিকার করা দরকার। তাই ঈষৎ নরম গলায় বলেন, “এরকম নীচ কথা আর বলো না, বুঝলে? মনেও এনো না। সংসারে যেমন ভাই বোন মনদ দেওয়ার জা ভাসুর সব থাকে, তেমনি সতীনও থাকে, বুঝলে? কই দেখি হাতটা!”

হাতটা বাড়িয়ে দিয়ে সত্যবতী নিজের উদ্বেল হৃদয়ভারকে সামলাতে চেষ্টা করে দাঁতে ঠোঁট চেপে।

মোক্ষদা বোঝেন মেঘ উড়ে গেল। হয়ে গেল রামকালীর মেয়ে শাসন করা। ছি ছি ছি! আর দাঁড়াতে হচ্ছে হল না, বললেন, “যাক গে, শাস্তি শাসন হয়ে গেছে তো? এবার মেয়েকে সোহাগ করা বসে বসে। তুমিই দেখালে বটে বাবা!”

রঙ্গমঞ্চ থেকে বিদায় নেন মোক্ষদা।

রামকালী আশু প্রতিকার হিসাবে একটা প্রলেপ মেয়ের ফোকা ঘায়ে লাগাতে লাগাতে সহসা আবার বলেন, “আজকের কথা মনে থাকবে তো? আর কোন দিন এ রকম কথা বলো না, বুঝলে? মানুষ তো বনের জানোয়ার নয় যে খালি হিংসেহিংসি কামড়াকামড়ি করবে! সকলের সঙ্গে মিলেমিশে সবাইকে ভালবেসে পৃথিবীতে থাকতে হয়।”

বাবার গলায় আপসের সুর।

অতএব ফের একটু সাহস সঞ্চার হয় সত্যবতীর। তা ছাড়া প্রাণটা তো ফেটে যাচ্ছে বাবার ধিক্বারে। কিন্তু তারই বা দোষ কোথায় বুঝে উঠতে পারে না সত্যবতী। সবাইকে ভালবেসে থাকাই যদি এত ধমেয়া হয়, তা হলে ‘সেঁজুতি’ বস্তুটি করতে হয় কেন?

মনের চিন্তা মুখে প্রকাশ হয়ে পড়ে সত্যর, “তাই যদি, তা হলে সেঁজুতি বস্তু করতে হয় কেন বাবা? পিসঠাকুরমা তো এ বছর থেকে আমাকে ফেস্তুকে আর পুণ্যিকে ধরিয়েছে!”

রামকালী এবার বিরক্তির বদলে বিস্মিত হন। ‘সেঁজুতি বস্তু’ সম্পর্কে অবশ্য তিনি সম্যক অবহিত নন, কিন্তু যাই হোক, কোনও একটি ব্রত যে মানবতাবোধ-বিরোধী হওয়া সম্ভব, সেটা ঠিক ধারণা করতে পারেন না। তাই প্রলেপের হাতটা ঘরের কোণে রক্ষিত মাটির জালার জলে ধুতে ধুতে বলেন, “ব্রতের সঙ্গে কি?”

“কি নয় তাই বলো না কেন বাবা ?” চোখের জল শুকোবার আগেই সত্যর গলার সুর শুকনো খটখটে হয়ে ওঠে, “সেঁজুতি বস্তুর যত মস্তুর সব সতীনকাটা উদ্ধারের জন্যে নয় ?”

রামকালী একটুক্ষণ চুপ করে থাকেন।

কোথায় যেন একটু আশার আলো দেখতে পাচ্ছেন। হুঁ, এই রকমই একটা কিছু গোলমেলে ব্যাপার ঢুকে গিয়েছে মেয়ের মাথায়। নচেৎ সত্যর মুখে অমন কথা!

হাতে অনেক কাজ।

তবু রামকালী বিবেচনা করলেন, সদুপদেশের দ্বারা কন্যার হৃদয়-কানন হতে ‘সতীন-কস্টকে’র মূলোৎপাটন করা কর্তব্য; তাই ভুরু কুচকেই বললেন “তাই নাকি ? সে মস্তুরটা কি ?”

“মস্তুর কি একটা বাবা ?” সত্যবতী মহোৎসাহে বলে, “গাদা গাদা মস্তুর। সব কি ছাই মনেই আছে! ভেবে ভেবে বলছি রোসো। প্রথমে তো আলপনা আঁকা। ফুল-লতার নকশা কেটে তার ধারে কোণে হাতা-বেড়ি হাঁড়িকুড়ি এস্তক ঘর-সংসারের প্রত্যেকটি জিনিস একে নেওয়া। তা’পর একোটা একোটা ধরে ধরে মস্তুর পড়তে হয়। হাতায় হাত দিলাম, বললাম—

‘হাতা, হাতা, হাতা,
খা সতীনের মাথা।’

খোরায় হাত দিয়ে—

‘খোরা খোরা খোরা,
সতীনের মাকে ধরে নিয়ে যাক
তিন মিনসে গোরা।’

তা’পর—

‘বেড়ি বেড়ি বেড়ি
সতীন মাগী চেড়ী।’
‘বঁটি বঁটি বঁটি
সতীনের ছেরাদর কুম্ভেশো কুটি।’
‘হাঁড়ি হাঁড়ি হাঁড়ি
আমি যেন হই জল-এয়োত্রী,
সতীন কুড়ে ‘রাড়ী’।’

“চুপ চুপ।”

রামকালী জলদগ্ধীর স্বরে বলেন, “এই সব তোমাদের মস্তুর ?”

এই সব যে ব্রতের মস্তুর হওয়ার উপযুক্ত নয়, সেই সত্যটা যেন সত্যর বোধের জগতে সহসা এই মুহূর্তে একটা চকিত আলোক ফেলে যায়। সে উৎসাহের বদলে মৃদুস্বরে বলে, “আরও তো কত আছে—”

“আরও আছে ? বটে! আচ্ছা বলো তো শনি আরও কি কি আছে! দেখি কি ভাবে তোমাদের মাথাগুলো চিবানো হচ্ছে! জানো আরও ?”

“হ্যাঁ।” সত্য বড় করে ঘাড় কাত করে বলে, “আর হচ্ছে—

‘টেকি টেকি টেকি,

সতীন মরে নিচেয় আমি উপুর থেকে দেখি!’

তা’পর গে—

‘অশ্বথ কেটে বসত করি,
সতীন কেটে আলতা পরি।
ময়না ময়না ময়না,
সতীন যেন হয় না।’

তা’পর একমুঠো দুবেবা ঘাস নিয়ে বলতে হয়, ‘ঘাস মুঠি ঘাস মুঠি, সতীন হোক কানা কুষ্টি।’ গয়না একেও ছুঁয়ে ছুঁয়ে মস্তুর আছে—

‘বাজু বন্দ পৈঁছে খাড়,
সতীনের মুখে সাত ঝাড়।’

পান একে বলতে হয়—

‘ছাঁচি পান এলাচি গুয়ো—
আমি সোহাগী, সতীন দুয়ো—”

“আচ্ছা থাক হয়েছে। আর বলতে হবে না।”

রামকালী হাত নেড়ে নিবৃত্ত করেন, “এসব গালমন্দকে তোমরা পূজোর মন্তর বল ?”

“আমরা বলি কি গো বাবা ?” সত্যবতী তার পণ্ডিত বাপের এহেন অজ্ঞতায় আকাশ থেকে পড়ে চোখ গোল গোল করে বলে, “জগৎ সুদ্ধু সবাই বলে যে। সতীন যদি বোনের মত হবে, তবে এত মন্তরের স্রেজন হবে কেন ? বোনের খোয়ারের জন্যে কি কেউ বন্ত করে ? আসল কথা বেটাছেলেরা তো আর সতীনের মর্ম বোঝে না, তাই—” একটা ঢোক গিলে নেয় সত্য, কারণ বেটাছেলে সম্পর্কে পরবর্তী যে বাক্যটি জিভের আগায় এসে যাচ্ছিল, সেটা বাবার প্রতি প্রয়োগ করা সমীচীন কিনা বুঝতে না পেরে দ্বিধা এল।

রামকালী গম্ভীর মুখে বলেন, “তা হোক, এ ব্রত তোমরা আর করো না।”
করো না!

ব্রত করো না!

মাথায় বজ্রপাত হল সত্যর।

এ কী আদেশ! এখন উপায় ?

একদিকে পিতৃআজ্ঞে, অপরদিকে ‘ব্রতোপতিত’। ব্রতোপতিত হলে তো জলজ্যান্ত নরক; পিতৃআজ্ঞে পালন না করার পাতকটা ঠিক কতদূর গর্হিত না জানা থাকলেও, সেই পাতকের পাতকীকেও যে নরকের কাছাকাছি পৌছতে হবে এ বিষয়ে সত্য নিঃসন্দেহ।

অনেকক্ষণ দুজনেই স্তব্ধ।

তার পর আন্তে আন্তে কথাটা তোলে সত্য, “ধরা বস্ত উজ্জাপন না করে ছেড়ে দিলে যে নরকগামিন হতে হবে বাবা!”

“না, হবে না। এসব ব্রত করলেই নরকগামী হতে হয়।”

“পিস্তাকুরমাকে তা হলে তাই বলব ?”

“কি বলবে ?”

“এই ইয়ে— স্বেচ্ছুতি করতে তুমি মানা করেছ ?”

“আচ্ছা থাক, এখুনি তাড়াতাড়ি তোমার কিছু বলবার দরকার নেই। যা বলবার আমিই বলব এখন। তুমি যাও এখন। হাতটা সাবধান। কোথাও সঁষটে ফেলো না।”

সত্যবতীর অবস্থাটা দাঁড়ায় অনেকটা নব্বোঁ, না তছৌ।

বাবার হুকুম চলে যাওয়ার, অথচ মুষ্টি মধ্যে প্রশ্নের সমুদ্র। সে সমুদ্রের ঢেউ আর কার পায়ের কাছে আছড়ে পড়লে সুরাহা হবে— বার ছাড়া ?

“বাবা!”

“কি আবার ?”

“বন্তটা যদি অন্যায়, সতীন যদি ভাল বন্ত, তা হলে বড় বৌয়ের অত কষ্ট হচ্ছে কেন ?”

“বড়বৌ ? রাসুর বৌ ? কষ্ট হচ্ছে ? সে তোমাকে বলেছে তার কষ্ট হচ্ছে ?”

রামকালীর কণ্ঠে ফের ধমকের সুর ছায়া ফেলে।

কিন্তু সত্যবতী দমে না।

ধিকারে দমে বটে সত্য কিন্তু ধমকে নয়। তাই বাক্তস্বীতে সতেজতা এনে মোক্ষদার ভাষায় ‘কথার ভাষায়’র মতই তড়বড় করে বলে, “বলতে যাবে কেন বাবা ? সবই কি আর মুখ ফুটে বলতে হয় ? চেহারা দেখে বোঝা যায় না ? কেঁদে কেঁদে চোখ-মুখ বসে গেছে, অমন যে সোনার বগু, যেন কালি মেড়ে দিয়েছে। পর্শ থেকে মুখে একবিন্দু জল দেয় নি। নোকনজ্জায় বলছে বটে ‘পেটবাথা করছে তাতেই খিদে নেই, তাতেই কাঁদছি’, কিন্তু বুঝতে সবাই পারছে। কে আর ঘাসের ভাত খায় বল ? মড়ার ওপর খাঁড়ার ঘা, তার ওপর আবার আজ নতুন বোর হাতের সুতো খোলা! কেউ বলছে বড়বৌকে অন্য ঘরে দিয়ে ওই ঘরেই নেমকর্ম হবে, কেউ বলছে ‘আহা থাক’। বড়বৌ নাকি ও-বাড়ির সাবি পিসীকে বলেছে, ‘অত ধন্দয় কাজ নেই, চাটুয্যে-পুকুরে অনেক জায়গা আছে, তাতেই আমার ঠাই হবে।’”

সর্বনাশ!

প্রমাদ গণেন রামকালী।

মেয়েমানুষের অসাধ্য কাজ নেই।

কে বলতে পারে মেয়েটা সত্যিই ওরকম কোন দুর্মতি করে বসবে কি না। এও তো মহাজালা। কোথায় ভদ্রলোকের জাত-মান উদ্ধারের কথা ভেবে আনন্দ করবি, তা নয় এই সব প্যাচ!.... কেন, ত্রিভুবনে আর কারো সতীন হয় না ?

হয়েছে আর কি, ওইসব অখন্দ্যে ব্রতপার্বণ করিয়ে শিশুকাল থেকে মেয়েগুলোর পরকাল ঝরঝরে করে রাখা হয়েছে কিনা!

মেয়েমানুষ জাতই কুয়ের গোড়া।

‘ঘরের লক্ষ্মী’ বলে সৌজন্য দেখালে কি হবে, এক-একটি মহা অলক্ষ্মী!

নইলে রেসোর এই বৌমা, কি বা বয়স, তার কিনা এত বড় কথা! জলে ডুবে মরবার সংকল্প! ছি ছি!

“এই কথা বলেছেন বড় বৌমা?”

অন্ধকার-মুখে বলেন রামকালী।

“সাবি পিসী তো বলছিল।”

বাবার মুখ দেখে এবার একটু ভয়-ভয় করে সত্যর। কিন্তু ভয় করলে তো চলবে না। তারও যে কর্তব্য রয়েছে— বাবাকে চৈতন্য করাবার।

এত বোধবুদ্ধি বাবার, অথচ সোয়ামী আর একটা বিয়ে করে আনলে মেয়েমানুষের প্রাণ ফেটে যায় কিনা সে জ্ঞান নেই! আর যদি না ফাটবে, তা হলে কৈকেয়ী কেন তিন যুগে হয় হয়েছে রামকে বনবাসে পাঠিয়েছিলেন? কথক ঠাকুরের কথাতেই তো শুনেছে সত্য।

রাজার রাণী তিনি, তার মনে এত বিষ!

আর বড়বৌ বেচারী নিরীহ ভালমানুষ, শুধু মনের ঘেন্নায় নিজে মরতে চেয়েছে।

সত্যর প্রাণে এত দাগা লাগার আরও একটা কারণ, বড়বৌকে দুটো সান্ত্বনার কথা বলবার মুখ তার নেই। নেই তার কারণ, এই মর্মান্তিক হৃদয়বিদারক নাটকের নায়ক হচ্ছেন স্বয়ং সত্যবতীরই বাবা। ইশারায় ইঙ্গিতে ঘরে-পরে সকলেই তো রামকালীকেই দুষছে।

দুষবার কথাও। ছেলের মায়ের যে গৌরব আলাদা। বড়বৌ যদি ছেলের মা না হত তা হলে কথা ছিল। কেঁদে কেঁদে যদি ওর বুকের দুধ শুকিয়ে যায়, ছেলে বাঁচবে কিসে?

এদিকে রামকালী ভাবছেন বৌটাকে শাস্তি করার উপায় কি? গ্রামসুদ্ধ লোক নেমন্তন্ন করেছেন, রাত পোহালেই যজ্ঞ, ও যদি সত্যিই কিছু একটা অঘটন ঘটিয়ে বসে! অনেক ভেবে গলাটা ছেড়ে বললেন, “ওসব হচ্ছে ছেলেবুদ্ধির কথা! তুমি আমার হয়ে বৌমাকে গিয়ে বলো গে, ‘ওসব ছেলেমানুষী বুদ্ধি ছেড়ে দিতে। বলো গে, বাবা বললেন, মন ভাল করব ভাবলেই মন ভাল করা যায়। বলো গে, উঠল, কাজকর্ম করুন, ভাল করে খান-দান, মনের গলদ কেটে যাবে’।”

সত্য আর একবার বাবার অজ্ঞতায় কাতর হয়। তবে শুধু কাতর হয়ে চূপ করেও থাকে না। একটু ভাঙ্ছিলোর হাসি হেসে বলে, “তা যদি কেটে যেত, তা হলে তো মাটির প্রিথিবীটা সগুণে হত বাবা! রুগীর চেহারা দেখে তুমি ওপর থেকে বলে দিতে পারো তার শরীরের মধ্যে কোথায় কি হচ্ছে, আর মানুষের মুখ দেখে বুঝতে পারো না তার প্রাণের ভেতরটায় কি হচ্ছে? নিজের চোক্ষে প্রত্যক্ষ একবার দেখবে চল তা হলে!”

সহসা কেন কে জানে রামকালীর গায়ে কি রকম কাঁটা দিয়ে উঠল। চূপ করে গেলেন তিনি। তার অনেকক্ষণ পর হাত নেড়ে মেয়েকে ইশারা করলেন চলে যেতে।

এর পর আর চলে না যাওয়া ছাড়া উপায় কি? সত্য মাথা হেঁট করে আস্তে আস্তে ঘর থেকে চলে যায়।

কিন্তু এবারের ডাকের পালা রামকালীরই, “আচ্ছা শোনো।”

সত্যবতী ঘাড় ফিরিয়ে তাকায়।

“শোনো, বৌমাকে তোমার কিছু বলবার দরকার নেই, তুমি শুধু, মানে ইয়ে, তোমাকে খালি একটা কাজ দিচ্ছি—”

রামকালী ইতস্তত করছেন!

সত্যবতী অবাধ হয়ে যায়।

নাঃ, আর যাই হোক বাবাকে কখনো এমন ইতস্তত করতে দেখে নি সত্য!

কিন্তু এ হেন পরিস্থিতিতেই বা কবে পড়েছেন রামকালী?

সত্যিই কি সত্যবতী তাঁর চৈতন্য করিয়ে দিল নাকি? তাই রামকালী অমন বিব্রত বিচলিত?

“বাবা কি করতে বলছিলেন?”

“ও হ্যাঁ, বলছিলাম যে তুমি তোমাদের বড়বৌ-এর একটু কাছে কাছে থাকো গে, যাতে তিনি ওই পুকুরের দিকেটিকে যেতে না পারেন।”

সত্যবতী মুহূর্তকাল স্তব্ধ থাকে। বোধ করি বাপের আদেশের তাৎপর্যটা অনুধাবন করতে চেষ্টা করে। তার পর খুব সম্ভব অনুধাবন করেই নম্র গলায় বলে, “বুঝেছি, বৌকে চোখে চোখে রেখে পাহারা দিতে বলছ।”

পাহারা!

রামকালী যেন মরমে মরে যান।

তঁার আদেশের ব্যাখ্যা এই!

বিরক্তি দেখিয়ে বলেন রামকালী, “পাহারা মানে কি? কাছে থাকবে, খেলাধুলো করবে, যাতে তাঁর মনটা ভাল থাকে—”

সত্যবতী সনিঃস্থাসে বলে, “ওই হল, একই কথা! কথায় বলে, ‘যার নাম ভাঙ্গা চাল তার নাম মুড়ি, যার মাথায় পাকা চুল তারেই বলে বুড়ী।’ কিন্তু বাবা, পাহারা নয় দিলাম, ক’দিন ক’রাত দেব বলো? কেউ যদি আত্মঘাতী হব বলে প্রতিজ্ঞা করে, কারুর সাধ্য আছে আটকতে? শুধুই তো চাটুঘ্যে—পুকুরের জল নয়, ধুতরো ফল আছে, কুঁচ ফল আছে, কলকে ফুলের বীচি আছে—”

“চুপ চুপ!”

রামকালী আতণ্ড নিঃস্থাসে দাহ ছড়িয়ে বলে ওঠেন, “চুপ করো। তোমার সেজ ঠাকুমা দেখছি ঠিকই বলেন। এত কথা শিখলে কোথা থেকে তুমি? যাও তোমাকে কিছু করতে হবে না, যাও!”

॥ দশ ॥



‘যাও’ বলে মানুষকে তাড়ানো যায়, চিন্তাকে তাড়ানো যায় না। তাড়ানো যায় না মানসিক দ্বন্দ্বকে। সত্যবতীকে ‘যাও’ বলে ঘর থেকে সরিয়ে দিলেন রামকালী, কিন্তু মর্ন থেকে সরতে পারছেন না সহসা উদ্বেলিত-হয়ে-ওঠা এই চিন্তাটিকে, তাড়তে পারছেন না এই দ্বন্দ্বটাকে।

তা হলে কি ঠিক করি নি?

তবে কি ভুল করলাম?

চিন্তার এই দ্বন্দ্ব রামকালীকেই তাড়িয়ে নিয়ে বেড়াচ্ছে, ঘর থেকে চণ্ডীমণ্ডপ, চণ্ডীমণ্ডপ থেকে বারবাড়ির উঠোনে, সেখান থেকে বাগান বরাবর। কি জানি কেন, একেবারে চাটুঘ্যেপুকুরের ধারে ধারে পায়চারি

করতে থাকেন রামকালী।

দীর্ঘায়ত শরীর সামনের দিকে ঈষৎ ঝোঁকা, দুই হাত পিঠের দিকে জোড় করা, চলনে মন্থরতা। রামকালীর এ ভঙ্গীটা লোকের প্রায় অপরিচিত। দৈবাৎ কখনো কোনো জটিল রোগের রোগীর মরণ-বাঁচন অবস্থায় চিন্তিত রামকালী এইভাবে পায়চারি করেন। আয়ুর্বেদ শাস্ত্রের পুঁথি নেড়ে ঔষধ নির্বাচন করেন না রামকালী, এইভাবে বেড়িয়ে বেড়িয়েই মনে করেন। হয়তো বা পুঁথির পৃষ্ঠাগুলো মুখস্থ বলেই সেগুলো আর না নাড়লেও চলে। শুধু ভেবে দেখলেই চলে।

কিন্তু সে তো দৈবাৎ।

ঔষধ নির্বাচনের জন্য চিন্তার বেশী সময় নিতে হয় না কবরেজ চাটুঘ্যে, রোগীর চেহারা দেখলেই মুহূর্তে রোগ এবং তার নিরাকরণ ব্যবস্থা দুইই তাঁর অনুভূতির বাতায়নে এসে দাঁড়ায়। তাই চিন্তিত মূর্তিটা তাঁর কদাচিৎ দেখতে পাওয়া যায়। ঋজু দীর্ঘ দেহ—শালগাছের মত সতেজ, দুই হাত বুরেকের উপর আড়াআড়ি করে রাখা, প্রশস্ত কপাল, খড়গনাসা, আর দঢ়নিবন্ধ ওষ্ঠাধরের ঈষৎ বন্ধিম রেখায় আত্মপ্রত্যয়ের সুস্পষ্ট ছাপ। এই চেহারাই রামকালীর পরিচিত চেহারা। কিন্তু আজ তার ব্যতিক্রম ঘটেছে, আজ রামকালীর মুখের রেখায় আত্মজিজ্ঞাসার তীক্ষ্ণতা।

তবে কি ভুল করলাম?

তবে কি ঠিক করি নি? তবে কি আরও বিবেচনা করা উচিত ছিল? কিন্তু সময় ছিল কোথা?

বার বার ভাবতে চেষ্টা করছেন রামকালী, তবে কি বুদ্ধিভ্রংশ হয়েছেন? তাই একটা অবোধ শিশুর এলোমেলো কথার উপর এতটা মূল্য আরোপ করে এতখানি বিচলিত হচ্ছেন? কি আছে এত বিচলিত হবার? সত্যিই তো, ত্রিভুবনে সতীন কি কারো হয় না? অসংখ্যই তো হচ্ছে। বরং নিঃসপত্নী স্বামীসুখ কটা মেয়ের ভাগ্যে জোটে, সেটাই আত্মল গুনে বলতে হয়। কিন্তু এ চিন্তা

দাঁড়াচ্ছে না। চেষ্টা করে আনা যুক্তি ভেসে যাচ্ছে হৃদয়-তরঙ্গের ওঠাপড়ায়। কিছুতেই উড়িয়ে দিতে পারছেন না একফোঁটা একটা মেয়ের কথাগুলোকে।

বহুবিধ গুণের সমাবেশে উজ্জ্বল বর্ণাঢ্য চরিত্র রামকালীর, পুরুষের আদর্শস্থল, তবু সে চরিত্রের গাঁথনিতে একটু বৃথি খুঁত আছে। মানুষকে মানুষের মর্যাদা দেবার শিক্ষা আছে তাঁর, শিক্ষা আছে বয়োজ্যেষ্ঠকে সম্মান সমীহ করবার, কিন্তু সমগ্র 'মেয়েমানুষ' জাতটার প্রতি নেই তেমন সন্ত্রমবোধ, নেই সম্যক মূল্যবোধ।

যে জাতটার ভূমিকা হচ্ছে শুধু ভাত-সেদ্ধ করবার, ছেলে ঠেঁজাবার, পাড়া বেড়াবার, পরচর্চা করবার, কোন্দল করে অকথ্য অশ্রাব্য গালিগালাজ করবার, দুঃখে কেঁদে মাটি ভেজাবার আর শোকে উনাদ হয়ে বুক চাপড়াবার, তাদের প্রতি প্রচ্ছন্ন একটা অবজ্ঞা ছাড়া আর কিছু আসে না রামকালীর। অবশ্য আচার-আচরণে ধরা পড়ে না, ধরা পড়ে না হয়তো নিজের কাছে— তবু অবজ্ঞাটা মিথ্যা নয়। কিন্তু সম্প্রতি ক্ষুদ্রে একটা মেয়ে যেন মাঝে মাঝে তাঁকে ভাবিয়ে তুলছে, চমকে দিচ্ছে, বিচলিত করছে, 'মেয়েমানুষ' সম্পর্কে আর একটু বিবেচনাশীল হওয়া উচিত কিনা এ প্রশ্নের সৃষ্টি করছে।

আকাশে সন্ধ্যা নামে নি, কিন্তু তাল নারকেলের সারি-ঘেরা পুকুরের কোলে কোলে সন্ধ্যার ছায়া। এই প্রায়াক্ষকার পথটুকুতে পায়চারি করতে করতে সহসা রামকালীর চোখের দৃষ্টি ঈগলের মত তীক্ষ্ণ হয়ে ওঠে। কে? ঘাটের পৈঠের একেবারে শেষ ধাপে অমন করে বসে ও কে? কই এতক্ষণ তো ছিল না, কখন এল? কোন্ পথ দিয়েই বা এল? আর কেনই বা এল এমন ভরা-ভরা সন্ধ্যায় একা? এ সময় ঘাটের পথে এমন একা মেয়েরা কদাচিত্র আসে, অবশ্য মোক্ষদা বাদে। কিন্তু দূর থেকে কে তা ঠিক বুঝতে না পারলেও মোক্ষদা যে নয়, সেটা বুঝতে পারলেন রামকালী।

তবে কে?

অভূতপূর্ব একটা ভয়ের অনুভূতিতে বৃকের ভেতরটা কেমন সিরসির করে উঠল। রামকালীর পক্ষে এ অনুভূতি নিতান্তই নতুন।

অন্ধকার দ্রুত গাঢ় হয়ে আসছে, দৃষ্টিকে তীক্ষ্ণতর করেও ফল হচ্ছে না, অথচ এর চেয়ে কাছাকাছি গিয়ে ভাল করে নিরীক্ষণ করবার মত অসঙ্গত কাজও রামকালীর পক্ষে সম্ভব নয়। কিন্তু একেবারে অগ্রাহ্য করাই বা চলে কি করে? সন্দেহ ধৈর্য খনীভূত হচ্ছে। এ আর কেউ নয়, নির্ঘাত রাসুর বৌ!

কিন্তু সত্য কি করল? সভাবতী? পাহারা দেওয়ার নির্দেশটা পালন করল কই?

দিব্যা বড়সড় একটা কলসী ওর সঙ্গে রয়েছে মনে হচ্ছে!

যারা সাঁতার জানে, তাদের পক্ষে জলে ডুবে মরতে কলসীটা নাকি সহায়-সহায়ক। আর ছেলেমানুষ একটা মেয়ে যদি ওই কলসীটা গলায় বেঁধে—

চিন্তাধারা ওই একটা দৃশ্যের শিলা পাথরকে ঘিরেই পাক খেতে থাকে। কিছুতেই মনে আসে না, অসময়ে জলের প্রয়োজনেও কলসী নিয়ে পুকুরে আসতে পারে লোক।

তবে এটা ঠিক, জল ভরবার তাগিদ কিছু দেখা যাচ্ছে না ও ভরীতে। কলসীর কানাটা ধরে চুপচাপ বসে থাকাকে কি তাগিদ বলে?

নাঃ, জলের জন্যে অন্য কেউ নয়, এ নির্ঘাত রাসুর বৌ। মরবার সংকল্প নিয়ে ভরসন্ধ্যায় একা পুকুরে এসেছে, তবু চট করে বৃথি সব শেষ করে দিতে পারছে না, শেষবারের মত পৃথিবীর রূপ রস শব্দ স্পর্শের দিকে তাকিয়ে নিতে চাইছে।

শুধুই কি তাই?

তাকিয়ে নিয়ে নিঃশ্বাস ফেলে ভাবছে না কি, কার জন্যে তাকে এই শোভা সম্পদ, এই সুখভোগ থেকে বঞ্চিত হতে হল?

হঠাৎ চোখ দুটো জ্বালা করে এল রামকালীর।

এই জ্বালা করাকে রামকালী চেনেন না। এ অনুভূতি সম্পূর্ণ নতুন, সম্পূর্ণ আকস্মিক।

কিন্তু দাঁড়িয়ে দাঁড়িয়ে দেখলে তো চলবে না, এখনি একটা বিহিত করতে হবে। নিবৃত্ত করতে হবে মেয়েটাকে। অথচ উপায় বা কি? রামকালী তো আর মেয়ে-ঘাটে নেমে হাত ধরে তুলে আনতে পারেন না! পারেন না ওকে সদুপদেশ দিয়ে এই সর্বনাশা সংকল্প থেকে ফেরাতে! ডাকবেনই বা কি বলে? কোন্ নামে? রামকালী যে খুঁতর।

অথচ এখান থেকে সরে গিয়ে কোনও মেয়েমানুষকে ডেকে নিয়ে আসবার চিন্তাটাও মনে সায় দিচ্ছে না। যদি ইত্যবসরে—

আরে, আরে, স্থিরচিত্রটা চঞ্চল হয়ে উঠল যে!

কলসীটা জলে ডুবিয়ে জল কাটছে যে মেয়েটা! ঝগল-দৃষ্টি ছুরির ফলার মত তীক্ষ্ণ হয়ে ওঠে, নিজের অজ্ঞাতসারেই মেয়ে-ঘাটের দিকে এগিয়ে যান রামকালী, এমন সংকট মুহূর্তে ন্যায় অন্যায় উচিত অনুচিত নিয়ম অনিয়ম মানা চলে না। আর একটু ইতস্তত করলেই বুঝি ঘটে যাবে সেই সাংঘাতিক কাণ্ডটা!

দ্রুতপদে একেবারে ঘাটের কাছে গিয়ে দাঁড়ালেন রামকালী, প্রায় আর্তনাদের মত চিৎকার করে উঠলেন, “কে ওখানে? সন্ধ্যাবেলা জলের ধারে কে?”

রামকালী আতঙ্কিত দৃষ্টিতে তাকিয়ে দেখছিলেন, তাঁর চীৎকারের ফলটা কি দাঁড়াল! ওই যে সাদা কাপড়ের অংশটুকু দেখা যাচ্ছিল এতক্ষণ, সেটা কি এই আকস্মিক ডাকের আঘাতে সহসা নিশ্চিহ্ন হয়ে গেল? যেটুকু দ্বিধা ছিল সেটুকু আর রইল না? ওই তো বসে রয়েছে জলের মধ্যে পায়ের পাতা ডুবিয়ে, জীবন আর মৃত্যুর মধ্যে ব্যবধান শুধু একটি লহমার, একটি ডুবের। তার পরই তো ওর সব দুঃখের অবসান, সব জ্বালায় শান্তি। ওইখানেই তো ওর হাতে রয়েছে সব ভয় জয় করবার শক্তি, তবে আর রামকালীর শাসনকে ভয় করতে যাবে কোন দুঃখে?

সাদা কাপড়টা দেখা যাচ্ছে এখনও, একটু যেন নড়ছে। রুদ্ধশ্বাস-বক্ষে অপেক্ষা করতে থাকেন রামকালী। অথচ এই বিমূঢ়ের ভূমিকা অভিনয় করা ছাড়া ঠিক এই মুহূর্তে আর কি করার আছে রামকালীর? যতক্ষণ না সত্যি মরণের প্রশ্ন আসছে, ততক্ষণ বাঁচানোর ভূমিকা আসবে কি করে? জলে পড়ার আগে জল থেকে তুলতে যাওয়ার উপায় কোথা?

যতই ভয় পেয়ে থাকুন রামকালী, এমন কাণ্ডজ্ঞান হারান নি যে শুধু ঘাটের ধারে বসে থাকা মেয়েটাকে হাত ধরে হিড়িহিড়ি করে টেনে নিয়ে আসবেন, মেয়েটা মরতে যাচ্ছে ভেবে।

কি করবেন তবে? সাদা রংটা এখনও নিশ্চিহ্ন হয়ে যায় নি, এখনও কিছু করা যাবে।

সহসা আতঙ্ক হয়ে উঠলেন রামকালী, সহসাই যেন ফিরে পেলেন নিজেকে। কী আশ্চর্য! কেন বৃথা আতঙ্কিত হচ্ছেন তিনি? এখনি তেমন হাঁক পাড়লেই তো অঞ্চলের দশ-বিশটা লোক ছুটে আসবে। তখন আর চিন্তাটা কি? নিজের ওপর আস্থা হারাচ্ছিলেন কেন?

অতএব হাঁক পাড়লেন।

তেমনি ধারাই হাঁক বটে। ‘মৃত্যুপথবর্তিনী’ও যাতে ভয়ে গুরগুরিয়ে ওঠে। জলদগণীর স্বরে অভ্যস্ত আদেশের ভঙ্গীতেই হাঁক পাড়লেন রামকালী, “যে হও জল থেকে উঠে এসো। আমি বলছি উঠে এসো। ভরসন্ধ্যায় জলের ধারে থাকবার দরকার নেই।” ‘আমি’টার ওপর বিশেষ একটু জোর দিলেন।

না, হিসাবের ভুল হয়নি রামকালীর।

কাজ হল। এই ভরাট ভারী আদেশের সুরে কাজ হল। কলসীটা ভরে নিয়ে তাড়াতাড়ি উঠে এল মেয়েটা একগলা ঘোমটা টেনে। সাদা রংটার গতিবিধি লক্ষ্য করে বুঝতে পারলেন রামকালী, ঘাটের সিঁড়ি দিয়ে উঠে আসছে ও।

আর একবার চিন্তা করলেন রামকালী, পাশ কাটিয়ে চলে যাবেন? নাকি নির্বুদ্ধি মেয়েটাকে একটু সদুপদেশ দিয়ে দেবেন?

সাধারণত স্বস্তর-বৌ সম্পর্কে কথা কওয়ার কথা ভাবাই যায় না, কিন্তু চিকিৎসক হিসাবে রামকালীর কিছুটা ছাড়পত্র আছে। বাড়ির বৌ-ঝির অসুখ-বিসুখ করলে মোক্ষদা কি দীনতারিণী রামকালীকে খবর দিয়ে ডেকে নিয়ে যান এবং তাদের মাধ্যমে হলেও পরোক্ষ অনেক সময় রোগীণীকে উদ্দেশ্য করে কথা বলতে হয় রামকালীকে। যথা ঠাণ্ডা না লাগনো বা কুপথ্য না করার নির্দেশ। তেমন বাড়াবাড়ি না হলে অবশ্য রোগী ‘দেখা’র প্রশ্ন ওঠে না, লক্ষণ শুনেই ঔষধ নির্বাচন করে দেন। কিন্তু বাড়াবাড়ির ক্ষেত্রে বলতে হয় বৈকি। অবশ্য যথাসাধ্য দূরত্ব সপ্তম বজায় রেখেই বলেন। পূত্রবধু অথবা ভ্রাতৃবধু সম্পর্কীয়দের ‘আপনি’ ভিন্ন ভূমি বলেন না কখনও রামকালী।

বিধি একেবারে লঙ্ঘন করলেন না রামকালী, তবু কিছুটা করলেন। পাশ কাটিয়ে চলে না গিয়ে একটা গলাখাঁকারি দিয়ে বলে উঠলেন, “এ সময় এরকম একা ঘাটে কেন? আর এ রকম আসবেন না। আমি নিষেধ করছি।” আর একবার ‘আমি’টার উপর জোর দিলেন রামকালী।

সম্মুখবর্তিনী অবশ্য কাষ্ঠপুত্তলিকাবৎ রামকালীর সামনে দিয়ে হেঁটে চলে যাবে, এমন ক্ষমতা অবশ্য থাকবার কথাও নয়।

রামকালী কথা শেষ করলেন, “বাড়িতে শুভ কাজ হচ্ছে, মন ভাল করতে হয়। এমন তো হয়েই থাকে।”

দ্রুত পদক্ষেপে এবার চলে গেলেন রামকালী।

রামকালী চলে গেলেও কাঠের পুতুলখানা আরও কিছুক্ষণ কাঠপাথরের মত দাঁড়িয়ে থাকে, কী ঘটনা ঘটে গেল যেন বুঝতেই পারে না। কি হল ? এটা কি করে সম্ভব হল ?

‘এমন তো হয়েই থাকে’, মানে কি ?

উনি কি তা হলে সব জেনেছেন ? জেনেও ক্ষমা করে গেলেন ? মাথা ঠাণ্ডা রেখে সদুপদেশ দিয়ে গেলেন মন ভাল করতে ? সত্যিই কি তবে উনি দেবতা ? দেবতা ভেবেও বুকের কাঁপুনি আর কমতে চায় না শঙ্করীর ।

হ্যাঁ, শঙ্করী !

রাসুর বৌ সারদা নয়, কাশীশ্বরীর বিধবা নাভবৌ শঙ্করী । চিরদিন পিত্রালয়বাসিনী কাশীশ্বরীর একটা মেয়েসন্তান, তাও মরেছিল অকালে । মা-মরা দৌতুরটাকে বুকে করে এক বছরেরটি থেকে আঠারো বছরের করে তুলে সাধ করে সুন্দরী মেয়ে দেখে বিয়ে দিয়েছিলেন কাশীশ্বরী, কিন্তু এমন রাক্ষসী বৌ যে বছর ঘুরল না, দ্বিরাগমন হল না । তা বাপের বাড়িতেই ছিল এ যাবৎ, কিন্তু এমনি মন্দকপাল শঙ্করীর যে, মা-বাপকেও খেয়ে বসল । ছিল কাকা, সে এই সেদিন ভাইবিকে ঘাড়ে করে বয়ে দিয়ে গেছে চাটুয্যেদের এই সদাব্রতের সংসারে । না দিয়েই বা করবে কি ? শুধুই তো ভাতকপড় যোগানো নয়, নজর রাখে কে ? শ্বশুরকূলে থাকলে তবু সহজেই দাবে থাকবে । আর কপাল যার মন্দ, তার পক্ষে শ্বশুরবাড়ির উঠোন ঝাঁট দিয়েও একবেলা একমুঠো ভাত খেয়ে পড়ে থাকা মান্যের । বাপ-কাকার ভাত হল অপমান্যর ভাত ।

এইসব বুঝিয়ে-সুঝিয়ে কাকা সেই যে ছেড়ে দিয়ে গেছে, ব্যস্! বছর কাবার হতে চলল, উদ্দিশ নেই । অথচ এখানে শঙ্করীর উঠতে বসতে খোঁচা খেতে হচ্ছে ‘চালচলনের’ অভব্যতায় । উনিশ বছরের আঙনের খাপরা এতখানি বয়স অবধি বাপের ঘরে কাটিয়েছে, তাকে বিশ্বাসই বা কি ? বিধবার আচার-আচরণই তো শেখে নি ভাল করে । নইলে বাম্বনের বিধবা এটুকু জানে না যে রাতে চালভাজার সঙ্গে শশা খেতে হলে আলাদা পাত্রে নিতে হয়, এক পাত্রে রাখলে ফলার হয় ! এমন কি কামড়ে কামড়েও তো খেতে নেই, আলগোছা টুকরো ফুরে মুখের মধ্যে ছুঁড়ে দিয়ে তবে চালভাজার সঙ্গে খাওয়া চলে । তা নয়, সুন্দরী দিব্যি করে একদিন শশা কেটে চালভাজার পাশে নিয়ে খেতে বসেছেন । যা-ই ভাগ্যিস মোক্ষদার চোখে পড়ে গেল, তাই না জ্ঞাত-ধর্ম রক্ষে !

কিন্তু সেই একটাই নয়, পদে পদে অসমচার ধরা পড়ে শঙ্করীর, আর প্রতিপদে উপর-মহলে সন্দেহ ঘনীভূত হয়— এ মেয়ের রীত-চরিত্রের ভাল কি না ।

তা রামকালীর এত তথ্য জানবার কথা নয় । কবে কোন্ দিন কোন্ অনাথা অবীরা চাটুয্যেদের সংসারে ভর্তি হচ্ছে, সে কথা মনে রাখার অবকাশ কোথায় তাঁর ? কাজে-কাজেই রাসুর বৌয়ের প্রশ্ন নিয়েই চিন্তাকে প্রবাহিত করেছেন । তাছাড়া পুকুরের উঁচু পাড় থেকে ঠিক ঠাইরও হয় নি, সাদা ওই বস্ত্রখণ্ডটুকুর কিনারায় একটু রঙের রেখা আছে কি নেই ।

কিন্তু না, সারদা মরতে আসে নি । সত্যবতী পিতৃ-আদেশের সঙ্গে-সঙ্গেই তাকে কড়া পাহারায় রাখতে শুরু করেছে । আর পাহারা না দিলেও মরা এত সোজা নয় । ‘মরব’ বলেছে বলেই যে সত্যিই সদ্য আপত্ত সতীনের হাতে স্বামী-পুত্র দুই তুলে দিয়ে পুকুরের তলায় আশ্রয় খুঁজতে যাবে সে তা নয় । জ্বালা নিয়েই বেঁচে থাকতে হবে তাকে অন্যকে জ্বালিয়ে পুড়িয়ে খাবার ব্রত নিয়ে ।

মরতে এসেছিল শঙ্করী ।

মরতে এসেছিল, তবু মরতে পারছিল না ।

বসে বসে ভাবছিল মরণের দশা যখন ঘটেছে তার, তখন মৃত্যু ছাড়া পথ নেই । কিন্তু কোন মৃত্যুটা শ্রেয় ? এই রূপ-রস-গন্ধ-শব্দ-সুধাময় পৃথিবী থেকে চিরতরে নিশ্চিহ্ন হয়ে যাওয়া, না সমাজ সংস্কার সঙ্কম সভ্যতা মানমর্যাদার রাজ্য থেকে বিলুপ্ত হয়ে যাওয়া !

শেষের মৃত্যুটা যেন প্রতিনিয়ত কী এক দুর্নিবার আকর্ষণে টেনে নিয়ে যেতে চাইছে শঙ্করীকে । কিন্তু শঙ্করী তো জানে সেখানে অনন্ত নরক । তাই না যে পৃথিবীর সক্ররূপ মিনতির দৃষ্টি তাকিয়ে আছে ভোরের সূর্য আর সন্ধ্যার মাধুরীর মধ্যে, তার কাছ থেকেই বিদায় নিতে এসেছিল শঙ্করী ?

কিন্তু পারল কই ?

শুধুই কি মামাঠাকুরের দুর্লভ আদেশ ! ঘাটের পৈঠাগুলোই কি তাকে দুর্লভ্য বাঁধনে বেঁধে রাখে নি ?

তবে কি শঙ্করীর মৃত্যু বিধাতার অভিপ্রেত নয় ? তাই দেবতার মূর্তিতে উনি এসে দাঁড়ালেন মৃত্যুর পথ রোধ করে ?

হঠাৎ এমনও মনে হল শঙ্করীর, সত্যিই মামাঠাকুর তো ? নাকি কোন দেবতার ছল ? ঠাকুর-দেবতার মানুষের ছদ্মবেশ এসে মানুষকে ভুল-ঠিক বুঝিয়ে দিয়ে যান, অভয় দিয়ে যান, এমন তো কত শোনা যায়!

বাড়ি ফিরে শঙ্করী যদি কোনপ্রকারে টের পায় রামকালী এখন কোথায় রয়েছেন, তা হলেই সন্দেহ ভঞ্জন হয়। ভাবতে ভাবতে ক্রমশ শঙ্করীর এমন ধারণাই গড়ে উঠতে থাকে, নিশ্চয় খোঁজ নিলে দেখা যাবে মামাঠাকুর এখন এ গ্রামেই নেই, রোগী দেখতে দুরান্তরে গেছেন। নিশ্চয় এ কোন দেবতার ছল। নইলে সত্যিই তো মামাঠাকুর এমন ঘুলঘুলি সন্ধ্যায় মেয়েখাটের কিনারায় ঘুরবেনই বা কেন ?

আর সেই হাঁকপাড়াটা ?

সেটাই কি ঠিক মামাম্বজুরের কণ্ঠস্বর ? মাঝে মাঝে তো ভেতরবাড়িতে আসেন মামাঠাকুর, কথাবার্তাও কন মার সঙ্গে, খুড়ীর সঙ্গে, কই গলার শব্দে এতটা চড়া সুর শোনা যায় না তো ? মৃদুগম্বীর ভারী ভরটি গলা, আর কথাগুলি দৃঢ়গম্বীর।

এ মামাঠাকুরকে দেখলে পুণ্য হয়।

বড় মামাঠাকুরের মতন নন ইনি। বড় মামাঠাকুরকে দেখলে ভক্তি-ছেন্দা ছুটে পালায়। কিন্তু কথা হচ্ছে ছদ্মবেশ সন্ধ্যা একেবারে নিঃশব্দ হবার উপায়টা কি ? কোথায় মেয়েমহল আর কোথায় পুরুষমহল! চাটুয্যোদের এই শতখানেক সদস্য সম্বলিত সংসারে স্ত্রীরাই সহজে স্বামীদের তত্ত্ব পান না, তা আর কেউ! অবশ্য পুরুষের তত্ত্ববার্তা নেবার প্রয়োজনটাই বা কি মেয়েদের ? দুজনের জীবনযাত্রার ধারা তো বিপরীতমুখী। পুরুষের কর্মধারার চেহারা যেমন মেয়েদের অজানা, সেদিকে উঁকি মারবার সাহস মেয়েদের নেই, তেমনি পুরুষের নেই অবকাশ মেয়েদের কর্মকাণ্ডের দিকে অবহেলার দৃষ্টিটুকুও নিষ্ক্ষেপ করবার।

একই ভিটেয় বাস করলেও উভয়ে ভিন্ন আকাশের তারা।

তবু মনে হতে লাগল শঙ্করীর, কোন উপায়ে একবার খোঁজ করা যায় না! মামাঠাকুর বাড়িতে আছেন কিনা, থাকলে কি অবস্থায় আছেন ? এইমাত্র ফিরলেন, না অনেকক্ষণ থেকে বসে আছেন ?

আহা, মামাঠাকুরের সঙ্গে যদি কথা কইতে পারা যেত! তাহলে বোধ করি ভগবানকে দেখতে পাওয়ার আশাটা মিটিত শঙ্করীর। তা ওঁকে ভগবানের সঙ্গে ভুলনা করবে না তো করবে কি শঙ্করী ? এত ক্রমা আর কোন মানুষের মধ্যে সম্ভব ? এত করুণা আর কার প্রাণে আছে ? শঙ্করীর মর্মকথা জানতে পারলে ত্রিগতের কেউ কি অমন দয়া অমন সহানুভূতি দিয়ে কথা বলতে পারত ? নাঃ, তারা মাথা মুড়িয়ে ঘোল ঢেলে গাঁয়ের বার করে দিত শঙ্করীকে। আর পিছনে ঘণার হাততালি দিতে দিতে বলত, “ছি ছি ছি, গলায় দড়ি! তুই না হিন্দুর মেয়ে! তুই না বামনের ঘরের বিধবা!”

আচ্ছা কিন্তু—, হঠাৎ যেন সর্বশরীরে কাঁটা দিয়ে ওঠে শঙ্করীর, মামাঠাকুর টের পেলেন কি করে? কে বলবে, কে জানে ? তাও যদি বা কোন প্রকারে সন্ধান পেয়ে থাকেন, যদি সেই পরম শত্রুটাই এসে কোন ছলে ভয়ে-ভয়ে ফাঁস করে দিয়ে গিয়ে থাকে— শঙ্করী যে আজ এই সন্ধ্যায় ডুবে মরবার সংকল্প নিয়ে ঘাটে এসেছিল, এ কথা জানতে পারলেন কি করে তিনি ?

মাত্র আজই তো দণ্ডকয়েক আগে সংকল্পটা স্থির করেছে শঙ্করী, অনেক ভেবে, অনেক নিঃশ্বাস ফেলে, অনেক চোখের জলে মাটি ভিজিয়ে। বিয়েবাড়ি, শাণ্ডী দিদিশাণ্ডীর দল বাড়তি কাজে ব্যস্ত, কে কোথায় কি করছে না-করছে কেউ লক্ষ্য করবে না, আজই ঠিক উপযুক্ত সময়। তা ছাড়া আসছে কাল বাড়িতে যজ্ঞি, আত্মীয়-কুটুম্বের ভিড় লাগবে বাড়িতে। কে জানে কোন ছুতোয় কে শঙ্করীর রীতিনীতির ব্যাখ্যানা করবে, শঙ্করীর চালচালনের নিন্দে করবে, টি-টি পড়ে যাবে বাড়িতে।

না না, মরতেই যদি হয়, আজকেই হচ্ছে তার শ্রেষ্ঠ সময়। এইসব সাত-সতেরো ভাবনার বোঝা মাথায় করে ঘাটে এসেছিল শঙ্করী, জীবনে সমস্ত বোঝা নামিয়ে দেবার জন্যে। কিন্তু—, আবার গায়ে কাঁটা দিয়ে উঠল শঙ্করীর, কিন্তু বিধাতা নিষেধ করলেন।

মরণের দরজা থেকে জীবনের রাজ্যে ফিরিয়ে আনলেন শঙ্করীকে।

তবে আর দ্বিধা কেন ?

শঙ্করী বিধবা হলেও ওর আনা জল নিরামিষ ঘরে চলে না। ও ‘অনাচারে’, ওর অদীক্ষিত শরীর। জলের কলসীটাকেই তাই মাঝের দালানে এনে বসাল শঙ্করী, ছেলেপুলেদের খাওয়ার দরকারে লাগবে।

কলসী নামানোর শব্দে কোথা থেকে যেন এসে হাজির হল সত্যবতী। এসেই এদিক ওদিক তাকিয়ে আস্তে আস্তে বলল, “সকলনাশ করেচ ‘কাটোয়ার বৌ’, তোমার নামে টি-টিক্কার পড়ে গেছে!” বাড়িতে অনেক বৌ, কাজেই আশপাশের বৌদের তাদের বাপের বাড়ির দেশের নাম ধরে ‘অমুক বৌ’, ‘তমুক বৌ’ বলতে হয়। তা ছাড়া শঙ্করী নবাগতা, ওর আর পর্যায়ক্রমে মেজ-সেজ দিয়ে নামকরণ হয় নি।

বুকটা ধড়াস করে উঠল শঙ্করীর।

কিসের সকলনাশ!

তবে কি সব ধরা পড়ে গেছে ?

ঘরের কোণে রাখা মাটির প্রদীপের আলায় মুখের রং-গড়ন দেখা গেল না, শুধু গলার স্বরটা শোনা গেল, কাঁপা কাঁপা ঝাপসা।

“কিসের সকলনাশ, রাঙা ঠাকুরঝি ?”

“আজ না তোমার লক্ষ্মীর ঘরে সন্ধ্যা দেবার ‘পালা’ ছিল ?” সত্যর কণ্ঠস্বরে বিস্ময় আর সহানুভূতি।

লক্ষ্মীর ঘরে সন্ধ্যা দেখানোর পালা!

ওঃ, শুধু এই!

বুকের পাথরটা নেমে গেল শঙ্করীর, হালকা হল বুক। হোক এটা ভয়ানক মারাত্মক একটা অপরাধ, আর তার জন্যে যত কঠিন শাস্তিই হোক মাথা পেতে নেবে শঙ্করী।

অবশ্য এই দরদের খিক্কারে চখে জলে এসে গিয়েছিল তার।

সত্য গলাটা আর একটু খাটো করে বলে, “আর তাও বলি কাটোয়ার বৌ, এই ভরসন্ধ্যা পর্যন্ত ঘাটে থাকার তোমার দরকারটাই বা কি ছিল ? সাপখোপ আছে, অনাচেকানাচে কু-লোক আছে—”

শঙ্করী সাহসে বুক বেঁধে বলে, “দিদিমা খুব রাগ করছিলেন বুঝি ?”

“রাগ ? রাগ হলে তো কিছুই না। হিজিল গিয়ে তোমায় ব্যাখ্যানা!”

সত্যবতী হাত-মুখ নেড়ে বলে, “আর সত্যিও বলি কাটোয়ার বৌ, তোমারই বা এত বুকের পাটা কেন ? ভর-সন্ধ্যাবেলা একা ঘাটে গিয়ে যুগযুগান্তর কাটিয়ে আসা কেন ? আবার আজই সন্ধ্যা দেখানোর পালা। ঠাকমারা তো তোমায় পাশ-পেড়ে কাটতে চাইছিল।”

“তাই কাটো না ভাই তোমরা আমায়—” শঙ্করী ব্যগ্রকণ্ঠে বলে, “তা হলে তোমরাও বাঁচো, আমার মনস্কামনা সিদ্ধি হয়।”

সত্য জ্বলন্ত করে গালে হাত দিয়ে বলে, “ওমা! তোমার আবার কিসের মনস্কামনা ? তুমি আবার বড়বৌয়ের মত বোল ধরেছ কেন ? বড়বৌও যে এতক্ষণ আমায় বলছিল, আমায় একটু বিষ এনে দাও ঠাকুরঝি, খাই। তোমার দাদার হাতের সুতো খোলার আগেই যেন আমার মরণ হয়, সে দৃশ্য দেখতে না হয়।”

সত্যি বলতে কি, সারদার সঙ্গে শঙ্করীর এখনও তেমন ভাব হয় নি। প্রথম তো বয়সের ব্যবধান, তাছাড়া সারদা ছিল স্বামী-সোহাগিনী নবপুত্রবতী, আর শঙ্করী ছাইফেলার ভাঙাকুলো। আরও একটা কথা— দুজনের এলাকা আলাদা। শঙ্করীকে থাকতে হয় বিধবামহলে, তাঁদের হাতে হাতে মুখে মুখে ফাই-ফরমাশ খাটতে— সারদা সদ্বা মহলের জীব। খাওয়া শোওয়া বসা সব কিছুই মাঝেই আকাশ-মাটির পার্থক্য।

কিন্তু আপাতত সারদা অনেকটা নেমে পড়েছে, এখন শঙ্করীও তাকে কক্কা করতে পারে। তাই করে শঙ্করী। দরদের সুরে বলে, “তা বলতে পারে বটে আবারী।”

“বলি সে নয় বলতে পারল, তোমার কি হল ? তোমার অকস্মাৎ কিসের জ্বালা উথলে উঠল ?”

“আমার পোড়াকপালে তো সকলদাই জ্বালা ঠাকুরঝি।” শঙ্করী নিঃশ্বাস ফেলে।

সত্য হাত নেড়ে বলে, “আহা, কপাল তো আর তোমার আজ পোড়ে নি গো! ঠাকমারা তো সেই কথাই বলছিল, সোয়ামীকে তো কোন জন্মে ভুলে মেরে দিয়েছ, তবে আবার তোমার সদাই মন উচাটন কিসের ? কিসের চিন্তে করো রাতদিন ?”

“মরণের!” শঙ্করী দালানের দেয়ালে পিঠ ঠেকিয়ে বসে পড়ে বলে, “ও ছাড়া আমার আর চিন্তা নেই।”

“তা ভাল।” সত্য আবার দুই হাত নেড়ে কথার সমাপ্তি টেনে মল বাজিয়ে চলে যায়, “সব মেরেমানুষের মুখে দেখি এক রা, ‘মরব’ ‘মরছি’ ‘মরণ হয় তো বাঁচি!’ এ তো আচ্ছা ফ্যাসাদ!”

শঙ্করী আর এ কথার উত্তর দেয় না, বসে বসে হাঁপাতে থাকে। আসুক ঝড়, আসুক বজ্রাঘাত, এখানে বসে বসেই মাথা পেতে নেবে সে, উঠে গিয়ে পায়ে হেঁটে ঝড়ের মুখে পড়বার শক্তি নেই।

তা একটু বসে থাকতে থাকতেই ঝড় এল।

কিংবা শুধু ঝড় নয়, বৃষ্টি-বজ্রাঘাতও তার সঙ্গী হয়েছে।

শঙ্করী ফিরেছে শুনে খোঁজ করতে এসেছেন কাশীেশ্বরী আর মোক্ষদা।

পিছনে দর্শকের ভূমিকা নিয়ে ভুবনেশ্বরী, রামকালীর স্ত্রী।

॥ এগারো ॥



অপরোধটা হচ্ছে লক্ষ্মীর ঘরে যথাসময়ে শ্রীদীপ না দেওয়ার কিন্তু শান্তির আশঙ্কায় সমস্ত শরীর কণ্টকিত হয়ে ওঠার সঙ্গে সঙ্গে শঙ্করীর মনের পটে যে ছবি ভেসে উঠল সেটা লক্ষ্মীর ঘট অথবা গৃহদেবতার পটগুলির নয়, নিজের যে অপরাধের শান্তির আশঙ্কাটা সমস্ত দেহমন শিথিল করে ছিল শঙ্করীর, সে অপরাধের সঙ্গে এ বাড়ির, এমন কি এ গ্রামেরও কোন সম্পর্ক নেই।

অপরাধের জায়গাটা হচ্ছে শঙ্করীর বাপের বাড়ির আমবাগান। সময়টা গা-ঝিমঝিমে ভরদুপুর।

নতুন কাঙ্ক্ষনের থেকে থেকে ঝিরঝিরি আর থেকে থেকে দমকা বাতাস বইছে আর নতুন “গুটি বাঁধা” আমগাছগুলো সে বাতাসে যেন মাতলামির খেলা জুড়েছে। কিছু কিছু গাছ কিন্তু খানিকটা পিছিয়ে আছে, তাদের এখনো বোলু ঝরে আম ধরে নি। পাতার ফাঁকে ফাঁকে মঞ্জরীর সমারোহ।

নির্জন দুপুরে সেই বাগানে শঙ্করী আর নগেন।

নগেনের হাতের মধ্যে শঙ্করীর হাত।

আল্গা করে এলিয়ে পড়ে থাকা নয়, হাতঝালী বজ্রমুষ্টিতে ধরে রেখেছে নগেন, পাছে শঙ্করী পালিয়ে যায়! যতক্ষণ না নগেনের বক্তব্যটা সম্পূর্ণ শেষ হবে, ততক্ষণ শঙ্করীর ছাড়ান নেই।

অনেক দিন ধরে অনেক ছোটখাটো-কথা, অনেক ইশারা-ইঙ্গিতের দূত মারফৎ নিজের বক্তব্য জানিয়েছে নগেন শঙ্করীকে, অনেক করুণ দৃষ্টি, অনেক চোরা হাসির সওগাতে। আজ বোধ করি একেবারে হেস্টনেস্ত করতে চায় সে।

কিন্তু নগেন কি শঙ্করীকে গায়ের জোরে এই নির্জন আমবাগানে টেনে এনেছিল? মুখে কাপড় বেঁধে, পাজাকোলা করে?

তা তো নয়।

সহায়সম্বলহীন ছেলেটার এত সাহস কোথা? মাসীর বাড়ির অল্প খেয়ে খেয়ে তো মানুষ।

শঙ্করীর কাকীই নগেনের মাসী।

মা-মরা বোনপোকে কাছে এনে মানুষ করেছেন কাকী নিজের ছেলেদের সঙ্গে। সে সংসারে শঙ্করীও বেড়ে উঠেছে।

মান্বখানে শুধু একটা বিয়ের ব্যাপার।

কিন্তু সে আর ক’দিনের? অষ্টমঙ্গলাতেই তো তার সমাপ্তি।

একই বাড়িতে বাস করেছে দুজনে। ভাই-বোনের মত। অথচ আশ্চর্য, মনোভাবটা কিছুতেই কেন ভাই-বোনের মত তৈরী হল না!

কেন ছোটবেলা থেকে শঙ্করীর নিজের খুড়তুতো দাদারা শঙ্করীর চুলের মুঠি ধরেছে আর পান থেকে চুন খসলে খিচিয়েছে, আর নগেন কেনই বা বরাবর সেই দুঃখ-যন্ত্রণায় স্নেহের শ্রলেপ লাগিয়েছে, অত্যাচারীদের প্রতি কটুক্তি করেছে!

পৃথিবীতে কি জন্যে কি হয় শঙ্করীর বোধের বাইরে। বোধের জগৎটা ওর নেহাৎই সীমাবদ্ধ। নইলে আঠারো বছরের বিধবা মেয়ের পক্ষে ভরা ভরদুপুরে আমবাগানে এসে একটা বেঁটাছেলের সঙ্গে কথা কওয়া যে কতদূর গর্হিত, সে বোধ থাকা উচিত ছিল বৈকি একটা আঠারো বছরের মেয়ের।

কিন্তু সত্যিই কি এটুকু বোধও ছিল না শঙ্করীর?

চব্বিশ ঘণ্টা কাকীর দাঁতের পিষুনিতে সে বোধ জন্মায় নি ? বাগানে এসেছিল কি শঙ্করী নির্ভয় নিশ্চিন্তে ?

না, অবোধ হলেও এতটা অবোধ নয় শঙ্করী। এসেছিল বৃকের মধ্যে ভয়ের বাসা নিয়েই সকালে যখন নগেন এ আবেদন জানিয়েছে, তখন থেকেই বৃকের মধ্যে টেকির পাড় পড়ছে তার। সকল কাজে ভুলচুক হয়েছে। তবু এসেছে।

তবু কি ভাগ্যিস আজ আর রান্নাঘরের ভারটা ঘাড়ে নেই। কাল শ্বশুরবাড়ি চলে যাবে, বলতে গেলে জনোর শোধই চলে যাবে, এই মমতায় গৃহকর্তী শঙ্করীকে হেঁসেলের দায়িত্ব থেকে ছুটি দিয়েছেন। আর যখন শঙ্করী নিতান্ত বিনীত মূর্তিতে, নিতান্ত কাঁচুমাচু মুখে আবেদন জানিয়েছে, “বকুলফুলের বাড়ি একবার যাব কাকীমা ? তখন ‘না’ করতে পারেন নি তিনি।

বাগানে এসেই প্রথম এই ছলনার খবর শুনে হেসে উঠেছিল নগেন। বলেছিল, “তা গুরুজনের সঙ্গে মিছে কথা করেছিস ভেবে অত মনমরা হচ্ছিস কেন ? ধরে নে না আমিও তোর একটা ‘বকুলফুল’ ?”

কিন্তু এখন আর নগেনের মুখে হাসি নেই, এখন নগেনের অন্য ভাব। এখন কেমন রুক্ষ হিংস্র উদ্ভ্রান্ত মতন। এখন বজ্রমুষ্টিতে শঙ্করীর হাত ধরে টেনে নিয়ে যেতে চায় ভিন্ন এক জগতে।

“পালিয়ে গিয়ে অন্য আরেক দূরের আর এক গাঁয়ে চলে যাই না ? সেখানে কে চিনবে আমাদের? বলব আমরা স্বামী-স্ত্রী, আশুদেব লেগে ঘরবাড়ি ক্ষেতখামার সব পুড়ে গেছে, তাই মনের আক্ষেপে দেশ-ভূঁই ছেড়ে চলে এসেছি।”

“অমন পাপকথা বললে যে জিভ খসে যাবে নগেনদাদা। নরকেও ঠাই হবে না আমাদের।” উচ্চারণ করে শঙ্করী, কিন্তু সে উচ্চারণে কোথাও কোন জোর প্রকাশ পায় না। পাপের আশঙ্কায় আগে থেকেই কি জিভ শিথিল হয়ে এল শঙ্করীর ?

“পাপ কিসের ? তোর ওই বে-টা কি রে ? স্বামীর ঘর করেছিস তুই ? জন্ম-জন্মান্তর থেকে তুই আর আমি পতি-পত্নী, বুঝি ? তাই ওই একটা উটকো স্বামী-সইল না তোর। নইলে এতদিন তুই কোথায় থাকতিস, আর আমি কোথায় থাকতাম। তুই মন চিক ক’র শঙ্করী, দোহাই তোর!”

“এ কথা কানে শুনলেও যে অনন্ত নরক নগেনদাদা!”

“তাই যদি হয়,” নগেন উগ্রমূর্তিতে বলে ওঠে, “নরকেই যদি যেতে হয়, তোকে তো একলা যেতে হবে না। আমাকেও যেতে হবে। তোর জন্যে সে ক্লেশও মেনে নিচ্ছি আমি। পৃথিবীর আর সবাই যাক তো স্বর্গে, তুই আর আমি নরকেই থাকব। এ জন্মটা তো তবু ভাল যাবে।”

“এইটাই কি একটা নেযা কথা হল ? না নগেনদাদা, তোমার পায়ে ধরি, আমায় ছেড়ে দাও। কেউ যদি এ অবস্থায় দেখে ফেলে, তা হলে আর আমার ঘরে ঠাই হবে না।”

“ভালোই তো—” নগেন হাতটা ছেড়ে দেওয়ার পরিবর্তে আরও জোরে চেপে ধরেছিল, বুঝিবা একটু কাছেও টেনেছিল, বলেছিল, “ঘর থেকে দূর করে দিলে আমাদের সুরাহাই হবে। কলঙ্ক ছড়ালে শ্বশুরবাড়ি থেকেও নেবে না তোকে, তখন দুজনে চলে যাওয়া সোজা হবে। শাপে বর হবে আমাদের।”

“না না, নগেনদাদা, হাত ছাড়। তোমার মনে এত ‘কু’ জানলে ককখনো এখানে আসতাম না আমি। তুমি বললে একটা কথা আছে—”

নগেন কখনো যা না করেছে তাই করল। অগ্নিমূর্তি হয়ে খিচিয়ে উঠল, “ন্যাকামি করিস নে। জানলে আসতাম না! তোর সঙ্গে আমার কি ভাগবত-কথা থাকবে শুনি ? আমি বলছি তুই আমার সঙ্গে পালিয়ে চল!”

সঞ্জ্ঞানে নয়, অসতর্কে মুখ দিয়ে বেরিয়ে পড়ল, “কোথায় ?”

নগেন মহাৎসাহে বলে ওঠে, “যেখানে হোক। অনে—ক দূরের কোন গাঁয়ে। সেখানে শুধু তুই আর আমি সুখে সংসার করব। ছোট্ট একখানা মাটির কুঁড়ে, একটু শাকপাতার বাগান, একটা একছিত্তে পুকুর, এর বেশী আর কি চাই আমাদের বল! তা সেটুকু সংস্থান করতে পারব। পেটে তো একটু বিদ্যে করেছি, কিছু না পারি একখানা পাঠশালা খুলব। কারুর কোন ক্ষেতি নেই তাতে শঙ্করী।”

বৃকের মধ্যকার সেই টেকির পাড় পড়াটা বন্ধ হয়ে কী এক কাঁপা কাঁপা সুখে মনটা দুলে উঠল না শঙ্করীর ? চোখ দুটো কি জলে ভরে এল না ? নতুন ফাণ্ডনের সেই থেকে থেকে ঝিরি ঝিরি, থেকে থেকে দমকা বাতাসে শরীরটা কেমন অবশ-অবশ হয়ে আসে নি কি ? মনে কি হয় নি, সত্যিই তো— তাতে কার কি ক্ষতি ? শ্বশুরবাড়ি সে চোখে দেখে নি, এক দিনও ঘর করে নি। চেনে না

তাদের, জানে না শঙ্করীকে না পেলো কার কি সুখ-দুঃখ, কার কি লাভ-লোকসান! কাকারা যদি খবর দেয়, শঙ্করী বলে যে একটা মেয়ে ছিল তাদের ঘরে— যে নাকি কবরেজ-বাড়ির ভাগ্নেবৌ ছিল— হঠাৎ ওলাওঠা হয়ে মরে গেছে সে, কত কাঁদবে কবরেজ-বাড়ির লোকেরা ?

আর কাকা-খুড়ী ?

মরে গেছে বলে রটিয়ে দিলে সমাজের কাছে পার পাবে না ?

না, বেশীক্ষণ এ চিন্তা মনে স্থান পায় নি। বাতাসটা হঠাৎ বন্ধ হয়ে ভয়ানক যেন গুমোট হয়ে উঠল, চেতনা ফিরে পেল শঙ্করী। বলে উঠল, “হিন্দুর ঘরের বিধবাকে বেরিয়ে যাবার কুমস্তরণা দিতে লজ্জা করে না তোমার ? তুমি না আমার ভাইয়ের মতন ?”

“না, কক্খনো না!” গর্জে ওঠে নগেন, “কক্খনো ভাইয়ের মতন নয়। সে কথা তুইও ভাল জানিস, আমিও ভাল জানি। চিরদিন মনে মনে আমি তোকে পরিবারের মতন দেখে এসেছি। জেনেওনে কেন মিছে বাকচাতুরি করছিস! কথা দে, দুপুররাত্তে তুই খিড়কি দিয়ে বেরিয়ে এসে এখানে দাঁড়াবি, আমি আগে থেকে দাঁড়িয়ে থাকব। তার পর জোর পায়ে হেঁটে গাঁ থেকে একবার বেগোতে পারলে কে ধরে ? খুঁজতে তো আর পারবে না মাসী-মেসো ? কিল খেয়ে কিল চুরি করে বসে থাকতে হবে!”

“ও নগেনদাদা, আমার বুকের ভেতরটা কেমন করছে, ছেড়ে দাও আমায়। আমি পারব না।”

“পারতেই হবে তোকে।” নগেন ব্যাকুল স্বরে বলে, “যতক্ষণ না তুই মত দিবি, ছাড়ব না হাত। দেখুক পাঁচজনে, সেই আমি চাই।”

“নগেনদাদা, আমি চেষ্টায়ে লোক জড়ো করব।” আলগা আলগা দুর্বল স্বরে বলে শঙ্করী, “বলব বাগানে একলা পেয়ে তুমি আমাকে—”

নগেন বেপরোয়া, বলে, “চেষ্টা। জড়ো কর লোক।”

“নগেনদাদা গো, আমাকে বরং মেরে ফেল।”

“আমি আর কি মারবো তোকে ? মেরেই তো ফেলোছে সবাই মিলে। বাপের বাড়িতেই লাথি-ঝাঁটা না খেয়ে একমুঠো ভাত জুটছিল না, মরার পূর্পর খাঁড়ার ঘা, এর পর আবার শ্বশুরবাড়ি সারা জন্মটা শুধু লাথি-ঝাঁটা সার। আমিই বরং তোকে বাঁচাতে চাই। আদর করে যত্ন করে মাথার মপি করে রাখতে চাই।”

“আমি চাই না তোমার আদর-যত্ন।” এবার একটু দৃঢ় শোনাল শঙ্করীর কণ্ঠস্বর, “লাথি-ঝাঁটাই আমার ভাল।”

“বটে! লাথি-ঝাঁটাই তোর ভাল?” নগেন সহসা মারমুখী হয়ে একটা কাজ করে বসল।

হ্যাঁ, আদর করে প্রেমালিঙ্গন নয়, মারমুখী হয়ে সহসা শঙ্করীকে সাপটে জড়িয়ে ধরল নগেন, ধরে বলে উঠল, “বেশ, সেটাই যাতে আরও ভাল করে খাস তার ব্যবস্থা করছি। এই দিচ্ছি দেগে, তার পর তোর শ্বশুরবাড়ির গায়ে রটাব, ও আমার সঙ্গে মন্দ—”

কী ভাবে যে নগেনের হাত থেকে নিজেকে ছাড়িয়ে নিয়েছিল শঙ্করী, কী ভাবে যে একেবারে ঘাটে ডুব দিয়ে বাড়ি গিয়ে বলেছিল বকুলফুলের বাড়ি যাওয়া হল না, রাস্তায় একথানা ছুতোহাঁড়ি পায়ে ঠেকে গেল বলে একেবারে নেয়ে বাড়ি ফিরতে হল, আর কি করে যে ‘অসময়ে নেয়ে মাথাটা ভার হয়েছে’ বলে দিনের বাকী সময়টা শুয়ে কাটাল, সে আর ভাল করে মনে পড়ে না শঙ্করীর।

শুধু মনে আছে তার প্রবল কান্নার ব্যাপার দেখে কাকাসুদু মমতা-মমতা গলায় সাব্দনা দিয়েছিল, “কেন কাঁদছিস মা, মেয়েমানুষকে তো শ্বশুরঘর করতেই হয়। সেই হচ্ছে চিরকালের জায়গা। তা ছাড়া কবরেজ মশাই অতি সজ্জন ব্যক্তি, সংসারে খাওয়া-পরার কোন দুঃখু নেই, ভাল থাকবি, সুখে থাকবি।”

তবু আরও আকুল হয়ে কেঁদেছিল শঙ্করী। অগত্যা খুড়ীকে পর্যন্ত বলতে হয়েছিল, “আবার আসবি, পালাপার্বণে আসবি, আমরা কি তোকে পর করে দিচ্ছি ?”

বছর ঘুরে গেল, খুড়ীর প্রতিশ্রুতি খুড়ী রাখে নি। নিয়ে যাওয়া তো দূরের কথা, একবার উদ্দিশ পর্যন্ত করে নি। সে গাঁয়ের এক কানাকড়া খবরও আর সেই অবধি পায় নি শঙ্করী। শুধু অবিরত কাঁটা হয়ে থেকেছে, ওই বৃষ্টি কে বলে, “নগেন বলে একটা ছেলে এসে গ্রামে কি রটিয়ে বেড়াচ্ছে শঙ্করীর নামে!”

ঘাটেপথে বেরিয়ে গাছের পাতা নড়ার শব্দে শিউরে ওঠে শঙ্করী, বাঁশের সরসরানি শুনলে থমকে দাঁড়িয়ে পড়ে।

কিন্তু ?

সে ভয় কি শুধুই ভয় ? নিছক ভয় ?

তার সঙ্গে ভয়ানক একটা আশাও জড়ানো নেই ?

সর্বদা কি মনে হয় না, হঠাৎ কোন একটা বাঁশবাগানের ধারে, কি পুকুরঘাটের কাছে সেই সর্বনেশে লোকটাকে দেখতে পায় তো আর বাড়ি ফেরে না।...

কাল শুনেছে, বিয়ে উপলক্ষে কাকার বাড়ি থেকে 'নেমন্তনিত্তে' আসবে। কাল থেকে তাই মরে আছে শঙ্করী।

কি জানি কি বলবে খুঁড়ো কি খুঁড়তুতো ভাইরা এসে!

নগেন কি সব বলে বেড়িয়েছে ?

নগেন কি ওখানে আছে এখনও ?

নগেন কি বেঁচে আছে ?

হয়তো টের পেয়ে সবাই মেরে ফেলেছে।

সেদিন কেন আমবাগানে গিয়েছিল শঙ্করী ? আর যে লোকটা তাকে মন্দ পথে টানবার চেষ্টা করছিল, কেন আজও শঙ্করীর মনকে লক্ষ দড়িদড়া দিয়ে টানছে সে ?

মরতে গিয়েও কেন মরতে পারে না শঙ্করী!

পৃথিবীতে শঙ্করী বলে একটা মেয়েমানুষ যদি না থাকে কি এসে যাবে পৃথিবীর! কলঙ্কিত মন নিয়ে ঠাকুরঘরের কাজ করছে সে, তুলসীতলায় প্রদীপ দিচ্ছে, এ মহাপাপের ফল—

চিন্তায় বাধা পড়ল।

কাশীশ্বরী এসে দাঁড়িয়েছেন, তীব্রকণ্ঠে ডাকছেন, “নাতবৌ!”

॥ বারো ॥



ভয়! ভয়!

সতার মনের কাছে এক বড় ভয়ের পরিচয় বোধ করি এই প্রথম।

‘কাটোয়ার স্কী’য়ের খুব যে একটা খোয়ার হবে এটা আশঙ্কা করছিল সত্য। কিন্তু এ কি! তিরস্কারের এ কোন ভাষা? জীবনে অনেক কথা শুনেছে সত্য, অনেক কথা শিখেছে, কিন্তু এসব শব্দ তো কখনো শোনে নি।

‘অসতী’ মানে কি? ‘উপপতি’ কাকে বলে? ‘কুল খাওয়া’ বলতেই বা কি বোঝায়?

যে কুলের আচার তৈরি হয়, আর তেলে-নুনে জরিয়ে অপূর্ব আনন্দন পাওয়া যায়, এটা যে ঠিক সে জাতীয় নয়, এইটুকুই শুধু বুঝতে পারে সত্য। কিন্তু তার পরই কেমন দিশেহারা হয়ে যায়। দূর থেকে হাঁ করে তাকিয়ে থাকে শঙ্করী আর কাশীশ্বরীর দলের দিকে।

না, আর কেউ কিছু বলছে না, সবাই নিখর, এমন কি মোক্ষদা পর্যন্ত কেমন যেন স্তব্ধ, একা কাশীশ্বরীই পালা চালিয়ে যাচ্ছেন, চাপা তীক্ষ্ণ গলায়।

শঙ্করীকে ধরে চিবিয়ে খেলেও বুঝি রাগ মিটবে না, এমনি সব মুখভঙ্গী।

মোক্ষদা এক ধরনের, কাশীশ্বরী আর এক ধরনের। মোক্ষদার ‘অটুট’ গভর, অসীম ক্ষমতা, অনর্গল বাকপটুত্ব। কিন্তু কাশীশ্বরীর তা নয়। কাশীশ্বরী শোকোক্তাপে কিছুটা অথর্ব, তাছাড়া চিরদিনই তিনি টেপামুখী। শুধু তেমন মোক্ষম অবস্থায় পড়লেই মুখ দিয়ে কথা বেরোয় তাঁর চাপা তীক্ষ্ণ।

কিন্তু আজকের মত এমন সব কথা কবে বেরিয়েছে কাশীশ্বরীর মুখ দিয়ে? এমন ঘৃণা-জর্জরিত মুখই বা কবে দেখা গেছে তাঁর?

কে গিয়েছিল কাটোয়ার?

কে কি শুনেছে এসেছে সেখান থেকে? বার বার শঙ্করীর বাপেরবাড়ির কথাই বা উঠছে কেন? তারা নাকি কেউ ভোজবাড়িতে আসবে না, সম্পর্ক রাখতে চায় না শঙ্করীর সঙ্গে। নেহাৎ নাকি তারা শঙ্করীর মা-বাপ নয়, খুঁড়োখুঁড়ী, তাই অমন মেয়েকে টুকরো টুকরো করে কেটে কাটোয়ার গঙ্গায় ভাসিয়ে দেয় নি।

আরও কত কথা, তার সঙ্গে কত মুখভঙ্গী!

শঙ্করীকে গলায় দড়ি দিয়ে মরবার পরামর্শ দেওয়া হচ্ছে, দেওয়া হচ্ছে ঘাটে ডুবে মরবার নির্দেশ! পাপিষ্ঠা শঙ্করীর পাপস্পর্শেই যে কাশীস্থরীর একমান্তর নাতিটা বিয়ের বছর না ঘুরতেই মরছে, সেকথাও প্রমাণিত হয়ে যাচ্ছে আজকের বিচারের রায়ে।

অনেক শনতে শনতে শেষ পর্যন্ত এইটুকু বুঝতে পারে সত্য, নাপিত-বৌ আর রাখু কাটোয়া গিয়েছিল যজ্ঞির জন্যে নেমন্তন্ন করতে। আর শঙ্করীর খুড়ী নাপিত-বৌয়ের কাছে শঙ্করীর নামে যাচ্ছেতাই করেছে।

সেখান থেকে খুব যে একটা গর্হিত কাজ করে চলে এসেছে শঙ্করী, সে বিষয়ে আর সন্দেহমাত্র নেই। লক্ষ্মীর ঘরে সন্ধ্যা দিতে দেরি হওয়া অথবা সাঁঝ-সন্ধ্যা পর্যন্ত ঘাটে বসে থাকার চাইতে যে অনেকে বেশী গর্হিত তা বুঝতে পারা যাচ্ছে।

কিন্তু শঙ্করীর অপরাধের সঙ্গে তার খুড়ীর বোনপোর যোগ কোথায়? সে কেন শঙ্করীর জন্যে বাড়ি ছেড়ে নিরুদ্দেশ হয়ে চলে গেছে?

এইখানেই সব গোলমাল লাগছে সত্যর।

সব যেন হৈয়ালি।

এই অন্য জগতের অর্থবহ, জীবনে না-জানা শব্দগুলো সত্যর বুকটাকে কেমন হিম-হিম করে দিচ্ছে। ভয় করছে। যে অনুভূতি জীবনে জানে না সত্য, আজ সেই অনুভূতি তার সমস্ত সাহসকে যেন বোবা করে দিয়েছে।

গিন্ধীরা কাউকে শাসন করছেন, অথচ সত্য তার মধ্যে ফোড়ন কাটছে না, এমন ঘটনা বোধ করি সত্যর জ্ঞানে এই প্রথম। অপরাধীর পক্ষ নেওয়াই সত্যর স্বভাব। তা সে অপরাধী যে শ্রেণীর হোক।

একবার বাসন-মাজুনি বাগ্গী-বৌ সন্ধ্যা করে ঘাটে বাসন মাজতে গিয়ে পঁজার বাসন থেকে একটা বাটি হারিয়ে ফেলেছিল। খুব সম্ভব বাটিটা জলেই ডুবে গিয়েছিল, কিন্তু বাগ্গী-বৌকে 'চোর' অপবাদ দিয়ে ন ভুতো ন ভবিষ্যতি করেছিলেন শিবজ্ঞানী আর দীনতারিণী। এবং মোক্ষদা হুকুম দিয়েছিলেন, "না যদি নিয়েছিস তো সমস্ত রাত ওই পুকুর হাতড়ে বাটি খুঁজে বার কর।"

বাগ্গী-বৌ যত হাউমাউ কাঁদে, গৃহিণীকুল ততই চেপে ধরেন তাকে। চুরির উদ্দেশ্যেই যে সে বেলা গড়িয়ে বাসন মাজতে আসে এ মন্তব্য শুধু কল্পিত ছাড়াই না তাঁরা। সেযাত্রা সত্যই তো রক্ষা করেছিল বাগ্গী-বৌকে।

বলেছিল, "চল বাগ্গীবৌ, আমিও খুঁজিগে তোর সঙ্গে। আমি খুব সাঁতার জানি, সাঁতরে এপার-ওপার করে বাটি হাতড়াব।"

"তুই খুঁজবি মানে?"

ধমকে উঠেছিল সবাই। এবং সকলকে চমকে দিয়ে সত্য উদাসভাবে বলেছিল, "তা খুঁজতে হবে বৈকি। তোমাদের পাপের প্রাচীতির আমাকেই করতে হবে, ভগবান যখন আমাকে তোমাদের ঘরের মেয়ে করে পাঠিয়েছে। বাড়িতে যাদের পাঁচসিন্দুক বাসন, তারা যদি তুচ্ছ একটা ডাল খাবার বাটির জন্যে একটা মানুষের প্রাণবধ করতে চায়, তবে একজনকে তো তার প্রতিকার করতে হবে।"

'খ' হয়ে গিয়েছিল সবাই, আর বোধ করি তুচ্ছ একটা বাটির জন্য নিজেদের তুচ্ছতার বহরটা সেই প্রথম নজরে পড়েছিল তাদের।

"তবে আর কি, পাঁচসিন্দুক বাসন আছে তো হরির নুট দিগে যা বাসনের। অনেক পয়সা আছে তোর বাপের।" বলে কেমন যেন শিথিলভাবে রণে ভঙ্গ দিয়েছিলেন তাঁরা।

বাগ্গী-বৌ গলায় কাপড় দিয়ে সত্যকে প্রণাম করেছিল সেদিন।

তা এমন অনেকেই অনেক সময় বিপদ থেকে ত্রাণ করেছে সত্য। কিন্তু আজ আর সত্য গলা দিয়ে শব্দ বেরোচ্ছে না।

একটা অন্ধকার অরণ্যের গা-ছমছমে রহস্য মুক করে দিয়েছে সত্যকে।

কখন যে তিরস্কার-পর্ব শেষ হল, কখন যে গিন্ধীরা আপন আপন কর্মে প্রস্থান করলেন, কাটোয়ার বৌ তারপর গেল কোথায়, এসবের কোন খবরই আর রাখতে পারে নি সত্য। কখন একসময় যেন আস্তে আস্তে চলে গিয়ে সারদার ঘরের মেজেয় পরনের চাঁদের আলো-রাঙা আটহাতি শাড়িখানির আঁচলটুকু বিছিয়ে শুয়ে পড়েছিল। যেখানে সারদাও শুয়ে আছে সেই একই পদ্ধতিতে, কোলের ছেলেটুকুকে কোলের কাছে নিয়ে।

সারদা বলেছিল, "শুনে যে সত্য ঠাকুরঝি!"

"শুলাম" বলে উত্তর এড়িয়েছিল সত্য।

সারদা আর একবার নিঃশ্বাস ফেলে বলেছিল— “কাটোয়ার বৌ অত গাল খাচ্ছিল কেন ঠাকুরবি ?”
সত্য বলেছিল, “জানি না।”
সত্যর পক্ষে এমন সংক্ষিপ্ত স্বল্প ভাষণ প্রায় অভূতপূর্ব, কিন্তু সারদারও নাকি মনে সুখের লেশ
নেই— তাই আর বেশী কথা বাড়ায় নি। একসময় ছেলের সঙ্গে ঘুমিয়েও পড়েছিল।

কিন্তু সত্যর চোখে ঘুম আসতে চায় না।
ভয়ের সেই অনুভূতিটা ছাড়তে চায় না তাকে।
থেকে থেকে বুকেটা কেমন ঠাণ্ডা আর ফাঁকা-ফাঁকা লাগে। অজানা ওই শব্দগুলো না হয় চুলোয়
যাক, কিন্তু আর একটা নতুন ভয় যে মনের মধ্যে বাসা বাঁধল এসে।

সত্যিই যদি কাটোয়ার বৌ...
গলায় দড়ি দেওয়ার পদ্ধতিটা কি, আর তার পরিণামই বা কি ঠিক জানে না সত্য, কিন্তু
অপরটার আশঙ্কায় বার বার গায়ে কাঁটা দিচ্ছিল তার। যদি তাই হয় ?
যদি কাল ‘যজ্ঞ’র প্রয়োজনে পুকুরে জাল ফেলাতে গিয়ে জেলেরা মাছের সঙ্গে আরও একটা
জিনিস ছেঁকে তোলে!

ভারী রুই পড়েছে ভেবে আহ্বাদে হেঁই হেঁই করে জাল টেনে তুলে যদি দেখে মাছ নয়!
বুকের মধ্যে টেকির পাড় পড়ার মত শব্দ হতে থাকে সত্যর।
কজনকে পাহারা দেবে সে ?

সারদার ব্যাপারেই তো ভয়ে আর বাপের হুকুমে তটস্থ হয়ে আছে, তার ওপর আবার কাটোয়ার
বৌ চাপল মনের মধ্যে। কাকে রেখে কাকে দেখবে সত্য ?
গালাগালির সময় মুখটা কি রকম দেখাচ্ছিল কাটোয়ার বৌয়ের ?
সত্য কি তাকায় নি ?

বোধ হয় তাকিয়েছিল, কিন্তু দালানের এক কোণায় মিটমিট করে একটা প্রদীপ জ্বলছিল, তার
থেকে দাওয়ায় আর কত আলো এসে পড়বে ?

তাও আবার চাঁদের এখন আঁধার কাল চলছে। ‘স্কুল’ চললে তবু উঠানে বাগানে হেঁটে চলে
সুখ, মনিষিকে দেখাও যায়। ‘আঁধারে’ তো সঙ্কে হলেই হয়ে গেল!
মানুষের সঙ্গে কথা কওয়া ওই মুখ-চোখের দেখেই।

না, শঙ্করীর মুখ দেখতে পায় নি সত্য।
তাই বুঝতে পারছে না, ওই অদ্ভুত অদ্ভুত শব্দগুলোর মানে শঙ্করী ধরতে পেরেছে কিনা।
আচ্ছা সারদাকে একবার চুপি চুপি জিজ্ঞেস করবে সত্য ? যতই হোক সারদা সত্যর দুগুণ
বয়সী, ছেলের মা, কতদিন আগে বিয়ে হয়েছে সারদার, হয়তো বিদ্যুটে কথাগুলোর মানে জানা
থাকলেও থাকতে পারে।

কিন্তু বার বার বলি বলি করেও বলতে পারল না শেষ অবধি। মুখের দরজায় কে যেন
তালচাষি দিয়েছে।

মানে বুঝতে না পারলেও কথাগুলো যে খারাপ কথা, সেটা বুঝতে পেরেছে সত্য।

কাটোয়ার বৌয়ের সঙ্গে খুব যে একটা যোগাযোগ ছিল সত্যর তা নয়। একে তো মাত্র
বছরখানেক হল এসেছে সে, সব আগভুক্ত হয়ে, তাছাড়া সে তো নিরামিষ দিকের। একসঙ্গে
খাওয়াদাওয়া নেই। তবে নাকি নেহাৎ দেখা-সাক্ষাৎ-সূত্রে কথাবার্তা। তাও বিশেষ মিশকে নয়
শঙ্করী। সর্বদাই যেন আনমনা, কাজেই—

সত্য আজও যখন সন্ধ্যা গড়িয়ে যাওয়ার অপরাধে চুপি চুপি অবহিত করতে এসেছিল শঙ্করীকে,
তখন নেহাৎ একটা জীবের প্রতি যতটুকু মমতা থাকা উচিত তার বেশী ছিল না। কিন্তু এখন যেন
মায়ায় মন ভরে যাচ্ছে সত্যর। মনে হচ্ছে কত না-জানি কাঁদছে বোচারা! জগতে এমন কেউ নেই ওর
যে সে কান্নায় একটু সান্ত্বনা দেয়!

বিধবা হওয়ার কি কষ্ট!

সত্যরও তো বিয়ে হয়েছে। একটা বরের সঙ্গেই নাকি হয়েছে। সেই বরটা যদি হঠাৎ মরে যায়,
সত্যও তাহলে তো বিধবা হবে ?

তা যদি হয়, সত্যকেও সবাই অমনি করে খোয়ার করবে ?

কিন্তু তাই বা কি করে বলা যায় ?

পিস্তাকুরমাও তো বিধবা।

বিধবা আরও কতজনেই, তাদের ভয়েই তো সবাই তটস্থ হয়ে থাকে।

ওদের দেখে মনে হয়, ওরাই যেন পৃথিবীর দণ্ডমুণ্ডের কর্তা।

তবে ? ওরা বড় বলে ? কিন্তু তাই কি ? এরা বড় হলে ওরকম হতে পারে ?

না, এ সব ঠিক বুঝতে পারে না সত্য।

শুধু যে বয়েস দিয়েই সব বিচার হয় তা তো নয়। এই যে তার বাবাকে দেশসুদ্ধ লোক ভয় করে, জেঠামশাইকে কি কেউ করে ? উল্টে জেঠামশাই পর্যন্ত তো বাবার ভয়ে কাঁটা। শুধু কি জেঠামশাই ? সেজঠাকুন্দা ? ন'ঠাকুন্দা ? কে নয় ? ওরা তো আর মেয়েমানুষ নয় ?

বয়েসটা কিছু নয়। ছোট বড় বলেও কিছু নয়।

তাহলে ভয়ের বাসটা কোথায় ?

ভাবতে ভাবতে খই পায় না সত্য। তবু ভাবে। কে যে ওকে ভয়ের বাসা খোঁজার চাকরি দিয়েছে কে জানে!

অনেক রাতে ভুবনেশ্বরী আসে ডাকতে।

“এই সত্য, না খেয়ে ঘুমিয়েছিস যে, ওঠ!”

সত্য পাশ ফিরে ঘুমের ভান করে জানায়, তার খিদের অভাব।

ভুবনেশ্বরী বকে ওঠে, “খিদে নেই কেন ? ওঠ যা, রাত-উপুসী থাকতে নেই। কথায় বলে রাত-উপুসে হাতী কাবু। বড় বৌমা, তুমিও ওঠো দিকিন্ বাছ। সারাদিন উপুসে আছ, আর অমন করে পড়ে থেকো না। স্বামী-পুতুরের অকল্যাণ হয় ওতে।”

ভুবনেশ্বরীর গলা পেয়েই ধড়মড়িয়ে উঠে বসেছিল সারদা। পৃথিবী থেকে বিদায় নেবার তীব্র ইচ্ছে ধরাশয়্যা নিয়ে পড়ে থাকলেও খুড়াশাওড়ীকে দেখে সমীহ করবে না, এমন কথা ভাবা যায় না। তাই ধড়মড়িয়ে উঠেছিল। স্বামী-পুতুরের অকল্যাণ শুনে এবার মনে মনে ধড়ফড়িয়ে উঠল।

ভুবনেশ্বরী ফের বলে, “আমি তোমার ছেলে দেখছি যাও ওঠো। সত্যকে ডেকে নিয়ে খেতে যাওগে। তোমার শাওড়ী হেঁসেল আগলে বসে আছে। এবেলায় জাল ফেলিয়ে মস্ত একটা মাছ ধরানো হয়েছিল, ‘এসো-জন বসো-জন’ যদি আসে বলে। খামি খামি দাগার মাছ আর আমের বাখরা দিয়ে এমনি খাসা টক রेंধেছে দিদি, দেখগে মাও খেয়ে।”

ভুবনেশ্বরী অনেকগুলো কথা বলে গেলেও সত্যর কানে তার শেষ অবধি পৌছয় নি। পুকুরে জাল ফেলে বড় মাছ ধরা হয়েছে, শুনেই তার মনশক্ষে ভেসে উঠেছে জালবদ্ধ আর একটা জীব। যাকে টেনে তুলে ধড়াস করে পুকুরপাড়ে ফেলা হয়েছে আর যে মুখ চন্দ্র-সূর্য্যিতে দেখতে পাবার কথা নয়, সেই মুখ সহস্র লোক দেখছে।

কিন্তু সেই মুখের উপর যে চোখ দুটো বসানো আছে, সে কি আর দেখছে ? জীবনে কি আর দেখবে কোন কিছু ?

উঠে বসে তাড়াতাড়ি বলে, “মা, কাটোয়ার বৌ কোথায় ?”

“কোথায় আবার,” স্বাক্ষর দিয়ে ওঠে ভুবনেশ্বরী, “কাঁথা মুড়ি দিয়ে শুয়েছে গিয়ে। তাকে তোর দরকার কি ? খেতে যাচ্ছিস খেতে যা।”

“খাব না, খিদে নেই।” ফের শুয়ে পড়ে সত্য।

কিন্তু ওদিকে ‘দাগা দাগা রুই মাছ আর আমের বাখড়ার টক’ অন্যত্র কাজ করেছে। একে যোল বছর বয়সের দুরন্ত স্বাস্থ্য, তার উপর সারাদিন ছেলেটা বুকুর দুধ টেনে খাচ্ছে।

সতীনকাঁটার যন্ত্রণাটাও যেন কাবু হয়ে এসেছে।

তবু একান্ত বাসনা সন্তেও বাধা আসে মনে।

সারাদিন অভুক্ত পড়ে থেকেও সেই অভুক্ত চেহারাটায় স্বামীর সঙ্গে একবার দেখা হল না, কে জানে রাতে হতে পারে কিনা ? আজ তো নতুন বৌয়েরই কালরাত্রি, কাজেই আজ পুরনো বৌ প্রাধান্য পেলেও পেতে পারে। দিবি্য করে মাছের ঝাল দিয়ে একপাথর ভাত স্টেটে এসে অভিমান জানাবে কোন মুখে ? সারদা তাই চি চি করে বলে, “সবে পেটের ব্যথাটা একটু নরম পড়েছে—।”

“তা হোক। ও খেলেই নরমে যাবে”, নরম গলায় বলে ভুবনেশ্বরী, “তুমি ডেকেডুকে নিয়ে গেলে তবে যদি সত্য দুটো খায়!”

নিজের শাওড়ীর সঙ্গে কথা বলে না। ঘোমটা দিতে হয় একগলা। কথা যা তা এই শাওড়ীর সঙ্গেই। তা খুড়াশাওড়ীর কঠোর নরম সুরটুকুই চোখে জল এনে দিল সারদার। অগত্যাই আর রাসুর সামনে অভুক্ত মুখ দেখাবার ইচ্ছেটাকে টেনে রেখে দেওয়া গেল না, সারদা সত্যকে নাড়া দিয়ে বলল, “চল ঠাকুরঝি, যা পারবে খেয়ে নেবে।”

সত্য উঠে বলল।

হাই তুলে বিরক্ত হয়ে উঠে বলল, “বাবা, দু’দণ্ড যদি একটু নিরিবিলিতে পড়ে থাকার জো আছে! নাও চল।”

সারদা চলে যেতেই ভুবনেশ্বরী একটা অসমসাহসিক কাজ করে বলল।

ঘুমন্ত ছেলেটাকে কাঁথা মুড়ে কোলে চেপে নিয়ে ঘর থেকে বেরিয়ে ছুপি ছুপি রাখুর মাকে গিয়ে বলল, “রাখুর মা, বড় ছেলেকে একবার ডেকে দে তো। বলবি জরুরী দরকার।”

বড় ছেলে অর্থে রাসু।

রাখুর মা এদিক ওদিক তাকিয়ে ফিসফিস করে বলে, “দেখে এলাম চণ্ডীমণ্ডপে গিয়েছে।”

“তা হোক, তুই আমার নাম করে ডেকে নিয়ে আয়।”

ঘরের কাছাকাছি গিয়ে মায়ের ডাকে থমকে দাঁড়িয়ে পড়তে হল সত্যবতীকে, আর সারদার বুকটা কী এক আশঙ্কায় চমকে উঠে শীতকালের পানাপুকুরের জলের মত ঠাণ্ডা নিখর হয়ে গেল।

অভ্যন্ত উচ্চারণে মায়ের নাম ধরে ডাক দেয় নি ভুবনেশ্বরী, ব্যস্ত অথচ চাপা গলায় বলে উঠেছে, “এই, তুই এদিকে আয়।” “তুই” অর্থেই সত্য।

আর বিশেষ করে সত্যকেই হঠাৎ চাপা গলায় ডাক দিয়ে সরিয়ে নেবার অর্থ কি? অর্থ আছে, এরকম ডাকের একটাই অর্থ হয়, আর যে অর্থ সত্যর কাছে ধরা না পড়লেও সারদার কাছে যেন ধরা পড়েছে। তাই না বুকটা হঠাৎ এমন হিম-হিম নিখর হয়ে গেল। তাই না আশার আশঙ্কায় চমকে উঠল সে বুক।

সারদা জানে, সারদার মনে আছে।

ছেলেবেলায় সারদা যখন নিঃশঙ্কচিত্তে তার সদ্য-বিবাহিত কাকীমার কাছে শোবার বায়না নিয়ে তোড়জোড় করত, তখন ঠিক এমনি চাপা গলায় তার মনে ডাক দিতেন, “ইদিকে আয় বলছি।” তবুও বায়না করত সারদা। এখন মনে পড়লে কী হাসি পায়!

সত্যবতী থমকে দাঁড়িয়ে পড়ে বলল, “বড় বৌ কি একলা শোবে নাকি? তোমাদের আক্কেলটা তো ভাল!”

ভুবনেশ্বরী হাসি চেপে ভর্ৎসনার সুরে বলে, “থাম, তোকে আর সঙ্কলের আক্কেল খুঁড়ে খুঁড়ে বেড়াতে হবে না। একলা কেন, অত বড় বৌটা ঘরে রয়েছে বড় বৌমার, সে কি কম নাকি?”

“জানি না বাবা, তোমাদের একো সময় একো মতি! এইটুকুনখানি কচি ছেলে, যার গলা টিপলে দুধ বেরোয়, যে আগলাবে মাকে!”

“তুই আসবি?”

“যাচ্ছি বাবা যাচ্ছি। তর সয় না একটু, সবাই যেন ঘোড়ায় জিন্দ দিয়ে আছে। নাও চল। একটা মনোকষ্টওলা মানুষ এই আঁধারপুরীতে একলা পড়ে থাকবে, এই যখন তোমাদের বিচের তো তাই হোক! কোন্ মুখেই যে তোমরা ধমকথা কও, তাও জানিনে বাবা!”

আটহাত শাড়িখানার হাততিনেক অংশমাত্র কাজে লাগিয়ে, আর বাকী হাতপাঁচেক বিড়ে পাকিয়ে কুক্ষিগত করে নিয়ে মায়ের পিছু পিছু চলল সত্যবতী অনিচ্ছামত্তর গতিতে। সত্যিই তার আজ সারদার কাছে গুতে ইচ্ছে ছিল। প্রধানত সারদার প্রতি সহানুভূতি, দ্বিতীয়ত মনে আশা করছিল, যদি গুয়ে গুয়ে গল্প করতে করতে ‘ভয়ঙ্কর’ শব্দগুলোর অর্থ উদ্ধার করে নিতে পারে!

শব্দগুলো যে ভাল নয়, বড়দের কাছে প্রশ্ন করলে যে সত্যি উত্তর পাওয়া যাবে না, ঠেলামারা একটা ভুলভাল উত্তরের সঙ্গে হয়তো বা খানিকটা ধমকই জুটবে— এ বিষয়ে যেন নিশ্চিত হয়ে রয়েছে সত্যবতী।

অথচ ভয়ঙ্কর অদম্য একটা কৌতুহল ভিতর থেকে চাড়া দিচ্ছে। শব্দগুলোর অর্থ সংগ্রহ করতে পারলেই যেন অনেক রহস্যের ঘরের চাবি খোলা যায়। অন্তত শঙ্করী কেন চকিংশ ঘণ্টা ‘মরব’ ‘মরব’ করে, আর বাড়ির সকলে কেন তার প্রতি এককড়া সদ্যবহার করে না, এটুকু যেন ওর থেকেই ধরা যাবে।

কিন্তু সকল গুড়ে বালি দিল মা।

তা নতুন কিছুও নয় অবিশ্যি! জন্মাবধি তো দেখে আসছে সত্যবতী, বড়দের কাজই হচ্ছে ছোটদের সকল ইচ্ছের গুড়ে বালি দেওয়া।

দীনতারিণীর ঘরে বাড়ির সব কটা 'সোমন্ত' মেয়ের শোবার ব্যবস্থা। ঘরটা প্রকাণ্ড বড় বলেও বটে, তা ছাড়া বড় বড় মেয়েরা এখান ওখান ছড়িয়ে থাকে এটা বিধি নয়। এই 'ব্যবস্থা' মেয়েদের মধ্যে ন'বছরের সত্যবতী সব চেয়ে বড়, আর তার বিয়েও হয়ে গেছে, তাই সে হচ্ছে দলনেত্রী। পুণ্ডি রাজু নেড়ী টেপি পুঁটি রাখালী সন্ধলেই তাকে ওপরওলার সন্ধানটা দেয়।

আজ ওরা সত্যর জন্যে অনেকক্ষণ অপেক্ষা করে ঘুমিয়ে পড়েছিল, সত্য এসে দেখল ঘুমন্ত পুরী। যে যেমন ইচ্ছে হাত-পা ছড়িয়ে শুয়েছে, জায়গা বিশেষ নেই, ওর মধ্যেই ওদের হাত-পা ঠেলেঠেলে জায়গা করে নিতে হবে।

সত্য বিরক্তভাবে আর একবার বলে উঠল, "একদিন অন্যন্তর শুলে যে কী মহাভারত অস্তদ্ধ হয়ে যেত মা মঙ্গলচণ্ডীই জানে!... নে, সর্ দিকি, এই পুঁটি, ঠ্যাঙটা একটু গুটো।"

বলা বাহুল্য পুঁটির সুপ্তির গভীরতায় এ স্বর পৌঁছল না। অগতাই সত্যবতী বাক্যবলের সাহায্য ছেড়ে বাহুবলের শরণ নিল। পুঁটির পা আর রাখালীর হাত সরিয়ে নিজের মতন একটু জায়গা করে শুয়ে পড়ল বিছানায়। দীনতারিণী এখনো আসেন নি, তাঁর শুতে আসতে দেরি হয়। বিধবাদের দিকের রাতের জলপান চালভাজা তিলের নাড়ুকে বড়ো দাঁতে জন্দ করতে সময় লাগে।

ঠাকুমার বিছানাটা ঠিক আছে কিনা একবার দেখে নিল সত্যবতী। আছে বটে একফালি ঠাই। অবিশ্যি বিছানা আর কি, ঘরজোড়া একখানা শতরঞ্জির উপর বড় বড় মোটা মোটা খানকয়েক কাঁথা, পাতা, আর তারই মাথার দিকে দেয়ালজোড়া টানা লম্বা মাথার বালিশ।

একসঙ্গে যাতে সারি সারি অনেকগুলো মাথা ধরানো যায় তার জন্যেই এই অভিনব মাথার বালিশের আয়োজন। এক-একটা বালিশ বোধ হয় লম্বায় চার হাত আর ওজনে আধ মণ, যারা শোয় তারা নিজেরা তাকে এক ইঞ্চিও নড়াতে পারে না। নিজের বালিশকে নিজের ঘাড়ের তলায় ইচ্ছেমত ভঙ্গীতে রাখতে পারার সুখ ওরা জানে না।

বালিশগুলো যে শুধু মাপেই বড় বলে ভারী তাও কে জানে, তুলেগুলোও যে পুরনো। জিনিস যত সস্তাই হোক আর যত বেশীই প্রাচুর্য থাকে—অপচয় করার কথা কড় কল্পনাও করতে পারে না। তাই কর্তাদের বড় বড় তাকিয়াগুলো ছিড়ে গেলে যখন তাদের জন্যে নতুন 'খেরো' দিয়ে নতুন তুলোর তাকিয়া বানানো হয়, তখন পুরনো তুলোর জিনিস ছেঁড়া খেরোগুলো কাজে লাগানো হয় বাড়ির নাবালকদের জন্যে।

সব বাড়িতেই একই অবস্থা। ছেলেরা কান্ধা-বান্ধা ছাড়া সংসারের যত গুঁচা মালের গতি হবে কাদের উপর দিয়ে? তবু তো কবরেজ-বাড়ির অবস্থা উত্তম। বাৎসরিক বৃত্তি দিয়ে সাজো-ধোবা ঠিক করা আছে, নিয়মিত সব ফর্সা করে দিয়ে যায় সে। মানে আর কি, কেচে শুকিয়ে পাট করে দিয়ে যায় কি আর? 'কাঁচা'র পুকুরে কেচে ভিজ়ে কাপড়-চোপড়ের উঁই খিড়কির পুকুরের পৈঠয়ে নামিয়ে রেখে যায়। তার পর তো আছেন মোক্ষনা। ভাল পুকুরের জল দিয়ে গুন্ধ করে সেই ভিজ়ের বস্তা রোদে মেলে দেওয়ার দায়িত্ব তাঁর। তার পর আছে বৌ-ঝিরা। শিবজায়ার ছেলের বৌরা, কুঞ্জর বৌ, ভুবনেশ্বরী—পরবর্তী ডিউটি এসে পড়ে এদের ওপর।

নিতি বিছানা কাঁথার ওয়াড় খোলা আর ওয়াড় পরানো কম ঝামেলার ব্যাপার নয়, কিন্তু রামকালীর যে ধোবার উপর এবং সংসার—পরিচালিকাদের উপর কড়া হুকুম দেওয়া আছে, অনন্ত মাসে দুক্ষেপ সব সাফ করতে।

আজই বোধ হয় সব সদ্য কাচা। কলা-বাসনার ক্ষার আর সাজিমাটির গন্ধ ছাড়ছে। সত্যবতী নাকে কাপড় দিয়ে শুয়েছে, এই গন্ধটা তার ভারী বিশ্রী লাগে। ও শুয়ে শুয়ে ভাবে, এই বিচ্ছিরি গন্ধটা বাদ দিয়ে কাপড় কাচা যায় না? ওটা ভাবতে ভাবতে আরও অন্য ভাবনায় চলে গেল সত্যবতী।...

বড়বৌ তো একা শুলে, মাঝরাত্তে উঠে যদি জলে ডুবতে যায়? বৌটা তো যাবেই, বাবাকে কি জবাব দেবে সত্য? তারপর গিয়ে রাত পোহালেই বাড়ি কুটুমে ছেয়ে যাবে, তার মাঝখানে সেই বড়বৌয়ের ডুবে মরার রায়লা। আচ্ছা বিপদ হল বটে!

নাঃ, নিশ্চিন্দী থাকা চলে না, বেশী রাত্তে বাড়ি নিঃসাড় নিশ্চূপ হয়ে গেলে উঠে গিয়ে দেখে আসতে হবে বড়বৌকে। সব চেয়ে ভাল হয় ওর ঘরটায় বাইরে থেকে শেকল তুলে দিলে, নইলে কবার আর দেখতে যাওয়া যাবে? কোন ফাঁকে যদি উঠে গিয়ে সর্বনাশ ঘটিয়ে বসে থাকে বড়বৌ?

দরজার মাথায় শেকল, সত্যবতীর হাত পৌঁছয় না, কিসের ওপর উঠে শেকলে হাত পাওয়া যায় তাই ভাবতে থাকে সে।

টিপ্-টিপ্-করা বুকটা নিয়ে সারদা ঘরে ঢোকে। সারদার আহারকালীন অবকাশে ছেলে কেঁদে ভুবনেশ্বরীকে জ্বালাতন করেছিল কিনা জিজ্ঞেস করতেও পারে না। ভুবনেশ্বরীই নিজ থেকে বলে, “নিঃসাদে গিয়ে শুয়ে পড় তো বড় বোমা, ছেলে সবে ঘুমিয়েছে, জেগে না যায়। শেওরে কাজললতা দিয়ে শুইয়ে রেখে এসেছি।”

রাসুকে ডাকিয়ে এনে ঘরে পুরে দেওয়া পর্যন্ত স্বস্তি ছিল না ভুবনেশ্বরীর। কি জানি যদি অন্ধকারে ঠাहर করতে না পেরে ‘কে কে’ করে চেঁচিয়ে ওঠে সারদা!

এদিকে আবার রাসুকে বলতে পারে না যে “ঘরের পিদিম নিভিও না”, কারণ ছেলেকে শোবার ঘরে পুরে দিয়ে আর তার সঙ্গে কথা কইতে মায়েরই লজ্জা লাগে। এ তো ভাসুরপো। আর সারদাকেই বা স্পষ্টাঙ্গপষ্টি বলা যায় কি করে, “ওগো তোমার জন্যে ঘরের মধ্যে মানিক আনিয়ে রেখেছি!” বলা যায় না বলেই কচি ছেলের ছুতো।

তা ছাড়া আর একটু কারণও কি ছিল না? একটু কৌতূকের সাধ? হলেও স্বাণ্ডী সম্পর্ক, তবু তো মেয়েমানুষ। আর বাঘা রামকালীর ঘরগী হলেও ভুবনেশ্বরী যেন এখনও ভিতরে ভিতরে কোথায় একটু কাঁচা একটু সবুজ রয়ে গেছে।

‘মানিকের উপমাটা ভুবনেশ্বরীরই মনে এসেছে। নিত্যকার মানুষটাই যে আজ সারদার কাছে পরম মূল্যবান হয়ে উঠেছে, একথা বোঝবার ক্ষমতা ভুবনেশ্বরীর আছে। দেখা যাক বড়বোমা কতটুকু করায়ত্ত রাখতে পারে স্বামীকে! অবিশ্যি ভরসা কিছু নেই, বেটাছেলের মন, নতুন বৌ ডাগরটি হয়ে উঠতে উঠতে সারদাও কোন্ না ততদিন তিন ছেলের মা হয়ে বসবে! তখন কি আর রাসু নতুন ফুলের মধু ফেলে—

ভাবতে গিয়ে চমকে গেল ভুবনেশ্বরী। মনে মনে নাক-কান মললো। রাসু না তার পুত্রস্থানীয়! তার সম্পর্কে এসব কথা কি বলে ভাবছে সে! সম্পর্কের মান-সুখ্যদা আর থাকছে কি করে তা হলে।

ওদের সম্পর্কে সব ভাবনা জোর করে মুছে নিয়ে রাসুয়ের দিকে চলে গেল ভুবনেশ্বরী। এবার তাদের দলের খাবার পালা। তবে আজ আর খাবার পরে ঘুম নয়, রাত জেগে কালকের যজ্ঞের কুটনোবাটনা করতে হবে। বড়লোকের বাড়ির বৌ বলে তো আর আয়েস করবার হুকুম নেই। বৌ হচ্ছে বৌ। বরং রাসুর মা দুদগু পা ছড়িয়ে বসলে, কি কাজে গাফিলি করলে কেউ কিছু বলবে না, কিন্তু বৌদের সেরকম আচরণ অমার্জনীয়!

তা খাটুনিতেও দুঃখ ছিল না, যদি শুধু নিজেরা জা-ননদের দল থাকতে পায় সে দলে। হাতের সঙ্গে গল্পগাছাও চলে তা হলে। কিন্তু তা তো হবার জো নেই, একজন গিন্নী পাহারাদার থাকেনই।

বৌরা ‘ঘরভাঙানি’ মন্ত্রণা করছে কিনা সেটা তো দেখতে হবে তাঁদের। এই গুরু কর্তব্যের দায়ে বেচারী শিবজায়াকে যে মরতে মরতে রাত জেগে ছেলেবোয়ের ঘরের পেছনের ঘুলঘুলির নিচে কান পেতে বসে থাকতে হয়।

সারদার ঘরে অবশ্য ঘুলঘুলি নেই। ভাল জানালা আছে। বাড়ির মধ্যে সেরা ঘরটাই সারদার। বর্ধমান থেকে মিস্ত্রী আনিয়ে রামকালী যখন অনেক খরচা করে দক্ষিণের উঠোনে এই ঘরদালান বানিয়েছিলেন, তখন সকলেই ভেবেছিল এটা রামকালীর নিজের জন্যই। মিস্ত্রীর কাজ শেষ হয়ে গেলে দীনতারিণীও তাই বলেছিলেন, “একটা শুভ দিন দ্যাখ তা হলে রামকালী নতুন ঘরে ওঠবার।” রামকালী হেসে উঠে বলেছিলেন, “তোমার যে দেখছি গাছে না উঠতেই এক কাঁদি গো মা। ঘরে যে উঠবে, সে আসুক আগে?”

দীনতারিণী অবাক হয়ে বলেছিলেন, “কে আসবে? কার কথা বলছি?”

“ঘরের লক্ষ্মীর কথাই বলছি মা,” রামকালী বোধ করি মায়ের হৃদগত ধারণা অনুমান করেছিলেন, তাই একবার মায়ের ধারণা-বৃক্ষের মূলে কুঠায়াঘাত করে পরম শান্তভাবে কথা শেষ করেছিলেন, “কেন, তুমি কি শোন নি রাসুর বিয়ের কথা চলছে?”

রাসুর! রাসুর বৌ এসে ওই ঘরের দখলীদার হবে!

দীনতারিণীর সতীনপোর ছেলের বৌ! দীনতারিণী আর আত্মসংবরণ করতে পারেন নি, বিরক্তভাবে বলে উঠেছিলেন, “অজ্ঞানের মতো কথা বলা না রামকালী। ওই সেরা ঘরখানা তুমি রাসুকে দেবে!”

রামকালী আর হাসেন নি, গম্ভীরকণ্ঠে বলেছিলেন, “দেওয়া-দিইর কথা কিছু নেই মা, যার যা ন্যায্য প্রাপ্য সে তা পাবে।”

দীনতারিণী তথাপি ছেলের ক্রোধশঙ্কা তুচ্ছ করেও উচ্চ প্রকাশ না করে পারেন নি, বলে ফেলেছিলেন, “তুমি মাথার ঘাম পায়ে ফেলে উপায় করছ, “হীরে হেন জিরে’ এনে নবাবীপছন্দের ঘর গড়লে, সে দ্রব্যি কুঞ্জর বেটা-বোয়ের প্রাপ্য হল কোন সুবাদে রামকালী!”

না, রামকালী প্রত্যক্ষে তিরস্কার করেন নি মাকে, বরং আরও শাস্তকণ্ঠে বলেছিলেন, “যে সুবাদে মানুষ বনের জন্তু-জানোয়ারদের মতন উদ্যম হয়ে না বেরিয়ে কোমরে কাপড় দিচ্ছে মা। যাক্গে ও কথা থাক, ‘জ্যেষ্ঠের শ্রেষ্ঠ ভাগ’ এ বিধিটা তো তোমার অজানা নয় মা। রাসু এ বাড়ির জ্যেষ্ঠ ছেলে।”

দীনতারিণীর চোখে জল এসে গিয়েছিল দুঃখে আর অপমান-বোধে, তাই শেষ-বেশ তর্কে বলে বসেছিলেন, “মেজ বৌমার প্রাণটার দিকেও তো তাকাতে হয়। যতই হোক সে এখনও কাঁচা মেয়ে, এই ঘর আরম্ভ হয়ে ইস্তক তার একটা আশা ছিল তো।”

রামকালী এবার আর একটু হেসেছিলেন, “তোমার মেজ বৌমার যদি এমন ইল্লুতে আশা হয়েই থাকে তো সে আশায় ছাই পড়াই উচিত মা।”

“ছাই পড়াই উচিত?”

আঁচল দিয়ে চোখ মুছেছিলেন দীনতারিণী। মেজ বৌমার আশাতপের কল্পনায় যত না হোক, নিজের আশাভঙ্গে। কুঞ্জ যে জন্মভোর গায়ে হাওয়া দিয়ে বেড়িয়ে সংসারের সব কিছুর সেরা ভাগটা ভোগ করে, এটা কি চিরকাল সহ্য হয়? দীনতারিণীর আশা ছিল, এই ঘরখানার ব্যাপারে অন্তত কুঞ্জ আর কুঞ্জের বোয়ের মুখটা ছোট হবে। সেই আশায় ছাই পড়ল। তাই কেঁদে ফেলে বললেন, “ছাই পড়াই উচিত?”

“উচিত বৈকি। ভবিষ্যতে তা হলে আর কখনও এমন বেয়াদু আশা জন্মাতে পাবে না।”

এর পর দীনতারিণী নীরবে তাকিয়ে তাকিয়ে দেখেছিলেন চন্দননগর থেকে ছুতোর এসে ঢুকল সেই ঘরে। হ্যাঁ, জোড়াপালক বানাতে হলে ঘরের মধ্যে বসেই বানাতে হয়, বাইরে থেকে গড়ে এনে লাগিয়ে দেওয়া রীতি তখনও হয় নি।

বহুবিধ কারুকার্য করা পালক।

ওর জন্যে চন্দননগরের ছুতোরদের ভাঙু ধোঁয়াগাতে হয়েছিল মাস দেড়েক ধরে। খেয়ে, মজুরি নিয়ে আর নতুন কাপড়ের জোড়া বখশিশ আদায় করে ছুতোররা চলে গেল, তার পরই বিয়ে হল রাসুর। নতুন পালকে ফুলশয্যে হল।

সেই পালক ছেড়ে সারাদিন আঞ্জ মাটিতে পড়েছিল সারদা। এখনও খুঁড়াশাড়ীর নির্দেশমত নিঃসাড়ে ঘরে ঢুকে হুড়কোটা লাগিয়েই ছেলের তল্লাসমাত্র না করে ঝুপ করে গুয়ে পড়ল মাটিতেই।

ঘরে ঢুকে না তাকিয়েও টের পেয়েছিল সারদা, তার আশার আশঙ্কটা মিথো নয়। আত্মপ্রাণে, অনুমানে, হৃৎস্পন্দনে বুঝিয়ে দিয়েছিল সারদাকে—ঘরে তোমার সাতরাজার ধন মানিক।

এ যেন আবার নতুন বিয়ের নতুন বর। দ্বিরাগমনে এসে প্রথম রাত্তিরে যখন পাঁচটা সমবয়সী মিলে সারদাকে ঘরে ঢুকিয়ে দিয়ে বাইরে থেকে দরজায় শিকল লাগিয়ে পালিয়েছিল, তখন এমনি বুকটা ধড়াস করেছিল সারদার। তবু তো তখন মাত্র বারো বছর বয়সে + আর—এখন ষোলো। ষোড়শীর হৃদয় তো আলোড়নে আরোই উত্তাল হবে।

ঘরে যে অপরাধী আসামী অবস্থান করছিল তার অবস্থাও অবশ্য সারদার চাইতে কিছু উন্নত নয়। তার বুকের মধ্যে হাতুড়ি পিটছে। জীবনে আর কখনও সারদার মুখোমুখি দাঁড়াতে পারে, এ আশা বুঝি ছিল না রাসুর। সারাদিন শুধু ভেবেছে জীবনের সমস্ত আনন্দ-আহ্লাদের সমাধি হয়ে গেল তার।

মেজখুড়ী কেন অন্দরে ডেকে পাঠিয়েছিল, তাও ঠিক বুঝতে পারে নি। ভেবেছিল আবার কোন নিয়ম-লক্ষ্যনের পাকচক্র পড়তে হবে এসে, কিন্তু এসে যা স্নান অভিনব।

সারদা নাকি রান্নাঘরে কাজে ব্যস্ত, আর ভুবনেশ্বরীরও কাজের তাড়া, ভাঁড়ারের দিকে না গেলেই নয়, তাই ‘ঘুমন্ত’ থোকাকে একটু আগলাতে হবে রাসুকে।

কিছুই নয়, শুধু ঘরে একটু থাকা।

বোকা রাসু তখনও কিছু সন্দেহ করে নি। শুধু একটু তাজ্জব বনে গিয়েছিল প্রস্তাবে। দেশসুদ্ধ লোক থাকতে কিনা ছেলে আগলাবার জন্যে রাসুকে ডাকিয়ে আনা হল বার-বাড়ি থেকে! আশ্চর্য নয় তো কি! যে রাখুর মা ডাকতে গিয়েছিল, সে-ই তো পারত কাজটা। করোও তো বরাবর তাই। তবু কিছু বলতেও পারে নি। না প্রতিবাদ, না প্রশ্ন। নতুন বোয়ের ব্যাপারে যতটা লজ্জা, ঠিক ততটাই লজ্জা তো নতুন ছেলের বিষয়েও।

সুড়সুড় করে তাই ঘরে ঢুকেছিল রাসু। আর ঢোকান সঙ্গে সঙ্গেই বুকের মধ্যে সন্দেহের হাতুড়ি পড়েছিল।

মেজখুড়ীর এই ডাকিয়ে আনাটা ছল নয় তো! মেজখুড়ীকে তো এমনিতেই খুব ভালবাসে রাসু, এবার যেন ইচ্ছে হল পূজো করে তাঁকে। ফস্ করে শ্রীপটা নিভিয়ে দিয়ে কাঠ হয়ে ভাবতে লাগল।

সাতপাঁচ ভাবতে ভাবতে খেয়াল করল ঘরে খিল পড়েছে, আর পরমুহূর্ত থেকেই অনুভব করল, বাতাসহীন ঘরের চাপা গুমোটোটা যেন একটা কান্নার ধাক্কায় কেঁপে উঠছে।

টপ্ টপ্ করে দু'ফোঁটা জল পড়ল রাসুর চোখ থেকে। পুরুষ মানুষ! তা হোক, মানুষ তো বটে।

ধড়মড় করে উঠে বসল সারদা। একটা বলিষ্ঠ আবেষ্টন থেকে নিজেকে ছাড়িয়ে নেবার চেষ্টা করতে করতে রুদ্ধকণ্ঠে বলল, “আর কেন, আর কেন?”

আর কিছু বলতে পারল না। চোখ দুটো বিশ্বাসঘাতকতা করে বসেছে। সারাদিন ধরে প্রতিজ্ঞা করেছিল, যদি কখনও সেই নিষ্ঠুরটার সঙ্গে দেখা হয়, কাঁদবে না, মুখ মলিন করবে না। পরস্য-পরের মত উদাসীন থাকবে। কিন্তু পরিস্থিতিটা সমস্তই গোলমাল করে দিল।

তাই কি দু-চার ফোঁটা?

একেবারে ধারার শ্রাবণ!

একে কি করে রোধ করবে সারদা? কোন্ বাঁধ দিয়ে ঠেকাবে?

“বড়বৌ!”

এতটুকু শব্দের মধ্যে কত মিনতি কত আবেদন!

কিন্তু এই করুণ মিনতিভরা ডাকেই বা সাড়া দিচ্ছে কে?

“বড়বৌ, আমার কি দোষ? আমার ওপর বিরূপ হচ্ছে কেন? বুঝতে পারছ না আমার প্রাণটাও গুঁড়ো হয়ে যাচ্ছে!”

ধারা শ্রাবণে বন্যা এল।

“থাক থাক, আর মন-মজানে মিছে কথায় কাঙ্ক্ষা নেই। পুরুষের প্রাণে আবার দরদ!”

“বড়বৌ, এই আমার মাথা খাও, বিশ্বাস কর তোমার মতনই জ্বলেপুড়ে থাক হচ্ছি আমি। তুমি যে আমাকে বিশ্বাসঘাতক ভাবছ, এ কষ্ট আমি-স্বাধব কোথায়?”

“রাখবার দরকার কি?” সারদা কখনো সামলে কঠোর হবার চেষ্টা করে, “কাল তোমার নতুন ফুলশয্যো, নতুন সুখ, আজ আবার এত দুঃখ কষ্টের পালা গাইবার কি আছে?”

“বড়বৌ, বল কি করলে তুমি আমায় বিশ্বাস করবে?”

বলিষ্ঠ আবেষ্টনের চাপটা যেন পিষে ফেলতে চাইছে সারদাকে, কি করে আর কঠিন থাকবে সারদা? তবু শেষ চেষ্টা করে, “আমার বিশ্বাস অবিস্বাসে কি এসে যাচ্ছে তোমার? ছেলের মা বুড়ীকে ছেড়ে এখন কচি তালশাঁস—”

“বড়বৌ, তুমি এমন ব্যাভার করলে আমার আত্মঘাতী হওয়া ছাড়া আর উপায় থাকবে না তা বলে দিচ্ছি—” রাসুও কঠিন হতে জানে, তাই বাঁধন আলগা দিয়ে বলে, “এই চললাম মেজকাঁকার ওষুধের ঘরে। তাজা গোখরো সাপের বিষ সঞ্চয় আছে। কোথায় আছে তাও আমার জানা। এর পর কিন্তু বিধবা হলে দোষ দিও না আমায়!”

বিধবা!

বুকটা থর থর করে ওঠে সারদার। বরং একশটা সতীন নিয়ে ঘর করবে সারদা, বিধবা হওয়ার মত অভিশাপ আর কি আছে? কিন্তু ঠিক এই মুহূর্তে বলাই বা যায় কি?

“তা হলে চললাম। এই জনৈর শেষ দেখা।” বলে রাসু দরজার কাছে এগোয়, আশা এই যে এবার সারদা মাথা খাওয়ার অনুরোধ জানাবে, কিন্তু সারদা যেন অনড়।

“ভেবেছিলাম ওকে চিরদিনের মত ত্যাগ দিয়েই রাখব, তুমি আমার যে প্রাণেশ্বরী সেই প্রাণেশ্বরীই থাকবে—” স্বগত উচ্চারণে আক্ষেপ প্রকাশ করে দরজার হুড়কোয় হাত লাগায় রাসু, “কিন্তু তুমি পতিহত্নী হয়ে নিজের পায়ে কুড়ুল মারলে বড়বৌ!”

হুড়কোটা খুলে পাশে রাখল রাসু।

এবার সারদা কথা বলল, কিন্তু এ কী কথা! এই কি প্রেমে পাগলিনী অবলা বালার ভাষা?

রুদ্ধকণ্ঠে সারদা বলে উঠেছে, “ঘরের পরিবারের সঙ্গে যাত্রা-গানের মতন কান্নার সুরে কথা কইছ কেন? হুড়কো খুলে বেরিয়ে গেলেই বুঝি খুব পৌরুষ হবে? তোমার গোখরো বিষ আছে, আর আমার দড়ি-কলসী নেই?”

“তোমার প্রাণটা পাথরে গড়া বড়বৌ! মেজকাকা যখন আমার গলায় গামছা মোড়া দিয়ে টানতে টানতে নিয়ে গেল, তখন তাঁর সামনে গিয়ে বলতে পারলে না, “আমারও দড়ি-কলসী আছে!” ঠিক আছে, সবাইকে এবার দেখিয়ে দিচ্ছি—ভালমানুষ রাসু কি করতে পারে!”

এই প্রকাণ্ড বীররসের ভূমিকাটি অভিনয় করে কপাটটা ধরে হ্যাঁচকা টান মারল রাসু, কিন্তু টানার সঙ্গে সঙ্গেই পরিস্থিতিটা বুঝতে দেরি হল না, দরজার বাইরে শেকল এ কাজ কে করল ?

মেজখুড়ী ?

কিন্তু তাঁর পক্ষে কি এ ধরনের চপল রসিকতা সম্ভব ? অথচ তা ছাড়া আর কে ? রাসু যে বাড়ির মধ্যে এসেছে, তাই তো কেউ দেখে নি। মেজখুড়ী তো আজকের নাট্যকার।

“বাইরে থেকে বন্ধ!”

একটা বিপন্ন স্বর আস্তে ঘরে ছড়িয়ে পড়ল :

“বন্ধ!”

সারদারও এতক্ষণকার নীরবতা ভঙ্গ হল বিশ্বয়ে ভয়ে।

“তাই তো দেখছি—” রাসুর কণ্ঠে ব্যাকুলতা, “এখন উপায় ? যদি সকাল পর্যন্ত বন্ধ থাকে ? বড়বৌ, কি হবে ?”

সহসা অদ্ভুত একটা কাণ্ড ঘটে।

একেবারে অভাবিত অপ্রত্যাশিত। হয়তো বা সারদা নিজেও এক মুহূর্ত আগে এটা কল্পনা করতে পারত না। ভাবতে পারত না তার কান্নায় বুজে আসা কণ্ঠ সহসা অমন কৌতুকের লীলায় হেসে উঠবে। সে হাসির শব্দ চাপা বটে তবু রহস্যে উচ্ছ্বসিত।

তা এই ধরনেরই স্বভাব বটে সারদার, নিতান্ত দুঃখের সময়ও হাসির কথা হলে হেসে ফেলা। কিন্তু আজকের কথা যে আলাদা। আজ সারদার মরণ-বাঁচনের সমস্যা। আজ কান্নায় গলা বুজে রয়েছিল সারদার। তবু রাসুর এই বিপন্ন বিপর্যস্ত কণ্ঠ থেকে তাকে কী যে কৌতুকের যোগান দিল, উচ্ছ্বসিত রহস্যে হেসে উঠল সে। হেসে উঠে বলল, “কী আর হবে! দায়ে পড়ে মশাইকে এখন পরনারীর সঙ্গে রাত কাটাতে হবে!”

রাসু চমকে গেছে, থমকে পড়েছে। তবে কি এতক্ষণ ছলনা করছিল সারদা ? সতীন হওয়ায় তেমন কিছু লাগে নি তার ? এ হাসি এ কথা তাঁর রীতিমত প্রশ্নের।

অতএব দরজা নিয়ে মাথা পরে ঘামাফিঙে চলবে, এখন এদিকের ঘাঁটি সামলে নেওয়া যাক।

খোলা হুড়কো আবার দরজায় উঠল।

অনাদৃত পালঙ্কের বিছানা আবার স্পর্শের উষ্ণতা পেল।

না, একেবারে সহজে ধরা দেবে না সারদা। সে সত্যবদ্ধ করিয়ে নেবে স্বামীকে।

“থাক, আমাকে স্পর্শ করতে হবে না, আগে মা সিংহবাহিনীর নামে দিব্যি কর, আমি বেঁচে থাকতে ছুটকিকে ছেঁবে না ?”

রাসুর বুকটা কেঁপে ওঠে।

শপথটা যে মারাত্মক। ভয়ে ভয়ে বলে, “সিংহবাহিনীর নামে দিব্যি করা কি ভাল বড়বৌ ?”

“মনে পাপ থাকলে ভাল নয়। একমন একপ্রাণ থাকলে ভয়ের কি আছে ?”

“তবু, ঠাকুর-দেবতা বলে কথা!”

“বেশ তো, আমি তোমায় সাধি নি। নাই বা আর স্পর্শ করলে আমায়!”

হায় মা সিংহবাহিনী, এমন ঘোরতর বিপদে তোমার গ্রামের আর কেউ কখনও পড়েছে ?

একদিকে একখানি অপরাধ-বোধের ভারে পীড়িত আর নতুন আশায় উদ্বেল ব্যাকুল হৃদয়, আর অপরদিকে এক অনমনীয়া পাষাণী।

তবে কি হাসিটাই ছিল ?

তাই সম্ভব, নইলে দিব্যি গুছিয়ে ছেলের কাছ ঘেঁষে শোবার আয়োজন করছে কেন সারদা ?

“বড়বৌ!”

“আঃ, কেন জ্বালাতন করছ ?” সারদার বৃকে পরম ভরসা দরজার বাইরে শেকল লাগানো, রাগ করে ছিটকে বেরিয়ে যাবার উপায় নেই রাসুর।

আঃ, কে সেই দেবী, যে রাসুকে এমন বন্দী করে ধরে দিয়েছে সারদার কাছে ? স্বয়ং মা সিংহবাহিনী নয় তো ?

“তা হলে তোমার দয়া হবে না ?”

“সোয়ামী, গুরুজন, তুমি আবার দয়ার কথা তুলছ কেন গো ? পরিবারই হল গিয়ে কেনা দাসী ।”

“আচ্ছা বেশ, করছি দিব্যি । হল তো ?”

“কই করলে ?”

“মনে মনে করেছি ।”

“মনে মনে ? হু! মনের কথা বনে যায় । মুখে বল ।”

“বেশ বেশ, এই বলছি, তুমি ছাড়া আর কাউকে ছেঁব না, সিংহবাহিনী সাক্ষী ।”

“আমি ছাড়া নয়, আমি বেঁচে থাকতে—”

এটুকু অনুগ্রহ করে সারদা ।

“ওই হল । কে আগে যায় কে পরে যায়, বলা যায় কি ?”

“আমার কুষ্ঠিতে আছে সধবা মরব ।” সারদা আত্মপ্রসাদের হাসি হাসে, “কিন্তু মনে থাকে যেন মা সিংহবাহিনী সাক্ষী!”

“থাকবে থাকবে ।”

কিন্তু সত্যিই কি মনে ছিল ?

রাসু কি শেষ অবধি মা সিংহবাহিনীর মর্যাদা রাখতে পেরেছিল ?

পুরুষমানুষ কি তাই পারে ?

রাসুর মত মেরুদণ্ডহীন পুরুষ ?

তবু এমনি মিথ্যে শপথের চোরাবালির উপরই তো ঘর বাঁধতে হয় মেয়েমানুষকে ।

॥ তেরো ॥



যজ্ঞের জন্যে ছানাবড়া ভাজা হচ্ছে । ভিয়েনের ‘চালা’য় বড় বড় কাঠের উনুন জ্বলে কারিগররা লেগে গেছে ভোর থেকে । প্রথমে বোদে ভেজে স্তূপাকার করে রেখেছে কাঠের বারকোশে, এখন থেকে শুরু হয়েছে ছানাবড়া । প্রচুর পরিমাণে না করলেও চলবে না, নিমন্ত্রিতদের পেট উপচে খাওয়ানোর পর আবার সারভর্তি ছাঁদা দিতে হবে তো । তা ছাড়া যখন কুলে ওই দু-রকম মিষ্টি!

তাড়াছড়ায় যজ্ঞ, গুর বেশী আর সম্ভব হল না, অথবা সেটাও হয়তো ঠিক কথা নয়, মোটামুটি কথা মাত্র । রামকালী চাটুয্যে যদি দরকার বুঝতেন, তা হলে একদিনের মধ্যেই কাটোয়া কি গুণ্ডিপাড়া থেকে গুস্তাদ ময়রা আনিয় পাঁচ-সাত রকম মিষ্টি বানিয়ে তোলাও অসম্ভব হত না তাঁর পক্ষে । কিন্তু

দরকার বোধ করেন নি তিনি ।

রাসুর প্রথম বিয়েতে ঘটা হয়েছিল বিস্তর, গ্রামে এখনও তার গল্প ফুরায় নি । মিষ্টির কারিগর এসেছিল নাটোর থেকে, কেটনগর থেকে, মুড়োগাছা থেকে । কাঁচাগোল্লা ক্ষীরমোহন মতিচূর সরভাজা ছানার ছিলিপি খাজা অমৃতি নিখুঁতি ইত্যাদি করে বারো-তেরো রকম মিষ্টি হয়েছিল । আর মাছের কথা তো বলেই শেষ হবে না । এক-একজনের পাতে বড় বড় এক-একটা মালসা ভর্তি মাছের তরকারি বসিয়ে দিয়ে আবার তিন-চারবার করে পরিবেশন । তা ভিন্ন রান্নার পদ তো বাহান্ন রকম, বাহান্ন ব্যঞ্জন নইলে আবার ঘটা কিসের ?

কুমোরবাড়ি বরাত দিয়ে সাইজের হাঁড়ি গড়িয়ে আনা হয়েছিল ঝোড়া ঝোড়া, তাতেই গলা উপচে মিষ্টির ছাঁদা । যজ্ঞের জের চলেছিল দিন পনেরো ধরে ।

সে কথা আলাদা । সে বিয়ের সঙ্গে এ বিয়ের তুলনা করার কোনও মানেই হয় না । অন্য বাড়ি হলে যজ্ঞই করত না, নেহাৎ রামকালী চাটুয্যের বাড়ি বলেই এত আয়োজন । পরিমাণে প্রচুরই হচ্ছে, তবে ওই মাত্র দু-রকম মিষ্টি, ষোলো-কুড়ির মত রান্নার পদ । রান্না এখন চাপে নি, পাশের চালায় তার তোড়জোড় চলছে, হালুইকর ঠাকুর স্নান করতে গেছে ।

এ গ্রামে হালুইকর ঠাকুর এনে রাখানোর প্রথা প্রবর্তন করেছেন রামকালীই ; মুর্শিদাবাদ অঞ্চলে দেখেছিলেন এ ব্যবস্থা । নইলে এ গ্রামে চিরদিন কাজেকর্মে গ্রামের ব্রাহ্মণ কন্যারাই বেঁধে থাকেন । সেটা রীতিমত একটা সম্মান-সম্ভ্রমের ব্যাপার । ডাকসাইটে রাখুণী বলে খ্যাতি আছে যাদের তাঁদেরই ডাকা হয় অনেক তোয়াজ করে । রান্নায় বসবার আগে ‘পূর্ণপাত্র’, নতুন কাপড়ের জোড়া, সধবা ব্রাহ্মণী হলে আলতা সিঁদুর—এই সব দিয়ে তবে পাকশালে ঢোকাতে হয় তাঁদের ।

তথাপি এই রান্নার পর্ব থেকেই অনেক গদাপর্ব মুঘলপর্ব বেধে যায়। গ্রামের যে একদল ছুতো খুঁজে বেড়ানো লোক আছে, তারাই 'যজ্ঞ' দেখলে দক্ষযজ্ঞের আয়োজন করবার তালে ঘোরে। মন-কম্বাক্ষি, কথাস্তর, মান-অভিমান, এসব প্রায় যজ্ঞেরই অঙ্গ। রামকালী ওসব ঝামেলার মধ্যে নেই। পয়সা দিয়ে লোক আনাবেন, কাজ করাবেন, চুকে গেল। রাধুনী বামুনের হাতে খেতে যাদের আপত্তি, তারা যাও বিধবার হেসেলে ভর্তি হও গে। মাছ জুটবে না।

তা সে দু-চারজন নিতান্ত নিষ্ঠাপরায়ণ গ্রামবৃদ্ধ ছাড়া 'না হুঁ করে' সকলেই বসে পড়ে রামকালীর বাড়ির ভোজে। গুস্তাদ কারিগরের রান্নার হাত, রামকালীর দরাজ হাত, আর রামকালীর প্রতি সমীহ-বোধ এই ত্রিশক্তির আকর্ষণে সকলেই প্রায় নরম হয়ে আসে। পয়সা যে এ অঞ্চলে কারুরই নেই তা তো নয়, কিন্তু এমন দরাজ হাত? এত বড় দিলদরিয়া মন?

খাঁটি গাওয়া ঘিয়ে সদ্য কাটানো টাটকা ছানার মিষ্টান্ন ভেজে তোলার সুগন্ধে শুধু আশপাশেরই নয়, সারা গ্রামখানারই বাতাস যেন 'ম ম' করছে। বাড়ি বাড়ি ছোট ছেলেপুলেদের ঘরে আটকে রাখা দুঃসাহ্য হচ্ছে তাদের অভিভাবকদের।

পায়ে রূপোর বোল দেওয়া খড়ম, গায়ে বেনিয়ান, পরনে নেত্রকোণার থান। সবদিকে চৌকস হয়ে তদারকি করে বেড়াচ্ছেন রামকালী। শুধু মিষ্টির ভিয়েনে শেকড় গেড়ে বসে থাকবার ভারটা দিয়েছেন বড়দা কুঞ্জকে। ওর থেকে বেশী দায়িত্বর কাজ কুঞ্জকে দেওয়া চলে না।

গয়লারা দইয়ের 'ভার' এনে নামিয়েছে, ক'মণ দইয়ের যোগান দিতে পেরেছে তারা, দাঁড়িয়ে তারই হিসেব নিচ্ছিলেন রামকালী, হঠাৎ নেড়ু এসে কাছে দাঁড়াল। রামকালী গ্রাহ্য করতেন না, কিন্তু নেড়ু একেবারে গায়ের কাছে দাঁড়িয়েছে, ভাবটা যেন কিছু বক্তব্য আছে। গয়লাদের উপর চোখ রেখেই রামকালীর মাথাটায় একবার হাত বুলিয়ে দিয়ে বললেন, "কি রে নেড়ু?"

নেড়ু সভয়ে এদিক ওদিক তাকিয়ে আস্তে বলল, "একবারে অন্দর-বাড়িতে যেতে বলছে।"

"অন্দরবাড়িতে যেতে বলছে? কাকে বলছে?"

"তোমাকে।"

রামকালী ভুরু কঁচকে বলেন, "আমাকে এখন যেতে বলছে? পাগলটা কে হল?" অগ্রাহ্যভরে আবার অদূরবর্তী গোয়ালাদের দিকেই মন দেন, "বলিস কি রে তুই, ওই পাঁচ মণ বৈ দই দিয়ে উঠতে পারছিস না! তা হলে আমার উপায়? তুই ভরসা দিলি—"

তুই মাথা চুলকে বলে, "আজ্ঞে ভরসা তো দেছলাম, কিন্তু মা ভগবতীরা যে আমাকে নিভর্সাঁ করে ছাড়লেন। কাল রেতে তো আর নিদ্রাই দিই নি, চৌদিকে সকল গোহালার ঘরে ঘরে বরাত দিয়ে দিয়ে বেড়ায়েছি, তা সবাইয়ের ঘরের দই যোগসাজস করে এই হল।"

"এই হল তা তো বুঝলাম, কিন্তু আমার কি হবে তাই বল? দাঁড়িয়ে অপমান হতে বলিস আমার?"

"অপমান!" তুই বীরবিক্রমে বলে ওঠে, "বলি একটা ঘাড়ে বিশটা মাথা কার আছে কবরেজ ঠাকুর যে আপনাকে অপমানি করবে?"

"মাথা এ গায়ের এক একজনের একশটা করে, বুঝি রে তুই!" বলে হাসলেন রামকালী, আর ঠিক সেই সময় নেড়ু আর একবার মিহিগলায় ডাক দিল, "মেজখুড়ো!"

"আরে, এ ছোকরা তো ভাল বিপদ করল! কে তোকে পাঠিয়েছে শুনি?"

"পিস্ঠাকুমা।"

রামকালী বিরক্তভাবে বললেন, "তা আমি বুঝেছি, নইলে আর কার এত—" বোধ করি 'কার এত আক্কেল হবে' বলতে যাচ্ছিলেন, সামলে নিলেন। ছোটদের সামনে গুরুজন সম্পর্কে তাচ্ছিল্যসূচক মন্তব্য করবার মত অসতর্কতা এসেছিল বলে রীতিমত বিরক্ত হলেন নিজের উপর। অথচ মোক্ষদার মত কাণ্ডজ্ঞানহীন গুরুজন সম্পর্কে সকলপ্রকার সমীহনীতি মেনে চলাও শক্ত।

অসতর্কতা সামলে নিয়ে বললেন, "বল গে যাও আমার এখন বিস্তর কাজ, তাঁর যা বলবার যখন ভেতরে যাব তখন যেন বলেন।"

"তুমি এ কথা বলবে পিস্ঠাকুমা জানে, তাই আমাকে বলে দিল—" নেড়ু টোক গিলে বলে, "বলে দিল বল গে যা বড় পিস্ঠাকুমা ভেদবমি হয়েছে, বাঁচে কি না, এফুনি দরকার।"

ভুরুটা আরো কঁচকে উঠল রামকালীর। পিসীর ভেদবমির দুর্ভাবনায় নয়, মেয়েমানুষের বিবেচনামূলক আবদারের ধৃষ্টতা দেখে। রোগ যে কাশীশ্বরীর হয় নি সেটা নিশ্চিত, তবু অর্থক

হয়রানি করতে ডাকাডাকি। হয়তো বা অভ্যাগত কুটুম্বীদের নিয়ে কোনরূপ সমস্যার উদ্ভব হয়েছে, আর সালিশ মানতে ডাকা হয়েছে রামকালীকে। কিন্তু এই কি তার সময় ?

সাতপাড়া লোক নেমস্তন্ন হয়েছে, একদিনের যোগাড়ে যজ্ঞ, মাথায় পর্বত বয়ে ঘুরছেন রামকালী, তখন কিনা এই সব মেয়েলিপনা!

তা ছাড়া আরও বিরক্তিকর, ছোট ছেলোটাকে মিথ্যে কথায় তালিম দিয়ে পাঠানো। কিন্তু যে রাগিণী মোক্ষদা, নেড়ুকে ফেরত দিলে নির্ঘাত নিজেই এখুনি রণরঙ্গিনী মূর্তিতে বার-উঠানেই হানা দেবেন এবং পাঁচজনের কান বাঁচবার চেষ্টামাত্র না করে বকাবকি শুরু করবেন, “পয়সার দেমাকে ধরাকে সরা দেখিস নে রামকালী, গুরুজন বলে একটু সমেহা করিস।”—হ্যাঁ, এরকম কথা স্বচ্ছন্দে বলতে পারেন মোক্ষদা, দ্বিধামাত্র করেন না।

সংসারের এই একটা মানুষকে কিছুতেই এঁটে উঠতে পারলেন না রামকালী। পারতেন, অনায়াসেই পারতেন, যদি সত্যিই রামকালীর গুরুজনে সমীহবোধ না থাকত। গুরুজন হয়েই মোক্ষদা রামকালীকে জপে ফেলেছেন।

কিন্তু শুধুই কি গুরুজন বলে জপ ?

আরও একজনের কাছেও কি মাঝে মাঝে জপ হয়ে পড়েন না রামকালী ? যে মানুষটা নিতান্তই লঘুজন! হ্যাঁ, মনে মনে স্বীকার না করে পারেন না রামকালী, মাঝে মাঝে সত্যবতীর কাছে জপ হতে হয় তাঁকে, হার মানতে হয়। কিন্তু তাতে কি বিরক্তি আসে ?

“মেজখুড়ো!” ছেলটাও কম নয়। তাই রামকালীর কোঁচকানো ভুরু দেখেও ভয়ে পালিয়ে গেল না, বলল, “পিস্টাকুমা তোমায় চুপি চুপি ডেকে নিয়ে যেতে বলল, খুব বিপদ!”

আঃ, এ তো আচ্ছা মুশকিলে ফেলল!

“বিপদটা তো দেখছি আমারই!” বলে রামকালী হাঁক দিলেন, “তুই, দই সব ভেতর-দালানে তুলে দাও, আর খোঁজ করে দেখ আর কারও ঘরে আরও দু-দশ সের পাওয়া যাবে কিনা।”

“পাওয়া গেলে তো ঠাকুর মশাই, “আমি নিজেই—” তুই মাথা চুলকে ধুঁত্যা করে বসে, “তা তোমার আঙ্গে পাঁচ মণই কি কম ? এ তো বড় খোকার শ্রেষ্ঠম বিয়ে নয়—”

রামকালী ভুরুটা একবার কুঁচকেই মৃদু হাসলেন বললেন, “কথাটা গয়লার ছেলের মতই বলেছিস তুই, পেরথম বিয়ে নয় বলে কুটুম্বজনকে খাওয়াতে বসে অপরিতুষ্ট রাখব ? আচ্ছা তুই ওগুলো তুলে দে গে, আসছি আমি।”

নেড়ুর সঙ্গে সঙ্গে ভিতরবাড়িতে ঢুকলেন রামকালী, মাঝখানে প্রকাণ্ড উঠোনটা পার হয়ে। এই মাঝের উঠোনই ধানের গোলা মরায়, সারা বছরের জ্বালানী কাঠের মাচা, চালার নিচে জালা জালা বীজধান।

নেড়ু দিগ্বিজয়ীর মত কাশীশ্বরীর ঘরের দরজায় এসে দাঁড়াল, কারণ রামকালীকে ডেকে আনার ভার আর কেউ নিতে চায় নি। সত্য পর্যন্ত ঝাড়া জবাব দিয়েছিল, “এই দেখলাম বড় পিস্টাকুমা চানু করে এল, একুনি আবার কী ব্যামোয় ধরল যে বাবাকে শত কন্মের মধ্যে থেকে ডেকে আনতে যাব ? মানুষটার কি এখন মাথার ঠিক আছে ? ঘরে তো জোয়ানের বড়ি আছে, তাই খেয়ে নাও না।”

“তুই বেরো দজ্জাল হারামজাদী—” বলে মোক্ষদা নেড়ুকে ধরেছিলেন।

কিন্তু নেড়ুদের তো আর গিন্নীদের ঘরে ওঠবার হুকুম নেই, তাই “এই যে ঠাকুমা—” বলে দাঁড়িয়ে পড়ল। নিচু দরজা, রামকালী খড়ম খুলে মাথা নিচু করে ঢুকলেন। আর সমস্ত ভুলে মোক্ষদা “তুই পালা লক্ষ্মীছাড়া ছেলে” বলে নেড়ুকে তাড়া দিয়ে বিদেয় করলেন।

রামকালী দেখলেন কাশীশ্বরী মাটিতে শুয়ে আছেন ধানের আঁচলটুকু মুখে চাপা দিয়ে। এটা আবার কি ! নিশ্চয় কোন মান-অভিমানের ব্যাপার। বিরক্তি এল, তবু শান্তভাবেই বললেন, “কি ব্যাপার!”

“ব্যাপার বেশ উত্তম—” চাপা গলায় এটুকু জ্ঞান দান করে মোক্ষদা আরও ফিস ফিস করে বললেন, “দুয়োরটা ভেজিয়ে দিয়ে তবে শুনতে হবে।”

রামকালী একবার বাইরে তাকালেন। শুচিবাই মোক্ষদাদের এই দিকটা বাদে সারা বাড়ি লোকে লোকারণ্য, এর মধ্যে কপাট ভেজিয়ে শুগুমন্ত্রণা! তিনি তো পাগল হন নি! গম্ভীর গলায় বললেন, “কপাট থাক, কি বলবার আছে বোলা।”

কিন্তু বলবার কিছু আর আছে নাকি ?

আছে বলবার মত মুখ ?

অথচ এত বড় ভয়ানক কথা রামকালীকে না জানিয়ে করবেন কি মুখ্য দুটো মেয়েমানুষ ? হিতাহিত জ্ঞান কি আর কিছু আছে তাঁদের ? মোক্ষদার আর কাশীশ্বরী! শঙ্করী যে কাশীশ্বরীরই নাত-বৌ!

ভয়ঙ্কর খবরটা এখনও পাঁচকান হয় নি, এখনও সংসারে সবাই আপন আপন কাজে হাবুডুবু খাচ্ছে, কিন্তু কতক্ষণ আর অন্যমনস্ক থাকবে লোক ? কতক্ষণ আর তাদের কান বাঁচিয়ে রাখা যাবে ? তার পর ? এক কান থেকে পাঁচ কান, তার পরই তো লহমায় পাঁচশ কান। খড়ো চালার পাড়ায় আগুন লাগাও যা, আর একটা বিধবার কলঙ্ক-কেলেঙ্কারী প্রকাশ হয়ে যাওয়াও তা। এ চাল থেকে ও চাল তো এ মুখ থেকে ও মুখ। হাড়হাবাতে লক্ষ্মীছাড়া মেয়েমানুষটা “নিভুবি” হবার আর দিন পেল না!

যদি জলে ডুবে নিভুবি হয়ে থাকে তো সেও বরং ভাল কথা, কিন্তু যদি ভরাডুবি করে বসে থাকে?

কাশীশ্বরীর ধারণা তাই। তাই তিনি মুখে আঁচল চাপা দিয়ে পড়ে আছেন। আর মর্মে মর্মে অনুভব করছেন, কেন সেই সর্বনাশীর খুড়োখুড়ী ও মেয়েকে ঘরে রাখে নি, উপযাচক হয়ে কাশীশ্বরীর গলায় গছিয়ে গেছে। হায় হায়, কালই তো টের পেয়েছিলেন কাশীশ্বরী, নাপিত-বোয়ের কথার আঁচে, তবে কেন আবাগীর বেটিকে দুয়ারে তাল লাগিয়ে আটকে রাখেন নি! পাঁচটা কুটুমের কাছে সাফাই গাইতে বললেই হত, হঠাৎ মাথাটার কেমন দোষ হয়ে গেছে শঙ্করীর, তাই কাজের বাড়িতে ছেড়ে রাখতে সাহস করেন নি!

মোক্ষদা কিন্তু জলে ডোবার কথাই তোলেন। “কোন রাত্তিরে কখন উঠে এ কাজ করেছে কিছু টের পাই নি রামকালী, সকালবেলাও বলি চানে গেছে না কোথায় গেছে। বেলা হতে মাথায় বজ্রাঘাত। আমার স্থির বিশ্বাস, বড় পুকুরে গিয়ে ডুবেছে কপালখাকী। এইবেলা জাল ফেললে—”

“না!” রামকালী জলদগম্বীর স্বরে বলেন, “জাল ফেলবে হবে না।”

“জাল ফেলা হবে না!”

যজ্ঞচালিতের মত উচ্চারণ করেন মোক্ষদা।

“না। এতগুলো লোকের খাওয়া পণ্ড হতে দেব না আমি।”

মোক্ষদা প্রকৃতি-বিরুদ্ধ নম্রভাবে বলে, “কিন্তু একটা জীবের জীবনের চাইতে যজ্ঞটাই বড় হল তোমার বিচারে?”

“শুধু আমার বিচারে নয়, যে কোন বুদ্ধিমান লোকের বিচারেই।” রামকালী ঘরের মধ্যে পায়চারি করতে করতে বলেন, “বলছ সকাল থেকে দেখতে পাও নি, ধরে নিতে হবে কাজটা হয়ে থাকে তো রাতেই হয়েছে। এখন জাল ফেললে জীবটা জীবন্ত উঠবে তোমাদের বিশ্বাস ?”

মোক্ষদা চুপ করে থাকেন উপযুক্ত উত্তরের অভাবে। আর কাশীশ্বরী চাপা গলায় হ-হ করে কেঁদে ওঠেন।

“থাম! লোকজন খাওয়ার আগে যেন টুঁ শব্দটি না হয়। যদি ডুবে থাকে তো যতক্ষণ না ভেসে ওঠে, ততক্ষণ তাকে জলের তলায় থাকতে দাও। ডুবলে ভেসে উঠতেই হবে, নদী নয় যে ভেসে চলে যাবে। কিন্তু—” পায়চারি থামিয়ে রামকালী কাশীশ্বরীর খুব কাছে সরে আসেন, ঈষৎ নিচু হয়ে চাপা গম্বীর সুরে বলেন, “আর যদি ডুবে না থাকে, বৃথা জাল ফেলার পর সমাজে অবস্থাটা কি দাঁড়াবে অনুমান করতে পারছ ? ঘরের বৌ-ঝিকে আগলে আটকে রাখার ক্ষমতা যখন নেই, তখন নিজেদের জিভকেই আগলে আটকে রাখো!”

কাশীশ্বরী সহসা কেঁদে ওঠেন, “ও রামকালী, তুমি আমায় একটু বিষ দাও বাবা, আমি এই মুখ আর কাউকে দেখাতে পারব না।”

“ছেলেমানুষি করো না।” মদুস্বরে ধমকে ওঠেন রামকালী, “বিপদে মতি স্থির রাখ। আমাকে বিবেচনা করবার সময় দাও। কিন্তু এই ভেবে আশ্চর্য হয়ে যাচ্ছি আমি, বলছ তোমাদের কাছে শুভেন, অথচ দু-দুটো মানুষ কিছু টের পেলো না তোমরা ?”

“মরণের ঘুম এসেছিল বাবা আমাদের—” কাশীশ্বরী আর একবার কেঁদে ওঠেন।

“পিসীমা, হাতজোড় করছি তোমায়, হৈ-চৈ করো না। সবাইকে না হয় বলো খুড়োর অসুখের খবর পেয়ে হঠাৎ বাপের বাড়ি পাঠিয়ে দেওয়া হয়েছে তাকে।”

“মানুষ তো আর ঘাসের বিচি খায় না রামকালী,” মোক্ষদা নিজস্ব ভঙ্গীতে ফিরে আসেন, “কাল রাতদুপুর অবধি সবাইয়ের সঙ্গে কুটনো কুটেছে লক্ষ্মীছাড়া—”

“আশ্চর্য!” আবার পায়চারি করতে করতে বলে ওঠেন রামকালী, “এ রকমটা হল কেন কিছু অনুমান করতে পারছ তোমরা ?”

কাশীশ্বরী মুখের ঢাকাটা আরও শক্ত করে চাপা দিয়ে বলে ওঠেন, “আমি পারছি রামকালী। মতিগতি তার ভাল ছিল না। ধিস্পী বয়েস অবধি খুড়োর ঘরে থেকেছে, মা-বাপ ছিল না যে সুশিক্ষে দেবে, উচ্চশ্রেণী যাওয়ার বুদ্ধির বৃদ্ধি করেছে বসে বসে! আমি বুঝছি জলে ডুবে মরে নি ও, আমাদের মুখে চুনকালিই দিয়েছে।”

ঘরটা নিচু-নিচু অন্ধকার মত। জানলা আছে কি নেই, তবু রামকালীর টুকটকে ফরসা মুখটা আরও কত টুকটকে হয়ে উঠেছে, টের পেলেন মোক্ষদা। চেয়ে চেয়ে মনে হল যেন ওই টুকটকে মুখটা থেকে উত্তাপ বেরোচ্ছে। বেপরোয়া মোক্ষদাও ভয় খেলেন। কি বলতে গিয়ে থেমে গেলেন।

আর ঠিক এই সময় দরজার গোড়ায় কাঁসর বেজে উঠল।

মাজাঘষা চাচাছোলা কাঁসর। “ওগো অ ঠাকমারা, কাটোয়ার বৌ গেল কোথায় ? পান সাজবার জন্যে যে হাঁক-পাড়াপাড়ি হচ্ছে তাকে। তোমরাই বা দুই বুনে এই বেলা দুপুর অবধি শোবার ঘরে গুলতুমি করছ কেন ? চান করে আবার শোবার ঘরে এসে সৈঁধিয়েছ যে বড় ? আর একবার চানের বাসনা আছে বুঝি ? তা তোমাদের বাসনা মেটাও, বৌকে পাঠিয়ে দাও।”

ঘরে ঢোকবার অধিকার নেই তাই বাইরে দাঁড়িয়েই বাক্যস্রোত বইয়ে দেয় সত্য। ধারণাও করতে পারে না ঘরের ভিতরে তার বাপের উপস্থিতি সম্ভব।

উঁচু ‘পোতা’র ঘর, দরজার বাইরে থেকে ছোটদের পক্ষে ভিতরটা স্পষ্ট দেখাও সম্ভব নয়।

মোক্ষদা বিনা বাক্যব্যয়ে কপাটের সামনে এসে দাঁড়ান, অতএব ঘরেই আছেন তিনি। সত্য বিরক্ত কণ্ঠে বলে, “কি গো, মুখে বাক্যা-ওক্যা নেই কেন ? কাটোয়ার বৌ গেল কোথায় সেটা বলবে তো ? ঘাট থেকে আরম্ভ করে সাত চৌহদ্দি ছিটি খুঁজে এলাম—”

সহসা মোক্ষদা সরে দাঁড়ালেন, এবং সেই শূন্য স্থানে রামকালীর মূর্তিটা দেখা গেল।

বাবা!

সত্য বজ্রাহত!

এখানে বাবা! আর সত্য মুখের তোড় খুলে দিচ্ছে! ছি ছি! কিন্তু বাবা এখানে কেন ? তা হলে নির্ঘাত কাটোয়ার বৌয়ের হঠাৎ কোনও অসুখ কয়েকটি, পিসঠাকুমারা তাই নিয়ে হিমসিম খাচ্ছে। ছি, ছি, এদিকে এই কাণ্ড, আর সত্য কিনা পান সাজবার তাগাদা দিতে এসেছে! বাবা কি বলবেন! বাড়ির কোনও খবর রাখে না সত্য এইটাই প্রমাণ হলে!

মনে মনে জিত কেটে চুপ হয়ে দাঁড়িয়ে থাকে বেচারী। আজ আর মানসিক চাঞ্চল্য নিবারণ করতে অভ্যাসগত শাড়ির আঁচলটা নিয়ে চিবোবার উপায় নেই, পরণে উৎসব উপলক্ষে নিজের বিবাহকাল লব্ধ একখানা ভারী বালুচরী ঢেলি।

রামকালী ঘাড় ফিরিয়ে মোক্ষদা ভগ্নীঘরকে উদ্দেশ্য করে মৃদুস্বরে বললেন, “স্বাভাবিক ভাবে যার যা কাজ করো গে যাও, বৃথা ঘরের মধ্যে বসে থাকবার দরকার নেই।” তারপর ঘর থেকে বেরিয়ে এলেন। এক মেয়েকে একটা সহজ পরিহাসের কথা বলে উঠলেন, “ইস! মেলাই সেজেছিস যে!”

কথাটা মিথ্যা নয়, শুধু বালুচরী কেন, মেয়েকে আজ একগা গয়না পরিয়ে সাজিয়েছে ভুবনেশ্বরী। কমগুলি গয়না তো হয় নি সত্যর বিয়ের সময়, পরে কবে ? বাপের কথায় লজ্জিত হাসি হেসে মাথা নিচু করল। এবার রামকালী পুরনো প্রসঙ্গে ফিরে গেলেন, “ভাগ্নে-বৌমাকে কে ডাকছে ?”

ভাগ্নে-বৌমা অর্থে আপাতত শঙ্করীকেই বোঝাল। সত্য বাবার কথায় নয়, বাবার কণ্ঠস্বরে থতমত খেল, অসহায়-অসহায় চোখে বলল, “ওই তো ওরা, যারা এক বরজ পান নিয়ে সাজতে বসেছে।”

“তাদের বলে দাও গে উনি আজ আর পান সাজতে পারবেন না।” হঠাৎ যেন রামকালীও অসহায়তা বোধ করলেন, তাই তাড়াতাড়ি বললেন, “আচ্ছা থাক, তোমার এখন আর ওদিকে যাবার দরকার নেই, যাঁরা পান সাজছেন সাজুন।”

কথায় কথায় পায়ে পায়ে এগিয়ে চলেছেন রামকালী, ঘরের পিছনে টেকি ঘরের দিকে ইচ্ছে করেই। সত্য সে খেয়াল করে না, ম্লানমুখে প্রশ্ন করে, “কাটোয়ার বৌয়ের অসুখ কি বেশী বাবা ?”

“অসুখ ? কে বলবে ?” রামকালী চমকে উঠে সামলে নিয়ে গম্ভীর ভাবে বলেন, “শোন, ওঁকে বৃথা ডাকাডাকি করো না। অসুখ করে নি, ওঁকে হঠাৎ খুঁজে পাওয়া যাচ্ছে না।”

আশ্চর্য! এ কথা কেন বললেন রামকালী!

একটু আগেও কি সিদ্ধান্ত করেছিলেন তিনি এ সংবাদটা আর কারও কাছে প্রকাশ করবেন না ? হয়তো আর কেউ হলেই করতেন না, হয়তো ভুবনেশ্বরী এসে প্রশ্ন করলেও তাকে এই “ডাকাডাকি করো না” বলেই থেমে যেতেন, কিন্তু সত্যর ওই উজ্জ্বল বিশ্বস্ত মস্ত বড় বড় চোখ দুটোর সামনে যেন সত্য গোপন করা কঠিন হল ; আর রামকালীর চিন্তাক্রান্ত মুখের দিকে তাকিয়ে এমনও মনে হল, এই ন’ বছরের মেয়েটার কাছে বুঝি তিনি চিন্তার ভাগ নেবার আশ্রয় খুঁজছেন ।

কিন্তু সত্যর তো ততক্ষণে ‘হয়ে গেছে!’

খুঁজে পাওয়া যাচ্ছে না ?

আস্ত একটা মানুষকে খুঁজে পাওয়া যাচ্ছে না!

তাতে আবার মেয়েমানুষ! বেটা ছেলে নয় যে পায়ে হেঁটে কোথাও চলে গেছে! মেয়েমানুষকে খুঁজে না পাওয়ার অর্থই নির্ঘাত বড়পুকুরের কাকচক্ষু জল । অবশ্য এ জ্ঞানটা সত্যর সম্প্রতিই হয়েছে সারদাকে উপলক্ষ্য করে । তাই চমকে উঠে বলে, “খুঁজে পাওয়া যাচ্ছে না ? হায় আমার কপাল, ওই ভয়ে বড়বৌকে সমস্ত রাত ঘরে ছেকল তুলে রেখে দিলাম, আর কাটোয়ার বৌ এই করল! হে ঠাকুর, আমি কেন দুটোকেই ছেকল দিলাম না ?”

“বড় বৌমাকে ছেকল দিয়ে রেখেছিলে ?” চমৎকৃত রামকালী প্রশ্ন করেন ।

“না দিলে”— সত্য উদ্দীপ্ত কর্তে বলে, “নিশ্চিন্দ হয়ে ঘুম আসে ? জলচৌকির ওপর জলচৌকি বসিয়ে কত কাণ্ড করে ছেকলে হাত দিয়েছি! ভোরের বেলা মাকে বলেকয়ে খুলিয়ে দিই । হায় হায়, কাটোয়ার বৌকেও যদি—” বলেই সত্য সহসা সুর ফেরায়, করুণ রসের পরিবর্তে বীর রসের আমদানি করে, “যাক, সে বেচারা মরেছে না জুড়িয়েছে । মানুষটা একদিন ঘাট থেকে আসতে একটু দেরি করেছে, লক্ষ্মীর ঘরে সন্ধ্যা দিতে পারে নি, তার তরে কী গঞ্জনা কী বাক্যযন্ত্রণা! একটা মনিষ্যি, তাকে দশটা মানুষে তাড়না! বড় পিসঠাকমাটি কি সোজা নাকি ? গাল দিয়ে দিয়ে আর আশ মেটে না । অত বাক্যযন্ত্রণায় পাষাণ পিরতিমে হলেও জলে গে ঝাঁপ দেয় ।”

রামকালী যেন ক্রমশ রহস্যের সূত্র পাচ্ছেন । বললেন, “বকাবকিটা কখন হল ?”

“এই তো কালই । অবশ্যি বৌয়েরও দোষ আছে, জল নিতে গেছ জল নিয়ে চলে এস, সন্ধ্যাতোর ঘাটে বসে থাকার দরকার কি ? তবে হয়, এনাদেরও লঘুপাপে গুরুদণ্ড! অবীরে বিধবা, মনেপ্রাণে কি সুখ আছে ওর ? দু দণ্ড নয় ছিলই ঘাটে, তার জন্যে অত গালমন্দ! এই গ্রীষ্মকালে কুল কোথায় তার ঠিক নেই, সকল গাছই তো শুঁড়ী, তবু বলে কি ঘাটে যাবার ছুতোয় কুল খাচ্ছিলি, আরও সব কত কথা—” বলেই হতাশ নিঃশ্বাস ফেলা সত্য, “আমি তার মানেই জানি না বাবা ।”

রহস্য স্পষ্ট হয়ে উঠেছে ।

কাল সন্ধ্যায় ঘাটে যে নারীমূর্তিটি দেখেছিলেন রামকালী, সে মূর্তি তা হলে সারদার নয়, কাশীশ্বরীর নাভ-বৌয়ের! আত্মহত্যার চেষ্টাই ছিল তার তখন!

একবারের চেষ্টায় পারে নি, তাই দ্বিতীয়বার আবার! কিন্তু খটকা লাগছে একটা জায়গায়, বকাবকিটা তো তার পরবর্তী ঘটনা । তা ছাড়া সত্যবতী বর্ণিত ‘কুল খাওয়া’ শব্দটা! যা শুনে এত চিন্তার মধ্যেও হাসি এসে গিয়েছিল তাঁর ।

কাশীশ্বরীও ওই সন্দেহ ব্যস্ত করেছেন ।

রামকালী চাটুয্যের বাড়িতে এমন একটা ঘটনাও ঘটা সম্ভব!

ভয়ানক একটা যন্ত্রণা অনুভব করলেন রামকালী । না, শঙ্করীর অপঘাত মৃত্যু ভেবে নয়, চাটুয্যে-বাড়ির সন্ত্রম নষ্ট বলেও নয়, যন্ত্রণা বোধ করলেন নিজের ক্রটি কথ্য ভেবে । আরও হুশিয়ার হওয়া উচিত ছিল তাঁর, আরও যথেষ্ট পরিমাণে সাবধান । একটা নিতান্ত তুচ্ছ মেয়েমানুষ যেন রামকালীর ক্ষমতার তুচ্ছতাকে ব্যঙ্গ করে গেল ।

মেয়েটার এ ধৃষ্টতাকে ক্ষমা করা যাচ্ছে না ।

হঠাৎ অনুভব করলেন সত্য পিছিয়ে পড়েছে । ঘাড় ফিরিয়ে দেখে থমকে গেলেন । সহসা এক জায়গায় দাঁড়িয়ে পড়ে নিঃশব্দে কান্না শুরু করেছে সত্যবতী ।

রামকালী পিছিয়ে এলেন । গম্ভীরভাবে বললেন, “তোমার কান্দবার দরকার নেই ।”

“বাবা!” এবার আর নিঃশব্দে নয়, ডুকরে গুঠে সত্য, “সব দোষ আমার । কাটোয়ারা বৌ তো রাতদিন বলত, ‘মরণ হলে বাঁচি’, আমি যদি তখন তোমাকে বলি তো একটা খ্রিতিকার হয় । মনে করতাম অলীক কথা, রাজ্যি সুন্দু মেয়েমানুষই তো রাতদিন ‘মরণ-মরণ’ করে—তেমনি । কাটোয়ার বৌ সত্যি ঘটিয়ে ছাড়ল! মা নেই বাপ নেই ভাই নেই, স্বামীপুত্রর কেউ নেই মানুষটার, শুধু গালমন্দ খেয়ে খেয়ে বেঘোরে মরে গেল! তুমি আগে টের পেলে—”

কান্নাটা বড় বেশী উথলে উঠল সত্যর ।

রামকালী কি হঠাৎ ডড়িতাহত হয়ে শুক হয়ে গেছেন ? নইলে মুখের চেহারা তাঁর হঠাৎ অত অদ্ভুতভাবে বদলে গেল কি করে ? যে জুকুটি নিয়ে একটা তুচ্ছ মেয়েমানুষের ধুষ্ঠতার দিকে তাকিয়েছিলেন, সে জুকুটি মিলিয়ে গেল কেন ? হঠাৎ একটা ধাক্কা খেয়ে কি হুড়মুড়িয়ে ভেঙে পড়ল তাঁর এতক্ষণকার চিন্তাধারা ?

“কান্না থামাও!” বলে আস্তে আস্তে চলে গেলেন তিনি বারবাড়ির দিকে । গিয়ে দাঁড়ালেন ভিয়েন-ঘরে যেখানে কুঞ্জ তখন জলচৌকিটা ঘুরিয়ে নিয়ে দেয়ালের দিকে মুখ করে বসে বসে একসরা গরম ছানাবড়া চাখছেন ।

বললেন, “বড়দা, আমাকে একবার বেরোতে হবে, তুমি দেখো অতিথিদের যেন কোন অমর্যাদা না হয় ।”

“আ—আমি!” মিষ্টি গলায় বেধে গেল কুঞ্জর ।

“হ্যাঁ, তুমি । নয় কেন ? তুমি বড়!”

হ্যাঁ, বেরোবেন রামকালী । জেলেদের ঘরে গিয়ে বলতে হবে, পুকুরে আর একবার জাল ফেলানো দরকার । বাড়িতে কাজ, সন্দেহ করার কিছু নেই । ভাববে মাছের কমতি পড়েছে ।

তবে রামকালী যেন বুঝছেন, ওটা নিরর্থক । কাশীশ্বরীর নাভবৌ নিজে ডুবে মরে নি, সংসারটাকে ডুবিয়েছে ।

রামকালী কি তবে এবার নির্দেশের আশ্রয় খুঁজবেন ? নিজের ওপর কি আস্থা হারিয়ে ফেলেছেন? নইলে যে প্রাণীটাকে শুধু ‘প্রাণীমাত্র’ ভেবে তার ওপর বিরক্ত হচ্ছিলেন— তার ধুষ্ঠতার বহর দেখে তাকে অন্য দৃষ্টিতে দেখছেন কেন ? কেন ভাবছেন তারও কোনো প্রাণ্য পাওনা ছিল সংসারে ? তাই রামকালী উপদেষ্টার দরকার অনুভব করছেন।

॥ চৌদ্দ ॥



“ওরে বাবা-সকল, একটু চোটপায়ে চল, তাগাদা আছে ।”

পালকি থেকে মুখ বাড়িয়ে আর একবার তাগাদা দিলেন রামকালী । মধ্যাহ্নের মধ্যে গিয়ে পৌঁছাতে না পারলে বিদ্যারত্ন মশাইয়ের সঙ্গে দেখা হকেন না । প্রাতঃসন্ধ্যা সেরে গঙ্গাস্নানে বেরিয়ে পড়েন বিদ্যারত্ন, যেটা বিদ্যারত্নের আবাসস্থান থেকে অন্তত তিন ক্রোশ দূরে । যাতায়াতের এই ছ’ ক্রোশ পাড়ি দিয়ে নিত্যস্নানপর্ব সমাধা করে পুনরায় ঠাকুরঘরে ঢুকে পড়েন তিনি গৃহবিগ্রহের ভোগ দিতে । তৎপরে প্রসাদ গ্রহণ, তার পর আবার সামান্য সময় বিশ্রাম, এই মধ্যবর্তী সময়টা কারও সঙ্গে দেখা করেন না বিদ্যারত্ন । কাজেই তাঁর কাছে যেতে হলে

ওই গঙ্গাস্নান সেরে ফেলার মুহূর্তে, নয় অপরাহ্নে ।

কিন্তু অপরাহ্ন পর্যন্ত সময় কোথা রামকালীর—প্রয়োজন যে বড় জরুরী!

জীবনে যখনই কোন সমস্যা সমাধানের জরুরী প্রয়োজন পড়ে, তখন রামকালী বিদ্যারত্নের দরবারে এসে হাজির দেন ।

অবশ্য সে রকম প্রয়োজন জীবনে দৈবাৎই এসেছে ।

সেই একবার এসেছিল নিবারণ চৌধুরীর মায়ের গঙ্গাযাত্রার ব্যাপারে । তিরানব্বই বছরের বুড়ী সজ্ঞানে গঙ্গাযাত্রা করলেন, আর সে নির্দেশ রামকালীই দিয়েছিলেন । কিন্তু বুড়ী যেন রামকালীর বিদ্যা-বুদ্ধিকে পরিহাস করে পাঁচ দিন গঙ্গাতীরের হাওয়া খেয়ে বেশ চাঙ্গা হয়ে উঠল । তারপর তার বায়না “আমায় তোরা বাড়ি নে চল!” শরীরে শক্তি আছে, বয়সে মন অবুঝ হয়ে গেছে । নিবারণ চৌধুরী রামকালীকে এসে ধরে পড়লেন, “বলুন কি বিহিত ?”

সেই সময় চিন্তায় পড়েছিলেন রামকালী ।

গঙ্গাযাত্রীর মড়া ফের ভিটেয় ফেরত নিয়ে গেলে সংসারের মহা অকল্যাণ, সদ্য ভিটেটায় তো তোলাই যাবে না তাকে । টেকিঘরে কি গোয়ালে বড় জোর রাখা যায়, কিন্তু নিবারণ চৌধুরীর মনোভাব দেখে মনে হয়েছিল, সেটুকুতেও তিনি নারাজ । ছেলেপুলে নিয়ে ঘর করেন তিনি,

সংসারের এত বড় অকল্যাণ ঘটাতে বুক কাঁপছে। বার বার তাই কবরেজ মশাইয়ের কাছে বিধি-বিধান চেয়েছিলেন।

সেই সময় এসেছিলেন রামকালী বিদ্যারত্নের কাছে। এসে প্রশ্ন করেছিলেন, “বিদ্যারত্ন মশাই, বলুন শাস্ত্র বড় না মাতৃমর্যাদা বড়?”

আজ এসেছেন আর এক প্রশ্ন নিয়ে।

অবশ্য আপাতত প্রশ্ন তাড়াতাড়ি পৌছবার। একখানা গ্রাম পার হয়ে তবে দেবীপুর। বিদ্যারত্নের গ্রাম।

পাল্কি থেকে আর একবার মুখ বাড়িয়ে দেখে বেহারাদার তাগাদা দিতে গিয়ে থেমে গেলেন রামকালী, থাক্, এত বিচলিত হবার দরকার নেই, পৌঁছে ওরা দেবেই ঠিক।

বিচলিত হওয়াকে ঘৃণা করেন রামকালী। তবু মনে মনে অস্বীকার করে লাভ নেই, আজ একটু বিচলিত হয়েছেন। কোথায় যেন হেরে গেছেন রামকালী, তারই একটা সূক্ষ্ম অপমানের জ্বালা মনকে বিধছে।

কিন্তু রামকালীর মধ্যে এই পরাজয়ের গ্লানি কেন? সংসারের একটা বুদ্ধিহীন মেয়ে যদি একটা অঘটন ঘটিয়ে বসে থাকেই, তাতে রামকালীর পরাজয় কেন?

ঘোড়ায় এলে এতক্ষণে পৌঁছে যেতেন, কিন্তু কোন ব্যোজ্যেষ্ঠ বা গুরুস্থানীয়ের সামনাসামনি সাধ্যপক্ষে ঘোড়ায় চড়েন না রামকালী। তাই পাল্কিতেই বেরিয়েছেন। বেরিয়ে এসেছেন একটু সস্পোনেই। জেলেদের জাল ফেলার ব্যাপারটা সামান্য তদারক করেই। বাড়তি কিছু মাছ উঠলে উঠুক। খাদ্যবস্তু কখনো বাড়তি হয় না। ওরা এখন যেভাবে কাজ করছে করুক, রামকালীর অনুপস্থিতি টের না পেলেই মঙ্গল। টের পেলেই কাজে টিলে দেবে।

কারুর ওপর কি ভরসা করার জো আছে?

কাকা আছেন, সেজকাকা। কিন্তু তাঁকে কোন কাজকর্মের ভার দেওয়াও বিপদ। কারণ তাঁর মতে ডাকহুক চেষ্টামেচি এবং নির্বিচারে সকলকে স্বাক্ষর করেই পুরুষের প্রধান গুণ। আর বয়েস হয়ে গেলে পৌরুষের পরিমাণটা যে তাঁর একুড়িলাও কমে নি, সর্বদা সেটা প্রমাণ করতেও রীতিমত তৎপর সেজকাকা। তাই তাঁকে ডেকেডুকে কুঞ্জত্বের ভার দেওয়া মানে বিপদ বাধানো।

আর কুঞ্জ?

কুঞ্জর কথা কি বলারই যোগ্য?

মিষ্টির ভিয়েনের কানাচে হাতে মুখে রসমাখা আর মুখভর্তি ছানাবড়া ঠাসা কুঞ্জর তৎকালীন চেহারাটা একবার চোখের সামনে ভেসে উঠল। তখন যখন দেখেছিলেন, মনটা বিরক্তিতে ভরে গিয়েছিল, এখন হঠাৎ একটা মমতা-মিশ্রিত অনুকম্পার ভাব মনে এল।

যে মানুষ লুকিয়ে-চুরিয়ে নিজের ছেলের বিয়ের ভোজের মিষ্টান্ন খেতে বসে, তার উপর অনুকম্পা ছাড়া হৃদয়ের আর কোন ভাববৃত্তি বিকশিত হবে?

এরা কি রাগেরই যোগ্য?

আচর্য। রাসুটা হচ্ছে ঠিক বাপের মতই অপদার্থ। ভবিষ্যতের দিকে তাকালে খুব একটা আশার আলো চোখে পড়ে না। কিন্তু তার জন্য হতাশা আনেন না রামকালী—আপন শক্তিতে বিশ্বাসী, আপন কেন্দ্রে অটুট অবিচল তিনি।

ওদের কথাকে চিন্তার জগতে ঠাই দেন না রামকালী, কিন্তু সত্যটা মাঝে মাঝে তাঁকে ভাবিয়ে তোলে। শুধু সেই একটা ভয়ঙ্কর সরল মুখ থেকে উচ্চারিত ভয়ঙ্কর জটিল প্রশ্নগুলোই চিন্তিত করে তোলে রামকালীকে তা নয়, চিন্তিত করে তোলে সত্যর ভবিষ্যৎ সম্পর্কে।

সংসার কি সত্যবতীকে বুঝবে?

পাল্কি থেকে নেমে পড়লেন রামকালী।

বিদ্যারত্নের মাটির কুটির থেকে একটু দূরে। সেটাই সত্যতা, সেটাই গুরুজনের সঙ্কম রক্ষা। গুরুজনের চোখের সামনে গাড়ি পাল্কি থেকে নামা অবিনয়।

মাটির ঘর দালান দাওয়া, দাওয়ার নিচের উঠোনে আঁকা ছবির মত বেড়া ঘেরা ছোট্ট ফুলবাগানটি। বিদ্যারত্নের নিজের হাতের বাগান, নিজের হাতের দেওয়া বেড়া। টগর দোপাটি গাঁদা বেল মল্লিকা রক্তজবা করবী সঙ্ক্যামণি, —নানান গাছে সারা বছরই ফুলের সমারোহ। এছাড়া বেড়ার ধারে আছে তুলসী কেয়ারি। গঙ্গান্নানের পর পূজোর আগে একবার গাছগাছড়াগুলির তদারক করে যাওয়ার অভ্যাস বিদ্যারত্নের। পায়ে খড়ম, পরনে নিজের হাতে কাটা সূতোর ধুতি ও উত্তরীয়—

পিতলের ঝারায় জল নিয়ে গাছের গোড়ায় গোড়ায় ঢালছিলেন বিদ্যারত্ন, রৌদ্রে, রামকালীর ছায়া পড়তেই মুখ তুলে তাকালেন।

হৈ হৈ করে সম্ভাষণ করে উঠলেন না বিদ্যারত্ন। হঠাৎ আবির্ভাবের জন্য বিশ্বয় প্রকাশও করলেন না, শুধু রামকালীর প্রণাম শেষ হলে তাঁর মাথায় হাত রেখে বললেন, “এস, দীর্ঘায়ু হও।”

শান্ত, সৌম্য মুখ, শ্যামবর্ণ ছোটখাটো চেহারা, মাথার চুলগুলি ধবধবে পাকা, কিন্তু দৃঢ়নিবন্ধ মুখের চামড়ায় বলিরেখার আভাসমাত্র নেই। সহজে বিশ্বাস করা শক্ত—বিদ্যারত্ন মশাইয়ের বয়স আশী ছোঁয়-ছোঁয়। চকচকে সাজানো দাঁতের পাটির গুত্র হাসিটুকুও বিশ্বাস করতে প্রতিবন্ধকতা করে।

দাওয়ার উপর খান দুই-তিন জলটৌকি, কাছের পৈঠেয় ঘটিতে জল। পা ধুয়ে দাওয়ায় উঠে জলটৌকিতে বসলেন রামকালী, বিনত হাস্যে বললেন, “আপনার তো আফিকের বেলা হল!”

“তা হল।” বিদ্যারত্ন প্রশ্নের হাসি হাসলেন, “বলবে কিছু—যদি বলবার থাকে?”

বলবার কিছু আছেই, নচেৎ এমন অসময়ে ব্যস্ত হয়ে আসার কারণ কি?

রামকালী আর গৌরচন্দ্রিকা করলেন না, মুখ তুলে পরিষ্কার কণ্ঠে বললেন, “পণ্ডিতমশাই, আজ আবার এক প্রশ্ন নিয়ে আপনার দরবারে এসে দাঁড়িয়েছি। বলুন মানুষ বড়, না বংশমর্যাদার অহঙ্কার বড়?”

ঠিক এই একই সময় একটা ছোট মেয়ে ওই একই ধরনের প্রশ্ন করছিল, অন্য কাউকে নয়, নিজের মনকেই। “আচ্ছা এও বলব, মানুষ বড়, না তোমাদের রাগটাই বড়?”

কী আশ্চর্য্য, কী আশ্চর্য্য! জলজ্যস্ত একটা মানুষ হারিয়ে গেল তবু গিন্নীরা কিনা সত্যর ওপর চোখ রাঙাচ্ছেন, “খবরদার দু’টি ঠোঁট ফাঁক করবি না, কারুর যদি কানে যায় তো তোদের সব কটার হাড়মাস দু’ঠাই করব।”

বেশ বাবা, তোমাদের জেদই থাক, রাগ নিয়ে ধুয়ে জল খাও তোমরা।

ওদিকে বিদ্যারত্ন রামকালীকে বলছিলেন, “কালের সমুদ্রে একটা মানুষের জীবনমরণ সুখদুঃখ কিছুই নয় রামকালী, সমুদ্রে বৃহদ মাত্র। কুলত্যাগিনী বধুকে সন্ধান করবার প্রয়োজন নেই।”

“কিন্তু সমাজকে তো একটা জবাব দিতে হবে?”

“যা সত্য তা বলবে সাহসের সঙ্গে। সত্যকে স্পষ্ট করে বলতে পারা চাই। সেটাই ধর্ম। সেই বিপদগামিনীকে তুমি তো আর ঘরে নিচ্ছ না? ভেবে নাও তার মৃত্যু হয়েছে।”

“কিন্তু পণ্ডিতমশাই, এ আমি ভাবতেই পারছি না।—আমার ঘরের কথা নিয়ে অপরে আলোচনা করবে।”

“রামকালী, তোমার দেহে একটু দুই রোগ হওয়া অসম্ভব নয়, তা যদি হয় কি করবে তুমি? বিধাতার বিধান মেনে নিতেই হবে। তা ছাড়া হয়তো এরকম একটা কিছু প্রয়োজনও ছিল। হয়তো তোমার ভিতর কোনখানে একটু অহমিকা এসেছিল—”

“অহমিকা! পণ্ডিতমশাই, ‘আমি’র প্রতি মর্যাদাবোধ থাকাটা কি ভুল? অন্যায়া?”

“এই একটা জায়গা বড় গোলমালে রামকালী, আত্মমর্যাদা-বোধ আর অহমিকা-বোধ, এ দুটোর চেহারা যমজ ভাইয়ের মত, প্রায় এক, সূক্ষ্ম আত্মবিচারের দ্বারা এদের তফাৎ বোঝা যায়। তা ছাড়া তুমি ব্রাহ্মণ! রজোগুণ তোমার জন্য নয়। কিন্তু আজ তোমার চিত্ত চঞ্চল, তুমি এখন বিশেষ ব্যস্তও, কাজেই আজ এস। আলোচনা থাক।”

রামকালী কয়েক মুহূর্ত মাথা নিচু করে ভূমিসংলগ্ন দৃষ্টিতে কি যেন ভাবলেন, তারপর সহসা মাথা তুলে বলিষ্ঠ কণ্ঠে বললেন, “আচ্ছা, আপনার নির্দেশ শিরোধার্য্য করলাম।”

আর একবার বিদ্যারত্নের পদধূলি নিয়ে বেরিয়ে এসে পালকিতে চড়লেন রামকালী। ফেরার মুখে আর বেহারাদের তাড়া দেবার কথা মনে এল না। বিদ্যারত্নের একটা কথা তাঁকে বিশেষ ধাক্কা দিয়েছে। বিদ্যারত্ন বললেন, “তুমি ব্রাহ্মণ, রজোগুণ তোমার জন্য নয়।”

কিন্তু তাই কি সত্য?

ব্রাহ্মণের মধ্যে তেজ থাকবে না? থাকবে কেবলমাত্র রজোগুণ-শূন্য স্তিমিত শক্তি?

ফিরে দেখলেন বাড়ি লোকে লোকারণ্য। নিমন্ত্রিতেরা প্রায় সকলেই এসে গেছে। রান্নাও প্রস্তুত। শুধু রামকালীর অনুপস্থিতিতে ভোজে বসিয়ে দেবার ব্যবস্থাটা ঠিকমত হচ্ছে না, সকলে মিলে শুধু গুলতানি চলছে।

এই চনচনে সময়ে দূর থেকে পরিচিত পাল্কি-বেহারাদের “হুম্ হুম্” আওয়াজ কানে এল। আশায় অধীর হয়ে উঠল সবাই— ‘এসে গেছেন, এসে গেছেন’ রবে গম্ গম্ করে উঠল জনতা। সকলেই অবশ্য ধরে নিয়েছিল আচমকা কোন রোগীর মরণ-বাচন সংবাদ পেয়ে বাধ্য হয়ে বেরিয়ে যেতে হয়েছে রামকালীকে। কুঞ্জও সেই কথাই বলে রেখেছিলেন।

অন্দরমহলে মেয়েদের মধ্যে শঙ্করী সম্পর্কে কানাঘুষো শুরু হয়ে গিয়েছিল; কিন্তু বারমহল সম্পূর্ণ নিশ্চিন্ত।

রামকালী এসে দাঁড়াতেই বয়োজ্যেষ্ঠ অতিথি-অভ্যাসগতের দল হৈ হৈ করে এগিয়ে এলেন, “ব্যারামটা কার রামকালী? কোন্ গায়ে? কে যেন দেবীপুরের দিকে পাল্কি যেতে দেখল, ওইখানেই কারও—”

“না, কারও ব্যায়রাম শুনে আমি যাই নি—” রামকালী একবার লোক-ভর্তি আটচালার সমস্তটায় চোখ বুলিয়ে নিলেন, তার পর একটু ধেমে বললেন, “আমি বেরিয়েছিলাম অন্য প্রয়োজনে, সে প্রয়োজনের কথা আপনাদের সকলকেই জানাব। যদিও আপনারা এখানে অভুক্ত ও ক্ষুধার্ত, আমার কথা শুনে ঠিক কি মনোভাব আপনাদের হবে তাও সম্পূর্ণ বুঝতে পারছি না, তবু আহারাদির পূর্বেই কথাটা ব্যক্ত করা উচিত মনে করছি আমি। বলতে আপনারা সকলে অনুমতি করুন আমাকে।”

নিঃশব্দ জনতার মাঝখানে রামকালীর ভরাট কণ্ঠস্বর গম্ গম্ করে উঠল, অনেকেরই বুক কেঁপে উঠল একটা অজানা আশঙ্কায়।

কুঞ্জ হঠাৎ পিছনদিকে হঠে গিয়ে ধুলোর উপর বসে পড়লেন, রাসু ভিড়ের একেবারে পিছনেই ছিল, সে হাঁ করে তাকিয়ে রইল কাকার আরক্ত গৌরমুখের দিকে। সমাগতেরা অনুধাবন করতে পারছেন না ব্যাপারটা কি। আহার্য বস্তুতে কি কোনও অনাচার স্পর্শ ঘটেছে? কিন্তু তাই বা কি করে বলা যায়? রামকালীর আচমকা বেরিয়ে যাওয়ার প্রশ্নটাও ঝেঁপিয়েছে।

তবে কি সহসা রামকালীর কোন জ্ঞাতির মৃত্যু ঘটেছে? এই বিরাট ভোজের রান্না সব অশৌচান্ন হয়ে গেছে? সেই সংবাদ পেয়েই রামকালী...। রামকালী কি এমন অর্বাচীন যে এই ভয়ঙ্কর মুহূর্তে সেই তথ্য এসে প্রকাশ করবেন? মৃত্যুসংবাদ কখনো না শুনে তো অশৌচ হয় না, উনি নিজে গা-ঢাকা দিয়ে বেড়ালে তো আর এখানের অনুষ্ঠানের অশৌচান্ন হয়ে যেত না? বলে এমন ক্ষেত্রে ঘরের মড়া কাঁথা চাপা দিয়ে রেখে লোকে দিন উদ্ধার করে নেয়।

তবে?

রামকালী যে তাঁর বক্তব্য জ্ঞাপন করতে অনুমতি চেয়েছিলেন, এ কথা কারও মনে ছিল না, ফের চেয়ে সে কথা মনে করিয়ে দিলেন রামকালী।

“তা হলে আপনারা আমার অনুমতি দিচ্ছেন?”

“হ্যাঁ, হ্যাঁ, অবশ্য অবশ্য। তোর যা বলবার আছে বল।”

“তা হলে শুনুন, গতরাত্রে আমার পরিবারভুক্ত একটি বিধবা বধু গৃহত্যাগ করেছে—”

“অ্যা! অ্যা! অ্যা!”

সহসা ভয়ঙ্কর একটা ঝড় উঠল। কালবৈশাখির দুমদাম এলোমেলো ঝড় নয়, যেন একটা বুনে অরণ্যের চাপাশ্বাস গৌঁ গৌঁ করে উঠল। সেই শ্বাস শুধু সমবেত কণ্ঠের ওই আহত বিন্ময়ের প্রচণ্ড ধ্বনি।

রামকালী কি এই বজ্রটাকেই প্রতুত করছিলেন এতক্ষণ ধরে তাঁর অভুক্ত ক্ষুধার্ত নিমন্ত্রিত অতিথিদের জন্যে?

তুমুল ঝড়ের ধ্বনিতে রামকালীর কথার শেষ অংশ চাপা পড়ে গিয়েছিল, আর একবার সে স্বর গম্ গম্ করে উঠল চাপা মেঘমন্দের মত।

“এখন আপনারা স্থির করুন, এই অপরাধে আমাকে ত্যাগ করবেন কিনা?”

যেন বক্তৃতা-মঞ্চে দাঁড়িয়ে বক্তৃতা দিচ্ছেন রামকালী, এমন ধীর-স্থির সমুন্নত সেই মূর্তি!

এঁকে ত্যাগ!

সম্ভব?

কিন্তু তাও হওয়া সম্ভব বৈকি। সমাজ বলে কথা!

নিবারণ চৌধুরীর মামা বেঁটেখাটো বিপিন লাহিড়ী একটা জলচৌকি টেনে এনে তার উপর দাঁড়িয়ে উঠে চিবিয়ে চিবিয়ে বললেন, “ত্যাগ করাকরির কথা নয়, ভবিষ্যতে যা বিচার তা হবে। কিন্তু বর্তমানে আজ তো আর আমাদের এখানে খাওয়া হয় না রামকালী।”

রামকালী দুই হাত জোড় করে শান্ত গম্ভীর কণ্ঠে বললেন, “আমি কাউকে অনুরোধের দ্বারা পীড়ন করতে চাই না, তবে এইটুকুই শুধু জানাচ্ছি, আমি সেই মতিভ্রষ্টা মেয়েকে মৃত বলেই গণ্য করব। মানুষের সমাজ থেকে তার মৃত্যু হয়েছে। আহারের পূর্বে এ কথাটি নিবেদন করতে যারপরনাই দুঃখ বোধ করছি আমি, কিন্তু আমার বিবেকের কাছে এইটাই কর্তব্য বলে মনে হল আমার।”

বিপিন লাহিড়ী মনে মনে খুব ভেঙেচান, “আগে বলাই কর্তব্য ভাবলাম! ওরে আমার যুধিষ্ঠির! এই যজ্ঞের খাওয়াটা পণ্ড করলি? ভাল হবে—তোমার ভাল হবে?”

চোখে জল এসে যাচ্ছিল বিপিন লাহিড়ীর। তবু কথা বলেন তিনি, “আমার মনে হয়, খবরটা তোমার এখন গোপন রাখাই উচিত ছিল রামকালী।”

“সে আমি ভেবেছিলাম।” রামকালী আবার একবার সকলের মুখের দিকে তাকিয়ে বলেন, “কিন্তু পরে মনকে ঠিক করে নিলাম। আমার এত বড় কলঙ্ক সত্ত্বেও যদি আপনারা আমাকে ত্যাগ না করেন, তাহলে পরম ভাগ্য বলে মানব। আর যদি তা করেন, সে শাস্তি মাথা পেতে নেব।”

এবার আর ঝড় নয়, গুঞ্জনধ্বনি!

সে ধ্বনি ক্রমশ স্পষ্ট হয়ে উঠল। “তা এতে তোমার আর কলঙ্ক কি?”

“আছে বৈকি! আমার অন্তঃপুর উচিত মত রক্ষা করবার অক্ষমতাই আমার কলঙ্ক, আমার অপরাধ। মার্জনা আমি চাইব না, এই অপরাধের মার্জনা নেই, শুধু আমার প্রতি আপনাদের শ্বেহ-ভালবাসার কাছে হাত জোড় করে প্রার্থনা করছি, আপনারা পরে আমার প্রতি যে শাস্তির আদেশ দেন মাথা পেতে নেব, শুধু আজ আপনারা দয়া করে আহার করুন।”

আর একবার ঝড় উঠল।

অসন্তোষের? না উল্লাসের?

বোধ করি বা উল্লাসেরই, তবে জলচৌকির উপর দাঁড়িয়ে থাকা বেঁটে-খাটো বিপিন লাহিড়ীর গলাটায় শুধু শোনা গেল, “আচ্ছা, আজকের মত তোমার অনুরোধ রক্ষা করাই আমরা স্থির করছি।”

রামকালী ধীরে ধীরে সরে গেলেন। মাথা সোজা করেই।

৥ পনেরো ॥



সকালবেলা নেড়ুকে হাতের লেখা মক্শ করতে হয়। পূর্বের উঠানের রোদ যতক্ষণ না পেয়ারাতলার ঠিক নিচেটায় এসে পড়বে ততক্ষণ পর্যন্ত নেড়ুকে সেই দুরূহ কর্তব্যটি করেই চলতে হবে, এই নির্দেশ আছে তার উপর। ঋতুভেদে সীমানার কিছু ভেদ হয়, আপাতত ওই পেয়ারাতলা।

অবশ্য তার প্রতি আরও নির্দেশ আছে।

সেটা হচ্ছে তালপাতার গোছাগুলি ও দোয়াত-কলম নিয়ে বসার সময় এবং ‘মক্শ’র পর সেগুলি তুলে রাখার সময় ভক্তিভরে মা সরস্বতীকে প্রণাম করা। প্রণাম-মন্ত্রের সঙ্গে প্রার্থনা-মন্ত্রও যুক্ত করা আছে।

দেবীর প্রসন্নতা লাভের উপায় স্বরূপ বিদ্যা অনুশীলনের চাইতে স্তবস্ততি প্রণাম প্রার্থনার উপরই নেড়ুর আস্থা বেশী। কাজেই ‘শব্দবোধ’র পাতা যথাসম্ভব তাড়াতাড়ি মুড়ে ফেলে, নিঃশব্দ স্তুতিতেই সময় বেশি যায় তার। চোখটা বুজে রেখেও তেরছা কটাঙ্কের কৌশলে পেয়ারাতলার প্রতি দৃষ্টি নিবন্ধ রেখে পরম ভক্তিভরে মন্ত্রোচ্চারণ করছিল সে পাততাড়িটি কপালে ঠেকিয়ে—

তুং তুং দেবী শুভবর্ণে,
রত্নশোভিত কুণ্ডলকর্ণে।
কণ্ঠে লম্বিত গজমোতিহারে,
দেবী সরস্বতী বর দাও আমারে।
লাগ্ লাগ্ বাণী কণ্ঠে লাগ্—
যাবজ্জীবন তাবৎ থাক্।
দুষ্ট সরস্বতী দূরে যাক্।
আমি থাকি গুরু বশে,
ত্রিভুবন পূরিত আমার যশে।

দেবী-সত্ত্বের কালে কিন্তু নেড়ু ভাবছিল দেবের কথা। সূর্যদেব।

আশ্চর্য! নিষ্ঠুর সূর্যদেবতাকে এত আন্তরিকভাবে মাতুল সম্বোধন করেও ভাগ্নের প্রতি তাঁর মমতার কোনও প্রকাশ দেখতে পায় না নেড়ু। পেয়ারাতলার নিচেটায় আসার যেন কোনও গরজই নেই তাঁর। অথচ তিনি সামান্য একটু কৃপা-দৃষ্টিপাত করলেই, করা মাত্রই, নেড়ুর আজকের মত যত্নগা শেষ হয়। বার বার ঘুরিয়ে ঘুরিয়ে একই স্তবস্তুতি কতক্ষণ ধরেই বা করা যায়?

তবু কপাল থেকে কলম তালপাতা নড়ায় না নেড়ু, ঠেকিয়েই থাকে, এইমাত্র ঠেকানোর ভঙ্গীতে।

“খুব যে বিদ্যে হচ্ছে! আহা মরে যাই, ছেলের কী ভক্তি রে!”

সত্যবতীর শানানো গলা বেজে ওঠে।

বুকটা কেঁপে ওঠে নেড়ুর।

উঃ, যা মেয়ে ও! আর যা জেরা! তথাপি বাইরের প্রকাশে সত্যকে কোন স্বীকৃতি দেয় না নেড়ু, একই ভাবে চোখ বুজে বিড়বিড় করতে থাকে।

সত্যবতী হি-হি করে হেসে ওকে একটা ঠেলা দিয়ে বলে, “এখন যে বড় চোখ বোজা হচ্ছে? এতক্ষণ কি করছিলি? হুঁঃ বাবা, খালি চোখ পিটপিট আর পেয়ারাতলার দিকে তাকাসনি!”

“আঃ সত্য!” নেড়ু এবার পাতা কলম কপাল থেকে নামিয়ে সযত্নে জলচৌকির উপর স্থাপিত করে বিরক্তি-ব্যঞ্জক গষ্ঠীর স্বরে বলে, “নমস্কারের সময় গোলমাল করছিস কেন?”

“নমস্কার তো তুই সকাল থেকেই করছিস! এক পোর বেলা হয়ে গেল সেই এতক নমস্কারই হচ্ছে! দেখি নি যেন!”

“ইঃ, দেখেছিস তুই!” নেড়ু উঠোনের দিকে তাকিয়ে দেখে। মনে হচ্ছে যেন মাতুল সূর্যদেব এতক্ষণে সদয় হয়েছেন, পেয়ারাতলার ঠিক নিচেটাতে কৃপাকটাক্ষ করছেন। অতএব বুকের বল বাড়ে তার। দৃষ্টকণ্ঠে বলে, “কত মক্শ করলাম তখন থেকে!”

“কই দেখি কত!” বলেই সত্য একটা কাজ করে বসে। হাতটা একবার মাথায় মুছে নিয়ে চট করে মা সরস্বতীর উদ্দেশ্যে একটা প্রণাম নিবেদন করে নেড়ুর এইমাত্র রক্ষিত তালপাতার গোছায় এক টান মারে।

“অ্যাই অ্যাই, ও কী হচ্ছে!” শিহরিত কণ্ঠে ভয়ঙ্কর একটা ভয়ের সুরে বলে ওঠে, “সত্য? তুই তালপাতায় হাত দিলি?”

“দিলাম তা কি!” নির্ভীক স্বর সত্ত্বের, “আমি তো মা সরস্বতীকে পেন্নাম করে হাত দিয়েছি!”

“পেন্নাম করলেই সব হল? তুই না মেয়েমানুষ? মেয়েমানুষের তালপাতায় হাত ঠেকলে কি হয় জানিস না?”

সত্য ইতিমধ্যে নেড়ুর সারা সকালের “শ্রমফল” নিরীক্ষণ শুরু করে দিয়েছে। বলা বাহুল্য একখানি মাত্র পাতা কালি-কলঙ্কিত, বাকী সবগুলিই নিষ্কলুষ নিষ্কলঙ্ক। কাজেই আর একবার হি-হি-র পালা।

“খুব যে বলছিলি অনেক মক্শ করেছিস? কই কোথায়? দোয়াতে বুঝি কালির বদলি জল ভরেছিস? তাই চোখে ঠাহর হচ্ছে না?”

সত্যর বিদ্রূপের ভঙ্গী বড় তীক্ষ্ণ, কারণ উজ্জ্বল মন্তব্যের সঙ্গে সঙ্গে চোখের তারা পাতার যতটা সম্ভব কাছে নিয়ে এসেছে সে, মুখে কৌতুকের আলোর ঝলমলানি।

এতটা সহ্য করা শক্ত।

নেড়ু এক হ্যাঁচকায় নিজ সম্পত্তি কেড়ে নিয়ে ক্রুদ্ধকণ্ঠে বলে, “বেশ থাক্। আমার বিদ্যো না হোক তোর কি? নিজের কি হয় দেখ্। বলে দিচ্ছি গিয়ে সবাইকে, তালপাতে হাত দিয়েছিস তুই।”

আর কেউ হলে “সবাইকে বলে দেওয়ার” ভীত-প্রদর্শনেই কাবু হয়ে পড়ে এবং আপসের সুরে “আচ্ছা বেশ ভাই দেখলাম!” ইত্যাদি অভিমানসূচক বাণী উচ্চারণ করে শত্রুপক্ষের মন নরম করে আনে। কিন্তু সত্যর মনোভাব আপসহীন। তাই ভিতরে যাই হোক, বাইরে বিন্দুমাত্র বিচলিত ভাব দেখায় না সে, সমান জোরের সঙ্গেই বলে, “বলে দিবি তো দিবি, সবাই আমার কি করবে শুনি? শূলে দেবে?”

“দেয় কিনা দেখিস! চালাকি নয়!”

“কেন, মেয়েমানুষ তালপাতে হাত দিলে কি হয়? কলকেতায় ত্রে কত মেয়েমানুষ লেখাপড়া করে?”

“তোকে বলেছে করে! পড়লে চোখ কানা হয়ে যায় তা জানিস?”

“ককনো না, মিছে কথা! বড্ডই তুই জানিস! যারা পড়ছে তারা সব অমনি কানা হয়ে যাচ্ছে!
হঁ!”

কলকেতা নামক অ-দৃষ্ট সেই দেশটায়, কদাচ কখনও যেখানের নাম কানে আসে, সেখানে সত্যিই কোনও মেয়েমানুষ লেখাপড়া করে কিনা এবং করলে তাদের চক্ষুযুগলকে দৃষ্টিশক্তিসম্পন্ন রাখতে পারে কিনা, এ সম্পর্কে নেড়ুর স্পষ্ট কিছু জানা নেই, তবু নিজের অভিমতকে প্রতিষ্ঠিত করতে প্রাণপণ চেষ্টা করে সে, “এখন না যাক—আসছে জানু যাবে। অমনি না!”

‘আসছে জানু।’ হি-হি-হি! তাদের আসছে জানুটা তুই দেখে এসেছিস বুঝি? আমি এই তোকে বলে দিচ্ছি নেড়ু, ওসব কিছু হয় না। বিদ্যে তো ভাল কাজ, করলে কখনও পা হতে পারে?”

লেখাপড়ার ব্যাপারে বুদ্ধি না খুললেও কূটতর্কের ব্যাপারে নেড়ু ওস্তাদ, তাই সে অকাট্য একটি যুক্তি প্রয়োগ করে, “নারায়ন-পুজোও তো ভাল কাজ, করে মেয়েমানুষেরা? ছুঁতে তো পায় না। ভগবান বলে দিয়েছে ভালো কাজগুলো বেটাছেলেরা করবে, খারাপ কাজগুলো মেয়েমানুষেরা করবে, বুঝলি?”

“হ্যাঁ, বলেছে ভগবান তোর কান ধরে!” ঝঙ্কার দিয়ে ওঠে সত্য, “ভগবান কখনো অমন একচোখা নয়। ওসব বেটাছেলেরাই ছিটি করেছে।”

বচসার শব্দ খুব মৃদু হচ্ছিল না, শব্দে আকৃষ্ট হয়ে পুণ্ডি এসে দাঁড়ায় এবং সকৌতূহলে প্রশ্ন করে, “কি ছিটি করেছে রে বেটাছেলেরা?”

সত্য মুহূর্তে অনুভূত ভাব পরিগ্রহ করে বলে, “কিছু না, শাস্তরের কথা হচ্ছে।”

শাস্তর!

পুণ্ডি হালে পানি পায় না।

সহসা এখানে শাস্ত্রালোচনা শুরু হল কী বাবদ, সেটা অনুধাবন করতে চেষ্টা করে। ইত্যবসরে নেড়ু সেই ‘বলে দেওয়া’র সুরে বলে ওঠে, “সত্যর সারসংক্ষেপ জানা গুনবি পুণ্ডিপিসী? তালপাতে হাত দিয়েছে, আবার বলছে ‘দিয়েছি তো হয়েছে কি!’”

তালপাতে হাত!

এটা আবার আর এক আকস্মিকতা। তালপাতাটা কি জাতীয় সহসা সেটা হৃদয়ঙ্গম করতে পারে না পুণ্ডিবতী।

“তালপাতা কি রে?” প্রশ্ন করে সত্যর মুখের দিকে তাকিয়ে।

তাকে ‘হাঁ’ করে দিয়ে সত্য হেসে উঠে দেওয়ালে পোঁতা পেরেক গোঁজা একখানা তালপাতার হাতপাখা পেড়ে নিয়ে বলে ওঠে, “এই যে এই! দেখ, এখন হাতে পোকা পড়ল কিনা আমার!”

“সত্য!”

নেড়ু চোখ পাকিয়ে বলে, “মা সরস্বতীকে নিয়ে তামাশা করছিস তুই?”

প্রত্যেক সময় প্রত্যেক ব্যাপারেই সত্য জিতে যায়, নেড়ু হারে। নেড়ুর মজ্জায় অবস্থিত পৌরুষবোধ এতে যথেষ্টই আহত হয়, আজ সহসা সত্যকে শাসন করবার একটা ছুতো পেয়ে নেড়ুর আর উল্লাসের সীমা নেই। তাই সহসা করতলগত সেই শক্তিটাকে অবহেলায় বাজে খরচ করে ফেলতে পারছে না, রীতিমত করে ভাঙিয়ে খেতে চাইছে চেখে চেখে।

এবার আর হাসে না সত্য, বিরক্তি প্রকাশ করে, সেই ওর অভ্যস্ত ভঙ্গীতে জোড়াভুরু কুঁচকে, “হাঁদার মতন কথা কস নে নেড়ু। তামাশা আমি মা সরস্বতীকে করছি না, করছি তোকে। তালপাতে একটু হাত দিয়েছি তো কী কাণ্ডই করছিস। যেন সগুণে মত্যা রসাতলে গেছে! শুধু হাত দেওয়া কেন, আমি তো লিখতেও পারি।”

“লিখতেও পারিস!”

যুগপৎ নারী-পুরুষ দুই কণ্ঠে উচ্চারিত হয় এই সর্পাহত-কণ্ঠবৎ শব্দ। আড়ষ্ট হয়ে গেছে পুণ্ডি আর নেড়ু।

কিন্তু নিষ্ঠুর সত্য ওদের এই আঘাতপ্রাপ্ত চিন্তাই আরও আঘাত হেনে বসে, “পারিই তো, এই দেখ।”

ঝপ করে আলোচ্য তালপত্রখণ্ডের একখানা টেনে নিয়ে দোয়াতে কলম ডুবিয়ে পরিপাটি করে লিখে ফেলে সত্য, “কর খল ঘট।” লিখে অদৃশ্যের উদ্দেশ্যে আর একটা প্রণাম ঠুঁকে বলে, “আরও কত লিখতে পারি!”

বিশ্বয়ের ঘোর কাটতে কিছুক্ষণ লাগে। পুণিয়ার চাইতে নেড়ুই বেশী বিশ্বয়াহত। যে দুর্নহ কর্মের চেষ্টায় তার ঘাম ছুটে যায়, এত অনায়াসলীলায় সেটা করে ফেলে সত্য!

তা ছাড়া কেমন করে ?

মা সরস্বতী কি সহসা ওর উপর ভর করেছেন ? যেমন নাকি গুনতে পাওয়া যায় কবি কালিদাসের উপর করেছিলেন ?

লেখা শব্দ কটির উপর চোখ রেখে বিম্ব হয়ে তাকিয়ে থাকে নেড়ু। আর পুণিা স্পর্শ বাঁচিয়ে তালপাতাখানার উপর ঝুঁকে পড়ে বিস্ফুরিত নেত্রে বলে, “কোথ থেকে শিখলি রে সত্য ? কে শেখালে ?”

“শেখাতে আবার কার দায় পড়েছে, আমি নিজে নিজেই শিখেছি! দেখে দেখে!”

“নিজে নিজেই শিখেছিস ? দেখে দেখে ?”

“না তো কি ?”

“দো'ত কলম পেলি কোথা ?”

“দো'ত কলম কে দিচ্ছে!” সত্য ঝাঁকের মাথায় তার গোপন কথাটি প্রকাশ করে বসে, “বটপাতার ঠুলি গড়ে, তার মধ্যে পুঁইমেটুলির রস গুলে কালির মতন করি।”

ভাজ্বব বনে যাওয়া দুটি প্রাণী ক্ষীণকণ্ঠে বলে, “আর পাত কলম ?”

“তোরা আর ‘হাঁ-করা’ কথা কস নে বাপু। পৃথিবীর তালগাছ কি কেউ সিঁদুক বন্ধ করে রেখেছে, না আকিঞ্চন করে খুঁজলে একটা শরকাঠি মেলে না ?”

গিন্ধীর মতন মুখ করে ঝঙ্কার দিয়ে ওঠে সত্য।

এতক্ষণে বুঝি হৃদিস পায় পুণিা। তা সেও গিন্ধীদের মত গালে হাত দিয়ে বলে, “তাহলে তুই নুকিয়ে মক্শ করিস ? উঃ ধনি বাবা! কাউকে টেরই পেছে দিস না ? কখন হাত পাকাস ?”

সত্য রহস্যের হাসিতে মুখ রঞ্জিত করে বলে, “যখন তোর ঝাকিস না।”

“কিন্তু সত্য!” পুণিা চিন্তিত স্বরে বলে, “খেয়াল করে তো করছিস, দেখে আহ্লাদও হচ্ছে, কিন্তু হাজার হোক মেয়েমানুষ, এতে তোর পাপ হবে না?”

“কেন, পাপ হবে কেন ?” সত্য সহসা উদ্দীপ্ত তেজের সঙ্গে বলে ওঠে, “মেয়েমানুষরা যে রাতদিন ঝগড়া কোঁদল করছে, যাকে ভ্রাক্কে গালমন্দ শাপমনিয়া করছে, তাতে পাপ হয় না, আর বিদ্যে শিখলে পাপ হবে ? বলি স্বয়ং মা সরস্বতী নিজে মেয়েমানুষ নয় ? সকল শাস্ত্রের সার শাস্ত্র চার বেদ মা সরস্বতীর হাতে থাকে না ?”

নেড়ুর আর বাক্যস্ফূর্তি নেই।

এত বড় অকাটা যুক্তির সামনে পড়ে গিয়ে যেন বিরাট একটা দৃষ্টির দরজা খুলে যায় তার চোখের সামনে।

সত্যিই তো বটে, মা সরস্বতীটি স্বয়ং নিজেই তো মেয়েমানুষ।

এতবড় স্পষ্ট সত্য কি করে এত দিন তার দৃষ্টির বাইরে ছিল ? আর এই সত্যাবতীটাই বা কেমন করে উদ্ঘাটন করে ফেলেছে সেই সবাইয়ের ভুলে থাকা, অথচ পরম স্পষ্ট কথাটাকে।

“নে পুণিা, ঘাটে যাই চ।”

আলোচনায় ইতি টেনে দিয়ে উঠে পড়ে সত্যাবতী, “আর দেরি করলে গিন্ধীরা ভাত গেলবার জন্যে হাঁক পাড়বে, ভাল করে চানই হবে না।”

কথাটা মিথ্যা নয়, জলে পড়লে সহজে আশ মিটতে চায় না এদের। সাঁতার দিতে দিতে হাঁপিয়ে না পড়া পর্যন্ত ভাল করে চান হয় না।

“চ” বলে উঠে পড়ে পুণিা, কিন্তু নেড়ুর সঙ্গে চোখে চোখে একটা ইশারা হয়ে যায় তার।

কিন্তু না, অসদভিপ্রায় ছিল না তাদের, ‘বলে দেওয়া’র মনোভাবও ছিল না আর। সত্যর গুণপনা সমাজে প্রকাশ করে সকলকে চমৎকৃত করে দেওয়াই উদ্দেশ্য ছিল।

সত্য যে তাদেরই একজন!

সত্যর মহিমায় তো তাদেরই মহিমা!

কিন্তু সদভিপ্রায়ের ফল কি সব সময় সুস্বাদু হয় ?

হয় না।

হয় না, সেটাই আর একবার প্রমাণিত হয়ে গেল নেড়ুর সত্যোদ্ঘাটনে।

হলুস্থল পড়ে গেল অন্দর-বাড়িতে।

প্রচ্ছনে বইতে লাগল রামকালীর মেয়েকে আশকারা দেওয়ার সমালোচনা আর প্রত্যক্ষে ছিছিঙ্কার পড়তে লাগল সত্যর বৃকের পাটার!

ও কি ভেবেছে শ্বশুরঘর করতে হবে না ওকে ?

“করতে হবেও না,” শিবজায়া তীক্ষ্ণকণ্ঠে বলেন, “শ্বশুররা টের পেলে উদ্দেশে হাতজোড় করে ত্যাগ করবে ও বৌকে।”

মোক্ষদা বলেন, “হারামজাদী যখনই জটার নামে ছড়া বেঁধেছিল, তখনই সন্দ হয়েছিল আমার। এখন বুঝছি।”

রাসুর মা কোনদিনই কোন কথায় বড় থাকে না, কাজের পাহাড় নিয়েই কাটায় সারা দিন, কিন্তু আজকের অপরাধের আবিষ্কর্তা নাকি স্বয়ং তারই পুত্ররত্ন, তাই বোধ করি কিছুটা দাবি অনুভব করে কথা বলার।

আস্তে আস্তে বলে, “একে তো ঘরের একটা বৌ, যা নয় তাই কেলেঙ্কারি করে গালে-মুখে চুনকালি দিয়ে জন্নোর শোধ লোকের কাছে হয়ে করে রেখে গেল, আবার ঘরের মেয়েরাও যদি যাচ্ছে তাই করতে থাকে—”

কথা শেষ করে না রাসুর মা, শুধু দুটো পাতকই যে একই গর্হিতের পর্যায়ে পড়ে সেইটুকুরই ইশারা দেয়।

কাঠ হয়ে তাকিয়ে থাকে ভুবনেশ্বরী।

শুধু কাশীশ্বরীই নীরব। তাঁর আর মুখ নেই।

সমালোচনার উদ্দমতা কিছুটা স্তিমিত হলে দীনতারিণী প্রায় মিনতির ভঙ্গীতে বলেন, “যাক পে বাবা, ওই নিয়ে আর বেশী কথাকথিতে কাজ নেই সেজঠাকুরঝি। প্রবাদে বলে, কথা কানে হাঁটে। কোন সূত্রে কার দ্বারা চালিত হয়ে কুটুমবাড়ির কানে উঠবে, ইয়ত সেই নিয়ে কি বিপত্তি বাধবে কে বলতে পারে! একে তো—”

দীনতারিণীও কথায় একটা অকল্পিত সজাবনা উঠিয়ে রেখে টেনে ছেড়ে দেন।

কাশীশ্বরীর সামনে আর শঙ্করীর কথা স্পষ্ট করে তোলেন না।

তবু মোক্ষদা উচ্চ চীৎকারে ভবিষ্যদ্বাণী করতে ছাড়েন না, “সে তুমি যতই সাবধান হও বড়বৌ, আমি এই আগুবাড়িয়ে বলে দিচ্ছি, ও মেয়ের কপালে অশেষ দুঃখ আছে। আজ নয় তুমি আমি চেপে গেলাম, কিন্তু ওকে নিয়ে যারা ঘর করবে, তাদের কি আর গুণ বুঝতে বাকী থাকবে? হবে না তো কি, বাপে শাসন না করলে কি আর বেয়াড়া মেয়ে-ছেলে শায়েস্তা হয়?”

দীনতারিণী অকূলের কূল হিসেবে শ্রিয়মাণভাবে বলেন, “তা তুমি না হয় রামকালীকে বুঝিয়ে বলো?”

“রক্ষ করো বড়বৌ। আমি আর হয় হতে চাই না। আমি লাগাতে যাব, আর তিনি মেয়েকে শাসন তো দূরের কথা, উল্টে আরও আশকারা দেবেন।”

অগত্যই দিশেহারা দীনতারিণী ভুবনেশ্বরীর প্রতিই দৃষ্টিক্ষেপণ করেন, “তা তুমিও তো সময়ান্তরে যখন তার মনমেজাজ ঠাণ্ডা দেখবে, একটু বুঝিয়ে বলতে পার মেজবৌমা? সত্যি যে মেয়ে তোমার বেঞ্চ্যচারী হয়ে উঠেছে। পরের ঘরে পাঠাতে তো হবে?”

ভুবনেশ্বরী অবশ্য এ কথার কোন উত্তর দেয় না। দেওয়া সম্ভব নয় তার পক্ষে। যদিও তার মেয়ের বিয়ে হয়ে গেছে, তবু গুরুজনের সমক্ষে স্বামী সম্পর্কে উল্লেখই যে যারপরনাই লজ্জাজনক। ভুবনেশ্বরী যে রামকালীর সঙ্গে কথা কয়, এত বড় লজ্জার কথাটা শান্তড়ী এই লোকসমাজে প্রকাশই বা করে বসলেন কেন? ছি ছি!

লজ্জা প্রতিকারের আর কিছু না দেখে মাথার ঘোমটাটাই আর খানিকটা বাড়িয়ে দিয়ে মাথা হেঁট করে ভুবনেশ্বরী।

তা মাথাটা আর ভুবনেশ্বরী উঁচু করতে পায় কখন?

স্বামীকেও যে তার বড় ভয়।

তবু বড়ই চিন্তাগ্রস্ত হচ্ছে সে মেয়ের ভবিষ্যৎ ভেবে। অহরহ সকলেই যে বলছে—ও মেয়ে শ্বশুরঘর করতে পারবে না।

আসামী এক, বিচারকও এক, শুধু কাঠগড়া আর অভিযোজ্ঞা আলাদা।

তবে আসামীকে প্রথমেই হাজির করে না ভুবনেশ্বরী, তাকে শাসিয়ে রেখে এসে, অনেক কৌশলে ভয়ানক একটা দুঃসাহসিক চেষ্টায় দিনের বেলা একবার স্বামীর সঙ্গে দেখা করার সুযোগ করে ফেলে সে। রামকালী যখন মধ্যাহ্ন-বিশ্রাম করছেন, সে সময় কাছে এসে ঘোমটা দিয়ে দাঁড়ায়।

রামকালী ঈষৎ আশ্চর্য হয়ে বলেন, “কিছু বলবে?”

স্বামীর স্নেহকোমল সুরে সহসা চোখে জল এসে যায় ভুবনেশ্বরীর, উত্তর দিতে পারে না, শুধু ঘোমটাটা একটু কমায়।

“কি হল?” রামকালী হৃদু কৌতুকে বলেন, “বাপের বাড়ি যেতে ইচ্ছে হচ্ছে?”

“না।” ভুবনেশ্বরী মাথা নেড়ে বাষ্পরুদ্ধ স্বরে বলে, “বলছি সত্যর কথা।”

“সত্যর কথা! কেন?” আর একটু হাসেন রামকালী, “আবার কি মহা অপরাধ করে বসল সে?”

“করছে তো সব সময়।” অভিমানের আবেগে কথায় জোর আসে ভুবনেশ্বরীর, “তুমি তো সবই হেসে ওড়াও। কথা শুনতে হয় আমাকেই।”

“বাজে কথা গায়ে মাখতে নেই মেজবৌ।”

“বাজে? মেয়ে কি করেছে শুনলে আর—”

“কি করেছে?”

“লিখেছে।”

“লিখেছে! লিখেছে কি?”

“তা জানি না। নেড়ুর তালপাতে কি সব বইয়ের কথা লিখেছে। আবার নাকি আস্পন্দা করে বলেছে, আরও অনেক লিখতে পারে। বুকের পাটা কত, বাগান থেকে তালপাতা কুড়িয়ে শরকাটি যোগাড় করে পুইমোটুলির রস দিয়ে লেখা শিখেছে!”

এর পর রামকালী চমৎকৃত না হয়ে পারেন না। বলেন, “তাই নাকি? গুরুমশাইটি কে? নেড়ুই নাকি?”

“নেড়ু? নেড়ু বলেছে সাতজনম চেষ্টা করলেও নাকি এমন হরফ সে লিখতে পারবে না!”

“বটে! কই তাকে একবার ডাক তো দেখি!”

আসামী পাশের ঘরেই অবস্থান করছে, ভুবনেশ্বরী তাকে চোখ রাঙিয়ে বসিয়ে রেখে এসেছে।

স্বামীকে যে খুব বেশী দুশ্চিন্তিত করছে, সেখানে ভুবনেশ্বরীর এমন ভরসা হয় না, শান্তির মতো কি আর তেমন গুরু হবে? অথচ লক্ষ্য সান্ত্বিত কাজ হবে বলে মনে হয় না, কারণ সত্যর ভাব যথারীতি অনমনীয়। তাই স্বামীকে একটু তাতিয়ে তোলবার আশায় বলে, “ডাকছি, বেশ ভাল করে শাসন করে দিও। শুধু যে আস্পন্দার কাজ করেছে তাও তো নয়, আলাত পালাত কত সব তরু করেছে। কলকাতায় নাকি অনেক মেয়েমানুষ আজকাল লেখাপড়া শিখছে, তাদের তো কই চোখ কানা হচ্ছে না, বিদ্যার দেবী মা সরস্বতীই তো নিজে মেয়েমানুষ, এই সব বাচালতা। তুমি একটু উচিত শিক্ষা দিয়ে বকবে মেয়েকে, বুঝলে?”

শেখাংশে মিনতি ঝরে পড়ে ভুবনেশ্বরীর কণ্ঠে।

সরে গিয়ে পাশের ঘর থেকে ইশারায় ডাকে মেয়েকে। স্বামীর সামনে তো আর গলা খুলতে পারে না।

সত্য এসে হেঁটমুণ্ডে দাঁড়ায়।

কাঠগড়ায় এসে দাঁড়াবার সময় এটাই পদ্ধতি সত্যর। উত্তরদানকালে মুখ তোলে।

রামকালী প্রথমটায় একটুও অন্তত ধমকে দেবেন এ আশা ছিল ভুবনেশ্বরীর, কিন্তু তিনি তাকে হতাশ করলেন। ভাবলেশশূন্য কণ্ঠে সহজভাবে বললেন, “তুমি নাকি লিখতে শিখেছ?”

মুখটা অবশ্য একটু পাং হুল সত্যবতীর।

“কই, কি লিখেছ দেখি?”

অস্ফুটে যা উত্তর দেয় সত্য তার অর্থ এই—অপরাধের পর আর সেই অপরাধের চিহ্ন সম্পর্কে সে ওয়াকিবহাল নয়। নেড়ু জানে।

“আচ্ছা ঠিক আছে। আবার লিখতে পার?”

সত্যবতী মুখ তুলে তাকায়।

কই বাপের চোখে তো রুদ্ধরোষের চিহ্ন নেই। তবে বোধ হয় তেমন রাগ করেন নি। তাই এবার সম্মতিসূচক ঘাড় নাড়ে সত্য।

“আচ্ছা কই, লেখো দিকি।”

হাত বাড়িয়ে চৌকির পাশে অবস্থিত জলটোকিতে রক্ষিত দোয়াত কলম ও খসখসে একখানা বালির কাগজ টেনে নেন রামকালী, বলেন, “লেখো—যা শিখেছ লেখো।”

এ কী! এ যে হিতে বিপরীত!

ধমক চুলোয় থাক, মেয়ের হাতে আবার কাগজ কলম তুলে দিচ্ছেন রামকালী! নাটকের শেষ দৃশ্যের জন্যে ?

অবশ্য এমনও হতে পারে, যাচাই করে দেখছেন নেড়ুর কথার সত্যতা।

সত্যি, আগাগোড়া ব্যাপারে নেড়ুর চালাকি হতে পারে।

কিন্তু তাই কি ? হতস্খাড়া মেয়ে তো অস্বীকারও করছে না।

ততক্ষণে সত্য ঘাড় গুঁজে দু-তিনটি শব্দ লিখে ফেলেছে। অবশ্য তালপাতার নিয়মে অধিক জোর প্রয়োগে কাগজপাত্রে সামান্য সামান্য ক্ষতের সৃষ্টি হল, কিন্তু লেখা হল।

রামকালী সেটা ঘুরিয়ে ফিরিয়ে বারকয়েক দেখে কোনও মন্তব্য না করে শান্তভাবে বলেন, “কলকাতায় অনেক মেয়ে লেখাপড়া করছে, এ কথা তোমায় কে বললে ?”

“ছেটমামী।”

“তাই নাকি ? তিনি কোথা থেকে—ও তিনি যে কলকাতারই মেয়ে! তাই না ?”

এ উদ্দেশটা ভুবনেশ্বরীকে। কিন্তু ভুবনেশ্বরী তো আর কত বড় মেয়ের সামনে গলা খুলে কথা বলতে পারে না, ঘাড় কাত করে সায় দেয়।

“তা তিনি জানেন লেখাপড়া ? তোমার মামী ?”

“একটু একটু জানেন। বেশি করে কবে আর শিখতে পেল বেচারী ? শুধু বলছিল, একজন মেম নাকি দেশী ইস্কুল খুলেছে, আর একজন সায়েব বিলিভী ইস্কুল খুলে দিয়েছে, কলকাতার মেয়েরা আর মুখ্য থাকবে না।”

“মেয়েদের লেখাপড়া শিখে লাভ কি ? তারা কি মায়ের গোমস্তা হবে ?” সকৌতুক হাস্যে মেয়েকে প্রশ্ন করেন রামকালী।

এবার সত্যবতীর তেজের পালা। সব সইতে প্যারে সে, সইতে পারে না ব্যঙ্গ।

“নায়েব গোমস্তা হতে যাবে কেন ? লেখাপড়া শিখে নিজে নিজে রামায়ণ মহাভারত পুরাণ বই-টাই পড়তে পারে তো ? কবে কথকঠাকুর কোথায় পড়বেন বলে অপিক্ষে করে থাকতে হয় না।”

মেয়ের এই ক্রুদ্ধমূর্তি আর সগর্ভ উক্তি কি রামকালীর খুশির খোরাক হয় ? তাই আরও একটু উত্তপ্ত করতে চান তাকে ?

“তা মেয়েমানুষের এত বেদপুরাণ জানবার দরকারই বা কি ?”

এবার সত্যবতী স্থান পাত্র বিন্মত হয়ে নিজ মূর্তি ধরে, “এত যদি না দরকারের কথা তো মেয়েমানুষের জন্মাবারই বা দরকার কি, তাই বল তো বাবা শুনি একবার ?”

মেয়ের এই দুঃসাহসে ভুবনেশ্বরীর বুক খরখর করে, অত বড় মানুষটার মুখে মুখে এতখানি চোপা!

হবে না, হবে না—এ মেয়ের কক্খনো শ্বশুরবাড়ি ঘর করা হবে না।

কিন্তু ভুবনেশ্বরীকে চমকে দিয়ে সহসা হেসে ওঠেন রামকালী, বেশ সশব্দেই।

তার পর মেয়ের দিকে তাকিয়ে বলেন, “তুমি লেখাপড়া শিখতে চাও ?”

“চাই তো, পাচ্ছি কোথায় ?”

“ধরো যদি পাও ?”

“তা হলে রাতদিন লেখাপড়া করব।”

“অতটা করতে হবে না। নিয়ম করে কিছুক্ষণ পড়লেই হবে। কাল থেকে দুপুরবেলা এই সময় আমার কাছে পড়বে।”

“পড়বে!”

ভুবনেশ্বরী আর কথা না বলে পারে না।

“হ্যাঁ, পড়বে লিখবে! পুঁইমেটুলির কালি দিয়ে নয়, সত্যিকার দোয়াত কলমই দেব ওকে।”

“বাবা!”

সত্যার মুখ দিয়ে মাত্র এই দুটি অক্ষর সম্বলিত শব্দটা বেরোয়। আর ভুবনেশ্বরীর দু চোখে শ্রাবণ নামে।



বসেছে কাব্যপাঠের আসর।

ঋতুরঙ্গ কাব্য। ‘বর্ষাখণ্ড’ শেষ করে প্রকৃতিদেবী সবেমাত্র ‘শরৎখণ্ড’র মলাটখানি খুলে ধরেছেন, এখনও তার ভিতরের শ্লোক পড়তে বাকী। এখনও কাশের বনে বনে গুরু হয় নি শ্বেতচামরের ব্যজনাবতি, শুধু ভোরের বাতাসে লেগেছে অকারণ পুলকের স্পন্দন। শুধু আকাশের নীলে দর্পনের স্বচ্ছতা, পাখীদের ‘শিষে’ উল্লাসের তীক্ষ্ণতা। দেবী অনন্তকাল ধরে একই কাব্য আবৃত্তি করে চলেছেন, শেষ লাইনের পরই আবার গোড়ার লাইন, তবু সে কাব্য পুরনো হয়ে যায় নি, পুরনো হয়ে যায় না। অনন্তকালের মানুষের কাছে বয়ে নিয়ে আসে আশার বাণী, প্রত্যাশার স্বপ্ন, উৎসাহের সুর।

উৎসাহের জোয়ার লেগেছে বাংলার গ্রামে গ্রামে। প্রতীকার উৎসাহ।

‘মা দুর্গা আসছেন!’

‘আসছেন বাপের বাড়ি। কৈলাস থেকে মর্ত্যালোকে।’ এ কথা গল্পকথা নয়, বাংলার অন্তরের সত্য বিশ্বাসের কথা। বৎসরান্তে মা মাতুরূপে আর কন্যারূপের সমন্বয় সাধন করে নেমে আসেন মাটি-মায়ের কোলে, এসে মায়ের কাছে সুখদুঃখের কথা কন, বিদায়কালে চোখের জল ফেলেন, এ কথা কি অবিশ্বাসের? দেবতার সঙ্গে আত্মীয়তার বন্ধন পাতিয়ে, দেবতাকে ঘরের লোক করে নিয়েই তো বাঙ্গালির ঘরকরনা। তাই তারা শিবের বিয়ে দেয়, ইতু-মনসার ‘সাধ’ দেয়, ভাদুকে সোহাগ করে আর পার্বতীকে পতিগৃহে পাঠাতে চোখের জলে বুক-জ্বাসায়। আর সবাই তবু দেবদেবী, উমা যে সেই ঘরের মেয়ে। মহিমায তাঁর সহস্র নাম থাকে আসল নাম যে সেই উমা নামটি। শরৎ পড়তেই ডিখারী বৈষ্ণবরা সেই কথা স্বরণ করিয়ে দিয়ে যায় খঞ্জরীর তালে তালে। “আয় মা উমাশশী, নিরখি মুখশশী, দিবানিশি আছি আসার আশায়।”

হয়তো একটি গ্রামে একটি মাত্র ভাগ্যবান্নের বাড়িতেই কন্যারূপিণী জগন্নাথার পদার্পণ ঘটবে, কিন্তু গ্রামের প্রতিটি ঘরের অন্তরবীণায় বাজছে আগমনীর সুর।

এবারে আশ্বিনের প্রথম দিকেই পূজা, তাই ভাদ্র পড়তে পড়তেই ‘সাজ সাজ’ রব। সংসারের নিত্য রান্না খাওয়া বাদে অন্য সব কিছুতেই যে করা চাই মাসখানেকের মত আয়োজন। পূজোর মাসে তো আর কেউ মুড়ি ভাজবে না, চিড়ে কুটবে না, মুড়কি মাখবে না, পক্কান্ন রাঁধবে না, মেটে ঘরের দেয়াল নিকোবে না? এমন কি সলতে পাকানো, সুপুরি কাটা, নারকেলকাঠি চাঁছা, সবই সেরে রাখতে হবে দেবীপক্ষ পড়ার আগে। কোজাগরীর পর আবার এসব কাজে হাত, আবার কাঁথায় ফোঁড় তোলা, আর তার সঙ্গে সদা-বিগত উৎসবের স্মৃতি রোমন্বন।

ভাদ্র মাসে শুধু যে আগমনীর প্রত্নতি তাও তো নয়, বর্ষার পর যে অনেক কাজ এসে জোটে গেরস্তর মেয়েদের। স্যাৎসেতে বিছানা কাঁথা, তোরসে তোলা কাপড় চাদর, ভাঁড়ারের সম্বন্ধরের মজুত বড়ি আচার, মশলাপাতি, ডাল কড়াই, —সব কিছুকে টেনে ভাদুরে রোদ খাওয়ানো তো কম কাজ নয়।

ভুবনেশ্বরীর মা সেই, ভাজেরাই সংসারের গিন্নী, কদিন থেকে দুপুরভোর এই কর্মকাণ্ড নিয়ে হিমশিম খাচ্ছে তারা। আজ পড়েছে নাড় দিয়ে। হাঁড়িভর্তি মুগের নাড়ু, নারকেলের নাড়ু করে মাচায় তুলে রাখতে পারলে মাসখানেকের মত জলপানের দায়ে নিশ্চিন্দ। আর পূজোর মাসে ছেলপুলের পাতে দুটো ভালমন্দ দিতেও হয়। ভুবনেশ্বরীর বড় ভাজ নিভাননী জোর হাতে নারকেল কুরছিল আর ছোট ভাজ সুকুমারী জাঁতা ঘুরিয়ে মুগ ভাজছিল, হঠাৎ উঠোনের দরজার শিকল নড়ে উঠল।

“এই দেখ কাজের গুরু কামাই,” নিভাননী নিচু গলায় বলে, “কে আবার এখন বেড়াতে এল কাজ পও করতে! নে ছোট বৌ, ওঠ, দুয়ের খোল।”

সুকুমারীর অবশ্য মনোভাবটা ঠিক বড় জায়ের সমর্থক নয়, একঘেয়ে কাজ করতে করতে বাইরের হাওয়া একটু ভালই লাগে তার। নিভাননী যদি একটু গল্প-গাছা করতে জানে, মুখ বুজে খালি কাজ আর কাজ!

দরজা খুলেই সুকুমারী উল্লাসধ্বনি করে ওঠে, “ওমা কি আশ্চর্য, পূবের সূখ্যি কি পশ্চিমে উঠেছে আজ, না যার মুখ কখনও দেখি নি তার মুখ দেখে ঘুম থেকে উঠেছি?”

এ হেন সংলাপে নিভাননীরও ব্যাজার মুখ কৌতূহলে সরস হয়, সে মুখ বাড়িয়ে বলে, “কে এলো গো, কার সঙ্গে এত রসের কথা?”

“এই যে ডুমুরের ফুল, ঠাকুরঝি।” বলে সুকুমারী তাড়াতাড়ি ননদের পা ধোবার জল আনতে ছোট্টে। ভুবনেশ্বরী মুখের ঘোমটা নামিয়ে দাওয়ায় বসে পড়ে ধুলো পা ঝুলিয়ে। ভান্ডরের কড়া রোদে তার কর্না মুখটা লাল-টকটকে হয়ে উঠেছে, ঘোমটা দেওয়ার দরুন চুলের গোড়ায় আর গলার খাঁজে ঘাম গড়াচ্ছে।

এমন করে ভররোদে হেঁটে আসা ভুবনেশ্বরীর পক্ষে সত্যিই অভাবনীয় ঘটনা। একে তো আসাই তার কম, তাছাড়া যদি আসার বাসনা প্রকাশ করে, পালকি করে পাঠিয়ে দেন রামকালী। যদিও এর জন্যে বাড়ির আর পাঁচজন ঠেস-টিটকারি দিতে ছাড়ে না, পাড়ার সমবয়সী বৌরা বলে ‘বাদশার বেগম’, তবু রামকালীর নির্দেশ মেনে চলতেই হয়।

কিন্তু আজ ব্যাপারটা কি?

পা ধোবার জল আর গামছা এগিয়ে দিয়ে একখানা ঝালর-বসানো হাতপাখা নিয়ে ননদকে বাতাস করতে থাকে সুকুমারী। একে তো গুরুজন, তায় আবার বড়লোকের ঘরনী।

“কার সঙ্গে এলে?” নিভাননী প্রশ্ন করে।

ভুবনেশ্বরী কিন্তু সে কথার উত্তরের আগেই বলে ওঠে, “পাখায় ঝালর বসিয়েছে কে গো?”

“কে আবার, ছোটগিল্লি!” নিভাননী অগ্রাহ্যে মুখ বাঁকিয়ে বলে, “রাতদিন যিনি সংসারের সর্ব্বতাতে বাহার কাটছেন!”

সুকুমারীর মুখটা চুন হয়ে যায়, ভুবনেশ্বরী তাড়াতাড়ি বলে, “তা বাহার কাটা তো ভালই, কেমন খাসা দেখাচ্ছে!”

“হোক গে”, নিভাননী আর একবার মুখ বাঁকায়, “এখন অবধি তো গাই দোয়াতে শিখল না, কুলো পাছড়াতে পারল না। টেকিশালে গিয়ে যা রঙ্গ, যদি দেখ তো বুঝবে। না পারে ‘পাড়’ দিতে, না পারে হাতে হাতে নেড়ে দিতে, পাড়াপড়শীকে তোয়াজ করে ডেকে এনে কাজ উদ্ধার করতে হয়। আসল কাজ চুলোয় দিয়ে ভাঁড়ারের হাঁড়ি-কলসীর গায়ে চিড়ির কেটে, শিকের দড়িতে কড়ির থোপনা গেঁথে, আর পাখার ঘাড়ে শালুর ঝালর ঝুলিয়ে পেরেকের সগুণের সিঁড়ি হবে!”

ভুবনেশ্বরী দেখে হিতে বিপরীত, এই স্ত্রী ধরে নিভাননী আরও কোথায় গিয়ে পৌঁছবে কে জানে! তা হলে তো আসল কাজই মাটি ছোট ভাজকেই যে আজ তার দরকার। তবু ভুবনেশ্বরী আবার একটা ভুল চালই করে বসে। বসে এইজন্যেই যে নিচুতলাদের নিন্দাবাদ করে ওপরওয়ালাদের প্রশ্ন রাখার যে চিক্কুন কৌশল, সে কৌশলটা তার ভাল আয়ত্তে নেই বলেই। নিজের বাড়িতে তো সেই ভয়ে সে কথাই কয় না সহজে। দেখে ঘোমটা আর নীরবতা অনেক বিপদের রক্ষক। কিন্তু এটা নাকি ভুবনেশ্বরীর বাপের বাড়ি, তাই সাহসে ভর করে বলে বসে, “কেন বাপু, এই তো বেশ ভাল ভাজছে। মুড়ি ভাজতেও পারে। অত বড় একখানা শহরের মেয়ে, আর কত পারবে?”

“তা বটে!” নিভাননী একটি উত্তপ্ত নিঃশ্বাস ফেলে বলে, “শহর কখনও চোখে দেখিনি, তার মশও জানি নে। ঘর-সংসারই বুঝি, আর বুঝি মেয়েমানুষের সেখানে হেরে গেলে লজ্জায় মাথা কাটা যায়... বসো একটু, গুড়ের পানা করে আনি, রোদে এসেছ।”

রোদের সময় ঘরে কিছু না থাক, আখের গুড় জলে গুলে তাতে পাতিলেবুর রস মিশিয়ে খাওয়ার রেওয়াজ এদিকে আছে, নিভাননীর মগজে সেই সহজটাই আসে। কিন্তু সুকুমারীর ওই গুড়ের পানা জিনিসটায় বিষম বিতৃষ্ণা, তাই সে বড়জায়ের ওপর কথা-কওয়া-রূপ অসমসাহসিক কাজটাও করে বসে ননদের প্রতি সমীহে। সসংকোচে বলে ফেলে, “কেন দিদি, মিছরি নারকেল’ গাছের ডাব তো পাড়ানো রয়েছে ঘরে!”

রয়েছে সেটা নিভাননীর মনে ছিল না, কিন্তু মনে পড়িয়ে দেওয়ার অপদস্থের একশেষ হয়ে যায় সে। কে জানে ননদ মনে করল কিনা, ইচ্ছে করেই ডাবের কথাটা বিস্মৃত হয়েছে সে। এই ছোট বৌটা দেখতে ভালমানুষ হলে কি হবে, টিপে ডান। কিন্তু এক্ষেত্রে নিভাননীকে মনের রাগ মনে চেপে হাসতেই হয়। হেসে বলতেই হয়, “অই দেখ, ভাগ্যিস মনে করলি ছোটবৌ! আমার অমনিতর ভুলো মনই হয়েছে আজকাল, বুঝলে ঠাকুরঝি! ঠাকুর-জামাইয়ের কাছ থেকে এবার একটা সিঁতিশক্তির গুথু খেতে হবে। ... যা তবে ছোটবৌ, দুটো ডাব কেটে আন গে।”

“আহা, কেন ব্যস্ত হচ্ছ বড়বৌ?” ভুবনেশ্বরী অকারণে গলা নামিয়ে বলে, “আমি এসেছি বিশেষ একটা দরকারে পড়ে, এখন চলে যেতে হবে।”

“ওমা শোন কথা! এখুনি চলে যেতে হবে কি গো? কি এমন বিশেষ দরকার পড়ল? এলেই বা কার সঙ্গে, যাবেই বা কার সঙ্গে? একা নাকি?”

“একা?” ভুবনেশ্বরী হেসে ওঠে, “সে আর এ কাঠামোয় হবে না। এসেছি পিসশাওড়ির সঙ্গে। দুয়োর থেকে আমাকে ছেড়ে দিয়ে গেলেন, আবার ফিরতি মুখে ডেকে নিয়ে যাবেন। চুপিসারে চলে এসেছি, ঘরে কেউ জানে না।”

“ঠাকুরজামাই?” নিভাননী রহস্যের হাসি হাসে।

ভুবনেশ্বরী নিভাননীর ঠাকুরজামাইয়ের প্রসঙ্গেই মাথার কাপড়টা একটু টেনে বলে, “তিনি তো ভিন্ গায়ে গেছেন রুগী দেখতে, নইলে আর এত বুকের পাটা! নিতান্ত কারে পড়েই আসা। পিসশাওড়ী সইয়ের বাড়ি আসছেন শুনে খুব কাকুতি করলাম, বলি, ‘ওই পথ দিয়েই তো যাবে পিসীমা!’ তা সেদিকে ভাল আছেন মানুষটা, কেউ শরণ নিলে তাকে বুক দিয়ে আগলান।”

“তা কাজটা কি?”

এবার ভুবনেশ্বরী খতমত খায়, কাজটা কি সেটা নিভাননীর সামনে বলা সঙ্গত কিনা এতক্ষণে খেয়াল হয়। আসলে এসেছে সে সুকুমারীর কাছে একখণ্ড লেখা কাগজ নিয়ে, যে কাগজের হিজিবিজি রেখাগুলো এক দুর্বোধ্য জুকুটি হেনে তার দিকে ক্রমাগত তাকিয়ে আছে আজ কদিন থেকে।

সত্যবতীর লেখা একখণ্ড কাগজ।

জিনিসটা ভুবনেশ্বরীকে ভাবিয়ে তুলেছে। ঘরের কোণে ঘাড় গুঁজে লিখছিল সত্যবতী, হঠাৎ বুদ্ধি দালানে কুমোর এল এই বার্তা পেয়ে ছুটে চলে গিয়েছিল নেড়ু পুণি আরও কুচোকাচাদের সঙ্গে, কাগজখানা চৌকিতে পাতা শেতলপাটির তলায় গুঁজে রেখে। ভুবনেশ্বরী কৌতূহলপরবশ হয়ে পাটিটি ঈষৎ উঁচু করে তুলে দেখতে গিয়েছিল কেমন আখর সত্তার হাতের কিন্তু দেখতে গিয়েই স্তম্ভিত হয়ে গেল, গোটা গোটা আখরে ঠিক পদ্যর ছাঁদে এ কি লিখছিল সত্য?

নকল করছিল?

কিন্তু নকল করবে যদি তো সামনে বই খোলা কই? সর্বনেশে মেয়ে নিজেই পয়ার বাধছে নাকি? ভয়ে বুকের রক্ত হিম হয়ে গিয়েছিল ভুবনেশ্বরীর, কিন্তু কাকে দেখিয়ে রহস্যের মীমাংসা হবে? রামকালীকে তার বড় ভয়।

রাসুলকে বলতে গেলে পাঁচকান হবার সম্ভাবনা। তাছাড়া বাড়িতে আর যারা লিখন-পঠনক্ষম, সকলেই তো ভুবনেশ্বরীর স্বভাব ভাসুর, ভেবে আর কুলকিনারা পাচ্ছিল না বেচার। তারপর সহসাই মনে পড়ল সুকুমারীর কথা।

সুকুমারী পড়তে জানে।

বামালটা সরিয়ে ফেলে সুকুমারীর কাছে আসার ভাল খুঁজছিল সে দু-তিন দিন থেকে। আড়চোখে দেখেছে, সত্য কখন একসময় শেতলপাটি উল্টে লওভও করে বোজাখুঁজি করেছে, আবার ‘ধুত্তোর’ বলে নতুন কাগজ নিয়ে বসেছে! সে কাগজে আর কোন রহস্যের রেখা একেছে সত্য, সে কথা ভুবনেশ্বরীর অজ্ঞাত, জিজ্ঞেস করতে গেলে সত্য মারমুখী হয়। বাড়ির লোকের জ্বালায় যে একদণ্ড নিরিবিলিতে বসবার জো নেই তার, এ কথা স্পষ্ট গলায় ঘোষণা করতে বাধে না সত্যবতীর।

অতএব এই টুকরোটুকুই ভরসা।

ঘাড় গুঁজে গুঁজে কি এত লেখে সে জানবার জন্যে মায়ের মন নানা কারণেই ব্যাকুল হয়। ব্যাকুল হয় কৌতূহলে, ব্যাকুল হয় আশঙ্কায়।

সতাকে যে স্বভাববাড়ি যেতে হবে!

হায়, সত্য যদি ভুবনেশ্বরীর মেয়ে না হয়ে ছেলে হত! বাপের উপযুক্তই হত। কিন্তু ভুবনেশ্বরীর কপালে ‘এক তরকারি নুনে বিষ’। একটা সন্তান, তা মেয়ে!

“কি গো ঠাকুরঝি, বাক্য-ওক্য নেই কেন?”

নিভাননী অবাক হয়। এত কুণ্ডা কিসের?

গরীব নন্দন নয় যে আশঙ্কা করবে ধার চাইতে এসেছে ভাজের কাছে।

আর চেপে রাখা চলে না, ঢোক গিলে বলতেই হয় ভুবনেশ্বরীকে— “এসেছিলাম ছোট বৌয়ের কাছে, একটা কাগজ পড়ানোর দরকার ছিল।”

“কাগজ!” নিভাননী আকাশ থেকে পড়ে, “কাগজ কিসের? কোন পাঠ্য কোবালা নাকি?”

“না না, ওমা সে কি? সে সব আমি কোথায় পাব? এ ইয়ে—একটু চিঠির মতন।”

“চিঠির মতন! সেটা আবার কি বস্তু ঠাকুরঝি? আর সে পড়ানোর লোক তোমার বাড়ি হাঁটকে একটা পুস্তক বেটোছেলে কাউকে পেলে না, সাতপাড়া ডিঙিয়ে একটা মেয়েমাগীর কাছে পড়তে এলে? কিছু গোপন বুঝি?”

সুকুমারী গিয়েছে ডাব কাটতে। ভুবনেশ্বরী অসহায় ভাবে একবার এদিক ওদিক তাকিয়ে সহসাই দ্বিধা ঝেড়ে ফেলে বলে, “কি যে বলো বড়বৌ, গোপন আবার কি? এই সত্যর একটু লেখা। বলি অষ্টপ্রহর কি এত লেখে বসে দেখি তো! বাড়িতে কাউকে দেখালে রসাতল করবে তো মেয়ে!”

নিভাননীর কানে আসতে বাকী ছিল না—সত্য লেখাপড়া করছে, তবু অজ্ঞের ভানে বলে, “বল কি ঠাকুরঝি, সত্যও কি তার ছোটমামীর মতন লেখাপড়া করছে? কালে কালে হল কি? বলি মেয়ে কি তোমার শামলা এঁটে কাছারী যাবে? সবাই তো তোমার ভাইদের মতন ভালমানুষ নয় যে, যা ইচ্ছে তাই চলে যাবে, শ্বশুররা এ খবর টের পেলে?”

“কি করব বড়বৌ, জানোই তো তোমাদের মনদাইকে কেমন একজেন্দা? মেয়ে বললে পড়ব তো পড়ুক। মেয়ে আকাশের চাঁদ চাইলে চাঁদ পেড়ে আনতে যাবেন এমন মানুষ। তাই তো ভাবলাম, কি লেখে বসে দেখি! ছেলেরুদ্ধি!”

বড় একটা পাথরবাটিতে ডাবের জল নিয়ে এসে দাঁড়াল সুকুমারী।

“ও বাবা কত! এত পারব না ছোটবৌ, তুমি একটু ঢেলে নাও।” বলে ভুবনেশ্বরী।

“খাও না, রোদে এসেছ।”

“তা হোক, অতটা নয় বাপু।”

অগত্যাই খানিকটা ঢালাঢালি করতে হল সুকুমারীকে। ভুবনেশ্বরী ইতাবসরে ব্যাপারটাকে লঘুর পর্যায়ে ফেলবার বুদ্ধিটা এঁচে নিয়েছে, তাই ডাবের জলে চুমুক দিতে দিতে ঝট করে বাঁ হাতের মুঠো থেকে কাগজের টুকরোটো এগিয়ে দিয়ে বলে, “এই নাও বিদ্যোবতী বৌ, পড় দিকিন এটা! আমরা তো চোখ থাকতে অন্ধ!”

“জনা জনা যেন অন্ধই থাকি বাবা—” নিভাননী বিষমুখে বলে, “যে জাতের দশহাত কাপড়ে কাছা নেই, তাদের আবার এত চোখ-কান ফোটান দরকার কি?” বলে, কিন্তু জিনিসটার ওপর এমন ভাবে হুমড়ে পড়ে, দেখে মনে হয় চোখ-কান থাকলে মুহুর্তে গ্রাস করে ফেলত। ভুবনেশ্বরী যাই বলুক, জিনিসটায় যেন রহস্যের গন্ধ।

সুকুমারী কাগজখানা উল্টে-পাল্টে বলে, “কি এ কৌতূহলের হাসি হাসে ভুবনেশ্বরী।

“কি তা আমি বলব কেন? তুমি বলো?” কৌতূহলের হাসি হাসে ভুবনেশ্বরী।

“একটা তো ত্রিপদী ছন্দের দেবীবন্দনা দেখছি, কার লেখা? খুব ভাল হাতের লেখা তো?”

“ত্রিপদী ছন্দ” শব্দটা বুদ্ধিগ্রাহ্য নয়, কিন্তু ‘দেবীবন্দনা’ কথাটার অর্থ জানা, তাই ভুবনেশ্বরীর বুক থেকে যেন একটা পাহাড় নেমে যায়, তবু জিনিসটা দোষণীয় নয়!

“পড় তো শুনি?”

সুকুমারী একটু শঙ্কিত দৃষ্টিতে বড়জায়ের দিকে তাকায়। নিভাননীর সামনে পড়া? তিনি এটাকে কোন্ আলোয় নেবেন? গুরুজনের প্রতি অসম্মাননা? কিন্তু নিভাবননীই অভয় দেয়, “নাও, পড়ই শুনি। হাবা কালো কানা অন্ধদের জ্ঞান দাও।”

অতএব সুকুমারী একটু কেশে একটু ইতস্তত করে পড়ে—

“এসো মা জননী

দুর্গে ত্রিনয়নী,

এসো এসো শিবজায়া,

সন্তানের ঘরে

এসো দয়া করে,

মহেশ্বরী মহামায়া।

তোমারে হেরিতে

আশাভরা চিতে

রয়েছি আকুল হয়ে,

আসিবে মা তুমি

এই মর্ত্যভূমি,

পুত্র কন্যা সাথে লয়ে।

একটি বৎসর

শূন্য আছে ঘর

দুগুণে আছি নিরবধি,

দিবস রজনী

কাটে দিন গুনি,

কবে দিন দেবে—”

“ওমা এ কি, শেষ নেই যে?” সুকুমারী অবাক হয়ে বলে, “এ স্তোত্রর কোথায় পেলো ঠাকুরঝি?”

“আর বল কেন?” ভুবনেশ্বরী কুণ্ঠা দমন করতে হাতপাখাখানা তুলে জোরে জোরে নাড়তে নাড়তে বলে, “সত্যর কীত্তি। লিখছিল—কুমোর এসে কাঠামো বাঁধছে শুনে ফেলে দিয়ে ছুটে গেল। আমি কুড়িয়ে তুলে—”

“তা নকল করেছে কোথ থেকে ?”

সকৌতূহল প্রশ্ন করে সুকুমারী।

“নকল করেছে তা মনে হল না ছোটবৌ,” ভুবনেশ্বরী যাকে বলে, “দোনামোনা’ সেই সুরে বলে, “ও মুখপুড়ী নির্যাস নিজেই বেঁধেছে।”

“কি যে বল ঠাকুরঝি”, সুকুমারীর কণ্ঠে অবিশ্বাস, “নিজে বাঁধবে কি ? অতটুকু মেয়ে এসব কথার মানে জানে ?”

“জানে না কি করে বলি বৌ, মুখপুড়ী নুকিয়ে নুকিয়ে তোমার ননদাইয়ের কবরের জী শাপ্তরের বইগুলো পর্যন্ত টেনে পড়তে বসে।”

“সে কথা আলাদা। পারুক না পারুক আশ্বা করে বসে কিন্তু ছন্দ বেঁধে আখর মিলিয়ে এত বড় স্তোত্রের তৈরি কি সোজা নাকি ?”

ছোটবৌয়ের এই অবিশ্বাসের সুর ভুবনেশ্বরীকে ঈষৎ ধতমত করছিল, কিন্তু মেঘ উড়িয়ে দিল নিভাননী, যে নিজে এতক্ষণ মুখে আষাঢ়ের মেঘ নামিয়ে ছোটজায়ের “অবলীলাক্রমে’র দিকে তাকিয়ে দিল। সুকুমারীর কথা শেষ হতেই হাত নেড়ে বলে উঠল নিভাননী, “তা এতে আশ্চর্য হবার কি আছে ছোটবৌ ? ঠাকুরঝি মনে বেদনা পাবে তাই রেখে-চেকে বলা, ঠাকুরঝির ওই মেয়েটিই কি সোজা ? কতদিন আগে ভোঁদার নামে ছড়া বাঁধে নি ও ? এ নয় মা-দুগ্‌গার নামে বেঁধেছে। তবে ভাবনার কথা বটে। ঠাকুর-জামাইয়ের দব্দবায় আমরা দশজনা নয় মুখে চাবি দিয়ে আছি, কিন্তু কুটুম তো তা মানবে না ? একবার টের পেলে—”

কথা শেষ হল না, মোক্ষদার হস্তদন্ত মূর্তি দেখা গেল খোলা দরজার সামনে। “চলে এস মেজবৌমা, ঝটপট চলে এস, ওদিকে এক কাণ্ড হয়েছে।”

কাণ্ড হয়েছে!

কী সেই কাণ্ড!

ভুবনেশ্বরীর মুখে কথা যোগায় না, হাঁ করে তাকিয়ে থাকে। সুকুমারী তো আগেই ঘোমটা টেনে বসেছে। তবে নিভাননীর কথা আলাদা, এ বাড়ির স্ত্রীর পদটা তার, এগিয়ে গিয়ে বলে, “কিসের কাণ্ড মাউইমা ?”

“আর বলা না বাছ। সইয়ের বাড়িতে ধসেছি কি না-বসেছি, রাখলা ছোড়া ‘রণপা’ নিয়ে গিয়ে হাজির। কি সমাচার ? না শীগগির চল, সত্যর স্বশুরবাড়ি থেকে লোক এসেছে। ভাগ্যিস দিদিকে বলে এসেছিলাম সইয়ের বাড়ি যাচ্ছি।”

নাঃ, মোক্ষদার কথা শেষ হতে পারে না, সহসা ভুবনেশ্বরী ডুকরে কেঁদে উঠেছে।

“ওমা ও কি। কাঁদছ কেন মেজবৌমা ? চল চল, অপিক্ষের সময় নেই।”

কিন্তু চলবে কে ?

ভুবনেশ্বরীর শুধু পা দুখানাই নয়, সমস্ত লোমকূপগুলো পর্যন্ত যে অবশ হয়ে গেছে।

সত্যর স্বশুরবাড়ি থেকে লোক!

অতএব আর সন্দেহ কি যে সমস্ত জানাজানি হয়ে গেছে! তা ছাড়া আর কি অর্থ থাকতে পারে এরকম বিনা নোটসে হঠাৎ স্বশুরবাড়ির লোক আসার ? কোথায় কে ঘরশব্দে বিতীর্ণণ আছে সে গিয়ে লাগিয়ে দিয়েছে সত্যর এই মারাত্মক অপরাধের আর সত্যর বাপের ওই উয়ানক দুগ্‌গাসহসের খবর। এর পর ? এর পর আর কি ভুবনেশ্বরী ভাবতে পারে না, শুধু ডুকরানোর মাত্রাটা বাড়িয়ে বলে ওঠে, “ওগো পিসীমা গো, তুমি আমাকে এখানে মেরে ফেলে রেখে যাও, বাড়ি অবধি যেতে পারবো না আমি।”

“আহা অধোয হচ্ছ কেন মেজবৌমা ?” মোক্ষদা দেহটাকে প্রায় উল্টোমুখে ঘুরিয়ে ব্যস্ত কণ্ঠে বললেন, “এখনকি অধোযের সময় ?” একুনি না যেতে পারো একটু সামলে নিয়ে ভেজের সঙ্গে যেও, আমি চললাম। পা তো আমারও কাঁপছে, কে জানে কী ব্রাত্ৰা নিজে এসেছে! তা বলে কোত্তব্য ত্যাগ করা চলে না। আঞ্জা, আমি এগোলাম।”

“রণপা’ ব্যতীতই রণপায়ের বেগে অদৃশ্য হয়ে যান মোক্ষদা।

ভুবনেশ্বরী যখন নিভাননীর সঙ্গে সন্তর্পণে খিড়কি দরজা দিয়ে ঢুকল, তখন বাড়ির চেহারা নিখর নিস্পন্দ।

যেন এইমাত্র কেউ একটা শোকসংবাদ পাঠিয়েছে।

তা হলে ?

নিভাননী ফিসফিস করে বলে, “বাড়ি এমন থমথমে কেন বল তো ঠাকুরঝি ? মন তো ভাল নিচ্ছে না। আর পোড়া মনের স্বপ্নই তো কু-কথা গাওয়া। জামাইয়ের কিছু দুঃসংবাদ নেই তো ?” আধমরা মানুষটাকে চৌদ আনা মেরে নিভাননী হুটচিল্পে উঠানে পা দিয়ে এদিক ওদিক তাকায়।

দালানে কারা যেন নিঃশব্দে জটলা করে বসে রয়েছে। ঘোমটা দিয়ে বোধ করি সারদা ঘোরাঘুরি করছে, ছোট ছেলেমেয়েগুলোর পাঞ্জা নেই।

“এসো ঠাকুরঝি উঠে এসো, নিয়তি যা করবে তা সইতেই হবে, এখন দেখি গে চল কার কি হল।”

নিভাননী নিজে বুঝতে পারুক না-পারুক, তার অবচেতন মনের একটা ফটোগ্রাফ নিতে পারলে সেখানে একটা প্রত্যাশার ছবি দেখতে পাওয়া যেত। জামাইটির ‘কিছু’ হলেই যেন প্রত্যাশাটি পূর্ণ হয়। ননদাইয়ের দন্দবা সেই গহন গভীরে যে একটি অনির্বাণ দাহ সৃষ্টি করে রেখেছে, সেটাও বুঝি কিষ্কিৎ শীতল হয় এমন একটা কিছু হলে।

ভুবনেশ্বরী কিন্তু দাওয়ায় উঠে দালানের চৌকাঠ পার হবার সাহস সঞ্চয় করতে পারে না, উঠানের পৈঠেতেই বসে পড়ে বলে, “আমার হাত পা উঠছে না বড়বৌ, তুমি দেখ গে।”

“শোন কথা ! তুমি এখানে এমন করে বসে থাকলে চলবে কেন ? ভীমের গদা বুক পড়লেও তো বুক পেতে নিতে হবে ঠাকুরঝি!” কণ্ঠস্বর সহানুভূতিতে কোমল হয়ে আসে নিভাননীর, “চল, আমি তোমায় আগলে দাঁড়াই গে।”

ভয় যতই তীব্র হোক, ভয়ের আকর্ষণটাও যে ততোধিক তীব্র। কাজে কাজেই উঠে পড়ে ভুবনেশ্বরী। আস্তে আস্তে দাওয়ায় উঠে দালানের কোণের দিকের একটা জানলায় উঁকি মারে। নিভাননী অবশ্য দরজায় পৌঁচেছে।

কিন্তু ব্যাপারটা কি হল ?

ভালমন্দের মত তো কিছু দেখাচ্ছে না। অন্তত সঙ্গার স্বপ্নরবাড়ি থেকে আগত হুটপুটাসী রমণীটির হিসেবে তো মনে হচ্ছে পুরোপুরি ভালই।

হয় কোনও দাসী, নচেৎ ‘নাপিতমেয়ে’, এ ছাড়া আর কে-ই বা আসবে ? যেই হোক, আপাতত তার আদরটা প্রায় মহারাণীর মত। ‘জল খাওয়া’তে বসানো হয়েছে তাঁকে, চারিদিকে ঘিরে বসে আছেন দীনতারিণী, কাশীশ্বরী, মোক্ষদা, শিবজামা, ছোটজেষ্টী, তা ছাড়া আশ্রিতা প্রতিপালিতার ঝাঁক। সকলের মুখের চেহারাতেই একটি স্তম্ভিত-বিনম্র সমীহ ভাব।

আর মধ্যমণিটির মুখচ্ছবিতে অহুঁসুধের দৃশ্য মহিমা। তাঁর সামনে কানাউঁচু বড়সড় পাথরের খোরা, তার মধ্যস্থলে মন্দিরাকৃতি শুকনো চিড়ের স্তূপ, পাশে একটি উঁচু কালো পাথরবাটি ভর্তি দই এবং সন্নিকটে একখানি আঙুট কলার পাতে স্থাপিত ছড়াখানেক চাটিম কলা, গগাচারেক দেদো মগা, একরাশ ফেনী বাতাসা এবং ক্ষীরের ছাঁচ, চন্দ্রপুলি, নারকেলনাড়ু, বেসননাড়ু ইত্যাদি বেশ একটা বড়গোছের সঙ্গার।

অর্থাৎ ঘরে সংসারে যত প্রকারের মিষ্ট বস্তু ছিল, সব কিছু দিয়ে তুষ্ট করার চেষ্টা চলছে কুটুমবাড়ির নাপতিনীকে।

হ্যাঁ, নাপতিনীই।

মালুম হয় দীনতারিণীর কথাতেই। নিতান্ত কাকুতিভরা কণ্ঠে বলছেন তিনি, “আর দুটোখানি চিড়ে দিই নাও নাপিত বেয়ান, আর বেয়ানই বা কেন, হিসেবে তো মেয়ে সুবাদ হচ্ছে, মেয়ে বলি। আর দুটো চিড়ে একেবারে মেখে জন্ম করে নাও মেয়ে, দইয়ে ভিজলে ও আর কটা ? সেই কোন ভোরে বেরিয়েছে। রোদে একেবারে মুখচোখ সিটিয়ে গেছে।”

ভুবনেশ্বরী বোধ করি বিহ্বলতার বশেই জানলা ছাড়তে ভুলে গিয়েছিল, নিম্পলক নেত্রে ঠায় তাকিয়েছিল সেই দেবমূর্তি আর তাঁর নৈবেদ্যের দিকে, হঠাৎ একসময় পিছনে একটা মৃদুকণ্ঠের আভাসে চমকে ফিরে তাকাল, পিছনে সারদা।

“এখানে দাঁড়িয়ে কেন মেজখুঁড়িমা ?”

“দাঁড়িয়ে কেন ? এমনি। ঘরে ঢুকতে পা উঠছে না। ও কেন এসেছে বড়বৌমা ?”

“কেন আর ?” সারদা অস্ফুট শ্রিয়মাণ গলায় বলে, “এসেছে মস্ত উদ্দেশ্য নিয়ে। বৌ নিয়ে যাবার বার্তা পাঠিয়েছেন তাঁরা। আশ্বিন পড়তেই নিয়ে যাবেন বলছে।”

“আশ্বিন পড়তেই! বলো কি বড়বৌমা! এই কদিন বাদ ?”

“তাই তো বলছে। একেবারে নাকি পুরকৃত দিয়ে ‘দিন’ দেখিয়ে পাঠিয়েছেন তাঁরা।”

কিছুক্ষণ স্তব্ধ থেকে ভুবনেশ্বরীর বুক ছিড়ে একটা প্রশ্ন ওঠে, “সত্য টের পেয়েছে ?”

“তা আর পায় নি ?”

“কি করছে ?”

“তা তো জানি না খুড়িমা। ভয়ে ভয়ে ঘরে গিয়ে সেঁধিয়েছে বোধ হয়!”

“আমি যে বাড়ি ছিলাম না—এটা কেউ টের পেয়েছে ?”

এবার সারদা একটু সত্য গোপন করে, “বলতে পারছি না মেজখুড়িমা, বোধ হয় পান নি কেউ। গোলেমালে ব্যস্ত আছেন সবাই।”

সত্য কথা বলা চলে না।

কারণ অনুপস্থিত ব্যক্তি সম্পর্কে যে ধরনের আলোচনা হয়, সেটা যথাযথ প্রকাশ করলে লাগিয়ে দেওয়া ভাঙিয়ে দেওয়ার পর্যায়ে পড়ে।

“ব্যস্ত থাকলেই বাঁচন” বুবনেশ্বরী আর একটা দীর্ঘশ্বাস-বাক্যে উচ্চারণ করে। “কিন্তু এখন হঠাৎ এ কি বিপদ বড়বৌমা!”

বড়বৌমা কিছু বলার আগেই নাপিত-মেয়ের মাজা-ঘষা চাঁচা গলাটি ধ্বনিত হয়, “বাপ বাড়ি নেই বলে মত দিতে ছুতো করছ কেন মাউইমা ? আমি তো আর আজই নে যাচ্ছি না! আমাকে এ মাসের কটা দিন এখানে থেকে একেবারে আধিনের তেসরা তারিখে নিয়ে যেতে বলেচে।”

॥ সতেরো ॥

জগতের সমস্ত বিশ্বয়কে কি একটিমাত্র প্রশ্নের মধ্যে প্রকাশ করা যায় ? সেই একটা প্রশ্নের মধ্যেই ধিক্কার দেওয়া যায় জগতের সর্বাপেক্ষা অসহনীয় ধুঁটতাকে ?

আরো কারও পক্ষে দেওয়া সম্ভব কিনা জানি না, কিন্তু দেখা গেল অন্তত একজনের পক্ষে তা সম্ভব হয়েছে!

বারুইপুরে বাঁয়ে-গিল্লীর একটিমাত্র ছোট প্রশ্নে ধ্বনিত হল বিশ্বের সমস্ত বিশ্বয় আর সমস্ত ধিক্কার-বাণী।

“পাঠাল না!”

“না।”

পথশ্রান্ত নাপিত-বৌ শুধু এই একটি শব্দ উচ্চারণ করে পা ছড়িয়ে বসল।

প্রথম বড় চেউয়ের পরবর্তী আর একটা ছোট চেউ।

“ভুই হার মেনে ফিরে এলি ?”

এবার বিশ্বয় আর ধিক্কারের পালা নাপিত-বৌয়ের, “শোনো কথা! তাদের মেয়ে, তারা পাঠালে না, আমি কি তাদের ঘর থেকে মেয়ে কেড়ে নিয়ে আসব ?”

এবার বাড়ুয়ে-গিল্লী নিজেই পা ছড়িয়ে বসলেন, দুই জু এক জায়গায় এনে জড়ো করার চেষ্টা করতে করতে বললেন, “ছুতোটা কী দেখাল ?”

“শোনো কথা! ছুতো আবার কিসের, সোজাসুজি মুখের ওপর ঝাড়া জবাব, “এখন পাঠাব না।”

নাপিত-বৌ আঁচল খুলে পানের কৌটো বার করে।

“এফুনি মুখে পান ভরিস নে নাপিত-বৌ, চোদ্দবার উঠবি পিক্ ফেলতে। আমার কথাগুলোর আগে উত্তর দে। বলি ছুতো যুক্তি কিছু না—শুধু পাঠাব না ?”

“এখন পাঠাব না।”

“তা কখন পাঠাবেন ? আমার ছেরান্দর সময় ? আমি যে ভেবে থই পাচ্ছি না রে নাপিত-বৌ, মেয়ের বাপের এত বড় বুকের পাটা! পৃথিবীতে এখনও চন্দ্র-সূর্যি উঠছে, না থেমে গেছে ? এ কথা ভেবে বুক কাঁপল না যে, তোর মেয়েকে যদি ত্যাগ দিই!”

নাপিত-বৌ নিষেধ অগ্রাহ্য করে মুখে পান-দোজা পুরে বলে, “বুক কাঁপবে! হুঁ! একটা কেন একশটা মেয়েকে ঘরে ঠাই দেবার, ভাত কাপড় দে’ পোষবার ক্ষমতা তাদের আছে! লক্ষ্মীমন্ডর ঘর বটে।”

“খুব বুদ্ধি গিলিয়েছে!” বাড়ুয়ে-গিল্লী দূরন্ত ক্রোধকে পরিহাসের ছদ্মবেশ পরিয়ে আসরে নামান, “তাই বেয়াইবাড়ির লক্ষ্মীর ঘটায় চোখ ঝলসেছে! বলি ঘরে ভাত থাকলেই মেয়ের স্বস্তরবাড়ির আশ্রয় ঘোচাতে হবে ? এত বড় আশ্পন্দার পর আর ওদের মেয়ে আনব আমি ?”



“খাওয়ার কথা তুলে খোঁটা দিও না বামুন-বৌদি, তোমাদের আশীর্বাদে নাপিত-বৌয়ের অমন খাওয়া ঢের জোটে। তবে হ্যাঁ, নজর আছে বটে। শুধু পয়সা থাকলেই হয় না, নজর থাকা চাই।”

কথাটা অর্থবহ এবং সে অর্থ বাঁড়ুয়ো-গিন্নির অন্তরে ছুঁচের মত গিয়ে বেঁধে, তবু তিনি নিজেকে সংযত করে বলেন, “তা নজরের পরিচয় কি দেখাল? বিশ ভরির চন্দরহার গড়িয়ে দিয়েছে তোকে, নাকি পঁচিশ ভরির গোট?”

“উপহাসিয়ার কিছু নেই, যা অনৈয্য তা বললে চলবে কেন? একজোড়া ফরাসড্যাঙার থান, একখানা কেটে খুঁটি আর নগদ পাঁচ টাকা কে দেয় গা কুটুমবাড়ির লোককে?”

“দেবে না কেন, যারা মেয়ে ঘরে আটকে রেখে দিতে চায়, তারা ঘুষ দিয়ে মুখ বন্ধ করে কুটুমের লোকের। নইলে তুই তাদের যাচ্ছেতাই শুনিয়ে দিয়ে না এসে সুখ্যত করছিস বসে বসে! তোর ওপর আমার ভরসা ছিল, এ তর্রাতে তোর মতন ‘মুখ’ তো কারুর দেখি না, আর তুই-ই ডোবালি? বাঘিনী হয়ে মেড়া বনে এলি?”

“কী যে তকরার করো বামুন-বৌদি, মেয়ের বাপ নিজে তফাতে দাঁড়িয়ে গিন্নীকে বলে দিল, “মা, কুটুমবাড়ির মেয়েকে বলে দাও, বিয়ের সময় কথা হয়েছিল মেয়ের কুমারীকাল পুণ্য না হলে শ্বশুরবাড়ি পাঠানো হবে না, সে কথা তারা হয়ত বিশ্বরণ হয়ে গেছেন, আমি তো হই নি। সময় হলে যাবে বৈকি!”

বাঁড়ুয়ো-গিন্নী বিবাহকালের শর্ত উল্লেখে ধেই ধেই করে ওঠেন, “কী বললি নাপিত-বৌ, বিয়ের কালের শত-সাবুদের কথা তুলেছে? কথা অমন কত হয়—বলে লাখ কথা নইলে বিয়ে হয় না—বলি তাঁদের চরণে খত লিখে দিয়েছিল কেউ? আমার ঘরের বৌ আমার যদি আনতে ইচ্ছে হয়! আচ্ছা আমিও দেখছি কত তাদের আসুপন্দা, কত তাদের তেজ! মেয়েকে শুধু ভাত-কাপড় দিলেই যদি সব মিটে যেত, তা হলে আর কেউ তাকে বিয়ে দিয়ে পরগোস্তুর করে দিত না, বুঝলি নাপিত-বৌ? আসছে মাসেই বেটার আবার বিয়ে দেব আমি, এই তোকে বেসে রাখলাম।”

নাপিত-বৌ নিমকহারাম নয়। অনেক খেয়ে অনেক পেয়ে এসেছে, তাই বেজার মুখে বলে, “সে তোমাদের কথা তোমরা বুঝবে, বেয়াই তো পস্তর লিখে দিয়েছে বামুনদাদার নামে, ন্যাও রাখো।”

“তুই যে তাজ্জব করলি নাপিত-বৌ, এই কুদিনে তোকে তুক করল না গুণ করল লো! তাই ঘরশতুর বিভীষণ হলি! কেবল ওদের কোলে ঝোল টেনে কথা বলছিস! কই, পস্তর কোথা?”

“এই যে।” নাপিত-বৌ নিজের গামছাটির পুঁটলির গিট খোলে।

বাঁড়ুয়ো-গিন্নীর অবশ্য তৎপরতার অভাব নেই, তিনিও সঙ্গে সঙ্গে পুঁটলির মধ্যে শোন-দৃষ্টি নিক্ষেপ করে বললেন, “কই, বড়মানুষ কুটুম কী দিয়েছে দেখি!”

একটি ছেঁড়া ন্যাকড়ার পুঁটলি খুলে একখানি দোমড়ানো মোচড়ানো চিঠি বার করে মাটিতে নামিয়ে দিয়ে নাপিত-বৌ প্রাণ সম্পদ দেখায়, “এই কেটে, এই কাপড়ের জোড়া, এই গামছা, আর—”

“ও বাবা, আবার নতুন ঘটি কাঁসি দিয়েছে যে দেখছি!” বাঁড়ুয়ো-গিন্নী বলেন, “সাধে কি আর বলছি ঘুষ দিয়েছে! তা নাকুর বদলে নক্ষণ নিয়ে ফিরলি তুই! কাঁসিখানা তো দেখছি ভারী পাথরকুচি!”

“তা ভারী আছে। আর কথাবার্তাও ভাল। বাড়িসুদ্ধ গিন্নীরা যেন আমায় হাতে রাখে কি মাথায় রাখে! সে তুমি যাই বলো বামুন-বৌদি, কুটুম তোমার খুব ভাল হয়েছে। অমন কুটুমের সঙ্গে অস্‌সরস করলে তুমিই ঠকবে। তবে গিয়ে বৌ তোমার মিছে বলব না, একটু বাচাল।”

বাচাল!

সহসা যেন পাথরে পরিণত হলেন বাঁড়ুয়ো-গিন্নী।

“বাচাল! আর সে কথা এতক্ষণ বলছিস না তুই? হবেই তো, বাচাল হবে না? বাপের চালচলন তো বুঝতেই পারছি, পয়সার গরমে ধরাকে সরা দেখেন, মেয়েকে আসকারা দিয়ে ধিস্টী অবতার করে তুলেছেন আর কি! আমিও এলোকেশী বামনী, বাচাল বৌকে কেমন করে টিটু করতে হয় তা আমার জানা আছে!”

“তা আর জানা থাকবে না?” ঠোঁটকাটা নাপিত-বৌ বলে বসে, “আরও একটা মানুষের মেয়েকে ঘরে পুরে কী হলে রেখেছ তা তো আর কারু অজানা নেই। তা এই বৌকে আর তুমি টিটু করছ কখন, বেটার তো আবার বে দিচ্ছ!”

নাপিত-বৌয়ের কথায় এবার একটু ভয় খান বাঁড়ুয়ো-গিন্নী এলোকেশী। ও যা মুখফোড়, পাড়ায় পাড়ায় সমস্ত রটিয়ে বেড়াবে, হাতে হাড়ি ভাঙবে। বাঁড়ুয়োর বৌ আনতে পাঠিয়েছিল, বড়মানুষ বেহাই মেয়ে পাঠায় নি, এ খবর রট্টে হলে কি আর মাথা হেঁট হবার কিছু বাকী থাকবে? নাপিত-

বৌকে চটানেটো ঠিক হয়নি চটায় না ওকে কেউ, চটাতে সাহসই করে না। সকলের হাঁড়ির খবর রাখে, সকল ঘরে যাতায়াত করে, আর সময়-অসময়ে নাপিত-বৌয়ের শরণ না নিলে কারুর চলে না। যেমন তেজী তেমনি বিশ্বাসী, আর তেমনি জোরমন্ত ডাকাবুকো। একটা মন্দজোরানের ধাক্কা ধরে নাপিত-বৌ। বৌ মেয়ের শ্বশুরবাড়ি বাপেরবাড়ি করতে নাপিত-বৌ এ গ্রামের ভরসা স্থল। চৈতন্য হয় সেটা এবার, তাই আর একবার দৈতো হাসি হাসেন বাঁড়ুয্যে গিন্ণী, “তবে আর কি, যা দেশ-রাজ্যে রপ্ত করে আয়, আমি আবার বিয়ে দিচ্ছি বেটার! মরণ আর কি, গা জুলে যায়! কিন্তু তুই-ই বল, রাগে মাথায় রক্ত চড়ে ওঠে কিনা। যাক বিশদ বৃত্তান্ত বল দিকি, তুই কি বললি, তারা কি বলল, মেয়েই বা—”

“সাতকাণ্ড ব্রাহ্মায়ণ গাইবার সময় এখন আমার নেই বামুন-বৌদি, দু দিন দু রাত পায়ের ওপর, সকাঙ্গ যেন ভেঙে আসছে। ঘরে যাই এখন।”

“ঘরে আর যাবি কেন”, বাঁড়ুয্যে-গিন্ণী নিশ্চিন্ত ভাবে বলেন, “এখানেই নয় দুটো—”

“না বাবা, ওতে আর দরকার নেই। কথায় বলে ‘ভাইয়ের ভাত ভেজের হাত’। ঘরে গে দু-দুও জিরোই, তারপর বোঝা যাবে।”

আরো নরম হতে হয়, আরো ভোয়াজ করতে হয়। শক্তের ভক্ত পৃথিবী।

“হ্যাঁলা, তা মাথায় বিষবাণ বিধে রেখে দিলি, উদ্ধার কর! মেয়ে কি বলল তাই বল? তুই কুটুমের বাড়ি থেকে গিয়েছিস, তোর সামনে কি বাচালতা করল?”

“করল কি আর গাছে চড়ল? তা নয়। তবে ঠাকুরমাদের সঙ্গে খুব হাত মুখ নেড়ে বক্তিরে করছিল দেখছিলাম। গিন্ণীর বলছিল, কুটুম চটানো ঠিক নয়, তোমার বেয়াইয়ের দুর্ব্বিকির নিন্দে করছিল, তা দেখি ঘরের মধ্যে ঝাঁজ দেখাচ্ছে, “বাবার কথার ওপর কথা! বাবার চাইতে তোমাদের বুদ্ধি বেশী! বেঁচ সময় যদি কথা হয়ে গেছল বারো বছর বয়েসী না হলে তারা বৌ নিয়ে যাবে না তো নিতে পাঠায় কোন্ আইনে”, এই সব!”

কিন্তু বাঁড়ুয্যে-গিন্ণীর তখন আর বাক্‌কুর্তির ক্ষমতা নেই। পুত্রবধুর বাক্‌বিন্যাস-প্রণালীর সংবাদে সে ক্ষমতা লোপ পেয়েছে তার।

কিছুক্ষণ গালে হাত দিয়ে স্তব্ধ হয়ে থেকে সন্নিঃস্থানে বলেন, “হ্যাঁলা বৌ, তুই তো আমাকে খুব উপহাস্য করলি বেটার আবার বে দেব বললি-বলে, তা তুই-ই নিজে মুখে স্বীকার কর, এ বৌ নিয়ে ঘর করা যাবে? বাবার জানো তো এমন কথা শুনি নি নাপিত-বৌ যে শ্বশুরঘরে যাওয়ার কথা নিয়ে ঘরবসতের বৌ কথা কয়, চিপটেন কাটো!”

“বাপের একটা তো, একটু বাপসোহাগী আছে। তা ও দোষ কি আর থাকবে? আপনিই যাবে। কথাতাই তো আছে গো—হলুদ জন্ম শিলে, চোর জন্ম কিলে, আর দুষ্ট মেয়ে জন্ম হয় শ্বশুরবাড়ি গেলে!”

“জানি নে মা, আমার তো ভয়ে পেটের মধ্যে হাত-পা সঁদিয়ে যাচ্ছে। বুড়ো বয়সে বেটার বৌয়ের হাতে কি খোয়ার আছে তা জানি না। আবার বে দেব আর কোথা থেকে! তোর বামুনদাদা যে বেয়াইয়ের বিষয়-সম্পত্তির ওপর টাঁক করে বসে আছে। বলে বাপের একটা মেয়ে, বাপ চোখ বুজলে সব মেয়ে-জামাইয়ের।”

“শোন কথা!” এবার গালে হাতের পালা নাপিত-বৌয়ের, ওই বিরিসিরি গুষ্টি, অমন সব সোনারচাঁদ ভাইপো রয়েছে, তারা পাবে না? তা ছাড়া ভাগভেন্ন তো নয়!”

“তা জানি নে বাপু, কস্তা বলে তাই শুনি। বলে বাপটা একবার চোখ বুজলে হয়!”

“কার চোখ আগে বোজে, কে কার বিষয় খায়, কে বলতে পারে বামুন-বৌদি! বেয়াইয়ের তো তোমার সোনার গৌরাঙ্গর মতন চেহারা, এখনো বে দিলে বে দেওয়া যায়! যাক গে বাবা, তোমাদের কথা তোমরা বোঝ, যাই, উঠি। বামুনদাদাকে পস্তরখানা দিও।”

নাপিত বৌ উঠতে যায়, আর সেই মুহূর্তেই বামুনদাদার আগমনবার্তা ঘোষণা করে খড়মের খট খট।

“এ কী, নাপিত-বৌ ফিরে এলি যে!”

প্রশ্নের সঙ্গে সঙ্গে বাইরের উঠানে থেকে ভিতর-উঠানে পা ফেলেন বাঁড়ুয্যে।

“ফিরে না এসে অকারণ আর কতদিন কুটুমের অন্ন ধরসাব! অবিশ্যি তারা অনেক বলছিল আর দশদিন থেকে—”

“তা তুই গিয়েছিলি কি করতে? বৌ কই?”

“পাঠাল না।”

বজ্রনির্ঘোষ ধ্বনিত হয় গৃহিণীর কণ্ঠ হতে।

“পাঠাল না।”

আর একবার প্রমাণিত হল, একটি প্রশ্নের মধ্যেই জগতের সমস্ত বিশ্বয় প্রকাশ করা সম্ভব হল। ছেলেকে খেতে বসিয়ে কথাটা পাড়লেন এলোকেশী। নাপিত-বৌ-নিষিদ্ধ অগ্নিধারা শরীরের মধ্যে পরিপাক করতে করতে বেগুনেরঙা হয়ে উঠেছিলেন তিনি, তাই ভাতের থালাটা ছেলের পাতের গোড়ায় ধরে দিয়ে যখন পিচ্ছিমের সলতেটা একটু বাড়িয়ে পা ছড়িয়ে বসলেন, মায়ের ভীষণাকৃতি মুখ দেখে বুকটা কেঁপে উঠল নবকুমারের।

নবকুমারের বয়স আঠারো-উনিশ হলেও মায়ের কাছে সে দুঃখপোষ্যের সমগোত্র। আর মা এবং যম তার মনের জগতে সমতুল্য। মা যখন মুখ ছোটায়, তখন ভয়ে নবকুমারের হাত-পা পেটের মধ্যে সঁদিয়ে যায়। যার উদ্দেশ্যেই সেই বহিস্রোত প্রবাহিত হোক, নবকুমার ভয়ে কাঁপে।

আজকের গালিগালাজের স্রোতটা আবার নবকুমারেরই শ্বশুরবাড়িকে কেন্দ্র করে, কাজেই খাওয়া আর হয় না বেচারার। ভয়ে লজ্জায় ঘাড়টা নিচু হতে হতে প্রায় থালার সঙ্গে ঠেকে আসে।

নাপিত-বৌ কুটুমবাড়ি যাওয়া পর্যন্ত মনের মধ্যে একটি পুলকের গুঞ্জরণ বইছিল নবকুমারের, ছড়ানো ছিটানো কথায় শুনতে পাচ্ছিল এলোকেশী নাকি বৌকে আনতে পাঠিয়েছেন।

কেমন সেই বৌ, কি তার নাম, কি রকম দেখতে, এসব লজ্জাকর চিন্তাকে কিছুতেই মন থেকে তাড়াতে পারছিল না নবকুমার। শয়নে স্বপনে একটি মুখচ্ছবি আবছা আবছা ছায়া ফেলে বাড়ির এখানে সেখানে এলোকেশীর কাছে কাছে ঘুরে বেড়াচ্ছিল, ঘোমটা টেনে টেনে।

শোবার ঘরে? অনবগুষ্ঠনে?

ওরে বাবা, অত দুঃসাহসী কল্পনার সাহস নবকুমারের নেই। সে ভাবনার ধারে-কাছে গেলেই বুক গুরগুর করে ওঠে তার। মার সামনে দাঁড়ালে তো কঁকুই নেই, আশঙ্কা হয় ছেলের মনের ভিতরটা কাঁচদীঘি'র জলের ভিতরটার মতই দেখতে পাচ্ছে এলোকেশী।

না, শোবার ঘরের এলাকায় কি নিজের ধারে-কাছে বৌয়ের উপস্থিতির অবস্থা চিন্তা করে না নবকুমার, করে শুধুই মায়ের ধারে-কাছেই।

নাপিত-বৌয়ের অভিযান কার্যকরী হবে না, এরকম অবিশ্বাস্য দুর্ঘটনার কথা তার স্বপ্নেও মনে আসে নি, তাই এই কদিন প্রতিদিন সন্ধ্যার পর ভবতোষ মাস্টারের কাছে ইংরেজি পড়া পড়ে বাড়ি ফিরে উৎকর্ণ হয়ে থাকে একটি মৃদু বুনবুন মলের শব্দের আশায়।

কিন্তু কই?

ক'দিনের কড়ারে গেছে নাপিত-বৌ, সে খবর নবকুমারের জানবার কথা নয়, তবু আশা করছিল পূজার আগে অবশ্যই। আর পূজার উৎসবের সঙ্গে হৃদয়ের আর এক উৎসবকে যুক্ত করে নিয়ে অবিরত বিহ্বল হচ্ছিল সে।

পূজা আসছে!

বৌ আসছে!

পূজোটা জানা, কিন্তু না-জানি কেমন সে বৌ!

বিয়ে হয়েছিল পনেরো পার হয়ে, এমন কিছু অজ্ঞানের বয়সে নয়, তবু লাজুক-প্রকৃতি নবকুমার বিয়ের কোন অনুষ্ঠানের সময়ই একটু চকিত দৃষ্টি নিষ্ক্ষেপ করেও কনে বৌকে দেখে নেবার চেষ্টা করে নি। এখন যদি কেউ বদলে অন্য মেয়ে গছিয়ে দেয়, ধরার সাধ্য হবে না নবকুমারের।

এমন কি এই কদিন ধরে শত চেষ্টাতেও বৌয়ের নামটা মনে আনতে পারছে না সে। এতদিন অবশ্য মনে আনবার খেয়ালও হয় নি, নাপিত-বৌয়ের অভিযানই সহসা নবকুমারকে এক ধাপ এগিয়ে নিয়ে গেছে। কৈশোর থেকে যৌবনের ধাপে।

বিয়ের সময় সম্প্রদানকালে নামটা তো দু-একবার উচ্চারিত হয়েছিল মনে হচ্ছে, কিন্তু কে তখন ভেবেছে এই নামটা মনে রাখবার দায়িত্ব তার! নবকুমার তো তখন অবিরাম ঘামছে!

ওই ঘামটাই মনে আছে, নাম-টাম নয়।

একে তো বিয়ের বর, তা ছাড়া শ্বশুরের সেই দৃশ্য উন্নত চেহারা, গম্ভীর স্বর আর রাশভারী ডাব। সেটাও সেই ভয়কে বাড়িয়ে দেওয়ার সহায়তা করেছিল।

তা ছাড়া বাসরঘরে আরও কত রকম ভয়।

সে ভয় এখনও বুঝি একটু একটু আছে।

কিন্তু 'বৌ' শব্দটি মিষ্টি। ভয়ের মধ্যেও রোমাঞ্চ।

‘কও না কথা মুখ তুলে বৌ,
দেখ না চেয়ে চোখ খুলে!’

মনের মধ্যে বাজছে সুর আর শব্দ। বন্ধুবান্ধবের সঙ্গে বৌয়ের আসন্ন আবির্ভাব নিয়ে আলোচনা করবার ক্ষমতাও নেই নবকুমারের। পাড়ার বন্ধু যারা খবরটা শুনেছিল তারা যদি একটু-আধটু ঠাট্টা করছে, “খেৎ, খেৎ” ছাড়া আর কোনও উত্তর দিতে পারছে না সে।

অথচ যখন ভবতোষ মাস্টারের কাছ থেকে পড়া সেরে সন্ধ্যায় কাঁচদীঘির নির্জন পাড় দিয়ে বাড়ি ফিরেছে তখন অনুচ্চারিত শব্দে বার বার ফিরিয়ে ফিরিয়ে গেয়েছে—

‘এনেছি বকুলমালা, করবে আলা
তেল-চোয়ানো তোর চুল!’

মিশি দাঁতের হাসিটি বেশ,
মুখখানি বেশ চলচলে!’

তারপর কি? তাই তো! ‘মুখখানি বেশ চলচলে, মুখখানি বেশ’—পরের লাইনটা কিছুতেই মনে পড়ে না, কোথা থেকে যে শিখেছিল তাও মনে পড়ে না। তবু ওই অসমাপ্ত গানটাই অপূর্ব সুরে গুঞ্জরিত হতে থাকে সমস্ত রাস্তাটা।

ক’দিনের প্রত্যাশার পর আজ বাড়ি ফিরেই এলোকেশীর প্রদত্ত সমাচারে বুকটা ছলাৎ করে উঠল। আর সেই বিয়ের দিনের মত ঘাম ছুটে গেল মুহূর্তের মধ্যে।

“নাপিত-বৌ এসেছে শুনেছিস?” বলে উঠলেন এলোকেশী।

বাঘিনীর মত বসেছিলেন দাওয়ার ধারে। ছেলে এসে পা-টা হাতটা ধোবে, এটুকু সময়ও দেরি সইল না তাঁর। দিয়ে বসলেন সংবাদ। অন্ধকারেই বলে বসলেন, আলোটাও আনলেন না ছেলের সামনে।

নবকুমারের কাছে অবশ্য এ সংবাদ অন্য অর্থ বুঝন করে এনেছে, তাই তার চিন্তে বিহ্বলতা। তাই মার বর্তমান অবস্থা ধরতে পারল না সে। ধনুতে পারল না কণ্ঠস্বরের ভীষণতাও। তাই না-জানা একটা সুখে শিউরে উঠল।

কিন্তু কতক্ষণের জন্যেই বা!

ক্ষণকালের মধ্যেই নিষ্ঠুর সত্য প্রকাশিত হল।

মান্যগণ্য বেহাইয়ের উদ্দেশে ‘ছোটলোক’, ‘চামার’, ‘আসপদাবাজ’ ইত্যাদি শোভন-সুন্দর বিশেষণমালা প্রয়োগ করে এলোকেশী জানালেন, “মেয়ে পাঠাল না।”

মেয়ে পাঠাল না!

এ কি অদ্ভুত বাণী!

মেয়ে না পাঠানো যে সম্ভব, সে কথা তো একবার মনের কোণেও আসে নি নবকুমারের!

কিন্তু এ কথায় আর কি কথা কইবে নবকুমার! আর উত্তরের প্রত্যাশা করেও কথা বলেন নি এলোকেশী।

আরও খানিকক্ষণ ধরে বেয়াইয়ের ‘পয়সার গরম’ তুলে, নাপিত-বৌকে ঘুষ দিয়ে ‘হাত করা’র বার্তা জানিয়ে, অবশেষে হঠাৎ আবিষ্কার করলেন এলোকেশী, ছেলেটা সেই অবধি উঠানেই দাঁড়িয়ে আছে কাঠ হয়ে।

মাতৃস্নেহ জেলে উঠল।

“আর দাঁড়িয়ে থেকে কি করবি, হাত-মুখ ধো!” বলে এলোকেশী উচ্চগ্রামে চিৎকার করলেন, “ভাত নেমেছে সদু?”

রান্নাঘর থেকে সাড়া এল, “নেমেছে মামীমা।”

“আয় মুখ ধুয়ে, ভাত দিই।” বলে রান্নাঘরের দিকে চলে গেলেন এলোকেশী। আর নবকুমার আস্তে আস্তে গায়ের কোটটা খুলে দেয়ালে লাগানো একটা গজালে টাঙিয়ে রেখে চলে গেল শিউকির পুকুরের দিকে।

হঠাৎ মনটা কেমন শিথিল আর ফাঁকা-ফাঁকা লাগছে। যা ছিল না, কোন দিনই যার স্বাদ জোটে নি, তেমন জিনিস হারালেও এমন শূন্যতা বোধ আসে? সব ফাঁকা-ফাঁকা ঠেকে?

কিন্তু তখনই বা হয়েছে কি!

আসল কথা পাড়লেন এলোকেশী ছেলেকে খেতে দিয়ে, পিদ্মিমের সলতে উসকে পা ছড়িয়ে বসে।

সে মুখ দেখে বুক কেঁপে উঠল নবকুমারের।

“আমি এই তোকে বলে রাখছি নবা, শেষবেশ একটা চিঠি চামারটাকে দেওয়াব কর্তাকে দিয়ে, তাতে যদি মেয়ে না পাঠায়, এই সামনের অঘাণেই তোর আবার বিয়ে দেব।”

আবার বিয়ে!

মা কি আজকে বুক ধড়াস ধড়াস করিয়েই মারবে নবকুমারকে?

আবার বিয়ে!

তার মানে আবার আর একবার নবকুমারকে নিয়ে সেই নকড়া-ছকড়া খেলা, আবার আর একটা বাড়িতে গিয়ে সেই স্পন্দান, সেই বাসর, সেই কানমলা, সেই ঘাম!

ঘাড়টা প্রায় পাতের সঙ্গে ঠেকে যায় নবকুমারের। মুখ দিয়ে কথাও বেরোয় না, মুখের মধ্যে ভাতের গ্রাসও ঢোকে না।

হঠাৎ একসময় কটুক্তি ধামিয়ে এলোকেশী বলেন, “খাচ্ছি কই?”

“খাচ্ছি তো!” এতক্ষণে অক্ষুটে একটা কথা বলে নবকুমার এবং বাক্যের সত্যতা রক্ষার্থে এক গ্রাস ভাত ঠেলেঠেসে মুখের মধ্যে চালান দেয়।

এবার সদু বা সৌদামিনীর রঙ্গমঞ্চে আবির্ভাব। মাটির সরায় একসরা ধোঁয়াওঠা গরম ভাত নিয়ে এসে অবাধ গলায় বলে উঠে সে, “ওমা, ই কি! যেখানকার ভাত সেখানে পড়ে! এতক্ষণ কি করলি রে নবু?”

“খাচ্ছি তো!” আরও একবার পূর্ব-কথা এবং পূর্বোক্ত কাজের পুনরাবৃত্তি করে নবকুমার।

“দিয়ে যাই আর দুটো?”

“না না, আর নয়।” ভরা মুখে হাত মুখ মাথা সব নেড়ে প্রতিবাদ জ্ঞাপন করে নবকুমার।

“খিদে নেই?”

নবকুমার আর একবার বলে, “খাচ্ছি তো।”

এদিকে ঠেলে-ওঠা চোখে জল আসতে চায়।

“খিদে আর থাকবে কোথা থেকে?” এলোকেশী বলে ওঠেন, “শ্বশুরের নিন্দে করেছি যে! একালের ছেলে তো! কিন্তু তোকে আবারও এই বলে রাখছি নবা, তোর দেমাকে-শ্বশুরের ওই খাড়া নাক যদি না ভুঁয়ে ঘষটে দিই তো আমি কি বলছি! বাপ বাপ বলে ওই মেয়ে ঘাড়ে করে নাকে খত্ব দিতে দিতে আসে তো ভাল, নচেৎ আবার ছাদনাতলায় গিয়ে দাঁড়াতে হবে তোকে। এবার আর নবাবের বেটী আনব না, গরীব-গুরবো শ্বশুরের মেয়ে নে আসব।”

“ওই শোন” সদু হেসে ওঠে, “আর মুখ গোঁজ করে থাকবার কিছু নেই রে নবু, আশ্বাস-বাক্য পেয়ে গেলি। এখন বড় বড় থাবায় খেয়ে নে। ...বৌ এল না বলে মনের দুঃখে নবু অমন সরলপুটির টকটাই ভাল করে খেল না, দেখছ মামী?”

“সব সময় ন্যাকরা করিস নে সদু,” এলোকেশী বেজার মুখে বলে, “চবিশ ঘণ্টা হাসি-মসকরা কার ভালও বা লাগে! প্রাণে কিসের যে এত উল্লাস তাও তো বুঝি না।”

কথাটা সত্যি।

উল্লাস আসবার কথা সদুর নয়।

তবু আসে।

তবু রং-তামাশা করে সদু, হি-হি করে হাসে। কিন্তু হাসি আসে কি করে সদু নিজেই কি জানে ছাই!

হয়তো এ জগতে একমাত্র ওইটুকুই ওর নিজের এজারো আছে বরে আনায়। দুর্ভাগ্যকে বুড়ো আঙুল দেখিয়ে হি-হি করে হেসে বেড়ায় সে বুকের পাথরখানা ঠেলে ফেলে দিতে।

অবিরত ওই পাথরখানা বুকে বইতে হলে কি ঘুরেফিরে আর অসুরের মত খেটে বেড়াতে পারত?

গাঁ-সুদ্ধ সবাই তো যিক্কার দেয় সদুর ভাগ্যকে, সবাই তো জানে সদুকে বরে নেয় না। অকারণ, শুধু খেয়ালের বশে সদুকে সদুর বর ত্যাগ করেছে। স্বভাবচরিত্র খারাপ তো অনেকেরই থাকে, পরিবারকে ত্যাগ আর কজন করে!

সদুর মা নেই, বাপ নেই, আজন্ম মামার বাড়ি মানুষ। মামা দু-তিনবার চেষ্টা করে করে শ্বশুরবাড়ি রেখে এসেছিল তাকে, কিন্তু কিছুতেই নিজের আসন দখল করতে পেরে উঠল না হতভাগা মেয়েটা। দুর্ভাবহারের চোটে পালিয়ে আসতে পথ পায় নি।

তদবধি আবার এই মামার বাড়িতেই স্থিতি ।

তা ছাড়া উপায় কি ?

মামার বাড়িতে আছে, দুবেলা হৈসেল ঠেলছে, জুতো-চণ্ডী সব নাড়ছে আর মামীর মুখনাড়া খাচ্ছে ।

তবু সে হাসে ।

বলিহারি!

বলিহারি যাই বাবা!— মামী বলে, পাড়াসুদ্ধ সবাই শুনে শুনে নবকুমারের এখন ধারণা হয়ে গেছে, হাসিটা সদুদির পক্ষে গর্হিত, তাই সে হাসিঠাট্টায় কোনও দিনই তেমন করে যোগ দিতে পারে না । আর আজকের কথা তো স্বতন্ত্রই । আজকের হাসি-ঠাট্টার বিষয়বস্তু তো নবকুমার নিজেই ।

‘দুখটা আনবি, না দাঁড়িয়ে রঙ্গ করবি ?’

ধমকে ওঠেন এলোকেশী ।

ছেলের কোলের গোড়ায় ভাতের খালাটি বসিয়ে দেওয়া ছাড়া আর বেশী নড়াচড়া করেন না এলোকেশী । দ্বিতীয়বার যা কিছু লাগে ‘সদু সদু’ হাঁক । মস্ত সুবিধে, সধু বিধবা পুষ্টি নয় । বিধবা হলে তো এক মহা ঝঞ্ঝাট—রাস্তিরে আঁশ হৈসেলের ভার দেওয়া যায় না । এক্ষেত্রে আর কোন দ্বিধা-দায় নেই । বড় বড় সরলপুটির টক সদু তো নিজেও একটু খাবে, অতএব কুটুক বাছুক রাঁধুক ।

কর্তা নীলাস্বর বাঁড়ুয়ার বয়স যাই হোক, রাতে ভাত খাওয়া ছেড়েছেন তিনি অনেক দিন । ঘরের গরুর খাটি দুধ দেড়সেরখানেককে মেরে আধসের করে সর পড়িয়ে রাখা হয়, তাতেই বাড়িতে ভাজা টাটকা খই ফেলে গোটা আষ্টেক মনোহরা মেখে আহার সারেন নীলাস্বর ।

সে সারা তাঁর সন্ধ্যাহ্নিক সেরে ওঠার সঙ্গে সঙ্গেই হয় । নবু মাষ্টারের কাছে পড়ে ফেরার আগাই । আবার তিনি যখন বেড়িয়ে ফেরেন, নবুর তখন অর্ধেক রাস্তির, কাজেই এ বেলায় বাপ-ছেলেতে দেখা হয় না । ছেলের যে এই এক বেয়াড়া খেলায় হয়েছে, ইংরিজি শিখবে! ওই স্নেহের ভাষা শিখে কি চতুর্ভুজ লাভ হবে কে জানে, তবু খুব একটা বাধাও দেন নি নবকুমারের স্নেহশীল পিতা । বলেছেন, ইচ্ছে হয়েছে পড়ুক!

আসল নষ্টের গোড়া তো ওই ভবতোষ ষ্ট্রিমসটা । কলকতা থেকে ইংরিজি শিখে এসে গাঁয়ে এখন ইস্কুল খোলা হয়েছে বাবুর । সকাপ-স্ট্রিকেল দুবেলা ইস্কুল বসায় । গাঁয়ের ছোঁড়াগুলোকে ক্ষ্যাপানোর গুরু । কানে মস্তুর দিচ্ছে, ইংরিজি না শিখলে নাকি উন্নতি নেই, শিখে কলকাতায় গিয়ে হাজির হতে পারলে সাহেবের অফিসে মোটা মাইনের চাকরি অবধারিত । ছুটেছে সবাই ওর ইস্কুলে চালাকের রাজা ভবতোষ ফাস্ট বুক, সেকেন বুক, কত সব শক্ত বই কিনে এনেছে কলকাতা থেকে, তাই থেকে পড়িয়ে পড়িয়ে বিদ্যে-দিগ্গজ করছে সবাইকে ।

বামুনের ঘরের ছেলেগুলো যাচ্ছে শুদ্ধুরের কাছে বিদ্যে নিতে! কলি পূর্ণ হতে আর কতই বা বাকি!

তবু ছেলেকে বাধা দেন নি নীলাস্বর, কলির তালেই চলেছেন । শুধু ওই স্নেহ-ভাষা-শিখে-আসা জামা-কাপড়গুলো ঘরে তোলে না, পরে কিছু ছোঁয় না, ছেড়ে হাত-পা ধুয়ে গঙ্গাজল স্পর্শ করে, এই পর্যন্ত ।

নবকুমারকে খাইয়ে মামী-ভাগ্নী দুজনে রান্নাঘরে বসে পড়ে খেতে । ওরা তো আর ভাত বেড়ে পিঁড়ি পেতে খাবে না, কাঁসি গামলা যাতে তাতে খেয়ে নেবে মাটিতে খেবড়ে বসে । তা এ সময় গল্পটা চলে ভাল । ফি হাত ধমক দিলেও ভাগ্নীকে নইলে চলেও না এলোকেশীর । কথা কইবার সঙ্গী বলতে দ্বিতীয় আর কে ?

খাওয়ার পর রান্নাঘর ধোয়ার ভার সৌদামিনীর ।

ঘর ধুয়ে পরদিনের জন্যে রান্নার কাঠ গুছিয়ে চকমকি ঠিক করে রেখে কাজ-করা কাপড় কেতে তবে শুতে যায় সদু । শোবার জন্যে তার নামে একটা ঘর আছে বটে, বিছানাও আছে বটে, কিন্তু সে ঘরে সে বিছানায় কতটুকুই বা শুতে পায় সে ? নীলাস্বর যতক্ষণ না আসেন এলোকেশীকে আগলাতে হয়, কারণ এলোকেশীর বড় ভূতের ভয় ।

নীলাস্বর আসার পর তাঁর জল চাই কিনা, তামাক চাই কিনা খোঁজখবর করে তবে সদুর ছুটি । তা সে ছুটিটা প্রায় রাতের আধখানা গড়িয়ে গিয়ে হয় ।

অবিশি তার পর বাকী রাতটা সদুকে কে আগলাবে, এ প্রশ্ন ওঠে না । সদু তো সদু! ওকে যদি এ নিয়ে আক্ষিপ প্রশ্ন করো, নিশ্চয় হেসে উঠে বলবে, “ভূতই আমায় আগলায় । জানো না—আমি যে শাকচূনী!”

তবু সদু মামীকে ভালোবেসে মামাকে উজিসমীহ করে, নবকুমারকে প্রাণতুল্য দেখে ।
তার এই বত্রিশ বছরের জীবনে ভালবাসার, উক্তি করবার, স্নেহ করবার জন্যে পেলই বা আর
কাকে ?

ভোরবেলাই ঘুমটা ভেঙে গেল ।

কারণ কিছু মনে নেই, তবু যেন মনে হল নবকুমারের, বুকটায় কী একটা পাষণ্ডতার চেপে
রয়েছে । যেন আস্ত একটা পাহাড়ই কেউ বুকের ওপর বসিয়ে দিয়েছে কোন ফাঁকে! রাত্রে ঘুমের
মধ্যেও ছিল যেন কি এক আতঙ্কের স্বপ্ন ।

একটুকুণ খোলা জানলার দিকে চেয়ে বসে থাকতে সব মনে পড়ল । মনে পড়ল মায়ের
শপথবাণী । মনে পড়ে হাত-পা ছেড়ে এল ।

ধীরে ধীরে উঠে পড়ল, বেরিয়ে এল ঘর থেকে কোঁচার খুঁটা গায়ে দিয়ে । ভোরের দিকে বেশ
শীত-শীত পড়ে গেছে । আর শরৎকালের সকালের এই গা-সিরসিরে হাওয়াটাই তো কোন উধাও
পাথারে মনটাকে ছুটিয়ে নিয়ে যায় ।

বাইরে এসে দেখল সৌদামিনী উঠানে ছড়াঝাঁট দিচ্ছে । কাছে গিয়ে বলল “মা ওঠে নি সদুদি ?”
মামী । সকালবেলাই হেসে গড়িয়ে পড়ে সৌদামিনী । মামি আবার এমন সময়ে কবে ওঠে রে
নবু? ভোর ঠাকুরের ‘সঙ্গে’ যে মামীর বিরোধী ।

খুচখুচ ঝাঁটা চালাতে চালাতে বলে সদু, “সরে দাঁড়া নবু, ধুলো লাগবে ।”
“লাগুক গে ।” বলে বরং কাছেই সরে এল নবকুমার, কাছে এসে হঠাৎ শীতকালে জলে ঝাঁপিয়ে
পড়ার ভঙ্গীতে বলে উঠল, “সদুদি, তুমি মাকে বলে দিও, ওসব পারব-টারব না ।”

ঝাঁট বন্ধ হল সৌদামিনীর!
চোখ গোল গোল করে বলল, “কি বলে দেব মামীকে ? পানি পানি না ?”
“ওই সব!” নবকুমার বলে ওঠে, “শুনলে তো কাল স্নিজের কানে, আবার শুধোচ্ছ কেন ?”

“নাঃ, তুই আমায় অথই জলে ফেললি নবু! কালকের দিনভোর কত কথাই তো শুনেছি, কোন্টা
তোর মনে গিখে আছে, তা কেমন করে বুঝব ?”
“আঃ, আচ্ছা জ্বালায় ফেললে তো! নাপিসির পিসির ব্যাপারে রেগে গিয়ে মা যা বলল মনে নেই
তোমার ?”

“ও হরি, তাই বল! তোর আবার স্নিয়ে দেবে, এই কথা তো ?” ফের সদুর সেই হি-হি হাসি,
“সেই চিন্তায় রাতভোর ঘুমুস নি বুঝি ? নাকি সেই ‘ঠাকুরঘরে কে, না আমি তো কলা খাই নি’
তাই ? মামী পাছে খ্রিতিজে বিশ্বরণ হয়ে যায় তাই ‘আমি পারব না’ ‘আমি করব না’ বলে স্বরণ
করিয়ে দিতে এসেছিস ?”

“আঃ সদুদি, ভাল হবে না বলছি । আমি এই তোমায় বলে রাখছি ওসব পারব না । আবার ওই
কানমলা-টানমলা—ওরে বাবা!”

সদু ফের হাতের কাজে মনোনিবেশ করে বলে, “তা আমায় বলে কি হবে ? মামীকে বল!”
“আমি বলব ? আমি বলব মাকে ?”

সদু হাসতে হাসতে বলে, “বলবি না কেন ? ডাগর হয়েছিস, সাহস হচ্ছে না ?”
“মার কাছে সাহস! হুঁ! এই তোমায় বলছি সদুদি, আমি তোমার কাছে বলে খালাস, যা বিহিত
করার তুমি করবে ।”

সৌদামিনী ফের হাত থামিয়ে বলে, “বেশ বলব মামীকে, নবুর আমাদের প্রথম পক্ষের ওপর
বড় আঁতের টান, ওকে ত্যাগ দিয়ে অন্যস্তর বিয়ে করবে না!”

“সদুদি ভাল হবে না বলছি! বলি, আবার এই সব ভুতুড়ে কাণ্ডের দরকার কি ? নাই বা পাঠাল
কেউ মেয়ে, পরে ঘরের মেয়ে নইলে বুঝি সংসার চলে না ?”

“কই আর চলে ?” সদু হাত মুখ নেড়ে বলে, “চললে আর এই আদি-অন্তকাল ধরে মানুষে ওই
সব ভুতুড়ে কাণ্ড করত না, বুঝলি রে নবু! এর পর ওই পরের মেয়েই জগতের সেরা আপন হবে ।”

“ছাই হবে!” বৌকের মাথায় বলে ফেলে নবকুমার, “কই, জামাইবাবুর তো হল না ।”
সদুর উচ্ছ্বাস কমে, একটু গম্ভীর হয়ে গিয়ে বলে, “ও-কথা বাদ দে । আমার মতন ছাই-পোরা-
কপাল যেন অতি বড় শত্রুরও না হয়!”

নবকুমার সদুর ভাবান্তরে ঈষৎ থতমত খেয়ে বলে, “আমি কিছু ভেবে বলি নি সদুদি । কিন্তু যা
বললাম, তোমাকে আমার রক্ষকণ্ডা হতে হবে!”

“বেশ বলব মামীকে, যা দেখেছি দু-ঘা ঝাঁটা আছে ললাটে।”

তা সদুর কথা মিথ্যা নয়। এলোকেশী সেই ব্যবস্থাই করেন।

তবে ললাটের ঝাঁটাটা দৃশ্যমান নয় এই যা। শব্দ অদৃশ্য। তবু এলোকেশী যখন কথার তুর্ভুড়ি ছোটান, মনে হয় তাঁর মুখ থেকে আগুনের হলকার মত দৃশ্যমানই কিছু বার হচ্ছে বুঝি!

শাক বাছতে বাছতে কথাটা পেড়েছিল সৌদামিনী, “ওগো মামী, তুমি তো বলছ ওরা পন্তরপাঠ-মাস্তুর মেয়ে না পাঠ্যালে তুমি ছেলের আবার বিয়ে দেবে, এদিকে ছেলে তো বেঁকে বসে আছে!”

“কী! কী বললি?”

মুহূর্তে অগ্নিকাণ্ড ঘটে গেল।

সদু কেন ভুলো না ভবিষ্যতি করে গাল দিয়ে ঘোষণা করলেন এলোকেশী, “যে আমার খেয়ে আমার পরে আমার সংসার ভাঙবার তাল খুঁজবে, তাকে ঝেঁটিয়ে দূর করে দেব তা এই বলে রাখছি সদু। আমার ছেলেকে কানে বিষ-মস্তুর দিয়ে পর করে নিতে চাস লক্ষ্মীছাড়ি! উঠুক তোরা মামা আফ্রিক করে, দেখাচ্ছি মজা!”

সদু প্রতিবাদও করে না, নিজের সাফাইও গায় না এবং এ প্রশ্নই তোলে না, তার অপরাধ কোথায়? এমন কি তার মুখ দেখে এই মনে হয়, এই বাক্যবাণের লক্ষ্য বুঝি তার অপরিচিত কেউ!

নীলাধর আফ্রিক সেরে উঠে বাইরে তামার কুশিতে সূর্যার্য নিবেদন করে কুশিটা মাটিতে উপুড় করে, আর এক দফা সূর্যপ্রণাম সেরে মুখ ফিরিয়ে দাঁড়াতেই এলোকেশী দুধকলা দিয়ে কালসাপ পোষার নজীর তুলে স্বামীকে অবহিত করিয়ে দিয়ে বলেন, “তুমি যদি এই দণ্ডে চিঠি লিখে রওনা করে না দেবে তো আমার মাথা খাবে।”

নীলাধর ‘আহা’ করে উঠে বলেন, “দিব্যি গালাগালির কি আছে। পত্র লিখছি, কিন্তু পাঠাবার কি হবে ভাই ভাবছি। নাপতে-বৌ-তো—”

“কেন গায়ে কি ও ভিন্ন আর মানুষ নেই? রাখাল তুমি গেলছ সেবার?”

“রাখাল যাবে? কিন্তু অতখানি পথ একেবারে একসা! তাই ভাবছি।”

“তা হলে গোবিন্দ আচার্য্যির ছেলে গোপনাকে পাঠাও। গাঁজার পয়সা দিলে রাজী হয়ে যাবে।”

“গোপনাকে কুটুমবাড়ি পাঠাব! কি বলছে কি বলে আসবে!”

“আসুক না।” এলোকেশী বীরদর্পে বলেন, “ওই গেঁজেলের কটুবাক্যিতে যদি মিন্‌সের চৈতন্য হয়! তার পর দেখি কেমন সোহাগিনী মেয়ে নিয়ে ঘরে বসে থাকতে পারে! গোপনাকে এও বলে দেবে, ওখানে আশেপাশে কুলীনের মেয়ের সন্ধান পায় কিনা দেখে আসতে। নাকের সামনে হলেই ভাল হয়।”

নীলাধর আর কথা বাড়ান না, কাগজ কলম নিয়ে বসেন। এবং অনেক মুসাবিদান্তে একখানি চিঠির খসড়া করেও ফেলেন।

তাতে এই কথাই বিশদ বোঝানো থাকে, রামকালী যদি পূর্ব জিদ্দ বজায় রাখতে চান, তাঁর কপালে অশেষ দুঃখ আছে। ছেলের তো আবার বিয়ে দেবেনই এঁরা, তা ছাড়া আরও যা করবেন ক্রমশ প্রকাশ্য। রীতিমত ভয় দেখানো চিঠি।

পত্রের ভাব ও ভাষায় এলোকেশী প্রীতিপ্রকাশ করেন। অতএব নীলাধর তৎপর হন পাঠাবার চেষ্টায়। কিন্তু মনে তাঁর দৃষ্টিস্তা, রামকালীর একমাস্তুর মেয়ে সত্যবতী! বেশী টান কষলে দড়ি না ছিঁড়ে যায়।

এত কথার কিছুই নবকুমার জানে না। সে স্থলে।

বেলায় যখন ফিরল, সদুর কাছে গিয়েই আগে দাঁড়াল। “সদুদি, তেল!”

সদু পলায় করে তেল এনে ওর হাতে দিয়ে বলে, “দেখলি তো, বললাম কাজ কিছু হবে না, শুধু আমার কপালে ঝাঁটা, তাই হল। তোর স্বস্তুরের মৃত্যুবাণ তৈরি, এতক্ষণে বোধ হয় পাঠানোও হয়ে গেল। যদি বা দুদিন দেরি হত, তোর অমত শুনে মামী একেবারে ধেই ধেই।”

হাতের তেল আঙুলের ফাঁক দিয়ে গড়িয়ে পড়ে, ফ্যালফ্যাল করে তাকিয়ে থাকে বেচারী নবকুমার।

সদু বোধ করি ওর মুখভঙ্গী দেখেই করুণাপরবশ হয়ে বলে, “যাক গে, তুই আর ও নিয়ে মন উচাটন করিস নে, দিতে হয় আর একবার টোপের মাথায় দিবি। কত আর কষ্ট! তোর একটা বৌ পেলেই হল। তবে মনে নিচ্ছে এবার তালুইমশাই নরম হবে, যতই হোক মেয়ের বাপ!”

হঠাৎ নবকুমার একটা বেখাপপা এবং অবাঞ্ছিত কথা বলে বসে, “সায়েরা শুধু একটা বিয়ে করে, ককখনো অনেক বিয়ে করে না।”

ব্যস, আর যায় কোথা!

সদুর হাসির ধুম পড়ে যায়। “ওমা, তাই নাকি? ও বুঝেছি, ওই সায়েরদের বই পড়ে তোরও সেই বুদ্ধি মাথায় ঢুকেছে! তা হ্যাঁরে নবু, সায়েররা যদি একটা বৈ বিয়ে করে না তো বাকী মেমগুলোর কী দশা হয়? বিধাতা পুরুষ যখন পৃথিবী ছিটি করেছিল, তখন একটা করে বেটাছেলে আর দেড়কুড়ি করে মেয়েমানুষ গড়েছিল, এ তো জানিস? তা হলেই বল, বাকীগুলোর গতি কে করবে, যদি একটা বৈ বিয়ে না করে—?”

“যত সব আজগুবী!” যদিও নবকুমার মার আড়ালে বেশ সশব্দেই কথা বলে, “পৃথিবী সুদ্ধ বেটাছেলে বুঝি দেড়কুড়ি করে—”

মুখের কথা মুখেই থাকে, রঙ্গস্থলে এলোকেশী দেখা দেন, “বলি নবা, চান করতে যেতে হবে কিনা? যখন দুটোয় এক হবে, অমনি হাসি-মস্করা। হ্যাঁলা সদি, তোকেও বলি, ও কি তোর সমবয়সী? তা তো না, রাতদিন কেবল কানে কুমন্তর দেওয়া! রোস, বৌ একটা আসুক না ঘরে, হাঁড়ি গলায় গেঁথে দেবার লোক হোক, তোকে একবারে ঝেঁটিয়ে বিদেয় করি।”

মাতৃ সন্নিধানে নবকুমারের সর্বদাই চোরের ভূমিকা। তাই সদুদির এই অপমানে তার প্রাণটা ছটফটিয়ে উঠলেও মুখ দিয়ে রা ফোটে না। কিন্তু আশ্চর্যের কথা এই, সদুর মুখের রেখায় কোনভাব-বৈলক্ষণ্য ফোটে না। সে যথাপূর্বং হাস্যবদনে নবুকে চোখ টিপে ইশারা করে, যার এই অর্থ হয় ‘যা নাইতে যা, মামী ক্ষেপেছে!’

হাতের তেল তেলো থেকে সবটাই গড়িয়ে গেছে, তেলালো হাতটাই শুধু মাথায় ঘষতে ঘষতে সোজা কাঁচদীঘিতে চলে যায় নবু। আজ আর যেন খিড়কি পুকুরে মন ওঠে না।

যেতে যেতে হঠাৎ সেই একদিন দেখা স্বপ্নের ওপর জ্বারী রাগ এসে যায় নবকুমারের। এত ঝামেলার কিছুই তো হত না, যদি সেই মেয়ে না কি পাঠাভক্তিনী!

বুকটায় শুধু পাষণভারই নয়, যেন কাঁটাও বিধেছে। দুঃ ছাই!

॥ স্মৃতিরো ॥



সপরিবার তুষ্টি গয়লা মাঠে এসে বুক চাপড়াচ্ছে আর পরিত্রাহি চেঁচাচ্ছে। তুষ্টির পরিবার জলে পড়ে কি আগুনে পড়ে এইভাবে লুটোপুটি খাচ্ছে এখান থেকে ওখান।

একরাশ লোক চারিদিকে ভিড় করে হা-হুতাশ করছে, আর কে কবে কোথায় ঠিক এই রকম অথবা এই ধরনের ব্যাপার দেখেছে তারই আলোচনায় বাতাস মুখর করে তুলেছে।

আশ্বিনের রোদে সর্দি-গর্মি হবার কথা নয়, কিন্তু সময়টা বড় কড়া। একেবারে ভরদুপুর বেলা। আর ভিজে পান্ত কটা পেটে ঢেলেই মাঠে-জঙ্গলে ঘোরা। মায়েরা তো এঁটে উঠতে পারে না ছেলেগুলোকে।

ছেলেটা তুষ্টি গয়লার নাতি রঘু। সমবয়সের দাবিতে নেভু কোম্পানির দলের একজন। আশ্বিনে আখের ক্ষেত রসে ভরভর, ছেলেগুলোর তাই দ্বিপ্রাহরিক খেলা আখ চুরি। উপকরণের মধ্যে একটুকরো ধারালো লোহার পাত। তার পর ক্ষেত থেকে আনার পর তো দাঁতই আছে।

দাঁত দিয়ে খোলা ছাড়িয়ে মাথাপ্রমাণ লম্বা লাঠিগুলো চিবিয়ে চিবিয়ে রসগ্রহণ করেছে সকলেই, হঠাৎ রঘুর যে কি হল! বুড়ো বটগাছটার তলায় যেখানে বসেছিল সবাই, সেখানেই ধুলো-জঙ্গালের ওপর শুয়ে পড়ল রঘু, যেন নেশাচ্ছল্লের মত।

ছেলেরা প্রথমটা খেয়াল করে নি, আগামী কাল আবার কখন অভিযান চালানো হবে সেই আলোচনাতেই তৎপর হয়ে উঠেছিল, চোখ পড়ল উঠে পড়বার সময়।

“কী রে রঘু, তুই যে দিব্যি ঘুম মারছিস?” বলল একজন হি-হি হাসির সঙ্গে ঠেলা মেরে। কিন্তু পরক্ষণেই হাসিমুখটা কেমন শুকিয়ে উঠল তার। রঘুর দেহটা যেন শক্ত কাঠমত, রঘুর ঠোঁটের কোণে ফেনা।

“এই, রঘুটার কি হয়েছে দেখ তো!”

“কি আবার হল ?” বেপরোয়া ছেলেগুলো রঘুর গায়ে হাত দিয়ে প্রথমটা হাসির ফোয়ারা ছোটাল, “দেখছিস চালাকি, কি রকম মটকা মেরে পড়ে আছে! এই রঘু, গায়ে কাঠপিপড়ে ছেড়ে দেব, ওই বলছি!”

গুধু গায়ে কাঠপিপড়ে নয়, কানে জল, পায়ে চিমটি ইত্যাদি করে ঘুম ভাঙ্গাবার সমস্ত প্রক্রিয়া শেষ করার পর বেদম ভয় ঢুকল ওদের। নিশ্চিত হল, এ ঘুম আর ভাঙবে না রঘুর, এ একেবারে ‘মরণ-ঘুম’। নইলে অমন হলদে রঙটা ওর এমন বেগুনে হয়ে উঠবে কেন ?

“চল পালাই।” বলল একজন।

“পালাব ? নেড়ু রুখে দাঁড়ায়।

“পালাব না তো নিজেরাও রঘুর সঙ্গে যমের দক্ষিণ দোরে যাব নাকি ? কর্তারা কেউ দেখলে আস্ত রাখবে আমাদের ?”

“যা বলেছিস। ভুল্টু ঠাকুরদা ওই দুই দুধের বাক দিয়ে মাথা ফাঁটিয়ে দেবে।”

“বাঃ, আমাদের কি দোষ ? আমরা কি মেরে ফেলেছি ?”

“তা কে মানবে ? বলবে তোদের সঙ্গে খেলছিল, তোরাই কিছু করেছিস। চল চল, কে কমনে দেখে ফেলেবে!”

নেড়ু ক্রুদ্ধকণ্ঠে বলে, “খুব ভাল কথা বলেছিস! বলি রঘু আমাদের বন্ধু না ? ওকে শ্যাল-কুকুরে খাবে, আর আমরা পালিয়ে প্রাণ বাঁচাব ?”

রঘু বন্ধু, এ কথা সকলের মনেই কাজ করছিল, কিন্তু ভয় কাজ করছিল তার চাইতে অনেক বেশী। কাজেই আর একজন বাস্তববাদী এবং ঈশ্বরবাদী বালক উদাসমুখে বলে, “ভগবান ওর কপালে যা লিখেছে তাই হবে। আমাদের কি সাধি যে খণ্ডাই!”

“আর রঘুর মা যখন বলবে, ‘তোদের সঙ্গে খেলতে গেছল রঘু, সে তো বাড়ি ফিরল না। কোথায় সে গেল বাবা ?’ তখন কি বলবি ?”

“বলব আজ রঘু আমাদের সঙ্গে খেলতে যায় নি।”

“মিছে কথা বলবি ?”

“তা কি করব ? বিপাকে পড়লে স্বয়ং নারায়ণও মিছে কথা বলে।”

“বলে! তোকে বলেছে!” নেড়ু তীব্রকণ্ঠে বলে ওঠে, “পাহারা দে তোরা ওকে, আমি দেখি গিয়ে মেজকাকা আছেন নাকি!”

“আর মেজকাকা! যমে ওকে গ্রাস করেছে রে নেড়ু!”

“তাতে মেজকাকা ডরায় না। জুটাদার বৌ তো মরে গেছল, বাঁচান নি ? কত লোককেই তো বাঁচান। আমি যাব আর আসব। তবে কপালক্রমে যদি দেখা না পাই, তাহলেই রঘুর আশায় জলাঞ্জলি।”

অগত্যা রঘুর বাস্তববাদী বন্ধুরা ‘য পলায়তি’ নীতি ত্যাগ করে রঘুর মৃতদেহ পাহারা দিতে সম্মত হল। মায়া কি তাদেরই করছিল না ? কিন্তু কি করবে ?

তারপর এই জ্বলন্ত আশুনের মত সংবাদটাই আশুনের মতই এখন থেকে ওখানে, এঘর থেকে ওঘর, দাঁউ দাঁউ করে জ্বালিয়ে দিয়ে গ্রামসুদ্ধ সবাইকে টেনে এনেছে এই বুড়ো বটতলায়।

তারপর চলছে জল্পনা-কল্পনা।

সর্দি-গর্মি ?

শরৎকালে ?

“তা হবে না কেন ? শরতের রোদই তো বিষতুল্য। গণেশ তেলির শালীর ছেলেটা সেবার ঠিক এই রকম করে—”

“আর জীবন স্যাকরার ভাইপোটা ?”

“নেপালের ভাগ্নীটাও তো—”

“আরে বাবা, সে এ নয়, সে অন্য ঘটনা!”

“আমার পিস্বুত্তরের দেশেও একবার কাদের নাকি বুড়ো বাপ ঘাট থেকে আসতে গিয়ে—”

সহসা সমুদ্র কল্লোলে স্তব্ধ হয়ে গেল।

কবরেজ মশাই আসছেন!

বাড়ি ছিলেন না, কোথা থেকে যেন ফিরেই শুনে পালকি করেই বুড়ো বটতলায় এসে হাজির হয়েছেন।

শায়িত বালকের দিকে তাকিয়েই চমকে উঠলেন রামকালী, চমকে বললেন, “কখন হয়েছে এ রকম ?”

নেড়ুর দিকে তাকিয়েই বললেন ।

নেড়ু সভয়ে ঘটনাটা বিবৃত করল । রামকালী নিচু হয়ে ঝুঁকে ছেলেটার হাতটা তুলে ধরে নাজী পরীক্ষা করে নিঃশ্বাস ফেললেন, তারপর আস্তে মুখ তুলে বললেন, “কাদের ক্ষেতের আঁখ খেয়েছিলি?”

অন্য সব বালকরাই নাগালের বাইরে, নেড়ুই রাজসাক্ষী, তাই নিরুপায় স্বরে গুণ্ডকথা প্রকাশ করে, “ইয়ে—বসাকদের ।”

“কিছু কামড়েছে বলে চেষ্টা নিয়ে ওঠে নি একবারও ?”

“না তো!” নেড়ু অবাক হয় । সমগ্র জনসভা একটি মানুষের মুখের দিকে তাকিয়ে চিত্তার্পিত পুতলিকাবৎ দগ্ধয়মান । এমন কি তুইরা পর্যন্ত স্তব্ধ হয়ে গেছে, হাঁ করে তাকিয়ে আছে, বোধ করি কোনও একটু ক্ষীণ আশায় বুক বেঁধে ।

“সর্দি-গর্মি নয় ।” নিষ্ঠুর নিয়তির মত উচ্চারণ করেন রামকালী, “সাপের বিষ!”

সাপের বিষ!

একটা সম্বরে চিৎকার উঠল, “কোথায়—কোথায় কেটেছে ?”

“কাটে নি কোথাও, সে তো ওর সঙ্গীরাই বলছে ।” রামকালী নিঃশ্বাস ফেলেন, “খাওয়ার সঙ্গে সঙ্গে দেহে বিষ প্রবেশ করেছে । একটু আগে যদি হাতে পেতাম, চেষ্টা দেখতাম, এখন আর কিছু করার নেই ।”

“কবরেজ মশাই!” হাহাকার করে পায়ে আছড়ে পড়ল তুই, “জগতের সবাইকে জীবন দিচ্ছেন কবরেজ-ঠাকুর, আর আমার নাতিটাকে কিছু করবার নেই বলে ত্যাগ দিচ্ছেন!”

রামকালী ডান হাতটা তুলে একবার আপন কপাল স্পর্শ করে বলেন, “আমার ভাগ্য ।”

“আপনার পায়ে ধরি ঠাকুরমশাই, ওষুধ একটু দ্যান ।”

এবার আছড়ে এসে পড়েছে বুড়ী । তুইর বৌ ।

রামকালী কোন উত্তর দেন না, লক্ষ্যহীন দৃষ্টিতে তাকিয়ে থাকেন জনতার দিকে ।

কিন্তু সাপের বিষ মানে কি ?

আহারের সঙ্গে সাপের বিষ আসবে কোথা থেকে ?

সহসা এ কি আকাশ থেকে পড়া বিপদের কথা বলছেন কবরেজ মশাই!

তুইর মত নির্বিরোধী নিরীহ মানুষটার এত বড় মহাশত্রু কে আছে যে, তার বংশে বাতি দেবার সলতেটুকু উৎপাটিত করবে, জ্বালিয়ে-পুড়িয়ে থাক করবে!

গুঞ্জন উঠছে জনতা থেকে ।

“কবরেজ মশাই, সাপের বিষের কথা বলছেন ? এত বড় শত্রু কে আছে তুইর ?”

“কেন, ভগবান!” তীক্ষ্ণ একটা ব্যঙ্গ-তীক্ষ্ণ হাসির সঙ্গে কথাটা শেষ করেন রামকালী, “ভগবানের বাড়া পরম শত্রু আর মানুষের কে আছে তুই ?”

কিন্তু এত সংক্ষিপ্ত ভাষণ বোঝে কে ?

বিশদ না শুনে পেলে ছাড়বেই বা কেন লোক ? শুধু ‘সাপের বিষ’ ফতোয়া জারি করে নিষ্ঠুরের মত নীরব হয়ে থাকলে প্রশ্ন-বিষের দাছে যে ছটফট করবে লোক!

বলতেই হবে রামকালীকে, সাপে কাটল না, তবু তার বিষ এল কোথা থেকে ?

কিন্তু উত্তর দিয়ে যে রামকালী বাকশক্তি-রহিত করে দিলেন সবাইকে! এ কী তাজ্জব কথা!

আখের ক্ষেতে সাপের গর্ত ছিল, থাকেই এমন ।

ঠিক যে আঁখ গাছটার গোড়ায় সে বিষের খলি, সেই আঁখটাই তুলে খেয়েছে হতভাগ্য ছেলোটা ।

“এ কি বলছেন কবিরাজ মশাই!”

“যা সত্য তাই বলছি ।” হাতের উল্টো পিঠ দিয়ে কপালের ঘাম মোছন রামকালী, গম্ভীর কর্তে উচ্চারিত হয়, “নিয়তির উপর হাত নেই, আঁখ কেউ দিতে পারে না । তবু তক্ষুনি টের পেলে বিষ তোলার চেষ্টাটা অন্তত করতাম । কিন্তু তা হবার নয়, অদৃশ্য নিয়তি অমোঘ নিষ্ঠুর ।”

অমোঘ নিয়তি!

তবু উৎসাহী কোন এক ব্যক্তি ‘সাপের বিষ’ শোনা মাত্রই হাড়িপাড়ায় ছুটে গিয়ে ডেকে এনেছে বিন্দে ওঝাকে ।

বিন্দে এসেও ধীরে ধীরে মাথা নাড়ে।

অর্থাৎ সেই এক কথা—আর কিছু করবার নেই!

কিন্তু মরাকে বাঁচাতে না পারুক, জ্যান্টটাকে তো মারতে পারে বিন্দে। সেই সর্বনাশের মূল স্বয়ং যমটাকে মস্তের জোরে শেষ করে দিক সে। জনমত প্রবল হয়ে ওঠে।

হয়তো এই তীব্র বাসনার মধ্যে অন্য একটা প্রচ্ছন্ন বাসনাও সুপ্ত হয়ে রয়েছে। সন্দেহ নেই রামকালী কবিরাজ দেবতা, তাঁর বিচার নির্ভুল, কিন্তু এ হেন কৌতূহলোদ্দীপক কথাটার একটা ফয়সালা হওয়া তো দরকার।

বিন্দেকে ঝুলোঝুলি করতে থাকে সবাই।

রামকালী সামান্য বিষণ্ণ হাসি হেসে বলেন, “যাচাই করতে চাও?”

“হায় হায়, আজ্ঞে এ কী কথা! কী বলছেন ঠাকুরমশাই!”

“যা বলছি তাতে ভুল নেই বাবা সকল। যা হোক, একটা কথা কেউ বললেই সেটা বিশ্বাস করে নিতে হবে, তার কোন হেতু নেই। কিন্তু হতভাগার দেহটার যথাযথ একটা ব্যবস্থা আগে না করে—”

বিন্দে মাথা নেড়ে বলে, “আজ্ঞে বিষহরির পো যখন কাটেন নি, তখন ওতে আমার কিছু করার নেই। ও আপনার সহজ মিত্তার হিসেবেই যা করবার করতে হবে।”

“কিন্তু দেখছ তো বিষে একেবারে নীল হয়ে গেছে!”

“তা অবিশ্যি দেখছি আজ্ঞে। একেবারে কালকেউটে দংশনের চেহারা। তবু যা কানুন!”

“বাবা সকল, তোমরা তবে আর বুধা ভিড় না করে কাজে লাগো!” শিখিল স্বরে বলেন রামকালী। রঘুর দিকে আর যেন ভাকাতে পারছেন না তিনি। কিন্তু কে এখন কাজে লাগতে যাবে?

এত বড় একটা উত্তেজনা তাদের অধীর করে তুলেছে। সকলে বিন্দেকে ঘিরে ধরে চোঁচাচ্ছে, “কড়ি চাল তুই, কড়ি চাল! হারামজাদা বেটা সুড়সুড় করে এসে তোর ঝাঁপিতে ঢুকুক। তারপর তুই আছিস আর তোর বিষপাথর আছে। আছড়ে মেরে ফেল!”

“তোমরা এত ছেলেমানুষি করছ কেন? সাপটাকে ত্রিকুপাওয়াই যাবে তার নিশ্চয়তা কি?”

“পাওয়া যাবে না মানে? আপনি যখন বলছেন—”

“বিষ তো ঠিক, কিন্তু আখের ক্ষেতটা আমার অনুমান মাত্র, তার আগে জলটল কিছুই যখন খায় নি বলছে—তাই। কিন্তু এখন বিন্দের কীর্তি দিয়ে পড়লে তোমরা তো—”

কিন্তু যে যতই ভয়-ভঙ্কিত করুক রামকালীকে, আজকের উত্তেজনা তাকে ছাপিয়ে উঠেছে। যদি আখের গাছের গোড়ায় সাপের বাসা থাকে, সেই খেয়ে জলজ্যান্ট একটা ‘সাদস্য’ গোয়ালার ছেলে এক দণ্ডে মরে যাবে? তা যদি হয়, সেটা চোখের সামনে যাচাই হোক!

সাপের গর্ত অবিকৃত না হওয়া পর্যন্ত কেউ নড়বে না।

অতএব সমস্ত দৃশ্য যথাযথ রয়ে গেল, রঘুর ব্যবস্থায় কেউ গাও দিল না, বিন্দে ওঝা মহাকলরবে সাপ চলে আনার মন্ত্র আওড়াতে শুরু করে দিল।

রামকালী চুপ করে দাঁড়িয়েছিলেন, হয়তো বা শেষ অবধি দাঁড়িয়েই থাকতেন, হয়তো বা একসময় চলেই যেতেন, কিন্তু সহসা সেজখুড়ো এসে হাজির হয়ে চাপা গলায় ডাক দিলেন, “রামকালী!”

খানিক আগে গ্রামের আরও অনেক কাজের লোকের মত সেজকর্তাও একবার এখানে এসে ঘুরেফিরে নানা মন্তব্য করে চলে গেছেন। আবার ফিরে এলেন কোন্ বার্তা নিয়ে?

না, বার্তাটা বলতে রাজী নন সেজকর্তা।

তবে জরুরী দরকার।

বাড়ি যেতে হবে রামকালীকে।

• দ্বিতীয় প্রশ্ন আর করলেন না রামকালী, ধীরে ধীরে সরে এলেন বুড়ো বটতলা থেকে। অকর্মা একদল লোক তখন বিন্দেকে ঘিরে উন্মত্ত হট্টগোল করছে।

ভাবলেন মৃত্যুর কারণ না বললেই হত। মৃত্যু মৃত্যুই। মৃত্যুর কারণ নির্ণয় করতে পারলেই কি তুই নাতিকে ফিরে পাবে? নাকি আততায়ীকে শেষ করে ফেললেই পাবে?

তা পায় না।

তবু মৃত্যুর পর মৃত্যুর কারণ নিয়ে মাথা ঘামায় লোকে। আর খুন হলে নিহত ব্যক্তির হত্যাকারীর ফাঁসি ঘটাবার জন্যে মরণ-বাঁচান পণ করে লড়ে।

আকাশ আর পাতাল, পাহাড় আর সমুদ্র।

কোন পরিবেশ থেকে কোন পরিবেশ!

কিন্তু ঘটনা যাই হোক, রামকালীর অন্তঃপুরেও প্রায় শোকেরই দৃশ্য। দীনতারিণী চোখ মুছছেন, চোখ মুছছেন কাশীশ্বরী, ভুবনেশ্বরী মূর্ছাতুরার মত পড়ে আছে একপাশে, মোক্ষদা দাপিয়ে বেড়াচ্ছেন এবং সেজখুড়ী, কুঞ্জর বৌ, আশ্রিতা অনুগতা প্রভৃতি অন্যান্য নারীকুল নিম্নস্বরে রামকালীর জেদ তেজ ও অদূরদর্শিতার নিন্দাবাদ করছেন।

শুধু সারদা সেখানে নেই, সে তদব্যস্তে কুটুমবাড়ির লোকের আহার-আয়োজনে ব্যাপৃত আছে। তুটু গয়লার নাতির ব্যাপার নিয়ে সারা গ্রাম আজ তোলপাড়, তবে বাইরের কোনো হুজুগে এ বাড়ির অন্তঃপুরিকাদের উঁকি দেবার অধিকার নেই, বাদে মোক্ষদা।

মোক্ষদা একবার দেখে এসে স্নান করেছেন, আর যাবেন না। গিয়ে করবেনই বা কি?

সত্যর শব্দের প্রেরিত চিঠি কুঞ্জবিহারী পড়ে দিয়েছেন, আর তার পর থেকেই বাড়িতে এই শোকের ঝড় বইছে।

জামাইয়ের মা-বাপ যদি ছেলের আবার বিয়ে দেয়, মেয়ের মৃত্যুর চাইতে সেটা আর কম কি! পরের মেয়ে-বৌকে উদারতার উপদেশ দেওয়া যায়, তার মধ্যে সতীনের হিংসের পরিচয় পেলে নিন্দে করা যায়, কিন্তু ঘরের মেয়ের কথা আলাদা।

সারাদিনের ক্লান্ত পরিশ্রান্ত দেহ আর তুটুর নাতির ওই শোচনীয় পরিণামে ক্রিষ্ট মন নিয়ে বাড়ি চুকেই ঘটনাটা শুনলেন রামকালী।

তীক্ষ্ণ ভীত দুই চোখের মণিতে জ্বলে উঠল দু-ডেলা আগুন। মনে হল ফেটে পড়বেন এখনি, ধৈর্যচ্যুত হয়ে চিৎকার করে উঠবেন, কিন্তু তা তিনি করলেন না, শুধু ভয়াবহ ভারী গলায় প্রশ্ন করলেন, “কে এসেছে চিঠি নিয়ে?”

এ সময় মোক্ষদা ভিন্ন আর কার সাধ্য আছে সামনে এগিয়ে যাবার? তিনিই গেলেন। বললেন, “এনেছে ওদের ওখানে এক আচার্য্যদের ছেলে। গোপেন আছ্যিয়া না কি বলল।”

“কোথায় সে? চণ্ডীমণ্ডপে?”

“না, খেতে বসেছে।”

“ঠিক আছে ঝাওয়া হলে আমার সঙ্গে দেখা করতে পাঠিয়ে দিও। চণ্ডীমণ্ডপে আছি আমি।”

মোক্ষদা প্রমাদ গুনে বলেন, “তা তুমিও তো আজ সারাদিন নাওয়া-খাওয়া কর নি!”

“যাক বেলা পড়ে এসেছে, একেবারে সন্ধ্যাহিক সেরে যা হয় হবে।”

“লোকটা একটু রগচটা আছে, একটু বুকেসুখে কথা কয়ো তার সঙ্গে।”

রামকালী ভুরু কুঁচকে বললেন, “লোকটা একটু কি আছে?”

“বলছিলাম রগচটা আছে।”

মোক্ষদাকে অবাক করে দিয়ে সহসা হেসে ওঠেন রামকালী, “তাতে কি? আমি তো আর রগচটা নই!”

তা বলেছিলেন রামকালী ঠিকই।

বগ মাথা সবই তিনি খুব ঠাণ্ডা রেখেছিলেন; বুঝিবা অতি মাত্রাতেই রেখেছিলেন; গোপেন আচার্য্যিকে ডেকে বেয়াইবাড়ির কুশলবার্তা নিয়ে হাস্যবদনে বলেছিলেন, “শুনলাম নাকি বেয়াই মশাইয়ের ছেলের বিয়ে! বলো গুনে খুব আনন্দিত হয়েছি। নেমন্তন্ন পেলে উচিতমত লৌকিকতা পাঠিয়ে দেব।”

গোজল গোপেন আচার্য্যি কটুকটব্য দূরের কথা, কথা কইতেই ভুলে গেল, হাঁ করে চেয়ে রইল।

“খাওয়া-দাওয়া হয়েছে তোমার?”

“আজ্ঞে হ্যাঁ।”

“আজ রাতে তো আর ফিরছ না?”

“আজ্ঞে না।”

“বেশ। সকালে জলটল খেয়ে যাত্রা করো।”

“আজ্ঞে মেয়ে তা হলে পাঠাবেন না?”

“মেয়ে? কার মেয়ে? কোথায় পাঠাবার কথা বলছ হে?”

গোপেন এবার সাহসে ভর করে বলে ওঠে, “আজ্ঞে, আজ্ঞে আপনার মেয়ের কথা ছাড়া আপনাকে আর কার কথা বলতে আসব ? মেয়ে তাহলে পাঠাবেন না ?”

“আরে বাপু, কোথায় পাঠাব তাই বলো ? অদুলোকের মেয়ে অদুলোকের ঘরেই যেতে পারে, যেখানে সেখানে তো যেতে পারে না ?”

গোপেনের শীর্ণ মুখটা বিকৃত হয়ে ওঠে, “বেশ, তবে পত্রে তাই লিখে দিন।”

“আবার পত্র লিখতে হবে ? এই তুচ্ছ কথাটুকু তুমি বলতে পারবে না ?”

“আজ্ঞে না। আমি গের্জেল-নেশেল মানুষ, আমার কথায় বিশ্বাস করে না করে! এসেছি যখন পাকা দলিলই নিয়ে যাব।”

“হঁ।” বলে মিনিটখানেক তুঙ্গ কুঁচকে চূপ করে দাঁড়িয়ে থাকেন রামকালী, তার পর বলেন, “আজ্ঞা তাই হবে। পত্র লিখে রাখব, কাল সকালে রওনা দেবার আগে নিও।”

সন্ধ্যা হয়ে গেছে। তবু ধীরে ধীরে বেরিয়ে পড়লেন রামকালী।

না, সন্ধ্যাক্ষিকের পূর্বে হাতমুখ ধুতে ঘাটে গেলেন না, গেলেন বুড়ো বটগাছতলার দিকে। কি করল ওরা দেখা যাক। এতক্ষণ পরে আবার রঘুর চেহারাটা চোখে ভেসে উঠল।

উঃ, নিয়তি কী অকরণ!

বাড়ি থেকে একটু এগিয়ে থমকে দাঁড়ালেন রামকালী।

চলচলিয়ে চোটপায়ে আসছে কে অন্ধকারে ? সত্যবতী না ?

“তুই এখানে একলা যে ?”

“একলা নয় বাবা, নেড়ু এসেছিল, তা ও এখন ফিরল না।”

“এসেছিল কেন ?”

“কেন, সেকথা আর শুধোচ্ছ কেন বাবা ?” সত্য বিষণ্ণ হতাশ কণ্ঠে বলে, “রঘুটাকে একবার শেষ দেখা দেখতে।”

“এভাবে এসে ভাল কর নি। সেজঠাকুমার সঙ্গে এলে পারতে।”

“সেজঠাকুমার তো আটবার ডুব দেওয়া হয়ে গেছে, আর আসত ?”

“আজ্ঞা বাড়ি যাও।”

“যাচ্ছি।... বাবা—”

“কি হল ? কিছু বলবে ?”

“বলছি—”

“কি ? কি বলতে চাও বলো ?”

“বলছি কোথা থেকে যেন একটা লোক এসেছে না পত্তর নিয়ে ?”

রামকালী মেয়ের মুখে এ প্রসঙ্গে শুনে অবাধ হন। তার পর ভাবেন, মেয়েটা তো চিরকলে বেপরোয়া। স্বস্তরবাড়ি যাবার ভয়ে বাপের কাছে আর্জি করতে এসেছে। তাই সন্দেহে বলেন, “হ্যাঁ, এসেছে তো। তোর স্বস্তরবাড়ি থেকে। তার কি ?”

“বলছিলাম কি—” সত্যবতীর কথা বলার আগে চিন্তা আশ্চর্য বটে!

রামকালী মনে মনে হাসেন, স্বস্তরবাড়ি শব্দটাই মেয়েদের এমন!

“বলো কি বলছ ?”

“আজ্ঞা এখন থাক। তুমি ঘুরে এসো। শুছিয়ে বলবার কথা। রঘুটার মিতদেহ দেখে অবধি মনটা বড় ডুকরোচ্ছে। বাড়ি ফিরে একটু জিরোই।”

“আজ্ঞা।” বলে চলে যান রামকালী।

এই অবোধ মেয়ে—একে এম্মনি স্বস্তরবাড়ি পাঠানো চলে ? অসম্ভব!

“পাওয়া গেছে পাওয়া গেছে!”

বহু কণ্ঠের একটা উন্মত্ত উল্লাসধ্বনি ভেসে আসে কবরেজবাড়ির দিকে, “কবরেজ মশাই, পাওয়া গেছে!”

কী পেল ওরা ? কিসের এত উল্লাস ? কোন্ পরম প্রাপ্তিতে মানুষ এমন উন্মত্ত হয়ে উঠতে পারে ? চতীমণ্ডপের দাওয়া থেকে নেমে এলেন রামকালী। তবে কি হতভাগ্য রঘুর প্রাণটাই ফিরে পাওয়া গেল তুষ্টির পূর্বজন্মের পুণ্যে ? কলিযুগেও ভগবান কানে শুনতে পান ?

রঘু কি শুধু অজ্ঞান হয়ে গিয়েছিল ?

মৃত্যুর কাছাকাছি অচৈতন্যতার যে গভীর স্তর, সেখানে ডুবেছিল ? জটার বৌয়ের মত ?
রামকালীর নির্ণয় ভুল ? তাই হোক, ভাই হোক। হে ঈশ্বর, একেবারের জন্য অন্তত তুমি রামকালীর
গর্ব খর্ব করো, একেবারের মত প্রমাণ করো রামকালীর নির্ণয় ভুল!

নাঃ, কলিযুগে ভগবান হাবা কালা হুঁটো। রামকালীর গর্ব খর্ব করবারও গরজ নেই তাঁর। রঘুর
প্রাণটা ওরা ফিরে পায় নি, পেয়েছে তার প্রাণঘাতককে! ওঝার মন্ত্রচালনার গুণে সাপটা এসে লুটিয়ে
পড়েছে মুখে ফেনা ভেঙে। আশ্চর্য! এ এক পরম আশ্চর্য!

সাপটাকে নাকি নিতে চেয়েছিল ওঝা, কাকুতি-মিনতি করে বলেছিল, “এমন জাতপাত দৈবাৎ
মেলে!” কিন্তু জনতার আক্রোশ থেকে রক্ষা করতে পারে নি তার জাতসাপকে। লাঠি দিয়ে আর বাঁশ
দিয়ে পিটিয়ে তার গোল চকচকে দেহটাকে ছেঁচে কুটে চ্যাপটা করে দিয়েছে সবাই।

“অপরাধ নিও না মা জগদগৌরী!” বলেছে আর পিটিয়েছে।

এখন লম্বা একটা বাঁশের আগায় সেই মরা সাপটাকে ঝুলিয়ে নিয়ে ওরা এসেছে রামকালীর
জয়গান করতে। ওঝা বুড়োও তার নিকষ-কালো গুলিপাকানো বেঁটে শরীরটাকে নিয়ে আসছে ছুটে
ছুটে বকশিশের আশায়। মোটা বকশিশ কি আর না দেবেন রামকালী ? ওঝার সাফল্য যে
রামকালীরও সাফল্য!

উল্লাস-টীক্কার-বত এই লোকগুলো যেন একটা অশুভ বর্বরতার প্রতীক। ঘৃণায় ধিক্বারে মনটা
বিষিয়ে গেল রামকালীর, হাত তুলে ওদের থামতে নির্দেশ দিয়ে জুকুটি করে বললেন, “কী হয়েছে
কী ? এত স্কূর্তি কিসের তোমাদের ? রঘু বেঁচে উঠেছে ?”

“বেঁচে উঠবে!” একজন মহোৎসাহে বলে ওঠে, “ভগবানের সাধি্য কি ওকে বাঁচায়! একেবারে
কালনাগিনীর বিষ! কিন্তু ধন্য বলি কবরেজ মশাই আপনার শিক্ষা! কামড়ায় নি, শুধু—”

“খামো!” ধমকে ওঠেন রামকালী, “তা ওই নিয়ে এত হৈ-চৈ করছ কি জন্যে ? একটা বালক
এখনো মরে পড়ে রয়েছে!”

সহসা একটা প্রবল আবেগে কণ্ঠ রুদ্ধ হয়ে আসে রামকালী চাটুয্যেব, যেমনটা তাঁর বড় হয়
না। রঘুর এই শোচনীয় মৃত্যুটা বড় লেগেছে রামকালীর। বার বার মনে হচ্ছে, হয়তো সময় থাকতে
রামকালীর হাতে পড়লে বেঁচে যেত ছেলটা।

ভারতে চেষ্টা করছেন, নিয়তি অমোঘ আন্ধু-নির্দিষ্ট, এ চিন্তা মূঢ়তা, তবু সে চিন্তাকে রোধ করতে
পারছেন না। বিষ-নিবারক গুণধূলো তাদের নাম আর চেহারা নিয়ে অনবরত মনে ধাক্কা দিচ্ছে।

“আজ্ঞে কর্তা, মা বিষহরি নিলে কে কি করতে পারে ? তবে কীর্তি একটা দেখালেন বটে!”
বলে ওঠে ওঝা বুড়ো, “তবে আমাকেও খুঁচে রক্ত তুলে খাটিতে হয়েছে কস্তা! বেটা কি আসতে চায় ?
একেবারে মোক্ষম মন্তর বেড়ে তবে—”

“বেশ, শুনে সুখী হলাম। যাও, তোমরা এখন জটার একটা সদগতি করো গে।” সাপ মারলে
তাকে শাস্ত্রীয় আচারে দাহ করা নিয়ম, সেই কথাই উল্লেখ করে কথাটা বলেন, তার পর ঈশ্বৎ
গাঢ়স্বরে বলেন, “আর সেই হতভাগাটারও একটা গতির ব্যবস্থা করোগে। তুষ্টর একার ঘাড়ে সব
দায়টা চাপিয়ে নিশ্চিন্ত থেকো না।”

জনতার উল্লাসটা একটু ব্যাহত হয়। এটা কী হল! এমনটা তো তারা আশা করে আসে নি!
ডেবেছিল, সাপটা আবিষ্কৃত হয়েছে দেখে নিঃসন্দেহে উৎফুল্ল হবেন রামকালী, কারণ এটা তাঁর
জয়পতাকা বলা চলে। অনেকের মধ্যেই তো একটা অবিশ্বাস উঁকি দিয়েছিল, কবরেজ মশাইয়ের
প্রতি অপরিসীম বিশ্বাস সত্ত্বেও।

একেবারে একটা অসম্ভব কথাই যে বলেছিলেন রামকালী। অসম্ভবও যে সম্ভব হয়, এ কথা
প্রমাণ করত কে এই সাপটা ছাড়া ? অথচ রামকালী যেন নির্বিকার।

ক্ষুদ্ধ হল, আহত হল ওরা।

“সে ব্যবস্থা কি আর না হচ্ছে কবরেজ মশাই,” ওরা বলে, “এতক্ষণে বাঁশ কাটা হয়ে গেল
বোধ হয়। তবে কথা হচ্ছে সাপের মড়া, ওকে তো ভাসাতে হবে!”

“না।” ভারী গলায় বলেন রামকালী, “সাপে কাটে নি। যথারীতি দাহর ব্যবস্থাই করো গে।
কতগুলো হৈ-চৈ করো না।”

বাঁশ ঘাড়ে করে চলে গেল ওরা, তার পিছনে গ্রাম-কোঁটানো ছেলেমেয়ে ইতরভদ্র। ওদের
গমনপথের দিকে তাকিয়ে থাকতে থাকতে হঠাৎ মনে হল রামকালীর, এরা আমাদের আত্মীয়! এই
আমাদের প্রতিবেশী! বুনো জঙ্গলে কোন সাঁওতালদের থেকে এমন কি উন্নত এরা ? বর্বরতার সুযোগ

পেলেই তো মেতে উঠতে চায় সেই বন্য বর্বরতায়! মৃত্যুকে যে একটু শ্রদ্ধা করতে হয়, শ্রদ্ধার লক্ষণ যে নীরবতা, এ বোধের কণামাত্র ও তো নেই এদের মধ্যে।

“কর্তা আমার বকশিশটা ?”

নিকটে সরে এসে হাত কচলায় বিন্দে বুড়ো।

“বকশিশ ?” রামকালী ভুরুর তীক্ষ্ণতায় কপালে রেখা ঐকে বলেন, “বকশিশ কিসের ?”

“আজ্ঞে কত্তা—!”

“বলছি বকশিশ কিসের ? ছেলোটাকে বাঁচিয়েছ ?”

“সে আজ্ঞে মৃত্যুর পর আর বাঁচাবে কে ?”

“হ্যাঁ, আমি তা জানি। শুধু এটাই বুঝতে পারছি না, বকশিশ পাবার দাবিটা কখন হল তোমার ?”

“বেশ, বকশিশ না দ্যান, মজুরিটা তো দেবেন আজ্ঞে!” ওখা এবার রুখে ওঠে।

“সেটা দেবে যারা ডেকে এনেছে—” শান্ত গম্ভীর কণ্ঠে বলেন রামকালী, “আমি তোমায় ডেকে আনি নি।”

“দশজনের মধ্যে কাকে ধরতে যাব কত্তা,” বিন্দে বেজার মুখে বলে, “না দ্যান তো চলে যাব। গরীব মানুষ—”

“দাঁড়াও।” রামকালী বেনিয়ানের পকেট থেকে নগদ দুটি টাকা বার করে ওর হাতে দিয়ে আরও গম্ভীর গলায় বলেন, “শুধু তোমার মজুরি নয়, একটা সাপেরও দাম। দামী সাপটা পেল তোমার!”

বুড়ো বিহ্বল দৃষ্টি মেলে অভিভূত কণ্ঠে বলে, “আজ্ঞে কী বলছ কত্তা ?”

“যা বলছি ঠিকই বুঝেছ। ... যাও”

“কত্তা!”

“কটা সাপ তোমার ঝাঁপিতে ছিল বুড়ো ?” নির্নিমেষ দৃষ্টিতে ওর মুখের দিকে তাকিয়ে রামকালী আশ্তে উচ্চারণ করেন কথাটা।

সে দৃষ্টির সামনে কেঁপে ওঠে লোকটা, কাঁদে, ফাঁদো গলায় বলে, “কত্তা, তুমি অন্তরযামী—”

“বিশ্বাস করছ সে-কথা ? আচ্ছা যাও, ভয় নেই।”

টাকা অভয় দুটো জিনিস পেয়ে গেছে লোকটা, অতএব আর দাঁড়ায় না। কি জানি ‘অগ্নিমুখ দেবতা’ এক্ষুনি যদি মত পাষ্টায়!

রামকালী অদ্ভুত একটা স্কোভেন্দু দৃষ্টি মেলে তাকিয়ে থাকেন। এদের তো নিজেদের অজ্ঞতার শেষ নেই, বুদ্ধিহীনতার চরম প্রতীক, তবু অপরের অজ্ঞতা আর মূঢ়তাকে উপজীবিকা করে চালিয়েও চলেছে দিবা!

সাপটা সম্বন্ধে সন্দেহ হয়েছিল, কিন্তু ধারণা করেন নি লোকটা এত সহজে স্বীকার পাবে, এক কথায় এমন গুটিয়ে কেঁচো হয়ে যাবে!

মনটা ভারাক্রান্ত হয়ে ওঠে একটা বিষণ্ণ বেদনায়। দেহের রোগ সারাবার ভার চিকিৎসকের হাতে, কিন্তু মনের রোগ কে সারাবে ? কুসংস্কার, অজ্ঞতা, বোকামি—অথচ তার সঙ্গে ঘোল আনা কুটিল বুদ্ধি। আশ্চর্য!

অন্ধকার হয়ে গেছে। আহ্নিকের সময় উত্তীর্ণ প্রায়, তবু সেই দাওয়ার ধারেই জলটোকিটার ওপর বসে আছেন রামকালী। খড়মটা পায়ে পরা নেই, পা দুটো আলগা তার ওপর চাপানো। অন্ধকারে খড়মের রূপের ‘বৌল’ দুটো ঈষৎ চকচক করছে।

“বাবা!”

চমকে উঠলেন এই অপ্রত্যাশিত ডাকে।

“সত্য! তুমি এখানে ? ও, আহ্নিকের সময় উত্তীর্ণ হয়ে যাচ্ছে তাই বলতে এসেছ ? যাও মা, তুমি ভেতরে যাও।”

“আমি সে কথা বলতে আসি নি বাবা!”

“সে কথা বলতে আস নি! তা হলে ?”

“বলছিলাম—” প্রায় মরীয়ার মতন বলে ফেলে সত্য, ‘বারুইপুরের লোককে, “হ্যাঁ” করেই দাও না বাবা।”

বারুইপুরের!

রামকালী অবাক হয়ে বলেন, “হ্যাঁ” করে দেব ? কি ‘হ্যাঁ’ করে দেব ?”

“তুমি তো বুঝতেই পারছ বাবা”—সত্য কাতর সুরে বলে, “আমি আর নিলুজ্জর মত মুখ ফুটে কি বলব!”

রামকালী মেয়ের মুখটা দেখতে পান না অন্ধকারে, কিন্তু স্বরটা ধরতে পারেন, তবু বুঝতে সত্যিই পারেন না, সত্য কি বলতে চায়? বাকুইপুরের লোকটার চলে যাওয়ার ব্যাপারে ‘হ্যাঁ’ করতে বলতে চাইছে নাকি? রামকালী তো সে রায় দিয়েছেন। তবে? বাড়ির মেয়েরা বোধ হয় এখনো জেব টানছেন!

সান্দ্বনার গলায় বলেন, “ভয় পেও না, শ্বশুরবাড়ি তোমায় যেতে হবে না এখন।”

সত্য বোঝে বাবা তার আবেদন ধরতে পারেননি, আর পারার কথাও নয়। সত্যর মতন কোন্ মেয়েটা আর নিজের গলা নিজে কাটতে চায়? কিন্তু সত্য যে সাতপাঁচ ভেবে তাই চাইছে। হাড়িকাঠের নিচে গলাটা বাড়িয়েই দিচ্ছে। পিস্তাাকুমার দল সশব্দে ঘোষণা করেছেন, “অহঙ্কারে ধরাকে সরা দেখে রামকালী মেয়ের আখের ঘোচালেন! কুটুমরা রক্তমাংসের মানুষ বৈ তো কাঠ-পাথরের নয় যে এত অপমান সহ্য করে বসে থাকবে! ছেলের আবার বিয়ে দেবেই নির্ঘাত, আর রামকালী চিরকাল মেয়ে গলায় করে বসে থাকবেন! গলায় পড়া মেয়ে মানেই হাতেপায়ে বেড়ি!”

সত্য ভেবে ঠিক করেছে, বাপ-মায়ের হাতে-পায়ে বেড়ি হয়ে থাকাটা কোন কাজের কথা নয়। তার চাইতে বাপের সুমতি করানোই ভাল।

কিন্তু বাবা তার বক্তব্যই ধরতে পারছেন না।

অতএব আর লজ্জার আবরণ রাখা চলল না। সত্য সকালবেলার চিরেতার জল খাওয়ার মতই চোখ-কান বুজে বলে ফেলল, “সে ভয়কে আমি মনে ধরাছি না বাবা, বরং উল্টো কথাই বলছি। ও তুমি পাঠাবার মন করলেই দাও, আমার কপালে মরণ-বাঁচন যা আছে হবে।”

রামকালী স্তম্ভিত হলেন।

এখাবৎ মেয়ের বহু দুঃসাহসের পরিচয় তিনি পেয়েছেন, সে দুঃসাহস পরিপাকও করেছেন। কারণ তার অর্থ হ্রদয়ঙ্গম করেছেন, কিন্তু এটা কি? নিজে সোঁধে শ্বশুরবাড়ি যেতে চাইছে সে?

বয়স্থা মেয়ে নয় যে এ চাওয়ার অন্য অর্থ করবেন, তবে?

কণ্ঠস্বর গম্ভীর হল, হয়তো বা একটু রুঢ়ও, “তুমি ইচ্ছে করে শ্বশুরবাড়ি যেতে চাইছ?”

“যেতে চাইছি কি আর সাধে!” বাবার কণ্ঠস্বরে দৃঢ়তার আভাস সত্যর চোখে প্রায় জল এনে ফেলেছে, “চাইছি অনেক ভেবেচিন্তে। কুটুমকে চটিয়ে শুধু গেরো ডেকে আনা বৈ তো নয়!”

রামকালী বুঝলেন, বাড়িতে এই ধরনের কথাই চাষ চলেছে। অবোধ শিশু শিখবেই তো। কিন্তু তাই বলে এতই কি অবোধ যে, বাপের সামনে কোন্ কথা বলতে হয় তা বোঝে না?

কঠিন স্বরে বললেন, “আমার গেরোর কথা আমিই বুঝব সত্য, তুমি ছেলেমানুষ, এ নিয়ে ভাববার বা এসব কথায় থাকবার দরকার নেই। এটা বাচালতা।”

কিন্তু সত্য তো দমবে না!

হাত ছেড়ে পালিয়ে যাওয়া সত্যর কোষ্ঠীতে লেখে নি। তাই ম্লান হলেও জোরালো স্বরে বলে, “সে তো বুঝছিই বাবা, বাচালতা নিলুজ্জতা, কিন্তু উপায় কি? সমিস্যে যে প্রবল। এর পর যখন তোমাকে আমায় নিয়ে ভুগতে হবে, তখন যে মরেও শান্তি পাবে না। ওরা ছেলের আবার বিয়ে নাকি দেবে বলেছে! সেটা তো অপমান! তুচ্ছ একটা মেয়েসন্তানের জন্যে কেন তোমার উঁচু মাথাটা হেঁট হবে বাবা!”

রামকালীর মনে হল প্রচণ্ড একটা ধমকে মেয়েটার বাচালতা ঠাণ্ডা করে দেন, কিন্তু পরক্ষণেই একটা বিপরীত ভাবের ধাক্কা এল! মেয়েটার মনের মধ্যে আছে কি? এতটুকু মেয়ে এত কথা ভাবেই বা কেন? আর এতখানি দুর্জয় সাহসই বা সংগ্রহ করল কোথা থেকে?

বাপের সঙ্গে শ্বশুরবাড়ি যাওয়ার আলোচনা ভূ-ভারতে আর কোনো মেয়ে করেছে কখনো? তাও রামকালীর মত রাশভারী বাপ! মা দীনতারিণী পর্যন্ত যার সঙ্গে সমীহ করে কথা বলেন! তা ছাড়া ‘শ্বশুরবাড়ি’ শব্দটাই তো মেয়েদের কাছে ‘সাপখোপ বাঘ ভালুক ভূত চোর’ সব কিছুর চাইতেও ভয়ের। সে ভয়কেও জয় করেছে সত্য কোন নির্ভয় মন্ত্রের জোরে?

ঠিক করলেন ধমকে ঠাণ্ডা করবেন না, শেষ অবধি ধৈর্য ধরে শুনবেন ওর কথা। দেখবেন ওর মনের গতির বৈচিত্র্য। রাগের বদলে একটা বিস্থিত কৌতূহল জাগছে।

শান্তগলায় বললেন, “মেয়েসন্তান যে ‘তুচ্ছ’, এটা তো তুমি কখনো বলো না?”

“বলি না, অবস্থাই বলাচ্ছে বাবা। তুচ্ছ না হলে আর তাকে সাত-তাড়াতাড়ি ‘পরগোস্তর’ করে দিতে হয়? একটা সন্তান বলে কথা, তাও তো ঘরে রাখতে পার নি, তবে আর মিথ্যে মায়ায় জড়িয়ে

কি হবে বাবা ? সেই 'পরগোস্তর'ই যখন করে দিয়েছে, তখন আর কি ? আজ নয় কাল পাঠাতে তো হবেই, বলতে তো পারবে না 'দেবনা আমার মেয়ে', তবে ?"

"পাঠাবার একটা সময় আছে, নিয়ম আছে, সে তুমি এখন বুঝবে না। ও নিয়ে মিছে মাথা খারাপ করো না। যাও ভেতরে যাও।"

"ভেতরে নয় যাচ্ছি, কিন্তু মনের ভেতরে তোলপাড় হচ্ছে বাবা। রঘুর মৃত্যু আজ আমার দিষ্টি খুলে দিয়েছে। ভগবানের রাজ্যেই যখন সময় বাঁধা নেই, নিয়ম নেই, তখন মানুষের থাকবে কি ? এই আজ আমাকে পরের ঘরে পাঠাতে বুক ফাটছে তোমার, একুনি যদি মিত্য এসে দাঁড়ায় দিতে তো হবে তার হাতে তুলে ?" সহসা আঁচলের কোণ তুলে চোখটা মুছে নেয় সত্য, তার পর ভারী গলায় বলে, "তখন তো বলতে পারবে না— 'এখনও সময় আসে নি, নিয়ম নেই ?' ও স্বস্তরবাড়ি আর যমের বাড়ি দুই যখন সমতুল্য, তখন আর মনে খেদ রেখো না। পাঠিয়ে দিয়ে মনে করো সত্য মরে গেছে।"

আর বোধ করি শক্ত থাকতে পারে না সত্য, নিজের সেই কাল্পনিক মৃত্যুর শোকেই ফুঁপিয়ে কেঁদে ওঠে।

স্তব্ধ রামকালী সেই ক্রন্দনবতীর দিকে তাকিয়ে থাকেন। মেয়েটা কি শুধুই শেখা বুলি কপূতে যায় না সত্যিই এমনি করে ভাবে ?

খানিকক্ষণ পরে স্তব্ধতা ভেঙে বলেন, "মন-কেমনের কথা আমি ভাবি না সত্য, তুমি বড়দের মত কথা বলতে শিখেছ তাই বলছি, তোমায় পাঠালে আমার মান থাকবে না।"

সত্য গভীর দুঃখে হতাশ স্বরে বলে, "বুঝি বাবা, বুঝি না কি ? কিন্তু এ তো তবু শুধু ওদের কাছে মান থাকা মান যাওয়া! গলবস্তুর হয়ে যেদিন ওদের ঘরে মেয়ে দিয়েছ, মান তো সেদিনই গেছে। কিন্তু ওরা যদি তোমার মেয়েকে ত্যাগ দেয়, তা হলে যে দেশসুদ্ধ লোকের কাছে হতমান্য। দু' দিক বিবেচনা করো বাবা।"

রামকালীর গলা দিয়ে বুঝি আর শব্দ বেরায় না, শুধা স্তব্ধ হয়ে গেছে তাঁর। মেয়েটা কি সত্যি বালিকা মাত্র নয়, ওর মধ্যে কি কোন শক্তির "ভর" হয় ? বুদ্ধির শক্তি, বাক্যের শক্তি ?

"আচ্ছা তুমি যাও, আমি ভেবে দেখছি।"

"ভাবো। যা পারো আজ রাত্তিরের মধ্যে ভেবে নাও। ওই হতচ্ছাড়াটা তো রাত পোহাতেই বিদেয় হবে।"

"ছি মা, স্বস্তরবাড়ির লোকের সম্পর্কে কি এভাবে বলতে আছে ?"

"নেই তো জানি বাবা, কিন্তু দেখে যে অপিরবিত্তি আসছে। কুটুমবাড়িতে পাঠাবার যুগ্য একটা লোকও জোটো নি!"

রামকালী ঈষৎ তরল কণ্ঠে বলে উঠেন, "তুই তো আমার মুখ হেঁট হবার ভয়ে সারা, কিন্তু স্বস্তররা ত্যাগ না দিয়ে কি ছাড়বে তোকে ? দুদিন ঘর করেই তো ফেরত দেবে। তোকে নিয়ে কে ঘর করবে সত্য ? এত ব্যক্তি কে সহিতে পারবে ?"

সত্য সগৌরবে মাথা তুলে বলে, "সে তুমি নিশ্চিন্দি থেকে বাবা, সত্যকে দিয়ে তোমার মুখ কখনো হেঁট হবে না।"

রামকালী গভীর স্নেহে মেয়ের পিঠে একটু হাত রাখেন।

মেয়েটা যে কি, তিনি বুঝে উঠতে পারেন না। থেকে থেকে সে যে তীক্ষ্ণ একটা প্রশ্নের মত তাঁর সামনে এসে দাঁড়ায়। যে কথাগুলো বলে, সব সময় সেগুলো মেয়ের শেখা কথা বলে উড়িয়ে দেওয়াও শক্ত। সে সব কথা চিন্তিত করে, বুঝিবা ভীতও করে। তবু রামকালী ওকে বুঝছেন, কিন্তু পৃথিবী কি ওকে বুঝবে ?

ও কেন সাধারণ হল না ?

পুণ্যের মত, বাড়ির আর পাঁচটা মেয়ের মত ? রামকালী তাহলে ওর সম্পর্কে নিশ্চিন্ত থাকতেন। সুখী হতেন।

কিন্তু ?

সত্যিই কি সুখী হতেন ? সত্য সাধারণ হলে, বোকা হলে, ভোঁতা হলে ? সত্যকে যে তাঁর একটা দামী জিনিস বলে মনে হয়, সেটা কি হত তাহলে ? কেবলমাত্র স্নেহের ওজন চাপিয়ে পান্নাটা এত ভারী করে তুলতে পারতেন ?

"যাও মা ভেতরে যাও, আর্হিক করব এবার।"

“যাচ্ছি—” উঠে দাঁড়িয়েই রামকালীর অসাধারণ মেয়ে সহসাই একটা হাস্যকর সাধারণ কথা বলে বসে, “ভেতর-দালান পর্যন্ত একটু এগিয়ে দেবে বাবা?”

“এগিয়ে দেব? কেন রে?”

“রঘুর দিশটা দেখে অবধি গা-টা কেমন ছমছম করছে বাবা। মেলাই অন্ধকার ওখানটায়।”

“হ্যাঁ হ্যাঁ চল, যাচ্ছি আমি। কেন যে তুমি গেলে সেখানে! ভাল করো নি।”

রামকালী কি একটু আশস্ত হলেন? তাঁর নির্ভীক মেয়ের এই ভয়টুকু দেখে?

মেলাই অন্ধকারটা পার হয়ে এসে সত্য একবার থমকে দাঁড়াল, তার পর ঝপ করে বলে উঠল, “ভাবতে ভুলে যেও না বাবা!”

“ভাবতে? কি ভাবতে? ও!” অন্যমনস্কতা থেকে সচেতনতায় ফিরে আসেন রামকালী, “ভেবেছি। পাঠিয়েই দেব তোমায়।”

সহসা কান্নায় উথলে উঠল সত্য, “আমার উপর রাগ করলে বাবা?”

“না, রাগ করি নি।”

“আবার আনবে তো?” কান্না অদম্য হয়ে ওঠে।

“ওরা যদি পাঠায়।” নির্লিপ্ত কণ্ঠে বলেন রামকালী।

“পাঠাবে না বৈকি, ইস!” মুহূর্তে কান্না থামিয়ে উদ্দীপ্ত হয়ে ওঠে সত্য, “তুমি ওদের মান রাখছ, আর ওরা তোমার মান রাখবে না? পাছে কুটুম্বর সঙ্গে ‘অসরস’ হয়, আসা-যাওয়া বন্ধ হয়, এই ভয়ে বুক ফেটে যাচ্ছে তবু যেতে চাইছি আমি, বুঝবে না তারা সে কথা?”

রামকালী আর একবার চমৎকৃত হলেন।

অতটুকু মগজে এত তলিয়ে ও ভাবে কি করে? তারপর হতাশ নিঃশ্বাস ফেললেন, বোঝবার কথা যদি সবাই বুঝত?

মেয়ের বিয়ে দেবার সময় জামাইয়ের রূপ দেখে নেওয়া যায়, কুল দেখে নেওয়া যায়, অবস্থা দেখে নেওয়া যায়, কিন্তু তার সংসারসুদ্ধ পরিজনের প্রকৃতি তো আর দেখে নেওয়া যায় না!

মেয়েকে রামকালী গৌরীদান করেছেন।

পাত্র খোজার সময় দীনতারিণী বলেছিলেন, “তোমার মোটে একটা মেয়ে, পরের ঘরে কেন দেবে? একটি সোন্দর দেখে কুলীনের ছেলে নিয়ে এসে ঘরজামাই রাখো।”

ভুবনেশ্বরীও স্পন্দিতচিন্তে শাশুড়ীর অন্তরালে বসে রায় শোনবার জন্যে হাঁ করে ছিল, কিন্তু রামকালী তাদের আশায় জল ঢাললেন। বললেন, “ঘরজামাই? ছি ছি ছি!”

“কেন?” দীনতারিণী বুকের ভয় চেপে জেদের সুরে বলেছিলেন, “লোকে কি এমন করে না?”

“লোকে তো কত কি করে মা!”

“তা বৌমার যে আর ছেলেপুলে হবে এ আশা দেখি না, কুষ্টিতেও নাকি আছে এক সন্তান। তা’লে তোমার বিষয়-আশয় তো জামাই-ই পাবে, ছোট থেকে গড়েপিটে তৈরি না করলে—”

রামকালী তীব্র প্রতিবাদে মাকে নির্বাক করে দিয়েছিলেন, “রাসু থাকতে, তা’র ভাইয়েরা থাকতে জামাই বিষয় পাবে এ কথা তুমি মুখে আনলে কি করে মা? ছি ছি।

সত্য কেন বাপের ভাত খেতে যাবে? এমন পাশ্বে দেব, যাতে জামাইকে স্বস্তরের বিষয়ে লোভ করতে না হয়।”

তা সে কথা রামকালী রেখেছিলেন।

মেয়ের যা বিয়ে দিয়েছিলেন, স্বস্তরের সম্পত্তিতে লোভ করার দরকার তাদের নেই।

বিষয়-আশয় ঢের, সে-ও বাপের এক ছেলে।

শুনেছেন বাপ একটু কৃপণ, তা সে আর কি করা যাবে? সব নিখুঁত কি হয়?

তেমনি যে চাঁদের মত জামাই!

তা ছাড়া পরম কুলীন।

এর বেশী আর কি দেখা যায়?

কিন্তু লোভ কি মানুষ দরকার বুঝে করে? রামকালী কি স্বপ্নেও ভেবেছেন তাঁর পরম কুলীন বেহাই শ্যেনদৃষ্টি মেলে বসে আছেন তাঁর বিষয়ের দিকে? এমন তীব্র লোভ যে রামকালীর ‘অবর্তমান’ অবস্থাটাই তাঁর একান্ত চিন্তনীয় বিষয়?

রামকালীর চাইতে বছর দশেকের বড় হয়েও, নিজে তিনি চিরবর্তমান থাকবেন এমনই আশা।

এসব জানেন না রামকালী ।
 শুধু জামাই পাঠচর্চা করছে এটা জেনেছেন, জেনে সন্তুষ্ট হয়েছেন ।
 'স্নেহ বিদ্যা' বলে হয় করবেন, এমন সংস্কারাঙ্কন রামকালী নন । শিশুক, ভালই । স্নেহদেরই
 তো রাজত্ব চলছে এখন ।

॥ উনিশ ॥



লক্ষ্মীকান্ত বাঁড়ুয়ে মারা গেলেন ।

পুণ্যবান মানুষ, নিয়মের শরীর, ভুগলেন না ভোগালেন না, চলে
 গেলেন সজ্ঞানে । সকালেও যথারীতি স্নান করেছেন, ফুল তুলেছেন,
 পূজো করেছেন । পূজো করে উঠে বড় ছেলেকে ডেকে বললেন,
 “তোমরা আজ একটু সকাল সকাল আহারাদি সেরে নাও, আমার
 শরীরটা ভাল বুঝছি না, মনে হচ্ছে ডাক এসেছে ।”

বড় ছেলে হতচকিত হয়ে তাকিয়ে থাকে, বোধ করি ধারণাও
 করতে পারে না, লক্ষ্মীকান্তর শরীর খারাপের সঙ্গে তাদের আহারাদি
 সেরে নেওয়ার সম্পর্ক কোথায় ? আর 'ডাক' কথাটারই বা অর্থ কি ?

লক্ষ্মীকান্ত ছেলের ওই বিহ্বলতায় হাসলেন । হেসে বললেন, “আহারাদি সেরে দুই ভাই আমার
 কাছে এসে বসবে, কিছু উপদেশ দিয়ে যাব । অবশ্য উপদেশ দেবার অধিকার আর কিছুই নয়,
 কতটুকুই বা জানি, জগৎকে কতটুকুই বা দেখছি, তবু বয়সের অভিজ্ঞতা । বধূমাতাদের জানিয়ে
 দাও গে, রান্না কতকগুলি 'পদ' বাড়িয়ে যেন বিলম্ব না করেন ।”

বাপ কেবল তাদের খাওয়ার কথাই বলছেন । কিন্তু তাঁর নিজের ?

বড় ছেলে রুদ্ধ কণ্ঠে বলে, “আপনার অনুপাক কখন হবে ?”

“এই দেখ বোকা ছেলে, বিচলিত হচ্ছে কেন ? আমার আজ পূর্ণিমা, অনু নেই । ফলাহার একটু
 করে নেব, নারায়ণের প্রসাদ । প্রসাদে চিন্তাও কিছু নেই ।”

ছেলে গিয়ে ছোট ভাইয়ের কাছে ছেড়ে পড়ল । তার পর অন্তঃপুরিকারা টের পেলেন ।
 কিছুক্ষণের মধ্যেই সমস্ত সংসারে শোকের ছায়া নেমে এল । কেউ অবিশ্বাস করল না, কেউ হাস্যকর
 বলে উড়িয়ে দিল না, 'অমোঘ নিশ্চিত' বলে ধরে পড়ল ।

বাঁড়ুয়ের সংসার থেকে এ সংবাদ সঙ্গে সঙ্গেই বাইরেও ছড়িয়ে পড়ল, কারণ আশুন কখনো
 এক জায়গায় আবদ্ধ থাকে না ।

মুহূর্তে চারিদিকে প্রচার হয়ে গেল, “বাঁড়ুয়ে যে চললেন !”

যেন বাঁড়ুয়ে কোন বিদেশভ্রমণে যাচ্ছেন, নৌকো ভাড়া হয়ে গেছে, সঙ্গীরা প্রস্তুত হয়ে দাঁড়িয়ে
 আছে কোথাও ।

উঠানে তুলসীমঞ্চের নীচে লক্ষ্মীকান্তের শেষ শয্যা বিছানো হয়েছে, বালিশে মাথা রেখে দুই
 হাত বুকে জড়ো করে টানটান হয়ে শুয়ে আছেন তিনি সোজা ।

কপালে চন্দনলেখায় হরিনাম, দুই চোখের উপর-পাতায় আর দুই কানে চন্দন মাখানো
 তুলসীপাতা । বুকের উপর ছোট্ট একটি হাতে-লেখা পুঁথি । লক্ষ্মীকান্তর নিজেরই হাতের লেখা, গীতার
 কয়েকটি শ্লোক । নিত্য পাঠ করতেন, সেটি সঙ্গে দেওয়া হচ্ছে ।

যাত্রাকালে কেউ স্পর্শ করবে না, যাত্রীর নিষেধ । বিছানাটি ছেড়ে আশেপাশে মাথা হেঁট করে
 বসে আছে ছেলেরা, পাড়ার কর্তা-ব্যক্তির । অন্তঃপুরিকারা আলম্ব ঘোমটায় আবৃত হয়ে বসে নীরবে
 অশ্রু বিসর্জন করছেন ।

মৃত্যুর দণ্ডকাল অতীত না হওয়া পর্যন্ত ডাক ছেড়ে কাঁদা চলবে না, সেটাও নিষেধ । ক্রন্দনধ্বনি
 আত্মার উর্ধ্বগতির পথে বিঘ্ন ঘটায় ।

বাঁড়ুয়ে-গিন্নীও সেই নিষেধাজ্ঞা শিরোধার্য করে নিঃশব্দে ডুকরোচ্ছেন ।

ঘোষাল এসে দাঁড়ালেন ।

কাঁপা গলায় বলে উঠলেন, “জনকরাজার মত চললে বাঁড়ুয়ে ?”

লক্ষ্মীকান্ত মৃদু হেসে মৃদু স্বরে বললেন, “বিদেশ থেকে স্বদেশে। বিমাতার কাছ থেকে মাতার কাছ।”

তারপর ছেলের দিকে তাকিয়ে বললেন, “তারক ব্রহ্ম।”

অর্থাৎ বৃথা কথায় কালক্ষেপ নয়।

“নমো নারায়ণায় নমো নারায়ণায়, হরেনর্মমৈব কেবলম্।”

আস্তে আস্তে চোখের পাতা দুটি বুজলেন লক্ষ্মীকান্ত। তুলসীপাতা দুটি ঢেকে দিল দুটি চোখের পাতা।

নিঃশ্বাসের উত্থান-পতনের সঙ্গে সঙ্গে নামজপ হতে থাকল ভিতরে, যতক্ষণ চলল শ্বাসের ওঠাপড়া।

একসময় থামল।

যাক, বয়স হয়েছিল লক্ষ্মীকান্তর, ভুগলেন না ভোগলেন না, চলে গেলেন, এতে দুঃখের কিছু নেই। অন্তত দুঃখ করা উচিত নয়। মানুষ তো মরবার জন্যেই এসেছে পৃথিবীতে, সেই তার সর্বশেষ, আর সর্বশ্রেষ্ঠ কর্মটি যদি নিপুণভাবে নিখুঁতভাবে করে যেতে পারে, তার চাইতে আনন্দের আর কি আছে?

না, লক্ষ্মীকান্তর মৃত্যুতে দুঃখের কিছু নেই।

তবু নিকট-আত্মীয়রা দুঃখ পায়।

মায়াবন্ধ জীব দুঃখ না পেয়ে যাবে কোথায়?

কিন্তু নিকট-আত্মীয় না হয়েও একজন এ মৃত্যুতে দুঃখের সাগরে ভাসে, সে হচ্ছে সারদা।

শ্রদ্ধ উপলক্ষে নতুন কুটুম্বকে নিমন্ত্রণ জানিয়েছে বাঁড়ুয়োর ছেলেরা আর ‘নিয়মভঙ্গ’ অবধি থাকার আবেদন জানিয়ে রাসুকে নিতে লোক পাঠিয়েছে।

তুলনা হিসেবে বলতে গেলে সারদার মাথায় একখানা ইট বসিয়েছে।

নিয়ে যাবে পরদিন। কথা চলছে সারাদিন।

এ বাড়ি থেকে রামকালী খবর শোনামাত্র একবার দেখা করে এসেছেন, এবং যথারীতি হবিষ্যান্নের যোগাড় পাঠিয়েছেন লৌকিকতা হিসাবে। প্রচুরই পাঠিয়েছেন।

এখন আবার রাসুর সঙ্গে লোক যাবে, শ্রদ্ধের ‘সভাপ্রণামী’ আর সমগ্র সংসারের ঘাটে ওঠার কাপড়চোপড় নিয়ে। নিয়মভঙ্গের দিন দুপুরে জাল ফেলানো হবে, মাছ যাবে, রাসুর শাওড়ীদের জন্য সিঁদুর আলতা পান সুপারি যাবে।

এই সব আলোচনাই চলছে সারাদিন।

সারদার মনে হচ্ছে, সবই যেন বড্ড বেশী বাড়াবাড়ি হচ্ছে।

এই যে তার বাবার খুঁড়ী মারা গেলেন সেবার, কই এত সব তো হয় নি!

যাক, সে কথা যাক।

পয়সা আছে বিলোবে।

কিন্তু সারদার খাস তালুকটুকু না এই উপলক্ষে বিকিয়ে যায়!

রাতে ছাড়া কথা কওয়ার উপায় নেই, স্পন্দিতচিত্তে সংসারের কাজ সারে সারদা, আর প্রহর গোনে।

তবু কুটুম্বদের একটু আক্কেল আছে, দিনে দিনেই নিয়ে চলে যায় নি, একটা রাত হাতে রেখেছে।

এ বাড়ির খাওয়া-দাওয়া মিটেতে রাতদুপুর হয়ে যায়।

তবু একসময় আসে সেই আকাজক্ষিত সময়।

দরজায় হড়কো লাগিয়ে দেওয়া যায় এবার, সমস্ত সংসার থেকে পৃথক হয়ে এসে বসা যায় দুটো মানুষ।

চট করে কথা বলা সারদার স্বভাব নয়।

প্রথমটা যথারীতি প্রদীপ উস্কোয়, প্রদীপের শিখর ওপর বাটি ধরে ছেলের দুধ গরম করে, ছেলে ডুলে দুধ খাওয়ায়, তার পর তাকে শুইয়ে চাপড়ে তার ঘুম সম্পর্কে নিশ্চিত হয়ে এদিকে এসে পা ঝুলিয়ে বসে।

বড় করে একটা নিঃশ্বাস ফেলে।

তার পর বলে ওঠে, “যাচ্ছে তা হলে?”

রাসু অবশ্য এ প্রশ্নের জন্য প্রস্তুতই ছিল, তাই নির্লিপ্ত স্বরে বলে, “যাওয়া ছাড়া তো উপায় দেখছি না।”

“উপায় খুঁজে বেড়াচ্ছিলে বুঝি ?” ব্যঙ্গ-তীক্ষ্ণ সুর।

“খুঁজে আর কি বেড়াব ? জানি তো ছাড়ান-ছিড়েন নেই!”

“চেষ্টা থাকলে ছাড়ান।” আরও তীক্ষ্ণ ছল ফোঁটায় সারদা।

“কি করে শুনি ?” ঈষৎ উন্মাদ প্রকাশ করে রাসু।

“শরীর খারাপের ছুতো দেখাতে পারলে কেউ টেনে নিয়ে যেতে পারে না।”

রাসু বিরক্তভাবে বলে, “সে ছুতোটা দেখাব কি করে শুনি, এই আঁকাড়া দেখানা নিয়ে ?”

সারদা এ বিরক্তিতে ভয় পায় না, দমে না। অগ্নান বদনে বলে, “চেষ্টা থাকলে কি না হয়! বলকা দুধ তোমার ধাতে অসৈরণ, লুকিয়ে সের দু-তিন কাঁচা দুধ চুমুক দিয়ে খেয়ে ফেললেই এখুনি এককুড়ি বার মাঠে ছুটতে হত। অসুখ বলে টের পেত সবাই। গুরুজনের সঙ্গে মিছে কথাও বলা হত না।”

“তা এটা আর মিছে ছাড়া কি ? মিছে কথা না হয়ে, হয় মিথ্যে আচরণ!”

নীতিবাগীশ রাসু জোর দিয়ে বলে।

“থামো থামো,” সারদা তীব্র প্রতিবাদ করে ওঠে, “এটুকু তো আর কখনো করো না গোসাঁইঠাকুর! ফটা বটঠাকুরদের বাড়ি থেকে পাশা খেলে দেরি করে ফিরে সদর দিয়ে না ঢুকে ষিড়কি দিয়ে ঢোকা হয় কেন শুনি ? মেজকাকা মশাই যে সমস্ত পড়ার টোল ঠিক করে দিয়েছেন, সেখানে তো মাসের মধ্যে দশ দিন কামাই দাও, সে কথা জানাও ওনা করে ? নিতিনিয়মে বেরিয়ে এখান-ওখান করে বেড়াও না ? আমাকে আর তুমি ধম্ব দেখাতে এস না।”

“আমি কাউকে কিছু দেখাতে চাই না,” বীরপুরুষ রাসু বলে, “গুরুজন যা নির্দেশ দেবে মানব, ব্যস।”

“তা তো মানবেই। সেখানে যে মধু আছে। শুধু বাগানের নতুন ফুল। পাটমহলের পাটরাণী।”

“বাজে কথা বলো না।”

“বাজে কথা বটে!”

সারদা আর একটা নিঃশ্বাস ফেলে বলে, “আমার গা ছুঁয়ে প্রতিজ্ঞে করেছিলে, সে কথা মনে পড়ছে ?”

“পড়বে না কেন ? তা আমি তো আর জামাইষষ্ঠীর নেমস্তনু খেতে যাচ্ছি না। যাচ্ছি একটা মান্যমান লোকের শ্রাদ্ধয়।”

“তার সঙ্গে আমারও শ্রাদ্ধ-পিণ্ডির ব্যবস্থা হচ্ছে, অন্তরেই জানছি। এবার নিশ্চয়ত তার মেয়ে পাঠাবার কথা কইবে।”

রাসু তেড়ে ওঠার ভান করে বলে, “তোমার যেমন কথা! নিজে থেকে কেউ মেয়ে পাঠাবার কথা বলে ?”

“বলে বৈকি। স্কেস্তর বিশেষে বলে। সতীনের ওপরে পড়া মেয়ের কথায় বলে।”

“বলি তার ঘরবসতের বয়েসটা হবে, তবে তো ? তুমি যেন রাতদিন দড়ি দেখে ‘সাপ’ বলে আঁতকাচ্ছ!”

“বয়েস!” সারদা তীব্র ঝঙ্কারে বলে ওঠে, “মেয়েমানুষের বয়েস হতে আবার কদিন লাগে ? দশ পেরোলেই বয়স। আর মেজকাকা মশাইয়ের কড়াকড়ির জারিজুরি তো ভেঙে গেল। নিজের মেয়েকেই যখন বয়েস না হতেই পাঠালেন!”

“গুরুজনের কাজের ব্যাখ্যানা করো না। কারণ ছিল তাই এ কাজ করেছেন।”

সারদা দুর্বীর, সারদা অদম্য।

সেও সমানে সমানে জবাব দেয়, “তা তোমার দ্বিতীয় পক্ষকে স্বপ্নবধর করতে নিয়ে আসারও একটা কারণ আবিষ্কার হবে। তবে এই জেনে রাখো, নতুন বৌ যদি আসে, সেও এক দোর দিয়ে ঢুকবে, আমিও আর এক দোর দিয়ে দড়ি-কলসী নিয়ে বেরিয়ে যাব।”

অন্তটা মোক্ষম।

রাসু এবার কাবু হয়।

আপসের সুরে বলে, “আচ্ছা অত পেঁচিয়ে পেঁচিয়ে দুঃখ ডেকে আনবার কি দরকার তোমার বেলো তো ? যাচ্ছি দাদাশ্বশুরের শ্রাদ্ধ, খাব মাখব চলে আসব, ব্যস! আমি কি কাউকে আনতে যাচ্ছি ?”

“তা সেটা মনে রাখলেই হল ।”

সারদা সহসা রাসুর একটা হাত টেনে নিয়ে ঘুমন্ত ছেলের মাথায় ঠেকিয়ে দিয়ে বলে, “তবে সত্যি করে যাও সেকথা!”

“আ ছি ছি! কি মতিবুদ্ধি তোমার! ছেলের মাথায় হাত দিয়ে—”

সারদা অকুতোভয়ে বলে, “তাতে ভয়টা কি ? আমায় বেলো না খোকায় মাথায় হাত দিয়ে দিবি করতে— জীবনে কক্ষনো পরপুরুষের দিকে চোখ তুলে চাইব না, একশ বার সে দিবি করব ।”

“চমৎকার বুদ্ধি! সেটা আর এটা এক হল ?”

“কেন হবে না ? আমি ছাড়া জগতের আর সকল মেয়েমানুষকে পরত্রী ভাবলে কোন কষ্ট নেই!”

“বাঃ, যাকে অগ্নিনারায়ণ সাক্ষী করে গ্রহণ করলাম—”

“ও!” সারদা ঝট করে উঠে দাঁড়ায় । দরজার খিলটা খুলে ফেলে, কপাট ধরে দাঁড়িয়ে চাপা অথচ ভয়ঙ্কর একটা শব্দে বলে ওঠে, “ও বটে! এতক্ষণে প্রকাশ পেল মনের কথা! তা এতক্ষণ না ভুগিয়ে সেটা বললেই হত! আচ্ছা—”

রাসুও অবশ্য এবার ভয় পেয়েছে, সেও নেমে এসে বলে, “আহা, তো কপাট খুলছ কেন ? যাচ্ছ কোথায় ?”

“যাচ্ছি সেইখানে, যেখানে খলকপটা নেই, আগুনের জ্বালা নেই।” বলে ঝট করে বেরিয়ে পড়ে অন্ধকারে মিশিয়ে যায় সারদা ।

নাঃ, আর কিছু করবার নেই!

নিরুপায় ক্ষোভে কিছুক্ষণ উঠেচেনের সেই গভীর রাত্রির নিকম্ব অন্ধকারের দিকে তাকিয়ে থেকে নিঃশব্দে কপাটটা ভেজিয়ে দিয়ে খাটের ওপর বসে পড়ে রাসু ।

ঘাম গড়াচ্ছে সর্বাস্ত্র দিয়ে ।

গরমে নয়, আতঙ্কে ।

কিন্তু করবার কি আছে এখন ? ঘর থেকে বেরিয়ে তো আর বৌ খুঁজে বেড়াতে পারবে না রাসু, মা-খুড়ীর ঘুম ভাঙিয়ে দুসংবাদটা জানাতেও পারবে না!

নিজের হাতে যদি করণীয় কিছু থাকে তো সে হচ্ছে নিজের হাতটা মুঠো পাকিয়ে নিজের মাথায় কিল মারা!

॥ কুড়ি ॥

এলোকেশী দাওয়ান পাটি পেতে বসে বৌয়ের চুল বেঁধে দিচ্ছেন ।

দিচ্ছেন অনেকক্ষণ থেকেই । সেই দুপুরবেলা বসেছিলেন— এখন বেলা

প্রায় গড়িয়ে এল ।

এলোকেশী যেন পণ করেছেন আজ তাঁর জীবনের শ্রেষ্ঠ শিল্পকীর্তি

দেখিয়ে ছাড়বেন । বৌকে সামনে রেখে তার পিছনে হাঁটু গেড়ে উঁচু হয়ে

বসেছেন তিনি, মুখের ভাব কঠিন কঠোর ।

ওদিকে টানের চোটে সত্যবতীর রণের শির ফুলে উঠেছে, চুলের

গোড়াগুলো মাথার চামড়া থেকে উঠে আসতে চাইছে, ঘাড় অনেকক্ষণ

আগে থেকেই টনটন করতে শুরু করেছে, এখন মেরুদণ্ডের মধ্যও

একটা অস্বস্তি শুরু হচ্ছে ।

অথচ তার কেশকলাপ নিয়ে যে অপূর্ব শিল্প-রচনার চেষ্টা চলেছে, আশা হচ্ছে না সহজে তার সমাপ্তি ঘটবে ।

কিন্তু কেবলমাত্র এলোকেশীর অক্ষমতাকেই দায়ী করলে অবিবেচনার কাজ হবে, দায়ী

অপরপক্ষ । সত্যবতীর চুলগুলো যেন বেয়াড়া ঘোড়া, কোনমতেই তাকে বাগ মানিয়ে বশে আনা

যাচ্ছে না ।

খুলে খাটো আর আড়ে ভারী চাপ চাপ কোঁকড়া কোঁকড়া চুলগুলো খোলা থাকলে যতই সুন্দর

দেখাক, তাকে বেণীর বন্ধনে বেঁধে কবরীর আকৃতি দিতে গেলেই মুশকিলের একশেষ । গোড়া



বাঁধতে গেলে ফসফস করে এলিয়ে খুলে পড়ে, কোনরকমে যদিবা তিনগুছির ফেরে ফেলা যায় তো পাঁচগুছি নগুছির দিকেও যাওয়া চলে না।

কিন্তু এলোকেশী আজ বন্ধপরিবর, সাতগুছির বাঁধনে বেঁধে 'কন্ডা খোঁপা' করে দেবেন বৌকে। তাই বারতিনেক অসফল্যের পর একগোছা মোটা মোটা কালো ঘুনসি দিয়ে চুলের গোড়াটাকে প্রায় ব্রহ্মতালুতে জড় করে এনে প্রাণপণ বিটকেলে বেঁধে ফেলেছেন, এবং সাতগুছির সাত ভাগকে আয়ত্ত করতে চেষ্টা করছেন।

দীর্ঘস্থায়ী এই চেষ্টায় সত্যবতীর অবস্থা উপরোক্ত। অনেকক্ষণ বাবু হয়ে বসে থাকার পর এবার হাঁটু দুটো মুড়ে বুকের কাছে জড়ো করে বসেছে সত্যবতী, কারণ পায়ে কিঁকিঁ ধরেছিল। মুখটা সত্যবতীর আকাশমুখো আর সেই মুখের ওপর পরনের নীলাম্বর শাড়িখানার আঁচলটুকু চাপা দেওয়া।

মুখে আঁচল চাপা না দিয়ে উপায় নেই, কারণ চুল বাঁধবার সময় ঘোমটা দেওয়া চলে না। অথচ জলজ্যান্ত আন্ত মুখখানা খুলে বসে থাকলেও তো চলে না। না-ই বা ধারেকাছে কেউ থাকল আর হলই বা শাওড়ী পিছনে বসে, তবু 'নতুন বৌ' বলে কথা। তাই আঁচলটা তুলে মুখে চাপা দিয়েছে সত্যবতী। মানে দিতে বাধ্য হয়েছে। ঘোমটা খসবার আগেই এলোকেশী নির্দেশ দিয়েছেন, "আঁচলটা মুখে ঢাকা দাও দিকি বাছা! তোমার তো আর বোধ-বুদ্ধির বালাই নেই, অগত্যে সবই স্পষ্ট করে বলে দিতে হবে আমায়।"

দিনটা কি তবে সত্যবতীর স্বপ্নরবাড়ি বাসের প্রথম দিন?

না তা নয়, এসেছে সত্যবতী প্রায় মাসখানেক হয়ে গেল, কিন্তু মাথাটা গুর এ পর্যন্ত শাওড়ীর হাতে পড়ে নি। সৌদামিনীই চুল বেঁধে সরময়দা মাথিয়ে আলতা পরিয়ে নতুন বৌয়ের প্রসাধন আর যত্নসাধন করছিল কদিন! হঠাৎ আজ এলোকেশীর নজরে পড়ল বৌয়ের চুল বেড়াবিনুনি করে বাঁধা। দেখে রাগে জ্বলে উঠলেন এলোকেশী। তবু নিশ্চিত হবার জন্যে ভুরু কুচকে ডাক দিলেন, "এদিকে এস দিকি বৌমা!"

শাওড়ীর সামনে কথা বলাও নিষেধ, মুখ খোলাও নিষেধ, সত্যবতী নীরবে কাছে এসে দাঁড়াল। ঘোমটা অবশ্য বজায় থাকলই, এলোকেশী ইচ্ছিকা একটা টানে পুত্রবধূর পিঠের কাপড়টা তুলে খোঁপাটা দেখে নিলেন। ঠিক বটে, বেড়াবিনুনিই সটে।

তেলে-বেগুনে জ্বলে ডাক দিলেন, "সদ্য সদি!"

যাকে বলে ত্রস্তব্যস্তে সেইভাবে ছুটে এল সৌদামিনী। দেখল নতুন বৌ 'বুকে মাথায় এক' হয়ে ঘাড় হেঁট করে দাঁড়িয়ে, আর মামী তার পিঠের কাপড় উঁচু করে তুলে ধরে দণ্ডায়মান। মামীর নয়নে অগ্নিশিখা; কপালে কুটিলরেখা।

'কি বলছ' এ প্রশ্ন উচ্চারণ করল না সৌদামিনী, শুধু শক্তিত দৃষ্টিতে দাঁড়িয়ে রইল।

কি হল বৌয়ের পিঠে?

কোন জড়ুল চিহ্ন, না কোন চর্মরোগের আভাস, নাকি বা কোন পুরনো ক্ষতের দাগ! অর্থাৎ নতুন বৌ কি 'দাগী'! আর মামীর শ্যেনদৃষ্টির সামনে ধরা পড়ে গেছে সেটা!

অবশ্য ভুল ধারণা নিয়ে বেশীক্ষণ থাকতে হল না সৌদামিনীকে, এলোকেশী প্রবল স্বরে বলে উঠলেন, "বলি সদি, এমন ব্যাগার ঠেলার কাজ কি না করলেই নয়?"

বুক থেকে পাথর নামে সৌদামিনীর।

যাক বাঁচা গেল।

নতুন কিছু নয়। সেই আদি ও অকৃত্রিম লক্ষ্য।

অতএব সাহসে ভর করে বলল, "কি হল?"

"কি হল! বলি শুধোতে লজ্জা করল না? ধষের ষাঁড়ের মতন আঁকাড়া গতর নিয়ে দুবেলা ভাতের পাথর মারছিস, আর গতরে হাওয়া দিয়ে বেড়াচ্ছিস, একটু হায়া আসে না প্রাণে? দশটা নয় বিশটা নয় একটা! ভাই-বৌ, তার চুলটা বেঁধে দিয়েছিস এত অচ্ছেদ্বা করে! বলি কেন? কেন? এত অগেরাহি কিসের?"

"হলটা কি তা বলবে তো?"

সহজ গলায় বলে সৌদামিনী। আর সত্যবতী ঘোমটার মধ্যে থেকে অবাক হয়ে প্রায় থরথর করে কাঁপতে থাকে। না, এলোকেশীর কটু-ভাষণে নয়, গিন্দীদের মুখে এরকম বিচ্ছিরি বিচ্ছিরি কথা শোনার অভ্যাস পাড়াবেড়ানি সভ্যর আছে। রামকালী চাটুয্যের বাড়ির কথাবার্তাগুলো কথঞ্চিৎ সভ্য,

নইলে তারই সেজপিসি সাবিপিসির বাড়ি সর্বদা এই ধরনের কথার চাষ। সেজন্যে না। এলোকেশীর কটুভাষণে না। অবাক হয় সৌদামিনীর সহ্যশক্তি দেখে। এত অপমানের পর ওই রকম সহজভাবে কথা বলল ঠাকুরঝি!

এটা সত্যবতীর অদেখা।

কটু কথার পরিবর্তে হয় কটু কথা, নয় ক্রন্দন, এই দেখতেই অভ্যস্ত সে! আর ঠাকুরঝি কিনা বলছে “হলটা কি তা বলবে তো?”

এলোকেশী অবশ্য অবাক হন না, কারণ সৌদামিনীর এই সহ্যশক্তি তাঁর পরিচিত। তবে তিনি তো আর প্রশংসায় উদ্বেল হন না, বরং এটা তার মামীর প্রতি অগ্রাহ্য ভাব বলেই রেগে জুলে যান।

এখনো তাই বললেন, “হলটা কি তা বলে তবে বোঝাতে হবে? মনে মনে জানছ না? চোখে দেখতে পাছ না? এ কী ছিরির চুল বাঁধা হয়েছে? বৌয়ের মাথায় বেড়া-বিনুনি! ছি ছি, এতখানি ব্যেস হল, কখনো শ্বশুরবাড়ির বৌয়ের মাথায় বেড়া-বিনুনি দেখি নি! গলায় দড়ি তোর সদু, গলায় দড়ি যে একটা মাস্তুর মাথা, তাও একখানা বাহারি খোঁপা বেঁধে দিতে পারিস না!”

সদু হেসে ওঠে, “বৌয়ের চুল যা বাহারি, ওতে আর বাহারি খোঁপা হয় না। বাগ মানানোই যায় না।”

“বাগ মানানো যায় না!” এলোকেশী ঝঙ্কার দিয়ে ওঠেন, “আচ্ছা, দেখব কেমন না যায়। এই বাঁড়ুয়ে-গিনীর কাছে জন্ম হয় না এমন কোন্ বস্তু জগতে আছে দেখি। ত্রিভুজগতের মধ্যে বাগ মানাতে পারলাম না শুধু এই তোমাকে।”

“বেশ তো মামী, তুমি নিজে হাতেই বৌকে সাজিও না, তোমার একটা মাস্তুর বেটার বৌ!” বলে সৌদামিনী।

আর এলোকেশী আরও খেই খেই করে ওঠেন, “কি বললি সদি? এ্যা! এত আসপদ্দা! মুখে মুখে জবাব! এত অহঙ্কার তোর কবে চূর্ণ হবে, কবে তোর দুঃখ শ্যালককুর কাঁদবে, সেই আশায় আছি আমি। এই তোকে দিব্যি দিলাম সদি, যদি আর কোনদিন তুই আমার বো'র চুলে হাত দিবি!”

“গুরুজনের দিব্যি গায়ে লাগে না— এ মানলে কি চুটে গা?” সদু অমানবদনে বলে, “তোমার হল গে মন-মর্জি, কোনদিন দেবে, কোনদিন বা ভুলে যাবে—”

“কী বললি! কী বললি লক্ষীছাড়ি! আমার একটা বেটার বৌয়ের কথা আমি ভুলে যাব?”

“তা তাতে আর আশ্চর্য্য কি মামী!” সদু স্তম্ভিত অমায়িক মুখে বলে, “তোমার সে শুণ্ডে কি ঘাট আছে? আপনার খিদের খাওয়া, তাই তো অর্ধেক দিন ভুলে যাও, ডেকে খাওয়াতে হয়।”

এলোকেশী সহসা থতমত খান। এটা ঠিক কোন্ ধরনের কথা ধরতে পারেন না। অভিযোগ না প্রশস্তি?

তাই ভারীমুখে বলেন, “হ্যাঁ, আমি ভুলে থাকছি আর রোজ তুমি আমায় ডেকে তুলে ঝিনুকে করে গিলিয়ে দিচ্ছ।”

“আহা তা না দিই, তোমার কি খেয়াল থাকে?”

“না থাকে না থাক। বৌয়ের চুল আজ থেকে আমি বাঁধব এই বলে রাখছি। ওর চুলের দড়ি কাঁটা সব আমার ঘরে রেখে যাবি। পাখী-কাঁটাগুলো দিতে ভুলবি না।”

“দেব, দিয়ে যাব। তা বৌয়ের বাবা যে সোনার চিক্রনি, সাপকাঁটা, বাগান ফুল ইত্যাদি করে একরাশ মাথার গহনা দিয়েছেন, সেগুলোই বা বাস্তব পুরে রাখছ কেন? সব বার করে বাহার করে দিও!”

“সে আমি কি করব না করব তোমার কাছে পরামর্শ নিতে আসব না! অনবরত খালি চ্যাটাং চ্যাটাং কথা! ভগবান যে কেন কঠিন রোগ দিয়ে তোর বাক্শক্তি হরণ করে নেন না তাই ভাবি। তুই জন্মের শোধ বোবা হয়ে বসে থাক, আমি ‘নিসিংহতলা’য় ভোগ চড়াই।”

“দোহাই মামী, ওসব মানত-টানত করতে যেও না। দেব-দেবীরা এক স্তনতে আর এক স্তনে বসে থাকে, হয়ত বোবার বদলে হুঁটো করে দেবে, তখন মরবে তুমি লাফিয়ে-ঝাঁপিয়ে।”

“কী বললি! তুই হুঁটো হয়ে বসে থাকলে আমার সংসার অচল হয়ে যাবে? সাথে বলি অহঙ্কারে পাঁচ-পা তোর। আমার সংসার আমি চালাতে পারি নে ভেবেছিস? বা হাতের কড়ে আঙুলে পারি। কিন্তু সে আঙুলই বা আমি নাড়ব কেন? ভাতকাপড় দিয়ে তোকে পুষছি যখন!”

“আহা, আমিও তো তাই বলছি গো। হুঁটো হলেও তো ভাত-কাপড়টা দিতেই হবে।”

“হবে! দায় পড়েছে। ঠ্যাং ধরে টেনে পগারে ফেলে দেব।”

“সর্বনাশ মামী, ও বুদ্ধি করতে যেও না, পাড়াপড়শী তাহলে সেই পগারের পাক তুলে এনে তোমাদের গালে মুখে মাখাবে।” বলে হাসতে হাসতে চলে যায় সৌদামিনী সত্যবতীকে স্তম্ভিত করে রেখে।

বড় সংসারের মেয়ে সত্যবতী, তার এতটুকু জীবনে অনেক চরিত্র দেখেছে, এরকম আর দেখে নি।

যাক, সকালের সেই ঘটনার পরিণামে আজ দুপুরের এই মল্লযুদ্ধ।

সত্যিই বড় ভারী চুলের গোড়া সত্যর, অথচ এদিকে ঝুলে খাটো! এক গোছা কালো ঘুনসি দিয়ে কষে বেঁধে আর গোছা গোছা ঘুনসির ডেজাল মিশিয়ে বেণী দুটো যদিবা লম্বা করলেন এলোকেশী, তাদের প্রজাপতি ছাঁদে পাক খাওয়াতে গিয়েই গোড়াসুদ্ধ ঢিলে হয়ে নেমে এল। সত্যবতীর কপালের ফের, ঠিক সেই মুহূর্তেই সত্যবতী বোধ করি পিঠের খিল আর পায়ের বিঝি-ধরা কমাতে একটু নড়েচড়ে বসল।

ব্যাপারটা হল ‘পাত্রাধার তৈল কি তৈলাধার পাত্রে’র মতই। বন্ধনটা ঢিলে হয়ে পড়ার জন্যেই মুক্তির সুখে নড়েচড়ে বসল সত্যবতী, না নড়েচড়ে বসার জন্যেই বেণী বন্ধনমুক্ত হয়ে গেল সেটা বোঝা গেল না। এলোকেশী দেখলেন বৌ নড়ল, চুল খুলল।

এলোকেশী পাথরের দেবী নন, রক্তমাংসের মানুষ, এরপরও যদি তাঁকে ঠাণ্ডা মাথায় সহজভাবে বসে থাকতে দেখবার আশা করা যায়, সে আশাটা পাগলের আশা। পাগলের আশা পূরণ হয় না, হবার নয়।

এতক্ষণের পরিশ্রম পণ্ড হওয়ার রাগে, আর সৌদামিনীকে নিজের শিল্পপ্রতিভা দেখিয়ে দেবার আশাভঙ্গে, দিকবিদিক জ্ঞানশূন্য এলোকেশী সহসা একটা অভাবিত কাজ করে বসলেন। বৌয়ের সেই খিল-ছড়ানো সিঁদে পিঠটার ওপর গুম্ব করে একটা গোলগাল কিল বসিয়ে দিয়ে বলে উঠলেন, “হল তো! গেল তো গোলায়! এক দণ্ড যদি সুস্থির—”

কিন্তু কথা এলোকেশীকে শেষ করতে হল না, মুহূর্তের মধ্যে আর এক প্রলয় ঘটে গেল। শান্ততীর হাত থেকে চুলের ভার এক হ্যাঁচকায় টেলে নিয়ে সত্যবতী ছিটকে দাঁড়িয়ে উঠল, আর শান্ততীর সঙ্গে যে কথা কওয়া নিষেধ সে কথা সম্পূর্ণ বিন্মৃত হয়ে দৃগুস্বরে বলে উঠল, “তুমি আমায় মারলে যে!”

কিলটা বসিয়ে চকিতে হয়তো একটু অনুতপ্ত হয়েছিলেন এলোকেশী, কিন্তু সে অনুতাপের অনুভূতি দানা বাঁধবার আগেই এই আকস্মিক বিদ্যুতঘাতে এলোকেশী প্রথমটা যেন পাথর হয়ে গেলেন। বৌয়ের কণ্ঠস্বর কেমন সেটা জানবার সুযোগ এ পর্যন্ত হয় নি এলোকেশীর, কেননা তাঁর সঙ্গে তো বটেই, তাঁর সামনেও কোনদিন বৌ কথা কয় নি। কইবার রেওয়াজও নেই। কোনও প্রশ্ন করলে শুধু ঘাড় নেড়ে “হ্যাঁ-না” জানিয়েছে। কথা যা সে সদূর সঙ্গে। কিন্তু সেও তো নিভৃত। রাগে সৌদামিনীর কাছেই শোয় বৌ, কারণ ডাগরটি না হলে তার ‘ঘর-বরে’র প্রশ্ন ওঠে না।

না, কোন ছলেই সত্যর কণ্ঠস্বর এলোকেশীর কানে আসে নি, সহসা আজ সেই স্বর বাজের মত এসে কানে বাজল।

এ কী জোরালো গলা বৌ-মানুষের!

এতটুকু একটা মানুষের!

অনুতাপের বাষ্প ধুলো হয়ে উড়ে গেল।

এলোকেশীও দাঁড়িয়ে উঠলেন। চোঁচিয়ে তেড়ে উঠলেন, “মেরেছি বেশ করেছি। করবি কি শুনি? তুইও উল্টে মারবি নাকি?”

সত্য তখন এলোকেশীর অনেক পরিশ্রমে গড়া সাতগুছির বেণী দুটোর মধ্যে আঙুল চালিয়ে চালিয়ে জোরে জোরে খুলে ফেলতে শুরু করেছে। মাথায় কাপড় নেই, মুখের আঁচল খসেছে, সেই মুখে আঙনের আভা।

এলোকেশীর কথায় একবার সেই আঙনভরা মুখটা ফিরিয়ে অবজ্ঞাভরে উচ্চারণ করল সত্য, “আমি অমন ছোটলোক নই। তবে মনে রেখো আর কোনদিন যেন—”

“কী বললি? আর কোনদিন যেন? গলা টিপলে দুধ বেরোয় এক ফোঁটা মেয়ে, তার এত বড় কথা! মেরে তোকে তুলো ধুনতে পারি তা জানিস? ... সদি লক্ষ্মীছাড়ি, আনু দিকি একখানা চালাকাঠ, কেমন করে বৌ টিট করতে হয় দেখাই ত্রিঙ্গগথকে। চালাকাঠ পিঠে পড়লেই তেজ বেরিয়ে যাবে।”

“মারো না দেখি, তোমার কত চালাকাঠ আছে!”

বলে দৃষ্টভঙ্গিতে সোজা শাণ্ডীর মুখোমুখি দাঁড়িয়ে থাকে সত্যবতী নির্ভীক দুই চোখ মেলে।

জীবনে অনেকবার রেগে জ্ঞানহারা হয়েছেন এলোকেশী, অনেকবার বুক চাপড়েছেন শাপমনি্য দিয়েছেন দাপাদাপি করেছেন, কিন্তু আজকের মত অবস্থা বোধ হয় তাঁর জীবনে আসে নি।

এ অবস্থা যে তাঁর কল্পনার বাইরে, স্বপ্নের বাইরে। তাই সহসা যেন নিখর হয়ে গেলেন তিনি, সাপের মত ঠাঙ্গ চোখে শুধু তাকিয়ে রইলেন সেই দুঃসাহসের প্রতিমূর্তির দিকে।

ঠিক এই অবস্থায় থাকলে কতক্ষণে কি হত বলা শক্ত, কিন্তু ভাগ্যের কৌতুকে আর এক অঘটন ঘটে গেল।

এই নাটকীয় মুহূর্তে উঠানের বেড়ার দরজা ঠেলে বাড়িতে এসে ঢুকল নবকুমার।

ঢুকেই যেন বজ্রাহত হয়ে গেল।

এ কী পরিস্থিতি!

সহস্র সাপের ফণার মত একরাশ চুলের ফণায় ঘেরা সম্পূর্ণ খোলামুখে এলোকেশীর মুখোমুখি অগ্নিবর্ষা দুই চোখে সোজা তাকিয়ে যে মেয়েটা দাঁড়িয়ে রয়েছে, কে ও?

নবকুমারের বৌ নাকি?

কিন্তু তাই কি সম্ভব?

আকাশ থেকে বাজ পড়ছে না, পৃথিবীর মাটি ফেটে চৌচির হয়ে যাচ্ছে না, এমন কি প্রলয়ঙ্কর একটা ঝড়ও উঠছে না, অথচ নবকুমারের বৌ নবকুমারের মার সামনে অমনি করে দাঁড়িয়ে আছে?

আর নবকুমার ঢুকে হাঁ করে দাঁড়িয়ে পড়া সত্ত্বেও দৃকপাতমাত্র করছে না?

অসম্ভব! অসম্ভব!

এ অন্য আর কেউ!

নবকুমারের অজানিত পড়শীবাড়ির মেয়ে। হয়তো ভয়ঙ্কর কোন একটা কিছু ঘটেছে ওদের সঙ্গে।

নবকুমার গলাখাকারি দিতে ভুলে যায়, সরে যেতে ভুলে যায়, স্তম্ভিত বিস্ময়ে তাকিয়ে থাকে। বিপদ যে ঘোরতর! “অসম্ভব” বলে একেবারে নিশ্চিত হতেই বা পারছে কই?

বৌয়ের মুখটা দেখবার সৌভাগ্য কোনদিন না হলেও এই মাসখানেকের মধ্যে কোন না বিশ-পঁচিশবার আভাসে ছায়ায় বৌকে দেখতে পেয়েছে সে। যদিও পাছে কেউ দেখে ফেলে বৌয়ের দিকে তাকিয়ে আছে নবকুমার, তাই সেই তাকানোটা পলকস্থায়ী হয়েছে মাত্র।

তবুও ক্যামেরার লেন্স পলকের মধ্যেই চিরকালের মত ছবি ধরে রাখে।

মুখ না দেখুক, সর্ব অবয়বের একটা ভঙ্গি তো দেখেছে।

আর দেখেছে ওই নীলাক্ষরীর আঁচলখানা।

অতএব মনকে চোখ ঠেরে লাভ নেই। চোখ বুজে সূর্যকে অস্বীকার করতে যাওয়া হাস্যকর।

পড়শীবাড়ির কেউ নয়, ওই দৃষ্ট মূর্তি নবকুমারের বৌয়েরই।

যে বৌয়ের উদ্দেশে নবকুমার স্বপ্নে জাগরণে নিঃশব্দ উচ্চারণে ক্রমাগত গেয়েছে, গাইছে, “কও না কথা মুখে তুলে বৌ, দেখ না চেয়ে চোখ খুলে।”

কিন্তু সে কী এই চোখ!

নবকুমার যেমন নিঃশব্দে এসেছিল, যদি পরিস্থিতি দেখে তেমনি নিঃশব্দে সরে পড়ত, তাহলে হয়তো নাটকের এই নাট্য-মুহূর্তটা এমন চূড়ান্তে উঠত না, হয়তো সত্যবতী নির্ভীকভাবে সেখান থেকে সরে যেত, আর এলোকেশী জীবনে যত গালি-গালাজ শিখেছেন, সবগুলো উচ্চারণ করতেন বসে বসে। আর স্বামী-পুত্র বাড়ি ফিরলে বৌয়ের এই মারাত্মক দুঃসাহস আর ভয়ঙ্কর দুর্বিনয়ের কাহিনী বিস্তারিত বর্ণনায় পেশ করতেন। তারপর গড়িয়ে যেত ব্যাপারটা।

কিন্তু নির্বোধ নবকুমার সেইখানেই দাঁড়িয়ে রইল হাঁ করে।

আর এক সময়ে এলোকেশীর চোখ গিয়ে পড়ল তার ওপর। দাওয়ার উপর তিনি, নিচে উঠানে ছেলে।

নবকুমারকে এভাবে হাঁ করে দাঁড়িয়ে থাকতে দেখে এলোকেশীও একবার হাঁ হয়ে গেলেন, তারপর সহসা সেই এতক্ষণের স্তব্ধ হয়ে থাকা হাঁ থেকে ভয়ঙ্কর একটা চিৎকার উঠল, “ওরে লক্ষ্মীছাড়া হতভাগা মেনিমুখে ছোঁড়া, পায়ের জুতো নেই? জুতিয়ে জুতিয়ে ওর মুখটা যদি জনুর শোধ ছেঁচে শেষ করে দিতে পারিস, তবে বলি বাপের বেটা বাহাদুর!”

কিন্তু নবকুমার নিশ্চল।

পরক্ষণেই সুরক্ষের্তা ধরলেন এলোকেশী, “ওগো মাগো, কোথায় আছ দেখ গো, বেটা বেটা-বৌ দুজনে মিলে কী অপমানটা করছে আমায়! ওরে নবা, বামুনের গল্প, ছোটলোকের মেয়ে বিয়ে করে তুইও কি ছোটলোক হয়ে গেলি? দু পায়ে খাড়া দাঁড়িয়ে মায়ে অপমানটা দেখছিস? তবে মার মার, ঝাটা আমাকেই মার। ঝাটা খাওয়াই উপযুক্ত শাস্তি আমার। নইলে এখনো ওই বৌকে ভিটের বুকে পা দিয়ে দাঁড়িয়ে থাকতে দিই? মাথা মুড়িয়ে ঘোল ঢেলে গলাধাক্কা দিয়ে বের করে দিই না? ওগো মাগো, বৌ আমায় ধরে মারে আর তাই আমার ছেলে দাঁড়িয়ে দেখে!”

এতক্ষণে নবকুমার বোধ করি চেতনা ফিরে পায়, আর ফিরে পাওয়ার সঙ্গে সঙ্গে চোঁ চোঁ সৌড় মারে সেই খোলা দরজাটা দিয়ে।

খিড়কির ঘাটে বাসন মাজছিল সদু, ঘাটের পাশ দিয়ে নবকুমারকে উর্ধ্বশ্বাসে দৌড়োতে দেখে দাঁড়িয়ে উঠে ছাইমাথা হাতটাই নেড়ে ডাক দেয়, “নবু, কি হল রে? অ নবু, অমন করে ছুটছিস কেন?”

নবকুমার প্রথমটা ভাবল পিছুডাকে সাড়া দেবে না, ছুটে একেবারেই নিতাইয়ের বাড়ি গিয়ে পড়বে, তারপর বলবে, “জল দে এক ঘট।”

কারণ নিতাই হচ্ছে তার সবচেয়ে অন্তরঙ্গ বন্ধু। বিচলিত অবস্থায় তার কাছেই যাওয়া চলে।

কিন্তু সৌদামিনীর উত্তরোত্তর ডাকে কি ভেবে থমকে দাঁড়াল, ফিরল, তারপর গুটি গুটি এসে ঘাটের পাশে একটা ঝড়ে-পড়া তালগাছের গুঁড়ির ওপর বসে পড়ে রুদ্ধকণ্ঠে বলল, “আমি আর বাড়ি ফিরব না সদুদি!”

“কথার ছিরি শোন ছেলের! হল কি তাই বল?”

“সর্বনাশ হয়েছে সদুদি!”

“আরে গেল যা! সর্বনাশের কথা বলতে আছে নাকি?”

“হলে বলতে আছে বৈকি!”

সদু নবকুমারের প্রকৃতির সঙ্গে পরিচিত, তাই বেশি ভয় না পেয়ে বলে, “কেন, তোর মা হঠাৎ চড়ি গুটালো নাকি?”

“মা নয় সদুদি, মা নয় আমিই। জানি না, ঠিক বলতে পারছি না, আমি সত্যি বেঁচে আছি কিনা!”

“গায়ে চিমটি কেটে দেখ।” বলে পুকুরের জলে হাত ডুবিয়ে ডুবিয়ে ছাই মাটি ধুতে ধুতে বলে সদু, “মামী বুঝি রণচণ্ডী হয়ে তেড়ে এসেছিল?”

“জানি না।”

“জানিস না? ন্যাকামি রাখ দিকি নবু, হয় কি হয়েছে তাই বল, নয় যে দিকে যাচ্ছিল সেই দিকে যা। বেটাছেলে না মেয়েমানুষ তুই?”

“সদুদি, যে দৃশ্য দেখে এসেছি, তা দেখলে অতি বড় বীর বেটাছেলেরও পেটের ভেতরে হাত-পা সঁধিয়ে যায়।”

“নাঃ, তোর দেখছি আর গৌরচন্দ্রিকে শেষ হয় না। বলবি তো বল, না বলবি তো যা। ভূত দেখেছিস, না ডাকাত পড়া দেখেছিস তাও তো জানি না।”

নবকুমার বুকে বল করে কণ্ঠে শব্দ আনে, ঝপ করে বলে ওঠে, “মাতে আর তোমাদের বৌতে মারামারি করছে!”

“কি করছে মাতে আর বৌতে?” চমকে উঠে বলে সৌদামিনী।

“বললাম তো, মারামারি করছে!”

সৌদামিনী এক মুহূর্ত স্তব্ধ থেকে তারপর বলে, “মারামারি কথাটা বলছিস কেন, মামী বৌকে ধরে ঠেঙাচ্ছে, তাই বল! আর সেই দৃশ্য দেখে তুই মন্দ পুরুষ কাছা-কোঁচা খুলে ছুট মারছিস! কেন তুই মেয়েমানুষ হয়ে জন্মাস নি নবু তাই ভাবি। যাই দেখি ইতিমধ্যে কি এমন ঘটল। এই তো খানিক আগে বাসনের পাজা নিয়ে বেরিয়ে এলাম— দেখলাম মামী বেটার বৌয়ের চুল বাঁধছে, ইতিমধ্যে হলটা কি?”

“আমি তো এই ঢুকলাম বাড়িতে। তুমি শীগগির যাও সদুদি।”

“যাই। বাবা পলকে প্রলয়, তিল থেকে তিলভাণ্ডেশ্বর! কি হল একুনি?”

সৌদামিনী তাড়াতাড়ি বাসনগুলো ধুয়ে নিতে থাকে।

“আমি আজ নিতাইদের বাড়িতেই থাকব সদুদি। এই চললাম।”

সৌদামিনী ভুরু কুঁচকে বলে, “কদিন পরের বাড়িতে থাকবি?”

“যতদিন চলে।”

“তার মানে নিজে গা বাঁচিয়ে কেটে পড়বি, আর পরের মেয়েটা, দুধের মেয়েটা তোর মার হাতে পড়ে মার খাবে!”

পরের মেয়ে এবং দুধের মেয়ে শব্দটার নবকুমারের বুকের ভিতরটা মোচড় দিয়ে ওঠে, চোখে জল এসে যায়। কষ্ট গোপন করে বলে, “তা আমি আর কি করব!”

সৌদামিনী আড়চোখে একবার ওর মুখচ্ছবি দেখে নিয়ে নির্লিপ্ত কণ্ঠে বলেন, “দৃশ্য দেখে চলে না এলে পারতিস, তুই দেখছিস জানলে যতই হোক নিজেকে একটু সামলে নিত মামী, একেবারে শেষ করে ফেলত না। যাই দেখি ছুঁড়ি বাঁচল কি মরল!”

নবকুমার লজ্জা ত্যাগ করে সহসা বলে ওঠে, “যাই বল সদুদি, যা দেখলাম ও তোমাদের বৌটি পড়ে মার খাবার মেয়ে নয়।”

“আমারও তাই মনে হয়,” বলে সদু সাকৌতুকে একটু হেসে বলে, “মারামারি না করুক, পড়ে মার খাবে না। তাই তুই তো বলতেই পারলি না হয়েছোটা কি?”

“গোড়া থেকে কি কিছু জানি ছাই। বাড়ি চকেই দেখি দাওয়ায় দু প্রাণী সুমুখোসুমুখি দাঁড়িয়ে। একজন সাপিনীর মত ফুঁসছে, আর একজন বাঘিনীর মতন গজরাচ্ছে।”

সৌদামিনী হেসে উঠে বলে, “বা রে, তুই তো অনেক নাটুকে কথা শিখেছিস দেখছি! যাক কালে-ভবিষ্যতে কাজে লাগবে। তোর বৌও খুব পণ্ডিত।”

বৌয়ের গল্প কান ভরে শুনতে ইচ্ছে করে নবকুমারের, ভুলে যায় এইমাত্র তাকে বাঘিনীর সঙ্গে তুলনা করেছে সে নিজেই। কিন্তু গল্প বাড়বে কি উপায়ে? নবকুমার তো আর কথা ফেলে বাড়তে পারে না?

ওধু ভাবে, ‘কালে-ভবিষ্যতে’!

সে কত কাল?

কোন ভবিষ্যৎ?

বাঘিনীর মুখটা বার বার মনে ধাক্কা দিচ্ছে। ভয়ঙ্কর, কিন্তু সুন্দর! কী বড় বড় চোখ, কী চমৎকার জোড়া ভুরু!

কিন্তু বৌও মায়ের মত রাগী হবে হয়তো। লজ্জায় কুণ্ঠায় বিগলিত বৌটি মাত্র থাকবে না। নবকুমারের কল্পনার সঙ্গে ঠিক খাপ খাচ্ছে কি?

ঠিক যেন কি একটা লোকসানের দুগুথে বুকটা টনটন করে ওঠে নবকুমারের।

কাদার পুতুলের মত একটি নিরীহ ভালমানুষ বৌ নবকুমারের ভাগ্যে জুটলে কি এসে যেত ভগবানের! কত লোকেরই তো তেমন বৌ হয়!

কিন্তু সাপের ফণার মত চুলের ফণায় ঘেরা ওই মুখখানি!

ওতে যেন আগুনের আকর্ষণ।

নবকুমার পতঙ্গ মাত্র।

সৌদামিনী বলে, “বিবাগী হয়ে যাচ্ছিলি তো যা, মেলা রাত করিস নে। হাঁড়ি আগলে বসে থাকতে পারব না।”

হাঁড়ি!

রান্না!

ভাত!

এসব শব্দগুলো কাজে লাগবে আজ! নবকুমারের যেন বিশ্বাস হয় না। ভয়ে ভয়ে বলে, “আছি এখানটায় আমি— তুমি, তুমি একবার দেখে এসে খবরটা আমায় দিতে পার না সদুদি? নিন্দিনি দিয়ে তা হলে আমাদের তাসের আড্ডায় যেতে পারি।”

“ওরে আমার কে রে, উনি বাবু বসে থাকবেন, আর আমি ওঁর জন্যে খবরের থালা বয়ে আনব!”

বলে থালা-বাসনের গোছটা বাগিয়ে কাঁধের ওপর তুলে নেয় সদু। হাতে গামছার পুঁটুলিতে ঘটিবাটি। চলে যেতে যেতে ছোট ভাইকে আর একবার অভয় দেয় সে, “বৌয়ের চিন্তে করে

মনখারাপ করিস নে, নেহাৎ যদি মামী খুন করে ফাঁসির দায়ে না পড়ে তো ওই বৌয়ের দ্বারাই শায়ন্তা হবে। বৌ তোর যেমন তেমন মেয়ে নয়।”

যদি খুন না করে!

যদিটা নবকুমারের বুকের মধ্যে কাঁটার মত খচখচিয়ে ওঠে, কিন্তু প্রশ্ন তুলতে পারে না, শুধু খ্রিয়মাণ হয়ে বসে থাকে।

“সন্ধ্যা হয়ে আসছে, এখানে আর বসে থাকতে হবে না, যা কোথায় যাচ্ছিল ঘুরে আয়।”

সদু লম্বা লম্বা পা পেলে বাঁশবাগানের খানিকটা অতিক্রম করে। কিন্তু নবকুমার আবার পিছু নিয়েছে। উদ্ভ্রান্ত মুখ, ছলছল চোখ।

“সদুদি, তোমার সঙ্গে আমি যাব ?”

সদু মৃদু হেসে পা চালাতে চালাতেই বলে, “কেন, এই যে বললি আর কখনো বাড়ি ফিরবি না!”

“মনটা কি রকম যেন করছে সদুদি!” বলে সঙ্গে সঙ্গে এগোতে এগোতে নবকুমার হঠাৎ সুর বদলায়, “বৌ যদি মাকে অপমান করে থাকে, তারও শাস্তি করা দরকার।”

“গায়ে পড়ে কাউকে অপমান করবার মেয়ে সে নয় নবু, সেদিকে তুই নিশ্চিন্দ থাক। তবে কেউ যদি গা পেতে অপমান নিতে যায় সে আলাদা কথা। আসল কথা কি জানিস, বৌ হল উঁচু ঘরের মেয়ে, শিক্ষাদীক্ষা উঁচু, লেখাপড়া জানে, বড় বড় বই পড়ে ফেলে, নিজে পয়ার বাঁধে—”

“অ্যা!”

স্থানকাল ভুলে নবকুমার প্রায় চৌঁচিয়ে ওঠে, “মস্করা করছ আমার সঙ্গে ?”

“কি দরকার আমার ? আকাশ থেকে কথা পেড়ে বলতেই বা যাব কি করে ? আর ওসব আমি বুঝি বা কি ? বৌ আমার কাছে মনটা খোলে তাই টের পেয়েছি।”

সদুর কাছে মনটা খোলে!

হায়, কবে সেই আকাজিকত স্বর্ণসুখ আসছে নবকুমারের ভাগ্যে, যেদিন নবকুমারের সামনে বৌ মন খুলবে!

সদু আবার মুখ চালায়, “তোদের এ বাড়িতে বসিয়ে হওয়া ওর উচিত হয় নি, এই বলে দিলাম স্পষ্ট কথা! তুই রাগ করিস আর যাই করিস, এ বাড়ি ওর যুগি় নয়! মামীর পয়সাই আছে, নজর বলতে আছে কিছু ? আর বৌয়ের ছোট নজর দেখার অভ্যেসই নেই। এই তো সেদিন মামী পাড়ার লোকের গয়না বাঁধা রেখে টাকা ধার দিয়ে সদু নেয় শুনে যেন হিম্মত হয়ে গেল বৌ!”

নবকুমার বিরক্ত স্বরে বলে, “তুই ওসব কথা বলতে যাবারই বা দরকার কি ?”

“বলতে আমি যাই নি রে বন্ধু তোর বৌয়ের কান ধরে। ওর সামনেই ঘোষগিনী একজোড়া বাজু বন্দক নিয়ে দৈ-দস্তুর করতে লাগল। সে বলে টাকায় এক পয়সা, মামী বলে টাকায় দেড় পয়সা, এই আধপয়সা নিয়ে ধস্তাধস্তি। শেষ অবধি—”

শেষ অবধি কি হল তা আর শোনা হল না নবকুমারের, সহসা বাড়ির মধ্যে থেকে ভয়ঙ্কর একটা চিৎকার-রোল ভেসে এল।

“সর্বনাশ করেছে—”

সদুর নিষেধবাণী ভুলে নবকুমার সর্বনাশ শব্দটাই আবারও ব্যবহার করল, “নিশ্চয় হয়ে গেল একটা কিছু!”

সদু ততক্ষণে বাড়ির মধ্যে ঢুকে পড়েছে।

আর নবকুমার ?

সে চলৎশক্তি হারিয়ে দাঁড়িয়ে থাকে নিজেদেরই বাড়িখানার দিকে তাকিয়ে।

তীক্ষ্ণ তীব্র সানুনাসিক এই স্বরটা কার ?

এ তো এলোকেশীর!

তবে হলটা কি ?

কিন্তু যাই ঘটুক, সব কিছু ছাপিয়ে নবকুমারের প্রাণটা হাহাকারে ভরে উঠল এই ভেবে— এই অ-সাধারণ বৌ নিয়ে ঘর করা হল না নবকুমারের অদৃষ্টে!

মা হয় বৌকে ‘মডিপোড়ার ঘাটে’ পাঠাবে, নয় জন্মের শোধ বাপের বাড়ি বিদেয় করে দেবে।

মার চিৎকার উত্তরোত্তর আকাশে উঠছে।

আর দলে দলে পড়শীরা নবকুমারের বাড়ির দিকে দৌড়ছে।

নবকুমার যাত্রাগানের দর্শকের মত পাথর হয়ে দাঁড়িয়ে দেখতে থাকে সেই দৃশ্য!



ত্রিবেণীর ঘাটে এসেছিলেন রামকালী। রোগী দেখতে নয়, যোগে গঙ্গাস্নান করতে। একাই আস্ত একটা পারানী নৌকা ভাড়া করেছিলেন স্নানের জন্যে। পাঁচজনের সঙ্গে ঠেলাঠেলি করে নৌকা বোঝাই হয়ে যেতে রামকালী ভালবাসেন না। দরকার হলে একাই ভাড়া করেন।

আগে অবশ্য এমন নৌকাভ্রমণ সহজ হত না। কারণ রামকালী যোগের স্নান করতে ত্রিবেণী যাচ্ছেন, কি কাটোয়া যাচ্ছেন, কি নবদ্বীপ যাচ্ছেন টের পেলে সত্যবতী একেবারে নাছোড়বান্দা হয়ে পেয়ে বসত। পায়ে পায়ে ঘুরে কাকুতি-মিনতি-করা মেয়েকে রামকালী এড়াতে পারতেন না, সঙ্গে নিতেন। অগত্যই নেড়ু আর পুণ্ডি। ওদের ফেলে রেখে শুধু নিজের মেয়েকে নিয়ে কোথাও যাবেন, এমন দৃষ্টিকটু কাজ রামকালীর পক্ষে সম্ভব নয়।

ওগা যেত।

রামকালী জলে সাবধান করতেন। আর স্নানের শেষে ঠাকুর-দেবতা দেখিয়ে নিয়ে ফিরতেন। ঘাট আর পথ, নৌকা আর মন্দির-প্রাসঙ্গ মুখর হয়ে উঠত ছোট্ট একটা বাক্যবাগীশ মেয়ের বাক্যস্রোতে।

আজকে শুধু জলের উপর দাঁড়াটানার ছপাৎ ছপাৎ শব্দ। উন্মুক্ত গঙ্গাবক্ষের দিকে তাকিয়ে ছোট্ট একটা নিঃশ্বাস ফেললেন রামকালী।

আকাশের পাখিটা খাঁচায় বন্দী হয়ে কেমন আছে কে জানে!

পুণ্ডিটার বিয়ের ঠিক হয়ে আছে।

গত ক-মাস “অকাল” ছিল বলে বিয়ে হয়নি। কিন্তু পুণ্ডি অন্য ধরনের মেয়ে। নেহাৎ সত্যর “প্রজা” হিসেবে দস্যিচালি করে বেড়িয়েছে, নচেৎ একান্তই স্বপ্নসংসারী মেয়ে সে। খাঁচার পাখি হয়েই জন্মেছে পুণ্ডি আর পুণ্ডির মত মেয়েরা।

কিন্তু সত্যর মত দ্বিতীয় আর একটা মেয়ে আর দেখলেন কই রামকালী? যে মেয়ে প্রতি পদে প্রশ্ন তুলে জানতে চায় “কী” আর “কেন”!

খোলা গঙ্গার দিকে তাকিয়ে আর একবার মনে হল রামকালীর, কতদিন যোগে স্নান করি নি! মনে হচ্ছে যেন দীর্ঘকাল। আর একটা নিঃশ্বাস পড়ল।

মাঝিটা একবার কথা কয়ে উঠল, “খুকী স্বপ্নরঘরে কস্তাবাবু?”

রামকালী বললেন, “হঁ।”

আর বার দুই ছপাৎ ছপাৎ করে ফের মাঝিটা বলে উঠল, “থাকবে এখন?”

সংক্ষেপে “দেখি” বলে আলোচনায় ইতির সুর টানলেন রামকালী। পুণ্ডির বিয়ে আসছে, এই যা একটু আশার আলো দেখা যাচ্ছে, নইলে থাকবে ছাড়া আর কি। চিরকালই থাকবে সেখানে। আর সেইটাই তো কাম্য। মোক্ষদার মত অনবদ্য রূপ আর অশেষ তীক্ষ্ণতা নিয়ে আজীবন বাপের ঘরে বসে জ্বলতে থাকবে, এমন ভাগ্য কেউ মেয়ের প্রার্থনা করে না। ঘরে থাকা মেয়ে মানেই দুর্ভাগা মেয়ে। অথচ মাঝে মাঝে পালেপার্বণে কি ভাত-পেতে-বিয়ের কুটুম্বের মত যে আসা, সে আসায় মায়ের প্রাণ ভরতে পারে, বাপের ভরে না। অতএব তাতে ইতি হয়ে গেছে।

কিন্তু শুধু মেয়ে-সন্তান কেন, পুত্র-সন্তান হলেই বা কতটুকু তফাৎ? ছেলে ঘরে থাকে, ছেলের ওপর জোর খাটে, এই পর্যন্ত। ছেলে বড় হয়ে গেলে আর কি তাকে নিয়ে মন ভরে? তাই হয়তো মানুষ জীবনের মধ্যে বারে বারে নতুন শিশুকে ডেকে আনে জীবনকে সরস রাখতে, ভরাট রাখতে। আবার তার পরেও আশ্রয় খোঁজে ‘টাকার সুদে’র মধ্যে।

নিত্যানন্দপুর ঘাট থেকে ত্রিবেণী ঘাট সামান্য পথ।

মাঝি নৌকা বাঁধল।

আর ঘাটে নেমেই প্রথম যার সঙ্গে চোখাচোখি হল রামকালীর, সে হচ্ছে “রানার” গোকুল দাস। দূর থেকে রামকালীকে নামতে দেখে ছুটে ছুটে আসছে সে।

কাদার উপরই আত্মি এক প্রণাম করে কৃতার্থমন্য গোকুল সবিনয় হাস্যে বলে, “আজ আমার কী ভাগ্যি কস্তাবাবু, কী ভাগ্যি!”
 রামকালী মৃদু হেসে বলেন, “সন্ধ্যা বেলা হঠাৎ ভাগ্যের এত জয়-জয়কার যে গোকুল!”
 গোকুল বলে, “তা জোকার দেব না আজ্ঞে ? এই আপনার সঙ্গে দেখা হয়ে গেল, নইলে তো যেতে হত সেই নিত্যেন্দ্রপুরে। এই নিন, পস্তুর আছে আপনার।”

পত্র!

কলকাতা থেকে আসছে! অভাবনীয়!

বিস্মিত হলেন রামকালী, কিন্তু বিস্ময় প্রকাশ করলেন না। খামে আঁটা চিঠিটা নিজের পরিত্যক্ত গাত্রবস্ত্রের উপর রেখে দিয়ে বললেন, “আচ্ছা ঠিক আছে। ভাল তো সব ?”

“আপনাদের আশীর্বাদে আজ্ঞে।” বলে ঈষৎ উসখুস করে গোকুল বলে ফেলে, “কলকাতার চিঠি আজ্ঞে ?”

“তাই তো দেখছি”, বলে রামকালী গামছা কাঁধে ফেলে জলে নামেন। প্রথম সূর্যের কাঁচা রোদ ঝলসে ওঠে কাঁচা সোনার রঙের দীর্ঘ দেহখানির উপর। গোকুল হাঁ করে তাকিয়ে থাকে। থাকতে থাকতে মনে মনে ভাবে— “ইস, যেন আকাশের দেবতা! কী দিব্য অঙ্গ!”

পত্রের কথা মন থেকে সরিয়ে ফেলে, যথাকৃত্য সব সেরে উত্তরীরে কোণে পত্রখানা বেঁধে মন্দির-দর্শনে অগ্রসর হলেন রামকালী। অগত্যাই গোকুল আর একটা সাষ্টাঙ্গ প্রণাম সেরে বিদায় নিল। কলকাতা থেকে কার পত্র এল সে কৌতূহল আর মিটল না তার।

নৌকায় বসে চিঠি খুললেন রামকালী।

আর পড়ে স্তব্ধ হয়ে গেলেন।

এই সকলের আলো তার সমস্ত উজ্জ্বলতা হারিয়ে যেন আসন্ন সন্ধ্যার মত মলিন হয়ে গেল। সদ্য গঙ্গানানে নির্মল রামকালী যেন একটা অপরিস্রব দ্রব্যের সংস্পর্শে এসে নিজেকে অশুচি বোধ করলেন।

চিঠি কোন পরিচিতের নয়। অজ্ঞাত ব্যক্তির।

তাছাড়া নিচে কোন নাম-দস্তখতও নেই।

বেনামী এই চিঠিতে শুধু সঙ্ক্ষেপেই বাগাড়ম্বর অনেক। কিন্তু সেটাই তো কথা নয়। চিঠির বক্তব্য এ কী ভয়ঙ্কর!

বার বার পড়ার পর আরও একবার চিঠিখানা সামনে মেলে ধরলেন রামকালী।

হস্তাক্ষর সুঁছাদের, লাইনগুলি পরিপাটি, বানান বিশুদ্ধ। কোন “লিখিত পড়িত” লোকের দ্বারা লেখা, সে বিষয়ে সন্দেহ নেই; উপরে “শ্রীশ্রীবাগদেবী শরণং” দিয়ে শুরু—

“মহামহিমার্গব শ্রীল শ্রীযুক্ত রামকালী চট্টোপাধ্যায় বরাবরে— যথাযোগ্য-সম্মান-পুরস্কার নিবেদনমেতৎ, অত্রপত্রে এই জ্ঞাত করাই যে, মহাশয়ের কন্যার অতীব বিপদ! তিনি তাহার স্বশ্রুগৃহে যারপরনাই লাঞ্ছিতা উৎপীড়িতা ও অপমানিতা রূপে কালযাপন করিতেছেন। বলিতে মন শিহরিত ও কলেবর কম্পান্বিত হইলেও জ্ঞাতার্থে লিখিতেছি, আপনার কন্যা তাঁর পূজনীয়া স্বশ্রুমাতা কর্তৃক প্রহারিতাও হইতেছেন। সেই অবলা বালিকাকে রক্ষা করে নিষ্ঠুর পাষণপুরীতে এমন কেহই নাই। আপনার জামাতা ধর্মপত্নীর এবিধি নির্যাতনে অবিরত অশ্রু বিসর্জন সার করিয়াছে। গুরুজনদিগের উপর তাহার আর কি বলিবার সাধ্য আছে? একপ্রকার অবস্থায় মহাশয় যদি সত্বর কন্যাকে নিজগৃহে লইয়া যান তবেই মঙ্গল। নচেৎ কি যে হইতে পারে চিন্তা করিতে মস্তক ঘূর্ণিত হইতেছে। মনুষ্যজনোচিত কর্তব্য বোধে ইহা আপনার গোচরে আনিলাম। নিজ গুণে ধৃষ্টতা মার্জনা করিয়া কৃতার্থ করিবেন। অলমতিবিস্তরেণ। ইতি—”

না, নাম-স্বাক্ষর নেই।

পত্র-লেখকের বাচালতা বা বাগাড়ম্বরে কৌতুক বোধ করবেন, এমন মানসিক অবস্থা থাকে না রামকালীর। চিঠিটা আস্তে আস্তে মুড়ে মেরজাইয়ের পকেটে রেখে দিয়ে এই রৌদ্রকরোজ্জ্বল পৃথিবীর দিকে তাকিয়ে থাকেন তিনি।

এত আলো পৃথিবীতে, তবু পৃথিবীর মানুষগুলো এত অন্ধকারে কেন ?

কিন্তু কে এই পত্র-লেখক ?

সত্য শ্বশুরবাড়ির কোন শত্রু ? এভাবে মিথ্যা অপবাদ দিয়ে পত্র লিখে তাঁদের অনিষ্টসাধন করতে চায় ? কিন্তু তাহলে চিঠিতে কলকাতার ছাপ কেন ? কলকাতা থেকে এ চিঠি আসে কি করে ? ভেবে ভেবে অবশ্য একটা সিদ্ধান্তে পৌঁছলেন রামকালী । পত্র-লেখকের অবশ্যই কলকাতায় যাতায়াত আছে, এবং নিজেকে গোপন রাখতে কলকাতায় অবস্থানকালে পত্র প্রেরণ করেছে ।

তবু একটা সমস্যা থেকেই যায় ।

পত্রের মধ্যস্থিত ওই বীভৎস সংবাদটা সত্যি, না শত্রুপক্ষের মিথ্যা রটনা ?

রামকালী কি একেবারে নিজে গিয়েই তদন্ত করবেন, না লোক পাঠাবেন ? বাইরের লোক গিয়ে কি ভিতরকার প্রকৃত তথ্য আবিষ্কার করতে পারবে ? এক যদি কোন স্ত্রীলোককে পাঠানো যায় !

যারা বারো মাস রামকালীর সংসারে খেটে খায়, চিড়ে-কোটানি মুড়ি-ডাজুনি ইত্যাদি, তাদেরই কারো একজনকে একটা সঙ্গী ও রাহাখরচ দিলে খবর এনে দিতে পারে । পরীক্ষামে সচরাচর এরাই কাজ করে । কিন্তু রামকালীর গুনের কথা ভেবে চিন্তা বিমুখ হল । কোন খবর গুরা জানা মানেই সাভাখানা গ্রামের লোকের জানা ! ঈশ্বর জানেন কী খবর আনবে, আর সেই নিয়ে সারা গ্রামে আলোচনা চলাবে ।

মনে হল সত্য যদি নিজে চিঠি লিখত !

চিঠি লেখবার মত বিদ্যে সত্য অর্জন করেছে । কিন্তু করে আর লাভ কি ? পিত্রালায়ে নিজের খবর জানিয়ে চিঠি দেবে এমন সাধ্য বা সাহস তো হবে না । তবে আর মেয়েদের লেখাপড়া শিখে লাভ কি ?

বুকের মধ্যেটা কেমন মোচড় দিয়ে উঠল স্থিতপ্রজ্ঞ রামকালী কবরেরেজের । চোখের সামনে ভেসে উঠল সত্যর সেই দৃশ্য মুখশ্চবি । সেই সত্য পড়ে মার খাচ্ছে ! এ যে বিশ্বাস করা একেবারে অসম্ভব !

না না, এ মিথ্যা চিঠি ।

শত্রুপক্ষের কাজ ।

নইলে কেনই বা ? ভাবলেন রামকালী, সত্যর গুণের নির্ধাতন চালাবে কেনই বা ? অকারণ এত হিংস্র কখনো হতে পারে মানুষ ? তাছাড়া শুধু তো শাশুড়ী নয়, তার শ্বশুর রয়েছেন । হাজার হোক একটা উদ্ভাবিত, তাঁর জ্ঞাতসারে এ রকমটা হুণ্ডিয়া কখনই সম্ভব নয় । আর বাড়ির লোকেরও অজ্ঞাতসারে যদি কোন পীড়ন চলে, পাড়ার লোকের টের পাবে কি করে ?

আবার ভাবলেন রামকালী, সত্যবতী তাঁদের একমাত্র পুত্রবধু । বিনা প্রতিবাদে রামকালী তাকে শ্বশুরঘর করতে পাঠিয়ে দিয়েছেন, তার সঙ্গে ঘরবসত হিসাবে প্রচুর সামগ্রী পাঠিয়েছেন, যাতে অন্তত শাশুড়ীর মন ভোলে । তবু তারা সত্যকে নির্ধাতন করবে ?

তাই কখনও সম্ভব ?

বললে দোষ, ভাবতে বাধা নেই, মেয়ের বিয়ের সময় ঘটক আনীত নানা পাত্রের মধ্যে এই পাত্রটিকেই পছন্দ করেছিলেন রামকালী, কেবলমাত্র তাদের পরিবারের লোকসংখ্যা কম বলে । সেই শৈশব থেকেই লক্ষ্য করেছেন, তাঁর মেয়ে জেদী তেজী অনমনীয় । বৃহৎ গোষ্ঠীর অনেকের মন যুগিয়ে চলা হয়তো তার পক্ষে সহজ হবে না, সে বোধ রামকালীর ছিল, তাই ভেবেছিলেন এখানেই ভালো । বাপের একমাত্র ছেলে ? দোষ কী ? সত্যও তো তার বাপের একমাত্র মেয়ে !

ঘরজামাইয়ের সাধ একেবারেই ছিল না রামকালীর । শুধু এইটুকু মনে মনে ভেবেছিলেন, ছেলেটা যেন নেহাত রাজমুলো না হয় । লেখাপড়ার একটু ধার যেন ধারে । তা সে সাধটুকু মিটেছিল রামকালীর, মিটেছিলও । জামাই তখনই ছাত্রবৃত্তি পাস, টোলে সংস্কৃত শিখছে ।

তারপর লোক-পরম্পরায় শুনেছিলেন, জামাই নাকি ইংরেজি ভাষা শিখতে উদ্যোগী হয়েছে । শুনে সন্তুষ্ট হয়েছিলেন রামকালী । নিজে সামনে উপস্থিত না হলেও জামাইয়ের খবর তিনি লোক-মারফৎ নিতেন, এবং এটুকু জেনে নিশ্চিন্ত ছিলেন, ছেলেটা কুসঙ্গে মেশে না, বদ খেয়ালের দিকে যায় না ।

সবই তো একরকম ছিল, হঠাৎ এ কী বিনামেঘে বজ্রপাত !

অবশেষে আবার ভাবলেন, এ শত্রুপক্ষের কাজ ।

কিন্তু মনের মধ্যে যে আলোড়ন উঠেছিল, সেটাকে একেবারে চেপে ফেলে নিশ্চিন্ত হয়ে থাকতে পারলেন না রামকালী, স্থির করলেন তিনি একবার নিজেই যাবেন বেহাইবাড়ি ।

মান খাটো হবে ?

তা যেদিন জামাইয়ের হাঁটু ধরে কন্যা-সম্প্রদান করেছেন, সেইদিনই তো মান গেছে । সেকালের মত তো রামকালী মেয়েকে স্বয়ম্বরা করতে পারেন নি ।

তাছাড়া একেবারে অকারণ জামাইবাড়ি যাওয়ার অশৌরবটা পোহাতে হবে না। পুণ্যের বিয়েকে উপলক্ষ করে মেয়ে নিয়ে আসতে চাইবেন। সেই সঙ্গে জামাই-বেহাইকেও নিমন্ত্রণ করে আসা হবে। রামকালী নিজে গিয়ে নিমন্ত্রণ করছেন, এর চেয়ে সৌজন্য আর কি হতে পারে?

ত্রিবেণী থেকে ফিরে রামকালী দীনতারিণীর কাছে সংকল্প ঘোষণা করলেন, “মনে করছি একবার বারুইপুর যাব।”

বারুইপুর! সত্যর শ্বশুরবাড়ি?

দীনতারিণী চমকে উঠে বললেন, “কেন, হঠাৎ? সত্যর কোন রোগ-ব্যামো হয় নি তো?”

“কী আশ্চর্য! রোগ-ব্যামো হবে কেন?” রামকালী শান্তভাবে বললেন, “ভাবছি পুণ্যটার বিয়ে হয়ে যাবে, তারপর দুজনে কবে দেখাসাক্ষাৎ হয় না হয়, গলাগলি বন্ধ দুটোতে। বিয়ের আগে কিছুদিন একসঙ্গে থাক।”

দীনতারিণী ছেলের মুখের দিকে তাকিয়ে থাকেন। এত সহজ ভাষা, এত সহজ কথা! রামকালীর মুখে!

ছেলেকে তো তিনি “পাথরের ঠাকুর” আখ্যা দেন!

সহজ কথা।

তবু রামকালীর মুখ থেকে উচ্চারিত হয় বলে কেউ সহজভাবে নিতে পারে না।

মোক্ষদা খরখরিয়ে বলেন, “এ আর অমনি নয়, লিখিপিড়ি-উলি বিদ্যেবতী মেয়ে, নিষ্ঘাত লুকিয়ে বাপকে চিঠি লিখেছে, ‘বাবা আমায় নিয়ে যাও, আর ঘোমটা দিয়ে থাকতে পারছি নে!’”

শিবজয়া আনতমুখী ভুবনেশ্বরীর দিকে কটাক্ষপাত করে কাতর-কাতর মুখে বলেন, “আমার কিন্তু তা মন নিচ্ছে না ছোটঠাকুরঝি। মনে হচ্ছে কোন কু-ঋণ আছে, রামকালী চাপছেন।”

বলা বাহুল্য এর পর আর ভুবনেশ্বরীর ডুকরে কেঁদে ওঠা ছাড়া গতি থাকে না।

ভুবনেশ্বরীর একমাত্র অন্তরের সুহৃদ অসমবয়সী এবং অসমসম্পর্ক হলেও ভাসুরপো-বৌ সারদা।

কিন্তু এমনি কপালের দুর্দৈব ভুবনেশ্বরীর যে, সারদা আজ চার মাস কাল বাপের বাড়ি।

দ্বিতীয় সন্তানের আবির্ভাব ঘোষণাতেই ঋণ এই পিতৃগৃহে স্থিতি।

না, সেই এক অন্ধকার রাতে বাসুর সঙ্গে কলহ করে ডোবার জলে ডুবে মরে নি সারদা। শুধু অন্য ঘরে নন্দদের কাছে গিয়ে গুয়েছিল। সে শুধু একটাই রাত। রাতের পর রাত পারবে কেন?

শ্বশুরবাড়ি বোয়ের রাতটুকুই তো মরুভূমিতে সরোবর। মৃত্যুপুরীর মধ্যে জীবন। যত বড় দুর্জয় মানই হোক, সে মান খাটো না করে উপায় থাকে না তাদের।

সকলেরই তাই। রাতে ভুবনেশ্বরীরও কান্নার বেগ অসম্বরণীয় হয়ে ওঠে। রামকালী অপর টোকি থেকেও সেটা টের পান। কিছুক্ষণ ঘুমের ভান করে চূপচাপ থাকলেও শেষ পর্যন্ত আর চূপ করে থাকা সম্ভব হয় না। মৃদুস্বরে বলেন, “অকারণ কঁাদছ কেন?”

বলা বাহুল্য, এ প্রশ্নে যা হয় তাই হল।

কান্নার আবেগ আরও প্রবল হল।

রামকালী বলেন, “ছেলেমানুষি করো না। এস কাছে এস, কান্নার কারণটা শুনি।”

ভুবনেশ্বরী চোখ মুছতে মুছতে উঠেই এল। এসে স্বামীর বিছানার এক প্রান্তে বসে চোখে আঁচল ঘষতে লাগল।

রামকালী ক্ষুধার বললেন, “তুমিও যদি এই সব গিন্দীদের মত হও, তাহলে তো নাচার। অপরাধের মধ্যে বলেছি পুণ্যের বিয়ে উপলক্ষে সত্যকে কিছুদিন আগেই আনব। নিজে গেলে আর ওরা অমত করতে পারবে না। কিন্তু এই সহজ কথাটা না বুঝে সবাই মিলে এমন কাণ্ড করছ যে, মনে হচ্ছে বুঝি কি একটা অমঙ্গলই ঘটে গেছে। আশ্চর্য!”

“তা কিছু নয়।” ভুবনেশ্বরী কটে বলে, “মেয়েটার জন্যে প্রাণটা উতলা হচ্ছে তাই—”

“হচ্ছে ঠিকই। হওয়া স্বাভাবিক।” রামকালী স্নেহ-গম্ভীর স্বরে বলেন, “তোমার একমাত্র সন্তান। কিন্তু কান্নাকাটি করলেই তো আর কিছু সুরাহা হয় না। মায়ের প্রাণ উতলা হয়, বাপের প্রাণেই কি একেবারে কিছু হয় না?” আর একটু ক্ষুধা হাসি হাসলেন রামকালী।

ভুবনেশ্বরীর পক্ষে এ কথার জবাব দেওয়া সম্ভব নয়।

অপ্রতিভ হয়ে বসে থাকে বেচারী।

একটু পরে রামকালী বলেন, “যাও, ভগবানের নাম স্মরণ করে শুয়ে পড় গে। দেখি যদি নিয়ে আসতে পারি।”

ভুবনেশ্বরী সহসা আবার কেঁদে ভেঙে পড়ে বলে, “আমার মন বলছে ওরা পাঠাবে না।” রামকালী আর কিছু বলেন না, ‘দুর্গা দুর্গা’ বলে পাশ ফিরে শুয়ে পড়েন। ভুবনেশ্বরী অনেকক্ষণ কেঁদে অবশেষে এসে শোয়।

পরদিন মেয়ের বাড়ি যাত্রার আয়োজন করেন রামকালী।

ইংরিজি পড়া আপাতত বন্ধ আছে, কারণ ভবতোষ মাষ্টার গ্রামে নেই। ছাত্রদের জন্য ‘সেকেণ্ড বুক’ সংগ্রহ করতে কলকাতায় গেছে। নবকুমারের তাই এখন অবসর। কিন্তু হায়, অবসরকে কুসুমমগ্নিত করে তুলবে, এ ভাগ্য নবকুমারের কই? বাড়িতে যে দু-দণ্ড বিশ্রামসুখ উপভোগ করবে, খাবে মাখবে থাকবে, তারও জো নেই। সেখানে জাগন্ত অবস্থায় যতক্ষণ থাকে ততক্ষণই হুংকম্প হতে থাকে তার।

কিন্তু ঘুমন্তই বা থাকে কতক্ষণ?

রাত্রে এখন আর সেই মহিষ-বিনিদিত ঘুম নেই নবকুমারের। বিছানায় শুয়ে ঘুম আসে না, ওঠে, বসে, পায়চারি করে, জল খায়, আবার শোয়, এইভাবে অনেকটা সময় কাটে। দিনের বেলা কর্মহীনের কর্ম, নিষ্কর্মার গতি পুকুরে ছিঁপ ফেলা!

বন্ধু নিতাই আর সে দুজনে সারা দুপুর সেই কাজটা করে। আজ্ঞও করছিল। ফাৎনা থেকে চোখ তুলতে হঠাৎ চোখে পড়ল নিতাইয়েরই।

বলল, “অমন বাহারে পালকি চড়ে কে আসছে বল দিকি?”

নবকুমার তাকিয়ে বলল, “তাই তো! দিবি পালকিখানা! তবে আসছে না বোধ হয়, গা পার হচ্ছে।”

বলল কিন্তু দুজনের একজনও চোখ ফেরাতে পারল না।

আর কম্পিত চিন্তে ভীত পুলকে দেখল পালকি ড্রাইভার দিকেই আসছে।

নবকুমার বলল, “ছিঁপ ফেলে রেখে চোঁ চোঁ দৌড় দিই আয়।”

নিতাই সবিস্ময়ে বলে, “কেন, পালাব কেন?”

“আমার মন বলছে এ পালকি নিত্যনেশ্বরীর।”

“অ্যা! চিনিস বুঝি?”

“চিনব কেন, অনুমান। মেয়ে নিতে পাঠিয়েছে নিয্যাস। নিতাই, আমি পালাই।”

নিতাই ওর কৌচার খুঁট চেপে ধরে বলে, “পালাবি মানে? হেস্টনেস্ট দেখবি না?

আর একটু তর্কাতর্কি হয় দুই বন্ধুতে এবং সত্যি বলতে, নবকুমার যতই পালাবার চিন্তা করুক, নড়তেও পারে না। টিকটিকির শিকারী দৃষ্টির সম্মোহনী শক্তিকে আকর্ষিত কীটের মত নিজীব হয়ে বসে থাকে।

পালকি এই দিকেই আসে, আরোহীর নির্দেশে বেহারারা এখানেই নামায়, এবং আরোহী না নেমেই হাতছানি দিয়ে ডাকেন ওদের। ঘাটের ধার থেকে দুজনেই উঠে আসে কৌচার খুঁটটা টেনে গায়ে দিতে দিতে।

“তোমরা এ গ্রামের?”

ভারট গম্বীর এই কণ্ঠস্বরে বুক কেঁপে ওঠে দুজনেরই। এবং যদিও নবকুমার স্বপ্নরকে চেনে না, বিয়ের সময় তাকিয়ে দেখেও নি, দু-দুবার ষষ্টিবাটায় নেমন্তন্ন করেছিল, অসুখের ছুতো করে যায় নি। ভয়েই যায় নি। তবু তার মন বলতে থাকে, এ সেই! এ সেই!

হ্যাঁ, রামকালীই। তিনি ওদের ঘাড়নাড়া উত্তরের পর আবার বলেন, “এ গ্রামের ছেলে, না ভাগিনেয়?”

নিতাই এগিয়ে এসে বলে, “আজ্ঞে আমি ভাগিনেয়, শ্রীযুক্ত কৃষ্ণধন দত্ত আমার মাতুল। আমার নাম নিতাইচন্দ্র ঘোষ। আর এই বাঁড়ুয়ে বাড়ির ছেলে নবকুমার বাঁড়ুয়ে। আমার বন্ধু।”

নবকুমার বাঁড়ুয়ে!

রামকালীর দুই চোখে একটা বিদ্যুতের আভা খেলে যায়, নিশ্চিন্ত হন অনুমান ঠিক। আর একবার ভাল করে আপাদমস্তক দেখে নেন ছেলেটার। দেখে নেন ওর মেয়েলী মেয়েলী দুধেআলতা-গোলা রং, আলতা-গোলা ঠোঁট, আর রোদে ঝলসানো টুকটুকে লালরঙা মুখ। তার পর নেমে আসেন পালকি থেকে।

গভীরতর স্বরে বলেন, “আমি রামকালী চাটুয্যো!”

বসে পড়বার একটা সুযোগ পেয়েই বোধ হয় বেঁচে যায় ছেলে দুটো, তাড়াতাড়ি বসে পড়েই রামকালীর চরণ-বন্দনা করে।

“থাক থাক” বলে উভয়ের মাথাতেই একটু হাতের স্পর্শ দিয়ে রামকালী একবার নিতাইয়ের দিকে দৃষ্টিক্ষেপ করে নবকুমারকে উদ্দেশ্য করে বলেন, “এ যখন তোমার বন্ধু, তখন এর সামনে কথা বলতে বাধা নেই, জিজ্ঞেস করছি, এইভাবে মাছ ধরেই দিন কাটাও নাকি?”

নবকুমারের খুতনি বৃকে ঠেকে। কিন্তু কায়স্থ বংশধর নিতাই, ওর থেকে অনেক চটপটে চৌকস। আর নির্ভীকও বটে।

সে তাড়াতাড়ি বলে, “না আজ্ঞে, অন্যদিন দুপুরবেলা আমরা মাষ্টারের বাড়ি পড়তে যাই। আজ তিনি—”

“কি পড়তে যাও?”

নবকুমার পিছন থেকে প্রবল চিমটি কেটে বন্ধুকে নিষেধ করে যাতে ইংরিজি পড়াটার কথা না বলে ফেলে। বলা যায় না, স্বেচ্ছ ভাষা অধ্যয়নের সংবাদে ক্ষেপে ওঠেন কিনা এই ভয়ঙ্কর লোকটা!

ভয়ঙ্কর?

অন্তত নবকুমারের তাই লাগছে।

কিন্তু নিতাই নিষেধের মান্য রাখে না। বরং একটু বিনয়-আচ্ছাদিত গর্বিত ভঙ্গীতেই বলে, “আজ্ঞে ইংরিজি।”

“ইংরিজি! তা বেশ। কতদূর পড়েছ?”

“ফার্স্ট বুক সেকেণ্ড বুক সারা হয়ে গেছে আজ্ঞে। এখন—”

“ভাল, শুনে সুখী হলাম। তা আজ পড়তে যাও নি যে?”

প্রশ্নটা নবকুমারকে, তবু উত্তরটা দেয় নিতাই-ই। “মাষ্টার মশাই বই আনতে কলকাতায় গেছেন।”

“কলকাতায়! ওঃ! হাঁ। যাক বাবাজী, তোমার সঙ্গে একটা কথা আছে। জানতে চাইছি, গ্রামে তোমাদের কোন শত্রু আছে?”

“শত্রু!”

নবকুমার বিহ্বলভাবে তাকিয়ে থাকে।

কোনও শত্রু!

এলোকেশীর মতে তো গ্রামস্বল্প সকলেই তাদের শত্রু।

“হ্যাঁ, শত্রু। মানে যে তোমাদের অনিষ্টকামী। মিথ্যা অপবাদ রটিয়ে তোমাদের ক্ষতি করতে চায়। এমন কোনও লোক আছে মনে হয়?”

নবকুমার আস্তে আস্তে নেতিবাচক মাথা নাড়ে, কিন্তু ততক্ষণে নিতাই অন্য উত্তর দিয়ে বসেছে, “আজ্ঞে গায়ে তো সবাই সবাইয়ের শত্রু। ওই ওপরেই দেখন-হাসি। আর নবুর মার মেজাজের জন্যে তো—”

“থাক ও কথা—”, মৃদু ধমক দিয়ে ওঠেন রামকালী, মেঘমন্দ্র স্বরে বলেন, “গ্রামের সকলের হাতের লেখা চেন? বলতে পার এ লেখা কার?”

মেরজাইয়ের পকেট থেকে চিঠিখানা বার করে সামান্য একটু মেলে ধরেন রামকালী।

কিন্তু মেলে ধরবার দরকারই বা কি, ওরা তো জানে এ লেখা কার! ভবতোষ মাষ্টারের। আর লেখার প্রেরণা নিতাই নিজে। মাষ্টারের কাছে হতভাগ্য নবকুমারের ধর্মপত্নীর যত্রণাময় জীবনের কাহিনী দিব্য বিশদ করেই বলেছিল সে, এবং সহসা ভবতোষ মাষ্টার ঘোষণা করেছিল, “আচ্ছা, আমি এর প্রতিকার সাধনে যত্নবান হব। সাহেবদের দেশে কদাপি কেউ স্ত্রীজাতির প্রতি নির্যাতন সহ্য করে না।”

“কি, চিনতে পারলে বলে মনে হয়?”

দুজনেই প্রবল বেগে মাথা নাড়ে। বলা বাহুল্য নেতিবাচক। “হ্যাঁ” বলে কে সিংহের মুখবিবরে মাথা গলাতে যাবে?

“ঠিক আছে। আমি তোমাদের ওখানেই যাচ্ছি। তোমার বাবা বাড়ি আছেন অবশ্যই!”

“আছে।” অক্ষুট এই শব্দটি এতক্ষণে রামকালীকে নিশ্চিন্ত করে, তাঁর জামাতা বাবাজী বোবা নয়।

পাল্কি-বেহারাদের ডেকে জনান্তিকে কি যেন নির্দেশ দিয়ে রামকালী বলেন, “চল, এটুকু তোমাদের সঙ্গে হেঁটেই যাই।”

“আমি আঞ্জের একটু দৌড়ে গিয়ে খবরটা দিয়ে আসি—”, বলেই বন্ধু নিতাই বিশ্বাসঘাতকের মত নবকুমারকে অথই জলে ফেলে রেখে দৌড় মারে।

রামকালী কয়েক পা অগ্রসর হয়ে সহসা স্বভাব-বহির্ভূত স্বরে একটা প্রশ্ন করে বসেন, “আমার মেয়ে কি তোমাদের গৃহে কোন উৎপাত ঘটাবে?”

“আঁ—আঁজ্ঞে, সে—এ কী!”

তোতলা হয়ে ওঠে নবকুমার।

“না, তাই প্রশ্ন করছি। সে বালিকা মাত্র, অবুঝ হওয়া অসম্ভব নয়।”

“আঁ—আঁজ্ঞে! না—না।”

কালঘাম ছুটে যায় নবকুমারের। সে গায়ের একমাত্র আচ্ছাদন কোঁচার খুঁটটুকু টেনে কপালের ঘাম মুছতে থাকে।

রামকালী মৃদু হাস্যে বলেন, “অধীর হবার কিছু নেই, আমি কৌতূহলপরবশ হয়ে প্রশ্ন করেছিলাম মাত্র। যাক, আমি যার জন্য এসেছি তোমাকে জানাই, কারণ তুমি আমার জামাতা। বাড়িতে একটি গুড কাজ আসন্ন, সে কারণ আমার কন্যাকে আমি নিয়ে যেতে মনস্থ করেছি। বিবাহের সময় অবশ্য যথারীতি নিমন্ত্রণ আসবে, তুমি এবং তোমার পিতা যাবে। তোমাকে কয়েকদিন থাকবার জন্য মেয়েরা অনুরোধ করতে পারেন, সে সম্পর্কে আমি তোমার পিতা-মাতাকে জানিয়ে যাব। থাকবার জন্যে প্রস্তুত থেকো।”

এ সবেই আর কি উত্তর দেবে নবকুমার?

ভয়ে আর আনন্দে, আশায় আর উৎকণ্ঠায় তার তো মুহূর্মুহ হৃদ-কম্পপুলক দেখা দিচ্ছে।

বাড়ির দরজার কাছাকাছি আসতেই নবকুমার সহসা কাঁচবর্ণে বলে ওঠে, “আমি যাই।”

“কি আশ্চর্য, যাবে কেন?”

“হ্যাঁ, আমি যাই। নিতাই আছে—” বলে এদিক থেকে তাকিয়ে স্বপ্নের পায়ের কাছে মাটিতে একটা খাবল দিয়ে ছুট মারে নবকুমার।

রামকালী সেদিকে চেয়ে একটা নিঃশ্বাস ফেলে।

লেখাপড়া শিখছে?

কিন্তু মানুষ হচ্ছে কি?

ঠিক এই সময় নিতাই নবকুমারদের বাড়ি থেকে বেরিয়ে আসে, আর নীলাম্বর বাঁড়ুয়্যে দরজার কাছে দাঁড়িয়ে একটি সুনিপুণ হাস্য সহযোগে বলেন, “বেহাই মশাই যে? কী মনে করে?”

॥ বাইশ ॥



বেলা না পড়তেই আবার রামকালীর পাল্কি ফিরতি মুখ ধরেছে, একা রামকালীকে নিয়েই। এখন পাল্কির খোলা দরজা দিয়ে পড়ন্ত সূর্যের স্বর্ণাভা উঁকি মারছে, শেষ ফাল্গুনের উডু উডু বাতাস যেন দুলু শিশুর মত মাঝে মাঝে ঝুপ করে ঢুকে পড়ে একটা ‘টু’ দিয়ে যাচ্ছে।

আকাশে বাতাসে পাতায় সর্বত্রই একটা আলো-ঝলসানো আনন্দের আবেশ। কিন্তু প্রকৃতির এই মধুর রূপে মন দেবার মত মন এখন নেই রামকালীর। কি এক দূরন্ত ক্ষোভে মনটা যেন হাহাকাবর করছে। মনে হচ্ছে কোথায় যেন মস্ত একটা হার হয়ে গেছে তাঁর।

ভদ্রতাবোধহীন নীলাম্বর বাঁড়ুয়্যের কাছে কি পরাজয় ঘটেছে রামকালীর? মেয়েকে নিয়ে আসতে পারেন কি এই ক্ষোভেই মন এমন অস্থির?

কিন্তু প্রকৃত ঘটনা তো তা নয়। নীলাম্বর তো ভদ্রতার চূড়ান্ত দেখিয়েছেন।

‘মেয়ে নিতে এসেছেন’ এ প্রস্তাব তোলামাত্রই নীলাম্বর অমায়িক হাস্যে বলেছেন, “বিলক্ষণ, এ তো অতি উত্তম কথা। আপনার কন্যা আপনি নিয়ে যাবেন, যত দিন ইচ্ছে রাখবেন, এতে আমার কি বলবার আছে? ওরে কে আছিস, পঞ্জিকাটা একবার নিয়ে আয় তো।”

রামকালী বলেছিলেন, “পঞ্জিকা আমি দেখেই এসেছি। আগামী কাল সর্বভঙ্গা ত্রয়োদশী। বারও ভাল। কালই নিয়ে যাব। রাত্রিবাস না করে উপায় থাকছে না। কাজেই গ্রামে কোনও ব্রাহ্মণ-বাড়িতে শয়নের একটু ব্যবস্থা করে দিন। কিন্তু অনুগ্রহ করে কোনও আহারাদির আয়োজন করতে যাবেন না। বেহারাদের জলপানির ব্যবস্থা ওদের সঙ্গে আছে।”

নীলাস্বর মেয়েদের ভঙ্গীতে গালে হাত দিয়ে বলে উঠেছিলেন, “বলেন কি বেহাই মশাই! আমার এত বড় বাড়ি, এত বড় ঘরদালান থাকতে আপনি অন্যত্র—”

রামকালী গম্ভীর হাস্যে থামিয়ে দিয়েছিলেন, “বেহাইমশাই কি হিন্দু বাঙালীর লোকাচার বিন্মৃত হচ্ছেন? জামাত-গৃহে রাত্রিবাস কি লোকাচারসম্মত?”

নীলাস্বর হাসির সঙ্গে একটি “হ্যা হ্যা” শব্দ করে বলেছিলেন, “তা অবশ্য, তা অবশ্য। কিন্তু আপনার কন্যার সন্তান-জন্মের পর তো আর এ জেদ রাখতে পারবেন না?”

রামকালী আরও গম্ভীর হয়ে বলেছিলেন, “সন্তান নয়, পুত্রসন্তান। কিন্তু সুদূর ভবিষ্যতের আলোচনায় বৃথা সময় অপচয়ে দরকার কি? এখন কন্যার সঙ্গে একবার সাক্ষাতের ব্যবস্থা করুন।”

“বিলক্ষণ, এর আবার ব্যবস্থা কি? ওরে সদু, তোদের বৌকে একবার মাঝের ঘরে নিয়ে আয়, বেহাইমশাই একবার দেখবেন।”

তবে? নীলাস্বরের ব্যবহারে খুঁত কোথায়?

এর চাইতে ভদ্র ব্যবহার আর কি আশা করা যায়? কত বাড়িতে তো বৌয়ের বাপ-ভাই এলে বাইরে থেকেই জল-পান খাইয়ে বিদায় দেওয়া হয়, মেয়ের সঙ্গে দেখা করতে দেওয়া হয় না। তা ছাড়া অনেক বাড়িতে বহু সাধ্য-সাধনায় যদি বা মেয়ের দর্শন মেলে, সঙ্গে একজন পাহারা থাকে। সে জায়গায় কিনা চাওয়া মাত্রই পাওয়া? রামকালীর তো কৃতার্থ হয়ে যাওয়া উচিত।

কিন্তু আশ্চর্য মানুষের মন! রামকালীর মনে হল নীলাস্বরের ওই “সদু” না কাকে ডেকে হুকুম দেওয়া, ওটা যেন তাম্বিল্য প্রকাশের একটা চরম অভিব্যক্তি। ও সুরটার মধ্যে এই কথাগুলোই ঠিক খাপ খেত— “ওরে কে আছিস, একমুঠো ভিক্ষে দিয়ো-যা তো, ভিখিরিটা চোঁচাচ্ছে!”

নিজেকে গ্লানিযুক্ত আর সমস্ত পরিবেশই অশুচি মনে হল রামকালীর। কিন্তু উপায় কী? জামাইয়ের বন্ধু সেই ছেলোটা উঠোনে দরজা ধরে দাঁড়িয়ে রয়েছে দেখা যাচ্ছে, নিজে সে গেল কোন দিকে?

এদিক ওদিক তাকালেন, হিন্দু শেলেন না।

সদু কে? ছেলে না মেয়ে? কর্তার তো ওনেছি মেয়ে নেই!

একঝাঁক ভাবনার মাঝখানে হঠাৎ বোধ করি সেই মাঝের ঘরেরই দরজার শিকলটা নড়ে উঠল। নীলাস্বর কোমরের কসি গুঁজতে গুঁজতে উঠলেন। ভিতরে ঢুক কি বললেন কি করলেন ঈশ্বর জানেন, তার পর বেরিয়ে এসে ডাক দিলেন, “আসুন বেহাই মশাই!”

রামকালী ভিতরে ঢুকলেন।

দেখলেন একটা অঙ্ককার—অঙ্ককার ঘরের মধ্যে একটা চৌকির ধারে একগলা ঘোমটা ঢাকা একটি বালিকা-মূর্তি। পরনের শাড়িখানা জমকালো; বোধ করি পিতৃ-সন্নিধানে আসার উপলক্ষে তাকে খানিকটা সাজিয়ে ফেলা হয়েছে।

ঘরের বাইরে একটি কমবয়সী মেয়ে দাঁড়িয়ে, মাথায় ঘোমটা কম। রামকালী এসে ঢুকতেই মেয়েটি ভাড়াভাড়ি তাঁর পায়ের ধুলো নিয়ে খাটো গলায় বলল, “ওই যে, কথাবার্তা কন।” তারপরে আরও খাটো গলায় হঠাৎ “মেয়ে নিয়ে যাবেন” বলেই টুক করে পাশের একটা দরজা দিয়ে কোথায় ঢুক গেল। কিন্তু ওর ওই অক্ষুট কথাটা পরিপাক করবার আগেই আর একটা চাপা অথচ তীব্র কথা কানে এল তাঁর, “বৌকে একলা রেখে চলে এলি যে বড়!”

“বাঃ, আমি আবার সঙ্ঘের পুতুলের মত কি দাঁড়িয়ে থাকব, লজ্জা করে না?” উত্তরের এই কথাটুকুও কানে এল। তারপর আবার সেই তীব্র স্বর, “ওরে আমার লজ্জাউলি লজ্জাবতী! একলা হয়ে এখন বাপের কাছে সাতখানা করে লাগাক!”

এর উত্তর আর কানে এল না রামকালীর, কিন্তু ইতিপূর্বের তিক্ত মন কী এক রকম বিকল হয়ে বিশ্বাদ হয়ে গেল, কন্যা-সন্দর্শনের প্রথম আনন্দটাই শিথিল হয়ে গেল।

সেই অবকাশে গুপ্তনবতী সভ্য নিতান্ত নীরবে বাপকে একটি প্রণাম করল। প্রণাম করে যথারীতি পায়ের ধুলো মাথায় বুলাতে ভুলে গেল না।

কিন্তু রামকালী সহসা এমন বিচলিত হলেন কেন?

সত্যর এই আচরণে বৃকের ভিতরটা হাহাকার করে উঠল তাঁর কেন ? যে হাহাকার এখনো থামতে পারছেন না এই স্থিতপ্রজ্ঞ মানুষটাও রামকালী কি আশা করেছিলেন তাঁর সেই সত্য অবিকল তেমনি আছে ? বাপকে দেখেই ছুটে এসে টিপ করে একটা প্রণাম হুঁকে গিন্নীদের মত বলে উঠবে, “কি বাবা, এতদিনে মেয়েটাকে মনে পড়ল ? ধন্য বলি বাপের প্রাণ, এতদিনে একবার দেখতে আসতে ইচ্ছে হল না মেয়েটা মরল কি বাঁচল ? যাই ভাগ্যিস পুণিপিপিসির বিয়েটা লেগেছিল, তাই না—”

অথবা এইটাই কি মনে করেছিলেন, সত্য আর আগের সত্য নেই, একেবারে বদলে গেছে! তাই প্রত্যাশিত হৃদয়ে অপেক্ষা করছিলেন, দেখামাত্রই ঝাঁপিয়ে এসে পিতৃবক্ষে আশ্রয় নিয়ে নিঃশব্দে কেঁদে ভাসাবে সে! আর তার সেই অবিরল অশ্রুধারায় রামকালীর জ্বালা করা বুকটা ঠাণ্ডা হয়ে যাবে!

কিন্তু এই ইচ্ছে তো রামকালীর হবার কথা নয়। আবেগপ্রবণতা তো রামকালীর সম্পূর্ণ রুচিবিরুদ্ধ। মন-কেমন করা বা অনেক দিন পরে দেখা হওয়া ইত্যাদি উপলক্ষ করে বউ কাঁদছে-কাটছে দেখলে ভুরু কুঁচকে ওঠে তাঁর। স্বয়ং রামকালী-দুহিতাই যদি সেই খেলো আর সস্তা পদ্ধতিতে আবেগ প্রকাশ করে বসে, রামকালী অসন্তুষ্ট হতেন না কি ?

বহু বিচিত্র উপাদানে গড়া মানব-মন কখন কি চায় বলা বড় শক্ত। কি চায় নিজেই বুঝতে পারে না, শুধু এক-এক সময় একান্ত বেদনায় বলে, “এ কী হল! এ তো আমি চাই নি!”

তাই চির-অবিচলিত রামকালী হঠাৎ আজ নিজের মেয়ের এই শান্ত সত্য বহুমূর্তি দেখে বিচলিত হয়ে ভাবলেন, “এ কী হল!”

কথা যোগায় না রামকালীর। মৃদু গঞ্জীর কণ্ঠ থেকে শুধু একটু কুশল প্রশ্ন উচ্চারিত হয়েছিল, “ভালো আছে তো ?”

সত্য তেমনি মাথা নিচু করে বলেছিল, “হ্যাঁ বাবা। বাড়ির সব খবর মঙ্গল ?”

ঠাকুমা পিসঠাকুমা দল থেকে শুরু করে বাগদী ঝিটা পর্যন্ত বাড়ির প্রত্যেকটি সদস্যের নাম করে কে কেমন আছে জিজ্ঞেস করল না সত্য, শুধু জিজ্ঞেস করল ‘বাড়ির সব মঙ্গল’ ?

আশ্চর্য! আশ্চর্য! স্বপ্নরঘরে এলে কি এমনি করেই মেয়েরা তাদের আজন্মের আশ্রয়কে— তাদের ধুলোমাটির গড়া খেলাঘরের মতই ভেঙে ফেলে? মন থেকে মুছে ফেলে ? তাই শকুন্তলাকে আর কোন দিন কল্প মূনির আশ্রমে দেখা যায় নি, জনিক রাজার ঘরে সীতাকে ? মহাকবিদের মহৎ লেখনীও এই অমোঘ নিয়মকে সহজ সত্য বলেই মনে নিয়েছিল, তাই সে লেখনী নির্মম উদাসীন্যে শুধু সামনের দিকে এগিয়ে চলেছে, পিছু ফিরে তাকায় নি ?

নারী আর নদী, এরা তবে এক ধাতুতে গড়া!

কিন্তু গিরিরাজ-দুহিতা উমা ?

না, উমা তো ইতিহাসের নয়, পুরাণের নয়, মহাকবিদের অমর লেখনীর অনবদ্য সৃষ্টি নয়, সে যে শুধু ঘরোয়া মানুষের মনের মাধুরী দিয়ে গড়া অমিয় ছবি। মানুষের প্রত্যাশা আর কল্পনা, আশা আর আকাঙ্ক্ষা দিয়ে গড়া ভালবাসার মূর্তি!

রামকালীর মনের মধ্যে অনেক ভাব-তরঙ্গের একটা আলোড়ন উঠেছিল, যেমনটা তাঁর সচরাচর হয় না। ভাবলেন তবে কি সত্য সম্পর্কে এতদিন যে মূল্যবোধ তাঁর মনের মধ্যে ছিল, সত্য তার উপযুক্ত নয় ? সত্য সেই সাধারণ মেয়ে, যারা সহজেই বদলে যায় ? ভাবলেন তবে কি মার খাওয়ার কথাটাই সত্য, আর সত্য একেবারে নেহাত একটা ভীকু মেয়ে মাত্র ? যে মেয়েরা পড়ে মার খায়, আর মার খেয়ে ভয়ে কাঁটা হয়ে থাকে, নিজেকে প্রকাশ করতে সাহস পায় না ?

সত্যর সম্পর্কে এত হতাশ হয়েই বুঝি রামকালীর মধ্যে এত আলোড়ন।

তবু সে আলোড়নকে সংহত রেখে রামকালী বলেছিলেন, “হ্যাঁ, সব সংবাদ মঙ্গল। পুণ্যির বিয়ে ষোলই বোশেখ, তাই তোমাকে নিয়ে যাবার সংকল্প করে এসেছি।”

হ্যাঁ, ঠিক এই কথাটা উচ্চারণের পরই বৃকের মধ্যে যেন একটা হাতুড়ির ঘা খেলেন রামকালী।

“বাবা গো, তুমি কি ভাল!” বলে অহোদে চোঁচিয়ে উঠল না সত্য, তার বদলে বলল, “বোশেখের মাঝামাঝি বিয়ে, আর এখন তো সব ফাগুনের শেষ, এত আগে থেকে নিয়ে যেতে চাইলে এরা কিছু মনে করতে পারে বাবা।”

রামকালী সুগভীর একটা নিঃশ্বাস গোপন করে বলেছিলেন, “ওঁরা অমত করেন নি।”

“করে নি সে ওদের ভদ্রতাই, কিন্তু বাবা আমাদেরও তো একটা বিবেচনা করা দরকার। এদের অসুবিধেয় ফেলে—”

“তোমার তাহলে এখন যাওয়ার মত নেই ?”

আর একটা নিঃশ্বাস গোপন করতে হয় রামকালীকে ।

সত্য এবার মুখ তুলে তাকায় । সোজাসুজি একেবারে বাপের চোখের দিকেই । বাহারে শাড়ির ঘোমটাটা খসে পিঠের ওপর পড়ে যায়, তাই সত্যর সে বাগ-না-মানা কৌকড়া চুলে ঘেরা মুখটার সবটাই স্পষ্ট দেখতে পাওয়া যায়, আর চোখের দৃষ্টিটা তার বেশ একটু সময় নিয়েই বাপের মুখের দিকে নিবন্ধ থাকে !

তার পর চোখ নামিয়ে নিয়ে খসে পড়া আঁচলটা মাথায় তুলতে তুলতে উত্তর দেয় সত্য, “তা কার্যক্ষেত্রে মত নেই-ই বলতে হয় বৈকি । ঠাকরুণের শরীর-স্বাস্থ্য ভাল নয়, একা ননদের ঘাড়ে সমগ্র সংসার—”

রামকালী ঈষৎ বিস্মিত প্রশ্নে বলেন, “ননদ! নবকুমারের ভগিনী আছেন নাকি ?”

“সহোদর বোন নন, তবে সহোদরের বাড়া বাবা । পিসতুতো ননদ—ওই যে যিনি তোমাকে এ ঘরে এনে পৌঁছে দিলেন ।”

“ও!” ননদ-প্রসঙ্গে ইতি টেনে রামকালী বলেন, “যাবার যখন উপায় নেই, তখন আর কি করবার আছে! অতএব রাতে আমার আর এ গ্রামে অবস্থান করারও প্রয়োজন দেখি না । এখন রওনা দেব । তার আগে একটা প্রশ্ন তোমায় করছি, তুমি তো লেখাপড়া কিছু শিখেছিলে, পত্রাদিও পড়তে পার মনে হয়, এই চিঠিটা পড়ে মানে বুঝতে পারবে ?” জামার পকেট থেকে চিঠিটা বার করেন রামকালী ।

চিঠিখানা কিন্তু সত্য তাড়াতাড়ি হাত বাড়িয়ে নেয় না । মৃদুস্বরে বলে, “কার পত্তর ?”

“সেটাই তো আমার জানা নেই । তুমি হয়তো জানতে পারবে ।”

অতঃপর চিঠিটা হাতে নিয়ে কয়েক ছদ পড়ে সত্য, ঈশ্বর জানেন ঘোমটার মধ্যে তার মুখের চেহারা কেমন হয়ে ওঠে, কিন্তু গলাটা তো ঠিকই থাকে । ঠিকঠাক শান্ত গলায় বলে ওঠে সে, “এত বড় একটা জ্ঞানবান বিচক্ষণ ব্যক্তি হয়ে বুঝতে পারবে না বাবা, এ কোনো শত্রুরের কাজ!”

“এমন কে শত্রু আছে তোমাদের ?”

“তা কে জানে বাবা! অনেক শত্রুর ছেঁ ওপরে ভালমানুষ সেজেও থাকে ।” চিঠিটা সব না পড়েই বাবার হাতে ফিরিয়ে দিয়েছিল সত্য ।

রামকালী সেটা ফের পকেটে পুরে, দীর্ঘনিঃশ্বাস গোপন না করেই বলেছিলেন, “তাহলে এখানে তোমার কষ্টের কোন কারণ নেই । তোমার সম্বন্ধে দুশ্চিন্তা করবারও কিছু নেই আমার । ঈশ্বর মঙ্গল করলেন । তাহলে এই কথাই বলে সান্ত্বনা দিতে পারব তোমার মাকে ।”

“মা!” সত্য একটু চমকে বলে, “এ পত্তরের বিষয় মা জানেন ?”

“না । তিনি অবশ্য জানেন না কিছু,” রামকালী ঈষৎ হাসির মত করে বলেন, “তবে ‘মেয়ে মেয়ে’ করে একটু উতলা হয়েছেন তো । যাক, তোমার প্রতি যে কোন দুর্ব্যবহার হয় না এটাই শান্তির বিষয় । আর বিশ্বাস করব তুমি ঠিক কথাই বলছ ।”

সত্য আর একবার তেমনি মুখ তুলে তাকায় । এবার যেন ভয়ঙ্কর একটা অভিমানের ছায়া ভর্ৎসনার মত ফুটে ওঠে সে-চোখে । তারপর চোখ নামে । মৃদু আর দৃঢ়কণ্ঠে বলে সত্য, “পেতল কাঁসার ঘটিটা-বাটিটাও একত্রে থাকলে মধ্যে মধ্যে ঠোকাঠুকি লাগে বাবা, আর এ তো জলজ্যান্ত মানুষ! একেবারে ঠোকাঠুকি লাগে না, লাগবে না, এ কথা কি জোর করে বলা যায় ? তবে এটুকু বিশ্বাস মেয়ের প্রতি রাখো বাবা, কোনও অন্যায় সে করবেও না, সহিবেও না ।”

তারপর রামকালী চলে এসেছিলেন ।

সত্য আর এক দফা প্রণাম করেছিল ।

কিন্তু এখানেই তো ইতি নয় ।

“মেয়েকে না নিয়েই যে চললেন বেহাইমশাই ?” এ প্রশ্নের উত্তর দিতে হয়েছিল রামকালীকে । আর মিথ্যা কথা বানিয়ে বলতে না পারার জন্যে বিদ্রূপ-হাস্যরঞ্জিত বিষয়-প্রশ্নও শুনতে হয়েছিল ।

সত্যর স্বস্তর সেই তাঁর মেয়েলী ভঙ্গীতে গালে হাত দিয়ে বলেছিলেন “বলেন কি বেহাই মশাই, মেয়ে বাপের ঘর যেতে চায় না! এ যে বড় তাজ্জব কথা শোনালেন দেখছি!”

নিজের জন্যও ততটা নয়, রামকালীর মনে হয়েছিল, কুকুরের কামড় হাঁটুর নিচে কিন্তু সত্যর স্বস্তর সম্পর্কে যে তাঁর ওই প্রবাদটা সহজেই মনে আসতে পারল, এটাও তো কম গ্রানির কথা নয় ।

আশ্চর্য, ওদের ব্যবহারে বিনয় আর সৌজন্য প্রকাশের ঘটা তো কম ছিল না, তবু কেন রামকালীর ওদের স্থূল অমার্জিত মনে হয়েছিল ? জামাইটা অবশ্য নেহাৎ বোকা-বোকা, প্রকৃতি কেমন কে জানে। তা সেই তো মাত্র একবার দেখা দিয়েই উধাও হয়ে গেল।

বন্ধুটাকে তবু আবার দেখলেন, কিন্তু জামাইকে নয়।

বন্ধুটা যে সত্যর শ্বভর-শাওড়ীর প্রতি শ্রদ্ধাশীল নয়, তা বেশ বোঝা যাচ্ছে।

শ্রদ্ধার যোগ্যই নয় ওরা।

তবু আর একবার বুকটা কেমন মুচড়ে উঠল রামকালীর, তবু সেই শ্বভরবাড়ির সঙ্গে দিব্যি মিশে গেছে সত্য। এমন মিশে গেছে যে শাওড়ীর শরীর-বাহ্যের অজুহাতে বাপের বাড়ি যাওয়ার প্রলোভন ত্যাগ করল।

সুযোগ পেয়েও বাপের বাড়ি যেতে চাইল না, এ রকম মেয়ে রামকালী কি তাঁর এতখানি জীবনে এর আগে কখনো দেখেছেন ? অথচ ঠিক বোঝাও যাচ্ছে না তাকে।

হয়তো তাকে আর কোন দিনই বোঝা যাবে না। রামকালীর মেয়ে রামকালীর কাছ থেকেই অনেক দূরে চলে গেছে, হয়তো আরও অনেক অনেক দূরে চলে যাবে। সেই সত্যকে আর কোনদিনই ঝুঁজে পাওয়া যাবে না।

চির নিঃসঙ্গ রামকালীর অন্তরের একটিমাত্র ছোট্ট সঙ্গী, রামকালীর আকাশের আলো-ঝিকঝিকে ছোট্ট একটি তারকা চিরদিনের মত হারিয়ে গেল।

হঠাৎ চিন্তায় ছেদ পড়ল।

চোখে পড়ল পাল্কির পাশ দিয়ে বেহারাদের সঙ্গে তাল মিলিয়ে আর একটা মানুষও দৌড়ছে।

কখন থেকে দৌড়ছে ?

হঠাৎ কোথা থেকেই বা এল ? কিছু বলতে চায় নাকি ?

রামকালী বেহারাদের আদেশ দিলেন থামতে।

আর তারপরই নজরে পড়ল, এ সেই নিতাই, তাঁর জমাইয়ের বন্ধু।

“কি খবর ?”

কিসের একটা প্রত্যাশায় রামকালীর মুখটা উজ্জ্বল হয়ে উঠল।

কি ভাবলেন তিনি ? তাঁর সত্যবতীই কী স্বামীর বাপকে ফিরিয়ে আনতে ডাক দিয়েছে ? এখন কেঁদে ফেলে বলবে, “মেয়ের মুখের কথাটা ভুলি দেখলে বাবা, তার অভিমানটাকে দেখলে না ? একবার ‘না’ করেছি তো রাগ দেখিয়ে চলে গেলো ?”

অনেকগুলো কথা মনের মধ্যে ছড়োছড়ি করে উঠল, তবু সংযত কণ্ঠেই প্রশ্ন করলেন রামকালী, “কী খবর ?”

নিতাই হাঁপাচ্ছিল।

একটু জিরিয়ে নিয়ে বলে, “বাচালতা মার্জনা করবেন তালুই মশাই, বলতে এসেছি— এ কী করলেন ? মেয়ে নিতে এসে খালি হাতে ফিরে যাচ্ছেন ? বাঁধুঘ্যে মশাইয়ের কাছে হেরে গেলেন ?”

রামকালীর মুখ লাল হয়ে ওঠে।

কণ্ঠে আত্মসংবরণ করে বলেন, “বাচালতা মার্জনা করা শক্ত হচ্ছে!”

“বুঝেছি। কিন্তু বড় আশায় হতাশাস হয়েই ছুটে এসেছি। আপনার কন্যাকে নিয়ে গেলেন না বটে, কিন্তু এর পর আর হয়তো মেয়েকে জীবিত দেখতে পাবেন না। হয়তো আত্মঘাতী হয়ে— মেয়ে তো আপনার ভাঙে তো মচকায় না!”

সহসা রামকালী চাপা ভারী গলায় প্রবল একটা ধমক দিয়ে ওঠেন, “দেখতে তো বেশ উদ্ভ্রসন্তান বলে মনে হচ্ছে, প্রকৃতি এমন ইতরের মত কেন ?”

ইতরের মত!

নিতাই বিহ্বল ভাবে তাকিয়ে থাকে।

রামকালী স্বভাবগম্ভীর স্বরে বলেন, “অপর গৃহের কুলবধু সম্পর্কে কোন আলোচনা ইতরতারই নামান্তর।”

“বেশ।” নিতাই অভিমান-ক্ষুব্ধ মুখ নিচু করে বিদায়-প্রণাম করে বলে, “আর কি বলব বলুন! তবে একা আমিই আস্পর্দা করি নি। আপনার জামাই নবকুমারই—,” ঢোক গিলে বলে নিতাই, “সে বলছিল— চোখের সামনে স্ত্রীহত্যে দেখব, প্রতিকার করব না ? তাই আমি—”

নিতাই আস্তে আস্তে চলে যায়।

রামকালী স্তব্ধ হয়ে সেদিকে তাকিয়ে থাকেন।

আত্মমর্খাদা বিসর্জন দিয়ে রামকালী কি ওকে ফিরে ডাকবেন ?

কিন্তু ডেকে তারপর ?

আদ্যোপান্ত ঘটনা জেনে নিয়ে ফের আবার ছুটবেন জামাইবাড়ি ?

তারপর ?

আবার তাদের বলবেন, “না, আমার ভুল হয়েছে, মেয়ে বালিকা, খামখেয়ালের বশে কি বলেছে সে-কথা কথাই নয়, ওকে নিয়ে যাব ?”

আচ্ছা তার পর ?

যদি সত্য আবার বলে, “সে কি বাবা, আবার ফিরে এলে কি বলে ? আমি তো বলেছি এখন যাওয়া হবে না ?”

তখন ?

তখন কি করবেন রামকালী ? সত্যর ওই কথার পর ? বলবেন, “পাগলী মেয়ে, পাগলামি রাখ, তোর মা তোকে না দেখে কেঁদে দিন কাটাচ্ছে!” বলবেন, “তোকে না নিয়ে একা ফিরতে আমার প্রাণটা হাহাকার করছে! বলবেন—”

না, তা হয় না, আত্মমর্খাদাকে আর কত বিসর্জন দেবেন রামকালী ?

“তোল্ পাল্কি!”

বেহারাদের হুকুম দেন রামকালী।

তারা যথারীতি গৃহাভিমুখেই চলতে থাকে।

আর রামকালী বিশ্বয়ে মুক হয়ে বসে থাকেন সেই একক পালকিতে।

ধীরে ধীরে বিশ্বয়ের ধূসরতা ফিকে হয়ে আসে।

কার্যকারণের চেহারাটা চোখে ভেসে ওঠে।

নীলাধর বাঁড়ুঘ্যের কাছে হেরে যান নি রামকালী, হেরে গেছেন আপন আত্মজার কাছে। বুদ্ধির খেলায় রামকালীকে পরাজিত করেছে সত্য। বাপের কাছে প্রতিপন্ন করেছে, শ্বশুরবাড়িতে সুখে আছে সে, সন্তোষে আছে। তাই শ্বশুরবাড়ির কতকগুলি কাছের কাছে বাপেরবাড়ির তীব্রমধুর আকর্ষণও তুচ্ছ করতে পারা অসম্ভব হল না তার।

জীবনের বিনিময়েও বাপের শক্তি বজায় রাখবে সত্য।

আর রামকালী ? রামকালী সত্যর সেই কৌশলে বিভ্রান্ত হলেন, অভিমানে অন্ধ হলেন, আপন অহঙ্কার নিয়ে ফিরে এলেন।

আর এখন ফিরে যাওয়া যাবে না।

অপেক্ষা করতে হবে ন্যায্য সময়ের জন্য। পুণিয়ার বিয়ের তারিখ ঘেঁষে কুটুম্বের মত আসবে সত্য। আসবে যদি ততদিন বেঁচে থাকে।

চোখ দুটো হঠাৎ লঙ্কার ঝাল লাগার মত জ্বলে উঠল। স্বভাব-বহির্ভূত তীব্রতায় পাল্কি থেকে মুখ বাড়িয়ে বেহারাদের উদ্দেশ্যে বলে উঠলেন রামকালী, “কচ্ছপের মত সমস্ত মাটি মাড়িয়ে হাঁটছিস যে তোরা, পায়ে জোর নেই ?”

চিঠিখানা যে “শতুরের রটনা”, এ কথাটা নেহাৎ ভুল নয়। বৌকে এলোকেশী নিত্যপ্রহারে জর্জরিত করেন, এ বললে এলোকেশীর প্রতি অন্যায় অবিচার করা হয়। মেরেছিলেন সেই একদিনই। বৌয়ের চুল বাঁধতে বসে। অধিশি একটু আশ মিটিয়েই মারবেন বলে উঠানের রোদে মেলে দেওয়া জ্বালানি কাঠ থেকে একখানা তুলে এনেছিলেন, কিন্তু সে কাঠ আর বৌয়ের পিঠে ভাঙবার সুখ তাঁর হয় নি। সর্বনেশে সৃষ্টিছাড়া বৌ হঠাৎ খট করে কাঠখানা হাত থেকে কেড়ে নিয়ে বেশ মজবুত গলায় বলে উঠেছিল, “দেখ গুরুজন আছে গুরুজনের মতন থাক, শিরোধার্যে রাখব। নচেৎ তোমার ললাটে দুঃখ আছে। আমাকে তুমি চেনো না, তাই ভেবেছো আমার ওপর যা খুশি করবে। সে বাসনা ছাড়া।”

কথা শেষ না হতেই এলোকেশী হঠাৎ মড়াকান্না কেঁদে উঠে পাড়ার লোক জড়ো করেছিলেন।

তারপর তো সে এক হে-টে কাণ্ড, রৈ-রৈ ব্যাপার!

কিন্তু সত্যকে আর সে রঙ্গমঞ্চে দেখা যায় নি।

পাড়ার পাঁচজনের বিশ্বয়াজ্ঞিকে সদু থামিয়েছিল, “নতুন ফাগুনের গরমে” মামীমার মাথাটা গরম হয়ে উঠেছে বলে। বলেছিল অবশ্য নেপথ্যে ডেকে নিয়ে গিয়ে চুপিচুপি জনে জনে বলেছিল। তারপর মামীকে চুপিচুপি বলেছিল, “সাপের ন্যাজে পা দিতে যেও না মামী, বোঁটি তোমার যেমন তেমন নয়!”

এলোকেশী সদুকে ন-ভূতো ন-ভবিষ্যতি গালমন্দ করে চিৎকার করে জানিয়েছিলেন—“আচ্ছ, ওই বৌকে তিনি মাথা মুড়িয়ে ঘোল ঢেলে গাঁয়ের বার করে দিতে পারেন কিনা দেখবে গাঁসুছু সবাই।”

কিন্তু আশ্চর্য, কার্যক্রমে আর তা করে উঠতে পারলেন না। এই কথার পিঠে বৌ সদুকে উদ্দেশ্য করে বেশ স্পষ্ট গলায় বলে দিয়েছিল, “ঘরের বৌকে মাথায় ঘোল ঢেলে গাঁয়ের বার করে দিলে যদি গাঁয়ের কাছে তোমাদের মুখোজ্জ্বল হয় তো তা করতে বল ঠাকুরঝি তোমার মামীকে। তবে বিবেচনা করে দেখতে বলা, তা করলে কার গায়ে ধুলো দেবে লোকে!”

এলোকেশী তেড়ে এসে বলেছিলেন, “তবে আয়, তোকে আজ কেটে রক্তগঙ্গা করে নিজে ফাঁসি যাই! উঃ, বৌমানুষের এত কথা!”

সত্য নিঃশব্দে রান্নাঘরের দাওয়া থেকে মাছ কাটবার বড় বঁটিটা তুলে এনে এলোকেশীর দিকে বাড়িয়ে দিয়ে বলেছিল, “তাই তবে কর, তখন তো আর আমি দেখতে আসব না, কার মুখটা পুড়ল!”

আশ্চর্য, এই ঘটনার পরই এলোকেশী কেমন নিথর হয়ে গিয়েছিলেন। আর একটিও বাক্য সরে নি তাঁর মুখ থেকে। কিছুক্ষণ সেই বঁটিখানার চকচকে ফলাটার দিকে তাকিয়ে আস্তে আস্তে সরে গিয়েছিলেন।

আর তদবধি—

তর্জন-গর্জনের পথ থেকে সরে এসে বাক্যালাপ বন্ধর ধরে চলেছিলেন এলোকেশী। এবং তলে তলে ক্রমাগত নীলাশ্বরকে মন্ত্রণা দিচ্ছিলেন, বৌয়ের গহনাকাটা সব কেড়ে নিয়ে কোন ছলে-ছুতোয় বাপের বাড়ি পাঠিয়ে দিতে। একবার পাঠিয়ে দিতে পারলে জীবনেও আর ওই সর্বনেশে জাহাবাজ মেয়েকে ফিরিয়ে নিয়ে আসছেন না।

কিন্তু ছলছুতো খুঁজতে খুঁজতে দিন গড়িয়ে যাচ্ছিল।

হঠাৎ এমনি সময় রামকালীর আবির্ভাব।

হাতে চাঁদ পেয়েছিলেন এলোকেশী এবং নিশ্চিত ঠিক করে ফেলেছিলেন, এই সূত্রে বৌকে জন্মের শোধ বিদায় দেবেন। কারণ ইতাবসরে আর একটি মেয়ে এলোকেশীর দেখা হয়ে গেছে, বয়স সাত-আট, ধরন-ধারণ খুব নিরীহ, সর্বোপরি তার বাপ প্রতিশ্রুতি দিয়েছে চীনে-সোনার গহনায় মেয়ের সর্বস্ব মুড়ে দেবে।

এ মহামন্ত্রটি স্বামীকে অনবরত জপিয়েছেন এলোকেশী।

অতএব এক কথায় রাজী হয়েছিলেন নীলাশ্বর বৌ পাঠাতে। স্বপ্নেও ধারণা করতে পারেন নি, বৌ নিজে বৌকে বসবে।

রামকালী চলে যেতে এলোকেশী পতির প্রতি জ্বলন্ত কটাক্ষ করে বলেন, “বুঝলে কত বড় জাহাবাজ ধড়িবাজ মেয়ে? বলে নি তোমায় আমি, ও মেয়ের হাড়ে ভেলুকি খেলে!”

নীলাশ্বর বলেন, “দেখছি বটে।”

“তা হলে বল, ওই বৌ নিয়ে ঘর করতে হবে আমায়? একে তো ওই লক্ষ্মীছাড়ি সনিকে নিয়ে হাড়ে হাড়ে জ্বলছি, তার সঙ্গে আবার ওই বৌ! আর দুটিতে মিল কত! আরও ওই জন্মেই বৌকে কুলোর বাতাস দিয়ে বিদেয় করতে চাই। আর—আরও একটা কথা”, চুপি চুপি বলেছিলেন এলোকেশী, “এখনো ঘরে দিই নি তাই, ওই ছক্কা-পাঞ্জা বৌ যেই সোয়ামীকে হাতে পাবে, সেই তো একেবারে জয় করে নেবে! আর কি আমার নবু আমার থাকবে? তার থেকে আমার বকুলফুলের ওই দ্যাওর-ঝিটা হাবা-গোবা মতন আছে—”

কিন্তু বেয়াই যখন চলে গেলেন তখন কিন্তু আর নীলাশ্বর এ কথা বলতে পারলেন না, “ভাল চান তো মেয়ে নিয়ে যান মশাই, নইলে কুলোর বাতাস দিয়ে বার করে দেবো!”

নীলাশ্বরের একটা ক্রটি আছে। বুকের পাটাটা তাঁর যতই থাক, মুখের জোরটা কম।

এলোকেশী গালে-মুখে চড়িয়ে বললেন, “কী বলব, ব্যাই বেটাছেলে, তার সঙ্গে তো আমার কথা কওয়া সাজে না, নইলে একবার দেখে নিতাম সে বা কত বড় ঘুঘু আর ওই বাপ-সোহাগী বেটিই বা কত বড় হারামজাদী!”

বৌয়ের সঙ্গে কথা বন্ধ ছিল, সে পণ আর রাখতে পারলেন না এলোকেশী। সত্য যেখানে বসে পান সাজছিল, সেখানে তেড়ে গিয়ে বললেন, “বাপ নিতে এসেছিল, গেলি না যে বড় ?”

সত্য একবার চোখ তুলে চোখ নামিয়ে পান মোড়ায় মন দিল।

“কী, কথার উত্তর দিলি না যে বড় ? গেলি না কেন বাপের সঙ্গে পিসির বিয়েতে ?”

সত্য মৃদু গম্ভীর ভাবে বলে, “বিয়ের তো এখনও দেরি।”

“তা বাপ তো আদিখ্যেতা করে নিতে এসেছিল!”

“বাবার কথায় ও-রকম অশ্লেষা করে কথা কইবে না।” বলে মোড়া পানগুলো ডাবরে ভরে ভিজ়ে ন্যাকড়া ঢাকা দিয়ে ধীর মন্থর গতিতে উঠে কুলুঙ্গীতে তুলে রাখে সত্য।

এলোকেশী রাগে দিশেহারা হয়ে বোধ করি আর কোন কথা বুঁজে না পেয়েই বলেন, “সর্বনাশী লক্ষ্মীছাড়ি, কি ভেবেছিস তুই ? বাপের ঘরে যাবি না, চিরকাল আমার বুকে বসে দাড়ি ওপড়াবি ?”

সত্য একবার ফিরে তাকিয়ে শাশুড়ীর দিকে একটি অন্তর্ভেদী দৃষ্টি নিক্ষেপ করে বলে, “সর্বনাশীকে যখন কুলো-ডালা দিয়ে বরণ করে ঘরে এনেছ, তখন চিরকাল তার বোঝা বইতে হবে বৈকি।”

নবকুমার খবরটা পেল ভগ্নদূতের কাছে।

নিতাই বলে গেছে, “তোমর স্বস্তর আমাকে শুধু ভস্ম করতে বাকী রেখেছে!”

কিন্তু নিতাইয়ের কথাগুলো নবকুমার গায়ে মাখল না।

নির্ঘাতিতা ধর্মপত্নীকে নির্ঘাতন থেকে উদ্ধার করবার সাধু সংকল্প নিয়ে নবকুমার অসমসাহসিক কাজ করেছিল, কিন্তু রামকালী ফিরে যাবার পর হঠাৎ নিজের মনের দিকে তাকিয়ে আবার বিষ্ময়ে হাঁ হয়ে গেল নবকুমার। আশ্চর্য, সত্যবতীর যাওয়া হল না দেখে তার মনের মধ্যে যেন একটা পুলকের ঢেউ উথলে উঠেছে!

নবকুমার এ রহস্যের কিনারা করতে পারল না।

কিন্তু নবকুমারের জন্যে যে আরও কী অদ্ভুত রহস্য তোলা ছিল, তা কি সে দগুখানেক আগেও ভেবেছিল ?

রাত খুব বেশী নয়, সন্ধ্যারান্তর।

এলোকেশী যথারীতি বিছানায় গিয়ে আশ্রয় নিয়েছেন আর নীলাশ্বর যথারীতি রাতসফরে বেরিয়েছেন, সদু রান্নাঘরে কাঠের ‘দেলকো’র উপর মাটির প্রদীপ বসিয়ে রান্না করছে। নবকুমার বাড়ি ফিরে সন্তর্পণে অন্ধকার দালানটা পার হচ্ছিল, হঠাৎ পাশের ঘরের দরজার কাছ থেকে একটা চাপা মৃদু অথচ দৃঢ় গলায় কে বলে ওঠে, “একটু দাঁড়াতে হবে!”

নিজের কানকে বিশ্বাস করতে পারে না নবকুমার এবং দাঁড়িয়ে যে পড়ে সেটা আদেশ-পালনার্থে নয়, চলৎশক্তি হারিয়ে ফেলে বলেই পড়ে।

এ কণ্ঠস্বর তার বাপের নয়, মায়ের নয়, সদুর নয়।

অতএব ?

বাড়িতে আর কে আছে ? নবকুমারের স্বপ্নলোকবাসিনী ছাড়া ?

অন্ধকারে কেউ কাউকে স্পষ্ট দেখতে পায় না— শুধু গলাটাই শোনা যায়, “নিত্যেনন্দপুরে চিঠি পাঠিয়েছিল কে ? আমার দুঃখ-কাহিনীর ব্যাখ্যা না করে ?”

বলাবাহুল্য নবকুমার দারুণমূর্তিতে পরিণত। আর দারুণমূর্তির কথা কইবার ক্ষমতা থাকা সত্ত্বেও নয়।

“উত্তর নেই যে ?”

নবকুমার একবার অক্ষুটে বলে, “কি বলব ?”

‘স্পষ্ট উত্তর দেবে। আমার বাবাকে চিঠি দিয়েছিল কে ?’

এ কণ্ঠের প্রশ্নে নিরুত্তর থাকা নবকুমারের সাধ্যাতীত। কষ্টে বলে, “আমার সঙ্গে কথা কইছ, কে কমনে দেখে ফেলবে!”

“আচ্ছা সে চিন্তে আমার। কথাতার উত্তর ফাঁকি না দিয়ে হুক জবাবটা দাও।”

নবকুমার ঢোক গিলে, ঘাড় চুলকে, মেমে-টেমে বলে, “আমি চিঠির কথা কি করে জানব ? কিসের চিঠি ?”

“দ্যাখো, মিথ্যে কথা কয়ো না, নরকে ঠাই হবে না।” সত্যবতী রুদ্ধকণ্ঠে বলে, “আমার নিয়ম জ্ঞান, এ তোমার কাজ!”

সহসা নবকুমারের স্বামীত্ব এবং পৌরষ ধিক্কার দিয়ে ওঠে তাকে। তাই সেও সহসা ক্রুদ্ধ কর্তে বলে, “যদি দিয়েই থাকি, দোষটা কি হয়েছে ? নিজেই তো মরছিলে!”

অন্ধকার থেকে মৃদু তীক্ষ্ণ স্বর দ্রুত কথা কয়, “মরছিলাম সেটা ঢাক পিটিয়ে বলে বেড়াবার, কুটুমের কানে তোলার মতন কথা নয়। যারা নিজের মায়ের গালে চুনকালি দেয়, তাদের আবার বিদ্যো-বুদ্ধির বড়াই! ঘরশতুর বিভীষণকে ক্রিজগতের লোকে ছিছিকার করছে বৈ ধন্য-ধন্য করে নি। এই বুঝে কাজ করো।”

ঘরের অন্ধকারের মধ্যে মিলিয়ে যায় দরজায় দাঁড়ানো মূর্তিটার আভাস।

কর্তৃস্বরের অনুরণনটুকুও বাতাসে মিলিয়ে যায়, অথচ নবকুমার না যথৌ ন তত্হৌ অবস্থায় দাঁড়িয়ে থাকে।

প্রথম পত্নী-সম্ভাষণের যে বহুবিধ রোমাঞ্চময় এবং আবেগময় মধুর কল্পনা নবকুমারের লাজুক হৃদয় এতদিন ধরে লালন করে আসছিল, তার উপর কে যেন একটা কালির দোয়াত উপুড় করে দিয়ে গেছে।

স্ত্রীর সঙ্গে জীবনের প্রথম বাক্যবিনিময় এইভাবেই শেষ হয় নবকুমারের।

॥ তেইশ ॥



সত্যর বেহায়াপনার কথা জানতে আর বাকী থাকে না কারো এ তন্ত্রাটে। বাপ নিতে এসেছিল, স্বস্তর-শান্ত্তী এক কথায় মত দিয়েছিল, অথচ সত্য যায় নি, নিজে ফিরিয়ে দিয়েছে বাপকে, এ অভাবনীয় সংবাদটা যেন খড়ের চালে আশুন লাগার মত ছড়িয়ে পড়ল এ-পাড়া থেকে ও-পাড়া। পাড়ার অন্য বৌরা ভাবল, কুড়ুল-বাড়ির বৌটার নানা নিন্দেবাদ শুনেছি, এতদিনে তার মানে পাওয়া গেল, বৌটা পাগল!

আহা বেচারি নবকুমার!

বেহাইয়ের বিষয়ে লোভে বাপ কিনা একটা পাগল বৌ গলায় চাপিয়েছে ছেলের!

তা সত্য সম্পর্কে এ ধরনের আলোচনা আরও একবার হয়ে গেছে ইতিপূর্বে। সত্যর বাপের বাড়ির দেশেই হয়েছে। যখন চাউর হয়ে গেল, রামকালী কবরেজ মেয়ে পাঠাতে চান নি, মেয়ে নিজে বলেছে, “পাঠিয়ে দাও বাবা”, তখন এর থেকে বেশী বৈ কম ছিছিকার পড়ে নি।

ভুবনেশ্বরী অবিরল কেঁদে মাটি ভিজিয়েছে, সত্যর বন্ধুরা গাল থেকে আর হাত নামাতে পারে নি, সত্য নিশ্চল থেকেছে। শুধু যখন সারদা বলেছে, “নিজের পায়ে নিজে কুড়ুল মারলে, ঠাকুরঝি ?” তখন বলেছে, “কুড়ুল তো বাবা সেই আট বছর বয়সে গলায় বসিয়ে রেখেছেন বৌ, নতুন আর কি হল ?”

“তবু আরও একটা বছর থাকতে পেতে—”

“এতখানি জীবনে একটা বছর কম-বেশীতে আর কি বা হবে বৌ! রাগের মাথায় তারা ওই বিয়ে না কি বলেছে, তাই করলে তো সারাজীবন সতীনের জ্বালায় জ্বলতে হবে!”

সারদা একটা নিঃশ্বাস ফেলে চূপ করেছে।

আর যখন ভুবনেশ্বরী কেঁদে-কেটে মেয়ের হাত ধরে বলেছে, “আমাদের জন্যে তোর মন-কেমন করছে না সত্য ?”— তখন সত্য অন্য দিকে মুখ ফিরিয়ে উদাস গলায় বলেছে, “করছে কি করছে না সে কথা কি ঢাক পিটিয়ে বলতে হবে ?”

“তবে স্বেচ্ছায় যেতে চাইলি কেন ?”

“কেন কথার মানে নেই। নিজেরাই তো বল, মা বড় নির্বোধ, কেঁদে কেঁদে মর, আপনি ভাবিয়া দেখ কার ঘর কর! তবে ?”

ভুবনেশ্বরী এতেও চৈতন্যলাভ করে নি, বলেছিল, “আমার তো তবু এপাড়া ওপাড়া—তোর মতন দশ-বিশ ক্রোশ দূরে নয়—”

কথা শেষ হয় নি।

এই সময় আর বাঁধ রাখতে পারে নি সত্য, হাপুসনমনে কেঁদে ফেলে বলেছে, “তা সে কথাটা সময়কালে ভাবে নি কেন ? একটা মাস্তুর মেয়ে আমি তোমাদের, চোখছাড়া দেশছাড়া করে এক অ-

গঙ্গার দেশে বিদেয় করে দিয়েছ, মায়া-মমতা থাকলে পারতে তা ? এই তো পুণ্য মোটে একটা বছরের ছোট আমার চেয়ে, দিব্য ড্যাংডেডিয়ে বেড়াচ্ছে, আর আমায় সেই কোন্ কালে পরগোস্তর করে দিয়ে—” গলাটা ঝেড়ে নিয়ে কথাটা শেষ করেছে সে, “তা না দিলে, পারতো কেউ আমার গলায় গামছা দিয়ে টেনে নে যেতে ? বাবা মেয়ে বলে মায়া করেন নি, ‘গৌরীদান’ করে পুণ্য করেছেন, আমারও নেই মায়া-মমতা। নির্মায়িক বাপের নির্মায়িক মেয়ে—” বলেই হঠাৎ মাটিতে উপুড় হয়ে পড়ে ডুকরে ডুকরে কেঁদেছে দীর্ঘ সময় ধরে।

তবু শ্বশুরবাড়ি যাওয়া কি হয় নি ?

রামকালী আর রামকালীর মেয়ে দুজনেই সমান। দুজনের মতই ‘কথা’ যখন দেওয়া হয়ে গেছে, তখন আর নতুন বিবেচনা চলে না।

বাপের আড়ালে আর মেয়ের সামনে আলোচনার ঝড় বয়েছিল।

এবারের পালা এই।

এবারে মোটামুটি সত্যর আড়ালেই। শুধু সদু বলেছিল, “খন্যবাদ তোমাকে বৌ, নমস্কার! ছিছিকার দেব, না পায়ের ধুলো নেব ভেবে পাচ্ছি না!”

সত্য এর উত্তরে নিজেই হেঁট হয়ে সদুর পায়ের ধুলো নিয়ে হেসে বলেছিল, “দুগুগা দুগুগা গুরুজন তুমি, ছিছিকারই দাও বরং! জন্মাবধি যা পেয়ে আসছি!”

সত্যর মধ্যে যে বিরাট সমুদ্রের আলোড়ন চলছে তা কি সত্য লোকের সামনে মেলে ধরবে ? হ্যাঁ, সমুদ্রের আলোড়নই। তবু বাপ চলে যাবার পর ভেঙে পড়ে নি সে। যথারীতি তারপরই তেল-সলতে নিয়ে বসেছে পিদিম সাজাতে, তার পর ঘাটে গেছে, গা ধুয়ে কাপড় কেচে মস্ত ঘড়াটা ভরে এনে দাওয়ায় বসিয়ে ভিজ্জে কাপড়ের ‘ঠাকুরঘরে’ সন্ধ্যা দেখিয়ে শাঁখ বাজিয়ে তুলসীমঞ্চ জল দিয়ে, শুকনো কাপড় পরে রাস্তিরের রান্নার ব্যবস্থা করতে বসেছে।

রাস্তিরের রান্নাটা সত্যই করে আজকাল। সদুকে বলেছিল এ অধিকার অর্জন করেছে সে।

শুধু রান্না করতে করতে যে চোখ দিয়ে জল গড়িয়ে পড়েছিল তার, ফাল্গুনের শেষ থেকে বৈশাখের মাঝামাঝি আসতে কদিন লাগে, কিছুতেই হিসেব মেলাতে পারে নি— তার কোন সাক্ষী নেই।

কিন্তু সত্যর জীবন কি সেই ‘বৈশাখের মাঝামাঝি’টা দেখা দিয়েছিল আনন্দের মূর্তি নিয়ে ? আলো-ঝলমলে উজ্জ্বল মূর্তি নিয়ে ?

নাঃ।

সে দেখা পায় নি সত্য।

পুণ্যর বিয়েতে যাওয়া হয়নি তার। ঠিক সেই সময় এলোকেশী রক্ত-আমাশয় পড়ে মরতে বসেছিলেন। আর কাঁথা মুড়ি দিয়ে পড়ে থাকা মানুষটাই ষিচিয়ে উঠে বলেছিল, “কি বললি সদু, বাপের বাড়ির লোকের সঙ্গে যাবো বলে নাচছে হারামজাদী ? বাপ যখন সোহাগ করে নিতে এসেছিল তখন যাওয়া হল না, এখন আমি মরতে বসেছি—। বলে দিগে যা, যাওয়া হবে না, যে নিতে এসেছে ধুলোপায়ে বিদেয় হোক।”

মামী মরতে বসেছে বলে যে সদু ছেড়ে কথা কইবে তা কিন্তু করে নি। ঝঙ্কার দিয়ে বলেছিল সে, “তারা তোমার লোককে টাটের শালগেরামের মতন পাদ্যার্থ্য দিয়ে বসিয়ে খাইয়ে মাখিয়ে আর এক পোটলা জিনিস দিয়ে বুক ভরিয়ে বিদেয় দিলে, আর তাদের লোককে ধুলোপায়ে বিদেয় দেবে ? তা ভালো, মুখটা খুব উজ্জ্বল হবে। কিন্তু আমি বলি কি, দু-দশ দিনের জন্যে পাঠিয়েই দাও! ছেলেমানুষ—তাছাড়া শুনেছি ওই পিসিই চিরকালের খেলুড়ি—”

এলোকেশী চিটি করে বলেছিলেন, “তবে বল যেতে। তুমিই বা থাকবে কেন ? তুমিও বিদেয় হও। শুধু যাবার আগে একখানা ছুরি এনে আমার গলায় বসিয়ে দিয়ে যাও।”

সদু ছুরি দেয় নি, নিজেও বিদেয় হয় নি, শুধু সত্যর যাওয়ার ব্যবস্থা করেছিল, কিন্তু মস্ত বাদ সাধল নবকুমার।

হঠাৎ ‘পুরুষকর্তার’ ভূমিকা নিয়ে বেশ সোচ্চার ঘোষণা করে বসল, “যাওয়া-টাওয়া হবে না কারুর। আমার মা মরছে, আর লোকে এখন খুড়তুতো পিসির বিয়ের ভোজ খেতে ছুটবে! বলে দাও সদুদি, সে গুড়ে বালি। যাওয়া বন্ধ থাক।”

নবকুমারের ঘোষণায় কর্তা-গিন্নী পরম পুলকে নির্লিপ্ত সেজে বললেন, “আমরা আর কি বলব ? নবা যখন—”

তবু সদু চেষ্টা করেছিল। বলেছিল, “সব সময় বুঝি নবার কঁথাতেই ওঠো বসো তোমরা ?”

কিন্তু কাজ হয়নি। এলোকেশী শাপমনি দিয়ে ভূত ভাগিয়েছিল।

সত্যবতী বলেছিল, “আমি বাবাকে কথা দিয়েছিলাম বিয়েতে যাবো—”

নবকুমার সদু মারফৎ সে কথা শুনে জবাব দিয়েছিল, “সমাজে আমাদের মুখটা হেঁট হয়, এই যদি কেউ চায় তো যাক।”

সদু ওর মুখের দিকে কিছুক্ষণ তাকিয়ে হঠাৎ হেসে ফেলে বলেছিল, “খুব তো বিজ্ঞের মত কথা বলছিস, আসল ব্যাপারটা কি বল দেখি ? বৌকে তো এখনও ঘরে পাস নি, তবু এত মন-কেমন ?”

সদুর এই কথায় হঠাৎ নবকুমারের কর্তৃত্বি ঘুচে গিয়েছিল। “য্যাঃ” বলে ঝপ করে সরে গিয়েছিল। বোধ করি এ কথাও ভেবেছিল, সদুদি কি অন্তর্যামী ?

কিন্তু শেষ পর্যন্ত সত্যবতীই বৌকে বসল। সদু যখন বহু চেষ্টায় রফা করেছিল, নেমন্তন্ন রক্ষা করতে নবকুমার যাবে, সেই সঙ্গে বৌ যাবে তিনটি দিনের কড়ারে, বরকনে বিদেয় হবে ওরাও চলে আসবে, তখন সত্যবতী হঠাৎ বলে বসল, “দরকার নেই আমার এই একমুঠো ভিক্ষেয়। তিন দিনের মধ্যে তো পাড়া ভেসে যাক— বাড়ির সব লোকগুলোর মুখও দেখে ওঠা হবে না, সে যাওয়ায় লাভ! লোকে গুনবে সত্য এসেছিল, সত্য চলে গেছে, ছিঃ!”

“দেখ কথা! ভাত পায় না— গয়না চায়! মুষ্টিভিক্ষেই যে জুটছিল না, তবু বিয়েটাও তো দেখতে পাবি ?”

“খাক, নাই দেখলাম। যার নেমন্তন্ন রক্ষের কথা সে যাক।”

“সে আর গিয়েছে!”

“সদু মন্তব্য করে। এবং ঠিকই করে। নবকুমার জোড়হাতে বলে, “রক্ষা কর বাবা!”

অতএব শেষ রক্ষা করেন নীলাম্বর।

তিনি রামকালীর প্রেরিত লোকের হাতে পত্র দিয়ে দেন, “নবকুমার বাবা-জীবনের গর্ভধারিণী মৃত্যুশয্যায়, সে কারণে কাহারও যাওয়া সম্ভবপর হইল না, পত্রবাহকের হাতে লৌকিকতা বাবদ দুই টাকা পাঠালাম।”

রামকালী সেই পত্র পেয়ে দীর্ঘ সময় চুপ করে থেকে আস্তে বলেছিলেন, “ও টাকা দুটো তুই জলপানি খাস রাখু।... আর শোন, বাড়ির মধ্যে বলে দিগে যা, সত্যর শাণ্ডী মরমর, তাই আসা সম্ভব হল না।”

তারপর যথারীতি বিয়ে হয়ে গেছে, বৈশাখ কেটেছে, জ্যৈষ্ঠ আষাঢ় সব কেটে গেছে, রামকালী তাঁর জামাতা বাবাজীবনের গর্ভধারিণীর মৃত্যুসংবাদ পান নি।

এই না পাওয়াটা কি একটা মরুভূমির রক্ষ বাতাসের মত ? যে বাতাস সমস্ত কোমলতা আর সরসতা মুছে নিতে পারে ? নইলে রামকালী আস্তে আস্তে এমন নীরস কঠিন হয়ে গিয়েছেন কেন ? কেন বেহাইয়ের সঙ্গে ভদ্রতারক্ষা হিসেবে বেহানের কুশল সংবাদ প্রার্থনা করেন নি ? কেনই বা ভেবেছেন, মেয়ে আনার জন্যে হ্যাংলামি করার মধ্যে অপৌরব আছে ?

অন্তঃপুরের মধ্যে একখানি বিচ্ছেদ-ব্যাকুল মাতৃহৃদয় যে রামকালীর এই কাঠিন্যের সামনে মূক বেদনায় স্তব্ধ হয়ে পড়ে আছে, সেটা বোঝবার ইচ্ছে হয় নি কেন রামকালীর ?

রামকালী কি ভেবেছিলেন, এবারও সেই একফোঁটা মেয়েটাই বাপের কাছে অহঙ্কারের পরিমাণ দেখিয়েছে! দৃঢ়তার অহঙ্কার, কাঠিন্যের অহঙ্কার! বলতে চেয়েছে, “দেখ, আমিও কম যাই না!” এই অভিমানাহত পিতৃহৃদয়টি এই অহঙ্কারে দিশেহারা হয়ে চুপ করে থেকেছে আর ভেবেছে, “দেখা যাক!”

কিন্তু কতদিন দেখবেন রামকালী ?

অসমবয়সী এই দুটো মানুষের দাবা খেলার চালের অবসরে কত ব্যাপারই ঘটে গেল। যে ব্যাপারের একটা ঘটলেও মেয়ে বাপের বাড়ি ছুটে আসতে পারে। কিন্তু বলা তো চাই ? মেয়ের বাপ গলায় বস্তুর দিয়ে আবার আর্জি পেশ করবে তবে তো ?

তা করছেন না রামকালী।

অতএব আরও একবার বর্ষা শরৎ শীত বসন্ত পার হয়ে গেল নিজস্ব নিয়মে।



নীলাশ্বর বাঁড়ুয্যে নিত্যনিয়মে সন্ধ্যা-গায়ত্রী আফ্রিকপূজা ইত্যাদি সেরে গৃহদেবতা নারায়ণশিলার প্রসাদী বাতাস দুখানি মুখে দিয়ে জল খেয়ে হাঁক দিলেন, “সদু, আজ আর আমার জলখাবার গোছাস নে, শরীরটা তেমন ভাল নেই।”

সদু দুটি চালভাজায় তেল-নুন মাখছিল মামার জন্যে। ঘরে ক্ষীরের তক্তা আছে, আছে নারকেলকোরা, ওতেই হবে। আজকাল আর রাত্রী বেশী কিছু খান না নীলাশ্বর।

মামার কথায় বেরিয়ে এসে বলে সদু, “কেন, শরীরে আবার তোমার কি হল মামা।”

“কি জানি কেমন খিদে নেই।”

বলে যথারীতি বেনিয়ানটি গায়ে এঁটে আলোয়ান কাঁধে ফেলে নিত্যনিয়মিত রাত চরতে বেরিয়ে যান নীলাশ্বর।

সত্যবতী ঘর থেকে বেরিয়ে এসে বলে, “শরীর খারাপ যদি, ঠাকুর আবার এই শীতের রান্তিরে বেরোলেন কেন ঠাকুরঝি?”

সদু হাসি চেপে বলে, “কেন বেরোলেন, তুই নিজে জিজ্ঞেস করলেই পারতিস বৌ!”

“শোন কথা, আমি কথা কই?”

“ও, তা বটে!”

বলে সদু মুখ টিপে হাসে।

সত্য হঠাৎ সদুর হাত চেপে ধরে সন্ধিদ্ধ স্বরে বলে, “আচ্ছা ঠাকুরঝি, ঠাকুর বেড়াতে বেরোলেনই তুমি অমন হাসো কেন বল তো? কোথায় যান?”

সদু অমায়িক মুখে বলে, “ওমা, হাসি ঠাকুরের কখন! যান বোধ হয় দাবা-পাশার আড্ডায়!”

“তা শরীর খারাপ হলেও যেতে হকি? বাঁড়বৃষ্টি বজ্রাঘাত কোনমতেই কামাই চলবে না? বারণ করতে পার না তোমরা?”

“বারণ? ও বাবা! ও আকর্ষণ স্বপ্নের আকর্ষণের বাড়া!” বলে আর একবার হাসি চাপে সদু।

“আমি ঠাকুরের সঙ্গে কথা কইলে ঠাকুরের ওই মারাত্মক নেশা ছাড়িয়ে দিতাম।”

“তা সেই চেষ্টাই নয় করিস। নিজে বলতে না পারিস বরকে দিয়ে বলাস। সে উপযুক্ত ছেলে— বাপের এই বদ নেশা যদি ছাড়াতে পারে!”

সদু এবার হাসি চাপে না, হাসে।

কথাটা যে সত্যর মনে লাগল তা নয়, বরং সদুর কথার মধ্যে সে একটা প্রচ্ছন্ন কৌতুকের আভাস পেল। তার গুণের এই আড্ডায় আকর্ষণটা যে ঠিক দাবাপাশার আড্ডা নয়, এই সন্দেহই বন্ধমূল হল।

রাত্রী তাই ঘরে ঢুকেই প্রথম ওই কথাটাই পাড়ে সত্য, “আচ্ছা, রোজ রান্তিরে ঠাকুর কোথায় যান বল তো?”

হ্যাঁ, কিছুদিন হল রাত্রির অধিকার পেয়েছে সত্য। সদুরই প্রচেষ্টায়— আর সদুর প্রচেষ্টাটা নবকুমারের প্রতি করুণাতেই। নইলে বৌ তো কিছুতেই হেলে দোলে না।

নববধূর স্বপ্নে বিভোর নবকুমার অবশ্যই এ হেন প্রশ্নের জন্য প্রস্তুত ছিল না। তাই খতমত খেয়ে বলে, “কোথায় আবার! তুমি জান না?”

“জানলে তোমায় শুধোতাম না।”

নবকুমার গম্ভীর হয়ে গিয়ে বলে, “বাপ গুরুজন, তাঁর কথা নিয়ে আলোচনা না করাই ভাল।”

সত্য ভুরু কঁচকে বলে, “গুরুজনের নিন্দে করাই না হয় ভাল নয়, গুরুজনের কথা মাস্তুরই কওয়া দোষ?”

নবকুমার গম্ভীরতর হয়ে বলে, “তা এ তো নিন্দেই কথা। বামুনের ছেলে হয়ে বাগ্দী-পাড়ায় যাওয়া, তাদের হাতের পান-জল খাওয়া, এসব কি আর খুব গুণের কথা!”

বাগ্দীপাড়ায় যাওয়া!

তাদের হাতে পান-জল খাওয়া!

সত্যকে যেন তার স্বামী হঠাৎ ধরে ধোবার পাটে আছাড় মারল।

সত্যও তাই থতমত খায়।

বলে, “ও কথার মানে?”

সত্যর বয়সের দিকে তাকায় না নবকুমার, বৌ সকল জ্ঞানের আধার হবে, এইটাই ধারণা তার। তাই উদাস গলায় বলে, “মানে যদি না বোঝ তো নাচার। বাপের সম্পর্কে স্পষ্ট করে আর কী বলব? কথায় বলে— পিতা স্বর্গ পিতা ধর্ম—। নইলে পথেঘাটে যখন উল্লাসী বাগ্দিনীকে দেখি, তখন কি আর রাগে ব্রহ্মাণ্ড জ্বলে যায় না? কিন্তু কী করব, মনকে প্রবোধ দিতেই হয়, ভাবতে হয় যতই হোক মাততুল্য।”

পূজনীয় গিড়দেব সম্পর্কে “কিছু বলব না” বলেও সবটুকুই বলে ফেলে নবকুমার নিশ্চিন্ত হয়ে স্ত্রীকে সমাদর করে কাছে টানতে যায়।

কিন্তু এ কী!

নিত্যকার প্রফুল্ল প্রতিমা সহসা প্রসূর-প্রতিমায় পরিণত হল কেন? সত্যিই সত্যর সর্বশরীর যেন পাথরের মতই কঠিন হয়ে উঠেছে।

আর সেই শরীরের মধ্যকার মনটা?

সেই মনটাও কি কাঠ হয়ে উঠল? অজানিত একটা ভয়ে?

হ্যাঁ, ভয়েই।

অনেক অনেক দিন আগে বালিকা সত্যর নিঃশঙ্ক চিন্ত যেমন ভয়ে কাঠ হয়ে গিয়েছিল কাটোয়ার বৌ শঙ্করীর এক অজানা অন্ধকার লোকের বার্তা শুনে, তেমনি ভয়ে। কিন্তু সেদিন ছিল শুধুই অন্ধকার, শুধুই ভয়। কিন্তু আজ সেই অন্ধকারের মাঝখানে জ্বলে উঠেছে একটা তীব্র বিদ্যুৎশিখার চোখ-ধাঁধানো আলো।

আজকের সত্য সেদিনের অবোধ বালিকা নয়, সংস্কৃত-ভক্তের অনেক কিছুই তার জানা হয়ে গেছে। তাই ভয়ের গাঢ় অন্ধকারের মাঝখানে দৃঢ়ভাবে জ্বলে উঠেছে ঘৃণার বিদ্যুৎশিখা।

বার দুই চেষ্টার পর নবকুমার হতাশ হয়ে বলে, “হলটা কি তোমার? সারা দিনের পর দুটো সুখ-দুঃখের কথা কইব, একটু হাসি-আনন্দ দেখব এই আশায় হাঁ করে থাকি—”

সত্য রুদ্ধস্বরে বলে, “হাসি-আনন্দ জেঁা কুমোরবাড়ির হাঁড়ি-কলসী নয় যে ফরমাস দিলেই পাওয়া যায়, হাসি-আনন্দের মতন মন না থাকলে?”

নির্বোধ নবকুমার পরিহাসের বার্থ চেষ্টায় বলে, “তা এতে তোমার এত মন খারাপের কী আছে? আমি তো আর কোনও বাগ্দিনী সঙ্গে ভালবাসা—”

“থামো থামো—” তীব্র থিকারের স্বর ছড়িয়ে পড়ে বন্ধ ঘরের দেওয়ালে দেওয়ালে।

শীতের রাতের সুবিধে, একটু গলা খুলে কথা কওয়া চলে। আর সত্যি কথা বলতে, সত্য এমন কিছু লজ্জাবতী বৌও নয়। গলার শব্দ তার যখন-তখন শুনতে পাওয়া যায়।

থিকার দিয়ে সত্য গায়ের কাঁথাটা টেনে গলা পর্যন্ত ঢেকে ওদিকে মুখ করে শুয়ে বলে, “ওই ঘেন্নার কথা নিয়ে হাসি-ঠাট্টা করতে লজ্জা হয় না তোমাদের?” আমি কিন্তু এই পষ্ট বলে দিচ্ছি, এরপর থেকে যদি ঠাকুরকে আমি ছেদ্দাভক্তি না করতে পারি দুশো না আমায়।”

এর পর নবকুমার কথা কইবার চেষ্টায় বার্থ হয়ে মনে মনে নিজেকে গালাগাল দিতে থাকে। ছি ছি, কী একটা গাধা সে! বললেই হত, “বাবা কোথায় যায় আমি জানি না!” বৌকে তো সে চেনে। ভাল মেজাজে আছে তো গঙ্গাজল, মেজাজ বিগড়ে গেল তো আগুনের খাপরা।

বাবা, কী যে একবগুগা মেয়ে! কবে একদিন সেই নবকুমারের কী-একটা মিথ্যে কথা ধরে ফেলে একেবারে পাঁচ দিন কথা বন্ধ! অবশেষে নবকুমার নিতাইয়ের কাছ থেকে পরামর্শ নিয়ে একটা শাস্ত্রের শ্লোক আউড়ে বোঝায়, পরিবারের সঙ্গে মিথ্যে কথায় পাপ নেই, তবে বৌয়ের মুখের কুলুপ খোলে। অবিশ্যি শাস্ত্রবাক্য মেনে নিয়ে নয়, মুখ খোলে প্রতিবাদের মুখরতায়।

সেদিন তেজের সঙ্গে বলেছিল সত্য, “থাক থাক, আর শাস্ত্রর আওড়াতে হবে না। যে শাস্ত্রর বলে মিথ্যে কথায় পাপ নেই, সেই শাস্ত্রের আমার অরুচি। পরিবার বুঝি একটা মানুষ নয়, ভগবান বাস করে না তার মধ্যে? এর পর আর তোমার কোন কথা মন-প্রাণ দিয়ে বিশ্বেস করব আমি?”

সে যাই হোক, তবু ঝগড়ার সূত্রেও কথার দরজা খুলেছিল। এবার আবার কি না-জানি হয়!

আর সত্য?

সে ভাবছিল, ছি ছি, এই চরিত্র তার স্বত্তরের! যাকে 'ঠাকুর' বলে সম্বোধন করতে হয় তাকে! চরিত্রের অন্য বহুবিধ ক্রটি সে দেখেছে স্বত্তরের, নীচতা ক্ষুদ্রতা স্বার্থপরতায় গিন্নী এলোকেশীর থেকে কিছু কম যান না তিনি, এয়াবৎ সে-সবই মনে মনে মেনে নিয়েছে সত্য আর ভেবেছে ত্রিসংসারে আমার বাবার মতন আর কজন হবে ?

কিন্তু এ কী!

এ যে ঘৃণায় লজ্জায় সমস্ত রক্তকণা ছি-ছি করে উঠছে। এই বয়সে এই প্রবৃত্তি! আর সব চেয়ে আশ্চর্য কথা, এরা সে কথা সবাই জানে! অথচ সত্য নির্বোধ, সত্য ন্যাকা, তাই এতদিন দেখেও স্বত্তরের এই রাত-চরার অর্থ কোনদিন আবিষ্কার করার চেষ্টা করে নি। সত্যরা ঘুমিয়ে পড়ার অনেক পরে যে তিনি বাড়ি ফেরেন এ কথা তো বরাবরই দেখেছে। তার মানে বোঝে নি। না না, এ স্বত্তরকে সে ভক্তি-ছেদা করতে পারবে না, তাতে সত্যকে যে যাই বলুক।

হঠাৎ সত্যর সর্বশরীর আলোড়ন করে প্রবল একটা কান্নার উচ্ছ্বাস আসে আর এই দীর্ঘকাল পরে বাপের ওপর তীব্র অভিমানে হৃদয় বিদীর্ণ হতে থাকে তার।

এ সংসারে এসে অনেক নীচতা অনেক ক্ষুদ্রতা অনেক হৃদয়হীনতা দেখেছে সত্য, সবই এদের অশিক্ষা-কুশিক্ষার ফল বলে সহ্য করে নিয়েছে, কিন্তু আজকে এই একটা বুড়ো লোকের চরিত্রহীনতার নোংরামি তাকে যেন আছড়ে মারছে।

তাই যে সত্য উৎপীড়নেও কখনো কাঁদে না, সে আজ কেঁদে বালিশ ভিজিয়ে বলতে থাকে, "বাবা বাবাগো, দশটা নয় পাঁচটা নয়, একটা মাস্তুর মেয়ে আমি তোমার, না দেখেও এমন ঘরেও দিয়েছিলে! এত তুমি বিচক্ষণ, আর এই তোমার বিচার!"

অনেকক্ষণ কেঁদে কেঁদে এক সময় ঘুমিয়ে পড়ে সত্য।

কিন্তু রাতে কম ঘুমিয়েছে বলে সকালবেলা পর্যন্ত সুমোবে, এত সুখ তো আর বৌ-মানুষের ভাগ্যে ঘটে না। যথারীতি ভোরে উঠে স্নানশুদ্ধ হয়ে শারায়ণের ঘরের গোছ করতে ঢুকল সত্য ভারাক্রান্ত মনে, আর অভ্যাসমতন চন্দন-পাটাখানী টেনে নিয়ে চন্দন ঘষতে গিয়েই কথাতা একটা বিদ্যুৎ-শিহরণ এনে দিল ওর মধ্যে।

সত্যর এই যত্ন করে চন্দন ঘষা, ফুল-তুলসী বাছা, ধূপ-ধূনোয় ঘর ভর্তি করে তোলার মূল্য কি ? এসব উপকরণ নিয়ে পূজো করবেন তো এখন নীলাধর বাড়্যে! তাঁর আবার কাশির ধাত বলে প্রাতঃস্নান করবেন না, মুখ হাত ধুয়ে প্রসঙ্গ ধুতিখানা জড়িয়ে এসে পূজোর আসনে বসেন।

কিন্তু স্নান করলেই বা কি ?

দেহ মন আত্মা সবই যার অঙ্গচি, স্নানে আর কী গুণ্ড হবে সে ?

হাত গুটিয়ে চুপ করে বসে থাকে সত্য হাঁটুতে মুখ রেখে। ফুল তোলা হয় না, তুলসী চয়ন হয় না।

অনেকক্ষণ পরে সৌদামিনী কি কাজে এসে থমকে দাঁড়িয়ে পড়ে বলে, "কি হল বৌ, অমন করে বসে যে ?"

সত্য অবশ্য নির্বাক।

সদু ব্যগ্রভাবে দরজার চৌকাঠ অবধি এগিয়ে এসে বলে, "শরীর খারাপ করছে ?"

সত্য মাথা নাড়ে।

"তবে ? বাপের বাড়ির জন্যে মন উতলা হচ্ছে বুঝি ? সত্যি, কতকাল হয়ে গেল—"

সত্য হঠাৎ উঠে দাঁড়িয়ে বলে ওঠে, "বাপেরবাড়ির জন্যে মন উতলা হতে কখনও দেখেছ ঠাকুরঝি, তাই বলছ ?" সদু তার বড় নন্দ, তবু একটু প্রশয় তার কাছে আছে।

সদু হেসে ফেলে বলে, "তা দেখি নি বটে, তা হলে বরের সঙ্গে কৌদল ?"

"বকো না ঠাকুরঝি, অত তৃষ্ণ ব্যাপারে তোমাদের বৌ হারে না। আমার মন ভাল নেই, আজ থেকে পূজোর ঘরের কাজ আর আমি করব না।"

সদু হঠাৎ এই অভাবিত ঘোষণায় স্তম্ভিত হয়ে বলে, "সে কি কথা বৌ!"

"ওই কথা ঠাকুরঝি। গুরুজ্ঞানের কথায় বলতে কিছু চাই নে, কিন্তু ঠাকুর এসে পূজোর আসনে বসবেন মনে করে পূজোর গোছ করবার প্রবৃত্তি আমার হরে যাচ্ছে।"

সদু ভয়ের চোটে নিজের মুখখানাতেই একবার হাত চাপা দিয়ে আন্তে-আন্তে বলে, "ও কি সর্বনেশে কথা বৌ, মামীর কানে গেলে আন্ত থাকবি ?"

সত্য মুখটা ফিরিয়ে শুকনো গলায় বলে, “এ সংসারে আর আন্ত থাকবার বাসনা আমার নেই ঠাকুরঝি!”

সদু প্রমাদ গনে।

এ আবার কী কথা রে বাবা! এর মূল কারণ যে সত্যর কালকের সেই স্বপ্নর-সম্পর্কিত প্রশ্ন তাতে আর সন্দেহ নেই, বোধ করি প্রশ্নের উত্তর তার জানা হয়ে গেছে। কিন্তু তার সঙ্গে এই রণমূর্তির সঠিক সম্বন্ধ অনুমান করতে পারে না সদু।

পারবার কথাও নয়।

সদুর অনেক বয়স হয়েছে, এসব ব্যাপার তার কাছে কিছুই নয়। আশেপাশে অহরহ দেখতে দেখতে হাড়মাস কালি। কাজেই নিজের স্বামী-পুত্র ব্যতীত আর কারও চরিত্রহীনতায় যে এত বিচলিত হওয়া সম্ভব এ সদুর বোধের বাইরে।

কিন্তু অন্য বিষয়ে সদু বুদ্ধিমতী, তাই এ কথা নিয়ে বেশী বাজাবাজি না করে বলে, “আচ্ছা বেশ, আমি চট করে চানটা সেপে এসে দিচ্ছি গুছিয়ে, তুমি চলে এস।”

“রাগ করো না ঠাকুরঝি, আমার মন কিছুতেই নিচ্ছে না তাই। তোমার কি কি কাজ আছে দেখিয়ে দাও, আমি করছি।” বলে সত্যিই পূজোর ঘর থেকে বেরিয়ে আসে সত্য।

কিন্তু পূজোর ঘরের তুলসী-চন্দনের দায় না হয় সদু সামলালে, বধুজনোচিত আরও যে একটি কাজ রয়েছে সকালবেলাকার।

সে দায় কে সামলাবে?

সকালবেলা জল মুখে দেবার আগে শ্বশুর-শাশুড়ীর পদবন্দনা সত্যর নিত্য কর্মপদ্ধতির একটি অঙ্গ। এলোকেশীই শিখিয়েছেন সদু মারফৎ।

সত্যও অবশ্য সে শিক্ষা মেনেই চলেছে এযাবৎ।

কিন্তু আজ সত্যর ভ্রাতৃনক এক দুঃসাহসিক সংকল্প। ‘অসুখ’ তাকে না থাকতে হয় তাও ভাল, তবু ওই অপবিত্র মানুষটার পায়ের ধুলো মাথায় নেবে না সে।

গুরুজন?

তা আর কি করা যাবে? গুরুজন যদি ইতরকর্মের মত আচরণ করে!

এলোকেশীও নিত্য সকালবেলা স্নান সেপে এসেই পূজোর ঘরে ঢোকেন। সাংসারিক কাজের তো কোন দায় নেই। সদু আছে, বৌ আছে। আর এলোকেশীর আছে দেব-দ্বিজে পরমা ভক্তি। নীলাধরও সারা সকাল ওইখানেই থাকেন, চণ্ডীর পুঁথি পড়েন, মহিমস্তব আওড়ান।

কর্তাগিনীর যাবতীয় বিশৃঙ্খলাপ এইখানেই। কারণ সে আলাপের যেটা প্রধান সময় সে সময়টা এলোকেশীর হাতের বাইরে। মশারী-বক্তৃতার উপায় কোথা?

তা এইখানেই রোজ একত্রে দুজনকে শ্রণাম করে যায় সত্য।

কিন্তু আজ আর সত্যর দেখা নেই।

এলোকেশী কিছুক্ষণ পরে সদুকে ডেকে বিরক্তি ব্যঞ্জক স্বরে বলে, “আজ আর নবাব-নন্দিনীর দেখা নেই যে! গেলেন কোথা?”

ব্যাপার বুঝতে সদুর দেরি হয় না। এবং বৌয়ের এই বেখাপ্লা গোঁয়ে একটু বিরক্তই হয় সে, তবু সামলে নিয়ে বলে, “যাবে আর কোথায়? এই তো ওই দিকে—”

বলে কল্পিত ‘ওদিকে’র দিকে তাকায় সদু।

এলোকেশী বলেন, “ছেন্দায়-অছেন্দায় দৈনিক একবার শ্বশুর-শাশুড়ীর পায় মাথাটা নোয়ানো, আজ থেকে বুঝি সে বরাদ্দ বন্ধ?”

নীলাধর মহিমস্তবের মাঝখানে উৎকর্ণ হয়ে ওঠেন। ততক্ষণে সদু হাওয়া। ওখানে গিয়ে ত্রস্তব্যস্তে বলে, “কী রে বৌ, এখনো পেন্নামটা ঠুকে আসিস নি বুঝি?”

সত্য হাতের কাজ সেপে উদাস মুখে বসেছিল। ঘাড় না ফিরিয়েই বলে, “না।”

“শাশুড়ীর টনক নড়েছে। যা যা, চট করে সেপে আয়।”

যেন ভুলে গেছে সত্য, তাই মনে পড়িয়ে দেওয়া!

সত্য গম্ভীরভাবে বলে, “দুজনে একত্রে বসে, একজনকে শ্রণাম করলাম, একজনকে করলাম না, ভাল দেখায় না। ঠাকুরন এদিকে আসুন, তখন হবে।”

সদু এবার বিরক্তি গোপন করে না। বলে, “তোমার আবার বড় বেশী বাড়াবাড়ি বৌ! স্বভাব-দোষ আর কটা বেটাছেলের নেই? তালুই মশাইয়ের মতন দেবচরিত্র কি আর সবাই? তা বলে স্বভাব-দোষের অপরাধে স্বভবের পাওনা পেন্নামটা রদ হয়ে যাবে?”

“বাবার কথা ভুলে কাজ নেই ঠাকুরঝি, তবে আমার যাতে মন নেয় না, সে কাজ আমি করতে পারি না। এক হিসাবে উনি পতিত। শালগেরামের পূজো গুঁর দ্বারা হওয়াই উচিত না।” বলে সত্য জোরে জোরে নিঃশ্বাস নিতে থাকে। বোধ করি মানসিক উত্তেজনাতেই।

সদুর কিছুক্ষণ আর বাকশক্তি থাকে না।

খানিক ‘খ’ বনে দাঁড়িয়ে থেকে আস্তে আস্তে বলে, “তোমর মত লেখাপড়া শিখি নি বৌ, এত কথা বোঝবার ক্ষমতা নেই। আমি সার বুঝি, যে যা করে করুক, আমার কর্তব্য আমি করে যাব।”

“মনে অভক্তি দেবানোটাই কি কর্তব্য ঠাকুরঝি?”

সদু চট করে এ কথার জবাব দিতে পারে না, কি যেন একটা বলতে যায়, কিন্তু ইত্যবসরে পিছনে এসে দাঁড়িয়েছেন বাঘিনী। মনের মধ্যে তাঁর সন্দেহের ধোঁয়া। যেন বুঝেছেন একটা কিছু হয়েছে।

বাঘিনীর মতই হাঁক করে রক্তস্থলে পড়েন তিনি, “কোতব্য অকোতব্যের কথা কি হচ্ছে রে সদু?”

সদু চুপ।

সত্যও চুপ।

এলোকেশীই ফের প্রশ্ন করেন, “মুখে কথা নেই কেন? কী শলাপরামর্শ হচ্ছিল দুজনে শুনি? তুই সদু আমার খাবি পরবি আর আমারই বৌ ভাঙাবি? কবে বিদেশি হবি তুই আমার সংসার থেকে?”

কথাটা নুতন নয়, এটাই এলোকেশীর কথার মাত্রা। প্রতিবাদ সদু কোনদিনই করে না, কিন্তু আজ হঠাৎ বিচলিত স্বরে বলে ওঠে, “শলা-পরামর্শ আমি তোমার বৌকে কোনদিন দিই নি মামী, সং পরামর্শই দিই। সত্যিমেথ্যে বৌই বলুক।”

বৌয়ের অবশ্য শাওড়ীর সামনে কথা বলবার কথা নয়। কিন্তু সত্য যখন-তখনই নিয়ম লঙ্ঘন করে বসে, তাই আজও ফস করে বলে, “সে কথা হাজারবার সত্যি। ঠাকুরঝি আমাকে সং পরামর্শই দিতে এসেছেন। কিন্তু সে পরামর্শ আমার মনে ‘নেয্য’ বলে না ধরলে তুমি ইদিকে এসেছ ভালই হয়েছে— বলে সত্য মুহূর্তে হাত বাড়িয়ে শাওড়ীর পায়ের ধুলো মাথায় নিয়ে বলে, “যতই যা হোক তুমি সতীলক্ষ্মী।”

সতীলক্ষ্মী অবশ্য প্রথমটা বেশ কিছু হকচকিয়ে যান, তারপর বলেন, “এ সবের মানে কি সদি?”

“মানে বুঝতে আমিও অপারগ মামী,” সদু বেজার মুখে বলে চলে যায়, “বৌ পারে তো নিজে বুঝিয়ে বলুক!”

সত্যিই আজ তার ভারী রাগ হয়েছে। এ আবার কী রে বাবা! তিলকে তাল করা! ডেকে অশান্তি টেনে আনা! বিশ্বভুবনে যে কথা কেউ কখনো শোনে নি, বলে নি, ভাবে নি— সেই কথা ওই মেয়ের মাথায় আসেই বা কী করে? আর বুকের পাটা? এযাবৎ সত্যর অনেক বুকের পাটা দেখেছে সদু, দেখে মুর্ছিত হব-হব হয়েছে, কিন্তু আজকের সঙ্গে যেন কোন দিনের তুলনাই হয় না!

তা সত্যিই তুলনা হয় না।

কারণ সদু চলে যেতে যেতে গুনতে পায় সত্য বলছে, “বলতে মাথা কাটা গেলেও না বলে পারছি নে, ঠাকুরের পায়ের ধুলো মাথায় ঠেকাবার প্রিবৃত্তি আর আমার নেই। যতদিন না জানতাম, ততদিন—”

কথার শেষাংশ শোনবার ক্ষমতা আর হয় না সদুর। ঝপ করে বিনা প্রয়োজনে একটা ঘড়া নিয়ে ঘাটে চলে যায়।

অনেকক্ষণ পরে ঘড়া কাঁখে নিয়ে আস্তে আস্তে খিড়কির দরজায় দাঁড়ায়। না, কোন শব্দ নেই, সব যেন নিখর। তবে কি একটা হত্যাকাণ্ড ঘটে গেছে? এটা শূশানের নিস্তব্ধতা?

দাওয়ায় উঠে কিন্তু অবাক হয়ে গেল সদু। দেখে মাঝের ঘরের দরজার কাছে গোটা দুই তিন গামছাবাঁধা পুঁটলি, আর মামা-মামী দুজনে মিলে একখানা ছেঁড়া কাপড়ে বড় একটা ধামা বাঁধছেন। ধামা অবশ্য বোঝাই। কি আছে ঠিক বোঝা যাচ্ছে না। এটা অপ্রত্যাশিত। সদুর বুকের রক্ত হিম হয়ে যায়।

এই সমগ্রটুকুর মধ্যে এত গোছগাছ হয়ে গেল ? আর কেনই বা হল ?

এঁরা কি তাহলে বৌয়ের সঙ্গে পেরে না উঠে দেশত্যাগী হচ্ছেন ?

কথাটা তাই । এ আর এক অভিনব রূপ এলোকেশীর ।

সদুর সঙ্গে চোখাচোখি হতেই এলোকেশী বলেন, “নন্দ-ভাজে পুণ্যের সংসার কর সদু, পাপী-তাপীরা বিদেয় হয়ে যাচ্ছে!”

সদু ঘড়া নামিয়ে বসে পড়ে বলে, “মামী তুমি কি ক্ষেপেছ ?”

“তা ক্ষেপলে জগৎ দুঃখতে পারবে না সদু । দশে-ধর্মে সবাইকে শুধিয়ে এস, এতেও যদি মানুষ না ক্ষ্যাপে তো কিসে ক্ষ্যাপে!”

“ও তো একটা পাগল! ওর কথা আবার ধর্তব্য!” গলা নামিয়ে বলে সদু ।

“পাগল! আঝাড়া কেউটে! তুই আর বৌয়ের হয়ে ওকালতি করতে আসিস না সদি । এত বড় একটা মানিয়মান মানুষ, পুতবৌয়ের দ্বিধারে জীবন বিসর্জন দিতে যাচ্ছিল । অনেক বুঝিয়ে নিবৃত্তি করে যাচ্ছি এখন গুরুপাটে । তার পর যা আছে অদুটে ।”

জোরে জোরে গাঁঠরি বাঁধতে থাকেন এলোকেশী ।

সদুর ইচ্ছে করছিল যে ছুটে গিয়ে বৌকে বলে, “ভাল চাস তো পায়ে ধরে মাপ চাই গে যা!” কিন্তু জানে সে কথা বলা বৃথা । স্বয়ং বৈকুণ্ঠের নারায়ণ এলেও সত্যকে স্বমতে আনতে পারবেন না । অনেক শুণ আছে বৌয়ের, কিন্তু ওই এক মহৎ দোষ । জেদ । মেয়েমানুষের এত জেদ ? আজকের ব্যাপারটাকে সদু যেন কোন দিক থেকেই সমর্থন করতে পারছে না ।

তাই চেষ্টা সে এদিক থেকেই করে ।

“তা বাড়ি ছেড়ে তোমরা যাবে কেন শুনি ? বাড়ি কি তোমার ছেলে-বৌয়ের ?”

“না হোক, যেখানে ওর মুখ দেখতে হবে সেখানে থাকব না, ব্যস!” এতক্ষণে মুখ খোলেন নীলাধর, এ কথাটি বলেন তিনিই ।

“তা বাড়ি থেকে তো অমনিমুখে যাওয়া চলবে না, ভ্রাত-ডাল চড়িয়েছি আমি । মুখে দিতে হবে ।” এ যেন আপাতত সমুদ্রে বালির বাঁধ ।

চড়িয়েছিল সত্যিই, কিন্তু রান্নাঘরের অবস্থা সম্পর্কে এখন আর কোন জ্ঞান নেই সদুর । কাঠ পুড়ে উনুন নিভে ঠাণ্ডা হয়ে বসে আছে নিশ্চিত ।

সহসা নীলাধর একটা প্রবল হুকার দিয়ে মূর্তিতে পা ঠোকেন, “ভাত-ডাল! এ ভিটেয় আমি আর জলগ্রহণ করব ভেবেছিছ তুই ?”

সদুর বুকটা ধড়ফড় করে ওঠে । মামীর সঙ্গে সে অনেক কথা চালাতে পারে, কিন্তু মামা ? উল্লাসীর হাতে পান-জল খাওয়া ইত্যাদি করে বহু ইতিহাস তো তার জানা । তবু তো কই ভয়ে মরে নি । আর ওই বৌ কোথায় পেল সেই ভয়-জয়ের মন্ত্র, যে মন্ত্রের জোরে স্বচ্ছন্দে বলা যায় উনি তো পতিত, শালগ্রামের পূজা করা ওঁর উচিত নয় ?

বেশী গভীরে ভাবার ক্ষমতা থাকে না সদুর, শুধু ভাবতে থাকে, নবাটা আবার আজকেই হাতে দেরি করছে! আর এই ভয়ানক দুর্দিনে কি হাটবারও হতে হয় ?

সদু কি করবে ?

গিয়ে বৌয়ের পায়ে ধরবে ? না কি রান্নাঘরে শেকল তুলে দিয়ে কোথাও আঁচল বিছিয়ে শুয়ে থাকবে ? তারই বা এত ভয়-পাবার কী আছে— তার দোষে তো আর নবকুমারের মা-বাপ দেশত্যাগী হচ্ছে না ?

সাহস দেখে কি সাহস জন্মায় ?

দুঃসাহস দেখে দুঃসাহস ?

তাই সে হঠাৎ অন্য মূর্তি ধরে, “ঠিক আছে, চুলোয় জল ঢেলে দিই গে ।” বলে চলে যায় ।

আশ্চর্য আশ্চর্য!

গিয়ে দেখে সত্য কিনা রান্নাঘরের দাওয়ায় বসে শাক বাছছে । মুখ দেখে কিছুই বোঝা যাচ্ছে না ।

সদুর আর সহ্য হয় না । সে বলে ওঠে, “ও পিণ্ডির কাজ করে আর কী হবে ? গিলবে কে ? বাড়ির কর্তা-গিন্নী তো সংসার ত্যাগ করছে!”

সদুকে অবাক করে দিয়ে সত্য বলে, “সংসার ত্যাগ করা অত সোজা নয় ঠাকুরঝি! সংসার ত্যাগ করতে বসে কেউ সমস্ত সংসারটাকে পুঁটলি বেঁধে নিয়ে যেতে চায় না! মিছে ভাবছ, কেউ কোথাও যাবে না । উনুনে আমি কাঠ ঠেলে দিয়েছি, তুমি দেখ এইবার ।”

তা সত্যর কথাই ঠিক।

শেষ পর্যন্ত কস্তা-গিনী দেশত্যাগের সংকল্প বর্জন করে থেকেই গেলেন। শুধু ভাত খাবার সময় একটু বেশী সাধ্যসাধনা করতে হল সদুকে!

থেকে গেলেন অবশ্য নবকুমারের নির্বেদে। নবকুমার দুজনের পায়ে মাথা খুঁড়ে “রক্তগঙ্গা” হতে চাইল, আর মায়ের পা ছুঁয়ে শপথ করল বৌকে শাসন করে দেবে।

ছেলের এতটা কাঁতরতা সহ্য করতে না পেয়েই বোধ করি ওঁরা এ যাত্রায় যাত্রা স্থগিত রাখলেন।

আর এই এতদিনের মধ্যে কখনো যা করে নি নবু, আজ তাই করে বসল। দিনের বেলায় কথা কয়ে বসল বৌয়ের সঙ্গে।

কিন্তু বৌকে কি বাগ মানাতে পেরেছিল নবু? বকে, খোশামোদ করে, পায়ে পড়তে গিয়ে? না, এ কথা কোনদিন সত্যর মুখ দিয়ে বার করতে পারে নি নবকুমার, “আমার অন্যায হয়েছে।” শুধু শেষ পর্যন্ত যখন নব আত্মঘাতী হবার ভয় দেখিয়েছিল তখন সত্য বলে উঠেছিল, ‘যেন্না ধরে যাচ্ছে সবতেই। পুরুষ না হয়ে মেয়েমানুষ হয়ে জন্মাও নি কেন তুমি, এই বিধেতার রহস্য। বেশ, ছেদা-শূন্য পেন্নামে যদি তোমাদের এত দরকার থাকে তো করব কাল থেকে সেই ন্যাকরা।’

রাগে অবশ্য নবকুমারের ভিন্ন রূপ।

সুন্দরী তরুণী স্ত্রীর সঙ্গে বাক্যালাপ বন্ধের দুঃসহ কষ্ট বহন করবার মত শক্তি তার নেই, তাই যেচে বলে, “মা-বাপকে গুনিয়ে গুনিয়ে একটু শাসন করতে হল, নইলে বলবে, ‘ছেলে বৌকে মাথায় তুলে রেখেছে’।

“আজ আমার কথা কইতে মন নেই, ক্ষমা দাও।”

বলে পাশ ফিরে গিয়েছিল সত্য।

আর বেশ কিছুক্ষণ পরে হঠাৎ ধড়মড়িয়ে উঠে বসেছিল, “আমি কলকাতায় যাব।”

নবকুমার চমকে বলে, “কলকাতায়! কলকাতায় যাবে তুমি? এতক্ষণে বুঝতে পারছি, মাথাটাই বিগড়েছে তোমার!”

“কেন, মাথা না বিগড়ালে কলকাতায় যাবে না কেউ? তোমার মাস্টারের মাথা খারাপ?”

“মাস্টার? মাস্টারের সঙ্গে তোমার কুপীনা? তিনি বেটাছেলে, একা যাচ্ছেন একা আসছেন, গিয়ে বন্ধুর বাসায় উঠছেন, তুমি কোনটা করবে?”

সত্য তীব্রস্বরে বলে “বেটাছেলে আমি নয়, তুমি তো? তুমি যেতে পারবে না? তোমার সঙ্গেই যাব। বাসা করে থাকবো।

নবকুমার স্তম্ভিত হয়ে বলে, “তোমার সঙ্গে সঙ্গে আমি তো উন্মাদ হই নি! মা-বাপ দেশ-ভিটে ছেড়ে যাব কিনা কলকাতায় বাসা করতে? কেন গুনি?”

“কেন তা গুনিবে? দেখতে যাবে তোমাদের এই বারুইপুরের বাইরেও আর জগৎ আছে!”

“দেখে আমার দরকার?”

সত্য চরম বিত্বারের স্বরে বলে, “দরকার? কী দরকার, তাও তোমাদের এই বারুইপুরের গর্তয় পড়ে থেকে বোঝার ক্ষমতা হবে না!”

নবকুমার এ কথার অর্থ ধরতে পারে না, একটা জোরালো যুক্তিই জোর দিয়ে বলে, “মেয়েমানুষ কলকাতায় যাবে! জাতধর্ম কিছু আর থাকবে তা হলে?”

সত্য গম্ভীর স্বরে বলে, “ঠাকুরের যদি এখনো জাত থেকে থাকে, শালগেরাম নাড়ার অধিকার থেকে থাকে তো আমারও কলকাতায় গিয়ে জাতের হানি হবে না।”

“আবার সেই এক কথা, পুরুষের আড়াই পা বাড়াইলেই শুদ্ধ, মেয়েমানুষের তাই হবে? চামড়া দেওয়া কলের জল খেতে হবে, তা জান?”

“খেতে হলে খাব। সেখানের আরও দশজন ব্রাহ্মণ-সজ্জনের যা গতি হচ্ছে, তাই হবে। কেন, হালদার-বাড়ির মেজ ছেলে যায় নি কলকাতায়?”

“বৌ নিয়ে যায় নি!”

“তা মরা বৌকে কি আর শাশান থেকে তুলে নিয়ে যাবে?”

“হালদারের ছেলে গেছে চাকরি করতে—”

সত্য দৃঢ়ভাবে বলে, “তুমিও তাই যাবে।”

“আমি ?” উপহাসের হাসি হেসে ওঠে নবকুমার, “আমি যাব কলকাতায় চাকরি করতে ?”
 “কেন নয় ? ভূমি যত ইংরেজি শিখেছ, এ তদ্বাটে আর কেউ শিখেছে ?”
 অন্য দিন হলে নবু অবশ্যই স্ত্রীর এই স্বীকৃতিতে বিগলিত হত, কিন্তু আজ তার প্রাণে সুখ নেই, নেই সে সুর। তাই বলে, “ওধু বিদ্যে থাকলেই তো হবে না—”
 সত্য জোড়া ভুরু কুঁচকে বলে, “তা আর কি থাকা দরকার ?”
 বিপদের মুখে ফস্ করে সত্যি কথাই বলে বসে নবু, “দরকার সাহসের।”
 সত্য এক মিনিট চুপ করে থেকে ঝুপ করে গুয়ে পড়ে বলে, “আচ্ছা সেটা আমি যোগান দেব।”
 কিন্তু এত বড় আশ্বাসেও কি বিশেষ কাজ হল ? হল না। নবকুমার ক্রুদ্ধ প্রশ্ন করলো, “পরের চাকরি করতে যাবই বা কেন ? ঘরে আমার ভাতের অভাব ? দেখেওনে চালাতে পারলে পায়ের ওপর পা দিয়ে বসে কাটিয়ে দিতে পারি তা জানো ? কি জন্যে করবো দাসত্ব ?”
 সত্য গম্ভীরভাবে উত্তর দিলে, “বসে থাকো এ বাসনা ঘোচাবার শিক্ষা পেতেই যাওয়া দরকার।”
 চলল অনেক কথা-কাটাকাটি। আর বহুক্ষণ কাটাকাটি করে নবকুমার এই কথাই ব্যক্ত করল, “আমার ধারা হবে না, এই স্পষ্ট বলে দিচ্ছি।”
 সত্যও দৃগুহরে বলে উঠল, “আমিও স্পষ্ট বলে রাখছি, কলকাতায় আমি যাব যাব যাব। মেরমানুষ কলকাতায় গেলে আকাশের বজ্রের এসে মাথায় পড়ে কিনা তা দেখব।”
 কিন্তু সে দৃশ্য কবে দেখতে পেয়েছিল সত্য ? তখনি কি ?
 না, দেখতে তার আরো অনেকদিন লেগেছিল।
 ভিজে ন্যাকড়াকে তড়িয়ে শুকিয়ে সে ন্যাকড়ায় সলতে পাকিয়ে তাতে শ্রদীপ জ্বালাতে হলে সময় একটু লাগবে বৈকি। ততদিনে সত্য দুটি ছেলের মা হয়েছে।

॥ পঁচিশ ॥



শীত গ্রীষ্ম বর্ষা বসন্তের অচ্ছেদ্য শৃঙ্খলার শৃঙ্খলে বন্দী এই নিয়মতান্ত্রিক পৃথিবী রাজ্যটার প্রধান প্রজা মানুষগুলোর জীবনের কিন্তু না আছে নিয়মের নিশ্চিন্ততা, না আছে শৃঙ্খলার আশ্বাস। তাকে না বিধাতা, না প্রকৃতি, কেউ-কোনদিন দেয় নি নিশ্চিত নিয়মের ভরসা।

তাই সহজ সুস্থ মানুষও রাতে ঘুমতে যাবার আগে স্থির বিশ্বাস নিয়ে বলতে পারে না, সকালের আলো সে দেখবেই। বলতে পারে না, তার ভরা বসন্তের মাঝখানে বজ্রের অভিশাপ নেমে আসবে না, শরতের সোনালী আলোকে মুছে দিয়ে গুরু হয়ে যাবে না অপ্রতিরোধ্য ধারা-বর্ষণ।

না, জোর করে এসবের কিছুই বলতে পারে না মানুষ। সে জানে না কখন তার আশায় গড়া সুখের ঘরখানি তছনছ করে দিয়ে যাবে অতর্কিত মৃত্যুর নিষ্ঠুর থাবা অথবা সে ঘরকে বিকল করে দিয়ে যাবে আকস্মিক দুর্ঘটনা অথবা দুরারোগ্য ব্যাধি। কে বলবে এই অনিয়মের দেবতা কোথায় বসে আছেন তাঁর অমোঘ নিয়ম নিয়ে!

তবু রামকালী কবরেজের সংসারে উপর্যুপরি দুর্ঘটনাগুলো দেশসুদ্ধ লোককে হতচকিত করে দিল।

আগুন লেগে বাইরের বড় আটচালা ভস্মীভূত হয়ে যাওয়াটাতেও কেউ অতটা বিশ্বয় বোধ করে নি, কারণ ছতশানের ক্ষুধাটা ভাগ্যের মার হলেও তার মধ্যে মানুষের অসতর্কতা অথবা মানুষের কারসাজির ছাপটা স্পষ্ট দেখা যায়। তা ছাড়া রামকালীর উপর ভাগ্যের মারটা সেই প্রথম।

না, রামকালীর আটচালায় আগুন লাগার মধ্যে কেউ শত্রুর কারসাজি আবিষ্কার করতে যায় নি। ওটা যে নিতান্তই অসতর্কতার ফল এটা সবাই বুঝেছিল। ব্যাপারটা এই—

এ বাড়ি থেকে আগুন সংগ্রহ করে নিয়ে যাওয়া কাছাকাছির প্রায় প্রতিটি পড়শীরই নিয়ম। বরাবরই সে-সব বাড়ির কেউ না কেউ নিজেদের প্রয়োজন মাসিক সময়ে এসে এ বাড়ির রান্নাঘর থেকে একখানা জ্বলন্ত কাঠ নিয়ে যায়। ঘরে তাদের উনানে শুকনো নারকেলপাতা, খটখটে ঘুঁটে অথবা সরু করে কুচনো কাঠকুটো ডালপালা সাজানোই থাকে, জ্বলন্ত কাঠখানা এনে তাতে সংযোগ করে দিতে পারলেই মিটে গেল কাজ।

রামকালীর বাড়িতে নিত্য সকালে তিন-চারটে করে উনুন জ্বলে। অতএব পড়শীরা নিজেদের সংসারে আবার আশুন জ্বালাবার অথবা হাসামার কথা ভাবতে যাবে কেন? কাজটা ঝগড়াটের। সোলার কাঠি বানাও, চকমকি ঠোকো, সময়সাপেক্ষ ব্যাপার। তার চাইতে এটাই তো সুবিধে। তা সেদিনও যথারীতি ওই ও-বাড়ির ঘোষাল-গিন্নীর বিধবা মেয়ে তরু প্রহরখানেক বেলা নাগাদ একখানা জ্বলন্ত কাঠ নিয়ে এ-বাড়ি থেকে নিজেদের বাড়ি যাচ্ছিল, হঠাৎ মাথা বরাবর খোলা আকাশে একটা দাঁড়কাক বিশ্রী করে ডেকে উঠল।

দাঁড়কাকের ডাক অপয়া, এ আর কে না জানে! ঘোষালের মেয়ে তরুও জানত। তা ছাড়া এও জানা ছিল— তার যেদিন বৈধব্যদশা ঘটে, সেদিন কোথায় যেন অনবরত দাঁড়কাক ডেকেছিল। তার উপর আবার আজ চতুর্দশী।

তরুর বুকটা কেঁপে উঠল। তাড়াতাড়ি পা বাড়ালো।

কিন্তু তাড়াতাড়ি পা চালিয়ে চলে যেতে গিয়েও আবার বাধা পেতে হল। কাকটা আরও নেমে এসে প্রায় তরুর মাথার উপরে একটা পাক খেয়ে ডেকে উঠল— ক্! বুকটা হিম হয়ে হিতাহিত জ্ঞান লোপ পেয়ে গেল তরুর, কী কাজের কী পরিণাম খেয়াল এল না, হাতের সেই জ্বলন্ত কাঠটা সে কাকের উদ্দেশ্যে ছুঁড়ে মারল।

বলা বাহুল্য, আশুন দাঁড়কাকের পালকাত্রেও লাগল না, পড়ল গিয়ে রামকালীর বারবাড়ির বড় আটচালার মাথায়। বৈঠকখানা বাড়ি, চণ্ডীমণ্ডপ এসব রামকালীর পাকা কোঠা, কিন্তু কাজে-কর্মে পূজোআচার্য বেশী লোক সমাগমের প্রয়োজনে প্রকাণ্ড দুখানা খড়ের আটচালা তিনি করিয়ে রেখেছিলেন পাশাপাশি, গায়ে গায়ে। অগ্নিদেবতার জোড়া নৈবেদ্য হল সে দুখানা।

তরু শুধু অসতর্কই নয়, অনামনস্কও।

কাঠখানা কোথায় গিয়ে পড়ল, অথবা পড়ে কি করল, সে সম্পর্কে খেয়াল মাত্র না করে তরু আবার এ বাড়িতে ফিরে এসে আর একখানা জ্বলন্ত কাঠ নিয়ে বাড়ি ফিরল। কি কাজ করেছে সে টের পেল তখন, যখন লেলিহান আশুনের প্রচণ্ড শিখায় অগ্নির অজস্র ধোঁয়ায় আকাশ ভরে গেছে, আর পাড়াসুদ্ধ লোকের চিৎকার আকাশ ছাড়িয়েছে।

বোকা তরু এই বলে বুক চাপড়াতে উদ্যত হয়েছিল, 'ওগো এ সর্বনাশ যে আমিই ডেকে আনলাম,' তরুর কাকা ইশারায় "চুপ চুপ" বলে খামিয়ে দিল তাকে।

কিন্তু আশুনকে থামানো গেল না। আর থামাবার উপায়ই বা কি! পুকুর থেকে ঘড়ায় করে জল এনে দূর থেকে ছুঁড়ে মারা বৈ তো নয়। সে চেষ্টায় লাভ নেই।

রামকালী গম্ভীর নির্যোষে ঘোষণা করলেন, "আশুনে জল দেবার দরকার নাই, তাতে আরো ছড়াবে। চণ্ডীমণ্ডপের দেয়ালে জল ঢালো। যাদের যাদের কাছাকাছি বাড়ি, তারা আপন আপন বাড়ির দেওয়াল ঠাণ্ডা কর।"

তবু সকলে যখন হায়-হায় করতে করতে বাড়ি ফিরল, তখন সন্ধ্যা হয়-হয়। রামকালী চাটুয্যের মত নিষ্পাপ নিরুল্লস অগ্নিতেজা মানুষটার চালায় আশুন লাগল কেন, এই নিয়ে জল্পনা কল্পনার শেষ রইল না।

কিন্তু এ তো সবে প্রথম।

এর কয়েক দিন পরেই দীনতারিণী ঘাট থেকে চান করে এসেই হঠাৎ "শরীর কেমন করছে" বলে পক্ষাঘাত হয়ে পড়লেন।

পক্ষাঘাত পাতক রোগ, দীনতারিণীর তা অজানা নয়। ছেলের দিকে তাকিয়ে তিনি অশ্রু-কলঙ্কিত চোখের ইশারায় কাতর আবেদন করলেন, তাঁকে তাড়াতাড়ি 'পার' করতে।

রামকালী শুধু কপালের ঘাম মোছার ছলে একবার কপালে হাত ঠেকালেন।

দিনতিনেক পরেই মারা গেলেন দীনতারিণী।

না, অত বড় বদ্যি হয়েও মাকে বাঁচাতে পারলেন না বলে কেউ দুষল না রামকালীকে। বরং দীনতারিণীর ভাগ্যকে "ধন্য ধন্য" করতে লাগল সবাই। বলল, "খুব গিয়েছে বুড়ী। ডুগল না ভোগাল না, এমন মুতু্যই তো কাম্য।"

তবে এ কথা বলতে ছাড়ল না, "বছরটা একটু সাবধানে থেকে রামকালী, অগ্নির কোপ, তায় মহাশুক্র নিপাত, সময়টা তোমার ভাল যাচ্ছে না।"

পাড়ার বয়োজ্যেষ্ঠরাই বলেন, এ ছাড়া আর কার সাহস ?

রামকালীর কাকা-দাদা তো সাধ্যপক্ষে তাঁর সামনে আসে না। সামনে আসে রাসু, কবরেজী শেখে কাকার কাছে। তবে প্রায়ই হতাশ করে কাকাকে। রামকালী কখনো জ্রুকুটি করেন, কখনো হেসে ফেলে বলেন, “তোমার কিছু হবে না রাসু!”

কিন্তু শুধুই কি রাসুর ?

কুঞ্জর কোন্ ছেলেটার বা কি হয়েছে ? পাঠশালায় গিয়ে অনাসৃষ্টি অনাসৃষ্টি খেলা উদ্ভাবন করা ছাড়া “মাথা” আর খেলতে দেখা যায় না রাসুর কোনো ভাইটারই। রাসু তো ভবু ছাত্রবৃত্তি পাস করেছে, টোলেও পড়েছে কিছুদিন, তাছাড়া চেহারাটা সুকান্তি আর বেশ মার্জিত ভাব।

অনেকটা কাকার ধাঁচের রং-গড়ন তার। তাই সমানে দাঁড়ালে একটা মানুষের মত দেখতে লাগে। আরগুলো তো তাতেও না।

তাছাড়া কবরেজী বিদ্যে মাথায় না ঢুকুক, অনেক ব্যাপারেই রাসু রামকালীর ডান হাত।... এই যে দীনতারিণীর শ্রাদ্ধের অত বড় কাণ্ডটা, রাসু সামনে না থাকলে রীতিমত বেগ পেতে হত না কি রামকালীকে ? কারণ স্বপাক হবিষ্যন্ন, ত্রিসঙ্ক্যা স্নান, ইত্যাদি করে বহুবিধ নিয়মের পাকে বাঁধা থাকায় নিজে তো ঠিক ‘মুক্তজীব’ ছিলেন না।

রাসু ‘কাজকর্মের ব্যাপারে যথেষ্ট পারগ।

‘দানসাগর’ করলেন রামকালী মাতৃশ্রাদ্ধে, সেই সমারোহে সত্য এল। নবকুমারও এল।

রাসুই আনতে গেল।

ঠাকুরমা মারা যাওয়ার খবরে সত্যর প্রাণটা আকুলিব্যাকুলি করছিল, রাসুকে দেখে যেন স্বর্গের চাঁদ দেখল। এ সময় যে বাবা রাখু কি গিরি তাঁতিনীকে পাঠান নি, খুব ভাল করেছেন।

সাড়ে তিন বছর পরে এই প্রথম বাপের বাড়ি যাওয়া।

কিন্তু সত্যর দেহের অন্তঃপুরে তখন যে আর এক ‘প্রথম’ সম্ভাবনার সূচনা দেখা দিয়েছে, সে কি সত্য জানত না ? না বুঝতে পারে নি ?

তা সত্য না পারুক, সদু পেরেছিল বুঝতে। কিন্তু রূপচণ্ডী মামীকে এই সূচনা মাত্রতেই জানাতে সাহস করে নি সদু। ভেবেছিল যাক আর গোটা দুই দিন, তেমন প্রবল লক্ষণ ধরা পড়লে আপনি জানবে বুড়ী।

এই সময় দীনতারিণীর বার্তা।

সদু ভয় পেল। এ সময় এই!

ভাবল, মামীকে বলি কি না বলি!

কিন্তু বলা আর হয়ে উঠল না।

বলতে দিল না তার মমতা। এ খবর শুনে যদি এলোকেশী আবার বৌয়ের “যাত্রায়” বাদ সাধেন!

আহা বেহারা এই এতদিন এসেছে, একনাগাড়ে আছে। আপনি বুদ্ধির দোষেই হোক আর যার দোষেই হোক আছে তো! এই ছুতোয় যেতে পারে তো যাক। ভগবান ভালই করবেন।

তবে যাত্রাকালে চুপি চুপি সাবধান করে দেয় সত্যকে, “বাপেরবাড়ি যাচ্ছি, দীর্ঘকাল পরে যাচ্ছি, কিন্তু সাবধান, বাঁধা-গরু ছাড়া পাওয়ার মত লাফঝাঁপ করিস নে। আমার বাপু সন্দ হচ্ছে—”

সত্য একটু ভাবনার মত তাকিয়ে অশ্রুটে বলে ফেলেছিল, “কি ?”

“এই দেখ! পষ্ট করে না বললে হবে না বুঝি ? এদিকে তো পাকা গিন্ধী! সন্দ হচ্ছে পেটে বাচ্ছা-কাচ্ছা কিছু এসেছে, বুঝলি ? সাবধানে থাকা দরকার।”

ভয় না আহ্লাদ ? ভয়, ভয়, সম্পূর্ণ ভয়! তবে এক অদ্ভুত ভয়!

নিজের মধ্যে কী এক অজ্ঞাত রহস্য বাসা বেঁধেছে, একথা ভাবলেই গায়ে কাঁটা দিয়ে ওঠে।

গরুরগাড়ির ভিতরে বসে ঘোমটার মধ্যে থেকে বার বার নবকুমারকে দেখে সত্য আর মানুষটাকে যেন নতুন মনে হয়।

এ খবর ও পেলো ?

কী না জানি হবে সেই অবস্থাটা!

গরুরগাড়িতে বেশ ঝাঁকুনি লাগছিল।

একসময় তাই বলেও ফেলে চুপি চুপি, “পাল্কি আনলে না কেন বড়দা ?”

রাসু অপ্রতিভ মুখে বলে, “খুব কষ্ট হচ্ছে না রে? আমি বলেছিলাম, তা খুড়ো মশাই বললেন—”, একটু ইতস্তত করে বলেই ফেলে রাসু, “বললেন, ‘কাজের বাড়িতে চারিদিক থেকে আত্মকূট্র আসবে, সবাইকে তো আর পালকি যোগানো যাবে না’—! আমি তাও অবিশ্যি বলেছিলাম, সবাই আর জামাই তো সমান নয়? তাতেও বললেন, ‘জামাইও তো বাড়িতে একটি নয় রাসু?’ ওঁকে আর কে বোঝাবে বল?”

সত্য অন্যমনস্ক ‘চুপি চুপি’টা ভুলে বেশ স্পষ্ট গলাতেই বলে ওঠে, “তা এর আর বোঝাবার কি আছে বড়দা, সত্যিই তো! জামাই সবাই সমান! নিজের জামাইটি বলে সারপন্ন করলে চলবে কেন? বরং পুণ্ডির নতুন বিয়ে হয়েছে—” কথা শেষ না করেই নবকুমারের উপস্থিতি স্মরণ করে জিভটা কেটে চুপ করে।...

কিন্তু সমুদ্রে বালির বাঁধ কতক্ষণ? আবার এক সময় কথা কয়ে ওঠে সে।

কত প্রশ্ন, কত ঔৎসুক্য!

এই সাড়ে তিনটে বছরে কত ঘটনা ঘটেছে, কত জন্ম-মৃত্যুর লীলা-খেলা হয়েছে, কত ছোট মানুষ বড় হয়েছে, কত আইবুড়োর বিয়ে হয়ে গেছে, সেই সব তথ্যগুলো তো কম মূল্যবান নয়, জানতে হবে না সে সব?

“তুমি কিন্তু একটুও বদলাও নি বড়দা!”

সহাস্য মুখে বলে সত্য।

আর নবকুমার বিগলিত বিন্ময়ে সেই হাস্যোজ্জ্বল মুখের দিকে তাকিয়ে থাকে। বিন্ময়? তা বিন্ময় বৈকি! সত্যর এই মুখ সে কবে দেখেছে? সত্যর মুখটা যে হেসে উঠলে এমন অপূর্ব লাভণ্যময় দেখায় সে কথাই বা কবে জেনেছে?

তা সত্যর সেই প্রশ্নে রাসুও হেসে উঠে বলে, “আমি আবার এই ক’দিনে বদলাবো কি?”

কদিন!

সত্যর যে মনে হচ্ছে কত যুগ-যুগান্তর পার হয়ে গেছে! সেকথাই বলে সে বিন্ময়-বিন্মারিত নদ্রে, “কদিন? বল কি বড়দা, সাড়ে তিনটে বছর— কদিন হল?”

“সাড়ে তিন বছর!” রাসু আবার হেসে ওঠে, বলে, “সাড়ে তিন বছর হয়ে গেল এর মধ্যেই? তা ওই স্নতেই সাড়ে তিনটে বছর, কোথা দিয়ে কেটে গেছে!”

সত্য নিঃশ্বাস ফেলে বলে, “তা তোমাদের আর না কাটবে কেন? স্বাধীন সুখী মানুষ। আমাদেরই মনে হচ্ছে যেন আর একটা জন্ম পরিণয়ে এলাম!”

তা বাপের ভিটেয় পা দিয়েও ঠিক সেই কথাই মনে হয় সত্যর। যেন আর একটা জন্ম পার হয়ে এল।

কিন্তু কোথায় এল?

ঠিক যে জায়গাটা থেকে চলে গিয়েছিলে, সেই জায়গাটায় কি? সেটা কি এখনো তেমনি পড়ে আছে? ফাঁকা, খালি?

হয়তো ছিল হয়তো আছে, কিন্তু এই জন্মান্তর পার হয়ে আসা মেয়েটাকে কি আর এখন সেই খাঁজে ধরবে? কোনো মেয়েকেই কি ধরে? গোত্রান্তরের সঙ্গে সঙ্গে সঙ্গেরই কি অন্তরের বিরাট একটা পরিবর্তন হয় না?

যে মেয়েটা হয়তো উঠতে বসতে বকুনি খেয়েছে আর নিতান্ত অবহেলায় খেলে খেলিয়ে বেড়িয়েছে, সে হয়ে ওঠে আদরের অতিথি, সমীহর কূট্র। কোন্‌খানে তবে আশ্রয় পাবে সেই মেয়েটা?

এত বড় কাজের বাড়ি, তবু ওরা সত্যর সঙ্গে সঙ্গে ফিরছে। সারদা, ভুবনেশ্বরী, শিবজয়ার নাতনী দুটো, এমন কি মোক্ষদা পর্যন্ত। সত্য কি খাবে, সত্য কোথায় শোবে, সত্য কোথায় বসবে, সত্যর কিছু চেয়ে না পাওয়া হল কিনা এই সব। ভুবনেশ্বরীর তো কথাই নেই। তার শাওড়ী গেছেন, মহা অশৌচ, ছুঁয়ে নেড়ে কিছু করার ক্ষমতা নেই, তবু বলে বলেই যা পারে।

ব্যাপারটা স্বস্তিকর নয়, এ যেন প্রতি মুহূর্তে মনে পড়িয়ে দেওয়া, “তুমি কুট্র, তুমি অতিথি!”

একসময় ঝেঁজেই উঠল সত্য। মার ওপরই উঠল।

“কী চাও বল তো তোমরা? একুনি আবার স্বস্তরবাড়ি চলে যাই? বাবাঃ, তোমাদের এই আদরের ঠালা সামলানো আমার কশ নয়। বাড়িতে তো আরো ‘স্বস্তরতি’ মেয়ে এসেছে, কই তাদের নিয়ে তো এত হৈ-চৈ করছ না?”

কথাটা সত্যি ।

আরো শ্বশুরঘর করা মেয়ে এসেছে । পুণ্ডি তো এসেইছে, কুঞ্জর দুই গিন্গীবান্নী মেয়ে এসেছে, শিবজায়ার মেয়ে এসেছে, রামকালীর যে ছোট খুড়ো নেই তাঁর তিনটে মেয়ে এসেছে, কুঞ্জর সহোদর বোনো এসেছে, তারা ঝাঁকের কৈ হয়ে রয়েছে । শুধু সত্যকে নিয়েই—

ভুবনেশ্বরী মেয়ের এই ঝঙ্কারে অপ্রতিভ হয়ে বলে, “তারা সবাই পেরায় পেরায় আসে । তোর মতন কে এমন ঘরবসতে গিয়ে একেবারে তিন-চারটে বছর—”

কথা শেষ করতে পারে না ভুবনেশ্বরী ।

সত্য মার এই রুদ্ধবাক মুখের দিকে তাকিয়ে একটু নরম হয়ে বলে, “বুঝলাম । কিন্তু আছি তো দিনকতক । কাজ মিটেই তো পালাচ্ছি না, সে কথা হয়ে গেছে ওখানে । তখন কোরো মেয়েকে আদরগোবর । এখন তোমার শাশুড়ীর ছেরাদ্দ, এখন মানায় মেয়ে নিয়ে সোহাগ করা ?”

ভুবনেশ্বরী সজল চোখে বলে, “কদিন থাকবি তুই-ই জানিস!”

“থাকবো বাবা, মাস দুই অন্তত থাকবো, হয়েছে সে-কথা ।... চল পুণ্ডি, আমাদের সেই বটতলার খেলাঘরটা দেখে আসি!”

বলে পুণ্ডির হাতটা চেপে ধরে প্রায় টেনেই বার করে নিয়ে যায় তাকে সত্য খিড়কির দোর দিয়ে ।

ওদের এই ‘খেলাঘর’টা বাস্তবিকই একটি মনোরম ঠাই । স্থান নির্বাচনের ব্যাপারে প্রশংসা অর্জন করতে পারে ওরা ।

প্রকাণ্ড একটা বুড়ো বটগাছ বুরি নামিয়ে নামিয়ে খানিকটা জায়গা এমন একটি ছায়াপূর্ণ আশ্রয়গৃহ নির্মাণ করে রেখেছে যে, দু-এক পশলা বৃষ্টি হয়ে গেলেও বোধ করি সেই গৃহবাসীর মাথা ভিজবে না । রোদের তো কথাই নেই, প্রায় প্রবেশ নিষেধ তার ।

এইখানেই সত্যদের শৈশবের খেলাঘর । তা শ্বশুরবাড়ি যাবার কদিন আগে অবধিও খেলেছে সে । এখনই পরিত্যক্ত ভূমি । এখনকার ছোটদের অন্য খেলাঘর ।

নিকানো-চুকোনো গাছের গোড়াটা এখন ধুলোভর্তি হয়ে থাকলেও সারি সারি ছোট ছোট উনুনগুলো এখনও পুরনো স্মৃতি বহন করে পড়ে আছে ক্ষত-বিক্ষত দেহ নিয়ে ।

কী যত্নেই এই উনুনগুলি পেতেছিল ওরা!...

কিছুক্ষণ গোড়ায় বসেই থাকল সত্য চুপ করে । ঠিক সেই মুহূর্তে যেন কথা কইবার শক্তি নেই । অগত্যা পুণ্ডিও চুপ ।

অনেকক্ষণ কাটার পরে একটা দীর্ঘনিঃশ্বাস ফেলে সত্য বলে, “আশ্চর্য্য দেখেছিস পুণ্ডি, সবাই বদলে গেছে, সবই বদলে গেছে, অথচ এই তুচ্ছ জিনিসগুলো অবিকল আছে!”

পুণ্ডিও নিঃশ্বাস ফেলে, “সত্যি, যা বলেছিস!”

সত্য আস্তে আস্তে দেখিয়ে দেখিয়ে বলে, “এই উনুনটা পুঁটির, এটা খেঁদির, এটা টেঁপির, এটা গিরিবালার, এটা সুশীলার, এটা তোর— তাই না ?”

নিজের কথাটা আর বলে না ।

পুণ্ডি বলে সে কথা, “এইটে তোর ছিল, দেখ ভাঙা হাঁড়িকুঁড়িগুলোও রয়েছে পাঁশকুড়ে!”

হ্যাঁ, খেলাঘরের ‘পাঁশকুড়’ও একটা ছিল বৈকি । সবই তো থাকা প্রয়োজন । পাঁশকুড়, পুকুরঘাট, গোয়াল, টেঁকিঘর— অনুষ্ঠানের ক্রটি হবে কেন ? বড়রা যে ‘খেলাঘর’ নিয়ে মত্ত, ওরা তো তারই নিখুঁত অনুকরণ করবে । ওদের মাটির আর কাঠের পুতুলগুলোও ঘাটে বাসন মেজেছে, ক্ষার কেচেছে, টেঁকিতে পাড় দিয়েছে, রোঁধেছে, কুটনো কুটেছে, বাটনা বেটেছে, ছেলে ঘুম পাড়িয়েছে, কর্তব্যে তিলমাত্র ফাঁকি দিতে পায় নি । তাদের কাজের ছুতোয় মুখব হয়ে উঠেছে এই বুড়ো বটতলা ।

বসে থাকতে থাকতে হঠাৎ উঠে দাঁড়ায় সত্য ।

বলে, “চ পুণ্ডি, আর দেখতে ইচ্ছে করছে না, বুকের ভিতরটা কেমন মুচড়ে উঠছে ।”

তা পুণ্ডির মধ্যেও সেই মোচড় পড়ছিল, সেও বলে, “চ আর মায়া করা বিড়ম্বনা । যেদিন পরগোস্তর করে দূর করে দিয়েছে, সেদিন থেকেই তো সব ঘুচেছে । মেয়ে জন্মাটাই ছাই ।”

সত্য আর একবার বড়সড় একটা নিঃশ্বাস ফেলে বলে, “মেয়ে জন্মাটাই ছাই নয় রে পুণ্ডি, আমাদের বিধেন দাতারাই ছাই । পরগোস্তর করে দিয়ে জনের শোধ পর করে নেড়ু দেবার হুকুম

ভগবান দেয় নি। এই যে তুই আমার চিরকালের বন্ধু, তোর বিয়েতে আসা হল না, এ দুঃখ কি মলেও যাবে? যাবে না। তবু তো এলাম না। এসব কি ভগবান বলেছে?”

তা নিঃশ্বাস ফেলেছে বলে যে হাসছে না, গল্প করছে না, পাড়া বেড়িয়ে বেড়াচ্ছে না, সেকথা ভাবলে ভুল হবে, সেটা যথারীতিই চলছে। গল্পের সমুদ্র, কথার পাহাড়। পাড়ার কোন্ মেয়েটা স্বপ্নবাবড়ি গেছে, কোন্ মেয়েটা বাপেরবাড়ি আছে— তার তন্মাস করে বেড়ানো আর গল্পে মুখের হয়ে ওঠা, এটা খবল প্রবাহেই চলছে। নিঃশ্বাসটা নিভুতে।

একান্ত নিভুতে, মনের অন্তরালে রয়েছে সেই নিঃশ্বাস। এত পূর্ণতার মধ্যেও কোথায় যেন একটা সগভীর শূন্যতা, সেই শূন্যতার ওপরই বৃষ্টি পা রাখতে হয়েছে সত্যকে, তাই পায়ের নীচে মাটি খুঁজে পাচ্ছে না।

সে শূন্যতা— সত্য আর এদের নয়। এ সংসার সত্যর নয়।

বিরাত কাজের বাড়িতে কে কোথায় ঠাই পেয়েছে কে জানে! মেয়েরা মেয়েমহলে, পুরুষরা বারমহলে। কোটাঘরে সব জামাই-কুটুম, আর নবনির্মিত আটচালার নিচে জাত-গোস্তর।... নবকুমার যে কোন্‌খানে আছে সত্য জানে না, মাঝে মাঝে সেটা মনে পড়ছে। আহা মানুষটা মুখচোরাজুক, কোথায় কি ভাবে আছে কে জানে! এসে অবধি তো দেখা হয় নি!... বাবা সহস্র কাজে বেড়াচ্ছেন, বাবার এমন সময় নেই যে জামাই নিয়ে তদারকি করে বেড়াবেন! যা করে পাঁচজনে.. কি ভাবেও আমাদের কে জানে!

থেকে থেকেই সেই মানুষটার কথা মনে পড়ছিল। মনকেমন মনকেমন ভাবটা ছিল, আবার একটু অহঙ্কারী অহঙ্কারী দুটু বুদ্ধিও ছিল। ইচ্ছে হচ্ছিল একবার লোকটাকে ডেকে বলে, “দেখ তুই? সবই দেখছ? বুঝতে পারছ, তোমার মা যতই হেলাফেলা করুন, নেহাৎ হেলাফেলা ঘরের মেয়ে আমি নই!”

কিন্তু এসব বলার সুযোগ কোথা?

বিয়েবাড়ি নয় যে সবাই রঙ্গরঙ্গে মাতবে। মাতদায় উদ্ধার বলে কথা। তাছাড়া অনেকের মধ্যে একজন হলেও দীনতারিণীর পদটা বাড়ির গিন্ধীর ছিল, ছোট ননদদের তিনি যতই ভয় করে চলে থাকুন, আর ছেলেকে যতই সমীহ করে আসুন, সবাই জানতো গিন্ধী বলতে দীনতারিণীই। সেই গিন্ধীর জায়গা শূন্য হয়ে গেলে সবাইয়েরই ফাঁকা ফাঁকা লাগে বৈকি। খেটে খেটেও জেরবার হচ্ছে সবাই, এর মাঝখানে কার এ কথা মনে উদয় হবে, সত্যর সঙ্গে সত্যর বরের দেখা করিয়ে দিই কোন ছলছুতোয়। তাছাড়া চাতক পক্ষীর অস্থি তো নয় সত্যর। এই দীর্ঘকাল নিশ্চিন্দ বরের ঘর করে এসেছে সে। সত্যর বরকে সত্যর দেখতে ইচ্ছে হবে, এ চিন্তা তাদের মনে উদয় হবার কথা নয়।

উদয় হচ্ছে এক ভুবনেশ্বরীর।

কিন্তু সে তো সব দিকেই বন্দিনী। একে তো শাস্ত্রী মরার নিয়ম-নীতির দায়, তার উপর মেয়ের ভয়ের দায়। ওরকম চেষ্টা করতে গেলে সত্য যে ক্ষেপে উঠবে না, এ প্রতিশ্রুতি কে দেবে ভুবনেশ্বরীকে?

কিন্তু সত্যর মা কি সত্যকে সবটা বুঝে উঠতে পেরেছে?

পারে নি।

সত্য যে ছলছুতো খুঁজে বেড়াচ্ছিল, এ তার ধারণার বাইরে।

তা অবশেষে হয়ে গেল যোগাযোগ।

নিয়মভঙ্গের যজ্ঞ মিটতে প্রায় সন্ধ্যা হয়ে গেছিল, সত্য পুকুরঘাট থেকে আঁচিয়ে একবার নিজের মামার বাড়ি পর্যন্ত গিয়েছিল মামীদের সঙ্গে, জোরপায়ে ফেরার সময় নেড়ুর সঙ্গে দেখা।

নেড়ু দাঁড় করালো।

মুখটা রহস্যে উদ্ভাসিত করে বলল, “এই সত্য, তোর ভূতের ভয় আছে?”

“ভূতের ভয়!”

“হঁ, গেছো ভূতের ভয়! নির্ঘাত আছে, তাই না?”

“নির্ঘাত আছে!”, সত্য মুখ নেড়ে বলে, “এলেন আমার গণথকার ঠাকুর!”

“নেই ভয়? ঠিক বলছিস? এই ঝিকিঝিকি বেলায় তোদের সেই বটগাছতলায় যেতে পারিস? সে যেতে আর হয় না। হঁ, জনমনিষ্যি যায় না সেখানে।”

“ওরে আমার কে রে? কেউ যায় না সেখানে? তুই যাস না তাই বল। তুইও কম খেলিস নি সেখানে, তবু মায়ামমতা নেই। আমাদের কথাই আলাদা, আমি আর পুণ্য যাই নি যেন।”

“গিয়েছিলি ?”

“নিয়াস! তুই হঠাৎ এমন ন্যাকা হচ্ছিস কেন রে নেডু ? পেঁচার চোখ গুনতে যেতাম না আমরা?”

“আহা, সে তো আগে! এখন শ্বশুরঘর করে করে সাহস হরে যায় নি ?”

“ইল্লি রে! গেলেই হল! চল না দেখিয়ে দিচ্ছি, একপো'র রাত অবধি বসে থাকতে পারি, তা জানিস ?”

বলে গটগট করে এগিয়ে যায় সত্য নির্ভয়ে নিশ্চিন্তে, এই ‘কনে দেখা’ আলোতেও যেখানটা প্রায় গভীর অন্ধকার।

কিন্তু কে ওখানে!

কে! কে!

প্রায় চোঁচিয়েই উঠছিল সত্য, সামলে নিল নেডুর ভয়ে। গুনতে পেলে আর রক্ষে রাখবে ? সত্যর ভয়ের কথা ঢাক পিটিয়ে বেড়াবে।... কিন্তু লোকটা যে এদিকেই আসছে! পালাবে সত্য ? উহু, এ নির্যাত নেডুর কোন কারসাজি, তা নইলে—

হঠাৎ একটা সম্ভাবনায় পা থেকে মাথা অবধি একটা তড়িৎপ্রবাহ বয়ে যায়, আর পরক্ষণেই সম্ভাবনাটা প্রত্যক্ষের মূর্তিতে দেখা দেয়!

“ইস তুমি! তুমি এখানে যে—”

জেনে বুঝেও বিশ্বাসের ভান করে সত্য।

নবকুমার হতাশ গলায় বলে, “কেন আর, তোমারই দর্শন আশায়! উঃ বাপেরবাড়ি এসে একেবারে ডুমুরের ফুল হয়ে গেছ, লোকটা মরল কি বাঁচল খোঁজও নেই!”

সত্য পুলক গোপনের ব্যর্থ চেষ্টায় হেসে ফেলে বলে, “আহা, কথার কি ছিরি রে! আমিই তো খোঁজ করে বেড়াব!”

“তা একবার দেখা তো দেবে ? আমি হতভাগ্য যাই আমেক বুদ্ধি খেলিয়ে—”

“তা তো দেখতেই পাচ্ছি। নেডু ছাড়া আর কারুর কানে গেছে নাকি ?”

“নাঃ, শুধু ও—”

“যাক, তবে ঠিক আছে। নেডু বিশ্বাসঘাতক নয়। তা বলি দরকারটা কি ?”

“দরকার! নবকুমার আরো হতাশ গলায় বলে, “বিনি দরকারে বৃষ্টি নিজের পরিবারকে একটু দেখতে ইচ্ছে করে না ? তোমার মতন পাষণ্ডহৃদয় তো নয় ?”

“পাষণ্ডহৃদয়! তা বটে।”

সত্য অনুচ্চস্বরে হেসে ওঠে। তারপর বলে, “কেমন লাগছে ?”

“খুব ভালো। নবকুমার অকপটে বলে, “মাইরি বলছি, স্বপ্নেও ভাবি নি শ্বশুরবাড়িটা আমার এমন! কী ঐশ্ব্যি, কী দব্দবা! দেশটাও চমৎকার! মা গঙ্গা দেখলে প্রাণ জুড়ায়!”

সত্য একটা নিঃশ্বাস ফেলে বলে, “তবেই বোঝ, মেয়েমানুষকে কতটি ত্যাগ করতে হয়!”

“তা সত্যি।”

নবকুমার আরও একবার অকপটে স্বীকার করে, “এসে অবধি সেই কথাই ভাবছি। বলতে গেলে তুমি তো একটি রাজকন্যা। সে তুলনায় আমি—”

আবেগের মাথায় বেশী কিছু বলে ফেলার আগে সত্য সামলে দেয়, “দুগুণা দুগুণা, ও কি কথা! তুমি হলে স্বামী, গুরুজন। রাজকন্যের কথা নয়, তবে প্রাণটা হু-হু করতে পারে কি না!”

“একশোবার পারে। হাজারবার পারে।”

বলে নবকুমার অসমসাহসিকতায় ভর করে হাতটা বাড়িয়ে সত্যর কাঁধে একটা হাত রাখে।

তা সত্য কি এই স্নেহস্পর্শে অথবা প্রেমস্পর্শে পুলকিত হয় না ? হয়। তবু মেয়েলী সাবধানতায় চুপি চুপি বলে, “এই সরে দাঁড়াও, কে কমনে দেখে ফেলবে, এরপর আর তাহলে জনসমাজে মুখ দেখাবার জো রইবে না! খিড়কির পুকুর বৈ গতি থাকবে না!”

নবকুমার কিন্তু এ ভয়ে ভীত হয় না। বরং আরও একটা হাত স্ত্রীর আরও একটা কাঁধে দিয়ে ঈষৎ আকর্ষণের ভঙ্গীতে বলে, “কেন, পরপুরুষ নাকি ?”

“না হোক, লোক-লজ্জা বলে একটা জিনিস তো আছে—”

“সে যদি বলো, এখানে নিরালায় চুপি চুপি দেখাতেই নিন্দে হতে পারে, কিন্তু তোমার ভাই তো বলেছে এখানে কেউ আসে না।”

“তা আসে না বটে।” সত্য ঈষৎ নরম সুরে বলে, “ওই জন্যেই তো আমবাগান জামবাগান ছেড়ে এই বটবৃক্ষের ছায়টুকু বেছে নিয়েছিলাম খেলাঘর পাভতে। বটের কিছুই তো লোকের কাজে লাগে না, না ফল, ফুল, না পাতা না কাঠ। তাই মানুষের পা পড়ে না। শুধু ছায়ার আশ্রয়!”

সন্ধ্যার অন্ধকার গাঢ় হয়ে এসেছে—

নবকুমার হঠাৎ একটা কবি-কবি কথা বলে বসে, “তা সত্যি। তোমার বাবাকে— ইয়ে স্বপুত্রাকুরকে দেখলে আমার এমনি বটবৃক্ষের কথা মনে আসে। বিরাট বটবৃক্ষ।”

সত্য চমকে ওঠে।

সত্য অভিভূত হয়!

আর তারই আবেগে হঠাৎ ‘লোকলজ্জা’ ভুলে নবকুমারের হাত দুটো হাতে চেপে ধরে বলে, “সত্যি বলছ? আমার বাবাকে তোমার ভাল লেগেছে?”

“ভাল লাগার কথা বলতে পারছি না, বলছি ভক্তির কথা সমীহের কথা। বিরাট বটবৃক্ষ দেখলে যেমন সমীহ আসে—”

“কথা কয়েছ বাবার সঙ্গে?”

“কথা? ওরে বাস! তিনি কোথায়, আমি কোথায়? কত ব্যস্ত মানুষ, দূরে থেকেই দেখছি—”

সত্য আব্বা বিহ্বল গলায় আস্তে বলে, “বাবাকে সবাই দূরে থেকেই দেখে। সব্বাই। মা পর্যন্ত। শুধু এই সত্য মুখপুড়ীই—”

লোকলজ্জা আরও বিস্মৃত হয়ে সত্য নবকুমারের ভূষিত বক্ষে মাথাটা রাখে।

নবকুমারও অবশ্য বেশ কিছুটা সময় এই মধুর আত্মাদের সুযোগ গ্রহণ করে নেয়, তারপর চুপি চুপি বলে, “নতুন জামাই, প্রথম এলাম এমন একটা শোক-দুঃখুর উপলক্ষে। কারুর বে-থায় এলে অবিশ্যি আমাদের দুজনকে ঘর দিত, কি বলো?”

সত্য এই মেয়েলী কথাটা শুনে হেসে ফেলে। হেসে বলে, “দিলেই বুঝি নিতাম?”

“নিতো না?”

“পাগল! ঘটে লজ্জা নেই বুঝি? ‘বর’ বস্তুটা স্বপুত্রবাড়িতেই ভাল, বুঝলে?”

নবকুমার অভিমানভরে বলে, “বুঝলাম। জাই এই হতভাগা চলে যাবার পর আরও দু’মাস ভাল করে থাকা হবে—”

সত্যর মনের মধ্যে একটা বিদ্রোহ-শিহরণ খেলে যায়। দু’মাস কি কত মাস কে জানে! পিসঠাকুমা তো সেই মোক্ষম কথাটা বলে বসেছে। আসার সময় সদুদি যা বলে ভয় জন্মিয়ে দিয়েছিল।... ক্রমশ সত্যও যেন অনুভব করছে, শরীরের মধ্যে কোথাও একটা অস্বস্তি বাসা বেঁধেছে... মনে হচ্ছে যেন গলার কাছটাতেই প্রধান অস্বস্তি। কেবলই যেন ভেতর থেকে ঠেলা মারছে, খাদ্যবস্তু নামতে চায় না, উঠে আসার তাল করে।... ওই খাওয়া থেকেই ধরে ফেলেছে পিসঠাকুমা। আর সঙ্গে সঙ্গে নানানখানা বিষয়ের উপদেশ দিয়ে জন্ম করেছে। তার মধ্যে প্রধান নিষেধ ছিল... সাজ-সন্ধ্যায় আগানেবাগানে গাছতলায় না যাওয়া।

তা সত্য নিষেধটা মানছে ভাল!

হঠাৎ একটু চঞ্চল হয়ে ওঠে সত্য। বলে, “যাই রাত হয়ে যাচ্ছে, বকবে!”

“এখানে আবার বকবে কে?” নবকুমার নিশ্চিন্তে বলে, “এখানে তো তুমি মহারানী। নেড়ু আমায় সব বলেছে। কী আদুরে মেয়ে তুমি, কী লাঞ্ছনাতেই পড়েছ—”

সত্য এবার নিজস্ব দৃঢ়তায় ফেরে।

দৃঢ়ত্বের বলে, “ওসব কথা বলছ কেন? যার যা নিয়তি। স্বপুত্রঘরে বকুনি-বকুনি আর কোন্ মেয়েটার নেই? ছাড়ো ওকথা। যাচ্ছি—”

“নিতান্তই যাবে? কি আর বলব? আবার কবে দেখা হবে?”

“তা কি করে বলি!”

“আমি তো এই সামনের বুধবারে চলে যাব, তার মধ্যে একবার হবে না?”

“আচ্ছা দেখি!”

নবকুমার আস্তে আস্তে বলে, “ইচ্ছে হচ্ছে এখানেই থেকে যাই। কী বাড়ি! সদাই সরগরম! আর আমাদের বাড়িতে যেন—”

“তা হোক। নিজের যা তাই ভাল।” সত্য আবার দৃঢ়ত্বের বলে, “তুমিও কালে-ভবিষ্যতে দেশের একজন হবে, তোমার সংসারও তেমনি সরগরম হবে।”

“আমার ? হু! সে যাক, কবে আবার গরীবের ঘরে যাবে ?”

সত্য ঝপ করে বলে বসে, “বলতে পারছি না, ছ মাস এক বছরও হতে পারে।”

“ছ মাস এক বছর!” নবকুমার বিহ্বলভাবে বলে, “তার মানে ?”

“আছে মানে।” বলে হঠাৎ তুরিৎগতিতে দৌড় দেয় সত্য।

যদিও ঘরে-পরে সবাই বলছে, “কী বড়ই হয়েছে সত্য!” বলছে, “রূপ যেন ফেটে পড়ছে, কী বাড়বাড়ন্ত গড়নই হয়েছে—” তথাপি দৌড়ঝাঁপের কমতি নেই তার।

তবে পিসঠাকুমার সামনে আর দৌড়ঝাঁপ চলবে না মনে হচ্ছে।

নবকুমার অনেকক্ষণ দাঁড়িয়ে থেকে আকাশপাতাল চিন্তা করে। তারপর সিদ্ধান্তে আসে, আর কিছুই নয়, মেয়ে অনেক দিন শ্বশুরঘর করছে, মা-বাপ এবার হাতে পেয়ে আটকে ফেলবে।

হেসে খেলে পাড়া বেড়িয়ে বেড়াচ্ছিল সত্য, এখানে আসার প্রাক্কালে সদু যে সন্দেহ প্রকাশ করেছিল সেটাকে চোখ বুজে অস্বীকার করে। ভিতরে যদি কোনো অস্বস্তির আলোড়ন অজানা এক ভয়ের ছায়া ফেলেও থাকে, বাইরের আলোড়নে সেটা মুছে গেছে।

চট করে কারো সন্দেহও আসে নি, কারণ সত্য কতক্ষণই বা কার চোখের ওপর আছে ? বৃহৎ যজ্ঞের আনুষঙ্গিক জের নিয়ে ব্যস্ত সবাই। হঠাৎ একদিন সন্দেহ জাগল ভুবনেশ্বরীর। যে মানুষটার চোখ দুটো সহস্র কাজের মধ্যেও সত্যের চোখ-মুখের কাছাকাছিই আছে।

সন্দেহ জাগতেই চুপি চুপি সারদার কাছে ব্যক্ত করল ভুবনেশ্বরী, আর সারদাও লক্ষ্য ঘনীভূত করে নিঃসংশয় হল।

ব্যস, মুহূর্তে এ-মুখ থেকে ও-মুখ, এ-কান থেকে ও-কান। গ্রামসুদ্ধ মহিলা খবরটা জেনে ফেললেন একটা বেলার মধ্যেই। মহিলাদের মারফৎ পুরুষরাও।

কিন্তু রামকালীর কানে উঠতে কিছুটা দেরি হয়েছিল। কী কারণ মাতৃবিয়োগের পর থেকে আর বাড়ির ভিতর শুঁছিলেন না রামকালী। পুরোপুরি কালাশৌচের কালটা যে এই নিয়মেই চলবেন তিনি, সেটা যেন অদৃশ্য কালিতে লেখা হয়ে গিয়েছিল।

ভুবনেশ্বরী তবে কোন উপায়ে এই ভয়ঙ্কর আনন্দের বার্তাটা তাঁর কানে পৌঁছে দেবে ?

উপায় হচ্ছে না, অথচ এই অপরিসীম আনন্দের ভাবটা একা একা বহন করাও কঠিন মনে হচ্ছে।

দু’দিনেই দু বছর হয়ে ওঠে ভুবনেশ্বরীর।

তবু এ হচ্ছেও হচ্ছে না, আর কেউ বলে ফেলুক। এই মধুর সুন্দর ভয়ঙ্কর রমণীয় খবরটি ধীরে ধীরে একটি উপহারের মত ধরে দেবে স্বামীকে, এই বাসনায় মর্মরিত হয়ে ওঠে ভুবনেশ্বরী।

কিন্তু নিজ কণ্ঠে সে উপহার দেওয়া আর ঘটে উঠল না তার। রামকালীর খেতে বসার সময় হঠাৎ মোক্ষদা দুম্ব করে বলে বসলেন। বললেন, “বললে তোমার মাথায় থাকবে কিনা জানি না, তবু বলা কর্তব্য তাই বলছি, দাদামশাই হতে চললে!”

রামকালী চমকে তাকালেন।

কথাটা ঠিক বোধগম্য হল না।

মোক্ষদা এসব পছন্দ করেন না। অতএব তিনি আরও স্পষ্ট প্রথর ভাষায় বলে ফেলেন, “বাংলা বৈ উর্দু ফার্সি বলছি না বাবা, বলছি সত্যর ছেলেপুলে হবে!”

রামকালী সহসা ‘বিষম’ খেলেন।

জলের প্রাসটা মুখে ঠেকিয়ে নামিয়ে রাখলেন, তাপর ঘাড় নিচু করে যেন পাতের ভাতের মধ্যে কথাটার অর্থ খুঁজতে লাগলেন।

না, কথা তিনি এখন কইবেন না। আচমন করে বসেছেন। কালাশৌচের বছরটা রীতিমত বিধিনিষেধের মধ্যে থাকতে চান। এসবে বিশ্বাসী তিনি কোনদিনই নন, কিন্তু মানুষের মন যে কত জটিল জিনিস, দীনতারিণীর মৃত্যুতে তা আর একবার দেখা গেল— রামকালীর সূক্ষ্মাতিসূক্ষ্ম আচারনিষ্ঠা দেখে।

কথা কইবেন না। অতএব উত্তরও মিলবে না।

তবু এই সময়টুকু ছাড়া রামকালীকে পাচ্ছে কে ? কাজেই যাবতীয় জ্ঞাতব্য বিষয় এই সময়েই রামকালীর কর্ণকুহরে ঢালার পক্ষে প্রকৃষ্ট।

‘বিষম’ খাওয়া শেষ হলে মোক্ষদা আর একবার বলেন, “আমি এই জানিয়ে দিলাম, এখন তোমার গুণবতী বেয়ানকে জানাবার কি ব্যবস্থা করবে তা দেখ! মাগীকে তো দিয়ে থুয়েও মন পাওয়া যায় না! এক ঝাঁক মগা আর এক জালা তেল দিয়ে পাঠাও কাউকে, তার সঙ্গে পান্য-অর্ঘ্য!”

রামকালী খেয়ে চলেছেন, ওদিকে ভুবনেশ্বরীর চোখে জল। যে খবর শুনে রামকালীর অঙ্লাদে প্রাণ উথলে ওঠার কথা, সেই খবর দেওয়া হল কিনা তাঁর মৌনকালে। কেন খাবার সময় ছাড়া আর বলা যেত না?

তাছাড়া ভুবনেশ্বরীর আশা-আকাঙ্ক্ষা আর উদ্বিগ্ন আনন্দে কম্পমান হৃদয়টি তার দল মেলে বিকশিত হয়ে উঠতে পেল না।

অবিশ্যি এত সূচারু করে কি আর ভাবতে পারল ভুবনেশ্বরী?

তা নয়।

শুধু চোখের সেই জলের ধারাটা যেন অবিরল হয়ে উঠল নানা অনুভূতি আর অব্যক্ত বেদনার ধাক্কায়।....

মোক্ষদা শেষ অঙ্গটি ত্যাগ করে, “আর একটা কথা না বলে বাঁচছি না, মেয়ে তো তোমার এতদিন শ্বশুরঘর করেও কিছুমান্তর বদলায় নি! যে ধিক্কা সেই ধিক্কা! সাঁঝ-সন্ধ্যের মানে না, ডিঙানো-মাড়ানো গেরাহ্য করে না, আগান-বাগান, ঘাট, পুকুর, ছিপি মাড়িয়ে বেড়াচ্ছে! আমি বারণ করতে গিয়ে শুধু হাস্যাস্পদ হয়েছি মান্তর, এখন তুমি দেখ যদি শাসন করতে পারো!”

রামকালীর কি আজ গলা দিয়ে ভাত নামছে না? তাই এত দেরি হচ্ছে খেয়ে উঠতে?

মোক্ষদার এত অবসর নেই বসে থাকবেন, “বড়বৌমা দেখো শ্বশুর আর কিছু নেয় কিনা” বলে চলে যান মোক্ষদা।

রাগ হয়েছে তাঁর। হলেই বা মৃত্যুশোক, তাই বলে এমন সুখবরে মুখটা প্রসন্ন করবে না? এত কী! যাক, সত্যর শ্বশুরবাড়ি খবর পাঠানোর ব্যবস্থা তাকেই করতে হবে। এ তিনি জানেন। এটা মেয়েলি কাজ।

সারদা অদূরে বসে আছে পাখা হাতে, তার শ্বশুরই শ্বশুরকে দেখার নির্দেশ।

হ্যাঁ, সারদাই বসে একগলা ঘোমটা দিয়ে। এটা তার সর্বশ্রেষ্ঠ কর্তব্য। দীনতারিণী, মোক্ষদা, কালীশ্বরী, শিবজায়া যে কেউই কাছে থাকুন, খাওয়ার তদারকি করুন, সারদা তফাৎ বাঁচিয়ে বসে পাখা নাড়বেই।

আর কে করবে?

ভুবনেশ্বরী তো আর এই একবাড়ি গিল্লীর সামনে লজ্জার মাথা খেয়ে স্বামীর খাওয়ার তদারকি করতে আসবে না।

মোক্ষদা চলে যেতে রামকালী উঠলেন।

দাওয়ার ধারে চকচকে করে মাজা গাড়ু ও তার উপর পাট করা কাচা গামছা রক্ষিত আছে আঁচানোর জন্যে, তবু হঠাৎ কি ভেবে চলে গেলেন ঘাটে। হবিষ্যের সময় ঘাটে মুখ প্রক্ষালন করাটা বিধি ছিল বটে, কিন্তু এখন কেন?

যে জন্যেই যান—

আজ ভুবনেশ্বরী ভয়ঙ্কর এক অসমসাহসিক কাজ করে বসল। দ্রুতপায়ে রান্নাঘরের পিছনে গলির বেড়ার দরজা দিয়ে বেরিয়ে গিয়ে, মেয়েঘাটের আবরু স্বরূপ আড়াল করা যে ঝোপঝাড়গুলো আছে, তার পাশ দিয়ে এগিয়ে প্রায় পুরুষঘাটের কাছ-বরাবর দাঁড়িয়ে থাকল।

রামকালী হাতমুখ ধুয়ে ফেরার পথে চমকে দাঁড়িয়ে পড়ে বলেন, “এ কী, তুমি এখানে?”

ভুবনেশ্বরী ঘোমটার মধ্যে থেকেই রুদ্ধকণ্ঠে বলে, “তা কি করবো! চোরে কামারে তো দেখা নেই, একটা কথার দরকার থাকলে—”

রামকালী প্রায় বিরক্ত স্বরে বললেন, “তা এইটা কি কথার জায়গা?”

ভুবনেশ্বরীর চোখে যে ধারপ্রাবণ, তা ঘোমটার মধ্যে থেকেই ধরা যায়।

সেই শ্রাবণ-বর্ষণের মধ্যেই তার কথা শোনা যায়, “কখন তোমায় পাচ্ছি?”

রামকালী ঈষৎ শান্তস্বরে বলেন, “তা কথাটা কি, বলে নাও চটপট! চারিদিকে লোকজন—”

“বলছি—সত্যর কথা—”

রামকালীর গলায় কেমন একটা বিরূপ গম্ভীর স্বর বাজে, “হ্যাঁ শুনলাম। ওর দিকে একটু লক্ষ্য রাখবে। বেশী দৌড়ঝাঁপ না করে। যাও, বাড়ির মধ্যে যাও।”

ভুবনেশ্বরীর সর্বশরীর একটা মূক অভিমানে কেঁপে ওঠে, আর কথা বলে না সে, আন্তে আন্তে মুখ ফিরিয়ে সরে আসে।

তার গতিভঙ্গীর দিকে তাকিয়ে রামকালীর একবার মনে হয়, আর একটু নরম করে কথা বললে ভাল হত। নির্বোধ মানুষটা মেয়ের এই সংবাদে ভয়ে সারা হচ্ছে। কিন্তু কি করবেন রামকালী, এটা তো আর স্ত্রীর সঙ্গে গালগল্পের জায়গা নয়!

ভাবেন কোনো এক সময় বলে দেবেন, ভয় পাবার কিছু নেই!

কিন্তু কোন্ সেই সময়?

রামকালী জানেন কি?

জানেন কি স্ত্রীর সঙ্গে গালগল্প করা কি বন্ধ? স্নেহ প্রেম ভালবাসা— এগুলো ব্যক্ত করার বন্ধ নয়, এটাই জানেন রামকালী।

সত্যর স্বশ্বরবাড়িতে খবর পাঠতে কাকে নির্বাচন করা যায়, তাই ভাবতে ভাবতে চণ্ডীমণ্ডপে গিয়ে বসেন রামকালী।

মোক্ষদা চলে আসেন।

এবং তোড়জোড় লাগিয়ে দেন সত্যর স্বশ্বরবাড়িতে খবর দেবার।

গিরি তাঁতিনী যাবে।

গরুরগাড়ি নিয়ে রাখুও যাবে। গিরির জন্যে তসর শাড়ি আসে, রাখুর জন্যে হলুদে ছোপানো ধূতি-চাদর। মস্ত একটা পেতলের হাঁড়িতে একহাঁড়ি ঘনিভাঙা তেল, আর মস্ত একটা “মটকি”তে বোঝাই কাঁচাগোল্লা। এ দৃশ্য দেখলেই ঘটনাটা বুঝতে পারবে সত্যর শাওড়ী, মুখ ফুটে বলতেও হবে না।

ওরা বেরোবার মুখে রামকালী হঠাৎ থামান। মোক্ষদাকে উদ্দেশ করে একগোঁজে টাকা বাড়িয়ে ধরে বলেন, “সেখানে লোকজন সবাইকে যেন পরিতোষ করে আসে, দিয়ে দাও গিরির হাতে।”

সংসারসুদ্ধ সবাই আহ্লাদে ভাসছে, দীনতারিণীর মৃত্যুশোক এ আহ্লাদকে পরাভূত করতে পারছে না। শুধু রামকালীই যেন পরাভূত হয়ে যাচ্ছেন, চেষ্টি করিও তেমন আহ্লাদ আনতে পারছেন না।

যেন রামকালীর কী একটা লোকসানই ঘটেছে।

সত্য বড় হয়ে যাচ্ছে, সত্য বড় হয়ে গেছে।

গিয়েই তো ছিল। তবু যেন কোথায় একটা আশা ছিল। মাতৃশ্রদ্ধের বিরাট কাজের মধ্যে দেখছিলেন সত্যর ছুটোছুটি আসা-যাওয়া গালগল্প। মনে করছিলেন— যা ভাবছিলাম তা নয়, শুধু স্বশ্বরবাড়ির চাপে পড়েই—

ভাবছিলেন হাতের কাজটা হালকা হলেই সত্যকে ডেকে কাছে বসিয়ে কথা বলবেন।

কাজ না মিটেই মোক্ষদা এলেন ভগ্নদূতের মূর্তিতে।

আর কাকে “কাছে” বসাবেন রামকালী?

অনেক দূরে চলে গেল যে সে।

নাঃ, কাছে আর কোনোদিন পাবেন না তাকে রামকালী।

এক নতুন চক্রের চক্রান্তে পড়ে অন্য আর এক রাজ্যের প্রজা হয়ে গেছে সত্য।

সে রাজ্য প্রমীলার রাজ্য, সে চক্রান্ত বিধাতার চক্রের।

॥ ছাঞ্চিশ ॥

নবকুমার চলে গিয়ে পর্যন্ত এই কটা দিন আরো “টো-টো” করে বেড়াচ্ছিল সত্য, বাঁধা গরু ছাড়া পাওয়ার ধরনে, নবকুমারের উপস্থিতিতে সামান্য যেটুকু সাবধান হতে হচ্ছিল তাও ঘুচেছিল, হঠাৎ শ্যেনদৃষ্টি মোক্ষদার মোক্ষম আবিষ্কারের ফলে স্বাধীনতা সাংঘাতিক রকম খর্ব হয়ে গেল তার।

বিদ্রোহ করা চলছে না, উঠতে বসতে উপদেশের ঠেলা। “দরজায় বসিস নি, দুজনের মাঝখান দিয়ে যাস নি, সাঁঝ-সন্ধ্যা হয়ে গেলে উঠোনে নামিস নি, শনি-মঙ্গলবারে পথে বেরোস নি, ঘাটেপুকুরে একা যাস নি,” নিষেধের বৃন্দাবন একেবারে। তাছাড়া আছে “বিধি”।



পায়ের আঙুলে রূপোর আঙুটি পরে থাকো, চুলের আগায় আর শাড়ির 'কোল আঁচলে' সর্বদা গিঠি বেঁধে রাখো, শত্রুপক্ষ জাতীয় কোনো মহিলাকে দেখলেই সরে থাকো এবং 'নজর-খরা' কোনো মহিলার নজরে পড়ে গেছ সন্দেহ হলেই দেহের কোনোখানে লোহা পুড়িয়ে ছ্যাকা দাও, রাত্রে খোঁপায় খড়কে রাখো, এইসব অনুশাসনের শাসনে চলতে হচ্ছে সত্যকে।

সত্যকে যেন বেঁধে মারছে এরা।

তবু সত্য যখন-তখনই ভয়ানক অঘটন ঘটিয়ে বসছে।

যেমন অন্যমনস্কতায় পান-ধোওয়া জল মাড়িয়ে গেল, মাছ-ধোওয়া জল ডিঙিয়ে গেল, ছেঁচতলায় নিজেই শাড়িখানা মেলে দিয়ে বসল, এই সব সর্বনেশে কাণ্ড!

ভুবনেশ্বরী কেবল বলে, "অ সত্য, কখন কি করে বসবি, আয় না আমার কাছে, একটু বোস না!"

এক-আধবার বসে সত্য।

হয়তো ভিতরের কোন ক্লান্তিতেই। কিন্তু বেশীক্ষণ মায়ের কাছে কাছে থাকতে তার লজ্জা করে। তাছাড়া চিরচঞ্চল চিত্ত তার দীর্ঘকাল শ্বশুরঘর করেছে অচঞ্চল ভূমিকা নিয়ে, আর সে সহজ ক্লান্তির কাছে হার মানতে রাজী হয় না, হয় না মমতার কাছে বশ্যতা স্বীকার করতে।

অতএব একদিন রামকালীর কাছে নাগিশ পৌছায়। বলা হল, "তুমি শাসন করো।"

কিন্তু রামকালী কি করলেন শাসন ?

নাকি চিকিৎসক-জনোচিত নিষেধের বাণী বর্ষণ করলেন ?

না, সে সব কিছুই করলেন না রামকালী। কেন কে জানে ভিতরে ভিতরে একটা পীড়া বোধ করছেন তিনি। কেমন যেন একটা বিমুখতা। যেন শেষ সঞ্চলটুকুও হারিয়েছেন, তাই মনের মধ্যে নির্লিপ্ত শূন্যতা।

রামকালী শুধু একদিন মেয়েকে ডেকে বললেন, "শুভকালীনা যা বলছেন, মন দিয়ে শুনবে। ওঁরা বোঝেন, ওঁদের কথা মেনে না চললে ক্ষতি হতে পারে।"

অভিমানে সত্য তিন দিন শুয়ে রইল।

ভুবনেশ্বরী অনুযোগ করলে বলল, "এই ছোট্টাও তোমরা। বেশ তো, যা চাও তাই হচ্ছে।"

সত্যিই হঠাৎ চূপচাপ হয়ে গেল সত্য।

কিন্তু ক্ষতিকি কি রোধ করা গেল।

না, রামকালী এখন গ্রহের কোপে পড়েছেন।

রামকালী 'মহাশুক্র নিপাতের' বিপাক মুক্ত হতে পারছেন না।

তাই রামকালীর প্রথম দৌহিত্র সন্তান পৃথিবীর আলোয় উদ্ভাসিত না হতেই অন্ধকারের রাজ্যে হারিয়ে গেল।

তা ছাড়া আর কি কারণ ?

সত্য তো সব কিছু বিধিনিষেধ মেনে চলছিল ইদানীং।

মোক্ষদা অবশ্য বললেন, 'এ সেই গোড়ার কালে ধিস্টীপনা করার ফল।' কিন্তু চিকিৎসক রামকালী তা বলেন না। রামকালীর হঠাৎ মনে হয়, এ বোধ করি তাঁর নিজেরই অবহেলার ফল। পিতা হিসাবে না হোক, চিকিৎসক হিসেবে তাঁর আর একটু কর্তব্য ছিল।

তবু এটাও তো সত্যি, এ পরিবারভুক্ত আত্মীয় আশ্রিত মিলিয়ে যে গোষ্ঠীটি সে গোষ্ঠীতে বছরে গড়ে অন্তত পাঁচ-সাতটা শিশুর জন্ম হচ্ছে নিতান্ত সহজে, প্রায় কর্তা-পুরুষের অজ্ঞাতসারেই।

না, অতুক্তি নয়। ওই ছেলেমেয়েগুলো একটু বড় হয়ে যখন অন্যের ট্যাকে চড়ে বহির্জগতে বেরোয়, তখন ওঁরা কৌতূহলী হয়ে প্রশ্ন করেন, "কার এটা ?"

অতএব অপরাধটা কোথায় রামকালীর ?

এই কটা দিন আগে "তেল-সন্দেহ" সহকারে খবর পাঠানো হয়েছিল সত্যর শ্বশুরবাড়িতে এবং এলোকেশী হেন মানুষও খবরদাত্রীকে একখানি নতুন কাপড়দানে পুরস্কৃত করেছিলেন, বৌকে বাপের ঘরে রাখার অনুমতিও দিয়েছিলেন দীর্ঘকালের জন্যে। আবার এখন এই বার্তা পাঠাতে হবে।

ঘটা করে 'সাধ' দিচ্ছিলেন বৌয়ের বড়লোক বাপ, তা নয়, মূলে হাবাৎ। হয়েছিল অবিশ্বাস্য মেয়েসন্তান, তবু প্রথম সন্তান তো! সত্য তো 'ভান্সা' হয়ে গেল। আরতো সত্য "অখণ্ড পোয়াতি" রইল না। কোনো শুভকর্মে নিয়ম লক্ষণের কাজে আগ বাড়িয়ে আসতে তো পারবে না সত্য।

কড়া হুকুম দিলেন এলোকেশী, শরীর-স্বাস্থ্য একটু ভাল হলেই যেন মেয়েকে পালকি চড়িয়ে পাঠিয়ে দেন বেহাই। অহ্লাদে মেয়ে বাপের বাড়ি গিয়ে অহ্লাদেপনা করেই যে এইটি ঘটিয়েছেন, তাতে আর সন্দেহ কি!

এ বচন হজম করতে হল রামকালীকে।

এ নির্দেশ মানতেই হল।

আবার রাসুকে যেতে হল সত্যর শ্বশুরবাড়ি, কেঁদে কেঁদে চোখ-ফোলানো শ্রিয়মাণ সত্যকে নিয়ে।

কিন্তু রামকালীর গ্রহের কোপ কি কাটল ?

মহাশুর নিপাতের বছর পূর্ণ হয়েও তো আরো একটা বছর কেটে গেল, তবু রামকালীর সংসারে অঘটন ঘটতেই লাগল কেন ? কোনোখানো কিছু নেই, “নেড়ু”, নামক নিরীহ ছেলেটা হঠাৎ একদিন হারিয়ে গেল, যেমন করে একদিন রামকালী হারিয়ে গিয়েছিলেন। কিন্তু নেড়ু তো খড়মপেটা খায় নি।

অনেক খোঁজাখুঁজি করলেন রামকালী, কুঞ্জ অনেক কাদলেন মেয়েমানুষের মত, নেড়ুর বার্তা পাওয়া গেল না। এর ক’মাস পরেই কাশীশ্বরী মারা গেলেন, আরো ক’মাস পরে শিবজায়ার বড় মেয়ে বিধবা হয়ে বাপের বাড়িতে এসে আশ্রয় নিল একপাল ছেলেমেয়ে নিয়ে।

এ সমস্তই যে রামকালীর গ্রহবৈশ্য, একথা কেহ না বলবে ?

এর সব ‘হ্যাঁপা’ই তো রামকালীকে নিতে হচ্ছে।

আর মজা এই, শত অসুবিধের মধ্যেও রামকালী কাউকে বলেন না, “সুবিধে হবে না”! শত ঝঞ্জাটেও বলে ফেলেন না, “আর পারা যাচ্ছে না!”

বিধবা হয়ে বাপের বাড়ি আসা খুড়তুতো বোনের স্নিগ্ধ যুগ্মি মেয়ে দুটোর জন্যেও তোড়জোর করে পাত্র খুঁজতে ঘটক ঠিক করে স্যাকরা ডেকে পাঠালেন। পাত্র খোঁজা হোক, গহনাপত্রও প্রস্তুত হোক। বোনের ছেলে চারটির কথাও ভুলে থাকলেন না, যথাযথ হিসেবে তাদের কাউকে টোলে, কাউকে পাঠশালা ভর্তি করে দিলেন।

কর্তব্যের ক্রটি করছেন না রামকালী, করছেন না কোনো অনাচার, তথাপি বারেবারেই ভাগ্যের মার পড়ছে তাঁর উপর।

কিন্তু “ওস্তাদের মার” নাকি শেষরাত্রে, আর ভাগ্য নামক ব্যক্তিটির মত এমন ওস্তাদ আর কে আছে ?

তাই—

রাত্রিশেষের ছায়াছন্দ আলো-আঁধারি মুহূর্তে সে তার প্রধান মারের খেলা দেখিয়ে গেল।

ঘন্টা কয়েকের ভেদবমিতে ভুবনেশ্বরী মারা গেল!

রামকালী কবরেজের ‘ডেকে কথা কওয়া’ ওষুধের সমস্ত মাহাত্ম্য কি ব্যর্থ হল ? হয়তো ব্যর্থই হল, নিয়তিকে কে পারে ঠেকাতে ? কে পারে অপ্রতিরোধ্যকে রোধ করতে ? তবু চেষ্টা করবার সময়টাও যে পেলেন না রামকালী। হয়তো সময়টা পেলে আক্ষেপটা কম হত। কিন্তু লাজুক ভুবনেশ্বরী, নির্বোধ ভুবনেশ্বরী সে চেষ্টাটুকুর অবকাশ দেয় নি। সে মাঝরাত্রে বিছানা থেকে উঠে সেই যে ঘাটের ধারে গিয়ে পড়েছিল, আর উঠে আসে নি, কাউকে জানায় নি। হয়তো বা পারেও নি।

বাগ্দী-বুড়ী শেষরাত্রে ঘাটে গিয়ে আবিষ্কার করল এই ভয়ঙ্কর ঘটনার দৃশ্য।

“ও মা আঁ আঁ—” করে চোঁচাতে চোঁচাতে এসে সে আছড়ে পড়ল। তার আর্তনাদ থেকে ব্যাপারটা বুঝতেও কিছুক্ষণ গেল লোকের।

কিন্তু দু-পাঁচ মিনিট আগে বুঝেই বা কী এমন লাভ হত ? তখন তো একেবারে শেষ সময়। চোখ মুখ বসে গেছে, নাড়ী ছেড়ে গেছে।

রামকালী নাড়ীটায় একবার হাত দিয়েই আঙুলে সেই প্রায় স্পন্দনহীন হাতখানা নামিয়ে রাখলেন। ঝুঁকে বসে রুদ্ধ-কম্পিত স্বরে বললেন, “মেজবৌ, এ কী করলে ?”

রাসু হাতে-ধরা প্রদীপটা রোগিণীর মুখের আরো কাছে এগিয়ে আনল, ভুবনেশ্বরী কষ্টে চোখের পাতা টেনে চোখ দুটো খুলল একবার। কি একটা বলতে গেল, ঠোঁট নাড়তে পারল না। চোখের কোণ থেকে দু ফোঁটা জল রণ বেয়ে গড়িয়ে পড়ল।

এ রোগে রোগীর শেষ অবধি জ্ঞান থাকে, চৈতন্য বিলুপ্তি ঘটে না। কিছু একটু বলবার জন্যে ভয়ঙ্কর একটা আকুলতা যে সেই মৃত্যুপথযাত্রিনীর ভিতরটাকে তোলপাড় করছে তা সেই বাতাসে-কাঁপা ক্ষীণ শ্রদীপশিখার আলোতে ধরা পড়ল।

রামকালী তেমনি রুদ্ধগঞ্জীর আবেগকম্পিত গলায় বললেন, “মেজবৌ, এমন কঠিন শাস্তি কেন?” মুহূর্তের জন্যে রোগিণীর ভিতরকার সেই আকুলতার জয় হল। ঠাট্টা, নড়ে উঠল। উচ্চারিত হল, “ছি!”

“সত্যকে না দেখেই চললে?”

হঠাৎ সেই কাঠ হয়ে আসা দেহটা বিদ্যুতাহতের মত নড়ে উঠল, একঝলক জল সেই কোটরগত চোখের চারধার থেকে উথলে উঠে গড়িয়ে পড়ল।

রাসুর হাতে শ্রদীপটা নিতে গেল বাতাসের ঝটকায়।

গত রাত্রে সহজ সুস্থ ভুবনেশ্বরী সংসারের বহুবিধ কাজ সেয়ে, আগামী সকালের রসদ বাবদ তিন-তিনটে মোচা কুটে রেখে, এক জামবাটি ডাল ভিজিয়ে ঘুমোতে গিয়েছিল, আজ আর সে সেই সকালের মুখ দেখতে পেল না। ভোরের প্রথম আলো একজোড়া ঘুমন্ত চোখের ওপর এসে স্থির হয়ে পড়ে রইল ব্যর্থতার গ্লানি বহন করে।

রাসু মেয়েমানুষের মত হাউ হাউ করে কেঁদে উঠল। কেঁদে উঠল যে যেখানে ছিল সকলেই।

মোক্ষদার তীব্র তীক্ষ্ণ চিৎকার প্রথম ভোরে ম্লান পবিত্রতাকে যেন দীর্ঘ-বিদীর্ণ করে ধিক্কার দিয়ে উঠল।

কুঞ্জ ভাসুরমানুষ, বেশী কাছে আসবেন না, দূরে বসে বুকচাপড়ে বলে উঠলেন, “জীবনভোর এত লোককে বাঁচালে রামকালী, সোনার প্রতিমা ঘরের লক্ষ্মীকে বাঁচাতে পারলে না? হেরে গেলে?” রামকালী শুধু একবার সেই হাহাকারের দিকে ফিরে তাকালেন, বললেন না, “যুদ্ধের অবকাশ পেলাম কই?”

অজাতশত্রু ভুবনেশ্বরীর মরণকালে তার পুরুষদেবতার সঙ্গে যেন ভয়ঙ্কর একটা শত্রুতা সেধে গেল।

সেজকর্তা ভাঙা-ভাঙা গলায় মল্লোচ্ছ্বাসের ভঙ্গীতে বললেন, “নারায়ণ নারায়ণ! অন্তিমে নারায়ণ! রামকালী, আত্মা এখানেই অবস্থান করছেন, নারায়ণের নাম কর।”

“আপনারা করুন।” বলে রামকালী উঠে দাঁড়ালেন।

এমন অকস্মাৎ মৃত্যুতে ঘরের পাশের লোকের সঙ্গেই দেখা হয় না, তা গ্রামান্তরের! মায়ের এ হেন মৃত্যু সত্যবতীর দেখবার কথা নয়, কিন্তু মাতৃশ্রাদ্ধও দেখা হল না তার।

হ্যা, শ্রাদ্ধ ভুবনেশ্বরীর ভাল করেই হল।

বাড়িতে পাঁচটা বুড়ী আছে বলে যে আর কেউ তার প্রাণ্য পাওনা পাবে না, এমন নীতিতে বিশ্বাসী নন রামকালী। আয়োজন দেখে ক্ষুব্ধ মোক্ষদা রামকালীকে বললেন, “আমাদের কথা না হয় ছেড়েই দিলে, কিন্তু তোমার খুড়ো এখনো বেঁচে, তাঁর চোখের সামনে একটা কচি বোয়ের ছেরাঙ্কয় এত ঘটা করা কি বেশ বিবেচনার কাজ হচ্ছে রামকালী?”

রামকালী পিসীর মুখের দিকে না তাকিয়েই উত্তর দিলেন, “তোমাদের কথা ছেড়ে দেবার কিছু নেই, কারুর কথাই আমি ছেড়ে দিচ্ছি না, যেটা বিধি সেটাই করছি।”

মোক্ষদা একটা ঈর্ষাকাতর নিঃশ্বাস ত্যাগ করে বলেন, “পাঁচটা বুড়ীর চোখের ওপর ওই কচি বৌটার সমারোহ করে ছেরাঙ্ক করাই তাহলে বিধি?”

রামকালী তেমনি মুখ ফিরিয়েই বললেন, “আত্মার বয়স নেই।”

“কিন্তু চোখে যে সহ্য করতে পারা যায় না রামকালী!” বললেন মোক্ষদা।

রামকালী মৃদুস্বরে বললেন, “জগতে অনেক জিনিসই সহ্য করে নিতে হয়। ও নিয়ে বৃথা আলোচনায় ফল কি?”

মোক্ষদা চুপ করে গেলেন। কথাটা সত্যি বৈকি। কনিষ্ঠজনের মৃত্যুটাই যদি সহ্য করে নেওয়া যায়, তার সেই প্রিয় পরিচিত মূর্তিটা আঙুনে পুড়িয়ে শেষ করে চিতায় জল ঢেলে এসেই আবার খাওয়া যায়, ঘুমানো যায়, তবে আর কোন মুখে বলা চলে— “তার পারলৌকিক ক্রাজ্জটা চোখ মেলে দেখে সহ্য করার ক্ষমতা আমার নেই!”

কিন্তু মায়ের শ্রদ্ধা চোখে দেখবার ক্ষমতা ছেলেমানুষ সত্যবতীর হবে না বলেই কি নিয়ে আসা হল না তাকে ?

না, তা নয়, নিজেরই তার আসা সম্ভব হল না। সে যখন মায়ের মৃত্যুসংবাদ পেলে, তখন দুদিনের ছেলে নিয়ে আঁতুরঘরে। ভুবনেশ্বরী যেদিন ভোরে মারা গেছেন ঠিক সেইদিনই সকালবেলা সত্যর দ্বিতীয় সন্তান ভূমিষ্ঠ হয়েছে। পুত্র-সন্তান।

দু পরিবার থেকে দুজন লোক কুটুমবাড়ি এসেছে খবর জানাজানি করতে। একজন জনের, আর একজন মৃত্যুর খবর বহন করে।

কিন্তু সত্য কেন প্রসবের প্রাক্কালে বাপের বাড়ি আসে নি ? বিশেষ করে বাপ যার এত বড় চিকিৎসক ?

আসে নি তার কারণ আছে। যদিও ধরতে গেলে কারণটা নিতান্তই মেয়েলী, কিন্তু এসব ক্ষেত্রে মেয়েলী প্রথা আর মেয়েলী কুসংস্কারেই জয়ী হয়, সত্যর বেলাতেও তার অন্যথা হয়নি। সত্যর প্রথমবারের ঘটনাটাই এমন অনিয়মের কারণ। বাপের বাড়িতে যখন এমন একটা অপয়া ব্যাপার ঘটে গেছে, তখন পালা বদল হোক।

তাই এবারে দুপক্ষ থেকেই একমত হয়ে স্থির করা হয়েছিল, সত্যর এবারের সন্তান মাতুলালয়ে ভূমিষ্ঠ না হয়ে পিত্রালয়ে ভূমিষ্ঠ হবে।

সত্য তাই ওখানেই আছে।

ভালই আছে। বেটাছেলেটি কোলে এসেছে। এলোকেশী বড় মুখ করে লোক পাঠিয়েছিলেন বড়লোক কুটুমবাড়ি। তাকে বলে দিয়েছিলেন, “শুভ সংবাদের বকশিশ হিসেবে পেতলের গামলাটা দিলে নিবি না, বলবি ঘড়া কই ?”

কিন্তু ঘরা গামলা কিছুই পাওয়া হল না তার। এসে শুনল এই বিপদ।

ওদিকে সত্যবতীও পুলকে আনন্দে আশায় গর্বে প্রত্যাশিত হয়ে বসেছিল কখন সংবাদদাতা ঘড়া নিয়ে ফিরবে। কিন্তু তার ফেরা পর্যন্ত আর অপেক্ষা করে বসে থাকতে হল না! লোক এল ওদিক থেকে।

এলোকেশী আঁতুড়ের দরজায় এসে মুখটা ঝুঁকিয়ে কোমলে করে বললেন, “আঁতুড়ঘরে কাঁদতে নেই, কাঁদলে ছেলের অকল্যাণের ভয়, নাতীর দোষ হবার ভয়, সাবধান করে দিয়ে খবরটা বলি বৌমা, ভেদবমি হয়ে তোমার মা-টি মরেছে। লুকোছাপা করে চেপে রাখবার তো খবর নয়, চতুর্থা করা না হোক, দুদিন মাছভাতটা তো বন্ধ দিতে হবে। তাই জানিয়েই দিলাম। দেখি, ভটচাককে জিজ্ঞাসাবাদ করতে পাঠাই, এক্ষেত্রে কী বিধিব্যবস্থা!”

একটা সদ্যপ্রসূতি তরুণী মেয়ের নিঃশব্দ বুক বেপরোয়া একখানা ধারালো ছুরি বসিয়ে দিয়ে নিতান্ত সহজভাবে সেখান থেকে সরে গেলেন এলোকেশী। ছুরিটার ক্ষমতার বহরও তাকিয়ে দেখে গেলেন না।

কিন্তু পাড়ায় বেরিয়ে এলোকেশী তাঁর প্রায় সখীমহলে এই সরেস খবরটি পরিবেশন করে বলে বেড়ালেন, “দেখলি তো ? মিথ্যে বলি কাঠপ্রাণ ? মা মরার খবর শুনে প্যাঁট প্যাঁট করে তাকিয়ে বসে রইল, ডুকরে কেঁদে উঠল না!”

সত্যিই ডুকরে কেঁদে সত্যবতী ওঠে নি।

স্তুভিত বিষয়ে শুকনো চোখ মেলে বসেই ছিল অনেকক্ষণ। তার পর কখন একসময় নবজাত শিশুটা তার দেহের ওজনের চেয়ে অনেক গুণ বেশী ওজনের চিৎকার করে উঠেছে, ধীরে ধীরে তাকে কোলে তুলে নিয়ে এদিকে পিঠ ফিরিয়ে চূপ করে বসে থেকেছে দেওয়ালের দিকে মুখ করে।

ওদিকে যদি একটুকরো জানলা থাকত, সত্যর প্রাণটা বৃষ্টি তাহলে সেই খোলা পথটুকু দিয়েই দৃষ্টির খেয়া-নৌকা চড়ে অসীম আকাশে সাঁতরে সাঁতরে আছড়ে গিয়ে পড়ত সেই তার শৈশবনীড়ে।

যেখানে “মেজবৌ” পরিচয়ে চিহ্নিত একটি নিটোল মুখ, ফর্সা রং, ছোটখাটো মানুষ ভীকু কুষ্ঠিত পদক্ষেপে সারাদিন শুধু সকলের মনোরঞ্জন করে বেড়াচ্ছে। আর তারই আশেপাশে এখানে সেখানে, তাকে প্রায় বিন্মৃত হয়ে দৃগু পদপাতে ঘুরে বেড়াচ্ছে একটি গাছকোমর-বেঁধে কাপড় পরা স্বাস্থ্যবতী বালিকা। কিন্তু এই আঁতুরঘরের এধারে ওধারে কোন ধারেই জানালা নেই। তিনদিকেই গোবরলেপা নিরেট মাটির দেওয়াল। দৃষ্টি সেখানে অচল হয়ে থেমে থাকে।

মা কেন সর্বদা এমন ভয়ে ভয়ে থাকে, এই নিয়ে বিরক্তি প্রকাশ করত সত্যবতী। বলত, “ভয় ভয় ভয়! এই ভয়ের জ্বালাতেই সগুণ পাবে না তুমি মা, দেখে নিও।”

সত্যবতীর মা কি স্বর্গ পায় নি ?

সত্যবতীর প্রাণটা তবে কেন 'স্বর্গ' নামক সেই এক অদৃশ্যালোকের অসীম শূন্যতায় হাহাকার করে বেড়াচ্ছে ?

"মা নেই, মাকে আর দেখতে পাবো না", এ কথা মনে রাখতে পারছে না সত্য, শুধু মনে হচ্ছে সেই চিরমমতাময়ী মানুষটা যেন ভয়ঙ্কর এক নিষ্ঠুর খেলায় মেতে একছুটে কোন্ দূর-দূরান্তর লোকে পৌঁছে গিয়ে সত্যকে 'দুয়ো' দিয়ে ব্যঙ্গহাসি হাসছে।

বলছে, "কি গো, রাতদিন তো নিজের খেলা নিয়েই উন্মত্ত হয়ে বেড়াতে, 'মা' বলে যে একটা মানুষ ছিল সংসারে, তার দিকে তাকিয়ে দেখেছিলেন কোন দিন ? মনে রেখেছিলে তুমি তার একমাত্র সন্তান, তুমি ছাড়া 'আপনার' বলতে আর কেউ নেই তার ?"

"মা মারা গেছেন" এ দুঃখের চেয়ে দুরন্ত হয়ে উঠছে সত্যর ছেলেবেলাকার সত্যর সেই মা'র প্রতি ওদাসীন্যের দুঃখ। মাকে কেন ভাল করে দেখে নি সত্য, দু'দণ্ড কেন স্থির হয়ে বসে নি মার কোলের কাছে ? কেন রাতে আর পাঁচটা মেয়ের সঙ্গে ঠাকুমার ঘরে শায়ার বদলে মায়ের গলাটি জড়িয়ে ঘুমোয় নি ? প্রায় তো সেই কুণ্ঠিত মানুষটি ভীষণ ভীষণ মুখটি হাসিতে উজ্জ্বল করে চুপি চুপি অনুনয় করত, "এ ঘরে আমার বিছানায় গুবি আয় না! রূপকথার গল্প বলব!"

যার কাছে এই অনুনয়, সে কোনদিনই তার মান রাখত না। নিতান্ত তাম্বিল্যে বলত, "হঁ, কতই না গল্প জান তুমি! ওঘরে বলে আমার বন্ধুরা সবাই—ওদের ছেড়ে তোমার কাছে গুতে আসব আমি ? বলিহারী কথা বটে!...

কী পাষণ্ড ওই মেয়েটা গো! কী পাষণ্ড!

গোবরলেপা ওই নিরেট দেওয়ালটায় মাথা কুটে কুটে মাথার মধ্যকার ভয়ঙ্কর যন্ত্রটাকে ছিন্নভিন্ন করে ফেলতে ইচ্ছে করে সত্যর।

ভগবান, একবারের জন্যে সেই দিনটা এনে দিতে পারো না ? সত্য তাহলে সেদিন সেই নিষ্ঠুর মেয়েটার পাপের প্রায়শ্চিত্ত করে ?

সেই ছোটখাটো দেহটাকে দুহাতে জড়িয়ে ধরে বুকে মুখ তুঁজে বলে, "মা মাগো, নিষ্ঠুর ছিল না সে মেয়েটা, শুধু অবোধ ছিল!"

ইদানীং—এর মাকে, শ্বশুরবাড়ি থেকে ঘুরে গিয়ে দেখা মাকে, কিছুতেই যেন মনে পড়াতে পারে না সত্য, ঘুরেফিরে শুধু মার সেই স্মিতান্ত বধু-মূর্তিটিই রামকালী কবরেজের মস্ত বড় বাড়িটার সর্বত্র সঞ্চরণ করে ফেরে।

সত্য যদি এখন মরে যায়, 'স্বর্গ' নামক সেই জায়গাটায় কি দেখা হবে মার সঙ্গে ? তা হলে সত্য তার বুকে ঝাঁপিয়ে পড়ে ডুকরে কেঁদে উঠবে, "মা মাগো, এত পাষণ্ড তুমি কী করে হলে মা!"

আত্মবিশ্মৃত সত্য কি মনে করে বসেছিল, সত্যিই সেখানে পৌঁছে গেছে ? ঝাঁপিয়ে পড়েছে মার বুকে ? আর তার ডুকরে ওঠাটা এত ভীষণ হয়ে গেছে যে মর্ত্যালোকের এইখানে এসে ধাক্কা দিয়েছে ?

নইলে এলোকেশী ছুটে আসবেন কেন ? কেন কঠিন গলায় ধমকে উঠবেন, "বৌমা, একটাকে বিসর্জন দিয়ে আশ মেটে নি, এটাকেও দিতে চাও ? ওই আঁতুড়-ষষ্ঠীর ছেলে কোলে নিয়ে মড়াকান্না ? বুকের পাটাকেও ধন্য! বলি মা বাপ কি কারো চিরদিনের ? তবু তো বিধাতাপুরুষের সুবিচার হয়েছে, বাপ না গিয়ে মা গিয়েছে। শাঁখা-সিদুর নিয়ে এয়েসাতী ভাগ্যবতী ড্যাংডেঙিয়ে চলে গেল, দেখে আহ্লাদ কর, তা নয় মা-মা করে চিৎকার তুলছ!'" বলি আর বেশীদিন বাঁচলে কপালে দুর্ভোগ ছাড়া কি ছাই সুখভোগ আসত ? হাত শুধু করে থান পরে বোগনো বেড়ির ঘরে ভর্তি হতে হত না ? চোখের জল যদি ছেলের গায়ে পড়ে বৌমা, তোমায় আমি বাপান্ত করে ছাড়ব তা বলে দিচ্ছি, মা-মা করে ন্যাকামি করা বার করে দেব।"

চোখের জল ছেলের গায়ে!

সত্য আঁচলটা তুলে ঘষে ঘষে চোখটা শুকনো করে ফেলে সত্যে তাকিয়ে দেখে, ছেলের গায়ে কোথাও জলের ফোঁটা লেগে আছে কিনা।

এই তো এই যে! এই যে জলের ফোঁটা! শিউরে ওঠে সত্য।

হে মা ষষ্ঠী, রক্ষা করো মা। এমন বুদ্ধিহীন মত কাজ আর কখনো করবে না সত্য।

কল্লিত সেই জলের ফোঁটা আঁচলের কোণ দিয়ে মুছে নিয়ে ছেলেকে নিবিড় করে ধরে সত্য। মৃত্যুর দিক থেকে মুখ ফিরিয়ে নিয়ে জীবনের মুখোমুখি বসে।

কথায় বলে, “ভাগ্যবানের বোঝা ভগবান বয়!” রাসুর বৌ সারদা অবশ্য নিজেকে খুব একটা ভাগ্যবতী মনে করে না, বরং যখন তখন “আমার যেমন ভাগ্য” বলে আক্ষেপ করতে ছাড়ে না। কিন্তু এক হিসেবে এয়াবৎ ভগবান তার বোঝা বয়ে এসেছেন। বয়ে এসেছেন গ্রহ-নক্ষত্রের একটি সুকৌশল সমাবেশ ঘটিয়ে।

নইলে পাটমহলের লক্ষ্মীকান্ত বাঁড়ুয়োর নাতনীর তো এখনো পাটমহলেই পড়ে থাকবার কথা নয়। কিন্তু তাই পড়ে আছে সে, সারদাকে নিঃসপত্নী রাজভোগের সুযোগ দিয়ে।

লক্ষ্মীকান্ত নেই, কিন্তু তাঁর পুত্র শ্যামকান্ত বাপের ঠাট-বাট বজায় রেখেছেন। সর্ববিধ আচার-আচরণ মেনে চলেন তিনি। নড়তে-চড়তে পাঁজিপুঁথি দেখেন এবং গ্রহ ফাঁড়া ঠিকুজিকোষ্ঠী ইত্যাদি গোলমেলে ব্যাপারে প্রত্যেক সময় কাশী-প্রত্যাগত জ্যোতিষার্ণব ঠাকুরের উপদেশ গ্রহণ করে থাকেন।

জ্যোতিষার্ণবই পটলীর কোষ্ঠী দেখে তার পতিগৃহে যাত্রা সম্পর্কে একটি বিশেষ বিধিনিষেধ আরোপ করেছিলেন।

ঘোষণা করেছিলেন, আঠারো বছরে পদার্পণের আগে পটলীর স্বামী-সন্দর্শনে বিপদ আছে। উক্ত কলাবিধি তার পতিসুখস্থানে রাহুর কটাক্ষ।

জ্যোতিষার্ণবের ঘোষণায় অবশ্য আশ্চর্য কেউ হয় নি, বরং যেন এ ধরনের একটা কিছু না হলেই আশ্চর্য হত। কারণ পটলীর পতিসুখস্থানে যে রাহুর সৃষ্টি সে আর জ্যোতিষীকে বলতে হবে কেন? সে তো তার বিয়ের দিনই হাড়ে হাড়ে টের পাওয়া গেছে।

নেহাৎ নাকি ওর বাপের পূর্বজন্মের পুণি ছিল, তাই সেই বিয়ের বর রামকালী কবরেজের দৃষ্টিপথে পড়ে গিয়েছিল। নয়তো পটলীকে তো বাসররাত্তেই শাখানোয়া খুলতে হত। আর নয়তো দাপড়া আধাবিধবা হয়ে জীবনটা কাটাতে হত।

রামকালী কবরেজ ভগবান হয়ে এসে উদ্ধার করেছেন। কিন্তু “অদৃষ্টের ফল কে খণ্ডাবে বল!” তাই গ্রহ-নক্ষত্ররা আঙুল তুলে নিষেধ করে রেখেছে, পটলী, তুই স্বামীর দিকে চোখ তুলবি না। অন্তত আঠারো বছর বয়স হবার আগে নয়।”

লক্ষ্মীকান্তর শ্রাদ্ধের সময় সামাজিক আচার অনুযায়ী জামাইকে শ্যামাকান্ত নিমন্ত্রণ করেছিলেন। তবে বাড়িতে কড়া শাসন করে রেখেছিলেন, মেয়ে-জামাইয়ে দেখাতনো না হয়। কিন্তু ভাগ্যচক্রে জামাইয়ের আসাই হল না। সেইদিনই নাকি জামাইয়ের রক্ত-আমাশা দেখা দিল। কে জানে সের দুই কাঁচা দুধ খাবার ফল কিনা সেটা!

যাক সে সব তো অতীত কথা।

শ্যামাকান্ত মেয়ের শ্বশুরকে তার কোষ্ঠীঘটিত বিপর্যয় জানিয়েছিলেন। কাজেই এতদিন ওপক্ষ থেকে বৌ নিয়ে যাবার প্রস্তাব ওঠে নি। দীনতারিণীর অত বড় সমারোহের শ্রাদ্ধেও শ্বশুরবাড়ি আসা হল না তার।

‘এক ঘাট’ করতে যে যেখানে জ্ঞাতিগোত্র ছিল সবাই এসে জড় হল, সত্য পুণি কুঞ্জর পাঁচ-পাঁচটা শ্বশুর-ঘরস্ত্রী মেয়ে, শিবজায়ার দৌত্তরগুণ্ডি, বাকী কেউ থাকে নি বাকী ছিল শুধু পটলী যে নাকি সর্বপ্রধানের এক প্রধান।

কিন্তু এবার সময় এসেছে।

আঠারো বছরে পদার্পণে করেছে পটলী। কুঞ্জগৃহিণী অভয়া ব্যস্ত হয়ে উঠেছেন নতুন বৌকে আনতে। মুখে বলেছেন অবশ্য, “আর ফেলে রাখলে কি ভাল দেখায়”, কিন্তু ভিতরের উদ্দেশ্য আরো গভীর, উদ্দেশ্য বড় বৌয়ের তেজ অহঙ্কার ভাঙা। সারদার যত তেজ, তত অহঙ্কার। দিন দিন যেন বাড়ছে। সংসারে ভুবনেশ্বরীর শূন্য স্থানটা কেমন করে কে জানে আস্তে আস্তে সারদার দখলে এসে গেছে। ভুবনেশ্বরীর মতই সারদা ভিন্ন যেন সব দিক অচল। কিন্তু ভুবনেশ্বরীর নম্র নীরবতা সারদার মধ্যে নেই, সারদা যতটা চৌকস, ততটাই প্রখর। শাশুড়ীকেও সে ডিঙিয়ে যেতে চায়।



অথচ দীনতারিণীর মৃত্যুতে গিল্লীর যে পদটা অভয়র পাবার কথা, সেটা যেন অভয়া পেল না। অভয়রা সেই 'হেসেলে চাকরি'র উর্ধ্বে নতুন কিছু হল না, বরং সেটাই আরও জটিল হয়ে উঠেছে। কাশীশ্বরী তো নেই-ই, হঠাৎ পড়ে গিয়ে হাত ভেঙে মোক্ষদাও কেমন কমজোরি হয়ে গেছেন। কাজেই অভয়াকে সদ্য-স্নানাঙ্কে ওঁদের ঘরেও কিছু গুছিয়ে দিয়ে আসতে হয়। বাটনাটা জলটা।

মোক্ষদা "হাতী হাবড়ে পড়ার নীতি"তেই সেই চির-অস্পৃশ্যের জল স্পর্শ করেন।

অতএব সমগ্র সংসারটা অনেকটা বেলা পর্যন্ত সারদার হাতেই থাকে। সঙ্গে থাকেন অবশ্য শিবজয়া, থাকেন আরও জ্ঞাতি মহিলারা, কিন্তু আশ্চর্য, সবাই যেন 'আমে দুধে' মিশে গেছে। অভয়া-রূপিণী আঁটির ঠাঁই হয়েছে ছাইগাদায়। অন্তত অভয়র তাই ধারণা।

বৌয়ের এই প্রতাপ, এই দপ্দপা আর সহ্য করতে পারছেন না অভয়া। টিট করতে ইচ্ছে করছে বৌকে। তা অল্প তাঁর হাতে এসে গেছে এবার। শ্যামাকান্ত জানিয়েছেন, আঠারো বছরে পা দিয়েছে পটলী।

শুনে বুকের জোর বাড়ল অভয়র।

ভাবলেন বড়বৌমার "তেজ আসপদা" কমুক একটু।

সতীন এনে বুক দিলে মেয়েমানুষ যেমন করে টিট হয়, তেমন আর কিসে ?

ওদিকে পাটমহলে মস্ত তোড়জোড়।

ফাঁড়া কেটেছে এতদিন পরে, ঘরবসত হচ্ছে মেয়ের, ঘরভরা জিনিস দেবার বাসনা পটলীর মা বেহলার। জিনিস গোছাচ্ছে, আর উঠতে বসতে মেয়েকে উপদেশ দিচ্ছে কিসে মেয়ে স্বস্তরবাড়ি গিয়ে "একজন" হতে পারে। মেয়েটা যে বড় ন্যাকা-হাবা, তাই ভাবনা বেহলার।

তবে অন্যদিকে একটা মস্ত ভরসা আছে পটলীর মার। অলক্ষ্যে প্রতি মূহূর্তে মেয়ের দিকে তাকিয়ে দ্যাখে আর সেই ভরসায় আলো মুখে ফুটে ওঠে। পটলীর সতীনের বয়সটা মনে মনে হিসেব করে সে আলো আরও জোরালো হয়। পটলীর সঙ্গে কার তুলনা ?

একে তো ভরস্তু বয়েস, তায় আবার এতকাল অবধি বাপের ঘরে নিশ্চিন্দ্রি ভাত খেয়ে খেয়ে গড়ন হয়েছে পুরস্তু। আর রূপ ? সে তো সেই শৈশব থেকেই একরকম ডাকসাইটে।

ঘরে পরে সবাই বরং ওই রূপের জুপেই খোঁটা দেয় তাকে। বলে, "অতি বড় সুন্দরী না পায় বর, শাস্তরের এ কথাটা নতুন করে প্রমাণ করছিস পটলী তুই। এর থেকে আমাদের কালো খেঁদি মেয়েরা অনেক ভাল। তোর বয়সী সরসুই তিন-চার ছেলের মা হল।"

এখন আবার ভয়ও দেখাচ্ছে অনেকে।

বলছে, "সতীন এখন স্থলকূল দিলে হয়! এযাবৎ একা পাটেশ্বরী হয়ে রয়েছে-পটলীর মা, তুমি মেয়ের গলায় কোমরে ভালমতন রক্ষাকবচ বেঁধে দিও। কে জানে কার মনে কি আছে! মেয়েকে বারণ করে দিও যেন সতীনের হাতের পান জল না যায়!"

আশা আর আশঙ্কা, স্বপ্ন আর আতঙ্ক, এই নিয়ে দিন কাটাতে কাটাতে অবশেষে একদিন পটলীর জীবনের সেই পরম দিনটি এসে পড়ে। স্বস্তরবাড়ি যাত্রা করে পটলী।

বাড়িটার খানিক খানিক ঝাপসা ঝাপসা মনে আছে। বড় যে উঠোনটায় বৌছত্তরের উপর গিয়ে দাঁড়িয়েছিল, মস্ত যে দালানটায় তাকে তুলে নিয়ে গিয়ে বসিয়েছিল, ঘাটের যে ধারটায় স্নান করিয়েছিল পটলীকে, যে ঘরে আটদিন বাস করেছিল সে, এইরকম একটু একটু—আর বিশেষ কিছু না।

অতগুলো মেয়েমানুষের মধ্যে কে যে তার সতীন, সে কথা বুঝতেই পারে নি পটলী। তা ছাড়া বোঝবার চেষ্টাই বা করেছে কে ? কেঁদে কেঁদে যার চোখ ফুলে করমচা!

শুধু তো স্বস্তরবাড়ি আসার কান্না নয়, নিজেকে ভয়ঙ্কর একটা অপরাধী ভেবে আরও কান্নার যোগ হয়েছিল তার সঙ্গে। সতি, পটলীর মত মহা-অপয়া ত্রিজনতে আর কে আছে ?

বিয়ের বর বিয়ে করতে এসে রাস্তায় মরে, এমন কথা কে কবে শুনেছে ? তার পর আবার এ বাড়ি ? বৌভাতের যজ্ঞের দিন বাড়ি যখন রমরম করছে, তখন কিনা বাড়ির একটা জলজ্যাস্ত বৌ হারিয়ে গেল! শুনে হা হয়ে গিয়েছিল পটলী।

পুরুষমানুষ রাস্তায়-ঘাটে বেরিয়ে সাপের পেটে বাঘের পেটে কি চোর-ডাকাভের হাতে পড়ে হারিয়ে যেতে পারে, কিন্তু মেয়েমানুষ ? বিশেষ করে বৌ-মানুষ ? ঘরের মধ্যে থেকে হারিয়ে যাবে কি? ভুতে উড়িয়ে নিয়ে যাওয়া ব্যাপার ছাড়া আর কিছু ব্যাখ্যা করা চলে না এর।

সেই ব্যাখ্যাতেই নিশ্চিত হয়ে সকল কারণের মূল নিজের উপর দিক্কারে আর ভয়ে যখন খালি কেঁদে আকুল হয়ে যাচ্ছিল, তখন সত্য এসে জ্ঞান দিয়েছিল তাকে।

হ্যাঁ, ওই আর একটা বস্তু মনে আছে পটলীর।

সত্য!

আর্শির মতন চকচকে সেই বড় বড় দুটো চোখ, আর তার উপরকার ঘনকালো জোড়া ভুরু, এখনও যেন স্পষ্ট মনে পড়ে যায় পটলীর।

পটলীর কান্নার কারণ শুনে সেই ভুরু কুঁচকে বলেছিল সত্য, “নিজেকে অপয়া বলে কেঁদে মরছ কেন? ভগবান যার ভাগ্যে যা লিখে রেখেছে তার তাই হবে। নিজেকে সমস্ত ঘটন-অঘটনের হেতু ভাববার হেতু? তুমি যদি না জন্মাতো, এই পৃথিবীর কলকজা বন্ধ থাকত?”

অবাক হয়ে গিয়েছিল পটলী তার সেই প্রায় সমবয়সী খুড়তুতো ননদের কথা শুনে। তার জীবনে এ হেন কথা সে কখনো শোনে নি। তাও আবার এতটুকু মেয়ের মুখে!

অথচ এই কদিন ধরে অনবরত সব গুরুজনের মুখে শুনেছে পটলী, পটলীই নাকি সকল অঘটনের কারণ।

পটলীর দোষেই নাকি যত কিছু খারাপ।

সেই নন্দ এখন নিশ্চয় শ্বশুরবাড়ি। কোন মেয়েটা আর পটলীর মত ফাঁড়া নিয়ে বাপের বাড়ি বসে থাকে?

তোড়জোড় এ বাড়িতেও চলছিল।

অভয়া যেন একটু বেশী-বেশীই করছেন।

করছেন ভালবেসে যতটা না হোক, লোক জানাতে। সারদা এবং সারদার সুয়ো'রা যাতে হৃদয়ঙ্গম করতে পারে, যে আসছে সে কারো করুণার ভিখিরী হয়ে নয়। আসছে রীতিমত অধিকারের দাবী নিয়ে।

অবিশ্যি ‘ঘর’টা সম্পর্কে স্পষ্ট করে কিছু উচ্চারণ করতে পারেন নি, কিন্তু ইশারায় ইস্তিতে ব্যক্ত করেছেন, এখন থেকে সারদার উচিত ছেলেনদের নিয়ে এদিককার ঘরে শোওয়া। ছেলে ভাগর হয়ে উঠেছে, আর এখন ঘর আগলানো কেন?

তবে সারদা এসব ইশারা-ইঙ্গিত গায়ে মাখেন না। বড় ছেলে ভাগর হয়ে ওঠা অবধি তো তাকে তার কাকাদের কাছে ভর্তি করে দিয়েছে সারদা। নিজের এলাকা ঠিক রেখেছে।

বড় ছেলে ‘বনু’ বা বনবিহারী ছোট্টকাকা নেড়ুর প্রাণপুতুল ছিল। নেড়ু হারিয়ে যাওয়া অবধি অন্য কাকাদের। প্রাণপুতুল অবশ্য সকলেরই, কিন্তু সর্বেসর্বা প্রথম ন্যতিটিকে অভয়া যেন তেমন দেখতে পারেন না। ছেলেটা শুধু সারদার পেটের বলেই নয়, বড্ড বেশী মা-ঘেঁষা বলেও। তাই যখন-তখনই তাকে খিচিয়ে বলতেন, “রাতদিন ছোট্টকাকা ছোট্টকাকা! ছোট্টকাকার যখন বিয়ে হয়ে যাবে?”

মেজকাকা থাকতে ছোট্টকাকার বিয়ে কেন হবে, অথবা বিয়ে হলে ভাইপোর সঙ্গে সংঘর্ষ বাধবার কারণটা কি, এ প্রশ্ন করতে না ছেলেটা, শুধু সববেগে বলে উঠত, “ছোট্টকাকাকে বিয়ে করতে দেবই না।”

অভয়া আরও খিচিয়ে বলেন, “তা দিবি কেন? কারুর আর এসে কাজ নেই, ভাগ নিয়ে কাজ নেই। একা তোর মা-ই সবকিছু দখল করে বসে থাকুক।”

তা তার সেই ছোট্টকাকা নিরুদ্দেশই হয়ে গেল, বিয়ে আর হল না।

অভয়া ভাবেন, এ ঐ অপয়া ছেলেটার বাক্যের ফল।

আর বাক্যগুলো মার ‘শিক্ষা’র ফল।

সারদা হাতের বাইরে বলে অভয়া হাতের মুঠোয় পুরতে পারেন এমন একটি হাতের পুতুলের বাসনা করছেন। তাকে নিয়ে অভয়া সাজাবেন খাওয়ানবেন চোখের ইশারায় ওঠাবেন বসাবেন।

“মেজবৌটা এলেও হত!”

অথচ অভয়ার মেজছেলের বিয়ের কথা মুখেও আনছেন না রামকালী। বরং একদিন বড় ভাইয়ের মুখের ওপরই স্পষ্ট বলেছিলেন, “ওই অপদার্থটার বিয়ে দিয়ে কি হবে?”

“অপদার্থ” বলে যে বেটাছেলের বিয়ে হবে না, এমন ছিটিছড়া কথা ত্রিসংসারে কে কবে শুনেছে? কিন্তু কুঞ্জ চিরদিনই ছোট ভাইয়ের ভয়ে কাঁটা। সমালোচনা যা করেন সে আড়ালে। তাই যা বলেছেন আড়ালেই বলেছেন। নিজে সাহস করে বিয়ের ব্যবস্থা করতে যান নি।

যাক, এতদিনে অভয়ার একটা নিজস্ব বস্তু পাবার আশা হচ্ছে।
কিন্তু একেবারে নিঃসংশয় সুখ জগতে কোথা ?
নতুন বৌয়ের বয়সের কথা ভেবে বুকের মধ্যে তেমন স্বস্তি নেই।
বুড়ো শালিখ কি পোষ মানবে ?
পাকা বাঁশ কি নুইবে ?

কিন্তু পটলী কি পাকা বাঁশ ?
কে জানে পটলী কি!

মেয়েমানুষ যতক্ষণ না নিজের স্বার্থ-কেন্দ্রে এসে দাঁড়ায়, ততক্ষণ তাকে কে চিনতে পারে ?
'ভাল মেয়ে' 'লক্ষ্মী মেয়ে' এসব বিশেষণ কত ক্ষেত্রেই ব্যর্থ হয়ে যায়।
পটলী কি তা না জানলেও পটলীর ফাঁড়া কাটার খবর পাওয়া পর্যন্ত সারদার বুকে বাঁশ
পড়েছে। কে যেন সেই বাঁশ দিয়ে অহরহ ডলছে তাকে।

আর রাসু ?

রাসুরও যন্ত্রণার শেষ নেই।

মনের মধ্যে দারুণ এক ভয়, অথচ পুলককম্পিত আবেগ। না জানি সেই সাত বছরে মেয়েটি
আঠারো বছরের হয়ে কেমনটি হয়েছে! এখান থেকে পত্তর নিয়ে যে গিয়েছিল, সেই রাসুর মা তো
এসে বলেছেন, “বৌ তো নয়, যেন পদ্মফুল!”

শুনে অবধি এক অবর্ণনীয় সুখকর যন্ত্রণা রাসুর মনকে কুরে কুরে খাচ্ছে।

সেই পদ্মফুল কি রাসুর পূজায় লাগতে দেবে সারদা ? নাকি বহুদিন আগের সেই এক দুর্বল
মুহূর্তের শপথটা স্মরণ করিয়ে দিয়ে বধিত্য করে রাখবে রাসুকে ?

সারদা কোনদিনই পদ্মফুল নয়।

পদ্ম গোলাপ চামেলী মল্লিকা কিছুই নয়, ফুলের সঙ্গেই যদি তুলনা করতে হয় তো বলতে হয়
অপরাজিতার গা-ঘেঁষা।

কিন্তু শ্যামলা রং হলেও তীক্ষ্ণ মুখশ্রী আত্ম অনবদ্য গঠন-সৌকুমার্যের জোরে এ বাড়ির বড়বৌ
হয়ে চোকবার সৌভাগ্য তার হয়েছিল।

আর এখন শ্রবল ব্যক্তিত্বের জোরে বাড়ির একেবারে শীর্ষস্থানীয় হয়ে বসে আছে সে। কিন্তু রাসু
এখনো জীবনরসের সন্ধানী নবীন যুবক। প্রথরা আর মুখরা সারদাকে সে আজকাল ভয় করে।

অবশ্য স্বামীসেবার নিখুঁত নৈপুণ্যে বরকে আয়ত্তে রেখে দিয়েছে সারদা নিখুঁত ভাবেই। এখনো
গরমকালের রাতে পাখা ভিজিয়ে বাতাস করে স্বামীকে, শীতের রাতে পিদ্দিমে হাত তাতিয়ে ঠাণ্ডা
সিরসিরে হাত-পা গরম করে দেয় তার।

আর সংসারের কাজে রান্নাঘরের গরমে যতই গলদঘর্ম হোক, শৌখিন বরটির কাছে রাতে শুতে
আসার সময় গা-হাত ধুয়ে কোঁচানো মিহি শাড়িখানি পরতে ছাড়ে না, মাথায় গন্ধ তেলটি দিয়ে একটু
চকচকে হয়ে আসতে ভোলে না।

কিন্তু প্রস্তুতিত পদ্মের সঙ্গে কি গন্ধ তেল পাল্লা দিতে পারবে ?

বৌ এসে দাঁড়াতেই একা ধনি্য ধনি্য রব উঠল। উঠল দু কারণেই। একে তো বৌয়ের রূপ, তার
উপর ঘরবসতের সামগ্রীর বহর।

রামকালী কবরেরজের সংসারে প্রয়োজনের অতিরিক্ত প্রাচুর্য, ঘর-সংসারের জিনিসপত্র তিনি
অপ্রয়োজনেই কতকগুলো করে করিয়ে রেখে দেন, কোন একটা উপলক্ষ হলেই। খুঁজলে বাড়িতে
ছেটয়-বড়য় খানবারো জাঁতা মিলবে, খানঘোল শিল। জলের ঘড়া না হোক গোটা চল্লিশ-পঞ্চাশ।
তবু মেয়েদের মন!

সেই শিল-নোড়া জাঁতা-কুলো ঘড়া-ঘটি ইত্যাদি করে সংসার-নির্বাহের তুচ্ছ উপকরণগুলোই
তাদের মন অহ্রোদে ভরে তোলে।

সকলেই একবাক্যে স্বীকার করে, “কুটুমের নজর আছে’। ঠানদি নন্দরাণী হেসে বলে, “না-
দেওয়ার মধ্যে দেখছি টেকি। একটা টেকি দিলেই রাসুর স্বত্তরের ঘোলকলা দেওয়া হত। ঘরবসতে
বৌমার বেহাই ওইটেই বা বাকী রাখল কেন ?”

না, টেকিটা পটলীর বাবা দেয় নি।

কিন্তু পটলীকে দিয়েছে!

আর পটলীই টেকির মুঘল হয়ে অন্তত একজনের বুকের গহবরে পাড় দিতে শুরু করেছে।
তবু সেই টেকির পাড়ের মধ্য থেকেই শক্তি সঞ্চয় করে নেয় সারদা। সংকল্প করে এ সতীনকে
সে স্বামীর ধারেকাছে আসতে দেবে না। সেই 'সিংহবাহিনীর' শপথটা রীতিমত কাজে লাগাবে।

তা ছাড়া আর উপায় কি!

রাসুকে তো চিনতে বাকী নেই সারদার। এই রূপসীর কাছে আসতে পেলে রাসু তো তদন্তেই
মাথা মুড়িয়ে তার চরনে নিজেকে বিকিয়ে দেবে।

প্রথম দিন অবিশ্যি অভয়াই বৌকে কাছে নিয়ে গুলেন এবং অনেক রাত পর্যন্ত জেগে আর
জাগিয়ে বৌকে জ্ঞানদান করতে চেষ্টা করলেন...এ সংসারে তার কে আপন, কেহ পর। কাকে সমীহ
করতে হবে, আর কাকে সন্দেহ করতে হবে।

কিন্তু পরদিন কি হবে?

অথবা তারও পরদিন?

পর পর চিরদিন?

সারদা সেই কথাই ভাবতে থাকে।

আজ তো গেল। কিন্তু কাল?

এবং চিরকাল?

রাসুর জন্যে না হয় সিংহবাহিনীর শপথ। কিন্তু সংসারের আর দশজনের কী ব্যবস্থা? তাদের
প্রশ্নবান যখন বিষের প্রলেপ মেখে বুকে এসে বিধবে? কি উত্তর দেবে সারদা?

ঘরের প্রদীপ নেভানো, রাসু এখনো বারবাড়ি থেকে আসেনি।

বৈশাখের দুরন্ত বাতাসে বৈশাখী চাঁপার মদির গন্ধ ছোট ছোট গবাক-পথেও সেই বাতাস
ঝলসে জলকে ঢুকে পড়েছে, আর সারা ঘরে ছড়িয়ে দিচ্ছে তার সুবাস।

এই রাত্রি, এই মোহময় বাতাস, আর এই ব্যুৎখ্যি টনটনে বুক-এর মাঝখানে কি মনে আনা
যায়, সারদা অনেকদিন স্বামীসঙ্গ পেয়েছে, সারদার ছেলের বয়স এখন বারো!

ভাবা যায়, সারদার জীবনের ভোগপ্যুত্রে দিকে হাত বাড়ানো শোভন নয়, স্বামীর অধিকার
স্বৈচ্ছায় ত্যাগ করে ভাঁড়ারের হাঁড়িকুঁড়ির মধ্যে জীবনের সার্থকতা খুঁজে বার করাই এখন তার
উচিত।

আশ্চর্য, আশ্চর্য, কিছুতেই কেন বিশ্বাস হচ্ছে না এই ঘর সারদা এত দিন ভোগ করছে?

বরং দৃষ্টি-অন্ধকার-করে দেওয়া অশ্রু-বাম্পের সঙ্গে বারে বারে মনে হচ্ছে, ক'দিনই বা!

মাঝে মাঝে কাদচ কখনো যে বাপের বাড়ি গিয়ে থেকেছে, সেইগুলোই যেন এখন মনে হচ্ছে
বিরাট এক-একটা বিরতি।

কিন্তু গরীব গেরস্ত বাপ সারদার, কতই বা নিয়ে যেতে পেরেছে মেয়েকে! ওর এই ষোল-
সতেরো বছরের বিবাহিত জীবনের মধ্যে দিন মাস ঘণ্টা মিলিয়ে হিসেব করলে না হয় চার-পাঁচটা
বছর!

তা হলেও তো হাতে থাকে এক যুগ।

কখন কোথা দিয়ে গেল সেই দীর্ঘ এক যুগ?

আস্তে আস্তে ঘরে এস ঢুকল রাসু। বরাবর যেমন ঢোকে। সারদা যে ধরনটাকে ব্যঙ্গহাসিতে
অভিষিক্ত করে বলে, "চোরের মতন।"

এই নতুন বিয়ের বরের ভঙ্গীটা আর কোনদিনই বদলাল না রাসুর।

তবে কি সেও টের পায় নি কবে কখন তার বয়স আঠারো থেকে চৌত্রিশে এসে পৌঁছেছে?
টের পায় নি, মাঝখানের সেই বয়সগুলো হাতফসকে পালাল কি করে?

তাই আজও শয়নমন্দিরে ঢুকতে তার লজ্জা!

আজ কিন্তু সমস্তটা দিন রাসুর বড় যন্ত্রণায় কেটেছে। অব্যক্ত সেই যন্ত্রণাটা যেন ধরা-ছোঁওয়া
যাচ্ছে না, শুধু মনটা ভারাক্রান্ত করে রেখেছে।

তা যন্ত্রণার কারণ আছে বৈকি।

এ যন্ত্রণা শুধু যে রূপসী স্ত্রীকে এখনো চোখে দেখতে পায় নি বলে তা নয়, কর্তব্য নির্ধারণের দৃষ্টেই বেচারী রাসুকে এত বিচলিত করছে।

অতঃপর রাসুর কর্তব্য কি ?

পূর্ব শপথ ভঙ্গ করে দ্বিতীয়বার মুখদর্শন না করা ? সারদার প্রতিই একান্তকি অনুরক্তি রেখে চলা ? না শপথটা একটা মুখের কথামাত্র বলে উড়িয়ে দিয়ে—

যন্ত্রণা এইখানেই।

উড়িয়ে দিলে সারদা যদি ভয়ঙ্কর একটা কিছু করে বসে ? তা ছাড়া সারদা মর্মান্বিত হবে, সারদা রাসুকে ধিক্কার দেবে, ঘৃণা করবে, এ কথা ভাবতেও তো বুকটা ফাটছে।

অথচ সারদার প্রতি সেই আনুগত্যের শপথ রক্ষা করতে গেলে আর একটা নির্দোষ অবলা সরলার প্রতি অবিচার করা হয়। এতদিন পরে স্বামীগৃহ এসে স্বামীর এই নিষ্ঠুরতা দেখে সেও কি দুঃখে লজ্জায় অভিমানে দেহত্যাগ করতে চাইবে না ? এতখানি আঘাত তাকে দেওয়া যাবে ? যে নাকি “বৌ নয়, যেন পদ্মফুল!”

এই দোটানায় রাসু সারাদিন টুকরো টুকরো হচ্ছে।

তবু ঘরে ঢুকে সহজ হবার চেষ্টা করল রাসু। বলল, “উঃ, কী অন্ধকার!”

একটা মাত্র মাটির প্রদীপে মস্ত একখানা ঘরের অন্ধকার দূরীভূত হয় এ কথা রাসুর আমলে হাস্যকর ছিল না। তাই সেই দীপশিখাটুকুর অভাবে রাসু বলল, “উঃ, কী অন্ধকার!”

কিন্তু ও পক্ষ থেকে এ সম্পর্কে কোন সাড়া এল না।

রাসু যথানিয়মে দরজায় হড়কোটা এঁটে সরে এসে এসে বলল, “পিদ্দিন জ্বালো নি যে ?”

এবার সারদা কথা বলল।

আর আশ্চর্য, ভিতরকার সেই বেদনা-বিধুর হাহাকার যখন ‘কথা’ হয়ে বেরিয়ে এল, এল তীক্ষ্ণ তীব্র একটি ব্যঙ্গের মূর্তিতে। হয়তো এইজন্যই স্বভাব জিনিসটাকে মৃত্যুর ওপার পর্যন্ত বিস্তৃতি দেওয়া হয়েছে।

সারদা তীক্ষ্ণ হল ফোটানোর সুরে বলে উঠল, “আর পিদ্দিন জ্বালার দরকার কি ? বাড়িতে যেকালে পুর্ণিমা চাঁদের উদয় হয়েছে!”

“পুর্ণিমা চাঁদ!”

রাসু সরল, রাসু অবোধ, রাসু এইমাত্র স্বর্গ হতে খসে পৃথিবীতে এসে পড়েছে। “পুর্ণিমা চাঁদ মানে ?”

“ও, মানে জানো না বুঝি ?” স্বামীকে যেন বিদ্রুপে খানখান করে দেয় সারদা, “কেন, বাড়িসুন্দু সবাই এত ধনি্য ধনি্য গাইছে, আর তোমার কানে ওঠে নি ? তোমার দ্বিতীয়পক্ষর রূপেই তো ভুবন আলো গো! তাতেই আর তেল খরচা করে আলো জ্বালি নি!”

রাসু হঠাৎ বল সঞ্চয় করে বলে ওঠে, “মেয়েমানুষ বড় হিংসুটে জাত!”

“কী! কী বললে ?” সারদা যেন তীক্ষ্ণতার প্রতিযোগিতায় নেমেছে, “মেয়েমানুষ হিংসুটে জাত ?”

“তবে না তো কি ?”

“মহাপুরুষ পুরুষজাতটা একেবারে দেবতা, কেমন ?” সারদা ক্ষুর গর্জনে বলে, “কি বলব— মুখ ফুটে তুলনা করে দেখাতে গেলে মহাপাতকের ভয়, তবু বলি—মেয়েমানুষের অবস্থার সঙ্গে একবার নিজেদের অবস্থা মিলিয়ে দেখ না। পরিবার যদি একবার পরপুরুষের দিকে তাকায়, তা হলে তো মহাপুরুষের মাথায় খুন চাপে!”

রাসু ধিক্কার-বিজড়িত কণ্ঠে বলে, “ছি ছি, কিসের সঙ্গে কী! পরপুরুষের নাম মুখে আনতে লজ্জা করল না তোমার ? দ্বিতীয় পক্ষ বুঝি পরস্ত্রী ? ছিঃ!”

সারদা কিন্তু এ-হেন ধিক্কারেও বিচলিত হয় না, তাই অনমনীয় কণ্ঠে বলে, “তা দ্বিতীয়, তৃতীয়, চতুর্থ যত হচ্ছে, ‘পক্ষ’ জুটলে আর পরস্ত্রীতে দরকার ? মেয়েমানুষের তো আর সে সুবিধে নেই ?”

রাসু হতাশ কণ্ঠে বলে, “হিংসেয় জ্বালায় তোমার দিগ্দিগিক জ্ঞান ঘুচে গেছে বড়বৌ, তাই যা নয় তাই মুখে আনছ! নতুন বৌকে আমি আনতে যাই নি, গুরুজনরা বুঝেসুঝে এনেছে। নইলে এযাবৎ কাল তো সেখানেই পড়ে ছিল!”

“ওঃ, ইল্লি! দুঃখু যে উথলে উঠছে দেখছি! পড়েই ছিল! আহা-হা, মরে যাই, অথৈ জলে পড়ে থেকেছিল একেবারে!”

সারদা ছুরি দিয়ে কেটে কেটে কথা বলে, “আমি কিন্তু সাফ কথা কয়ে দিচ্ছি, ভাগাভাগির ইলুতেপনায় আমি নেই। আমায় চাও তো ওকে স্পশ্য করতে পারে না, আর ওকে চাও তো আমি—”

হঠাৎ কণ্ঠ রুদ্ধ হয়ে যায় সারদার। আর এই রুদ্ধ কণ্ঠই বড় ভয় রাসুর।

আরও হতাশ গলায় বলে সে, “তার আমায় কি করতে বলা? মাথার ওপরকার গুরুজনরা যে ব্যবস্থা দেবে তাই মানব, না চেষ্টামেটি করে তার প্রতিবাদ করব?”

“কি করবে সে তোমার নিজের বিবেচনা। তুমিও কিছু কচি খোকাটি নও। মাথার ওপরকার গুরুজন যদি বিষ খেতে বলে, খাবে? খুড়োঠাকুর ধম্ম করলেন, উদ্দরলোকের জাত রক্ষা করলেন আমার বুকে বাঁশ ডলে! এতই যদি ধম্মজ্ঞান, নিজাই কেন—”

“বড়বৌ!” হঠাৎ ধমকে ওঠে রাসু, “কি বলছ কি? উন্মাদ হয়ে গেলে নাকি?”

সারদা ঝপ করে বিছানায় শুয়ে পড়ে গম্ভীর গলায় বলে, “উন্মাদ হবার ঘটনা ঘটলে মানুষ উন্মাদ হবে, এ আর আশ্চর্য্য কি? খুড়োঠাকুর যদি তখন আমার ঘর না ভাঙতেন, তা হলে বরং আজ ওনার ভাঙা ঘর ভরত।”

“বড়বৌ! কাকে নিয়ে তুলনা? এসব অকথা কুকথা মুখে উচ্চারণ করলেও মহাপাতক হয় তা জান?”

“মুখে উচ্চারণ করলে মহাপাতক, কিন্তু মনে? মনকে কেউ শাসিয়ে রাখতে পারে? যাগ গে, ভাল-মন্দ কিছুই বলব না আমি। আমার যা বলবার বলেছি।”

রাসু আপসের সুরে বলে, “অতই বা খাণ্ডা হচ্ছ কেন বড়বৌ? তুমি ঘরনী গিন্নী, বলতে গেলে জোয়ান ব্যাটার মা। তোমার জায়গা কে কাড়ে? তবে লোকদ্যাখতা একটা কথা আছে তো? ওকে একেবারে ভাসিয়ে দিলে—”

সারদা গম্ভীরভাবে বলে, “মা সিংহবাহিনীর নামে দিব্যি গেলেছিলে, সে কথা বোধ হয় ভুলেই গেছ?”

“ভুলে যাব কেন”, রাসু অসন্তুষ্ট স্বরে বলে, “কিন্তু লোককে কি বলবে, সেটাও তো চিন্তা করতে হবে?”

সারদা আবার ঝপ করে উঠে বসে। বলে, “কেন, লোককে বোঝাবার উপায় নেই? লোককে বোঝাতে কত কল-কাঠি আছে! লোককে বলতে পার না, কোনও সাধু-ফকির তোমার হাত দেখে বলেছে, ওই দ্বিতীয় পক্ষের পরিবারকে স্পর্শ করলে তোমার পরমাযু-ক্ষয় যোগ আছে?”

॥ আটাশ ॥

সংসারসুদ্ধ সকলেই আশা করেছিল প্রস্তাবটা সারদার দিক থেকেই উঠবে। কারণ সত্যিই কি আর এতটা বেয়েক্লে আর চক্ষুলজ্জাহীন হবে সে? কিন্তু আক্কেল সম্পর্কে নিতান্ত উদাসীন হয়েই অনেকগুলো দিন কাটিয়ে দিল সারদা। চক্ষুলজ্জার প্রকাশ দেখা গেল না।

তাহলে?

চোখে আঙ্গুল দিয়ে দেখানো ছাড়া তো উপায় নেই। কিন্তু সেই আঙ্গুলটা বাড়ায় কে? যে মুখরা সারদা, সুযোগ পেলে গুরুজনকেও রেয়াত করে কথা কয় না। ঘোমটার মধ্যে থেকেই এমন কুটুস কামড়টি দেয়, তাতে কামড়াহতের সর্বাপেক্ষে জ্বালা ধরে যায়।

কাজেই আড়ালে-আবডালে সমালোচনা উদ্দাম হয়ে ওঠে। বস্তুত এখনকার অবস্থা এই, সারদা যখনই যে কাজে এক জায়গা থেকে আর এক জায়গায় গিয়ে পড়ে, দেখে দু তিনটি মুখ একত্র হয়ে গুঞ্জরন করছে, সারদা গিয়ে পড়তেই ঝপ করে গুঞ্জরণটা থেমে যায় এবং মুখগুলি বিভক্ত হয়ে গিয়ে সহসা যা হোক একটা কাজের কথা নিয়ে সোরগোল শুরু করে দেয়।

সারদা কি বোঝে না কি কথা হচ্ছিল ওদের? বোঝে বৈকি। বুঝে মাথা থেকে পা অবধি রি রি করে জ্বলে ওঠে তার, তবু বুঝতে না পারার ভানটাই চালিয়ে যায় সে। চালায় এই জন্মে, জানে বুঝতে পেরেছি বলার সঙ্গে সঙ্গেই সমস্ত ব্যাপারটা নিরাবরণ হয়ে যাবে, যেটুকু চক্ষুলজ্জার আড়ালে-আবডালে রেখে ঢেকে বলছে ওরা, সেটুকু ঘুচে গিয়ে প্রকাশ্য আক্রমণের পথে নেমে আসবে। কাজেই ওই মুখোমুখিটা যতক্ষণ এড়ানো যায়!



তা ছাড়া এমনিতেই সারদা বিশেষ আত্মস্থ, গায়ে পড়ে কিছু বলতে যাওয়া বা জবাব দিতে যাওয়া ওর স্বভাবই নয়।।।

কিন্তু ওঁরাই এবার গায়ে পড়ে বলতে আসার সংকল্প গ্রহণ করেছেন। সারদার নিজের শাওড়ী আর পিসশাওড়ী শশীতার। এই পিসশাওড়ীটিকে জীবনে এই প্রথম দেখল সারদা। কারণ প্রায় বছর তিরিশ পর তিনি পিত্রালয়ে এসেছেন। এতদিন বিরতির কারণ অবশ্য বৈবাহিক কলহ। তা দুই বৈবাহিকের একজন তো বহুদিন গত হয়েছেন, কুঞ্জ রামকালী আর শশীতারার বাবা জয়কালী। অপরটি অর্থাৎ শশীতারার স্বত্তর নাকি এতদিন বেঁচে থেকে পুত্রবধূর পিত্রালয়ের পথের কাঁটাটি দৃঢ়মূল রেখেছিলেন।

সম্প্রতি তাঁর শ্রদ্ধা চুকেছে, শশীতার। এত বছর পরে পিত্রালয়ে এসেছেন। এখন কিছুদিন থাকবেন।

এসে দিন দুই লেগেছে তাঁর সংসারের হালচাল বুঝতে, তারপর কার্যক্ষেত্রে নেমেছেন। সংসারে নিজের ভাই কুঞ্জর প্রতিপত্তিহীন অবস্থা ও সত্যতো ভাই রামকালীর 'বোলবোলাও দাপটটা তাঁর বুকে শেল বিধেছে, এবং রাসুর প্রথম পক্ষ'র নিলজ্জতায় গালে হাতে দিতে বাধ্য হয়েছেন তিনি।

অবাক হয়ে বলেছেন, "হ্যাঁগা, ও বুড়োমাগী গায়ের জোরে বর আগলে বসে থাকবে, আর সোমন্ত যুবতী বৌটা শাওড়ীর ঘরে শুয়ে ঘরের 'আড়া' গুনবে? এ তোমরা চলতে দিচ্ছ? বলি ছেলেটার কথাও তো ভাবতে হবে? তার টাটকাটি রইল ধামাচাপা দেওয়া, আর গুনকনো বাসিটায় মন সন্তোষ করে থাকার জুলুম? এতখানি বয়সে এমন কথা গুনি নি দেখি নি!"

সারদার শাওড়ী সুদীর্ঘকালের অদেখা ননদিনীটিকে পরম আত্মীয়ের অধিকার দিয়ে বিগলিত স্বরে বলেন, "দেখ ঠাকুরঝি দেখ। যত থাকবে ততই বুঝবে। একে তো তোমার দাদার ওই মিনমিনে স্বভাবের জন্যে আমি চিরদিন বড় হয়েও ছোট, হাঁড়ি-হেসেল ছাড়া আর কিছু দেখলাম না। তার ওপর বৌটি হয়েছেন জাঁহাজ। এমনিতে দেখেও ওকে কারুর সাথে-পাঁচে নেই, কিন্তু অহঙ্কারে মটমট। কারুর মতে চলাতেও যাও দিকি? চলবে না। আর এমন রাশভারী শ্রিকিতি, ডেকে একটা কথা বলতে সাহস হয় না।"

"তোমাদের হয় না, আমার হবে।" শশীতার। দৃঢ় রায় দেন, "এ নিযিন্দেপনার বিহিত আমি করে ছাড়ব।"

বিহিত করতে ভাজকে নিয়ে এজলাসে এসে আসামীকে তলব করলেন শশীতার।

সারদা এল, ঘর হেট করে বসে ঘোমটার মধ্যে থেকেই মৃদু অথচ স্পষ্ট স্বরে বলেন, "কি বলছ?" শশীতার। নড়েচড়ে বসে হাতপাখা নাড়তে নাড়তে বললেন, "বলছি একটা নেয়া কথা। মনে কিছু করে না। আক্কেল যাদের শরীরে নেই, তাদের আক্কেল করাতে হলে চোখে আব্বল দেওয়া ভিন্ন তো গতিও নেই। তাই দেব। তাতে চোখে যদি তোমার জ্বালা ধরে, আমায় কিন্তু দুখো না বাছ!"

সারদার কণ্ঠ থেকে একটু হাসির আওয়াজ পাওয়া গেল, "তোমাদের দুখব? এত আসপন্দা আমার পিসীমা?"

"আসপন্দা!" শশীতার। পাখার বেগটা বাড়িয়ে দিয়ে বলেন, "না, আসপন্দা তোমার দেখি না বটে, কিন্তু আক্কেলটুকুও তো তিলমান্ডর দেখি না বাছ! নতুন বৌমার দিকটা তো একেবারে ভাবছ না!"

পরক্ষণে শশীতার। আর তার ভাজকে অবাক করে দিয়ে সারদার মৃদুকণ্ঠের স্পষ্ট স্বর ধ্বনিত হয়, "আমি না ভাবলাম, তোমরা এতজনে তো ভাবছ!"

"এতজনে ভাবছি? আমরা এতজনে ভাবছি! তুমি যে অবাক করলে বড় বৌমা! আমরা ভেবে তার কী উবগারটা করতে পারব গুনি? তুমি এদিকে আত্মঘাতী হবার ভয় দেখিয়ে সোয়ামীকে শাসিয়ে রেখেছ, ভয়ে কাঁটা হয়ে আছে সে, আমরা কি করব? এই তো সিদিনকে রান্তিরে ছোড়াটাকে হাত ধরে হিঁচড়ে এনে বললাম, 'রাসু, তুই ইদিকে আয়। ঘরের তো অভাব নেই বাড়িতে। এ ঘরে নবাবী পালঙ্ক না থাক, সোয়ামী পেলে নতুন বৌয়ের এখন আমতজাই রাজতজ।' তা আনতে কি পারলাম? ভয়ে সিটিয়ে হাত ছাড়িয়ে পালিয়ে গেল। বলে কি, 'তাহলে তোমাদের বড়বৌ আত্মঘাতী হবে!' ... হ্যাঁ গা, বাপ তো তোমার সনলাম ভালমানুষ, তোমার এ কী ছোটলোকমি!"

শশীতার।র কথা শেষ হওয়ার সঙ্গে সঙ্গে ঘরের মধ্যে যেন একটা তীব্র বিদ্যুৎ ঝলসে ওঠে। বিদ্যুৎটা আর কিছু নয়, সারদার চোখের আগুন। হঠাৎ মুখ তুলতে গিয়ে মাথার ঘোমটাটা খসে গিয়েছিল সারদার। ঘোমটাটা আবার একটু তুলে মুখ প্রায় অনাবৃত রেখেই সারদা বলে, "দশচক্রে

ভগবান ভূত হয় পিসীমা, তায় মানুষ তো কোন ছার! পাকেচক্রে উদ্ভরলোকের মেয়ে ছোটলোক হয়ে উঠবে এতে আর আশ্চর্য্য কি!”

একে মুখ খোলা, তাতে এই বাকি!

সারদার শাশুড়ী বোধ করি নিজের মর্যাদা সম্পর্কে এবার সচেতন না হয়ে পারেন না। তাই নখপরা মুখ ঘুরিয়ে বলে ওঠেন, “মুখের ঘোমটা খুলে শাশুড়ীর সঙ্গে ঝগড়া করছ তুমি বড় বৌমা! বুকের পাটা তোমার এত কিসের? জান, জন্নোর শোধ বাপের বাড়ি বিদেয় করে দিতে পারি তোমায়?”

এজলাসটা বোধ করি সারদার ধারণার জগতে ছিল, আর সওয়ালের জন্যে প্রস্তুতও ছিল সে। তাই তীক্ষ্ণ একটু হাসির সঙ্গে বললে, “জন্নের শোধ যদি যেতেই হয় তো বাপের বাড়ি যাব কেন? যমের বাড়ি তো কেউ কেড়ে নেয় নি!”

শশীভারা এবার চাকা নখ ঘুরিয়ে ঝঙ্কার দিয়ে ওঠেন, “যমের বাড়ির ভয় দেখিয়ে আমাদের জন্দ করতে পারবে না বড় বৌমা, আমরা রাসু নই। বলি ওই যে একটা বড়ঘরের মেয়ে এসেছে, যার বাপ ঘরবসতের দ্রব্যতে বাড়ি ভরিয়ে দিয়েছে, তার দাবি-দাওয়াটা মানবে না তুমি? আর ওই রূপের কান্তি টাটকা পদ্মফুল, সোয়ামীকে তুমি এর ভোগ থেকে বঞ্চিত করছ, এতে যে তোমার নরকেও ঠাই হবে না!”

হঠাৎ হেসে উঠে সারদা দিবি) স্পষ্ট গলায় বলে, “ভালই তো পিসীমা! নরকে ঠাই না হলে সগুণে যাব! দুটো বৈ তো আর দশটা জায়গা নেই!”

দুটো গিন্নীকে হতবাক করে দিয়ে উঠে দাঁড়িয়ে সারদা, “তালের বড়া খেতে চেয়েছে ছোট ঠাকুরপো, তালগুলো মেড়ে রাখিগে।”

অর্থাৎ তোমাদের কাঠগড়া থেকে ফসকে পালাচ্ছি এবার।

শশীভারা বোঝেন, যেমন ভেবেছিলেন, ঠিক তেমনটাই ঝিক্কার দিয়ে বিচলিত করে কার্যসিদ্ধ করা যাবে না। অন্য চাল চালেন তিনি। বলেন, “সন্তোষ-ভব্যতার পাঠশালায় দেখছি একেবারেই পড় নি তুমি বড় বৌমা। গুরুজনের সামনে থেকে অনুমতি না নিয়ে উঠতে আমি আমার স্বত্তরবাড়ির দিকের কোন ঝি-বৌকে কখনও দেখি নি। আমনি নিজেরাও—গুরুজন ডেকে একটা কথা শুধালে ঘাড় নেড়ে, হ্যাঁ হু করে উত্তর দিয়েছি, উঠে যেতে না বললে ঘাড় ভঁজে বসে থেকেছি।”

সারদাকে এতেও অপ্রতিভ করা যায় না, সে তেমনি মৃদু হাসির সঙ্গে বলে, “বসবার অবকাশ থাকলে তো বসে থাকোও একটা সুখ পিসীমা!”

“হঁ! কথার পিঠে কথা দেওয়াই তোমার রোগ দেখছি। হাবাগঙ্গা শাউড়ী পেয়েছ, তাই এমন দুরবস্থা হয়েছে। যাক বলি শোন, আপস-মীমাংসার কথাই কইছি। ঘরনী গিন্নী বেটার মা তুমি, অনেকদিন তো সোয়ামীকে ভোগ করলে! ওকে একেবারে ভাসিয়ে দিলে চলবে কেন? ওরও আশু-সাক্ষী বিয়ে। আমি বলি কি, একটা পালা ঠিক করো।”

মনে মনে হাসেন শশীভারা, একবার যদি রাসুকে নতুন নেশা ধরিয়ে দেওয়া যায়, তারপর দেখা যাবে তোমার কত আদর থাকে! দেখা যাবে কোথায় থাকে তোমার ঐ তেজ! ওই বৌয়ের আশ্বাদ পেলে, তুমি গলায় দড়ি দিলে কি জলে ডুবলেও কিছু এসে যাবে না রাসুর!

‘পালা’র বুদ্ধিটা মাথায় আসার জন্যেই নিজেকে নিজে তারিফ করেন শশীভারা।

কিন্তু সারদা সে তারিফ বেশীক্ষণ বজায় থাকতে দেয় না। তীক্ষ্ণকণ্ঠে বলেন, “তোমাদের অনুমতি না নিয়েই যাচ্ছি, পিসীমা। এসব নীচু কথা শুনতে মাথা কাটা যাচ্ছে।”

“অ্যাঁ অ্যাঁ? কী বললি? আমরা নীচু কথা কইছি? ছোটলোকের বেটি, হাঘরের মেয়ে! বলতে জিভ আড়িয়ে গেল না!” শশীভারা ধেই ধেই করে নেচে ওঠেন, “খুব উঁচু কথাটা তুমি কইছ বটে! একলা খাব, একলা পরব, একলা ভোগ করব, এই তো মহত্ত্বের কথা! ‘পালা’ কথাটা নিচু কথা হল! বলি তাতে তো দুই দিকই রক্ষ হয়!”

সারদার বোধ করি কী একটা কঠিন কথা মুখে আসে, কিন্তু সেটা কষ্টে দমন করে বলে, “দুদিক রক্ষের দরকার নেই, একদিকই রক্ষ করো তোমারা।”

এরপর আর দাঁড়ানো চলে না।

মান-সন্মান বজায় রাখা শক্ত হবে। সারদার নিজের চোখই তাকে অপদস্থ করে ছাড়বে।

দু-টো গিন্নীকে পাথর করে দিয়ে চলে যায় সারদা।

এই চরম অপবাদের মুহূর্তে ভুবনেশ্বরীকে মনে পড়ে তার। সারদার ভাগ্যটাই মন্দ, নইলে অমন একটা স্নেহের আশ্রয় হারায় সে? ভুবনেশ্বরীর কি এখন মরবার বয়স?

হ্যাঁ সারদা নির্লজ্জ, সারদা বেহায়া, সারদা স্বার্থপর। কিন্তু পরার্থপরতায় উদার হবার ভাগ্য সে পেল কবে? ভাগ্য যে তাকে বঞ্চনাই করেছে। আর সে বঞ্চনা এসেছে তার গুরুজনদের হাত থেকেই।

গুরুজনদের প্রতি শ্রদ্ধা সম্মান তার আসরে কোথা থেকে? বিষপাত্রের বিনিময়ে কে অমৃতপাত্রের উপহার নিতে হাত বাড়ায়?

শশীতারার গাল হাত দিয়ে অভয়াকে উদ্দেশ্য করে বলেন, “মান্যে বড় গুরুজন তুমি বৌ, তোমার পায়ের ধুলো নেবারই কথা। তবু বলি, তোমার পায়ের ধুলোয় গড়াগড়ি দিতে ইচ্ছে করছে। এই কালকেউটে নিয়ে ঘর করছ তুমি?”

কুঞ্জ-গৃহিণী কপালে হাত ঠেকিয়ে বলেন, “অদেষ্ঠ ঠাকুরঝি!”

আসল কথা “অদেষ্ঠ”টা তাঁর নিজের কাছে ধরা পড়েছে এই সম্প্রতি। ননদিনীর দিব্যদৃষ্টির প্রভাবে। এবং এযাবৎ বোকামি করে এসেছেন, সুদে-আসলে সেটা উসুল করে নিতে ইচ্ছে হচ্ছে তাঁর।

“ওই কালনাগিনীর দিক থেকে রাসুর মন একেবারে ঘুরিয়ে দিতে পারি, এমন ‘ওষুধ’ আমার জানা আছে বৌ—” শশীতারার চাপা হিংস্র স্বরে বলেন, “অব্যর্থ তুকে। রাসু তোমার ছটফটিয়ে নতুন বৌর পায়ে পড়বে, বড়বৌকে জন্মের বিষ দেখবে!”

ভাজ্জ অবাক হয়ে বলেন, “সত্যি ঠাকুরঝি, তেমন ওষুধ তোমার জানা আছে?”

শশীতারার মুখে একটি বিচিত্র হাসি ফুটে উঠে, “জানা না থাকলে আর তোমার নন্দাইকে অমন কেন গোলায় করে রেখেছি? বয়সকালে কি কম দুর্দান্ত ছিল নাকি? সম্পর্ক অসম্পর্ক মানত না, রূপসী মেয়েমানুষ দেখলেই উন্মাদ হয়ে উঠত। এক বাগদীঘড়ী শেখাল আমায় সেই তুকে, তার পর থেকে এমন নেলাখেপা হয়ে গেল যে, আমি বৈ আর কিছু জানে না। আমি উঠতে বললে ওঠে, বসতে বললে বসে, খেতে বললে খায়, ঘুমতে বললে ঘুমোয়। আমার মুখের দিকে ফ্যালফেলিয়ে তাকিয়ে থাকে। আমি বলি থাক, ওই আমার ভুলে নাই বা রোজগার করল, নাই বা হট্টগোল করে বেড়াল, ভাতের তো অভাব নেই ঘরে। আমার আঁচলটিতে তো বাঁধা রইল জন্মের শোধ!”

রাসুর মা ইতস্তত করে বলেন, “কোন শিকড়বাকড় নাকি? রাসুর কোন ক্ষতি হবে না তো?”

“শোন কথা! সে কাজ আমি করব? এ আর কিছুটা নয়, শুধু একজনের থেকে মন ঘুরে আর একজনের ওপর পড়া। তাহলে বলি শোন, তোমার কপালক্রমে এই পরশুই আমাবসো আসছে— একেবারে দুপুররাতে নতুন বৌমা যদি এলোচূলে বিবস্ত্র হয়ে একটা কলাগাছের গোড়ায় এক ঠোকায় একটি ছুঁচ বিধে দিয়ে আসতে পারে, তাহলে—”

কথা শেষ হয় না শশীতারার, সারদার ছেলে দৌড়ে এসে বলে, “তোমার শীপগির চলে এস, মেজঠাকুন্দা অজ্ঞান হয়ে গেছে।”

মেজঠাকুন্দা! মানে রামকালী! যিনি জ্ঞানের পারাবার! রামকালী অজ্ঞান হয়ে গেছেন, এ কী অদ্ভুত ভাষা?

সকলেই দৌড়ায়।

তবে কি রামকালীও ভুবনেশ্বরীর মত বিনা নোটিশে—

ব্যাপারটা এত জানাজানি হল, ভিতরবাড়িতে পড়ে গিয়ে। বারবাড়িতে পড়লে অন্তত মেয়েমহলের দল এভাবে ধারেকাছে গিয়ে হা-ছতাস করতে পারত না।

যাদের স্পর্শের অধিকার আছে তারা মুখে মাথায় জল ঢেলে গঙ্গা বইয়ে দিল, বাড়িতে যত হাতপাখা এনে জড় করল। এ শুধু দুর্ভাবনাই নয়, এক প্রকার রোমাঞ্চও। যে মানুষটার মুখের দিকে কেউ কোনদিন স্পষ্ট করে তাকিয়ে দেখবার সাহস পায় নি, সে মানুষটা অসহায়ভাবে চোখ মুদে পড়ে আছে, তাকিয়ে দেখতে পাওয়া যাচ্ছে কেমন তার নাকমুখ, করুণা করা যাচ্ছে তাকে জল দিয়ে বাতাস দিয়ে, এটা প্রায় সুখের পর্যায়েই পড়ে।

সারদাও একখানা হাতপাখা নিয়ে এসেছিল, আর দূর থেকে বাতাস করছিল এবং ভাবছিল, আশ্চর্য এতদিন ঘর করছি মানুষটা কেমন দেখতে তা তো কোনদিন দেখি নি! একেই কি বলে “তণ্ড-কাক্ষন-বর্ণাভাং—”

ভয়ঙ্কর একটা আবেগের আলোড়নে চোখে ছলাৎ করে জল এসে যায় সারদার, এ হেন স্বামীকে ফেলে চলে যেতে হয়েছে মেজখুড়িকে ? আর তাই বুঝি স্বর্গেও তিষ্ঠোতে পারছেন না, আকর্ষণ করে টেনে নিয়ে যেতে চাইছেন নিজের কাছে ? মনের মত স্বামী এমনি জিনিস! তার পর চোখ মুছে ভাবল, মেজখুড়ো আমাদের মায়া কাটিয়ে চললেন!

কিন্তু আপাতত দেখা গেল সারদার আশঙ্কা অমূলক। চিরশান্ত চিরসুকুমার ক্ষীণশক্তি ভুবনেশ্বরীর আকর্ষণ মাধ্যাকর্ষণের চেয়ে জোরালো হল না।

রামকালী চোখ মেললেন।

চারদিকে এতগুলো মুখ দেখে ভুরুটা ঈষৎ কুঁচকে গেল, আবার চোখ বুঝলেন। আর অনেকক্ষণ পরে বললেন, "আমাকে বাইরে চণ্ডীমণ্ডপে বিছানা করে দাও।"

হ্যাঁ, বাইরেই গুলেন রামকালী। মেয়েদের এই হা-হতাশ তাঁর অসহ্য, নিজের কাছে নিজে ভয়ানক লজ্জিত হচ্ছেন। রামকালীর পক্ষে এ হেন দুর্বলতা ক্ষমার অযোগ্য। রামকালী জ্ঞান হারিয়ে পড়ে গেছেন। পাঁচজনে মুখে-মাথায় জল দিল, হা-হতাশ করল, এর চাইতে ঘৃণ্য ব্যাপার আর কি আছে!

এ রকমটা হল কেন ?

অনেকদিন থেকেই যেন ভিতরে ভিতরে একটা ক্ষয় চলছে, যেন একটা ভাঙনের পদধ্বনি শুনে পাচ্ছেন। শরীর খারাপ হয়ে গেছে। সেই থেকেই গেছে।

রামকালীর মধ্যেও একটা আবেগের আলোড়ন উঠল। সেই ছোটখাটো মানুষটা, যাকে রামকালী কোনদিনই পুরো একটা মানুষ বলে গণ্য করেন নি, সে যে দৃঢ়কঠিন রামকালীর ভিতরের এতটা শক্তি হরণ করে ফেলবে এ রামকালীর ধারণার মধ্যেই ছিল না।

ভুবনেশ্বরী সম্পর্কে যে তাঁর একটা বাৎসল্যমিশ্রিত প্রীতি ছিল, জীবনের কোন আদর্শে, কোন চিন্তায়, কোন সুখদুঃখে তাকে ডাক দেন নি। আজ মনে হচ্ছে সম্পূর্ণ বিচার করেন নি রামকালী স্ত্রীর উপর। চিরদিন যাকে ছোট ভেবে এসেছেন, সে হয়তো এমন ছোট ছিল না, যাকে সামান্য ভেবেছেন, সে হয়তো সামান্য নয়। রামকালী যদি তাকে স্নেহের সঙ্গে কিছু শ্রদ্ধাও দিয়ে হৃদয়ের সহধর্মিণী করে তুলতে পারতেন, হয়তো সারাটা জীবন এতখানি নিঃসঙ্গ হয়ে থাকতেন না।

মৃত্যুর মহিমায় ভুবনেশ্বরী যেন ঝুঁপ হয়ে উঠেছে।

বিছানায় শুয়ে শুয়েই সংকল্প করলেন রামকালী, শীঘ্রই তীর্থযাত্রা করবেন। বায়ু-পরিবর্তনের প্রয়োজন হয়েছে।

বায়ু-পরিবর্তন ভিন্ন ভাঙন ধরা স্বাস্থ্যের ক্ষয়পূরণ সম্ভব নয়।

তীর্থযাত্রার সংকল্প ঘোষণা করলেন রামকালী।

দু-তিনটে দিন রামকালী সম্পর্কে উদ্বেগ নিয়েই দিন গেছে সকলের, রাসু বারবাড়িতে চণ্ডীমণ্ডপেই রাত কাটিয়েছে, কাকার নিষেধ সত্ত্বেও, চুপি চুপি—তাঁর অলক্ষ্যে।

আজ আবার স্বাভাবিকত্ব এল সংসারে। যদিও রামকালীর তীর্থযাত্রার সংকল্পে ভয় ভাবনা আতঙ্ক দেখা দিল, তবু সেটা তো আজই নয়। তীর্থযাত্রার অনেক তোড়জোর।

রাসুকে আজ শশীতারা আবার ডেকে পাঠালেন। বললেন, "দেখ, পুরুষের চামড়া যদি গায়ে থাকে তো বৌয়ের নাকে-কান্নায় ভিজিস নে। আশুঘাতী অমনি হলেই হল! আজ তুই ইদিককার ঘরে শুবি।"

তিন-তিনটে রাত বাইরের ঘরে কাটিয়ে রাসুরও মন চঞ্চল, এ প্রস্তাবে আরও চঞ্চল হয়ে ওঠে। অথচ তার সায় দেবার উপায় নেই। এ যেন পেটে ঝিদে, সামনে সুখান্দা অথচ মুখ বাঁধা!

তাছাড়া রাসু সারদা নয় যে এসব কথার পিঠে কথা কইবে। লজ্জায় ঘাড় হেঁট করে থাকে সে। শশীতারা বোঝেন "মৌনং সম্ভতি লক্ষণম্। হুষ্টচিন্তে বলেন, "তোকে কিছু ভাবতে হবে না, তুই শুধু খাওয়ার পর আমার ঘরে এসে বসবি। পিসি-ভাইপোয় গল্প করবার ছুতোয় রাতটা একটু ঘোর করে দেব, তার পর—আহা নতুন বোটোর মনের দিকে একটু ভাকাবি না তুই ? ভাববি না তার কথা ?"

রাসুর চোখে জল এসে পড়ে, সে তাড়াতাড়ি সরে যায়। নতুন বৌয়ের কথা ভাবছে না সে ? অহরহই তো ভাবছে!

কিন্তু যাকে নিয়ে এত দুর্ভাবনা শশীতারার, সে কোথায় ? পাটমহলের লক্ষ্মীকান্ত বাঁড়ুয়োর নাতনী পটলী ?

সে যেন একটা অদ্ভুত ভয়ে কাঠ হয়ে আছে। এতদিনে অবশ্য সে চিনে ফেলেছে কে তার সতীন। সতীনকে যে এতটাই ভীতিকর মনে হয় তা বুঝি ধারণা ছিল না তার। সারদার মুখের দিকে কোনদিন ভাল করে তাকাতে পারে না সে, কথা বলা তো দূরের কথা।

অথচ সারদা হরদমই তার সঙ্গে কথা বলে। সংসারের সবাইকে খেতে দেওয়ার ভার যে সারদারই হাতে—অগতাই পটলীকে তার হাতে পড়তে হয়েছে। তার শাশুড়ী দু-চারদিন নিজের এজ্ঞারে রাখবার চেষ্টা করে অক্ষমতাবশতই হাল ছেড়ে দিয়েছেন।

সারদা ফি-হাত ডাকে, “নতুনবৌ, খাবে এসো।নতুনবৌ, এখন মুড়ি খাবে ? নতুনবৌ, তুমি মাছের পেটি ভালবাস না দাগা ? নতুনবৌ, তুমি ছাঁচা আমার আচার খাও না ? নতুনবৌ, আচারের তেল দিয়ে কথবল মেখে খেয়েছ কোনদিন ? খাবে তো বল মাছি ?”

নতুনবৌ যে কার নতুন বৌ সে কথা যেন জানে না সারদা। কুটুম্বের মেয়ে এসেছে, তাকে আদরযত্ন করছে ভারপ্রাপ্ত কর্মচারী।

আজও ফুলুরি আর তিলপিটলি বেগুনভাজা করে এক বাটি হাতে নিয়ে ডাকতে এসেছিল সারদা নতুনবৌকে, “খাবে গরম গরম ?”

পটলী মাথা নেড়ে বলল, “না।”

সারদা একটু আশ্চর্য হল। কারণ নতুনবৌ কোনদিন কিছুতেই ‘না’ করে না। করে না বলে মনে মনে বরং একটু কৌতুকই অনুভব করে সারদা। ভাবে, ভাল করে খাইয়ে-দাইয়ে ঠাণ্ডা করে রাখা যাবে ওকে।

পটলী যে ভয়েই ‘না’ করতে পারে না, সেটা বোঝেই সারদা। হয়তো বোঝার কথাও নয়। আজ না শুনে বলে, “কেন গো, খাবে না কেন, খিদে নেই ?”

পটলী মাথা আরও নিচু করে মাথাটা আর একবার নাড়ে।

সারদা একটু চূপ করে থেকে মুচকি হেসে বলে, “কেন বল তো নতুনবৌ ? তোমার তো কখনও অগ্নিমান্দ্য দেখি নে!”

এরপর নতুনবৌয়ের দিক থেকে কেবল সাদা আসে না, শুধু তার ঘাড়টা আরও নুয়ে পড়ে। সারদা চলে যেতে উদ্যত হয়ে বলে, “তবে নয় দুটো তিলের নাড়ু পাঠিয়ে দিই গে, খেয়ে জল খাও।”

এবার হঠাৎ নতুনবৌ বলে ওঠে, “তুমি আমায় এত যত্ন করো কেন ?”

সারদা বোধ করি এ প্রশ্নের জন্য আদৌ প্রস্তুত ছিল না, তাই হঠাৎ একটু খতমত খেয়ে যায়, তবে সে মুহূর্তের জন্য। পরক্ষণেই তীক্ষ্ণ একটু হেসে বলে, “করব না কেন, যত্ন করবারই তো সম্পর্ক গো!”

এতক্ষণ ঘাড় নিচু ছিল, এবার বোধ করি অজ্ঞাতসারেই মুখটা তুলে ফেলে পটলী, আর দীর্ঘ পল্লবচ্ছন্ন দুটি চোখের কোল বেয়ে দুফোটা জল গড়িয়ে পড়ে তার। সে চোখের দৃষ্টিতে ফুটে ওঠে একটা অসহায় ভর্ৎসনা। সে দৃষ্টি সারদার উপর নিবন্ধ রেখেই বলে, “তামাশা করছ ?

মুখরা সারদা সহসা যেন মুক হয়ে যায়। ওই দুফোটা চোখের জলের দিকে তাকাতে পারে না, আর ভগবান জানেন কোন এক অদ্ভুত রুদয়-রহস্যে সারদার নিজের চোখ দুটোও জলে ভরে ওঠে।

তবু নিজেকে সামলে নিয়ে সে বলে, “করলামই বা একটু তামাশা! করতে নেই ?”

পটলীর বোধ করি এক্ষণে খেয়াল হয় যে, তা চোখ দুটো শুধু দু’ফোটা জল ফেলেই ক্ষান্ত হয়নি। তাই সে দুটোকে নামিয়ে ফেলে এবার। আর কষ্টে গলার স্বর পরিষ্কার করে বলে, “আমি তো তোমার শত্রুর, আমাকে বিদেয় করে দাও না ? তুমি বাঁচ, আমিও বাঁচি।”

সারদা ঈষৎ বিষণ্ণ কৌতুকে বলে, “আমি না হয় বাঁচব, ভোর বাঁচবার হেতু ?”

“তোমার বৃকের পাথর হয়ে আর সংসারসূক্ত সকলের দয়ার পাত্র হয়ে থাকতে হয় না, সেই বাঁচান!”

সারদা আর একবার মুক হয়। দেখে নতুনবৌয়ের হেঁটমুণ্ডের অন্তরাল থেকে জল ঝরে ঝরে তার কোলের উপর জড়ো হয়ে থাকা ফর্সা ফর্সা ফুলো ফুলো দুখানি করপল্লবের ওপর পড়েই চলেছে।

স্তব্ধ হয়ে অনেকক্ষণ সেই দিকে তাকিয়ে থাকে সারদা, তার পর সহসাই আত্মস্থ হয়ে শান্ত দৃঢ়কণ্ঠে বলে, “চোখ মোছ, নতুনবৌ, আর কাঁদতে হবে না।”

“তোমার পায়ে ধরি দিদি, আমায় পাঠমহলে পাঠিয়ে দাও।”

“শোন কথা, আমি কি পাঠিয়ে দেবার কর্তা ?” সারদা হেসে ওঠে, “বলে আমার ওপরই হুকুমজারি হয়েছে—জনোর শোধ বিদেয়! সে যাক, বলি এত রূপযৌবন নিয়ে কেঁদে মরবি আর হেরে পালাবি কি লো ? লড়াই করে সতীনের কাছ থেকে বর কেড়ে নিবে নে ?”

“লড়াই-টড়াই আমি কিছু চাই না দিদি।”

“লড়াই চাস না! কি মুশকিল, তবে তো খয়রাত করতে হয়!” সারদা তেমনি বিষণ্ণ কৌতুকে বলে, “তুই দেখছি আমার সব মজা মাটি করে দিলি। লড়াই করতে বসলে জোরের পরীক্ষা হয়, দান-খয়রাত করতে গেলে যে বেবাক সবটাই তুলে দেওয়া ছাড়া গতি থাকে না।”

ব্যাকুল আবেগে উচ্চারণ করে নতুনবৌ।

“আমার কিছু চাই না দিদি।”

সারদা হাসে, “কিছু চাস না ? বরও চাস না ?”

“না।”

সারদা বলে, “কিন্তু জগতের কি নিয়ম জানিস, না চাইলে সব জিনিস মেলে চাইতে বসলেই হাতছাড়া! ... ইস্, কথা কইতে কইতে এমন খাসা তিলপিটুলি বেগুনভাজাগুলো নেতিয়ে গেল। ঝা, খেয়ে ফেল, মন ভাল হবে।”

“মেজঠাকুন্দা!”

রামকালী একখানা সরু খাতার উপর বৃকে পড়ে অশ্রুধারা তীর্থযাত্রার হিসেবের খসড়া করছিলেন, হঠাৎ রাসুর ছোট ছেলের এই ডাকে চমকে স্নেহকোমল স্বরে বললেন, “কি দাদা ?”

“মা বলছে, মা তোমার কাছে ভিক্ষে চাইবে।”

এ আবার কী অভূতপূর্ব কথা!

রামকালী বিমূঢ় দৃষ্টিতে তাকিয়ে দেখেন,

দরজার ওপাশে রাসুর বৌয়ের উষ্ণ হাত টের পান। প্রায় বিচলিত স্বরে বলেন, “কি বলছ দাদা, বুঝতে পারলাম না তো!”

এবার মাধ্যমের গুরুত্ব হারায়। মাধ্যমকে মাধ্যম মাত্র করে সারদা মৃদু কণ্ঠে বলে, “খোকন বল, মা বলছে কখনো কিছু চায় নি মা, বাড়ির বড়বৌ, একটা ভিক্ষে চাইছে—”

রামকালী ধারণা করেন, এ আর কিছু নয়, রাসুর দ্বিতীয় পক্ষ ঘটিত নাটক। নির্যাত সপত্নী-অসহিষ্ণু এই মেয়েটি সতীনকে তার পিড়ালয়ে পাঠানোর প্রস্তাব করতে এসেছে। বিরূপ চিন্তে গম্ভীর হাস্যে বলেন, “ভিক্ষেটা কি, সেটা না জানলে তো সাদা কাগজে দস্তখত করা যায় না বড় বৌমা! দেবার ক্ষমতা যদি আমার না থাকে!”

“খোকা বল, আপনি ইচ্ছে করলেই হয়।”

রামকালী যদিও রাসুর বৌয়ের এই অসমসাহসিকতায় শুদ্ধিত হন, তবু ঈষৎ চমৎকৃতও হন। হঠাৎ একটা অতি অসমসাহসী মেয়ের কথা মনে পড়ে গিয়ে মনটা শিথিল হয়ে যায়! বলেন, “মাকে বল দাদাভাই, ইচ্ছে করবার মত হলে অবশ্যই করব।”

“খোকা বল, আপনি তীর্থে যাচ্ছেন আমার মাকে সঙ্গে নিন।”

এ আবার কি কথা!

এ যে রামকালীর ধারণার অগোচর, স্বপ্নের অগোচর। এই কথা বলতে এসেছে রাসুর বৌ! মেয়েটা পাগল নাকি! তবে নাকি নিতান্তই হাস্যকর অলীক কথা, তাই ঈষৎ কৌতুকের সুরে বলেন, “তোমার মাকে নিয়ে যাই এত সাধ্যি কি আমার আছে দাদাভাই ? তুমি বড় হও, মাকে নিয়ে যাবে।”

“মেজঠাকুন্দা, মা বলছে তামাশা করে উড়িয়ে দিলে হবে না, মা সত্যি ভিক্ষে চাইতে এসেছে।”

রামকালী আর মাধ্যমকে গ্রাহ্য করেন না, বলেন, “বড় বৌমা, তোমার প্রার্থনাটা যে বড় অসম্ভব। আমি পুরুষমানুষ, কোথায় উঠব, কোথায় থাকব, কিভাবে ঘুরব—”

“মেজঠাকুন্দা, মা বলছে, মা কষ্ট করতে হারবে না। তোমার রান্না করা, বাসন মাজা—এর জন্যেও তো একটা লোক চাই। মা সব করে দেবে।”

“দাদাভাই, তোমার মা ছেলেমানুষ, সবটা বুঝতে পারছেন না। সম্ভব হলে আমাকে দুবার বলতে হত না। তোমার মাকে বল, বাড়ির বড়বৌ বলে আমার কাছে একটা আবদার করলেন, রাখতে পারছি না, এটা আমারও কষ্ট। আমি তার বদলে তাঁর নামে খাসে কুড়ি বিঘে ধানজমি লেখাপড়া করে দেব। তার আদায় থেকে উনি যা খুশি করতে পারবেন। আর তুমি যখন বড় হবে—”

“খোকা বল বাবা, বিষয়-সম্পত্তিতে মার কোন দরকার নেই।”

খাসে কুড়ি বিঘে ধানজমি!

এতেও একটু প্রলোভিত হল না মেয়েটা? আশ্চর্য তো! সত্যি বলতে কি, এ সংকল্প রামকালীর সহসা আজকের নয়। কিছুদিন থেকেই ভাবছিলেন তিনি, এই ধরনের একটা কিছু করবেন। ওই মেয়েটাকে তিনি যতই সাধারণ হিংসুটে মেয়েছিলে ভেবে আসুন, ওর সম্পর্কে কোথায় যেন একটু অপরাধবোধ তাঁকে হৃদয়ের গভীর স্তরে পীড়িত করত। তাই ভাবতেন ক্ষতি পূরণার্থে—

কিন্তু মেয়েটা বলে কি? বিষয়-সম্পত্তিতে তার দরকার নেই?

একটু চূপ করে থেকে বলেন, “তবে আর কি করব বল দাদাভাই! যাতে লোকে নিন্দে করতে পারে, এমন কাজ কি করে করা যায়!”

“মেজঠাকুরদা, তুমি তো লোকনিন্দেকে ডরাও না?”

“লোকনিন্দেকে ডরাই না!”

রামকালী যেন হঠাৎ অদ্ভুত অজানা একটা রহস্যের রাজ্যের সামনে এসে দাঁড়িয়েছেন। এরা সব রামকালীকে ভাবে কি? রামকালী সম্পর্কে রামকালীর অপরিচিত যে একটা জগৎ আছে, তাদের ধারণাটা কি? একটা কৌতুকের বিষয়ে স্বল্পবাক রামকালী আজ একটু বেশী কথাই বলে ফেলেন।

“লোকনিন্দেকে ডরাই না একথা কে বলে দাদু? ডরাই বৈকি। সত্যি নিন্দের কাজ করলে—” রামকালীও কথা সমাপ্ত করতে করতে ভাবেন—শেষ করছে গিয়ে থামেন। এই অবসরে এতক্ষণের নম্র আর মৃদু চাপা কণ্ঠস্বরটা প্রায় স্পষ্ট হয়ে ওঠে, “খোকা বল, আপনার যদি একটা দুর্গন্ধি মেয়ে থাকত, তাকে তীর্থে নিয়ে গেলে লোকে নিন্দে করত?”

রামকালী স্তব্ধ হয়ে যান!

অনেকক্ষণ চূপ করে থেকে বলেন, “আচ্ছা দাদু, তোমরা ভেতরে যাও। আমাকে একটু ভাবতে দাও।”

হ্যাঁ, ভাববেন রামকালী। অনেক কিছু ভাববেন। এইটুকু মেয়েটা কুড়ি বিঘে ধান জমির মোহ ভ্যাগ করে তীর্থে যেতে চায় কোন মানসিক অবস্থায় তা ভাববেন, আর ভাববেন মোক্ষদাকে সঙ্গে নিয়ে রাসুর বৌয়ের প্রার্থনাটা পূরণ করা যায় কিনা! মোক্ষদার হাত ভেঙেছে, পা-টা-তে মজবুত আছে। তার জীবনেও তো কখনো কিছু হয়নি। এ কর্তব্যটা করা উচিত ছিল রামকালীর।

রান্না-ভাঁড়ার ঘরের জীবগুলো সম্পর্কে এত বেশি করে কখনও ভাবেন নি রামকালী।

একটা মেয়ে তাঁকে মাঝে মাঝেই ভাবাত। অনেক দিন সে রামকালীর কাছ থেকে বিচ্ছিন্ন হয়ে আছে। আশ্চর্য হয়ে ভাবছেন রামকালী, কতদিন তার কথা ভাবি নি!

সে পাছে ভাবে বলে রামকালীর অসুখের খবর দেওয়া হয় নি। কিন্তু তীর্থযাত্রার খবর! সেটাও কি না দিলে চলবে?

॥ উনত্রিশ ॥

জ্বর জ্বর!

পঞ্চকাল কাটল।

উত্তরোত্তর বাড়ছে বৈ কমছে না। ক্রমশ বিকার ধরল। হাত মুঠো করে আফালন করছে রোগী, বিছানায় তেড়ে তেড়ে উঠছে। দুটো লোক দুদিকে ঠায় বসে আছে রোগীকে বিছানায় চেপে ধরে রাখতে।

আর একজন তো অবিরত পানাপুকুরের ঠাণ্ডা জল এনে কলসী কলসী ঢালছে রোগীর মাথায়। কবিরাজ এসে ওষুধ দিচ্ছেন বটে, কিন্তু যেভাবে মুখ প্যাঁচা করে আস্তে আস্তে ঘাড় নাড়ছেন, তাতে ওষুধ সম্পর্কে ভরসা বোধ করছে না কেউ।

এদিকে বাড়িতে রথ-দোলের ভিড়।

প্রথম প্রতিশ্রুতি-১২



পাড়ার লোকের যেন খেয়ে ঘুমিয়ে স্বস্তি নেই। তারা প্রতি মুহূর্তে চরম মুহূর্তের অপেক্ষায় হুমড়ি খেয়ে পড়ে আছে। নাটকের শেষ দৃশ্যটা পাছে ফসকায়! অবিশ্যি অহিতৈষী কেউ নয়। সকলেই নিরীহ নবকুমারকে ভালোবাসেন। তেমন তেমন কেউ ওর নামে পূজো মানত করেছে, “গা শেতল” হবার আবদার নিয়ে গঙ্গাজলের ঘড়ার মধ্যে পাঁচ কড়া কড়ি ফেলে রেখেছে, আর ওলাইচণ্ডীতলা থেকে নিত্য মায়ের চরণামৃত এনে যোগান দিচ্ছে।

বাঁড়ুঘো-গিন্ধীর ওই সবেধন নীলমগিটুকুর প্রাণের জন্য উদ্বেগ, উৎকর্ষার আর অন্ত নেই লোকের। তবু আশা যখন ছাড়তেই হচ্ছে, বিশেষ নাট্যমুহূর্তটিকে ছাড়বে কেন?

অতএব নিজের নিজের সংসারের রান্না-খাওয়া সংক্ষিপ্ত করে এ বাড়ির হাজরেটা বজায় রাখছে সবাই। তা ছাড়া প্রায় প্রত্যেকেই তো এক-একজন অভিজ্ঞ চিকিৎসক! সে চিকিৎসা বিদ্যা কাজে লাগাবার যখন সুযোগ পাওয়া গেছে, কাজে লাগাবে না?

প্রকৃতপক্ষে এখন কবিরাজী চিকিৎসা বাতিল হয়ে গেছে, পাড়ার গিন্ধীদের চিকিৎসাই চলছে। গতকাল নুটু স্যাকরার মার ব্যবস্থাপনায় পেটে পচা পুকুরের শ্যাওলা প্রলেপ দেওয়া হচ্ছিল। কারণ নুটুর এক ভাসুরপোর নাকি ঠিক এই অবস্থায় ওই দাওয়াই অব্যর্থ হয়েছিল।

না হবেই বা কেন?

কথায় বলে, “মুড়ি আ ভুঁড়ি।” দুটোর মধ্যে দূরত্ব বেশ খানিকটা থাকলেও সম্বন্ধ যে অবিচ্ছেদ্য। একজনকে ঠাণ্ড করতে পারলেই আর এক জন ঠাণ্ড হতে বাধ্য। তাই পেটে শ্যাওলার প্রলেপ চাপিয়ে চাপিয়ে তাকে ঠাণ্ড করে আনবার চেষ্টা চলছিল—মাথায় চড়ে ওঠা রক্তকে চড় চড় করে নামিয়ে আনতে।

কিন্তু নুটুর মার কপাল! অত বড় অব্যর্থ প্রয়োগটাও বিফল হল। রোগী বিছানায় মাথা ঘষটাতে শুরু করল।

আজ তাই হরি ঘোষালের গিন্ধীর দাওয়াই চলছে। গায়ের তাপ “ধান দিলে খৈ ফুটেছে,” তাই ঘোষাল-গিন্ধী বিধান দিচ্ছেন সপসপে করে ভেজানো ন্যাকড়ায় রোগীকে আট্টেপিটে মুড়ে তার উপর জোর জোর করে পাখার বাতাস লাগাতে। সেই বাতাসে ন্যাকড়া শুকিয়ে উঠলেই আবার তাতে জলের আছড়া।

রোগী জ্ঞানশূন্য, অতএব সেবিকারা স্বাক্ষরবিন্যাসে ভয়শূন্য। ঠিক এই অবস্থায় আর এই এই লক্ষণে কার জানাশোনা কটি রোগীর স্বপ্নপ্রাপ্তি ঘটেছে তারই হিসেবনিকাশের সঙ্গে সঙ্গে পাখা চলছিল উদ্দাম বেগে। নীলাম্বর বাঁড়ুঘো অনেকক্ষণ বসে থাকতে থাকতে হঠাৎ “বুক কেমন করছে” বলে পাশের ঘরে গিয়ে শুয়েছেন, সদু তাঁর চোখে মুখে জল দিচ্ছে, এমন সময় এলোকেশীর গলায় মরাকান্না উঠল।

যাঁরা খোদ রোগীর ঘরে বসে তাঁরা বুঝলেন, মাগী আর পারছে না, চেপে থেকে থেকে বুক ফেটে যাচ্ছে!

যাঁরা এ বাড়ির বাইরে আছেন, তাঁরা উঠি তো পড়ি, পড়ি তো মরি করে ছুটে এলেন। নীলাম্বর “যাঃ সন্ধানশ হয়ে গেল” বলে চৌকি থেকে মড়মড়িয়ে নামতে গিয়ে হুড়মুড়িয়ে পড়ে গেলেন, আর সদু তাঁকে তোলার পরিবর্তে চলে গেল ও-ঘরে, তবে একটু দাঁড়িয়েই চলে এসে সামুনা দিতে বসল মামাকে।

এলোকেশীর কাছে যাওয়া কর্তব্য ছিল, কিন্তু কোন্ কর্তব্যটা করবে? সে তো আর চতুর্ভূজ্য নয়?

এলোকেশী টেকিঘরে বসে কাঁদছেন।

সমাগতা মহিলারা সেইখানেই জমায়েত হলেন এবং এই হঠাৎ-কান্নার কারণ অবগত হয়ে গালে হাত দিয়ে বসে পড়লেন।

কয়েকজন এ কথাও বললেন, “পায়ের ধুলো দাও নবুর মা, তোমার একটু পায়ের ধুলো দাও, মাথায় ঠেকাই, যদি তাতে তোমার মতন সহ্যশক্তি জন্মায়। ওই দজ্জাল বৌ নিয়ে এই অবধি ঘর করছ তুমি!”

জ্ঞানেকা আক্ষেপ করে বলেন, “আমি ভাবছিলাম আজ ভরস্কোয় তোমার বৌকে নিয়ে চণ্ডীতলায় গিয়ে মায়ের পায়ে তার শাঁখা-সিদুর জমা দিয়ে ‘এয়োৎ বাঁধা রাখা’র মানুতি করে আসব। তোমার তো মাথার ঠিক নেই, পাঁচজনে না দেখলে চলবে কেন? কিন্তু যে বৌ তোমার—বলতে তো ভরসা হচ্ছে না!”

অপরা ফিসফিস করে, “বলো না দিদি, বলো না। আমি বলি নি ভেবেছ ? হাত বাঁধার কথা বলেছিলাম। কিন্তু সদুর কাছে নাকি বলেছে নবুর বৌ, আমি ডান হাতের বদলে বাঁ হাতে ভাত খেলে আমার স্বামীর পরমায়ু ফিরবে এ কথা আমি বিশ্বাস করি না। উচিতমত ওষুধ না পড়লে কি অসুখ সারে ?”

“অ্যা! এই কথা বলেছে ?”

“তাই তো বলল সদু। বলল, ওই নিয়ে আর বৌকে পেড়াপেড়ি করতে যেয়ো না খুড়ি, মানুষের মান-মর্যাদা তো রাখতে জানে না। হয়তো তোমার মুখের ওপরই ‘না’ বলে বসবে।”

“সাধে কি আর বলছি, নবুর মার পাদোদক খেতে হয়!”

কথাটা এলোকেশীর কানে যায়। তিনি বুকটা আর একবার চাপড়ে, আর একবার সেই চিরপরিচিত সুরের কান্নাটি কেঁদে ওঠেন।

“ওরে নবু রে—ওরে আমার সোনার গোপাল রে, তুই থাকতেই তোর বৌ আমাকে কী পায়ে দলছে দ্যাখ রে!”

যারা রোগীর সেবা করছিলেন, তাঁরা সেবা ফেলে ছুটে আসেন।

হলটা কি ?

এই দুঃসময়ে “পাহাড়ে” বৌ কি না কি করে বসল!

তা সে যা করে বসেছে তা চরম!

শান্তড়ীর মুখের ওপর বলেছে, “মানুষটাকে দশজনে মিলে কুপিয়ে কুপিয়ে না কেটে একেবারে মা চণ্ডীর কাছে বলি দিয়ে দিলেই হত! মানুষটাও উদ্ধার পেত, দশজনেরও খাটুনি কমত!”

স্বামীর কথা নিয়ে যে বৌ এমনি করে গলা তুলে শান্তড়ীর সঙ্গে কথা বলতে পারে, সে বৌ তা হলে না পারে কি!

“ঝেঁটিয়ে বিদেয় করে দাও, ঝেঁটিয়ে বিদেয় করে দাও—” চাটুযো-গিন্গী দৃষ্টকণ্ঠে বলেন, “ওই ডাকাতির আওতাতে-আওতাতেই ছেলে তোমার তুষ হয়ে গেছে নবুর মা! নইলে অমন ডবকা ছেলে, হঠাৎ এমন পিচাশ পাওয়া রোগেই বা ধরবে কেন!”

“তবু আমার নবু ওই বৌ-অন্ত-প্রাণ চাটুযো দিদি! বৌয়ের ভয়ে কাঁটা!”

দুটো অবস্থার মধ্যে সামঞ্জস্য না থাকলেও কথাটা বলেন এলোকেশী।

“তা ভগবান তেজ ডাঙছেন! অবিশ্যি তোমার মাথায়ও মুণ্ডর মারছেন! কিন্তু ওই তো বিধাতার বিধান। একের পাপে আরের দণ্ড ঠিকই এও বলব, ওর দুঃখে শেয়াল-কুকুর কাঁদবে! পথের শতুর আঁহা করে যাবে!”

এঁরা অধিকাংশই এলোকেশীর স্বাতক। গোপনে সুদী কারবার করে থাকেন এলোকেশী। ওঁদের অনেকেই সোনাটা রূপোটা এলোকেশী সিন্দুকে পচছে।

অবশ্য পাড়ায় স্পষ্টবক্তা ন্যায়দর্শী একেবারে নেই তা নয়। কিন্তু তেমনদের সঙ্গে এলোকেশী ভাব চটিয়ে রেখেছেন। তবু নবকুমারের মরণ বাঁচন অসুখ শুনে দেখতে আসছেন তারা, ন্যায়্য কথা দু-একটাও বলেও যাচ্ছেন।

যেমন ভজুর পিসি বলে গেছিলেন, “হ্যাঁগা, বৌয়ের বাপের বাড়ি খবর দিয়েছ ?”

এলোকেশী বাঁকা মুখে জবাব দিয়েছিলেন, “কেন, সেখানে খবর দিয়ে আবার কি হবে ?”

“ওমা, তাদের হল গে জামাই! মুখের ওপর বলছি না, তবে ভগবানের মারের ওপর তো কথা নেই! একটা এদিক-ওদিক কিছু হয়ে গেলে জবাবটা কি দেবে ?”

“জবাব!”

এলোকেশী মনোকষ্ট ভূলে উদ্দীগু হয়ে উঠেছিলেন, “কেন, আমি কি তাদের উঠানে বাস করি ? আমি কি তাদের জমিদারির প্রজা ? আমি কি তাদের স্বাতক ? আমি কি কাঠগড়ায় আসামী যে জবাবদিহি দিতে হবে ? কি বলব, এখন আমার দুঃসময় চলছে তাই—নইলে তোমায় উচিত কথা শুনিয়ে দিতাম কায়ত-ঠাকুরঝি!”

সনতের জেঠী একদিন বলেছিলেন, “নবুর স্বস্তর তা শুনেছি নামকরা কবরেজ, জামাইয়ের অসুখের খবর দিচ্ছ না কেন ?”

এলোকেশী গম্ভীর কণ্ঠে জবাব দিয়েছিলেন, “আমার তো দশটা পাইক-পেয়াদা নেই দিদি যে হুট বলতে খবর দেব। বলে ছেলের ব্যামোতেই চোখে সরষে ফুল দেখছি। বেশ তো, তোমরা পাঁচজন আছ, খবর দাও না। বলে পাঠাও, ‘এস তুমি। তোমার জামাইয়ের উচিত চিকিৎসা করে যাও’।”

এরপর আর কে কথা কইবে ?

কিন্তু এলোকেশী কি সত্যিই এত মন্দ যে নিজের ছেলের কল্যাণ-অকল্যাণ দেখেন না ?
না, তা নয় ।

আসলে এলোকেশী এ বিশ্বাস রাখেন না বৌয়ের বাপ ধনুত্তরী! তা ছাড়া এটাও মনের মধ্যে কাজ করছে, যদি সত্যিই তা হয়, বৌয়ের বাপের গুণপনাতেই যদি তাঁর ছেলে সেরে ওঠে, সে অপমানের জ্বালা এলোকেশী জুড়োবেন কিসে ?

আর বৌও কি তা হলে আরও সাপের পাঁচ-পা দেখবে না ? ছেলের প্রাণের জন্য শত-সহস্রবার তেত্রিশ কোটি দেবতার চরণে মাথা খুঁড়ছেন এলোকেশী, কিন্তু বৌয়ের তেজ-দপটা কিছু খর্ব হোক, এটাও প্রার্থনা । দুটোর সামঞ্জস্য বিধান হয় না, কারণ মরা স্বামী বেঁচে উঠলে তো দব্দবার আর শেষ থাকে না মেয়েমানুষের । তেমন হলে বড় কেউ মায়ের পুণ্যবলের কথা তোলে না, তোলে পরিবারের এয়োতের জোরের কথা!

আবার সেই বেঁচে ওঠাটাই যদি বৌয়ের নিজের বাপের গৌরবে হয় ? উঃ রক্ষে করো ! নবু তার নিজের বাপের পুণ্যে তরবে । নিত্য একশ আট তুলসী দেওয়া কী ব্যর্থ হবে!

হায়, এলোকেশীর ছেলের একশ বছর পরমাযু হয়ে যদি বৌয়ের হাড়ির হাল হওয়া সম্ভব হত! তা হবার উপায় নেই । এলোকেশীর প্রাণের পুতুলই যে বৌয়ের অহঙ্কারের মাটি ।

কিন্তু সত্য এ নাটকের কোন্ অঙ্কে ?

সে কি এবারও স্বামীসেবার পুণ্য অর্জন করে না ?

নাঃ, সে পুণ্য অর্জনের সৌভাগ্য তার হয় না । কারণ গুরুজনদের সামনে গিয়ে তো আর সে বরের গায়ে-পায়ে হাত বুলোতে বসবে না । ঘরে ঢুকবেই বা কোন্ লজ্জায়!

রাত্রে ? সে তো স্বপ্ন-শাশুড়ী দুজনে ছেলেকে বুক দিয়ে আগলে পড়ে থাকেন । আর সদু তাঁদের খিদমদগিরি করে । সেখানে সত্য কে ?

তা ছাড়া তার কোলে বাচ্চা ছেলে । ছ মাসও হয় নি । আর তার গলাতেই সংসার ।

স্বামীসেবার একটি অংশ তার ভাগে আছে । সেটা হচ্ছে ঔষধের অনুপান প্রস্তুত । বহুবিধ জিনিস নিয়ে ছাঁচা, বাটা, গুঁড়ানো, সেক করা ইত্যাদিতে অনেকটা সময় ব্যয় হয় তার ।

কবরেজ আবার ওষধে ফল হচ্ছে না দেখে অবিরতই অনুপানের ত্রুটি আবিষ্কার করছেন! তেজী সত্য এসময় শুকনো চোখে ঠায় খাড়া থাকে । শুধু রান্নাঘরের কোণে যখন একা মুখ নিচু করে কাজ করে, আর রাত্রে যখন ছেলে দুটো ঘুমিয়ে পড়ে, তখন বাঁধমুক্ত করে অশ্রুর সাগরকে ।

নবকুমার যদি সত্যিই না বাঁচে!

তোলপাড় হয়ে ওঠে আকাশ পাতাল পৃথিবী । যে মানুষটা সত্যর মনের জগতে একটা অবোধ অজ্ঞান নাবালকের দলে গণ্য ছিল, সে যে তার এত বড় আশ্রয় এ কথা এখন টের পেল সত্য! যখন সে মানুষটা যেতে বসেছে!

সত্য কেন তাকে কেবল বকেই এসেছে! কেন শুধুই ভালোবাসে নি ? কেন কেবল হেসে কথা বলে নি ?

ঠাকুর, ওকে এবারের মত বাঁচিয়ে দাও, সত্য ওকে শুধু ভালবাসবে । ও বোকামি করুক, ভীষণতা করুক, ছেলেমানুষি করুক, কোন দোষ ধরবে না সত্য ।

কিন্তু ও কি বাঁচবে!

মাকে অবহেলা করেছিল সত্য, মা বাঁচেন নি । আর স্বামীকে অবহেলা করে পার পাবে!

তখন না হয় বুদ্ধি ছিল না, মা কী বস্তু বোধ জন্মায় নি । কিন্তু এখন ? এখন কী জবাব আছে ?

সারারাত জেগে ঠায় বসে থাকে সত্য কান খাড়া করে । হঠাৎ বুদ্ধি কোন সময় সেই ভয়ঙ্কর শব্দটা ওঠে । মাঝে মাঝে পা টিপে টিপে গিয়ে এ-জানলা ও-জানলা করে মরে । কিন্তু ব্যর্থ হয়ে ফিরে আসে । রাত্তিরে রুগীর ঘরের জানলা কে খুলে রাখবে ? একে তো "সান্নিপাতিক জ্বরবিকার", হাওয়া লাগলেই বিপদ । তা ছাড়া রাত্তিরে জানলা খোলা দেখলে অপদেবতায় উঁকি মারবে না ? হাওয়া বাতাস লাগবে না ? আর ভাবতে বুক কাঁপলেও না ভেবে উপায় নেই, পথ খোলা দেখলে যমদূত চুকে পড়বে না ? এলোকেশী কি সেই আসার পথ খোলা রাখবেন ?

অতএব সত্য কানকে তীক্ষ্ণ থেকে তীক্ষ্ণতর করে তোলে ।

কিন্তু এতেই কি সত্যের সকল কর্তব্য শেষ হয়ে গেল ? আর কোন করণীয় নেই তার স্বামীর সম্পর্কে! ওঁরা মা-বাপ, তা ঠিক। কিন্তু এঁরা যদি অবোধ হন ? তবে সত্যই বা কি কম অবোধ! এক মাস হতে চলল জ্বর চলছে নবকুমারের, দিন দিন বাড়ছে বৈ কমছে না, অথচ উচিতমত একটা ওষুধ পড়ল না তার পেটে!

আর সত্য নিশ্চেষ্ট হয়ে বসে আছে!

সত্যের ভগবান কি এর পরও ক্ষমা করবেন সত্যকে ?

এলোকেশীর সেই কান্নার পর এলোকেশীকে সাধুনা দিচ্ছিলেন মহিলারা, “কখনো কোন দোষ করোনি, ঘাট করো নি, কারুর অহিত করো নি, পুত্রশোকের জ্বালা তোমায় কেন দেবে ভগবান ?”

আবার সু-পরামর্শ দিচ্ছিলেন পরক্ষণে, “বলতে নেই, ছেলের যদি কিছু হয় নবুর মা তো তুমি একদোর দিয়ে ছেলেকে বিসর্জন দেবে, আর দোর দিয়ে ওই হারামজাদীকে গলাধাক্কা দিয়ে বার করে দেবে। যে বৌ শাওড়ীকে অত কথা বলে—”

“ও বাতাসীর মা, শুধু কি ওই কথা বলেছে! বলি তবে শোন! রাতে বাইরে যাব বলে হঠাৎ দোর খুলে দেখি ঝপ করে কে দোরোরের কাছ থেকে সরে গেল! ভয়ে হাঁকপাক করে চেষ্টায়ে উঠেছি। কে কে বলে চেষ্টায়ে উঠে দেখি, না আমার অবতার! রাগের চোটে মুখ দিয়ে কু-কথা বেরিয়ে গেল, বললাম, দোরের গোড়ায় কি করছিলি রে হারামজাদী ? তুক না তাক ? বলল কি জান!—ছেলে মিত্যুশয্যায়, তবু তোমার জিভের ধার কমে না ? কেমন মা তুমি ?”

শ্রোত্রী মহিলা সঙ্গে সঙ্গে সবলে নিজের গালে ঠাই ঠাই করে দুটো চড় কষিয়ে বলে ওঠেন, “ওমা আমি কোথায় যাব! ও নবুর মা, সে বৌয়ের মুখ তুমি নাথি দিয়ে ভেঙে দিলে না ?”

এই শান্তিমূলক ব্যবস্থার জবাবে “উদারচরিতানাম” নবুর মা কী বলতেন কে জানে, সহসা অন্য এক ঝড় এসে লাগল। দেখা গেল গোয়ালের পাশের দরজা ঠেলে ঢুকে নাপিত-বৌ চুপি চুপি রান্নাঘরের দিকে এগোচ্ছে। অর্থাৎ সত্যের সন্ধানে যাচ্ছে।

বৌয়ের সঙ্গে নাপিত-বৌয়ে কিসের শলা! মুহাম্মান এলোকেশী গলা তুলে হাঁক দিলেন, “কোথায় যাওয়া হচ্ছে ?”

চতুর নাপিত-বৌ বুঝল ধরা পড়েছে। জন্তুএব মিছে কথা বলে চাপা না দিয়ে এদিকে এসে চুপি চুপি বলে, “বৌমা যে আমায় তেনার বাপের কাছে পাঠিয়েছিল গো, তার বার্তাটা দিতে—”

কথা শেষ করতে পারে না সে। এলোকেশী রুদ্ধশ্বাসে বলেন, “কার কাছে পাঠিয়েছে ?”

“ওনার বাপের কাছে গো। ভারী মস্ত কবরেজ তো! পত্তর লিখে আমার হাত দে পাঠিয়েছিল জামাইরে বিত্তান্ত জানিয়ে। এসে চিকিচ্ছে করতে—”

“তুই সে-ই কথা আমায় না জানিয়ে, স্বাধীনে চলে গিয়েছিলি ?”

নাপিত-বৌ নরম হবার মেয়ে নয়। যেই দেখল ধমকের পথ ধরেছে গিন্নী, সেও সতেজে বলে, “স্বাধীন পরাধীন বুঝি নে! বৌ-টা সোয়ামীর ভাবনায় ধড়ফড়াচ্ছে, দেখে মায়া হল—”

“মায়া! মায়া হল ? তুই আর ভুতের কাছে মামদোবাজী করতে আসিস নে নাপতে-বৌ! বিনি মজুরিতে তুই পরের জন্যে একটা হাই তুলিস না, আর তুই যাবি মায়ায় পড়ে—”

“বিনি মজুরিতে, তা তো বলি নি—” নাপিত-বৌ বেজার মুখে বলে, “তা করলে আমার চলবেই বা কেন ? নেব্য মজুরি দিয়েছে, গিয়েছি—”

“দিয়েছে! বৌ তোকে নেব্য মজুরি দিয়েছে ?” এলোকেশী ক্ষেপে ওঠেন, “সে কোথায় পাবে শুনি ?” তা হলে সে আমার বাস্ত্র থেকে চুরি করতে শিক্ষে করছে! আর তুই তার মন্ত্রী হয়ে—”

সহসা পিছনে বজ্রপাত হয়।

এতগুলো গিন্নী সম্বন্ধে অবহিত মাত্র না হয়ে সত্য বলে ওঠে, “নিচু ঘরের মতন কথা বোলো না। নাপিত-খুড়ীকে আমি রাহাখরচ বলে আমার মলজোড়াটা দিয়েছি।”

মলজোড়াটা! পাথর হয়ে যান মহিলারা।

শাওড়ীকে না বলে-কয়ে গায়ের গহনা দানছত্র! মুহর্মুহ মূর্ছা গেলেও বোধ করি এই প্রবল আঘাতের বেগ রোধ হবে না।

এত বড় দুঃসাহস কেউ কল্পনাও করতে পারেন না।

এলোকেশী বুকে হাত চাপড়ে বলে ওঠেন, “দ্যাখ, তোমরা দ্যাখ! দেখে বল আমায় ধরে ঝ্যাটা মারবে কিনা, বৌকে আমি নিন্দে করি বলে! ওরে বাবা রে, আমি কি করব রে—”

সত্য সেদিকে দৃকপাত না করে নাপিত-বৌয়ের দিকে তাকিয়ে শান্তভাবে বলে, “বাবা কি চণ্ডীমণ্ডপে ছিলেন ?”

“ওমা শোন কথা!” নাপিত-বৌ গালে হাত দিয়ে বলে, “তিনি আবার কই ? তেনার হাতে নাকি কোন মরণ-বাঁচন রুগী, তাকে ফেলে আসতে পারল না। ওষুধ পাঠিয়ে দেছে। এসেছে তোমার বড় ভাই—তার হাতেই ওষুধ আর তোমার নামে পত্তর আছে। ... ওমা ও কি ও কি, বৌ যে পড়ে গেল গো! ওমা ই কী কাণ্ড!”

প্রবল একটা কোলাহল উঠল বাঁধ হারিয়ে ফেলা সেই ছড়িয়ে পড়া নদীটুকু ঘিরে।

“ভিরমি লেগেছে... ভিরমি! ভিরমি না ভিটকিলোমি... মস্ত বড় একটা অপকন্ম করে ফেলে এখন ধরা পড়ে—।”

নদীকে ঘিরে চেউ ওঠে অসংখ্য।

দীক্ষাগুরু নিপাতে তিন দিন অশৌচ শাস্ত্রীয় বিধি।

বিদ্যারত্ন রামকালীর তথাকথিত মন্ত্রদীক্ষার গুরু ছিলেন না, আর রামকালীও ওই ধরনের শাস্ত্রীয় বিধি যে ঠিক অক্ষরে অক্ষরে পালন করেন তা নয়। তবু বিদ্যারত্নের মৃত্যুর পরের দিন রামকালী সমস্ত কাজকর্ম পূজাপাঠ পরিত্যাগ করে স্তব্ধ হয়ে বসে ছিলেন বারমহলে।

তিন দিন ঔষধরুপী নারায়ণে হস্তক্ষেপ করবেন না, শাস্ত্রপাঠ ইত্যাদি করবেন না, অনুগ্রহণ করবেন না।

বিগত কয়েকদিন রোগীর বাড়িতে দিনে রাত্রে যমের সঙ্গে যুদ্ধ করে পরাজিত হয়ে ফিরে এসেছেন। মুখে সেই পরাজয়ের কালি-মাখা ছাপ। চিন্তা করছেন এই অবস্থায় জামাত-গৃহে যাওয়ার কোন অর্থ হয় না। কারণ চিকিৎসা করা থেকে যখন বিরত থাকতে হবে। ঔষধ যখন স্পর্শও করবেন না। মনে করছেন আগামী পরশ স্নানস্তব্ধির পর—

চিন্তায় বাধা পড়ল।

দেখলেন তাঁর পালকি ফিরছে। অর্থাৎ হয় রাসু নয় রাসুর খবর। রাসুকে বলে দিয়েছিলেন, সত্য উদ্ভিগ্ন হয়ে খবরটা দিয়েছে বটে তবে যথার্থই রোগী কঠিন কিনা সেটা রাসু অনুধাবন করে শীঘ্রমধ্যে হয় নিজে ফিরে আসবে, নয় পালকি পাঠিয়ে দিলে ঘটনার গুরুত্ব জানিয়ে দেবে।

ঈষৎ কম্পিত বক্ষে অপেক্ষা করেন রামকালী, পালকি শূন্য না পূর্ণ দেখা পর্যন্ত।

না, শূন্য নয়।

রাসু নামছে। যাক ঈশ্বর রক্ষা করেছেন। রাসু এসে নতমুখে প্রণাম করতে উদ্যত হতেই রামকালী পিছিয়ে গিয়ে বলেন, “থাক থাক, এ সময় প্রণাম নিষেধ। কি রকম দেখলে ?”

রাসু আস্তে আস্তে মাথা নেড়ে বলে, “ভাল নয়।”

ভাল নয়!

সহসা রামকালীর মনশক্ষে একটা মূর্তি ভেসে ওঠে। নিরাভরণ শুভ্র মূর্তি। শিউরে ওঠেন রামকালী, নিস্তেজ স্বরে বলেন, “ঔষধটায় ফল হল না ?”

“ঔষধ প্রয়োগ করা হয়নি—” রাসু জলদগম্বীর স্বরে বলে, “সত্য ফেরত দিয়েছে।”

‘ফেরত দিয়েছে ?’

সত্য রামকালীর ঔষধ ফেরত দিয়েছে! রাসু ওই দিশেহারা মুখের দিকে না তাকিয়েই হাতের পেটিকাটি আস্তে নামিয়ে রেখে বলে, “হ্যাঁ। আপনার পত্র নেয় নি, পড়ে নি।”

রামকালী ব্যাকুলভাবে বলেন, “তোমার সঙ্গে দেখা করতে দেয় নি ?”

“না, না, তা দিয়েছে। সত্যও অসুস্থ ছিল। আমি গিয়েছি মাত্র, ঠিক সেই সময় হঠাৎ অচৈতন্য হয়ে পড়েছিল নাকি। পরে সুস্থ হয়ে আমার সঙ্গে দেখা করে বলল, বাবার যখন আসা সম্ভব হল না, চিঠি থাক বড়দা, ও আর পড়ে কি করব! আর ওষুধও তুমি ফিরিয়ে নিয়ে যাও। আমার অদৃষ্টে যা আছে তাই হবে। যদি সতীমায়ের কন্যে হই, সেই পুণ্যেই আমার শাখা লোহা বজ্রর হয়ে থাকবে।”

জীবনে বোধ করি এই প্রথম রামকালী হতবাক হয়ে তাকিয়ে থাকেন, কথা খুঁজে পান না। এরপর কি আর “স্নান-শুদ্ধ” হয়ে যাত্রা করবেন রামকালী, সত্যর কথা অবোধের কথা ভেবে ?

তা সেই অবোধ সত্য তো তাহলে একথাও বলে বসতে পারে, “আবার তুমি এলে কেন বাবা, তোমার ওষুধ যখন খাওয়াচ্ছি না!”



এ তন্ত্রাটে এ ইতিহাস এই প্রথম।

সায়ের ডাক্তার ডাকার ইতিহাস।

ভবতোষ মাস্টার, নিতাইচরণ আর নীলাধর বাঁড়ুয্যের কুলমজানি পুতবৌ, এই তেরোম্পর্শের যোগে এ ইতিহাসের সৃষ্টি। খবর শুনে যে যেখানে ছিল সে সেখানেই দাঁড়িয়ে পড়ল, যে যে বয়সে ছিল সে সেই বয়সেই রয়ে গেল।

বাঁড়ুয্যের লক্ষীছাড়া রণচণ্ডী বৌয়ের গুণপনা জানতে কারও বাকী ছিল না, শুধু ভেবে পেত না বৌকে ওরা এখনো ঠাই কেন দিচ্ছে! গলাধাক্কা দিয়ে তাড়িয়ে কেন দিচ্ছে না!

বলাবলি করছে সবাই, ভেতরে কোনও রহস্য আছে..... বাপের এক মেয়ে তো! আর বড় মানুষ বাপ! নির্ঘাত বাপ কোন কড়ার করে বিয়ে দিয়েছে!... বৌকে বাপের বাড়ি খেদিয়ে দিলে বোধ করি সেই বামুন বদিয়ার বিষয়সম্পত্তিগুলো নবা পাবে না। তা নয় তো, সমস্যা সমাধানের সব চেয়ে সোজা উপায়টা ত্যাগ করে বাঁড়ুয্যে-গিন্নী গালাগালি শূলোশূলি বুক-চাপড়াচাপড়ির ঘুরপথ ধরে মনের ঝাল মেটায় কেন!

বৌ বিদেয় করে দেওয়ার নাটকটা বার বার ঠিক জমে ওঠার মুহূর্তেই ভেঙে গিয়ে গিয়ে ইদানীং সবাই হতাশ হয়ে গিয়েছিল। এবং নিত্য নতুন একটা ডেউয়ের যোগানদার হিসাবে সত্যকে বেশ এক রকমের পছন্দই করতে শুরু করেছিল।

আলোচনার একটা বড় খোরাক, আপন আপন ঘরের বৌ-ঝিকে সুশিক্ষা দেবার সুবিধার্থে একটা কুদৃষ্টান্ত, এটাও একটা লাভের অঙ্ক বৈকি।

কিন্তু নবুর জ্বরবিকারে পড়া অবধি নবুর বৌয়ের সমালোচনায় উপযুক্ত ভাষাও খুঁজে পাচ্ছিল না কেউ। বেদে পুরাণে, যাত্রা নাটকে এমন জাঁহাজ্জি মেয়েমানুষ কেউ কখনো দেখে নি, শোনে নি।

কাজেই ভাষাও সৃষ্টি হয় নি ওর জন্যে।

তবু এতদূর বুঝি কেউ দুঃস্থপেও কল্পনা করে নি। বৌ নাকি নবুর বন্ধু নিতাইয়ের সঙ্গে আড়ালে দেখাসাক্ষাৎ করে গলার দশভরির হারিপাছা বিক্রী করিয়ে, ভবতোষ মাস্টারকে দিয়ে ব্যবস্থা করে কলকাতা থেকে সায়ের ডাক্তার আনিচ্ছে!

আবার ভবতোষ মাস্টারের সঙ্গেও কথা করেছে!

সাহেব ডাক্তারের চিকিৎসায় নবু বাঁচুক আর মরুক সেটা এখন চিন্তনীয় বিষয় নয়, চিন্তনীয় হচ্ছে—বাঁড়ুয্যে সম্পর্কে অতঃপর কিংকর্তব্য!

ব্যাপারটা তো আর এখন গিন্নীদের এলাকায় নিবন্ধ নেই, সমাজের মাথার মণি পুরুষদের মাথা টলিয়েছে। নবুর বৌ শাওড়ীর সঙ্গে গলা তুলে কৌদল করে, শ্বশুরের সামনে কথা করে বসে, অথবা দজ্জালজনোচিত আরও বহুবিধ অকাণ্ড করে, এ তাঁরা এযাবৎ গৃহিণী মারফৎ শুনে এসেছেন, কিন্তু তাতে বৌটা সম্পর্কে বিরক্ত হওয়া ছাড়া আর কিছু করার ছিল না।

কিন্তু এখন আর “ময়েলী কাণ্ড” বলে উড়িয়ে দেওয়া চলে না। এখন জাত যাওয়ার প্রশ্ন উঠেছে। হতে পারে বাঁড়ু য্যে কর্তা সমাজের মাথা, কিন্তু মাথা বলেই তো আর সবাইয়ের মাথা হাতে কাটবার আবদার চলে না?

‘বাগদিনীর ছোঁয়াচ’টা হাসা-হাসির মধ্যে দিয়ে একরকম মেনে নেওয়া হয়েছে, আর ওটা এমন সৃষ্টিছাড়া নতুনও কিছু কথা নয়, কিন্তু ঘরে দোরে যদি সাহেব ঢোকে, ঘরের বৌ যদি পরপুরুষের সঙ্গে কথা কয়, সেটা মেনে নেবে সমাজ এত নখদস্তহীন হয়ে যায় নি!

চণ্ডীমণ্ডপে বৈঠক বসে এবং পাঁচ মাথা এক হয়ে এই স্থিরীকৃত হয়, প্রথমে নীলাধর বাঁড়ুয্যেকে চাপ দেওয়া হবে পুতবৌকে ত্যাগ করবার জন্যে, তারপর যদি সে তাতে রাজী না হয়, বা না পেরে ওঠে, অবশ্যই পতিত করতে হবে নীলাধরকে।

সমাজে বাস করা তো আর ছেলেখেলা নয়। ওই মুমূর্ষু রোগীটা সত্যিই যদি সাহেব ডাক্তারের ওষুধ খেয়ে বাঁচে, বাঁচতেও পারে, ওই লালমুখোদের ওষুধে ভেলকি খেলে শোনা যায়, ঈশ্বর করুন বাঁচুকই, ওকে একটা অঙ্গ-প্রায়শ্চিত্ত করিয়ে মহাপ্রসাদ খাওয়াতেই হবে।

আর ওই ভবতোষ মাষ্টারটা!

ওটাকে জলবিছুটি দিয়ে গ্রামের থেকে বার করে দেবার কথা, কিন্তু শয়তানটা ডাক্তারের সঙ্গেই গট্ গট্ করে গাড়িতে গিয়ে উঠে কলকাতায় লম্বা দিল!

ঘোড়ার গাড়িতে চড়ে এসেছে ডাক্তারের সঙ্গে!

তা ওর আর বাস ওঠাবার প্রশ্ন কোথায়, নিজেই তো প্রায় বাস উঠিয়ে কলকাতায় গিয়ে বাসা বেঁধেছে। পিসিটা আছে, তাই কালেকশ্বিনে আসে!

আসামী বলতে হাজির শুধু নিতাইটা।

তা আপাতত ওকেও খুঁজে পাওয়া যাচ্ছে না। সাহেব ডাক্তাররূপী আগুনটি ল্যাঞ্জে বেঁধে এনে লক্ষ্মাকাণ্ড ঘটিয়ে সরে পড়েছে।

এখন আগুনের কাজ আগুন করছে।

আগে ঘুণাক্ষরে কেউ টের পায় নি।

কোন ফাঁকে যে এসব যোগাযোগ করেছে সত্য, ঈশ্বর জানেন! গ্রামের এত জোড়া চোখের ওপর দিয়ে ভানুমতীর খেল দেখিয়ে দিল!

লোকে দেখল গ্রামের পথে ঘোড়ার গাড়ি।

নীলাশ্বর দেখলেন সে গাড়ি তাঁর দরজায় থামল। আর তা থেকে নামল এক বাঘা সাহেব।

বুকের রক্ত হিম হয়ে গেল নীলাশ্বরের। সম্ভেহ নেই এ গাড়ি কালেক্টরের বা ম্যাজিস্ট্রারের, নিশ্চয় কোন শত্রু নীলাশ্বরের নামে কিছু লাগিয়ে-ভাঙিয়ে এসেছে, আর সেই বাবদ হাতকড়া এসেছে নীলাশ্বরের জন্যে।

কেন আসবে, কি সূত্রে আসা সম্ভব, এসব কথা ভাববার ক্ষমতা থাকে না নীলাশ্বরের, খেয়াল থাকে না সঙ্গে সঙ্গে কে নামছে দেখবার! হাঁউমাউ করে গিয়ে প্রায় আছড়ে পড়েন তিনি সাহেবের সামনে।

ওদিকে পাড়ায় ঘরে ঘরে বেতার-বার্তা। নীলাশ্বরের দরজায় ঘোড়ার গাড়ি থেকে সাহেব!

আইন-আদালত ছাড়া চট করে কারুর মগছে কিছু আসে না এবং সকলে একবার করে জানলা একটু ফাঁক করে আর বলাবলি করতে থাকে—“একেই বলে বিপদ একা আসে না! ওদিকে ছেলে শুষছে, এদিকে এই কাণ্ড!”

নীলাশ্বরের বাড়িতেও উঁকিঝুঁকি চক্কতে থাকে।

কিন্তু সহসা একজনের চোখে পড়ল সাহেবের গলায় নল বুলছে।

“ডাক্তার...ডাক্তারী নল বুলছে গলায়!” একটা চাপা উত্তেজনা ছড়িয়ে পড়ল চারিদিকে।

ডাক্তার! সাহেব ডাক্তার এনেছে নবুর জন্যে! তলে তলে এই চালাকি খেলেছে নীলাশ্বর, অথচ কারুর সঙ্গে কোন পরামর্শ নেই?

এ যেন প্রতিবেশীর গালে আচম্কা একটা খাল্লড় বসিয়ে দেওয়া! আবার সাহেবের পায়ে ধরে কাঁদতে বাসেছে!

হ্যাঁ, প্রায় পায়ের পড়েছিলেন নীলাশ্বর, ‘ও সাহেব, আমি কিছু জানি না, আমি কোনও দোষে দোষী নয়। ঘরে আমার ছেলে মরছে—’

সাহেব যে ভারী গলায় আশ্বাস দিল, “ভয় না আছে। রোগী ভাল হইয়া যাবে—” তাও তাঁর কানে ঢুকল না।

কানে ঢুকল ভবতোষ মাষ্টারের কথা।

“এ কী, এ রকম করছেন কেন? কলকাতা থেকে ডাক্তার এসেছেন নবকুমারের চিকিৎসার জন্য!”

নীলাশ্বর তাকিয়ে দেখলেন।

নিতাইকেও দেখলেন।

মুহুর্তে অনুভব করলেন, কোথাও একটা কিছু ষড়যন্ত্র ঘটেছে। তার সঙ্গে সঙ্গেই সেই ষড়যন্ত্রের নায়িকা হিসাবে সত্যর চেহারাটাই চোখের উপর ভেসে উঠল।

কিন্তু কি করে কী হল?

তা সে যাই হোক, এখন টু শব্দ চলবে না! বলির পাঁঠার মত কাঁপতে কাঁপতে ভবতোষ মাষ্টারের সঙ্গে সঙ্গে নিজের ঘরে চোরের মত ঢুকলেন নীলাশ্বর।

সত্য নিশ্চল প্রস্তর-প্রতিমার মত দাঁড়িয়েছিল সেই রুগীর মাথার কাছে বাগানের দিকের জানলায়। কপাটটা এমন ভাবে আড় করে রেখেছিল, যাতে সে নিজে ঘরের মানুষদের দেখতে পায়, ঘরের মানুষরা তাকে দেখতে পায় না।

ভবতোষ মাস্টারের সঙ্গে সঙ্গে যখন তার চাইতে প্রায় হাতখানেক লম্বা দশাসই গড়ন লাল টকটকে মানুষটা ঘরে ঢুকল, কেন কে জানে বুকটা কেঁপে উঠল সত্যবতীর। তার পর হঠাৎ দু চোখ ভরে জল উপচে এল।

দৃশ্যত হাতজোড় করল না, মনে মনে নম্র শ্রণামে বলল, “বাবা, তোমার আশ্পন্দাওলা অবাধ্য মেয়েটাকে মাপ করো। দূরে থেকে আশীর্বাদ করো যেন তার হাতের নোয়া, সিঁথির সিঁদুর বজায় থাকে।... বুঝেছি তোমার বৃকে দাগা দিয়েছি, কিন্তু আমি তো তোমারই মেয়ে। তেজ বল, অহঙ্কার বল, তোমার স্বভাব থেকেই তোমার মেয়েতে বর্তেছে।”

তারপর মার মুখখানা মনে করতে চেষ্টা করল। বলল, “মা, তোমার নামে দিব্যি গেলে বাবার ওষুধ ফেরত দিয়েছি, তোমার নামে যেন কলঙ্ক না পড়ে।”

কালী দুর্গা চণ্ডী শিব, এত সব জানে না সত্য, জীবনের সাক্ষাৎ দেবতার কাছেই বার বার আশীর্বাদ প্রার্থনা করে।

সাহেব ডাক্তারের ওষুধ ধনুসুরী হোক!

আবার তার চির-কৌতূহলী চিন্তা ওই ভয়ঙ্কর গম্বীর মুহূর্তেও হঠাৎ অজান্তে কখন নেহাৎ ছেলেমানুষের মত কৌতূহলী হয়ে ওঠে। বিখিত পুলকে দৃষ্টি বিস্ফারিত করে দেখে, ডাক্তার কিভাবে রোগীর বৃকে পিঠে নল বসাতে আর সেই নলের দুটো মুখ নিজের কানে ঢুকিয়ে গম্বীর মুখে বসে আছে।

একটু পরে স্তনতে পেল, ভারী ভারী একটা গলা উচ্চারণ করছে, “ভয় না আছে। ভাল হয়ে যাবে।”

শ্লেষকে দেবতা ভাবলে কি পাপ হয়?

তার পর রক্তমধের সমারোহ মিটল।

যারা ডাক্তারকে নিয়ে এসেছিল, তারা অল্প-সঙ্গেই সরে পড়ল। আর উদ্যত বজ্র হাতে নিয়ে দু দুটো মানুষ নিশ্চেতনের মত নিষ্ক্রিয় হয়ে বসে রইলেন।

বাঁড়্যে আর বাঁড়্যে গিন্গী।

মাটির পুতুলের মত বসে আছেন দুজনে। বুঝতে পারছেন না, এই অবস্থায় ঠিক কোন্ পথে চলা বুদ্ধিমানের কাজ হবে।

না, বজ্র বোধ করি গুঁদের মাথায় পড়েছে!

নবুর কথা ভুলে গেছেন গুঁরা।

অপেক্ষাকৃত সচেতন ছিল সদু।

সে চলে যাবার আগে নিতাইকে হাতছানি দিয়ে ডেকে, ডাক্তার কি কি নির্দেশ দিয়ে গেল তা ভাল করে বুঝিয়ে দিয়ে যেতে বলেছিল। এবং সেই ফাঁকেই ঝপ করে বলে বসেছিল, “টাকা কে দিল রে? মাস্টার?”

নিতাই মাথা চুলকে বলে, “না, মানে ইয়ে—ব্যাপারটা কি জান সদুদি, বৌঠান হঠাৎ সেদিন ঘাটের পথে ডেকে কেঁদে পড়ে—”

সদু থামিয়ে দেয়, ঈষৎ কঠিন সুরে বলে, “বৌ যার-তার কাছে কেঁদে পড়বার মেয়ে নয়। ভণিতা রেখে সত্যি কথাটা বল! ঝপ করে বল!”

নিতাই অতএব সত্যি কথাই বলে।

ঘাটের পথে নিতাইয়ের হাতে গলার হার খুলে দিয়ে বলেছে সত্য, আমার যেমন স্বামী তোমারও তেমনি বন্ধু। সেই বুঝে কাজ করবে। কলকাতায় গিয়ে এই হার বিক্রি করে সাহেব ডাক্তার নিয়ে এস। ওপর হাতের তাগা-জোড়াটাও খুলে দিতে চাইছিল, নিতাই নিবৃত্ত করেছে।

রোগীর ঘরে কেউ নেই।

সত্য আস্তে আস্তে এসে বিছানার কাছে দাঁড়িয়েছিল, সদু ঢুকতে এসে ফিরে গেল। মনে মনে বলল, “বাঁচে যদি তো তোর পুণ্যেই বাঁচবে বৌ। বেহুলা মরা স্বামী নিয়ে স্বর্গ পর্যন্ত ধাওয়া করেছিল, সাবিত্রী যমরাজের পেছনে ছুটেছিল। যুগে যুগে তারা সকলের পূজা পাচ্ছে।”

একটু পরে আবার যেতে গিয়ে শুনতে পেল বৌ শাশুড়ীর কাছে এসে নরম গলায় বলছে, “সাহেব ডাক্তারের ওষুধে তো তোমরা সর্বদা ছুঁতে পারবে না, ঋণীর ভারটাই বরং আমাদের দিয়ে রান্নাঘরটা তুমি—”

এলোকেশী নড়েচড়ে শুকনো গলায় বলে ওঠেন, “তা এখন তুমি যা বলবে তাই শিরোধার্য করতে হবে! মহারাণী ডিক্টোরিয়ার নিচেই তুমি! তা রান্নাঘরের ভার না হয় বাঁদী নিল, তোমার ছেলের ভার কে নেবে?”

সত্য আরও নম্র গলায় বলে, “ঠাকুরঝির কাছেই তো বেশী থাকে ওরা।”

“থাকে বলে গলায় চাপাতে হবে?”

জগতে সবই সম্ভব। সদুর দিকে টেনেও কথা বলেন এলোকেশী! সদু পরবর্তী কথা শোনার জন্যে চুপ করে দাঁড়িয়ে থাকে। আবার শুনতে পায় বৌয়ের আরও নরম গলা, “ঠাকুরঝি তো ওদের প্রাণতুল্য দেখেন। গলায় চাপা ভাববেন কেন মা?”

কিন্তু সত্যের এই নরম গলাটা কেন সদুর চোখে জল এনে দেয়! কেন যেন মনে হয় সত্যর গলায় এই নরম সুর একেবারে মানায় না। ওর সেই জোরালো গলাটাই ভাল। অনেক ভাল।

॥ একত্রিশ ॥



সাহেব ডাক্তারের হাতযশে, কি সত্যর শাঁখা-লোহার পুণ্যে, অথবা নবকুমারের নিজেরই পরমায়ুর জোরে বেঁচে গিয়েছিল নবকুমার। কিন্তু ভিতরে ভিতরে কেন কে জানে সত্যকে সে নিজের জীবনদাত্রী বলেই ভাবতে অভ্যস্ত হয়ে গিয়েছে সেই থেকে।

অতএব সে জীবনটা নিয়ে সত্য যা করতে পারে করুক। যে দেশে অসুখ করলেই সাহেব ডাক্তার পাওয়া যায়, মৃত্যুভয় বলে বিভীষিকাটাই থাকে না, সত্য যদি নবকুমারকে সেই দেশে নিয়ে গিয়ে প্রতিষ্ঠিত করতে চায়, সেই চাওয়াটাকে আর হাস্যকর অবাস্তর বলে উড়িয়ে দেয় না নবকুমার।

কাজেই সত্যর কাজ কিছুটা সহজ হয়ে এসেছে। হয়তো এই জন্যেই লোকে বলে থাকে, ভগবান যা করেন মঙ্গলের জন্যে। নবকুমারের এই মারাত্মক রোগটাও শেষ অবধি সত্যর জীবনে অন্তত সত্যর মতে, পরম মঙ্গল ডেকে এনেছে। ছেলেরের মানুষ করতে চায় সত্য, মানুষের মত মানুষ। আর সে মানুষ হতে হলে জগৎটাকে দেখতে হয়।

অবশ্য তার পরও কি আর কাঠখড় পোড়াতে হয় নি? অনেক হয়েছে। অবশেষে আস্তে আস্তে মেঘ কেটে সূর্যকিরণের আভাস দেখা যাচ্ছে।

ভবভোষ মাস্টারের চেষ্টায় নিতাই আর নবকুমারের এক-একটা চাকরি যোগাড় হয়েছে কলকাতায়। নিতাইয়ের রেলি প্রাদার্সে, নবকুমারের সরকারী দপ্তরে।

অতএব ওদের এখন এক পা রথে এক পা পথে। নবকুমার অবশ্য মা-বাপের কাছে নিজে প্রস্তাব করে নি, করতে পারে নি, সত্যকেই বলতে হয়েছে। তবে কথা বন্ধ করেছেন তাঁরা ছেলে বৌ দুজনের সঙ্গে।

এলোকেশী আজকাল খাওয়া শোওয়া ব্যতীত বাড়িতে থাকেন না বললেই হয়। আর নীলাঘর সন্ধ্যার দিকে হরিসভায় যেতে শুরু করেছেন।

কিছুদিন আগে পর্যন্ত সদু সত্যর উপর একটু খাপ্পা ছিল। কিন্তু সত্যর সাহেব ডাক্তার ডাকারূপ অসাধ্য সাধনের পর থেকে সদুও যেন কেমন মহিমান্বিত।

মাঝে মাঝে নিজের জীবনের খাতাটাও বুজি উল্টো দেখতে শুরু করেছে আজকাল সদু। সদু যদি ওই রকম নির্ভীক হতে পারত! পারলে হয়তো সদুর জীবনটা এমন বরবাদ হয়ে যেত না। হয়তো বিপথগামী স্বামীকে সুপথে টেনে এনে সংসার করতে পারত। কিন্তু সত্যর মত বলার শক্তি সদুর নেই। সত্যর মত বলতে জানে না সদু মনে-জ্ঞানে যে কাজে দোষ দেখব না, পাপ দেখব না, সে কাজে নিন্দের ভয় করব কেন? নিন্দে সুখ্যাতির ভয়ে হাত-পা গুটিয়ে বসে থাকটাও তো এক রকম স্বার্থপরতা। কিসে লোকে আমায় নিন্দে করবে, আর কিসে আমার সুখ্যাতি করবে এই চিন্তায় যদি স্বামী-পুত্রের ভালটি পর্যন্ত না দেখি সেটা তো ঘোর স্বার্থপর কাজ।

সদু উঠে-পড়ে লেগে স্বামীকে শোধরাতে পারত, তা পারে নি সদু, ভয় খেয়েছে। সদু মামার বাড়িতে এসে অকারণে মামা-মামীকে বাঘের মত ভয় করে মরছে। ন্যায়-অন্যায় কথাটি কখনো বলতে পারে নি। সদু ভীতু।

সত্য সাহসী।

তাই সত্য আজ ডোবার ঘোলা জল থেকে মুক্ত হয়ে সাগরে তরী ভাসাতে গেল।

পাড়াপড়শীর ঘরে সত্যর বয়সী যে সব বৌ-ঝি আছে, তাদের মধ্যেও সত্য একটা আলোড়ন এনেছে বৈকি। তাদের দিনরাত্রির চিন্তার অনেকখানি দখল করে রেখেছে সত্য।

কী আশ্চর্য!

কী বিশ্বয়!

কী অলৌকিক!

ঠিক তাদেরই মত একটা মেয়েমানুষ স্বামীপুত্র নিয়ে কলকাতায় 'বাসা'য় যাচ্ছে! আর কিসের কবল থেকে? না এলোকেশীর মত ভয়ঙ্করীর কবল থেকে! ওদের স্বামীরা এখন কিছুদিন যাবৎ দাম্পত্যসুখের মাধুর্য থেকে বঞ্চিত। কারণ সেই নিভৃত নির্জনে তাদের স্ত্রীরা এখন অনবরত নবকুমারের সাহস ও প্রেমের দৃষ্টান্ত দেখাচ্ছে।

হতভাগ্য স্বামীরা নবকুমারকে 'ব্রহ্মণ', 'মেয়েমানুষের বশ' ইত্যাদি বিশেষণে ভূষিত করেও বিশেষ সুবিধা করতে পারছে না।

তবে বৌত্তলোর অসুবিধে এই—সত্যর সঙ্গে একবার নির্জনে দেখা করে স্বামীদের স্ত্রৈণ করে তোলবার মস্তুরটা শিখে নেবে এ উপায় নেই। বাঁড়ুঘো-গিনীর বৌয়ের সঙ্গে মেশার ব্যাপারে তাদের প্রতি কড়া নিষেধ আছে, আর 'ঘাটে' আসার সময় শান্ত্রী পিস্শাভট্টী কি বড় ননদ, নিদেনপক্ষে একটা পুঁচকে ননদও পাহারাদার থাকে।

অতএব মস্তুর শেখা হয় না।

অবশ্য ওপরওয়ালাদের অনিয়ে তারা সত্যকে ছিঁছিকার দেয়। যে মেয়েমানুষ বড়ো স্বপ্ন-শান্ত্রীর সেবারূপ মহৎ কর্মে জলাঞ্জলি দিয়ে ছেলেদের ভাল ইচ্ছলে পড়া' ছুতো করে 'বাসা'য় যায়, সে মেয়েমানুষকে শত ধিক দেবে না আর মেয়েমানুষেরা?

কিন্তু দিক।

সত্যর কানে এসব আসেও না।

এলেও সত্যর কানের ভিতর দিয়ে 'মরমে' পশে না। সে তখন শুধু যাবার প্রস্তুতিসাধনে যত্নবতী।

এই সময় কথাটা একদিন পাড়ল সত্য।

হয়তো সেটাকেও ওই প্রস্তুতি হিসেবেই ধরেছে সে। অথবা এক অনিশ্চিতের পথে পা বাড়াবার আগে জনোর শোধ জনাভূমিকে দেখার বাসনা তাকে প্রবলভাবে পেয়ে বসে। কারণটা যাই হোক, কথাটা পাড়ে সত্য, "যাবার আগে একবার ওখানে ঘুরে আসব।"

'ঘুরে আসতে ইচ্ছে করছে' অথবা 'ঘুরে আসলে ভাল হয়', কি 'ঘুরে আসা কর্তব্য' এসব ভাষার ধার দিয়ে যায় নি সত্য।

'ঘুরে আসব!'

তার মানে ব্যাপারটা স্থির সিদ্ধান্তের কোঠায়। এখন ব্রহ্মণর ব্যাটা বিষ্ণু এলেও সে সিদ্ধান্তের রদ হবে এ আশা নেই কারো।

এলোকেশী বিরস মুখে বলেন, "যাবে ভাল কথা। তা আমাকে বলতে এলে কেন? শুধোছে? নাকি অনুমতি নিচ্ছ?"

ই্যা, কথা আবার কইছেন এলোকেশী বৌয়ের সঙ্গে। তার কারণ কথা কওয়াই তাঁর রোগ। মুখ বুজে দু-দণ্ড থাকা তাঁর কোষ্ঠীতে নেই। "কথা বন্ধ করব" ভেবেও কয়ে ফেলেন।

সত্য তার বড় বড় চোখ দুটো একবার তুলে তাকিয়ে দেখে বলে, "নাঃ, সে মিথ্যে রঙ্গর দরকার দেখি না। যাব যখন মনস্থ করেছি, যাওয়ার ব্যবস্থাই করতে হবে। জানানটা দিলাম, ঠাকুরকে বলবেন পঞ্জিকাটা একবার দেখে দিতে।"

এলোকেশী স্ব-স্বভাবে এসে পড়েন।

ভেঙিয়ে উঠে বলেন, "বাপ উদ্ভিশ করে না। বাপের বাড়ি যাবে কোন সুবাদে?"

"বাপকে একবার পেন্নাম করতেই যাব।" সত্য আকাশের দিকে তাকিয়ে উদাস মুখে বলে, "মা-বাপের কর্তব্য আছে, সন্তানের নেই?"

“তা বেশ, কোর্তব্য করো। যেও বাপকে পেন্নাম করতে। আমার ছেলে বিনি “আভ্যানে” যাবে না তা বলে রাখছি।”

সত্য উঠে দাঁড়িয়ে বলে, “এমন এক-একটা অনাচ্ছিষ্ট কথা বল তুমি! তোমার ছেলেকে তুমি আটকাবে তো আমি এতখানি রাস্তা যাব কি প্যাড়ার লোকের সঙ্গে!”

“তোমার আবার সঙ্গ!” এলোকেশী পিচ্ করে একটা পিচ্ ফেললেন, “ডাকাতে তোমায় দেখে ভয় পাবে মা!”

“পেলেই মঙ্গল।” সত্যও কথায় ইতি টানে, “তবু লোকসাক্ষী একটা বেটা-ছেলে সঙ্গে থাকা ভাল। আর বাবাকে পেন্নাম করা তো বাবার জামাইয়েরও কাজ!”

“ইল্লিমারি টুস্কি! আরও কত শুনব! বলে, রাখালি কত খেলাই দেখালি! শ্বশুর আবার কবে কার গুরুঠাকুর হল, তা তো জানি না!”

“মেয়েমানুষের যদি এত হয় তো বেটাছেলের একেবারেই বা হবে না কেন, তাও তো জানি নে মা। মা-বাপ উভয় পক্ষেই গুরুজন।” বলে এবার উঠেই যায় সত্য।

জানত এই রকমই হবে। তাই আর অনুমতি চাওয়ার প্রহসনটা করতে চেষ্টা করে নি।

প্রবলের জয় অবশ্যজ্ঞাবী।

পঞ্জিকা দেখে যাত্রার দিন দেখাও হয়, এবং শুভ মুহূর্ত অনুযায়ী “যাত্রা” করে স্বামী-পুত্রকে নিয়ে পালকিতে গিয়ে ওঠেও সত্য। বিশেষ কোনও বাধা আর আসে না। হালই ছেড়ে দিয়েছে তারা।

পালকি সত্যর শ্বশুরবাড়ির গ্রাম ছাড়ায়, পালকির দরজা সরিয়ে মুখ বাড়ায় সত্য।

নবকুমার বলে, “ঘোমটা খুলে মুখ বাড়ান্ন কেন? কে কোথায় দেখে ফেলবে!”

সত্য পুলক-কম্পিত স্বরে বলে, “দেখলেই বা! আর ত্রো এখন আমি শ্বশুরবাড়ির বৌ নয়!”

“বলছি কি তা নয়?”

“তবে মুখ বুজে থাক। মুখে তো লেখা নেই বৌ কি কি? দেখো না ওখানে গিয়ে কি রকম গাছকোমর বেধে দস্যিবিল্ডি করে বেড়াই!”

বড় ছেলে ‘তুড়ু’র এসব আলোচনা হৃদয়ঙ্গম হবার বয়স হয়েছে। সে সহসা বলে ওঠে, “ফ্যাঃ! তুই আবার গাছকোমর বাঁধবি কি?”

“আবার তুই!” সত্য তীব্র ভর্সনার বলে ওঠে, “কত দিন বলেছি মাকে তুই বলতে নেই, তুমি বলতে হয়। তবু—”

সহসা কথার মাঝখানে হেসে ওঠে নবকুমার, “হয়েছে। খুব শাসন হয়েছে। বড্ড একটা মানুষ ও, তাই সুশিক্ষে দেওয়া হচ্ছে। আমি তো বুড়ো বয়সে অবধি মাকে তুই বলেছি।”

সত্যর মুখ কঠিন হয়ে ওঠে। বলে, “তুমি যা যা করেছিলে বুড়ো বয়সে অবধি, তার দৃষ্টান্ত তুমি অন্য সময় ছেলের কানে ঢেলে। আমি যখন একটা শিক্ষাদীক্ষা দিতে আসব, তখন তার ওপর ঝাঁপিয়ে পড়ে ঝগড়া দিতে এসো না।”

“বাবাঃ! কী হল? কিসে যে কি হয় তোমার বোঝা দায়!”

নবকুমার বোঝে একটু বেকায়দা হয়ে গেছে। ক্ষণপূর্বের সেই পুলকোচ্ছল লাভগ্যাময়ী মূর্তি অন্তর্হিত হয়ে গেল ওই কাঠিন্যের আড়ালে। তাই আপসের সুর ধরে সে। সত্যি সত্যবতীর ওই চাপল্য, ওই লাভগ্য, ওই অহ্লাদে আলো হয়ে ওঠা মুখ কী অপূর্ব! কিন্তু বড় ক্ষণস্থায়ী! মুহূর্তে মেঘে ঢাকা পড়ে যায়!

আর যায় নবকুমারেরই বোকামিতে। অথচ নবকুমার কিছুতেই বুঝতে পারে না কিসে কি হয়ে যায়, কিসে কি হয়ে যেতে পারে।

সত্যবতীর নাগাল কোনদিনই কি পাবে সে?

কিন্তু সত্যর মুখের মেঘ কাটাতে পেরেছে নবকুমারের আত্মজ।

তুড়ু ইত্যবসরে মায়ের কোল ঘেঁষে বসে বলছে, “মামার বাড়ি গিয়ে ভাল ছেলে হতে হয়, না মা? না না, সব বাড়িতেই ভাল ছেলে হতে হয়। শুধু মামার বাড়ি গিয়ে আরো বেশী বেশী ভাল হতে হয়। তা আমি তো সেসব জানিই, কিন্তু ওই খোকা বোকাটা? কিছু জানে না, মামার বাড়ি গিয়ে শুধু অ্যা-অ্যা করে কাঁদবে।”

ছেলের ওই অ্যা-অ্যা ভঙ্গীতে হেসে ফেলেছে সত্য।

না, অন্তত এই পথটুকুতে তেমন ভয় নেই নবকুমারের। মেঘ স্থায়ী হবে না। বুঝি গতির মধ্যেই আছে এক অপূর্ব পুলকের স্বাদ। তাই মুহূর্তে মুহূর্তে কিশোরীর মত উচ্ছসিত হয়ে উঠেছে সত্য।

“ওগো দেখ দেখ, ওই মাঠে কি কালো গরুটা! ঠিক যেন গয়ার পাথরবাটি। ...তুড়ু .. দেখ দেখ, ওই পুকুরটায় কত পদ্ম ফুটেছে! ছোটবেলায় আমরা ওই পদ্ম গাদা গাদা তুলতাম। ... মামার বাড়ি চল, দেখাব তোকে সেই পুকুর। ... আচ্ছা হ্যাঁগো, ওই গাছটা কি বল তো? ঠিক ধরতে পারছি না। পাতাগুলো বেশ কেমন নতুন ধরনের। ওমা ওমা, কী চমৎকার বুনো ফুল বুনো ফুল গন্ধ এল! ঠিক আমাদের ওখানের মতন!”

নিজের খুশিতে নিজের সঙ্গেই কথা বলে চলেছে সত্য, স্বামী-পুত্র উপলক্ষ মাত্র।

নবকুমার হাঁ করে চেয়ে থেকে সেই মুখের দিকে।

এতদিন ঘর করছে, দু-দুটো ছেলের বাপ হল, এমন প্রকাশ্য দিনের আলায় এত স্পষ্ট করে কবে এমনভাবে তাকিয়ে থাকতে পেরেছে তার লাভণ্যময়ী স্ত্রীর মুখের দিকে!

“বাসা”য় যাওয়ার ভয়টা একটু কমে এসেছে, এখন বরং একটু একটু রোমাঞ্চময় উন্মাদনা। সেখানে গুরুজনের রক্তচক্ষুর ভয় নেই, নেই পাড়া-পড়শীর গুরুভয়।

শুধু নবকুমার আর সত্য!

চাকরির ভয়টা খুব জোর আছে। তবে ভাবতোষ মাস্টার প্রচুর ভরসা দিয়েছেন। বলেছেন নবকুমার যা ইংরিজি জানে, তার সিকি ইংরিজি শিখেও সাহেবের অফিসে কাজ করছে কত লোক। নবকুমার ঢুকতে না ঢুকতে সায়েবের নেকনজরে পড়ে যাবে নির্খাত। আরো বলেছেন, গ্রামে পড়ে থেকে জমিজমার উপস্থিত্তে জীবন কাটানোর ইচ্ছেটা এ যুগে অচল ইচ্ছে।

কলকাতায় গিয়ে দুটো কমিজ করাতে হবে আর একজোড়া সু-জুতো। এ নইলে তো আর অফিসে যাওয়া যাবে না।

ভবতোষ তাদের জন্যে একটা বাসাও ঠিক করে রেখেছেন নাকি। নিজে তিনি মেসে থাকেন, কিন্তু নবকুমারের তো তা চলবে না। সে যখন ফ্যামিলি নিয়ে যাচ্ছে। নিতাইটার মন্দ কপাল। ওর বৌকে বাসায় আনতে পারবে না। নিতাইয়ের মন্য বলেছেন, বৌ কলকাতার বাসায় গেলে তার হাতে আর তাঁদের খাওয়া চলবে না।

এত বড় শক্তির ভয় তুচ্ছ করে বরের সঙ্গে বাসায় যাবে এত সাহস নাকি নিতাইয়ের বৌয়ের নেই।

অতএব নিতাইকেও নবকুমারের হাঁড়িতে জায়গা দিতে হবে। বৌটাকে যদি আনতে পারত নিতাই! বেশ দুটো বৌতে থাকত একসঙ্গে। হোক বামুন-কায়েত, কেউ কারুর ভাতের হাঁড়ি নাড়তে না যাক, দুজনে একত্রে বসা, গল্প করা, চুল বাঁধা, পান সাজা, এসব তো করতে পারত।

তা হবার জো নেই।

বেচারী নিতাইটাকে তাদেরই একটু যত্ন-আপত্তি করতে হবে।

ভবতোষ বলেছেন, খুব খাসা বাড়ি। মিন-চারখানা ঘর, মস্ত দরদালান। রান্নাঘর, ভাঁড়ারঘর, উঠোন, কুয়োভলা। জলের কলও নাকি আছে। বাড়ির ভেতরে নয়, দরজার কাছে। থাক। তার জল খেয়ে জাতজন্ম না খোয়ানোই ভাল, কুয়োর জল যখন আছে!

সে যা হয় হবে।

প্রধান কথা ভাড়া। বডই গিয়ে লাগবে। বাপের কাছ থেকে তো আর টাকা চাইতে যাবে না নবকুমার!

কিন্তু ভবতোষ বলেছেন, কলকাতায় ও-বকম বাড়ি দশ টাকাতোও সহজে মেলে না, নেহাত বাড়িটা ভবতোষের এক বন্ধুর বাড়ি বলেই আট টাকায় পাওয়া যাচ্ছে।

হোক।

নবকুমার তো তেমনি মাইনেও পাচ্ছে আটান্ন টাকা! এত বড় মোটা মাইনের চাকরের পক্ষে ওতে কাতর হওয়া ঠিক নয়।

যাক তাই হোক।

তা বলে নিতাইয়ের প্রস্তাব সে নেবে না! নিতাই বলেছে, ভাড়ার ভাগ দেবে। না, ছিঃ! নবকুমারের এত বন্ধু নিতাই, তাই কখনো নেওয়া যায়?

কিন্তু কে জানে সেখানে সত্যর মেজাজ কেমন থাকবে! এখানে তো ক্ষণে রুপে ক্ষণে তুট, সেখানে যতই হোক নিতাই একটা পর ছেলে! সত্য যদি তার সামনে মেজাজ দেখায়!

নাঃ, তা বোধ হয় করবে না।

সেদিকে সভ্য আছে।

এখন কবে সেই দিনটি আসে! যবে সেই অজানা অচেনা দরদালানে বসে দুই বন্ধু অফিসের 'ভাত' খাবে! আর সত্য এলোচুল দুলিয়ে কোমরে কাপড় জড়িয়ে ছুটোছুটি করে রান্না করবে! পরিবেশন করবে!

এই সমস্তই সম্ভব হবে সত্যর শক্তিতে।

বিগলিত প্রেমে সত্যর দিকে তাকিয়ে দেখে নবকুমার।

কিন্তু সত্যর তখনও দৃষ্টি লক্ষ্যভেদী, নাসারন্ধ্র স্ফীত, সমস্ত চেতনা একত্র। সহসা চেঁচিয়ে ওঠে সে, "ওই তো, ওই তো জটা-দাদাদের বাড়ির চিলেকোঠা, ওই গাঙ্গুলি-কাকাদের উঠোনে বাজপড়া নারকোল গাছটা—ও বেহারারা, ডান দিকে ডান দিকে—"

পথ দেখিয়ে দেওয়ার ভার সে নিজে নিয়েছে।

পালকি নামাতেই একটা বিরাট চাঞ্চল্যে ঢেউ উঠেছিল, তার পর জানা হতেই আকাশ থেকে পড়ল সবাই। না বলা না কওয়া এমন করে মেয়ে কেন উপস্থিত? এমন তো হবার কথা নয়!

কি মূর্তি নিয়ে নামছে?

কে ফেলে দিয়ে যেতে এসেছে?

ওগো না গো না!

ষড়ৈশ্বর্যময়ী রাজরাণীর বেশে এসেছে সে কার্তিক-গণেশের হাত ধরে, ভোলানাথকে সঙ্গে করে! মন কেমন করছিল তাই দেখতে এসেছে বাপকে, বাপের বাড়ির সবাইকে। এসেছে জন্মভূমিকে দেখতে।

বারবাড়ির কলরোল মিটিয়ে অন্দরমহলের দিকে এগিয়ে সভ্য, চারিদিকে বিভ্রান্ত দৃষ্টি মেলে। আর যেই ভেতর-বাড়ির উঠোনে পা ফেলল, তুমুল একটা কান্নার রোল উঠল। বিলাপধ্বনি মিশ্রিত রোল।

আলাদা করে বোঝবার উপায় নেই গলাধ্বনি। একতান বাদন। বাড়ির সকলের সঙ্গে পাড়ার মহিলারও যোগ দিয়েছেন অনেকে।

কিন্তু নতুন কার জন্মে বিলাপ? ভুবনেশ্বরীর ঘটনা তো অনেক দিনের হয়ে গেছে।

না, বিশেষ কারণে জন্মে বিলাপ নয়, আর সদ্য শোকের কাতরতাও নয়। খানিকটা সত্যর আবির্ভাবে আনন্দাশ্রু আর বাকীটা সত্যর এই দীর্ঘ অনুপস্থিতিকালের মধ্যে সংসারের যা যা শোকাবহ ঘটনা ঘটেছে, তারই ফিরিস্তি জানিয়ে নতুন করে বিলাপ-ক্রন্দন।

এই ক্রন্দনরোলের মাঝখানে দিশেহারা সভ্য ছেলে দুটোর হাত ধরে উঠোনের একধারেই দাঁড়িয়ে থাকে, আর বারবাড়িতে নবকুমার উদ্ভ্রান্ত দৃষ্টি মেলে উৎকর্ষ হয়ে বসে থাকে। সামনে শ্বশুর বসে, কিন্তু তাঁকে প্রশ্ন করবে এত বুকের পাটা নবকুমারের নেই। সেই যে প্রণাম করে ঘাড় হেট করে বসেছে, বসেই আছে।

তা ছাড়া তিনি তো দেখা যাচ্ছে নির্বিকার। বাড়ির মধ্যে এত বড় ক্রন্দনরোল যখন ওঁকে তিলমাত্র বিচলিত করতে পারছে না, তখন ব্যাপারটায় গুরুত্ব নেই বলেই মনে হচ্ছে।

নবকুমারও পাড়াগাঁয়ের ছেলে। মেয়ে শ্বশুরবাড়ি থেকে এলে কান্নাকাটির ঘটনা তার একেবারে অজানা নয়, তাই ক্রমশ সে নিশ্চিন্তে হয় আর রোলটাও আস্তে আস্তে ফিকে হয়ে আসে।

ঈশৎ নড়েচড়ে রামকালীই কথা বলেন।

"কখন বেরিয়েছ?"

"আজ্ঞে—!"

নবকুমার চমকে তাকায়।

রামকালী তাকিয়ে দেখেন। একটি স্বাস্থ্যবান সুকান্তি পুরুষের দেহে এখনো যেন একখানা লাজুক কিশোরের মুখ! সুন্দর সুকুমার, কিন্তু বুদ্ধির ছাপ খুঁজে পাওয়া যায় না। মনে মনে মৃদু আক্ষেপের হাসি হাসেন। একে স্নেহ করা যায়, ভরসা করা যায় না। হয়তো এই জন্যই ভগবান সত্যকে অমন দৃঢ় মজবুত করে গড়েছেন, ও লতার মত আশ্রয় চাইবে না, বনস্পতির মত আশ্রয় দেবে।

একটা নিঃশ্বাস পড়ল।

মনে করলেন সত্যরূপ কপালে চির দুঃখ। রামকালীর মেয়ে রামকালীর ললাটলিপিই পেয়েছে।
কত দুঃখী রামকালী! কত সুখী ছিল ভুবনেশ্বরী!

আগে স্বপ্নেও কল্পনা করেন নি রামকালী, এমন করে কখনো ভাবলেন, নিজেকে কখনো দুঃখীর
কোটায় ফেলবেন।

নবকুমারের ওই তটস্থ সুরের “আজ্ঞে” শুনে রামকালী মৃদু হেসে আর একবার বললেন,
“কতক্ষণ বেরিয়েছ?”

“আজ্ঞে, সেই প্রাতঃকালে দুটো ফেনাভাত খেয়েই—”

কথাটা বলেই বোধ করি নিজের বেকুবিটা বুঝতে পারে নবকুমার, ‘প্রাতঃকাল’ কে আরও
মোক্ষম করে বোঝাবার জন্যে ওই ফেনাভাতের প্রসঙ্গটা না আনলেই হত। প্রাতঃকালই যথেষ্ট ছিল।
কিন্তু মুখের কথা হাতের টিল!

রামকালী ব্যস্ত হয়ে বলেন, “সেকি! এতটা সময় লেগেছে! তা হলে তো—না না, আর বসে
থাকা নয়। শীঘ্রই হাতমুখ ধুয়ে—”

নবকুমার এবার কিস্তিৎ স্পষ্ট গলায় বলে, “না না, ব্যস্ত হবেন না। পথে পালকি নামিয়ে আহার
হয়েছে। সঙ্গে জলপান ছিল।”

“তা হোক। বেলা পড়ে এসেছে। ওরে কে আছিস?”

একসঙ্গে অনেকগুলো নানা বয়সের ছেলে এসে দাঁড়ায়। অর্থাৎ এরা আশেপাশে উঁকিঝুঁকি
মারছিল, শুধু সামনে আসতে ভরসা পাচ্ছিল না।

রামকালী বলেন, “অশ্বরে গিয়ে বল গে, বাবাজীর হাতমুখ ধোয়ার ব্যবস্থা করতে।”

‘হাতমুখ ধোয়াটা’ একটা সাঙ্কেতিক শব্দ। মূল অর্থ জলখাবারের ব্যবস্থা করা। ওরা দু-একজন
ব্যস্ত হয়ে চলে যায়, দু-একজন দাঁড়িয়ে থাকে। আর কে একজন খপ করে বলে বসে, “জামাইবাবুর
কী মজা! কেন কলকাতার বাসায় গিয়ে থাকবে!”

রামকালী ঈষৎ চমকে ওঠেন।

ভাবেন, এটা আবার কি কথা!

সত্য তো ঘোমটা ঢাকা অবস্থায় একটা প্রশ্নই করেই ভেতরে চলে গেছে, নবকুমারের সামনে
বাগের সঙ্গে কথা বলে নি, তা ছাড়া ছিল পাড়াপড়শীর হুল্লোড়।

নবকুমার মেয়েদের মত লজ্জার ভান করে বসে আছে। রামকালী ঈষৎ কৌতুকের স্বরে বলেন,
“কলকাতার বাসার কথা কি বলছে?”

প্রশ্নটা নবকুমারকে।

নবকুমার উত্তর না দিয়ে পারে না। তাই আন্তে আন্তে বলে, “হ্যাঁ, সেই রকমই স্থির হয়েছে।”

“শুনে সুখী হচ্ছি। এখন কলকাতায় উন্নতির নানাবিধ পন্থা হয়েছে। কোনও কর্মের চেটা হয়েছে
নাকি?”

“আজ্ঞে হ্যাঁ। মাস্টারমশাই একটা চাকরির ব্যবস্থা করে দিয়েছেন।”

রামকালীর জামাতা, তাই কর্তব্যবোধেই প্রশ্ন করেন রামকালী, “কোথায়?”

“ইয়ে, আ-আজ্ঞে সরকারী দপ্তরে।”

“সুখের কথা। তা কোথায় থাকবার ঠিক করেছ? মেসে?”

“আজ্ঞে না। বাসায়। মাস্টারমশাই বাসাও ঠিক করে দিয়েছেন।”

রামকালী অবশ্য বেতন কত তা জিজ্ঞেস করেন না, শুধু সামান্য চিন্তিত স্বরে বলেন, “তা হলে
তো পাচকের ব্যবস্থা করতে হবে। একা বাসা নিয়ে—”

নবকুমার আর বেশীক্ষণ লজ্জা বজায় রাখতে পারে না, পুলক গোপনের উচ্ছ্বসিত আভা মুখে
মেখে বলে ওঠে, “পাচকের দরকার হবে না। তুডু খোকার মা, ইয়ে, আপনার মেয়েই তো যাচ্ছে!”

“আমার মেয়ে! সত্য! সত্য! কলকাতায় বাসায় যাচ্ছে!”

নবকুমার খতমত খেয়ে চূপ করে যায়। বুঝতে পারে না রামকালীর এই স্বরটা ঠিক কোন
ভাবব্যঞ্জক। একটু যেন বিচলিত মনে হল না?

হ্যাঁ, কিঞ্চিৎ বিচলিত হয়েছেন রামকালী।

অনেকদিন আগের একদিনের কথা মনে পড়ে গেছে।

বালিকামূর্তি নিয়ে সত্য ভেসে উঠেছে চোখের সামনে। আর তার সামনে ভেসে উঠেছে আর
একখানা ভয়ব্যাকুল মুখ। সেই মুখের সামনে আজুল তুলে বলছে সত্য, “তোমার যে এত ভয় কিসের
মা! এই তুমি দেখে নিও, কলকাতায় আমি যাব, যাব, যাব!”

সত্য তার প্রতিজ্ঞা রাখছে, কিন্তু তা দেখে গর্বে আনন্দে বিশ্বয়ে পুলকে কে মুগ্ধ হবে ? নিঃশ্বাস গোপন করে বললেন, “সাহস করতে পারছে সুখের বিষয় । তা তোমার মাতাপিতার ব্যবস্থা ?”

“দিদি আছে । পড়শীরা আছে ।”

“হঁ । তা ওঁরা আপত্তি করলেন না ?”

এবার আর নিজেকে সংবরণ করা দুঃসাধ্য হয়ে ওঠে নবকুমারের । প্রায় একগাল হেসে ফেলে বলে, “আপত্তি কি আর তাঁরা না করেছেন! কিন্তু আপত্তি টিকলে তো ? এ ধুর্যো ধরল, ছেলেদের ভাল ইচ্ছুলে পড়ানো চাই! বুদ্ধির রাজা তো!”

ওর ওই উদ্ভাসিত মুখের দিকে তাকিয়ে সহসা ওর ওপর ভারী একটা স্নেহ অনুভব করলেন রামকালী । অন্দরে পাঠিয়ে দিলেন নবকুমারকে ।

অন্দরের অবস্থা তখন হাস্যমুখর । সত্যর ছেলেদের নিয়ে ঠাট্টা-আমোদ চলছে দিদিমা সম্পর্কীয়াদের । সত্যকে ঘিরে বসেছে বাকী সবাই ।

রাসুর নতুন বৌ, শিবজায়ার আইবুড়ো নাতনীরা, রাসুর দুই ভাদ্রবৌ আর ভাগ্নী দুটো এবং পড়শীবাড়ির নবীনা-প্রবীণার দল । মোক্ষদার বেশী কথা বলার ক্ষমতা আর নেই, তবু আসরের একপাশে বসে আছে দেওয়ালে ঠেস দিয়ে । শুধু সারদা এ আসরে অনুপস্থিত । সারদার মরবার সময় নেই ।

তার ঔদাসীন্യের কাছে সত্যর নতুনত্ব, অপূর্বত্ব, বৈচিত্র্যের বহুমুখিত্ব, সব কিছুই পরাস্ত মেনেছে ।

কিন্তু আর সবাই তো সারদা নয়, তাই প্রশ্নের উত্তর দিতে দিতে নিজে আর কাউকে কোনও প্রশ্ন করবার সময় পাচ্ছে না সত্য । অথচ সে তো নিজেকে দেখাতে আসেনি, সবাইকে দেখতে এসেছে ।

কিন্তু কৌতূহল যে সকলেই অদম্য । দু-দুটো ছেলে হয়ে গেল, তারা ডাগরটি হল, যোগাযোগ তো নেই । ওরা অবিশিষ্ট ছেলেদের অনুপ্রাশনে বলে পাঠিয়েছিল, কিন্তু রামকালী তো তখন তীর্থে ঘুরছেন । তবে ফিরে এসে তো কই— ?

কিন্তু এত দিন কেন আসে নি সত্য আর এখন এমনই হুট করে এল কেন, এ প্রশ্ন চাপা পড়ে গেল । এখন প্রশ্ন কলকাতার বাসা! সেইখানেই সহস্র কৌতূহলের প্রশ্ন । কে সাহস দিল সত্যকে ? কে দেখবে সেখানে সত্যকে ? শব্দর-শাওড়ী বেঁচে থাকতে বরের সঙ্গে বাসায় যাবার পরিকল্পনাটা তার মাথায় এলোই বা কি করে, আর তাঁদের অনুমতিই বা পেল কোন অলৌকিক সাধনার জোরে ?

তা ছাড়া—

গেলে জাত যাবে কিনা, স্নেহের জল খেতে হবে কিনা, জুতো মোজা পরতে হবে কিনা, বরের সঙ্গে “ল্যাগো ফেটিং” চড়ে গড়ের মাঠে হাওয়া খেতে যেতে বাধ্য হতে হবে কিনা ইত্যাদি বহুবিধ খাপছাড়া প্রশ্ন তো আছেই ।

অনেক প্রশ্নের উত্তর দিয়ে দিয়ে ক্লান্ত সত্য এক সময় বলে ওঠে, “বাব্বাঃ! নিজের পাঁচালীই গাইলাম এই অবধি, তোমাদের খবরাখবর কিছু শুনতে দাও ?”

মোক্ষদা ক্লান্ত আর্ত কণ্ঠে বলে ওঠেন, “আমাদের আবার খবর! যারা মরে নি তারা এখনো বিধাতার অনুজল ধঃসাঙ্গে এই খবর ।”

“বাঃ, ও কি কথা!”

“ঠিক কথাই বলেছি সত্য । চিরটাকাল তোকে ‘মুখ, করেছি, ভেবেছি হাড়ির হাল হবে তোর । এখন দেখছি তুই-ই টেকা মারলি! তুই-ই দেখালি! বেশ করেছিস এ মতলব করেছিস । এখন সবাই বলছে ইংরিজি বিদ্যার জয়জয়কার । ছেলে দুটোকে যদি কলকেতায় ইংরিজি ইচ্ছুলে দিতে পারিস—”

শিবজায়া সম্প্রতি বিধবা হয়েছেন এবং কিছুক্ষণ আগে গগণভেদী চিৎকার করে সত্যকে বুঝিয়েছেন, সত্যর মা পরম পুণ্যবতী ছিল, মরে পুণ্যের পরাকাষ্ঠা দেখিয়ে গেছে এবং জগতে যে যেখানে শাঁখা-নোয়ার গৌরব নিয়ে এখনো টিকে আছে, তারা যেন এই বেলা সেই গৌরব বজায় থাকতে পৃথিবী থেকে সরে পড়ে । এখন শিবজায়া মুখে কাপড় ঢাকা দিয়ে শুয়েছিলেন পোড়ামুখ কাউকে দেখাবেন না বলে ।

কিন্তু চির-প্রতিশ্রুতিনী মোক্ষদার এই বাক্য শুনেই তাঁর নির্বেদ ভঙ্গ হল । মুখের কাপড় সরিয়ে বলে উঠলেন, “বললে ভাল ছোট্টাকুরঝি! জন্ম পেল ছেলে খেয়ে, আজ বলছে ডান! বলি একাল

সেকাল সবাইয়ের বাংলা সমস্ক্রিত'য় চলল, বেশী বিদ্যান হল তো ফার্সি, আর এখন ওই মেলেচ্ছ ভাষা না শিখলে আর—”

“ফার্সিটাও মেলেচ্ছ ভাষা সেজবৌ!”

“ওমা শোন কথা! জন্মকাল ফার্সি'র কথা শুনে এলাম, কই কখনো তো শুনি নি মেলেচ্ছ ভাষা!”

সত্য এবার কথা বলে, “থাক্ পিসঠাকুমা ওসব জাত থাকা জাত যাওয়ার গল্পো! ও তোমার যা যাবার সে যাবেই। তা কে রুখতে পারবে? ও কথা ছাড়ো। তোমার এমন হাল হল কি করে তাই বল? এত তীর্থধর্ম করে হাওয়া বদল করে এসেছ, শরীর তো ভাল হবার কথা!”

“আর ভাল!”

মোকদ্দা জিন্তে একটা শব্দ করেন, “আমার ভাল একেবারে সেই যমরাজ এলে তবে। বর তো কখনো চোখে দেখি নি, ওই যম বরের চতুদোলাতে চড়েই যাব। তবে একালে ভাল আর কজন আছে? সেই সেবারও যে গাঁ দেখেছিস সে আর নেই। মানুষের দেবদ্বিজ উক্তি যাচ্ছে, গুরুলঘু জ্ঞান যাচ্ছে, মানুষ মনিষত্ব সব ঘুচেছে। দেখবি, ঘুরে ঘুরে দেখবি তো? দেখিস সুখ পাবি না।”

দিন সাত্তক থাকার পর ফিরতিপথে অনবরত সেই কথাই ভাবতে ভাবতে চলে সত্য। ভাবে আর মনে মনে বলে, “দেখেছি পিসঠাকুমা, দেখে বুঝেছি তোমার কথাই ঠিক। সুখ পেলাম না। সেই আগের গাঁ আর নেই। নেই আগের সুখ আনন্দ তৃপ্তি।”

এবারও ছেলেবেলাকার খেলার জায়গাগুলোয় গিয়ে গিয়ে বসে দেখেছে সত্য, চেষ্টা করেছে আগের দিনের সুর বাঁধতে, কিছু পারে নি। শেষ পর্যন্ত সেটা হাস্যকর হয়ে উঠেছে। ছেলেরদের দেখাবে বলে ফটু করে একদিন গাছে চড়তে গিয়েছিল, ছেলেরাই এমন হাঁ হাঁ করে উঠল যে নেমে আসতে হল। সেই সাতারের পীঠস্থান বড় দীঘিতে গিয়ে সাতার দিয়েছে, সুখ পায় নি। নোনা আতা আর নোড় কুড়াতে গিয়ে কেমন যেন পাগলামি মনে হয়েছে, তবু কুড়িয়ে এনে হেঁচে আচার করবে বলে রেখে দিয়ে ফেলে রেখেছে। বুঝেছে সুখ পাবে না ওরকি।

সুখ তো সবটা নিয়ে।

সেই সবটা, সম্পূর্ণটা, অখণ্টা কোথায়? কোথায় সেই আগের সঙ্গী-সঙ্গিনীরা?

আর কোন্‌খানে সুখ পাবে সত্য? এর মাঝখানে কোথায় খুঁজে পাবে রামকালী চাটুয্যের সেই মাঠবেড়ানো সেই দস্যি মেয়েটাকে? যাকে স্বপ্নে পাবার জন্যে এত তোড়জোড় করে আসা?

আর সেই মেয়েটার মা, তার ছায়াও কি থাকতে নেই? সব খুয়ে মুছে পরিষ্কার হয়ে গেছে?

বদলে গেছে।

সব বদলে গেছে।

সত্যর সেই চেনা জগৎটি অদৃশ্য হয়ে গেছে। নিশ্চিহ্ন হয়ে গেছে সত্যর আসনটি। সত্যর জন্মভূমির মাটিতে সত্য এখন আগন্তুক, বহিরাগত। এখন এখানে চোখের সামনে অন্যায় ঘটতে দেখলেও চুপ করে যেতে হয় মনে হয়, থাক! দুদিনের জন্যে এসে আর বেপরোয়া দুঃসাহসে বলতে পারা যায় না, এ বাপু তোমাদের অন্যায়ই।

নইলে এ কদিনে দেখলেও তো কম নয়। অনেক অন্যায় ঘটনা ঘটছে এখন সংসারে। তার কারণ বাবাই যেন কেমন একটু উদাসীন হয়ে গেছেন। আগে পাড়ার ছেলেরদের এতটুকু বেচাল করবার জো ছিল না, এখন বাড়ির ছেলেরাও ওঁর সামনেই যা ভয় করে, আড়ালে সমীহর বালাই নেই।

পাড়াতেই কত দেখল।

জটাধার বৌ এখন গলা তুলে শাওড়ীর সঙ্গে ঝগড়া করে। আর জটাধা নাকি বৌয়ের কাছে জোরহস্ত। সত্যর মামারবাড়িতে ভাইয়ে ভাইয়ে হাঁড়ি ভেন্ন হয়ে গেছে। দু বাড়িতে দুদিন নেমন্তন্ন খেতে হয়েছে সত্যকে। তুষ্টি গয়লা পক্ষাঘাত হয়ে বিছানায় পড়ে, তুষ্টির বৌ কেঁদে কেঁদে লোকের দোর-দোর ঘুরছে, কিন্তু কেউ আর ওর কাছে ঘি-দুধ নেওয়ার গা করছে না, টালবাহানা করে অন্যের কাছে নিচ্ছে। বলে কিনা, “তুষ্টির বৌয়ের পাতা দই? মুখে করা যায় না। তুষ্টির বৌ আবার ঘি তৈরি করতে শিখল কবে?”

জিনিস একটু যদি নীরেসই হয়, তা বলে চিরদিনের লোকটার দুঃখ-কষ্টের সময় দেখবে না? মানুষ আর জন্তু-জানোয়ারের তবে তফাৎ কি?

লুকিয়ে দুটো টাকা দিয়ে এসেছিল সত্য তুষ্টিকে, তুষ্টির চোখ দিয়ে জল পড়েছিল। বলেছিল, “বাপের মতন মনটি। কবরেজ মশাই আছেন, তাই এখনো বেঁচে আছি।”

কুমোর-জেঠা, কামার-খুড়ো, ধোপাপিসি কারুর সঙ্গে দেখা করতে বাকি রাখেনি সভা, কিন্তু আগের মতন কেউ সহাস্যে বলে নি, “এসেছিল ? আয় বোস ।” আসন পেতে দিয়ে বলেছে, “আসুন দিদিঠাকরুণ, বসুন ।” আর্চব, একসঙ্গে সবাই কি করে বদলে গেল ?

বদলায় নি শুধু গ্রামটা । বদলায় নি গাছপালা মাঠ বন দীঘি পুকুর । এরাই শুধু উচ্ছসিত আনন্দে স্বাগত জানিয়েছে মাথা নেড়ে নেড়ে, কোলাহল করে করে । আবার বিদায়কালে তারাই বিষণ বিধুর দৃষ্টি মেলে মৌন বেদনার মত তাকিয়ে থেকেছে ।

এরাই শুধু বদলায় নি ।

কিন্তু ওদের কাছে আর কতটুকু আশ্রয় ? আশ্রয় চায় হৃদয়ের কাছে, প্রাণোত্তাপের কাছে । কোথায় সেই উত্তাপ ? সকলেই ভাল করে যত্ন করেছে আর বলেছে, “ওরে বাবা, দুদিনের জন্য এসেছ!” কেউ বলে নি, “তুই যে আমাদের চিরদিনের!”

সত্যর মা বেঁচে থাকলে কি অন্য রকম হত না ? মার কাছে কি সত্যর সেই শৈশবটি সোনার কোঁটায় তোলা থাকত না ? সত্য এসে দাঁড়ালে মা সেই কোঁটোটি খুলে ধরে হাসিমুখে বলত না, “এই দেখ কিছু হারায় নি তোর । সব আছে । আমি তুলে রেখেছি ।”

তা হলে হয়তো সত্যর সেই পুতুলের বাস্তবটাকেও এসে দেখতে পেত সত্য । মা বলত, “এই দেখ, তোর হাতের কাপড় পরানো এই তোর ‘বড়বৌ, মেজবৌ, ন’বৌ’ সেবারে এসে যেমন রেখে গিয়েছিলি তেমনই আছে ।”

হ্যাঁ, ঠাকুমার শ্রাঙ্কে এসে সেবারে নিজের ফেলে যাওয়া পুতুলবান্ধু সাজিয়েছিল সত্য, তারপর তো তার নিজেরই জীবনের মধ্যে এল পুতুল ভেঙ্গে যাওয়ার ঘটনা । ...মাটির পুতুলের কথা আর কে ভেবেছে!

সত্য হয়ত মার ছেলমানুষিতে হাসত । তবু সুখ পেত না । মা না থাকলে বাপের বাড়ি এসে সুখ নেই । নিঃশ্বাস ফেলে ভাবল সত্য । অত বড় সংসারের মধ্যে সেই মানুষটাকে, অনেকের মধ্যে একজন মাত্র ছাড়া আর তো কোনদিন কিছু ভাবে নি । হঠাৎ আজ ধরা পড়েছে, সেই একজন ছাড়া সমস্ত ‘অনেকেই’ অর্থহীন ।

তবু ওরই মধ্যে পিস্ঠাকুমার কাছে দুদণ্ডসমলে প্রাণটা ঠাঞ্জ হত । কিন্তু সেই দোর্দণ্ডপ্রতাপ মানুষটার এত দূরবস্থা হয়েছে যে দেখলে প্রাণটা ফাটে ।

সত্য বলেছিল, “অতিরিক্ত খেটেখেটেই তুমি এমনি করে দেহ ভেঙেছ পিস্ঠাকুমা! তোমার সেই শরীর-স্বাস্থ্য এই কবছরে এমনি হয়েছে ?”

মোক্ষদা ধিক্কারের হাসি হেসে বলেছেন, “অতিরিক্ত যদি না খাটব তো সেই ভূতের মত আঁকড়া গতির নিয়ে করতাম কি বল ? ভেতরের ভূতই রাত-দিন ছুটিয়ে মারত !”

“আর এখন যে সেই ভূত তোমাকেই জীর্ণ করে ফেলল!”

“মরুক গে । যে কদিন পৃথিবীর অনুজলের বরাত আছে গড়িয়ে গড়িয়ে বাঁচবই । তারপর যে পারবে সে মুখে এক নুড়ো আগুন দিয়ে চিতেয় তুলে দেবে । যার ছন্দায় আসবে সে এক মুঠো পিণ্ডি দেবে । যার জন্য একটা দিন অশৌচ পালবার কেউ নেই, তার আবার বাঁচা-মরা!”

সত্য ব্যথিত হয়ে বলেছিল, “বাবাই তোমার সব করবে পিস্ঠাকুমা ।”

মোক্ষদা উদাস কণ্ঠে বলেছিলেন, “তা অবিশ্যি করবেন । রামকালী মহৎ মানুষ, হয়তো মায়ের মতন করেই পিসির ছেরাদ করবেন, তবু মনে মনে তো জানবেন যা করছি বাহুল্য করছি, ভিক্ষে দিচ্ছি ।”

আর্চব!

মোক্ষদাকে দেখে আগে কি কেউ কখনো ঘৃণাক্ষরেও ভাবতে পেরেছে, এ সংসার মোক্ষদার নিজের নয় ? এখানে মোক্ষদার জন্যে তেরান্তির অশৌচ পালবার মতও কেউ নেই ? মোক্ষদা মরলে যে তাঁর মুখে আগুন দেবে, পিণ্ডি দেবে, সে দয়া করেই দেবে ? মোক্ষদার প্রাণ্য পাওনা বলে দেবে না ?

অত দাপট তবে কোন্ ‘ভিতের’ ওপর খাড়া ছিল । নাকি কোথাও কোনও ভিত ছিল না বলেই ফোঁপরা দাপটটা অত বড় করে তুলে ধরতেন মোক্ষদা ? জানতেন হাতটা একটু শিথিল হলেই মুহূর্তে ভূমিসাৎ হয়ে যাবে ফাঁকা ইমারত ?

ভাবতে ভাবতে—

ছেলে দুটোকে একটু কাছে টেনে নিয়ে বসল সত্য। এরাই জোর, এরাই ইমারতের ভিত।

সারদাকে বুঝতে পারে নি সত্য।

নাগালই পায় নি সারদার।

অবিশ্যি সারদাই সর্বদা খাইয়েছে, মাখিয়েছে, যত্ন করেছে। সত্য ছেলেবেলায় যা যা খেতে ভালবাসত সেগুলি মনে করে রেখে দিয়েছে, হেসে হেসে বলেছে, “বুঝলি ছুড়ু, তোর দাদামশাইয়ের সংসারে এ হেন জিনিস মজুত থাকতে তোর মার কচি পছন্দ ছিল পুইমেটুলি ভাজা, শশাপাতার বড়া, তেতো পুঁটির টক!”

কিন্তু সত্য যখন বলতে গিয়েছিল, “যাই বল বৌ, খুব মহব্বুটা দেখিয়েছ তুমি! নতুন বৌ বলছিল, তুমি একপ্রকার দেবী—” তখন কেমন কঠিন হয়ে উঠেছিল সারদা। ভয়ানক তীক্ষ্ণ একটা হাসি হেসে বলেছিল, “তোমার তো বুদ্ধি-সুদ্ধি আছে ঠাকুরঝি, পরের মুখে বাল খাচ্ছ কেন?”

বুদ্ধি-সুদ্ধি যথেষ্ট পরিমাণ থাকা সত্ত্বেও কথাটার নিহিতার্থ ঠিক ধরতে পারে নি সত্য। আর সর্বদাই লক্ষ্য করেছে, পুরনো অন্তরঙ্গতার দরজা কিছুতেই খুলতে রাজী নয় সারদা।

আর বড়দা ?

তার সঙ্গে তো কথাই কইতে ইচ্ছে হয় নি সত্যর। বড়দা যে ওই গিল্লিবান্নি সারদার স্বামী, অত বড় দুটো ছেলের বাপ, তা যেন খেয়ালেই নেই বড়দার। যেন নতুন বৌয়ের নতুন বর! তার কথা নিয়েই সত্যর সঙ্গে হাসি-ঠাট্টা ফষ্টি-নাষ্টি! ছিঃ!

কারো সঙ্গেই যেন কথা কয়ে সুখ হয় নি।

অবিশ্যি বিদায়কালে সকলেই ব্যাকুলতা দেখিয়েছে, চোখের জল ফেলেছে, আবার কবে দেখা হবে বলে হা-হতাশ করেছে। কেউ কেউ ডাক ছেড়েও কেঁদেছে, কিন্তু সত্যর নিজেরই যেন ভেতরের শিকড় ছিঁড়ে গেছে। তাই নিজেও সে চোখের জল ফেললেও, যে প্রাণ নিয়ে এসেছিল সে প্রাণটা নিয়ে ফিরছে না।

রামকালী তো চিরদিন সকলেই দূরের মানুষ, শুধু দুঃসাহসী সত্যই পারত সেই দূরত্বের বর্ম ভাঙতে। কিন্তু সে দুঃসাহসিক আবদার সত্য নিজেই আর করতে পারে নি। সময়ও পায় নি। সর্বদা নবকুমারকেই কাছে কাছে রেখেছেন রামকালী। আর সত্যকে টেনেছে মেয়েমহলে। তবে নবকুমারকে যে রামকালী ভালোবেসেছেন ওইটাই পরম ভক্তি।

আসার সময় বাপকে প্রণাম করে স্বামীর উপস্থিতি ভুলে রুদ্ধকণ্ঠে বলে উঠেছিল, “তুমি তোমার এই দুঃসাহসী আঙ্গাঙ্গাওলা মেয়েকে ক্ষমা করেছ বাবা, সেই সাহসেই বলছি, আমি তোমার এক সন্তান, যেন সময়কালে সেবাবত্নের অধিকার পাই।”

রামকালীর গলাটা কি একটু কেঁপে উঠেছিল ?

চারিদিকের হা-হতাশের শব্দে সেটা ধরতে পারে নি সত্য। শুধু কথাটাই শুনতে পেয়েছিল। মেয়ের মাথাটা ধরে একটু নাড়া দিয়ে বলে উঠেছিল রামকালী, “চিরকালের পাকা বুড়ী! বাবার জন্যে তো খুব সুব্যবস্থা দিচ্ছিস! সেবার পাত্র হবেই বা কেন রে?”

এ কথাই আর উত্তর দিতে পারেনি সত্য, সেই গভীর একটু স্নেহস্পর্শে ভেতর থেকে উথলে কান্না এসেছিল তার। কাঁদতে কাঁদতে আর কান্না চাপতে চাপতে পালকিতে উঠেছিল।

পালকিতে উঠেও তাই কথা কইতে পারে নি অনেকক্ষণ।

হঠাৎ একসময় নবকুমার বলে উঠল, “তোমার বাবা আমাদের এই তুচ্ছ জগতের মানুষ নয়।”

চকিত হয়ে স্বামীর দিকে তাকাল সত্য।

বাতাস লেগে লেগে ততক্ষণে গালের জলের ধারাটা শুকিয়ে উঠেছে, চোখটা জল শুকিয়ে ভারী থমথমে হয়ে রয়েছে।

নবকুমার আবার বলল, “সেকালের রাজা-রাজড়াদের সব যেমন ভাব ছিল তেমনি ভাব। ভয়ও যত করে ভক্তিও তত আসে। এমন বাপ পাওয়া পরম পুণ্য।”

সত্যর মুখের কাছে একবার আসে, “তবু তুমি দেখছ ভাঙা রাসের ঠাকুর! আগের মানুষকে যদি দেখতে! এমন মন ভেঙেছে, শরীর ভেঙেছে!” কিন্তু বেদনাবিধুর চিন্তে অত কথা বলতে ইচ্ছে হয় না। শুধু আস্তে বলে, “মা থাকতে তো দেখলে না! মাকেও দেখলে না! এই আক্ষেপটা রয়ে গেল।”

মনে মনে বলে, দেখ কেন আমি বাপের গরবে গরবিনী!

কিন্তু তবু মেয়েসন্তান।

বাপের সে গরব শুধু মনের মধ্যে তুলে রাখবার। সে গৌরবে অধিকার নেই ভোগের দাবী নেই। ছেড়ে চলে যেতে হয়েছে, ছেড়ে থাকতে হবে। সেই গৌরবের ছায়ায় বসে জীবনকে ধন্য করার উপায় নেই; জীবনকে নিয়ন্ত্রণ করবার পথ নেই। ভগবান, কেন এই পোড়া সমাজ গড়েছিলে ?

সমাজের ব্যাপারে ভগবানকেই দোষ দেয় সত্য। তারপর বাইরের মৌন প্রকৃতির দিকে তাকিয়ে মনে মনে বলে, “বিদেয় নিষ্টি ভোমাদের কাছে; হয়তো বা জনের শোধ। পা বাড়ানি অকূলের দিকে। এখন দেখি জিতি কি হারি! রামকালী চাটুয্যের মেয়ে, যদি হারেও, তবু হার মানবে না।”

বারুইপুর ফিরে এসেই কলকাতায় যাওয়ার তোড়জোড়। যাত্রাকালে মা বাপ কেউই কথা বললেন না, ঠিক যাত্রাকালে তো বাড়ি থেকে বেরিয়েই গেলেন, যা কিছু করলো সদু।

কিন্তু আশ্চর্য, নবকুমার যেন এই বিরাট লোকসানটাকে আর লোকসান বলে মনে করছে না। রামকালীকে দেখে এসে পর্যন্ত ‘বাপ’ সম্পর্কে যে একটা উঁচু ধারণা তার জন্মেছে, তার সঙ্গে নীলাধরের এই মেয়ে-সংকীর্ণতা যেন বড় বেশী দৃষ্টিকটু লাগলো তার। ইচ্ছে হচ্ছিল মা-বাপের এই দুর্ব্যবহারের প্রসঙ্গ নিয়ে সত্যর সঙ্গে কিছু আলোচনা অর্থাৎ নিন্দাবাদ করে, কিন্তু সত্যর ভয়েই সাহস করল না। এগিয়ে চলল নতুন জীবনের দিকে।

॥ বত্রিশ ॥

এ এক আশ্চর্য সকাল!



যেন এই সকালের আকাশের কোন লুকনো পৃষ্ঠপটে নিথর হয়ে আছে অনেক রহস্য, অনেক আনন্দ, অনেক ভয়। সেই রহস্য আস্তে আস্তে উন্মোচিত হবে, সেই আনন্দ ধীরে ধীরে প্রসন্ন হাসি হাসবে, অথচ সেই ভয়মুঠোয় চেপে রাখবে সমস্ত সন্তাকে। তাই উচ্ছ্বসিত হতে বাধবে, উল্লসিত হতে বাধবে যতটা জুটছে তার সবটা গ্রহণ করতে বাধবে।

এই আশ্চর্য নতুন সকাল সেই অজানিতের ইশারা নিয়ে তাকিয়ে রইল সত্যবতীর মুখোমুখি।

সত্যবতী অবাক হয়ে তাকিয়ে রইল ভাস্কর মুখের দিকে। ভাবল, “আকাশটা কি রকম অন্যরকম!”

অথচ সত্য যে এইমাত্র এই স্বপ্ন-শহরের মাটিতে পা ফেলল, আর তার আকাশে চোখ মেলল তাও নয়। গতকাল বিকেলে এসে উঠেছে সে পাথুরেঘাটার এই একতলা বাসাবাড়িটায়।

তবু ভোর সকালে ঘুম ভেঙে ঘর থেকে বেরিয়ে এসে বেশ খানিকক্ষণ দাওয়ায় দাঁড়িয়ে রইল সত্য বিমূঢ়ের মত।

মনে পড়ল না, ঠিক এই মুহূর্তে ওর কোন কাজ আছে।

যে জীবনটা অভ্যস্ত ছিল, তার কাজগুলো যেন নিজেরাই সজীব হয়ে পর পর সামনে এসে দাঁড়াতে, কিন্তু চিরপরিচিত গতির সেই নিত্য কাজগুলো ঝাপসা হয়ে গেছে। এলোকেশীর হাতের কাটা খাল দিয়ে আর ডোঙা ভাসবে না সত্যর। এবার সত্যকে নিজে হাতে খাল কাটতে হবে।

কোথায় যেন ভোরের পাখীরা ডাকছিল, সত্যর মনে হল ওরা আর কি নিত্যেন্দ্রপুর থেকে উড়ে উড়ে সত্যর সন্ধান করতে এসেছে, না বারুইপুরের কোন এক অজানা গাছের ডালে বসে সত্যকে ডাক দিচ্ছে! বলছে, “সত্য, তুমি ভুল করতে বসেছ! দ্যাখ বিবেচনা কর, এখনও হয়তো সময় আছে ফেরবার!”

সত্য কি সত্যই ভুল করল ?

নইলে বুকের ভেতরটায় এমন ভয়-ভয় করছে কেন ? কেন নিজেকে কেমন যেন অসহায় লাগচে ?

দাঁড়িয়ে থাকতে বল পাচ্ছে না সত্য, তাই বসে পড়ল দাওয়ার ধারে। ভাবল হঠাৎ ঘুম ভেঙে উঠে এসে বোধ হয় মাথাটা হালকা লাগছে। একটুক্কণ বসে নিয়ে স্নান করতে গেলেই হবে। আজকের দিনটা পর্যন্ত ইচ্ছেমত, কাল থেকে নবকুমার কাজে লাগবে।

পাড়াগাঁয়ের 'কাছারী-বাড়ি'র চাকরি নয়, এ একেবারে কলকাতা শহরের অফিসের চাকরি। ভাত দিতে এক পলক এদিক ওদিক করলে চলবে না। সত্যকে গুনিয়ে গুনিয়ে এলোকেশীর এক বান্ধবী অবহিত করিয়ে দিয়েছিলেন, "বুঝবেন ঠ্যালা! স্বাধীন সংসার করার মজা বুঝবেন! 'আপিসের ভাত' যে কী বউ জানেন না তো! দেখে এসেছিলাম সেবার কালীঘাটে আমার পিসতুতো ডায়েদের বাড়ি গিয়ে। একটা মানুষের ভাত যোগাতে তিন-তিনটে বৌ হিমসিম খেয়ে যাচ্ছে। তোমার বৌ অবিশ্যি করিৎকমা, তবে শাশুড়ী-ননদের তলায় তলায় কাজ, আর এক হাতে 'হরিদ্বার গঙ্গাসাগর'— অনেক তফাৎ!"

এলোকেশী বলেছিলেন, "পারবে। বুকের পাটার জোরেই পারবে। তবে খোয়ার হতে আমার ছেলেটারই হবে। বাছা আমার জগতের কিছু জানে না, তাকে গলায় গামছা বেঁধে নিয়ে গিয়ে গাড়িতে জুততে গেল। যাক—ভগবান দেখছেন!"

বান্ধবী বলেছিলেন, "তা তো সত্যি। যে অন্যায় পথে সুখ করতে যাবে, তার বিচার ভগবান অবিশ্যি করবেন সংসার করা মানে তো আর মাছের ল্যাজা ভাত খাওয়া নয়, তার অনেক হ্যাঁপা। কথাতেই আছে—একলা ঘরে চতুর্ভুজে খেতে বড় সুখ, মারতে এলে ধরতে নেই ওইটাই যা দুখ।"

এর পর আলোচনার মাধ্যমে ভবিষ্যৎবাণী করা হয়েছিল, "ঠ্যালা বুঝলেই নবুর বৌ পালিয়ে আসতে পথ পাবেন না!"

সত্য সেদিন মনে মনে তাচ্ছিল্যের হাসি হেসেছিল। কিন্তু আজ সত্য একটু যেন ভয় পাচ্ছে। ভাবছে এই শহরকে আমি বুঝতে পারব তো? আপনার করতে পারব তো? এ শহর আমাকে "আয়" বলে কাছে টানবে তো? এখানে আমাকে নিষ্পরের মত, বেচারীর মত, থাকতে হবে না তো? না "আপিসের ভাত"কে ভয় সত্যর, ভয় করে না একা হাত'কে। সত্যর ভয় অপরিচয়ের ভয়।...

"মা!"

বড় খোকা তুড়ু এসে দাঁড়িয়েছে পিছনে। নীলাধর নাম দিয়েছিলেন 'তুড়ুক সোয়ার', সেই থেকে তুড়ু। ভাল নাম সাধন। প্রথম সন্তানটি নষ্ট হয়ে গেছে, তাই এটি সাধনার ধন। অতএব সেই ঘেঁষা নাম।

তুড়ুর ফোলা ফোলা চোখে অগাধ বিশ্বাস।

সত্য তাড়াতাড়ি মুখ ফিরিয়ে বলে, "উঠে পড়েছিস! ভাই ওঠে নি?"

"না।"

"আর তোদের বাবা?"

"না।"

"তা উঠবেন কেন? আয়েসটি যে নবাবী! কাল থেকে বুঝবেন মজা!"

আলিস্যি ভেঙে উঠে দাঁড়ায় সত্য।

কী বোকাম মত বসেছিল এতক্ষণ! কী ভাবছিল আবোলভাবোল! নতুন জায়গায় সব ব্যবস্থা করে নিতে কম তো দেয়ি হবে না!

গতকাল সন্ধ্যায় রান্না হয় নি।

ভবতোষ মাস্টার ঘর-দোর দেখিয়ে-গুনিয়ে ওদের সরিয়ে রেখে বলেছিলেন, "তুমি তা হলে এদের সামলে-সুমলে নিয়ে বসো নবকুমার, বৌমাকে বলে বেলা থাকতে প্রদীপ জ্বালাবার ব্যবস্থা করে ফেলতে, নতুন জায়গা। আমি তোমাদের জন্যে কিছু খাবার নিয়ে আসছি। এখন আর রান্নাবান্নায় কাজ নেই—"

সত্য ঘরের ভিতর থেকে দরজার শিকল নেড়েছিল।

নবকুমার সেদিক থেকে ঘুরে এসে হাত কচলে ঝেঁলেছিল, "আপনি আবার বৃথা কষ্ট করবেন কেন? ইয়ে মানে—যাহোক করে দুটো ভাত ফুটিয়ে নেবে এখন।"

ভবতোষ মাস্টার একবার সেই দরজার দিকে দৃষ্টিপাত করে সরাসরি অন্তরালবর্তিনীকেই উদ্দেশ্য করে বলে উঠেছিলেন, "যাহোক করে করতেও অনেক ল্যাঠা বৌমা, কাল সকাল থেকেই একেবারে নতুন করে পত্তন করো। কাল আমি একটা বাসনমাজার ঠিকে-ঝি যোগাড় করে নিয়ে আসব। আজ বাজার থেকে পুরী-তরকারি মিষ্টি এনে...."

নবকুমার হঠাৎ বলে উঠেছিল, “বাজারের পুরী-তরকারি ? কলকাতায় পা দিতে দিতেই জাতটা খোয়াব ?”

হেসে উঠেছিলেন ভবতোষ মাষ্টার।

বলেছিলেন, “নাঃ, তুমি একেবারে মাষ্টার আমলেই আছ নবকুমার ! জাতটা খোয়াচ্ছ কিসে ? আমি কি স্লেক্স হোটেলের খানা এনে খাওয়াতে চাইছি তোমায় ? দেশে তোমরা ময়রার ঘরের জিলিপি মেঠাই ফুলুরি বেগুনি খাও না ? এও সেই ময়রার দোকানের !”

নবকুমার মাথা চুলকেছিল...

“ইয়ে মানে, ওই তরকারি-টরকারি বলছিলেন তাই বলছি। একটা দিনের জন্যে কেন আর...”

ভবতোষ মাষ্টার জোর দিয়ে বলেছিলেন, “শুধু একটা দিন কেন, এমন অনেক দিনই হতে পারে নবকুমার। বৌমা একা মানুষ। শরীর-অশরীর আছে। কোনদিন যদি ভাতের হাঁড়ি নামাতে না পারলে! তা ছাড়া জলখাবার বলে কথা আছে। কলকাতায় এত হরেক খাবার, খাবে না ছেলেপুলে ? তোমায় তো আমি দোকানের ভাত খেতে বলছি না। তবে যদি বৌমার তেমন আপত্তি থাকে...”

আর একবার শেকল নড়ে উঠেছিল।

নবকুমার ঘুরে এসে বলেছিল, “না, ইয়ে মানে ওদিকে আপত্তির কিছু নেই। বলছে, আপনি যা বলবেন তাই শিরোধার্য। আপনি হিতৈষী বন্ধু গুরু। আপনার...”

“হয়েছে হয়েছে। অত ভাল ভাল কথা বেশী খরচ করবার দরকার নেই নবকুমার। তোমরা খেয়েদেয়ে একটু সুস্থ হও, আমি দেখে বাসায় যাই।”

নিজের পয়সায় একরাশ খাবার এনেছিলেন ভবতোষ মাষ্টার। পুরী তরকারি চমচম রাবড়ি। সাজা পানও এনেছিলেন। বিহ্বল হয়ে গিয়েছিল ছোট ছেলে দুটো। কী সোনার দেশে এল তারা!

নিতাইয়ের সঙ্গে একসঙ্গে থাকবার ব্যবস্থা হয়েছে, কিন্তু এদের সঙ্গে একসঙ্গে এসে উঠতে পারে নি নিতাই। কদিন পরে আসবে। রাত্রে তাই একবার প্রস্তাব করেছিলেন ভবতোষ, “একা ভয় পাবে না তো নবকুমার ? নতুন জায়গা। বল তো যে কদিন তাঁ নিতাই আসে, রাতে আমি তোমাদের পাহারা দিই ?”

নবকুমার হাতে চাঁদ পাচ্ছিল।

কিন্তু সে চাঁদ মুঠোয় পেতে দিল না সত্য। শেকল নড়ে জানাল, মাষ্টার মশাইয়ের কষ্ট পাবার দরকার নেই, দরজার ছড়কো লাগিয়ে বেশ খুঁকবে তারা।

ভবতোষ চলে গিয়েছিলেন।

আর চলে যাবার পর সত্যকে এক হাত নিয়েছিল নবকুমার। চিরকাল যেটা বলে সেটা বলেই বসেছিল।

“সব তাতেই দুঃসাহস প্রকাশ! ভগবান যে কেন তোমাকে বেটাছেলে না করে মেয়েছেলে গড়েছিল তাই ভাবি!”

সত্যর মুখ কঠিন হয়ে ওঠে নি। সত্য হেসে ফেলেছিল। গলা খুলে। নিজের এই খোলা হাসির শব্দ নিজের কানেই অপরিচিত ঠেকেছিল সত্যর।

তবু খোলা গলাতেই বলেছিল, “জাববার কি আছে ? তোমাকে ভগবান বেটাছেলে করে গড়েছে। অপরের পিতোশ করলে চলবে কেন ? বারো মাস তো অপরে করবে না ? তবে ? গোড়া থেকেই মনের জোর করে পায়ে দাঁড়াবার চেষ্টা করা উচিত।”

সন্ধ্যার অন্ধকারে মিটমিটে প্রদীপের ছায়ায় এ বল খুঁজে পেয়েছিল সত্য, আর সকালের হীরে-বকবকে আলোয় দুর্বল হয়ে পড়বে ?

না, পড়বে না। সত্য আঁচল কোমরে জড়িয়ে নেমে পড়েছে কাজে। নেমে পড়ল নতুন জীবনসংগ্রামে।

এ সংসার সত্যর নিজের। নিজের ছাঁচে, নিজের ভাবে, নিজের স্বপ্নে একে গড়ে তুলবে সত্য।

ভবতোষ বাসার ঘরদোর সব ধুইয়ে মুছিয়ে রান্নাঘরে উনুন পাতিয়ে রেখেছিলেন। আনিয়ে রেখেছিলেন ঘুটে কয়লা। কাল নবকুমারের মাধ্যমে কয়লার উনুন জ্বালার পদ্ধতিটাও শিখিয়ে দিয়ে গেছেন সত্যকে। সেই পদ্ধতিতে উনুনে আগুন দিতে দিতে হঠাৎ ভারি অবাধ লাগল সত্যর। যেভাবে ইচ্ছে কাজ করতে পারে সত্য, কেউ কোথাও চোখ দেবার নেই, ছল ধরবার কি খুঁত ধরবার নেই। এ কী অদ্ভুত অনুভূতি!

এ কী অপূর্ব সুখ!

এই সুখটার ধারণা নিয়েই তো মুক্তির লড়াই করে নি সত্য। ও শুধু চেয়েছিল তেমন দেশে চলে আসতে, যেখানে রোগে ডাক্তার আছে, ছেলেদের জন্য ভাল ইঙ্কুল আছে, পুরুষদের জন্যে কাজ আছে।

নিজের জন্যে ভাল কি আছে, সে কথা ভেবে দেখে নি সত্য। শুধু জেনেছিল নিন্দে আছে, ধিক্কার আছে। এখন দেখছে আরো অনেক আছে। স্বাধীনতার সুখ মানে তা হলে এই? মাথার ওপর সর্বদা উদ্যত খাঁড়ার বদলে অনেক উঁচুতে আলো-ঝকঝক আকাশ থাকা?

শহরের মেয়েরা যে কেন বিদ্যেয়-বুদ্ধিতে অনেক উঁচু, তার মানে বুঝতে পারে সত্য। যারা এত পাচ্ছে, তারা তার প্রতিদান দেবে বৈকি!

হঠাৎ একটু শুক্ক হয়ে গেল সত্য।

সেও তো অনেক পাবে, তার বদলে দিতে পারবে তো কিছু!

রান্নাঘর থেকে বেরোতে গিয়ে খতমত খেয়ে ফের ঘরে ঢুকে পড়তে হল সত্যকে! ভবতোষ উঠানে দাঁড়িয়ে। 'উঠান' বলতে সত্যর পরিচিত জিনিস নয়। শানবাঁধানো চারটোকো খানিকটা জায়গা মাত্র। পাড়াগায়ে একে চাতাল বলে।

সে যাই হোক, ভবতোষ সেখানে দাঁড়িয়ে গলাখাঁকারি দিলেন, তারপর বললেন, "নবকুমার আছ নাকি?"

"বাবা ঘুমুচ্ছে।"

সাদা দিল খোকা।

ভবতোষ গলা চড়ালেন, "এখনো ঘুমুচ্ছে? কাল থেকে যে দশটায় অফিস যেতে হবে। আমি এই একজন লোক ঠিক করে আনলাম, মেয়েলোক। খোকা, তোমার মাকে তা হলে বল, কথাবার্তা কয়ে নিতে। আমি অবশ্য মোটামুটি বলে নিয়ে এসেছি। ঝাপন মাজা, ঘর মোছা, ছাড়া কাপড় কাচা, কয়লা ভাঙা, উনুন ধরানো, মশলা পেশা এইসব করতে হবে। মাইনে মাসে বারো আনা, জলপানি চার আনা। তবে মাথায় মাথতে তেল একটু দিতে হবে। চান না করলে তো আর মশলা পেশা চলবে না!"

নবকুমারের সাদা পাওয়া যায় না। ঘরের মধ্যে বিহ্বল সত্য এই সকালেও ঘামতে থাকে।

সব কাজই যদি কি করবে, সত্য তুমি হলে কী করবে?

শুধু বাসন মাজার জন্যেই হলে তো হত।

ভবতোষ সঙ্গের স্ত্রীলোকটিকে উদ্দেশ্য করে বলেন, "কই গো বাছা, এগিয়ে এস। ওই ওদিকে মা রয়েছেন, তাঁর সঙ্গেই বলা-কওয়া করে নাও। এখন থেকেই লেগে যাও তা হলে। এই তো রাতের শকড়ি ঘটবাটি পড়ে রয়েছে।"

আর বেশীক্ষণ লজ্জাবতীর ভূমিকার মধ্যে নিজেকে আবদ্ধ রাখা সম্ভব হল না সত্যর। মাথায় কাপড়টা টেনে দরজার কাছে এসে দাঁড়িয়ে নম্র গলায় বলে ফেলল, "এত সবেের জন্যে বলার দরকার ছিল না। ঘরের কাজ নিজেই চালিয়ে নিতে পারব—"

ভবতোষ প্রথমটা একটু খতমত খেলেন, কারণ সত্য এসে কথা বলবে, আশা করেন নি। তারপর সামলে উঠে বললেন, "কেন? লোক যেক্ষেত্রে রাখাই হচ্ছে, সবই করবে। এমনিতে শুধু বাসন মাজলেও তো আট আনার কম রাজী হচ্ছে না। আর গণ্ডা চারেক পয়সা দিলেই—"

"পয়সার জন্যে না—" সত্য এবার প্রায় স্পষ্ট গলায় বলে ওঠে, "নিজের অব্যাস খারাপের জন্যে বলছি। সব কাজ লোক দিয়ে করালে আয়েস এসে যাবে। সময়ই বা কাটবে কিসে?"

"ভবতোষ মিনিটখানেক হাঁ করে তাকিয়ে থাকেন। কথাটা হৃদয়ঙ্গম করতে এ সময়টুকু লেগে যায় তাঁর।

শুণ্ডরবাড়িতে খেটে খেটে হাড়কালিকরা কোন মেয়ে যে বাসায় এসে "আয়েস" করতে চায় না, এ তাঁর অভিনব মনে হল। ছাত্র নবকুমারের স্ত্রীটি সম্পর্কে অবশ্য তিনি বরাবরই একটু সমীহ ভাবাপন্ন, তবু আজ যেন তার সম্পর্কে আরও বেশি অবহিত হলেন।

হয়তো বা কিঞ্চিৎ অভিজ্ঞতও।

তার পর ধীরস্বরে বললেন, "মেয়েছেলেদের জন্যে আরো অনেক ভাল ভাল কাজ আছে বৌমা, তাতেও সময় কাটবে। তা ছাড়া অবকাশকাল ঘরে বসে বসে লেখাপড়ার চর্চা করলেও—"

কথা শেষ হল না, নবকুমার বেরিয়ে এল ঘর থেকে চোখ রগড়াতে রগড়াতে। ভটস্থ হয়ে বলল, "মাস্টার মশাই আবার সঙ্কালবেলাই কষ্ট করে—"

“না, কষ্ট আর কি! এই কাজের লোক ঠিক করে আনলাম। দেখিয়ে শুনিয়ে দাও একে। এবার একটা গোয়লা ঠিক করে দিতে পারলেই সব ব্যবস্থা হয়ে যায়।”

“আপনি আর কত কষ্ট করবেন?” সত্য বলে ওঠে।

আর সঙ্গে সঙ্গে চমকে ওঠে নবকুমার।

দরজার শেকল নাড়া পর্যাটো কখন পার হল? এভাবে স্পষ্টাঙ্গি কথা! অবাক কাণ!

ভবতোষ বলেন, “আমাকে যদি তোমরা পর ভাবো নবকুমার, তবেই কুষ্ঠা বোধ করবে। আমি কিছু তোমাদের পর ভাবছি না।”

“না না, সে কি? পর মানে?”

নবকুমার কথার খেঁই হারায়। এবং বোধ করি “আপনি” ভাবার প্রমাণ দেখাতেই তাড়াতাড়ি বলে ওঠে, “আমি তো এই ভাবছিলাম আপনার সঙ্গে হাটটা ঘুরে আসি। কোন্ কোন্ বারে হাট বসে এখানে?”

ভবতোষ হাসেন।

বলেন, “কলকাতায় রোজই হাট।”

“ও! প্রত্যেক দিন বাজার বসে?”

“তা বসে। একটা নয়, অনেক বাজার। তা আজ আর তোমাকে যেতে হবে না, আমিই ব্যবস্থা করছি। তুমি বরং বাড়ির কাজে, মানে কি সুবিধে অসুবিধে—”

“বাড়ির কাজে কিছু আটকাবে না—”, সত্যর ধীর গঞ্জীর কণ্ঠস্বর ধ্বনিত হয়। তার পর ঘরের মধ্যে থেকে একটা ধামা বার করে এনে নবকুমারের সামনে নামিয়ে দিয়ে চলে যায় সত্য।

এমনি করেই আরম্ভ হয় সত্যর শহরে সংসার।

নিজের সংসার।

কদিন পরে নিতাই আসে।

নবকুমার বলে, “ওকে আর তোমার লজ্জা করলে চলবে না। একসঙ্গে থাকা, ভাইয়ের মত, বাড়িতে আর দ্বিতীয় মেয়েছেলে নেই, ভাত বেড়ে দেবে তুমি—”

সত্য মৃদু হেসে বলে, “অত বলবার কি আছে? আমাকে কি তোমার খুব লজ্জাবতী মনে হয়?”

“আহা, ইয়ে তা নয়। মানে লজ্জা আর কোথা? মাষ্টার মশাইয়ের সঙ্গেই তো তুমি দিব্যি কথা চালাচ্ছ... বুঝলি নিতাই, প্রথম দিন আমি তো তাজ্জব! যদি ভাগ্যিস মা নেই সামনে! খুব সাহসী, বুঝলি? মাষ্টার মশাইয়ের সঙ্গে কথা বলতে আমারই তো—”

নিতাই এক নজর সত্যর দিকে দৃষ্টিপাত করে বলে, “বৌঠানকে এতদিন দেখেও চিনতে পারলে না নব? তোমার আমার মাটি দিয়ে গড়া উনি নন। তোমার অনেক ভাগ্য তাই...”

হঠাৎ ওদের চমকে দিয়ে হেসে ওঠে সত্য, “নাও, নাওয়া-খাওয়া শিকেয় তুলে এখন দুই বন্ধুতে ভাগ্যবিচার শুরু হয়ে গেল! আচ্ছা ঠাকুরপো, তুমিই বল, মাষ্টার মানে হল গিয়ে শুরু, কেমন কিনা? তা শুরুকে লজ্জা করলে চলবে কেন? ভক্তি করব, ছেন্দা করব, মান্য করব, ভয়-লজ্জা করব কেন? আমি তো ওনার কাছে ইংরিজি পড়ব ঠিক করেছি।”

“কী বললে?”

নবকুমার জ্যা-মুক্ত ধনুকের মত ছিটকে ওঠে, “কি শিখবে?”

“বললাম তো।”

“পাপলামি করো না। বেশী বাড়াবাড়ি ঠিক নয়। যা রয় সয় তাই ভাল। কলকাতায় এসেছ, বাসার সংসার করছ, এ পর্যন্ত একরকম, তা বলে—”

“তা ইংরিজি শিখব বলেছি বৈ তো গাউন পরে হোটলে খানা খেতে যাব বলি নি?” কৌতুকের হাসিতে জোড়া ভুরু নেচে ওঠে সত্যর, উৎফুল্ল মুখ লাল হয়ে ওঠে, নিতাইয়ের দিকে সরাসরি তাকিয়েই বলে, “তোমার বন্ধুর সবতাতেই ভয়! ঘরে বসে বসে বই পড়ে যদি একটু জ্ঞান-বিদ্যে অর্জন করা যায়, তাতে দোষটা কি বল তো? নাকি মেলেছ অক্ষর ছুঁলেও জাত যাবে?”

নবকুমার গঞ্জীরভাবে বলে, “তা একরকম তাই বৈকি। যতই হোক হিন্দুর মেয়ে!”

“আর নিজে হিন্দুর ছেলে নও?”

“বেটাছেলের কথা আলাদা।”

“আলাদার কিছু নেই। ধর্মের কাছে সব সমান। আর যদি জাত যাওয়ার কথাই বল—”, আর একবার কৌতুকের আলো ফুটে ওঠে সত্যর মুখে, “সে তা হলে অনেক দিনই গেছে।”

“অ্যা!”

“অ্যা!”

যুগপৎ দুই বন্ধুরই মুখবিবর হাঁ হয়েই থেকে যায় বুজতে ভুলে।

সত্য মৃদু মৃদু হাসতেই থাকে।

একটু চেতন্য লাভ করে নবকুমার বলে, “ইংরিজি পড়েছ তুমি?”

“সামান্য সামান্য। নিজের চেষ্টায় যা হয়। তোমার বই দুটো তো ছিল ঘরে।”

“তাজ্জব!”

নিতাইয়ের কণ্ঠ থেকে শুধু এইটুকু স্বর নির্গত হয়।

“কিগো ঠাকুরপো, আমার হাতে চলবে তো? নাকি জাত যাওয়ার হাতে খাবে না?”

কথা নেই বার্তা নেই সহসা নিতাই এক হাস্যকর কাজ করে বসে। প্রশ্নের উত্তর না দিয়ে হুমড়ি খেয়ে পড়ে সত্যর পায়ের কাছে সাষ্টাঙ্গ এক প্রণাম করে।

সত্য অবশ্য এর জন্যে প্রস্তুত ছিল না। দু পা পিছিয়ে যায়। তারপর ধীরস্বরে বলে, “যাক ঠাকুরপো, গুরুজন বলে মানলে তাহলে? বেশ। নাও এবার বাধ্যতা কর। তোমার তো এখনো দুদিন ছুটি, চান করে খেয়ে ভাইপোদের নিয়ে ইঙ্কলে ভর্তি করতে যাও দিকিন। কদিন এসেছে, কেবল খেয়ে খেলিয়ে বেড়াচ্ছে। যার জন্যে এত কাণ্ড করে কলকাতায় আসা—”

॥ তেত্রিশ ॥

কালের খাতায় কয়েকখানা পাতা ডান দিক থেকে বাঁ দিকে চলে আসে, গড়িয়ে যায় অনেকগুলো দিন।

অনভ্যস্ত জীবন প্রায়-ধাতস্থ হয়ে এসেছে নবকুমারের। গতিতে বেশ খানিকটা ক্ষিপ্রতার সঞ্চার হয়েছে। বাড়িতে অফিসের গল্প করতে শিখেছে, অফিস যাওয়ার সময় কৌটো ভর্তি পান, আর পানের সঙ্গে দোজা নিতে শিখেছে।

ইতিমধ্যে ছেলেরা জ্বলে কয়েকবার ক্রাস বদলেছে, আর সত্যবতীরা একবার বাসা বদলেছে।

বাসা বদলাবার অবশ্য অতি সূক্ষ্ম গোপন একটা ইতিহাস আছে, সে ইতিহাসে শুধু সত্যবতীর আর ভবতোষ মাষ্টারের মধ্যেই নিবন্ধ।

বেশ চলছিল সংসার।

তাড়াহুড়ে করে স্বামীর আর স্বামীর বন্ধুর অফিসের ভাত রাঁধছিল সত্য। পান সাজছিল দু কৌটো করে। তারা বেরোতে না বেরোতে ছেলেদের নাওয়া-খাওয়া নিয়ে ব্যস্ত হচ্ছিল, “দুর্গা দুর্গা” উচ্চারণ করে ছেলেদের জ্বলে পাঠাচ্ছিল, তারপর সারাদিনের অবসরে সংসারের বাকী কাজগুলো সেরে ভুলে মন দিয়ে শিখছিল লেখাপড়া। বাংলা ইংরাজী দুই-ই।

বইয়ের যোগানদার ভবতোষ, পাঠশিক্ষকও ভবতোষ। নিয়মিত নয়, মাঝে মাঝে দুরূহ জায়গাগুলো বুঝে নিত সত্য। ঘরের মধ্যে উঁচু চৌকিতে বসতেন মাষ্টার, চৌকির সামনে মাটিতে সত্যর দুই ছেলে বসত মাদুরে নিজেদের বই খাতা নিয়ে, আর সত্য মাদুর থেকে কিছুটা দূরত্ব বজায় রেখে মেজের বসত মাথায় কাপড় টেনে।

কিন্তু কথা চিরদিনই স্পষ্ট সত্যর।

তাই দূরত্ব সত্ত্বেও তার প্রশ্ন বুঝতে অসুবিধে হত না ভবতোষের।

এই পড়াশোনার মাঝখানে হঠাৎ একদিন সত্য বলে বসল, “আমাদের জন্যে অনেক তো করলেন আপনি, আর একটু কষ্ট করতে হবে।”

ভবতোষ বিচলিত হয়ে বললেন, “কষ্ট কিসের, কষ্ট মানে?”

“কষ্ট তো বটেই। এযাবৎ অনেক কষ্ট করলেন। সে যা হোক, আপনি পিতৃতুল্য, আমি আপনার মেয়ের মত, তাই ‘কিন্তু’ আমি হচ্ছি না—”



সত্যর বড় ছেলে লক্ষ্য করল, হঠাৎ যেন মাটির মশাইয়ের মুখটা কেমন বদলে গেল। কি রকম যেন ভয়-পাওয়া ভয়-পাওয়া মুখ হয়ে গেল।

সত্যর অবশ্য মাথায় ঘোমটা, মুখী নীচু।

ভবতোষ অক্ষুটে কি যেন বললেন। সত্য পরিষ্কার গলায় উত্তর দিল, “হ্যাঁ, সেই কথাই বলছি— ‘কিন্তু’ আমি হচ্ছি না। আপনি কায়েত ঠাকুরপোর জন্যে অন্য একটা ব্যবস্থা করে দিন। এখানে তো গুনছি মেস-ঘর না কি যেন আছে, মাথাপিছু খাই-খরচা দিয়ে বেটাছেলেরা এক জোট হয়ে থেকে আপিস-কাছারি করে।”

কায়েত ঠাকুরপো অর্থে নিতাই।

সামনে শুধু “ঠাকুরপো” বললেও আড়ালে তার সম্পর্কে অপরকে বোঝাতে “কায়েত ঠাকুরপো” বলেই উল্লেখ করে সত্যবতী। কিন্তু সেটা কেবলমাত্র বোঝাতেই।

নবকুমারের সঙ্গে তা ঠিক ভাইয়ের মতই ছিল সে এ বাড়িতে, আর নেহাত “ভাতে”র ছোঁয়াটা বাদে অত বামুন-কায়েতের ভেদাভেদও ছিল না সত্যর কাছে। খুব সৌহার্দ্যই তো ছিল।

হঠাৎ কি হল ?

ভবতোষ তাই অন্যমনস্ক ভাবে বললেন, “সে তো আছে।”

“হ্যাঁ, সেই কথাই বলছি। ওনার থাকার জন্যে ব্যবস্থা একটা আপনাকে নিয়াসই করতে হবে।”

ভবতোষ মাথা চুলকে বলেন, “তা না হয় দিলাম, কিন্তু হঠাৎ ? মানে সে কিছু বলেছে ? ইয়ে এখানে থাকবে না বলে—”

“না, তিনি কিছু বলেন নি,” সত্য দৃঢ় গলায় বলে, “আমিই বলছি। আর এটা আপনাকে করতেই হবে।”

ভবতোষ মুহূর্ত কয়েক চুপ করে থেকে আশ্তে বলেন, “তুমি যখন বলছ বৌমা; অবশ্যই ন্যায্য কোন কারণ আছে। তবু মানে বুঝতে পারছি না বলে কেমন যেন চিন্তায় পড়ছি।”

এবার আর উত্তর এল না সত্যর দিক থেকে।

ভবতোষ উঠে দাঁড়ালেন।

তারপর বললেন, “নবকুমারেরও এই মত হোঁচল।”

সত্য বলল, “ঘর-সংসারের সুবিধে-অসুবিধে বেটাছেলের মতামত চলে না। ব্যবস্থা হয়ে গেলে বললেই হবে।”

ভবতোষ বুঝলেন। বুঝলেন কেন একটা গোলমালে ব্যাপার ঘটেছে। কিন্তু নিতাই ছেলেটা তো—হল কী!

আচ্ছা হঠাৎ বলা-কওয়া নেই, নিতাইকে তিনি বলবেন কি করে, “ওহে তোমার জন্যে মেসের ঘর যোগাড় করেছি, কাল থেকে থাকো গে যাও সেখানে!”

সে কথা বলেও ফেললেন।

“নিতাইকে আগে একটু না জানালে—”

“হ্যাঁ, সে একটা চিন্তা বটে। কিন্তু কি আর হবে ? বলতেই যখন হবে, সে ব্যবস্থা আমিই করব।”

ভবতোষ অগত্যাই বিদায় নিলেন।

বড় ছেলে বলল, “কাকাবাবু কেন এখানে থাকবেন না মা ?”

সত্য গম্ভীরভাবে বলল, “ছেলেমানুষ সব কথায় থাকতে নেই খোকা। যখন যা হবে দেখতেই পাবে। কেন, কি বিস্তারিত ভাবে বসো না।”

তা তারা শুধু দেখতেই পেল।

দেখল বাবা কোথায় যেন পালিয়ে থাকল, মা চুপচাপ দরজা ধরে দাঁড়িয়ে রইল আর নিতাইকাকা নিজের তোরঙ্গ আর বিছানা নিয়ে আশ্তে আশ্তে একটা ভাড়াটে ঘোড়ার গাড়িতে গিয়ে উঠল।

পরিস্থিতিটি এমন থমথমে যে, একটিও প্রশ্ন করতে সাহস হল না তাদের।

তা সাহস প্রথমটায় নবকুমারেরও হয় নি। তাই সে সকাল থেকে পালিয়ে বেড়াচ্ছিল। অনেক রাতে বাড়ি ফিরে প্রায় চোরের মত চুপি চুপি তাকিয়ে দেখল নিতাইয়ের ঘরটার দিকে। দেখল দরজায় শেকল তোলা।

বুকটা ধক করে উঠল।

মনে হল তার “অস্তর” নামক জায়গাটাতে যেন অমনি একটা শেকল তোলা দরজা দাঁড়িয়ে রয়েছে মুখ গভীর করে। সে দরজা আর বুঝি কোনদিন খুলবে না। সেই বন্ধ ঘরের মধ্যে রয়ে গেল নবকুমারের অনেকখানিটা সুখ, অনেকখানিটা আনন্দ।

ঈশ্বর জানেন সত্যর হঠাৎ কেন এই খেয়াল!

নিতাইয়ের কোন ব্যবহারে যে সে রাগ করেছে তাও তো মনে হচ্ছে না। নিজের চক্ষে কাল দেখেছে নবকুমার, রান্নাঘরে নিতাইয়ের ভাত বাড়তে বসে টপ্‌টপ্‌ করে চোখের জল পড়ছে সত্যর। আর এও লক্ষ্য করেছে নিতাই যা যা খেতে ভালবাসে, সেই সবই আজ কদিন ধরে রাখছে সে।

তবে ?

হিসেবটা মিলছে কোন্‌খানে ?

তবে কি খরচপত্রের কথা নিয়ে মাথা ঘামাচ্ছে সত্য ?

কিন্তু তাতেই বা প্রশ্নের উত্তর কোথায় ? নিতাই তো সংসার-খরচের ভাগ না দিয়ে ছাড়ে না।

গোলকধাঁধার মধ্যে কাটাতে হয়েছে নবকুমারকে।

সত্যকে প্রশ্ন করে সদুত্তর জোটে নি। সে বলেছে, “এ তো ভাল ব্যবস্থাই হচ্ছে। দু’বেলা বাড়ি ভাড়াটা পেলে ঠাকুরপোর আর বৌ এনে বাসা করার চেষ্টা থাকবে না।”

নবকুমার বেঁচে উঠে বলেছিল, “ওর পরিবারের কথা ও বুঝবে। সে চেষ্টা যে করতেই হবে তার কোন মানে আছে ? গাঁ-সুদ্ধ বৌ কি তোমার মতন বাসায় আসার জন্যে পা তুলে বসে আছে ?”

সত্য অবশ্য এ কথায় মর্মান্বিত হয়ে নিখর হয়ে যায় নি। প্রথম প্রথম যেমন হত। কারণ যে কোন বিষয়ে সামান্যতম অসুবিধে বা অপছন্দ হলেই সত্যের “বাসায় আসার” বাসনা নিয়ে খোঁটা দেওয়ার অভ্যাস নবকুমারের গোড়া থেকেই। বহুবিধ স্বাস্থ্য-সুখের আশ্বাদ পেলেও এবং বহুবার মনে মনে সত্যকে তারিফ করলেও, ওটা যেন ওর একটা মুদাদোষের মতই।

প্রথম প্রথম সত্য অভিমানে পাথর হয়ে যেত। আর সেই পাথর-মূর্তি অসহ হওয়ায় শেষ অবধি নবকুমারকেই মিটমিট করতে হত। বলতে হত, “ক্ষটি হয়েছে বাবা, শতকবার ঘাট হয়েছে। এই নাক মলছি, কান মলছি, আর যদি ও কথা মুখে আনি। ঠাট্টার কথা বুঝতে পার না, এই এক আশ্চর্যি!”

তা “ঠাট্টা” বলেই বুঝিয়ে বুঝিয়ে ক্রমশ জিনিসটাকে গা-সহ্য করে এনেছিল নবকুমার। এখন এমন হয়েছে যে ওই খোঁটাটাকে আর গ্রাহ্যের মধ্যেই আনে না সত্য। সেদিনও তাই আনে নি।

ওধু জুকুটি করে বলেছিল, “পা তুলে আছে কি নেই, সেটা তো যতক্ষণ না অর্জ্বায়ী হচ্ছ টের পাবে না। তবে মানুষের সংসারেও নেয্য হিসেব একটা আছে। বিয়েটা করে লোকে ঘরকন্না করবার জন্যেই।”

আরো খানিক বাক্যব্যয় করেছিল নবকুমার। অনেকটা একতরফ। তবু তার মনে আশা ছিল শেষ পর্যন্ত নিতাইয়ের যাওয়ার কথাটা হাওয়ায় ভাসবে। কিন্তু দেখল ক্রমশই সেটা পাকতে থাকল।

কেউই কিছু বলে না, তবু যেন কোথায় কি হতে থাকে। খেতে বসে দু’বন্ধুতে কথাও হয় না তা নয়। কিন্তু সে যেন শুকনো-শুকনো আঠা ছাড়া। অথচ নিতাইকে স্পষ্টাঙ্গি জিজ্ঞেস করতেও সাহসে কুলোয় না।

সত্যকেও না।

কিন্তু আজ এই দুঃখের আবেগে ওর সাহস জেগে উঠল। ওখান থেকে তাড়াতাড়ি সরে এসে তীব্রবরে বলে ফেলল, “বিনি দোষে নিরপরাধ মানুষটাকে বাড়ি থেকে বিদেয় করে দিতে মনটা একবার কাঁদলও না ? ধন্য মেয়েমানুষ বটে!”

সত্য তখন প্রদীপের সামনে হেঁটমুণ্ডে বসে একখানা বইয়ের পাতা ওল্টাচ্ছিল, স্বামীর এই মন্তব্যে একবার মাত্র মাথাটা তুলল, তার পর নীরবেই আবার মাথা নীচু করল।

নবকুমারের তখন ভিতরে আলোড়ন চলেছে, তাই সবই খারাপ লাগছে। অতএব ওই বইয়ের পাতা ওল্টানোতেও গা জ্বলে গেল তার। বলল, “মা যা বলে ঠিকই বলে। মেয়েছেলের অধিক বিদ্যে সর্বনাশের মূল!”

সত্য চট করে বইটা মুড়ে ফেলে উঠে দাঁড়িয়ে বলল, “মাতৃবাক্য অবিশ্যই বেদবাক্য। অতএব আমিই বসে বসে তোমার সর্বনাশ সাধন করছি। তা তার তো আর চারা নেই। বিদ্যেটা তো আর ঘটিবাটি নয় যে, অসুবিধে ঘটাজে বলে সরিয়ে রাখব। কিন্তু ‘বিনাদোষে’ কিনা, আর মনটা কাঁদছে কিনা, সে সংবাদ তুমি সঠিক পেয়েছ ?”

“মন! হাঁ! পাষাণেও বরং প্রাণ আছে, তোমার মধ্যে নেই।”

বন্ধুকে যে নবকুমার কতখনিটা ভালবাসে তা সত্যের অজানা নয়, তাই এত বড় দোষারোপেও বিচলিত হয় না সে। বোঝে, রাগে দুঃখে বলে ফেলেছে। আর সেটাই তো স্বভাব নবকুমারের। রাগের মাথায় কড়া কথা বলে বসে, আর রাগ ভাঙলে খোশামোদ করতে বসে।

তাই সত্য অবিচলিত ভাবে বলে, “তা পাষাণীই যখন, তখন মন কাঁদার কথা উঠছে কেন? তবে ‘বিনাদোষে’, এ কথা ডাববার হেতু? যে মানুষ গুরুর নামে কলঙ্ক দিতে পারে, তাকে আমি অন্তত নিরপরাধী বলতে পারব না।”

গুরুর নামে!

নবকুমার স্তম্ভিত ভাবে বলে, “তার মানে?”

“মানে তোমায় বোঝাতে পারব না। মেয়েমানুষের বাড়ী পেট-আলগা মানুষ তুমি, এখনি জগৎসংসার সকল বাত্মা জেনে ফেলবে। তবে এই বিশ্বাসটুকু রেখে আমার ওপর, অন্যায় কাজ আমাকে দিয়ে হবে না। অবিবেচনার কাজও না।”

না, এর বেশী নবকুমার জানতে পারে নি।

পারবার কথাও নয়।

বুদ্ধি দিয়ে বুঝে ফেলবে এত ক্ষমতা তার নেই। আর সত্য তো হাত জোড় করে বলেছে, “আমায় আর কিছু জিজ্ঞেস করো না। আমি সে কথা মুখে আনতে পারব না।”

না, সত্যিই পারবে না।

মুখে আনবার কথা নয়।

তবু নিতাই একদিন মুখে এনেছিল। ভবতোষ মাষ্টার সত্যকে পড়া দিয়ে চলে যাওয়া মাত্র বলে উঠেছিল, “সম্পর্কটা মাষ্টার বানিয়েছে ভাল! গুরু-শিষ্য! কিন্তু রীতক্ষণ পড়া বুঝায় ততক্ষণ তো গুরু বসে বসে শিষ্যকে চোখ দিয়ে গিলতে থাকে।”

সত্য তীব্র স্বরে বলেছিল, “ঠাকুরপো!”

“তা রাগ করলে আর কি হবে? যা হক রুগ্ন তাই বলছি। মাষ্টার মশাইয়ের রীত-চরিত্তির আমার আর আজকাল ভাল মনে হয় না। ছুতোয়-সাতায় হরঘড়ি এ বাসায় আসার বহর দেখে বুঝতে পারেন না? নিছক হিত করতে আসা নয়, কীরণটা অন্য! আমি এই ভবিষ্যৎবাণী করছি, সময়ে সাবধান না হলে ওই মাষ্টার হতে একদিন বিপদ আসবে।”

সত্য কঠিন গলায় প্রশ্ন করেছিল, “কথাই যদি তুললে ঠাকুরপো তো বলি—সে বিপদ যে তোমার দ্বারাই আসবে না, তার নিশ্চয়তা কি?”

“আমার দ্বারা! আমার দ্বারা মানে?”

নিতাই সিঁদুরে-আমের মত লালচে হয়ে ওঠে।

কিন্তু সত্য কঠোর।

“মানে ঘরে গিয়ে বোঝ পে। জিজ্ঞেস করো গে আপনার মনকে। কে কাকে চোখ দিয়ে গিলছে, সে খবর তোমার চোখে পড়ে কেমন করে তাই তোমায় শুধুই আমি!”

“পড়বে না?” নিতাই উত্তেজিত হয়, “নবর মতন কানা মানুষ ছাড়া সবাইয়ের চোখেই পড়ে।”

“নিজে চোখ না ফেললে পড়ে না, এই আমারও সাদা বাংলা। কিন্তু এমন মন্দ কথা যখন তোমার মনে উঠতে পারে ঠাকুরপো, তখন আমার মনে হয় আর একত্র থাকা ঠিক নয়।”

“ঠিক নয়!” নিতাই অবাক হয়ে বলে, “একত্র থাকা ঠিক নয়?”

“না।”

নিতাই ফুঁসে উঠে বলেছিল, “আমাকে সরালেই তোমাদের বিপদ সরবে?”

“বিপদ!”

সত্য সহসা হেসে উঠেছিল, “আমার আবার বিপদ কিসের? আঙনে যদি হাত দিতে আসে ঠাকুরপো, বিপদটা আঙনের হয়, না হাতের হয়? রামায়ণ মহাভারতের কাহিনীও কি কখনো শোন নি? সপীনারীর উপাখ্যান? তোমায় যে সরে যেতে বলছি, সে তোমারই ভালর জন্যে।”

নিতাই আর কোনও কথা বুঝে না পেয়ে বলেছিল, “চমৎকার! বিচারটা ভাল!”

সত্য বলেছিল, “এখন তুমি নানা কারণেই অন্ধ ঠাকুরপো, তাই জ্ঞানগম্য নেই। পরে বুঝবে। তবে এ সম্পর্কে অধিক কথায় আর কাজ নেই। কুকথা হচ্ছে ছারপোকাকার বংশ, একটা থেকে একশোটা ছানা জন্মায়। ওকে মূলেই ধ্বংস করে দেওয়া বুদ্ধির কাজ।”

তারপর সেই ভবতোষ মাস্টারের কাছে মেস খুঁজে দেওয়ার প্রস্তাব।

কিন্তু নিতাইয়ের অনুযোগ কি বাস্তবিকই অমূলক ?

নিছক অমূলক বললে ভুল বলা হবে।

ভবতোষ মাস্টারের চোখের শ্রদ্ধা সমীহ আর স্নেহভরা মুগ্ধ বিহ্বল দৃষ্টি যে আত্মহারা হয়ে সত্যবতীর আনত মুখের দিকে তাকিয়ে থাকে, এ কি সত্যবতীর অনুভবের মধ্যে ধরা পড়ে না ?

পড়ে। পাথরের দেবতাও বস্তুর নিবেদন বোধে।

তবু সত্যবতী গ্রাহ্য করে না। সত্যবতী বোধে এ দৃষ্টির মধ্যে অনিষ্টের আশঙ্কা নেই। সত্যবতী জানে এ দৃষ্টি সত্যবতীর কেশাঞ্ছেরও ক্ষতি করতে পারবে না। যেমন পারবে না নিতাইয়ের স্রীর্ষাকাতর জ্বালাভরা দৃষ্টি। দুটোকেই সমান অগ্রাহ্য করেছিল সত্যবতী। কিন্তু নিতাইয়ের এই স্পষ্টস্পষ্ট জ্বালা প্রকাশে বিবেচনার পথ নিল সে। কে জানে কোনদিন যদি নির্বোধ নবকুমারের কানে তুলে বসে নিতাই এই নীচ সন্দেহের কথাটা!

যদি মাস্টারমশাইয়ের কানে ওঠে ?

ছি ছি!

উনি স্নেহ করেন।

উনি গুরু।

উনি নিজেও জানেন না, এর মধ্যে কোন দোষ আছে। তাঁই গুরুর নিজেও ক্ষতি হচ্ছে না।

কিন্তু নিতাইয়ের কথা স্বতন্ত্র। নিতাইয়ের মধ্যে যা আছে, সেটা নির্ভেজাল শ্রদ্ধা নয়।

সে আপনি আপনার ক্ষতি করতে পারে।

তার জন্যে ব্যবস্থার দরকার।

তাই নবকুমারের কাছে দুঃস্বরে বলতে পারে সত্যবতী, “আমার দ্বারা কোন অবিবেচনার কাজ হবে না, কোন ছোট কাজ হবে না, এ বিশ্বাস রেখো।”

নিতাই চলে যেতেই নবকুমার বলতে শুরু করল, “বাড়ীটা যেন গিলে খেতে আসছে!” বলতে লাগল, “চার-চারখানা ঘরে দরকার কি ?”

ওই শেকল-বন্ধ ঘরটা যে ওর বুকে শেলের মত বিধছে সেটা বুঝতে পারে সত্য। তাই একদিন নরম গলায় বলে, “আর একটা বাসা দেখলে হয় না ?”

“কেন, আর একটা বাসার কি দরকার ?”

নবকুমার খাপ্পা হয়ে ওঠে।

“দরকার আর কি, একটু হাওয়া বদল! তা ছাড়া এ বাসার ভাড়টাও তো কম নয়। এদিকে বাজার দিন দিন অগ্নিমূল্য হচ্ছে। ওদিকে ছেলের বইখাতা ইকুলের মাইনে বাড়ছে।”

“তা সে তো তোমার পক্ষে ভালই। একটা মানুষ দু বেলা দু মুঠো ভাতের বদলে একমুঠো করে টাকা ধরে দিচ্ছিল—”

সত্য বিনাবাক্যে উঠে গিয়ে গিয়েছিল। আর মনে মনে প্রতিজ্ঞা করেছিল, ঠিক আছে, আর নবকুমারকেও বলা নয়, ভবতোষ মাস্টারকে অনুরোধ জানানো নয়, নিজেই হাল ধরবে সে। ঝিকে দিয়ে বাসা যোগাড় করবে। ঝি পাঁচবাড়ি ঘোরে, অনেক সন্ধান রাখে।

তা সত্যর হিসেব ভুল হয় নি।

মুজারামবারু স্ট্রীটের এ বাসা ঝি পঞ্চম মা-ই যোগাড় করে দিয়েছে। বাড়িওয়ালা মস্ত বড়লোক, বনেদী ঘর। আগে যখন আরো বোলবোলাও ছিল, তখন আমলা-গোমস্তাদের জন্যেই ছোট ছোট অনেক বাসা বানিয়ে দিয়েছিল। এখন কর্মচারীর সংখ্যা কম, তাই দু-পাঁচখানা বাসায় ভাড়া বসিয়েছে।

তারই একখানার সন্ধান এনে দিল পঞ্চম মা। নবকুমার বাসা দেখে এসে সন্তোষ প্রকাশ না করে পারল না। কারণ ছোট হলেও বাসাটা ভাল। রাস্তার ধার। ভবতোষ মাস্টার ক্ষুণ্ণস্বরে বললেন, “বাসা বদলের দরকার ছিল, আমায় জানাও নি তো নবকুমার ?”

নবকুমার ‘বাড়ির মধ্যে’র শিক্ষায় শিক্ষিত হয়ে বলল, “আজ্ঞে আপনার ওপর আর কত বোঝা চাপবে ? আমাদের জন্যে তো আপনার কাজের অন্ত নেই। এটা যখন ঝি’র দ্বারা হয়ে গেল—”

“আমার বাসা থেকে একটু দূর হয় গেল, এই আর কি!”

ভবতোষ নিঃশ্বাস ফেললেন।

তবু বাসা বদল হল।

আর সত্য আর একটু স্বাবলম্বী হয়ে উঠল। ফি-হাত মাষ্টারমশাইয়ের মুখাপেক্ষিতার অভ্যাসটা কাটাতে শুরু করল।

তবে এ বাড়ির একটা অসুবিধে, বাড়িওলারা ধনী হলেও জাতে ছোট। কাজেই বামুন-ভক্তিটা প্রবল। যখন তখন পালাপার্বণ হলেই বামুনবাড়ি সিধে পাঠায় তারা, বামুনের মেয়ের জন্যে পান সুপুরি মিষ্টি, লালপাড় শাড়ীর উপটৌকন পাঠায়।

ফেরত দেওয়াও চলে না, কেবল নেওয়াও লজ্জার।

নবকুমার অবশ্য লজ্জায় বলে না। বলে, “এতে তোমার এত কিছু কিসের? কথায় আছে লাখ টাকায় বামুন ভিখিরি! তা ছাড়া ওরা হল গে সোনার বেনে, বামুনকে দান করে পুণ্য সঞ্চয় করছে।”

“তা হোক।” সত্য ঝঙ্কার দেয়, “আমরা তো আর পরিবর্তে কিছু দিতে পারছি না? নিতে আমার মাথা কাটা যায়।”

“তোমার সবই উল্টো। বলি পরিবর্তে তো তুমি আশীর্বাদ দিচ্ছে!”

“আশীর্বাদ!”

হি হি করে হেসে ওঠে সত্য, “আমার আশীর্বাদের অপেক্ষাতেই যে ছিল এত দিন! আর ওদের ওই রাজ্যপাট আমার আশীর্বাদেই হয়েছে! যাই বল, এ একটা বিপদ হয়েছে।”

“লোকের যা প্রার্থনার, তোমার তাতেই বিপদ, আর লোকের যাতে ভয়, তোমার তাতেই অহ্লাদ, এই তো দেখলাম চিরটাকাল। কোন্ বিধাতা যে গড়েছিল তোমায় তাই ভাবি।”

এই ধরনের কথা প্রায়ই হয়।

আবার মাঝে মাঝে পঞ্চুর মা বলে, “বড় বাড়ির গিন্নী পেরায় আমাকে বলে, “হ্যাঁলা, সবাই আমার সঙ্গে দেখা করতে আসে, কই সাত নম্বর বাসার গিন্নী তো কই আসে না একদিনও?” আমি বলি, “ও রাণীমা, গিন্নী কোথায়? সে নেহাৎ ছেলেমানুষ বোটি।” তা যাই বল বাপু, তোমার এক-আধদিন যাওয়া কোণ্ডব্য। সকল প্রেজারাই যখন যায়—”

সকল প্রেজারাই যখন যায়—!

সত্য দপ্ করে জুলে উঠে বলে, “তা আমি তো আর ওঁনাদের প্রজা নই পঞ্চুর মা! ভাড়া দিই, থাকি!”

‘তা সে একই কথা!’ পঞ্চুর মা বিগলিত স্বরে বলে, “খাজনা দিলে প্রজা, ভাড়া দিলে ভাড়াটে। গিন্ণীর যেন একটু গোসা-গোসা ভাব দেখলাম, তাই বলছি। মানে বড়মানুষ তো? রাতদিন তোয়াজ পাচ্ছে, তাতেই অজ্ঞার ভাব। মনে করে, সাত নম্বর কেন তোয়াজ করে গেল না? একদিন গেলেই ও গোসাটা কাটে।”

“আমার সময় কোথা?”

সত্য গম্ভীর ভাবে বলে।

“ওমা শোন কথা!” পঞ্চুর মা বিশ্বয় রাখবার জায়গা পায় না, “এই গলির এপার ওপার, একটু একবার যেতে তোমার সময় হবে না? তা হলে বলি বৌদিদি, অজ্ঞার তোমারও কম নয়।”

“তা হলে বুঝেছিস?” হেসে ফেলে সত্য।

“বুঝেছি। বুঝেই আছি। তবে কিনা তোমার হিতের জন্যই বলছি। জলে যখন বাস, কুমীরের সঙ্গে ভাব রাখাই ভাল।”

“দেখ পঞ্চুর মা, ওসব তোয়াজ করা-টরা আমাকে দিয়ে হবে না। তা সে কুমীরের কামড় খেতে হয় তাও ভাল।”

“আহা-হা, তা কেন! কামড়ের কথা হচ্ছে না! তোমরা হলে গে জগতের সেরা, উঁচু বামুন। তোমাদের মানিয়ার কাছে কি আর পয়সার মানি? তবে কিনা কালটা কলি, এই আর কি। কলি কালে পয়সাই মোক্ষ। নইলে এই এগারো নম্বর বাসার চক্কোস্তি-গিন্নী অমন করে দস্ত-গিন্ণীর পায়ে তেল দেয়?”

“যাক পঞ্চুর মা, ওসব কথা তুলিস নে। আমার মেজাজ খারাপ হয়ে যায়। বড়মানুষের বাড়ি যাওয়া আমার পোষাবে না, এই হচ্ছে সাদা বাংলা। তা তাতে এখানের বাস ওঠাতে হয় তাও ভাল।”

পঞ্চুর মা মানুষটা ভাল। লাগানে-ভাঙানে নয়। আর বোধ করি সত্যর এই তেজস্বিতাকে সে সম্মীহ করে। তাই গিয়ে বড় বাড়ির গিন্ণীর কানে তোলে না কথাটা। নইলে ও-বাড়িতে তো আর নিত্য গতায়ত।

কারণ ঝি-খেটে খেলেও পঞ্চুর মা মালির মেয়ে। তার বোনঝি ওই বড় বাড়িতে ফুলের যোগানদার, বোনঝির সেখানে অশেষ প্রতিপত্তি। পঞ্চুর মা সেই সুবাদে দৈনিক জলপানিটি বরাদ্দ করে নিয়েছে ও বাড়িতে।

আর রাজ্যের ঝি আর মালিনী তাঁতিনী নিয়েই তো আসর গিল্লীর ।

তাই সে ভাবে, একটা দিন গেলে যদি বড় বাড়ির গিল্লীর মনটা প্রসন্ন হয়, গেলেই বা । কিন্তু সত্য উড়িয়ে দেয় ।

বলে, “বড়মানুষের বাড়ির চৌকাঠ ডিঙোতে আছে ? বাপ!”

তবু সত্যকে একদিন বড় বাড়ির চৌকাঠ ডিঙোতে হল ।

ওদের রাধুনী বামনী আর গিল্লীর খাস ঝি এসে কর্তার নাতির ‘মুখে-ভাতে’র নিমন্ত্রণ করে গেল । নতুন কাঁসার রেকাবিতে চারজোড়া সন্দেশ, আর নতুন পেতলের ঘটতে সেরটাক তেল দাওয়ায় নামিয়ে দিয়ে বলল, “নাতির মুখের পেসাদ নেমন্তন্ন করে গেলাম । বাড়িসুন্ধ সব যাওয়া চাই । বাড়ির যেন উনুন না জ্বলে ।”

সত্য মৃদু গম্ভীর ভাবে বলে, “কবে অনুপ্রাশন ?”

“এই তোমার গে পরণ্ড ।”

সত্য আরও গম্ভীর ভাবে বলে, “তবে ? ছুটির দিন জো না ? বাবুকে দশটায় আপিস যেতে হয় । উনুন না জ্বলে চলেবে কেন ? অত সকাল সকাল তো আর যজ্ঞিবাড়িতে ভাত মিলবে না ?”

“তা জানি না ।” রাধুনী খরখরে গলায় বলে ওঠে, “পাড়ার কারুর ঘরে উনুনের ধোঁয়া উঠতে দেখলে গিল্লী আর রক্ষে রাখবে না, এই হচ্ছে সংবাদ ।”

“তা হলে বাবুকে সেদিন পান্তা খেতে হবে!”

সত্য নিশ্চল দাঁড়িয়ে বলে ।

আর রাধুনী বামনী গালে হাত দিয়ে ‘খ’ হয়ে যায় । তারপর খরখরিয়ে ওঠে, “ওমা এ যে সর্ব্বনেশে মেয়ে গো! রাণীমা তো ঠিকই বলেছে, ‘আর সকল বাড়ি শুধু ঝি গেলেই বোধ হয় হত, সাত নম্বরে বামুনদি তুমি সঙ্গে যেও । ওনার বড় দেমাক, কি জানি যদি শুদ্ধুরের মুখের নেমন্তন্ন না নেন”!

“তা ভাল! চোখে না দেখেও মানুষ চিনতে পারেন! ভ্রামাদের রাণীমা তো খুব গুণী!”

রাধুনী বোধ করি কথাটার নিহিতার্থ হৃদয়ঙ্গম করুতে না পেয়েই বলে, “গুণী, সে কথা আর বলতে! একবার কেন একশোবার! গেলেই জানতে পারবে কি দয়া-দাক্ষিণ্যে! আর রূপও তেমনি । যেন জগদ্ধাত্রী প্রতিমা!”

গিল্লীর খাসদাসী সঙ্গে ।

কাজেই জানা কথা এই যে স্ততিগান একেবারে ব্যর্থ হবে না ।

সত্য বলে, “তা দাঁড়াও । ঘটটা রেকাবটা নিয়ে যাও ।”

শুনে ঝি বামনী দুজনেই হেসে ওঠে, “ওমা! বলে কি গো ? নিয়ে যাব কি গো! ও তো সামাজিক বিলানোর জন্যে । একেবারে ব্যাপারীদের কাছে বায়না দিয়ে এক মাপের এক গড়নের অমন হাজারখানেক আনানো হয়েছে । এসব বুঝি দেখনি কখনো ?”

সত্য আর দ্বিরুক্তি না করে জিনিস দুটো ঘরে উঠিয়ে রাখে । এই হাসির শব্দ যেন ছুরির মত বিধতে থাকে ।

দেখবে না কেন ?

রামকালী চাটুয্যোর মেয়ে সত্য অনেক কিছুই দেখেছে । বাসন বিলানোও দেখেছে বৈকি । কিন্তু সেটা কখন কিভাবে বিলানো হয় তা তার জানা ছিল না ।

ভাবল, কি জ্বালা!

যদি বা পাঁচ টাকায় এমন মনের মত বাসাটি পাওয়া গেল, তার সঙ্গে জুটল এই পিপড়ের কামড়! এতদিন ওদের বাড়িতে না গিয়ে চলেছে, আর চলল না দেখা যাচ্ছে । সামাজিক নেমন্তন্ন বলে কথা ।

গাড়ি-পালকির পথ নয়, তবু এসব কাজে পালকিতে চেপে যাওয়াই রেওয়াজ । পঞ্চুর মা বলে, “আমি এই বাসন কখনো মেজে ফেলে বাসা থেকে কাচা কাপড় পরে আসছি বৌদিদি, তুমি সাজগোজ করে নাও ততক্ষণ, আর খোকাদেরও পোশাক-আশাক পরিয়ে—”

“খোকারা তো এখন ইকুলে চলল ।” বলল সত্যবতী ।

“ওমা, সে কি কথা! নেমন্তন্ন খাবে না ওরা ?”

“ইকুল কামাই করে ?”

পঞ্চর মা অবাধ হয়ে বলে “একদিন তোমার ইঙ্কল কামাইটা এমন মারাত্মক হল বৌদিদি ? পাড়াসুদ্ধ ছেলে কেউ আজ ইঙ্কলে যাবে নাকি ? বলে বিশ দিন থেকে দিন গুনছে সবাই। বড়মানুষের বাড়ির নেমন্তন্ন, কত ভালমন্দ সামগ্রীর আয়োজন, বারো মেসে সংসারে তোমার গে সেসব চোখেও দেখতে পায় না কেউ—”

সত্য ঈষৎ কঠিন সুরে বলে, “তা বারো মাস যখন দেখতে পায় না, একদিন পেয়েই বা কি রাজালাভ হবে ? তুই বাসা থেকে ঘুরে আয়, আমি একাই যাব।”

“জানিনে বাবা! তোমার মতিগতি কেমন! বলি ছেলেরা না গেলে মাথা পিছু ছাঁদাটাও তো বেবাক লোকসান।”

“লাভ-লোকসানের হিসেব তোর সঙ্গে করতে বসতে পারছি না পঞ্চর মা, কাজ সেরে বাসা থেকে ঘুরে আয়।”

পঞ্চর মা তথাপি হাল ছাড়ে না।

বলে, “তা বৌদিদি, খোকারা ইঙ্কল থেকে ফিরেও যেতে পারে। খ্যাট তো তোমার গে এই দুপুর থেকে সাজ সন্ধে অবধি চলবে!”

“তুই থামবি ?” বলে ধমক দিয়ে সরে যায় সত্য।

নবকুমার কোটের পকেটে পানের কৌটোটা ভরে নিতে নিতে বলে, “ছেলেদের নিয়ে গেলেই পারতে!”

“কেন ?”

“কেন আবার কি! নেমন্তন্ন—”

“নাঃ, বড়লোকের বাড়ি না যাওয়াই ভাল। ছেলেবুদ্ধি ছেলেমন, অত জাঁকজমক দেখে এসে শেষে নিজেদের তুচ্ছ মনে করতে শিখবে।”

“তোমার যত সব উদ্ভট কথা! মাথাতে আসেই যে কি করে! যাক, যাবে একটা টাকা নিয়ে যেও। সামাজিক আশীর্বাদটা দিতে হবে তো ?”

সত্যর জোড়া ভুরু নেচে ওঠে।

কৌতুকের হাসিতে মুখ উজ্জ্বল দেখায়।

“একটা টাকা! ধুং! এতদিন ধরে এত সিধে শ্রুতি কাপড়চোপড় পেয়ে আসছি, যদি তার শোধ দেবার সুযোগ পাচ্ছি, টাকা দিয়ে সারব কেন ?”

“তবে কী দেবে ? গিনির মালা ?”

নবকুমারও রহস্য করে।

“গিনির মালা ? না। বেআন্দাজী কিছু করতে যাব না। এইটে দেব।”

সত্য তোরঙ্গ খুলে একটা জিনিস বার করে। মুঠোয় চেপে রহস্যভরে বলে, “হাত গুনে বল, কি এটা ?”

“হাত গুনে জানি না। আপিসের বেলা হয়ে যাচ্ছে। দেখাবে তো দেখাও।”

সত্য মুঠো খুলে ধরে।

আর বাকমক করে ওঠে সোনার জলুস।

কড়িহার একগাছা। ভরি পাঁচেকের কম নয়।

নবকুমার হেসে ফেলে বলে, “ইস, তা আর নয়! প্রাণ ধরে পারবে ?”

“নিশ্চয়। আমার প্রাণ অত হালকা নয়।”

“পাগলামি করো না।”

“পাগলামি নয়, সত্যিই দেব।”

“ওই অতবড় সোনার হারছড়া দিয়ে দেবে ? বড়মানুষের সঙ্গে পাল্লা দেওয়ার সাধ!”

“পাল্লা নয়। সত্য গভীর ভাবে বলে, “মান-সম্মান রক্ষা। বলে কিনা প্রজা!”

“গুদের কাছে তোমার মান ? ওরা হল গে লাখপতি।”

“তাতে আমার কি ?”

এবার নবকুমার বোঝে, রহস্য নয়, সত্যি। ফ্রুদ্ধ হয়ে ওঠে।

বলে, সর্বনাশা বুদ্ধি না হলে এমন কাণ্ড কেউ করতে যায় না। বলে, একটা টাকায় যেখানে মেটে, সেখানে এতবড় একগাছা সোনার হার! এ শুধু বন্ধ পাগলেই করে। তা ছাড়া উড়নচওয়ে হয়ে সোনাদানা নষ্ট করবার অধিকারই বা দিয়েছে কে সত্যকে ? এলাকেশী যদি টের পান, রক্ষা রাখবেন ?

সত্য গভীর ভাবে বলে, “এ তোমার মায়ের জিনিস নয়।”

“নয় মানে! তোমার বাবা যে কালে সালঙ্কারা কন্যে দান করেছে—”

“এ আমার বিয়ের সময়ের জিনিস নয়। সেসব তোমার মা সঙ্গে দেনও নি। এবারে নিত্যেন্দ্রপুরে যেতে ছোট খোকার নাম করে পিস্টাকুমা দিয়েছেন।”

“দিয়েছেন বলেই বিলোতে হবে? না না, ওসব বদখেয়াল ছাড়।”

“তা হলে আমার যাওয়া হয় না।”

“যাওয়া হয় না! চমৎকার! বলি এত যদি টেকা দেওয়ার শখ, নিজের জন্যেও তাহলে হীরে মুক্তো জরি বেনারসী যোগাড় করো?”

“তা কেন?”

সত্য দৃঢ়ভাবে বলে, “বামুনের মেয়ের শাঁখা আর লালপাড় শাড়ীই মস্ত আভরণ।”

তা শেষ পর্যন্ত সেই মস্ত আভরণেই সজ্জিত হয়ে ও বাড়িতে গিয়ে হাজির হল সত্য পঞ্চর মার সঙ্গে। একখানা নতুন কাঁসার রেকাবিতে সেই কড়িহারছড়া আর একটু ধানদুর্বো নিয়ে।

‘নৌকতা’র বহর দেখে পঞ্চর মাও তাজ্জব হয়ে গেছিল। গালে হাত দিয়ে বলেছিল, “হ্যাঁগো বৌদিদি, বড় বড় কুটুমবাড়ি থেকেও তো দুটো একটা টাকাই দেয়। আর তোমার মতন এই পাড়াপড়শী শ্রেজারা চারগণ্ডা কি জোর আটগণ্ডা পয়সা। একটা টাকা হল তো খুব বেশী হল। আর তুমি—”

“হোক হোক, চল্ তুই।”

“ছেলে কোন ঘরে?” সত্য শুধোল একজনকে।

সম্ভবত সে দাসী। কারণ পঞ্চর মা তাড়াতাড়ি আগবাড়িয়ে এসে একগাল হেসে বলে, “এই যে সুখদার পিসি! নিয়ে এলাম আমাদের বৌদিদিকে। সাত বছরের বাড়ির—”

“ও!”

সুখদার পিসি ভুরুন ইশারায় দিকনির্দেশ করে বলে, “ওই উদিককার দালানে বসাও গে!”

“বসবে বসবে! তা অগ্নে খোকাবাবুকে আশীর্বাদ করে—”

সুখদার পিসীর এতকথনে বোধ করি হাতের জিনিসটার প্রতি নজর পড়ে। ঈষৎ বিস্ময় এবং সমীহ মিশ্রিত স্বরে বলে, “তা তবে ওপরতলায় নে যাও। মোক্ষদার কাছে আছে ছেলে।”

মোক্ষদা এ বাড়ির খোদ ঝি।

গিন্ধীর পরের পদটাই তার।

বাড়ির বৌ-কিরা পর্যন্ত তার ভয়ে তটস্থ। আর অন্য ঝিদের তো সে দণ্ডমুণ্ডের কর্তা। মোক্ষদার জিন্মাতেই আছে ছেলে। কারণ ছেলের সর্বাস্তে আজ গয়না।

ন্যাড়া মাথা, সর্বাস্তে অষ্ট অলঙ্কার, আর সল্‌মা-চুমকির-কাজ-করা ভেলডেটের পোশাকের জ্বালা, হাঁ হাঁ করে কাঁদছিল ছেলেটা—

“মুখ-দেখানি”র থালা সামনে নিয়ে ক্রন্দনরত ছেলেটাকে কোলে চেপে ধরে বসেছিল মোক্ষদা কালো মোষের মত চেহারাখানি নিয়ে।

পঞ্চর মার সঙ্গে সত্যকে দেখেই বাজখাই গলায় বলে ওঠে, “এই বুঝি তোর মনিব পঞ্চর মা? যাক পা’র ধুলো পড়ল তা হলে?”

সত্যর ভুরু কুঁচকে ওঠে।

তবু সে ধীরভাবে এগিয়ে গিয়ে ধানদুর্বো নিয়ে ছেলের মাথায় দিয়ে হারসমেত রেকাবিটা নামিয়ে দেয় মুখ-দেখানির থালার কাছে। যে থালায় টাকার চাইতে আধুলি, ও আধুলির চাইতে সিকির সংখ্যাই বেশি।

সঙ্গে সঙ্গে ভুরু কুঁচকে ওঠে মোক্ষদারও।

“এটা কি পঞ্চর মা?”

পঞ্চর মা বলে তটস্থ ভাবে, “এই খোকাবাবুর আশীর্বাদ মোক্ষদাদি! বৌদি বলে একটা টাকা নিয়ে গিয়ে আর কি হবে পঞ্চর মা! বড়মানুষের বাড়ি, সমুদ্রের পাদ্য-অর্ঘি—তাই—”

“বাজে বাজে বকছিস কেন মিথ্যে?” তীব্র স্বরে ধমকে ওঠে সত্যবতী। তীব্র তবে মৃদু।

মোক্ষদা একবার সত্যর আপাদমস্তক দেখে নেয়, একবার হারছড়া হাতে তুলে ঘুরিয়ে ফিরিয়ে অনুভব করে! তারপর বিরস স্বরে বলে, “এ হার তুমি উঠিয়ে নিয়ে যাও গো সাত নব্বয়ের গিন্ধী। এদের ঘরের ছেলেপেলে গিন্ধির গয়না পরে না।”

গিল্টির গয়না!

পঞ্চর মার বুকটা বসে যায়।

নিকোবাহ ছুঁড়ির নিকবুদ্ধি দেখে এ পর্যন্ত সে মনে মনে হাসছিল। ভাবছিল শহুরে বড়মানুষ তো দেখে নি কখনো, তাই তরাসে বেআন্দাজী একটা নৌকতা করে বসেছে। তা বসুক। পঞ্চর মার মুখটা বড় হবে বোনঝির মনিববাড়িতে।

কিন্তু এ কী!

এ যে মুখে চুনকালি!

ছি ছি, ই কি মুখ্যমি। তুই এই দস্তবাড়িতে নিয়ে এলি গিল্টির গয়না!

প্রায় হতভম্ব হয়েই তাকিয়ে থাকে সে। কিন্তু ততক্ষণে উত্তর দিয়েছে সত্য। তীক্ষ্ণ তবে মৃদু।

“তুমি বুঝি এখানে নতুন কাজে ঢুকেছ?”

“নতুন? আমি নতুন কাজে ঢুকেছি?” মোক্ষদা আঙনের মতন গনগনিয়ে ওঠে, “ওমা আমার কে গো! তুমি আজ নতুন পদাঙ্গন করেছ বলে মোক্ষদাও নতুন হয়ে গেল! এই বাড়িতে কাজ করতে করতে চুল পাকালাম। বলি এ প্রশ্ন যে?”

“প্রশ্ন তুমিই করালে বাছ! এতদিন এদের ঘরে কাজ করছ, সোনা চেনো না?”

মোক্ষদা কালো মুখ আরও কালি করে বলে, “তোমার কথাবাত্তা তো বড় চ্যাটাং চ্যাটাং! যা পঞ্চর মা, বড় রাণীমার কাছে নে যা। সেখানে মুখটায় একটু লাগাম রেখে কথা কোয়ো গো ভালমানুষের মেয়ে। সে আর দাসীবাঁদীর এজলাশ নয়।”

পঞ্চর মা খানিক এগিয়ে ফিসফিস করে বলে, “মোক্ষদার বড় দাপট মা! শুকে একটু তোয়াজ করে কথা কইতে হয়। যাই, দেখি আমার বুনঝিটা কোথায়। তাকে সঙ্গে পেলে বুকে একটু ভরসা পাই। বাস মালিনী তো সে। এই বিরাট বাড়ির যত মেয়েছেলে-সকবার খোঁপার জন্য রোজ বরান্দর ফুলের সাজ, রকমারি মালা, জরির ফুল, রাংতার চাঁদতারা, সর্ক-ওই আমার বুনঝি... অ শৈল, কই, কই কোথায় লো—”

পঞ্চর মা ঝপ করে এগিয়ে যায়।

আর সত্যবতী দালানের একটা খামের কাছে দাঁড়িয়ে দেখতে থাকে তাকিয়ে তাকিয়ে বাড়ির বাহার, কারুকর্ম, সাজসজ্জা!

দালানের ছাতটা কী উঁচু!

যেন কোথায় খামতে হবে ভুলে গিয়ে যথেষ্ট উঠে গেছে উপর দিকে। সেই ছাদের নীচে ঝুলছে প্রকাণ্ড প্রকাণ্ড ঝাড়লতন, সত্য গুনে ফেলল, চকমিলানো দালানের চার কোণায় চারটে, আর মাঝামাঝি একটা করে, সবসুদ্ধ আটটা ঝাড়।

আগাগোড়া দালান শ্বেতপাথরে মোড়া, শুধু কিনারায় কিনারায় কালো পাড়। খামের মাঝখানে প্রতিটি খিলেনের মাথা থেকে ঝুলছে নানা মাপের পাখীর খাঁচা, পাখীর দাঁড়। হরেক রকমের পাখী। আশ্চর্য! এত পাখী কেন? এত পাখী পুষে কি হয়?

দালানের কোণে কোণে একটা করে পাথরের নগ্ন নারীমূর্তি। সত্য তাদের দিকে তাকিয়ে চোখটা তাড়াতাড়ি ফিরিয়ে নিল। ভাবল, মাগো মেয়েগুলোকে দেখে মনে হচ্ছে যেন জলজ্যান্ত! তার পর মনে মনে ফিক করে একটু হেসে ভাবল, বেচারীরা বোধ হয় রক্তমাংসেরই ছিল, হাজার লোকের চোখের সামনে অমন করে দাঁড়িয়ে থাকতে হওয়ায় লজ্জায় পাথর হয়ে গেছে।

বাইরে থেকে বাড়ির ভেতরের এতটা শোভা-সৌন্দর্য ঠিক বোঝা যায় না। ভিতরে ঢুকলে দেখে তাজ্জব বনতে হয়। ছেলেবেলায় বাবার কাছে নবাব-বাড়ির অনেক গল্প শুনেছে সত্য, আর অসীম কৌতূহলী চিন্তের অসংখ্য প্রশ্ন-শরাগাতে রামকালীকে বলতেই হত অনেক কিছু বিশদ করে। দস্তদের অন্তঃপুরে এসে সত্যর সেই ছেলেবেলায় শোনা নবাববাড়ির কথা মনে পড়ল। শোনা গল্পের সঙ্গে মনের রং আর কল্পনা মিশিয়ে নিয়ে এই ধরনের ছবিই একে রেখেছিল সত্য তার ধারণার জগতে।

তাই ভাবল, বাবা, এ যে দেখছি একেবারে নবাবী কাণ্ড!

“এস গো বৌদিদি,” উর্ধ্বশ্বাসে ছুটে এল পঞ্চর মা, “এই সময় চল। এখন একটু ভিড় কম আছে।”

সত্য আস্তে বলে, “কাজের বাড়ি তো, কিন্তু এত বড় দালানের মানুষজনের চিহ্ন নেই কেন রে পঞ্চর মা! বাড়ির গিন্টিটিন্টিই বা কোথায়?”

“ওমা শোন কথা!” পঞ্চর মা বিস্ময়ের চরম অভিব্যক্তি স্বরূপ গালে হাত দেয় ।...

“কি হল ? মুচ্ছা গেলি যে!”

“তা মুচ্ছা যাওয়ার মতন কথাই যে বললে বৌদিদি । এ কী তোমার আমার মতন গরীবগুরবোর ঘর যে নাতির অন্ত্রাশনে ঠাকমা কোমর বেঁধে কাজ করে বেড়াবে ? এ বাড়ির গিন্নীরা নীচের তলায় নাবে নাকি ?”

“নীচের তলায় নামে না ?” সত্য হেসে ফেলে বলে, “কেন, পায়ে বাত বুঝি ?”

“বকো না বৌদিদি । হাসিও না । নীচের তলায় নাবার ওনাদের দরকার ? বাহান্ন গণ্ডা দাসীবাঁদি মোতায়েন নেই ? তা ছাড়া তোমার গে সংসারে কত অবীরে বেধবা প্রতিপালিত হচ্ছে, তারাই সংসারের কন্না করছে । আর সরকার মশাই তো আছেনই । অবিশ্যি একেবারে নাবে না তা নয়, নাবে । পালপাক্ষনে ঠাকুরদালানে আসে । তা তার জন্যে আলাদা সিঁড়ি আছে ভেতর ঘর দিয়ে । ইদিকটা হল গে, না সদর না অন্দর, দুইয়ের মাঝখান । মানুষজনের কথা বলছ ? সে তোমার গিয়ে ইদিকে বড় নেই । ভিড় দেখতে চাও তো দেখ গে যাও ভেতরবাড়ির উঠানে দালানে ।... এ তো আর চালা বেঁধে ভিয়েন বসানো নয়, পেরকাও পেরকাও টানা লম্বা পাকা ভিয়েন-ঘর । তার ছেঁতলায় মেছুনীরা বসেছে মাছ কুটতে । ঙগবান জানেন কত মণ মাছ, তবে সে যা বঁটি, দেখে ভিরমি লেগে যায় । মন্দ ছেলেরা পেরথমে ন্যাজা মুড়ো খণ্ড করে বাগিয়ে দিয়েছে, তারপর মেছুনীরা বসেছে ‘খামি’ করতে । দেখাব, সবই দেখাব তোমায় ঘুরিয়ে ঘুরিয়ে । আমি শৈলর মাসী বলে আমায় কেউ কিছু বলে না । আর বলবেই বা কেন ? আমি বলব, আমার মনিব গো! গাঁ-ঘরের মানুষ, এত সব সাহেবী কেতা, শহুরে কাণ্ড তো কখনো দেখে নি, তাই—”

কথা হচ্ছিল এ-হন্দ ও-হন্দ দালানটা পার হতে হতে । তিন মুড়ো পার হলে তবে একেবারে শেষ মুড়োয় সিঁড়ি, সিঁড়ির কাছবরাবর এসে পৌঁছেও ছিল, হঠাৎ দাঁড়িয়ে পড়ে তীব্র তীক্ষ্ণ অথচ চাপা গলায় বলে ওঠে সত্য, “পঞ্চর মা!”

“কী হল গো ?”

পঞ্চর মা থতমত ।

“দেখ, কথা যখন কইতে জানিস না, হস্তিনী জ্ঞান যখন নেই, তখন মেলা কতকগুলো কথা কইতে আসিস নে ।”

“ওমা! কথার ভুল আবার কখন হয়?”

“সে জ্ঞান থাকলে তো বুঝি । তাকে এই পষ্ট কথায় সাবধান করে দিচ্ছি, আমাকে নিয়ে মিছে কতকগুলো বকবক করবি না । যা করতে এসেছিস তাই কর ।”

“বাব্বা! ধনি মেজাজ! মেজাজে তুমিও তো দেখছি রাজরাজ্যের থেকে কিছু কম যাও না । এদের এসব ঘরবাড়ি, বোটকথানা আর বাবুদের ঐশ্বর্য্যির দব্দবা এই কলকাতা শহরে একদিন এমন রাষ্ট্র ছিল যে শুনতে পাই নাকি খাস বিলিতী সাহেবরা সুদ্ধ দেখতে আসত । আর তুমি কিনা—”

“হ্যাঁ, আমি ওই রকমই! ও বাবা, এ কে ?”

“ও বাবা, এ কে ?” বলেই হঠাৎ থেমে দাঁড়ায় সত্য, তারপরই ঈষৎ এগিয়ে গিয়ে নিরীক্ষণ করে দেখে অনুচ্চস্বরে হেসে উঠে বলে, “দেখ কাণ্ড! কে বলবে সত্যি সেপাই নয়!”

পঞ্চর মা এবার একটু গৌরব অনুভব করে, অজ্ঞারি মানুষটা হয়েছে তা হলে জদ! স্বীকার পেয়েছে যে অবাধ হয়েছে!

সিঁড়িতে উঠতে যেতেই ঠিক পাশে বন্দুক কাঁধে যে সেপাইটা খাড়া দাঁড়িয়ে আছে বীরের ভঙ্গীতে, প্রথম দিন সেটাকে দেখে পঞ্চর মাও ঘাবড়ে গিয়ে দশ পা পিছিয়ে এসে দুগুণা নাম জপ করতে শুরু করেছিল । দেখে শৈলের কি হাসি! সে রকম হাসি পঞ্চর মার হাসতে ইচ্ছে করছে, তবে নেহাৎ নাকি মানুষটা বেখাপ্পা মেজাজী, তাই সাহস হয় না । শুধু একটু মুচকি হেসেই ক্ষান্ত হয়ে বলে, “ওই দেখ, যত দেখবে তত আশ্চর্য্য হবে । এখানেএক কুটুমবাড়ি তন্তু নে গেছিলুম, তা সে বললে বিশ্বাস করবে না, তাদের বাগানে ফোয়ারার ধারে এমন একটা মেয়েছেলের মূর্তি বসানো আছে যে, দেখে লজ্জায় জিভ কেটে ছুটে পালাতে হয় । আমি বলে উঠেছিলুম পয্যন্ত ‘মরণ মাগীর! এই বারবাড়িতে এমন বে-বস্তুর হয়ে নাইতে এসেছে কেন ?’ শ্বেতপাখরে গড়া তো, আমি ইনভাম করেছিলুম, বোধ হয় তোমার গে মেম-বাইজীটাইজী হবে । তা আমার কথা শুনে এ বাড়ির এক দাসী হাসতে হাসতে হাতের বারকোশখানাই ফেলে দিল । পথের ওপর মের্ঠাই গড়াগড়ি!”

সত্য এই হাসির নাটকে অংশগ্রহণ করে না, ঈষৎ কঠিন গলায় বলে, “তা সেরকম মূর্তির অভাব তো এখানেও নেই । দেখে লজ্জায় জিভ কাটতে হয়েছে তো আমাকেও । তা এই বুঝি শহুরে

বড়মানুষদের বাড়ির বাহার ? কুচি-পছন্দকে বলিহারি যাই! পয়সা থাকে দেবদেবীর মূর্তি গড়িয়ে প্রতিষ্ঠা কর না! তা নয় যত অসভ্যতা ! বাপ-বেটায় মারে-পোয়ে একসঙ্গে আনাগোনা করতে হয় না এখন দিয়ে ? দেখে লজ্জা লাগে না!”

পঞ্চর মা সত্যবতীর এই অর্বোধ নীতিজ্ঞানের মস্তব্যে একটি অবহেলা-মিশ্রিত পরিতৃপ্তির হাসি হেসে বলে, “তা এসব তো আর হেঁজিপৈঁজির ঘরের কাণ্ড নয়! এ তোমার গিয়ে বিলেত থেকে সায়েব কারিগর এসে গড়েছে। এর মান ময্যোদা আলাদা।”

“তাই বুঝি ? তা বেশ। মানময্যোদার নিদর্শনটা দেখলাম ভাল। এখন চ দিকি, দায় সেরে ফিরতে পারলে বাঁচি।”

সিঁড়িতে উঠতে উঠতে পঞ্চর মা ফিস ফিস করে বলে, “বললে তুমি শুনবে না বোধ হয়, তবু আমার কস্তব্য আমি করি, বলে রাখি তোমায়, যতই তুমি বামুনের মেয়ে হও, গিন্ণীকে একটু মান-সম্মান দিও। জোড়হস্ত দেখাই অব্যেস তো ওনাদের, বেতিক্কেরম দেখলে চটে যাবে।”

সত্য আর একবার থমকে দাঁড়ায়, তেমনি তীক্ষ্ণ কণ্ঠে বলে, “তবে দেখিয়ে দে জোড়হস্তটা কেমন ভাবে করতে হবে। শুধু জোড়হস্ত ? না গলবস্তুর চাই ? ধন্যি বটে পয়সার মহিমা! বলি এত যে ওদের স্তোত্রপাঠ করিস, নিজের অবস্থা কিছু ফিরেছে তাতে ? বাসন মেজে তো বাস। জোরহস্ত করবি ভগবানের কাছে, করবি মানুষের মতন মানুষের কাছে, পয়সার কাছে করতে যাস কেন মরতে ?”

সত্য বুদ্ধিমতী, তবু সত্য নেহাতই নির্বোধ। যে মরার কথা সে বলেছে, সে মরা কি একা পঞ্চর মার ? কে না যায় সে মরণে মরতে ? কে না চায় সেই মৃত্যুসাগরে ডুবতে ?

নইলে চক্রবর্তী-গিন্ণী কেন দস্ত-গিন্ণীকে অবিরত তেল দেয় ? দস্তরা যে সোনার বেনে, আর সোনার বেনেরা যে জল অচল এ কথা কি জানে না চক্রবর্তী-গিন্ণী ?

সত্য যখন সিঁড়ি ভেঙে উঠে গিয়ে বড়গিন্ণির ঘরের দরজায় এসে দাঁড়াল তখন চক্রবর্তী-গিন্ণী বিগলিত বিনয়ে, মুখের চেহারায় জোড়হাতের ভঙ্গী ফুটিয়ে ধরাছিলেন, “তাই তো বলছি মা, তোমার মতন এমন উঁচু নজর কটা লোকের আছে ? ঘরে তুমি বলাবলি করি, ই্যা, দরাজ প্রাণটা এনেছিল বটে দস্তদের গিন্ণী!”

সত্য এসে দাঁড়াতেই কথা ছেদ পড়ল। ঘরের মধ্যে যারা ছিলেন তাঁদের সকলেই চোখ পড়ল তার উপর। মোসাহেবের স্ত্রীলিঙ্গ কি আমার জালা নেই, যদি কিছু থাকে তো এঁরা দস্ত-গিন্ণীর তাই। সেই সন্ধ্যা বেলা থেকে অর্থাৎ যখন থেকে দস্ত-গিন্ণী ‘সত্য’ করে জাঁকিয়ে বসেছেন, তখন থেকে এঁরা তাকে ঘিরে বসে আছেন এবং চাটুকোর প্রতিযোগিতা চালাচ্ছেন।

কাজ-কর্মের দিনে এইভাবেই গুছিয়ে বসেন দস্ত-গিন্ণী, অথবা বসেন আরও সব বড়লোকের গিন্ণীরা, এই ধরনের চাটুকোরী পরিবৃত্তা হয়ে। নিমন্ত্রিত যারা আসেন, তাঁরা পাতে বসবার আগে একে একে দুইয়ে দুইয়ে এসে দেখা করে যান। ওঁরা মানুষ বুঝে ওজন করে কথা বলেন।

এখানেও আজ চলছিল সেই পর্ব।

সত্য এসে দাঁড়াল সেই পর্বের পার্বণী যোগাতে।

সমস্ত দৃশ্যটার ওপর চোখ বুলিয়ে নিল সত্য।

দেখলে প্রকাণ্ড চারচৌকো ঘর, তার মেঝেটা শতরঞ্জ খেলার ছকের মত চৌকো সাদা-কালো পাথরে মোড়া। সমস্ত দেয়ালটায় একটা কালচে সবুজ রং আর নীচে থেকে হাততিনেক উঁচুতে টানা লম্বা একটা পাঁচরঙ্গা রঙের নকশার পাড় আঁকা। ঘরের মধ্যেও ছাতের নীচে ঝাড়লুঠন। জানলাদরজাগুলো যৎপরোনাস্তি চওড়া আর উঁচু, তাতে পাখী-খড়খড়ির পাল্লা, আর তার পিঠ-পিঠ ফিকে নীল-রঙা কাঁচের শার্সি পাল্লা।

দেয়ালের ধারে ধারে সাজানো মেহগনী কাঠের আলমারি টেবিল, স্ট্যাণ্ড দেওয়া প্রকাণ্ড দাঁড়া আরশি, দাঁড়ানো ঘড়ি। আলমারির সামনে টেবিলে ওপর দেওয়ালের ব্র্যাকেটে নানাবিধ পুতুল খেলনা টাইমপিস ফুলদানি, উঁচুতে দেওয়ালের গায়ে অয়েল-পেট্টিং।

এত বড় ঘরটা আগাগোড়া জিনিসে বোঝাই। ঘরের ঠিক মাঝখানটায় একটা মস্ত চৌকো পালঙ্ক, পালঙ্কের গদিটা প্রায় হাতখানেক পুরু, একখানা ধপধপে সাদা চাদর তাতে টান টান করে পেতে গদির তলায় তলায় গৌড়া। সেই পালঙ্কের উপর চারদিকে গির্দে তাকিয়া সাজিয়ে শ্বেত হস্তীর মত বিপুল বপুখানি নিয়ে বসে আছেন দস্তবাড়ির বড়গিন্ণী।

বড়গিন্ণী যে বিধবা সে কথা জানা ছিল না সত্যবতীর, কিন্তু এ কেমন বিধবা ? সত্যর মনের মধ্যে প্রশ্নের প্রাবল্য। এ কি রকম সাজসজ্জা ? বড়গিন্ণীর পরনে দর্শকের দৃষ্টি-পীড়াকারী অতি মিহি

চন্দ্রকোণার খানধুতি, আর আঁচলে বড় খোলোয় চাবি, সামনের চুল “আলবোট” ফ্যাশান, পিছনে একটি বড়ির মত খোঁপা।

বড়গিল্লীর নীচের হাত শূন্য ফাঁকা, কিন্তু উপর হাতে বোধ করি নিরেট সোনার মোটা মোটা প্লেন তাগা। গলায় গোছা করা গোট হার। কোলের কাছে রূপোর ডাবরভর্তি সাজা পান।

পালঙ্কের ধারে দাঁড়িয়ে বাজুর ওপর থেকে হাত বাড়িয়ে দাসী বা কোনও আশ্রিতা একখানি ঝালরদার পাখা দুলিয়ে দুলিয়ে বাতাস করছে। পালঙ্কের নীচে পায়ের কাছে একখানা জলটোকির উপর সোনার মত ঝকঝকে একটা বড় পেতলের পিকদানি, আশেপাশে চাটুকারিণীর দল। অবস্থা সম্পর্কে এবং মর্যাদা হিসাবে কেউ পালঙ্কের উপরেই বড়গিল্লীর গা ঘেঁষে বসেছেন, কেউ আলগোছে একটুখানি বসেছেন পালঙ্কের কিনারায়, কেউ কেউ বা পালঙ্ক ঘিরে আশেপাশে দাঁড়িয়ে। তারে মথো সধবা আছে, বিধবা আছে, বয়স্ক আছে, তরুণী আছে।

শূন্য প্রকোষ্ঠের উপরভাগে বাহুতে মোটা সোনার তাগা ভারী বিসদৃশ লাগল সত্যর, আর বিসদৃশ লাগল বিধবা মানুষের এরকম পানের ডাবর কোলে করে খাটগদিতে বসে থাকা। ইতিপূর্বে কোন বিধবাকে কখনো খাটগদিতে বসে থাকতে দেখেনি সত্য।

মনটা হঠাৎ কেমন বিমুগ্ন হয়ে গেল। ভাবতে চেষ্টা করল বটে, মরুক গে, এই যদি কলকাতা শহরের চালচলন হয়, আমার কি? কিন্তু চেষ্টাটা ফলবতী হল না। মন সেই মোটা তাগা পরা ছোট ছেলেদের পাশবালিশের মত মোটা মোটা ন্যাড়া হাত দুখানার দিকে তাকিয়ে সিঁটিয়ে রইল।

বড়গিল্লী চোখের কেমন একটা ইশারা করলেন, সঙ্গে সঙ্গে দ্রুতভঙ্গিতে একজন জলটোকিতে বসানো সেই পিকদানিটা উঠিয়ে নিয়ে তাঁর মুখের কাছে ধরল। বড়গিল্লী পিচ করে একটু পিক ফেলে বললেন, “কে এসে দাঁড়াল র্যা? চিনতে পাচ্ছি না তো?”

এগিয়ে এল পঞ্চর মা, বলে উঠল, “ওই যে আপনার সাত নম্বর বাড়ির—”

“অ। তাই বলি চিনতে পারছি না কেন? আসে নি ছোট কখনো? তা এসো বাছা, একটু এগিয়ে এসো। ... পায়ের ধুলো দাও খানিকটা।”

“পায়ের ধুলো” নামক জিনিসটা যে নিজে থেকে দেওয়া যায় এ হেন অভিনব কথা সত্য জীবনে এই প্রথম শুনল। তার জানার জগতে জানা আছে ওটা যার নেবার ইচ্ছে হয়, সে এসে মুণ্ডু হেঁট করে আহরণ করে নেয়।

কিংকর্তব্য বুঝতে না পেরে চূপ করে দাঁড়িয়ে থাকে।

“কই গো দাও?”

জিনেকা “খামাধারিণী” তীব্রকণ্ঠে বলে ওঠেন, “পা’র তলা থেকে এক ফোঁটা ধুলো নিয়ে এনার মাথায় দিয়ে দাও।”

সত্য গম্ভীর ভাবে বলল, “পায়ে ধুলো নেই।”

পায়ে ধুলো নেই!

এইটা একটা কথা হল?

তা ছাড়া দত্তগিল্লীর প্রার্থিত বস্তু, তাও সোনা নয় দানা নয়, নেহাতই তুচ্ছ বস্তু! সেই বস্তুর প্রার্থনা যে এভাবে অগ্রাহ্য করা যায়, এ তো অভাবনীয় কথা!

দত্তগিল্লী গালে হাত দিয়ে কোনরকমে বিস্ময় এবং অবহেলার ভাব কমিয়ে ফেলে ব্যঙ্গহাসি হেসে বললেন, “সেই যে বলে না, অভাগা যদ্যপি চায়, সাগর শুকায়ে যায়, আমার ভাগ্যে যে দেখছি তাই হল! এক ফোঁটা পদরজও দুর্লভ হল!”

সত্য অবাধ হয়ে তাকিয়ে দেখে সেই আকার-অবয়ব-বর্জিত মেদপিণ্ডের মুখের দিকে। এই মাংসের তালের মধ্যে থেকে বয়স উদ্ধার করা কঠিন, কিন্তু যিনি পৌত্রের অনুরোধ দিতে বসেছেন, নেহাৎ কিছু ছেলেমানুষ তিনি নন, কোন না সত্যর দিদিমার বয়সী! সত্যর সঙ্গে এ আবার কোন ধরনের রসিকতা তাঁর?

‘ঝড়ের আগে এঁটো পাত’ সদৃশ একটি মহিলা বলে ওঠেন, “মানুষ বুঝে কথা কইতে হয় বাছা!” কইবার আগে তাকিয়ে দেখতে হয় কাকে কি বলছি!”

বলা বাহুল্য সত্য নীরব।

শুধু তাঁর প্রকৃতি অনুযায়ী চোয়ালের পেশীগুলো দৃঢ় আর কঠিন হয়ে ওঠে।

“সোনার হার দিয়ে নৌকতা করেছ, তুমিই না?”

এবার সত্য মুখ খোলে।

নরম গলায় বলে, “নৌকতা বলছেন কেন ? খোকাকে যৎসামান্য কিছু আশীর্বাদ বৈ তো নয়।”
“তা সে যাই হোক,” দত্তগিনী অসন্তুষ্ট স্বরে বলেন, “ও হার তোমাকে ফিরে নিয়ে যেতে হবে।”

নিয়ে যেতে হবে!

সত্য অবাধ হয়ে বলে, “ছেলেকে দেওয়া জিনিস কী করব নিয়ে গিয়ে?”

“কী করবে সে তোমার বিবেচনা। তবে পেরজার দানের সোনা আমরা নিই না।”

আবার সেই “প্রজা”!

সত্যর সমস্ত শরীরের মধ্যে যেন একটা বিদ্যুৎপ্রবাহ বয়ে যায়, তবু সে কষ্টে আত্মসংবরণ করে বলে, “তাহলে দেখছি আপনাদের এই সব প্রজা-পাঠকদের নেমন্তন্ন করাটাই ভুল, নৌকতা না দিয়ে কে আর কোন কাজে যায় বলুন ? তা ছাড়া ব্রাহ্মণে কি আশীর্বাদ ফিরিয়ে নিতে পারে?”

ব্রাহ্মণ!

দত্তগিনী একটু মলিন হন।

“ওমা! এ যে দেখছি কাঠ-কাঠ কথা!” দত্তগিনী বলেন, “পোড়ারমুখী মোক্ষদা তো তা হলে ঠিকই বলেছে! যাক্, তুমিই তো হলে জিতলে। অতিথি নারায়ণ, যা বলবে শুনতেই হবে। তবে কাজটা ভাল হয় নি তোমার। বামুনের মেয়ে তুমি, তোমাদের পায়ের ধুলো আমাদের শিরোভূষণ, বলব না তোমায় আমি কিছু, শুধু এইটুকু বলব, পুটিমাছও মাছ, ঝইমাছও মাছ, তবু কে আর তাদের এক সমান বলবে বল ? যাক্ বলেছি তো অতিথি নারায়ণ! গুরে সুবাস, একে সঙ্গে করে বামুনের পাতার ঘরে বসিয়ে দিগে যা।”

অর্থাৎ এখানেই বাক্য ইতি।

সত্য ধীরে ধীরে সরে আসে আর হঠাৎ মনে হয় তার—কোথায় যেন তার একটা হার হল।

সত্য কি খাবে না ?

চলে যাবে ?

বলবে শরীর খারাপ ?

কিন্তু কিছু বলার আগেই দত্তগিনী ফের কথা বলেন, “তোমাদের ছেলের আনো নি ?”

“না।”

“কেন ? সগুটি নেমন্তন্ন হয়েছিল না ?”

সত্যর জোড়া ভুরু চির অভ্যাসমত কুচকে ওঠে, আর গলায় ফিরে আসে মৃদু কঠিন স্বর। সেই স্বরে উত্তর দেয়, “না, নেমন্তন্ন আপনার ক্রটি কিছু হয় নি। তবে সগুটির এসে মাথা মুড়োবার সময় না হলে আর উপায় কি! যাক্ আমি তো এসেছি, তাতেই হবে। কথাতেই আছে, শিরে জল ঢাললে সর্বাস্তে পড়ে।”

ঘরে যারা উপস্থিত ছিল তারা সাত নম্বর বাড়ির ভাড়াটের এ হেন স্পর্ধায়ুক্ত কথায় বিস্ময়ে হতবাক হয়ে যায় এবং ভাবলেশশূন্য মেদপিণ্ডেও কঠিন একটা ভাবের খেলা ফোটে। তা তিনিও দত্তগিনীর বড়গিনী। তাই নিজেকে সামলে নিয়ে বলেন, “বামুনের কথার তো খুব বাঁধুনী! নেকাপড়া জানা বুঝি ? ভাল ভাল। দেখি নি তো এর আগে, দেখে বড় আমোদ পেলুম। তা যাক্, খেও ভাল করে। আর ছেলের ছাঁদটা নিয়ে যেও।”

সত্য চলে যাচ্ছিল সেই সুবাস না কে তার সঙ্গে, হঠাৎ মুখ ফিরিয়ে দাঁড়িয়ে পড়ে তীক্ষ্ণ একটু হাসির সঙ্গে বলে, “আমি পাড়াগাঁয়ের মেয়ে শহুরে রীতির কিছু জানি নে। নেমন্তন্ন করে ডেকে এনে অপমান করাই বুঝি কলকাতার চাল ?”

“ওমা, শোনো কথা!”

দত্তগিনীর দুখের মত সাদা মুখখানায়ও হঠাৎ কালি মেড়ে যায়, আমতা আমতা করে বলেন, “তোমরা হলে গে কুলের কুলীন, সব বামুনের সেরা বামুন, যাকে বলে জাত সাপ। তোমাদের অপমান্য করবে, এত সাধ্যি কার আছে বল ভাই বামুনদি ? যদি দোষক্রটি কিছু হয়ে থাকে—নিজগুণে মার্জনা করে আমার খোকাকে একটু আশীর্বাদ করে যাও।”

সত্য স্থির স্বরে বলে, “আশীর্বাদ তো অবিরতই করব। কিন্তু আমাকে একটু শীগগীর ছেড়ে দিতে হবে, তাড়া আছে।”

শূদ্র-বাড়ি বামুনের খাওয়া।

দিনদুপুরে মোটা মোটা খানকতক লুচি, আলুনি খানিকটা কুমড়োর ঘাঁট আর আলুনি বেগুনভাজা। অবশ্য হরেকরকম মিষ্টি আছে, আছে দই ক্ষীর।

তা কোনটাই সত্যর কাছে আকর্ষণীয় নয়। তবু খেয়ে দায় সেরে নিয়ে তাড়াতাড়ি পঞ্চর মার সন্ধান করে। কিন্তু কোথায় পঞ্চর মা? সে তখন “চপের” আসরে গিয়ে বসেছে। তিনতলার ওপর প্রকাণ্ড হলে সে আসর বসেছে। নাতির ভাতে “চপ-কীতন” দিয়েছেন দত্তগিন্ণী।

মানদা ঢপি এসেছে।

আর নাকীসুরে টেনে টেনে কী একটা গানের গোড়াবঁধুনি শুরু করছে।

পঞ্চর মার তল্লাস করতে এসে দাঁড়ায় তার বোনঝি শৈল।

ময়লা রং, কালো ফিতেপাড় শাড়ি পরনে, সাদা ধবধবে সরু সিঁথির দুপাশে পাতাকাটা চুল, সর্বাস্থ নিরাভরণ তবু মনে হয় মেয়েটা খুব সেজেছে তো! এটা মনে হয় হয়তো মাজাঘষা গড়নের জন্যে, হয়তো বা পানেরাঙ্গা ঠোঁটের জন্যে।

শৈল বার্তা শুনে অবাধ হয়ে বলে, “ওমা, চলে যাবে কী গো? চপ শুনবে না?”

“না!”

“কী আশ্চর্য! শোনবার লেগে লোকে মরে যায়, আর তোমার এত অপেরাশি? মনে ভাবছ বুঝি শুনলেই প্যালা দিতে হবে? তা তুমি দিলেও পার, না দিলেও পার, ওটা হচ্ছে ইচ্ছেসাপেক্ষ।”

“তুমি পঞ্চর মাকে ডেকে দেবে?”

“ও বাবা! দিচ্ছি দিচ্ছি! মাসি তাই বলছিল বটে—”

“শোন তোমার মাসিকে বল একেবারে যেন একখানা পালকি ডেকে তবে আসে!”

“পালকি! ও বাবা!”

শৈল পানেরাঙ্গা ঠোঁটের একটা অপরূপ ভঙ্গি করে ওদিকে এগিয়ে যায়।

ত্রি তীক্ষ্ণ সরু গলায় গানের আওয়াজ এ বাড়ি থেকেও শোনা যাচ্ছে। শুধু এ বাড়ি কেন, দূরে অদূরে বোধ করি পাড়ার সব বাড়ি থেকেই শোনা যাচ্ছে। সুরের জন্যে যত না হোক, গলার জন্যেই ‘মানদা ঢপি’ বিখ্যাত! তীক্ষ্ণ শানানো গলা গুল্লায় সেই সুর—গান থামবার পরেও বাতাসের গায়ে ঝনঝনিয়ে আছড়ায়।

সত্য কখনও চপকেতন শোনে নি।

ছেলেবেলায় সেজঠাকুরদার মুখে কখনো কখনো হরিসভায় কেতনগান শুনতে যেত, সে অন্যরকম। তার গানের থেকে অনেক জোরালো ছিল খোল করতালের জগঝম্প। আরও ছোটয় বাবার সঙ্গে একবার যেন হালিশহরে না কোথায় নৌকো করে গিয়েছিল কালীকীর্তন শুনতে, আবছা মনে পড়ে। আর কবে কোথায়?

বারুইপুরে পানের চাষ অনেক আছে বটে, গানের চাষ নেই।

আজ যদি মেজাজটা অমন না বিগড়ে যেত, দু দণ্ড বসে গান শুনে আসত সত্য, কিন্তু হল না শোনা। যাচ্ছেতাই হয়ে গেল মন মাথা।

নিজের বাড়ির দাওয়ায় দাঁড়িয়ে একটু শোনবার চেষ্টা করল, তা সে ওই সুরের একটা বেশ ছাড়া কিছুই কানে এল না। একটুকু দাঁড়িয়ে শ্বিঃশ্বাস ফেলে সরে এল সত্য। এ শ্বিঃশ্বাস গান শুনতে না পাওয়ার জন্যে অবশ্য নয়, কারণ অন্য।

জগতে পয়সার প্রাধান্য দেখে আর পয়সার গরম দেখে মনটা উদাস হয়ে যাচ্ছে তার। কী আশ্চর্য এই কলকাতা শহর! গুণের নয়, বিদ্যোবুদ্ধির নয়, মানুষ মনিষ্যত্বের নয়, শুধু মাত্র পয়সার জয়জয়কার। এই শহরকে সেই শৈশবকাল থেকে কত ভক্তি কত সমীহর চোখে দেখে এসেছে যে সত্য!

খানিকটা উদাস-উদাস হয়ে বসে থেকে সত্য আবার ভাবল, তা একটা মাত্র সংসার দেখে, একটা মানুষের আচার-আচরণ দেখেই বা আমি এমন আশা-ছাড়া হচ্ছি কেন? এত বড় বিরাট পুরীতে কত মানুষ কত হালচাল! এই শহরেই রাজা রামমোহন ছিলেন, বিদ্যোদাসগর আছেন, বঙ্কিমচন্দ্র আছেন, পিরীলি ঠাকুরবাড়ির মহর্ষি দেবেন্দ্রনাথ ঠাকুর আছেন, আরও কত সব আছেন। ভবতোষ মাস্টার তাঁদের সব জীবনকথা, মহিমার কথা কত শুনিয়েছেন সত্যকে, সে সব ভুলে গিয়ে সত্য কিনা ওই দত্তগিন্ণীকে দিয়ে কলকাতার বিচার করছে?

মনটা ঝেড়ে ফেলে উঠল। আজ পঞ্চর মা আসবে না, তার কাজগুলো সব করে নিতে হবে।

তা একটু না গুছিয়ে নিতেই তুড়ু, আর খোকা ইঙ্কুল থেকে ফিরল দুমদাম করে।

“মা! ভীষণ নেমন্তন্ন খেলে তো?”

সমস্বরে বলে উঠল দুজনে।

সত্য হেসে ফেলে বলে, “হ্যাঁ! শুধু ভীষণ? একবা বিভীষণ! নে নে, ইঙ্কুলের জামাকাপড়ে সর্বজয় করিস নে। মুখ-হাত ধো।”

“খাবার আছে? খাবার? মগা-মেঠাই, বাজাগজা, ছানাঝড়া, অমৃতি? ভাবতে ভাবতে আসছি আমরা—”

ওদের কণ্ঠে অসহিষ্ণুতা দেদীপ্যমান।

সত্যর মনটা একটু মায়া-মায়া হয়ে আসে, এই দেখ ছোট ছেলেদের কাণ্ড! সারাদিন পড়া লেখা ফেল করে মগা-মেঠাইয়ের চিন্তা করছে। কিন্তু মায়াকে প্রশ্রয় দিলে চলবে না এখন। তাই সবিস্ময়ে ভাব দেখিয়ে বলে, “ওমা স্বপ্ন দেখছিস নাকি? ওসব আবার আমি কোথায় পাব?”

ওরা কিন্তু এ বিস্ময়কে আমল দিল না, মার হাত ধরে কুলে পড়ে হৈ-হৈ করে উঠল, “ইস তাই বৈকি! চালাকি হচ্ছে! ও বাড়ি থেকে ছাঁদ! আনো নি বুঝি?”

ছাঁদ!

সত্যর মায়া-মায়া মুখটা কঠিন হয়ে ওঠে, তীক্ষ্ণ প্রশ্ন করে, “ছাঁদার কথা কে বলেছে?”

“বাঃ, বাবা তো আপিস যাবার সময় বলল, তোদের মা কত ছাঁদ আনবে দেখিস।”

“ভুলে বলেছেন। নয়তো ঠাট্টা করেছেন।” সত্য বলে।

কিন্তু তুড়ুর মন এখন আক্ষেপ-উদ্বেল। সে বলে, “তুমি শুধু শুধু আমাদের ইঙ্কুলে পাঠালে, কেউ বুঝি আর ইঙ্কুলে গেছে? পাড়ার ওরা দিকির পেট ঠেসে খেলা আবার জনাজনতি ছাঁদা আনল। আর আমরা হুঁউ—যোল রকম নাকি মিষ্টি করেছে ওরা—”

সত্য গম্ভীর ভাবে বলে, “সেটা আবার কি করে জানলি, আপিস যাবার সময় তাও বুঝি বলা হয়েছে?”

“না, সে কথা বাবা কি করে জানবে? বলেছে পঞ্চর মা।”

“ও, তা আজ দেখছি তোদের মাথার মধ্যে শুধু ওই ছাঁদার গল্পই ঘুরছে। হ্যাংলার মতন আবার ছাঁদা আনবে কি! যাঃ চল, বাড়িতে যা আছে তাই দিই পে।”

তুড়ু বয়সে বড় হলে কি হয়, খোকার থেকে সে ছাঁদা। তাই সে সহসা বলে ওঠে, “চাই না আমি ও মুড়ি-মুড়কি আর নাড়ু খেতে! পঞ্চর মা ঠিকই বলেছে—”

হঠাৎ নিজের কথায় শিউরে উঠে চুপ করে যায় সে।

কিন্তু চুপ করিয়ে রাখবার মেয়ে সত্য নয়। সে তীব্র জেরায় কী বলেছে পঞ্চর মা তা আদায় করতে চেষ্টা করে। আর তুড়ু কাঠ হয়ে গেলেও খোকা বলে বসে, পঞ্চর মা বলেছে একদিন ইঙ্কুল কামাই হলে কী এত রাজ্যি লোপাট হয়? অমন ভোজটা থেকে ছেলে দুটোকে বঞ্চিত করল! মা না রাঙ্কুসী—

“কী! কী বললি? বন্ বন্ আর একবার!”

সত্য যেন দিশেহারা হয়ে গেছে। সত্য নিজের কানকে বিশ্বাস করতে পারছে না। এই হল শেষটা! এই রকম হচ্ছে তার ছেলেরা? এর জন্যে এত কাণ্ড করে দেশ থেকে চলে এসেছে সত্য?

তার যে একান্ত বাসনা ছিল তার ছেলেরা সত্য হবে মার্জিত হবে।

সত্যই কি তবে অসভ্য হবে, অমার্জিত হবে? মারবে ছেলেদের?

না, সত্য ছেলেদের মারে নি।

শুধু একবার সেই তীব্র প্রশ্ন করে চুপ করে গেছে। চুপ করে বসে আছে। ছেলেরা যে মুড়ি-মুড়কিও খায় নি, তা আর তার মনেও নেই। ও শুধু ভাবছে। ঘরে পরে বিপদ, কার আওতা থেকে তবে রক্ষা করবে ছেলেদের?

খানিক পরে নবকুমার এল।

আড়চোখে একবার দেখে নিল সত্যর জলদগম্ভীর মুখটা, তারপর ইশারায় খোকাকে ডেকে বাইরে নিয়ে গিয়ে প্রশ্ন করল, কী হয়েছে সত্যর।

হ্যাঁ, বেগতিক দেখলে এই রকমই ওদের প্রশ্ন করে জেনে নেয় নবকুমার। নেয় খোকার কাছে বেশী, জানে তুড়ুটা বোকা, গুছিয়ে বিশদ বলতে সে পারেও না।

কারণ শুনে নবকুমার বুঝতে পারে না, এই তুচ্ছ ব্যাপারে এত বিচলিত হবার কি হল সত্যর!

ছেলেরা তো আর মাকে রাঙ্কসী বলে নি ? বলেছে পঞ্চর মা!

তাই ঘরে ঢুকে কাঠহাসি হেসে বলে, “কি, আবার কি হল ?”

সত্য সেই ভাবেই বসে থাকে, কথা বলে না।

নবকুমার বলে, “বাবা রে, চিরটা দিন এক রকমে গেল! তোমার ‘কাঠ-কাঠিন’ স্বভাবের গুণেই পঞ্চর মা ও কথা বলেছে। তা সেইটুকু বলেছে বলে এত শাস্তিও করতে হয় ছেলে দুটোকে ? ইঙ্কল থেকে নাচতে নাচতে আসছে বড়মানুষের বাড়ির ভালমন্দ দুটো খাবে বলে, তার বদলে কিনা উপোসের সাজা! ধন্য বটে!”

উপোসের সাজা! মানে ? ওঃ, তাই তো! ছেলেদের খেতে দেওয়া হয় নি!

মুহূর্তে মনটা ভিতরে ভিতরে দ্রব হয়ে গিয়ে “হায় হায়” করে ওঠে। ছেলেদের খেতে না দিয়ে বসে আছে সে ? রাগের চোটে খেয়ালই হয় নি ? ইস! পঞ্চর মা দেখছি নেহাৎ ভুল বলেও নি। কচি ছেলে ওরা, ওদের আর ভালমন্দ বোধ কতটুকু ? ওদের বাপ বড়ো মিনসেই যদি বড়মানুষের বাড়ির খাবারের মোহময় ছবি এঁকে ওদের সামনে ধরে! রাগটা কমে গিয়ে “হায়-হায়” এলেও মুখে হারে না সত্য। গঞ্জীরমুখে বলে, “তা সামান্য দুটো মুড়ি-নাড়ু, নাই বা দিলাম, মগ্গমেঠাই খাজাগজার গল্প করগে না ছেলেদের কাছে, খুব পেট ভরবে।”

কথা কয়েছে। বাঁচা গেল।

নবকুমারের ভয়টা অনেক ভাঙে।

সত্য যখন মুখ খুলেছে, বুঝতে হবে অবস্থা একেবারে মারাত্মক নয়।

কথা না কয়ে চোয়ালের হাড় শক্ত করে নিঃশব্দে বসে থাকাকাটাকেই বড় ভয় নবকুমারের। অফিসে নবকুমারের কর্মদক্ষতা আর বুদ্ধিমত্তার এত সুনাম, নিম্নবর্তীরা এত ভয়-ভক্তি করে তাকে, সেখানে নিজেকে তো “বেশ একজন” মনে হয় কিন্তু বাড়িতে এলেই যে কী হয়! সেই চির অসহায়তা!

তবু আজ এখন সত্য মুখ খুলেছে।

তাই নবকুমারও সাহসে ভর করে বলে, “আহা খিদেয় কাহিল হয়ে গেছে একেবারে! আপিস ইঙ্কল থেকে ফিরে খিদে যা জোর লাগে জানি ভোঁ?”

অর্থাৎ এ সুযোগে নিজের কথাটাও ঢুকিয়ে দিল নবকুমার।

আর রাগ নিয়ে বসে থাকা চলে না। ঝুঁকি উঠে পড়ে।

নবকুমারও আর বেশী সময় নেই। স্বপ্নে তাড়াতাড়ি বলে ওঠে, “রাগ তো দেখালে এত, বলি ছাঁদায় এত ঘেন্না কিসের ? ছাঁদা আঁটার কে না আনে ? কেন, তোমার বাপের বাড়ির দেশে ছাঁদার চল নেই বুঝি ? আমরা তো বাবা ছেলেবেলায় ওই ছাঁদার আশাতেই নেমন্তন্ন যেতাম। ছোট পেটে কতই আর খেতে পারতাম বল ? বাড়িতে এসে পরদিন সকালে সেই ছাঁদার সরা খুলে—”

“থাক হয়েছে, গল্প রাখ—মুখ ধোও গে” বলে সত্য উঠে যায়। মনটা হঠাৎ যেন নরম হয়ে গেল। সত্যি এতে রাগের কি ছিল ? তাদের ছেলেবেলায় তারাও তো—! কেন ‘চল’ থাকবে না তার বাপের বাড়ির দেশে ? তাদের বাড়ির কাজকর্মেই তো কত সরা সাজানো, মালসা সাজানো, হাঁড়ি সাজানো দেখেছে, লোকে খাওয়াদাওয়ার পর নিয়ে গেছে। রামকালী নিজে দাঁড়িয়ে তদারক করেছেন, মাথাপিছু ঠিকমত যাচ্ছে কিনা। সঙ্গেই বিটা মুনিষটা রাখালটা পর্যন্ত বাদ যেত না। আবার সত্যরাও পিস্টাকুমার সঙ্গে যখন এ-বাড়ি ও-বাড়ি নেমন্তন্ন গেছে, তারা দিয়েছে, নেওয়া হত না তা তো নয়।

আর একটা উৎসব ছিল বিশেষ আকর্ষণীয়। সেটা হচ্ছে আটকৌড়ে। গ্রামে কারও বাড়িতে ছেলে জন্মালেই আটদিনের মাথায় ডাক পড়ত অপর বাড়ির কুচো ছেলেদের কুলো পিটোতে। সে সম্মানটা অবশ্য গুধুই ছেলেদের।

তবে খই-মুড়কি আটভাজার সঞ্জর থেকে মেয়েরা বঞ্চিত হত না। আঁটসাঁট করে বেড়াবিনুনি বাঁধা, কোমরে ডুরেশাড়ির আঁচল জড়ানো, পাড়া সচকিত করে মল বাজিয়ে যাওয়া নিজের সেই চেহারাটা যেন চোখের ওপর দেখতে পেল সত্য।

ফিরত সেই ডুরেশাড়ির আঁচলটা কৌশলে ‘কোঁচড়ে’ পরিগণত করে, তাতে খাজা গজা আটভাজার বোঝাই দিয়ে। তার মধ্যে কেউ কেউ বা আবার আটটা করে পয়সা মিশিয়ে রাখত, বাড়ি এসে কি মহোৎসবে সেই পয়সা খোঁজার ধুম!

কই, নিজেকে বা অপরকে তো তখন হ্যাংলা মনে হত না ? কেন হত না ? আজই বা কেন—

স্বামী-পুত্রের খাবার গোছাতে গোছাতে কারণটা ভাবল সত্য, নির্ণয়ও করল একটা। ওদের খেতে দিয়ে উপস্থাপিত করল সেই কথাটা।

“বলছিল আমাদের নিত্যেন্দ্রপুরে ছাঁদার চল ছিল কিনা? থাকবে না কেন, খুবই ছিল। তবে কথাটা হচ্ছে—সেই দেওয়ার মধ্যে নেমস্তন্ন-কস্তার অহঙ্কারটা ফুটে উঠত না। বরং যেন দিতে পেরেই কেতাখ। তাই যারা নিত, তাদের মধ্যে ‘মান অপমান’ ঘুলোত না। এই তোমার দত্তবাড়ির বাপু সবভাতেই যেন অহঙ্কার। একখানি একখানা তিজ্জলে বাহান্ন প্রস্থ মিষ্টি সাজিয়ে রেখেছিল তো আসনের পাশে, তা সেটা মানুষ পালকিতে তুলিয়ে দেবে তো? তা নয় বাড়ির লোকেরা কে কোথায় ঠিক নেই, কাকস্য পরিবেদনা, একটা দাসীমতন মেয়েমানুষ ভাঙ্গা কাঁসি গলায় চেঁচিয়ে উঠল, “ওগো বামুন মেয়ে, তোমার ছাঁদা পড়ে রইল যে!” দেখতো অভব্যতা! নেব আমি হাতে তুলে?”

সত্যর স্বামী-পুত্রের মনে সেই বাহান্ন রকম কী প্রতিক্রিয়া সৃষ্টি করল কে জানে, তবে নবকুমারকে স্বীর কথায় “তা সত্যি” বলে সায় দিতেই হল। তার পর কথাটা সে নিজেই পাড়ল, “তা’পর—সত্যিই সেই সোনার হারছড়াটা দিয়ে এলে নাকি?”

“তা সত্যি দেব না তো কি মিথ্যে দেব? দেব বলে নিয়ে গেলাম—”

নবকুমার আক্ষেপ-নিঃশ্বাস গোপন করে উদাসভাবে বলে, “তোমার জিনিস তুমি ফেলে দিতে পার, বিলোতে পার, সে কথা না তবে পাড়ার দু-একজনকে শুধিয়েছি সকালে, কেউ আধুলিটা কেউ সিকিটা দিয়েছ, টাকার উর্ধ্ব কেউ ওঠে নি।”

সত্য এ প্রসঙ্গে যবনিকাপাত করে দিতে বলে, “যাক গে বাপু, কচি ছেলেকে দেওয়া জিনিসের কথা নিয়ে কচকচানিতে কাজ নেই, ছাড়ান দাও ও কথায়। এবারে পুরুষ বেটাছেলের মতন একটা কাজ কর দিকি? একখানা বাসা যোজ্ঞ।”

“বাসা? আবার বাসা খুঁজব? বদলাবে এ বাসা?”

“তাই তো স্থির করেছি।”

মনে করেছি নয়, ইচ্ছে করেছি নয়, সংকল্প করেছিও ন্যূন, একেবারে স্থির করেছি!

নবকুমার মনে মনে নিজের হার নিশ্চিত জেনেও লড়াইয়ে নামে, “তা স্থির করবে বৈকি, মাথাটাই অস্থির যে! তাই নিত্যি মতন স্থির করা! বলি এই ভাড়ায় এমন বাসা আর পাবে? দত্তদের নাকি নেহাৎ পয়সায় দুকপাত নেই তাই বাসাখুঁজি? এত সস্তায় ছেড়েছে! অপর কেউ হলে দেড়া দাম হাঁকত। ওসব কু-মতলব ছাড়।”

সত্যর সেই জোড়া ডুরুর নীচের পুঁতীর কালো চোখ জোড়া সহসা একটি কৌতুক-রসশ্রিত বিদ্যুৎকটাক্ষে ঝিলিক মেয়ে ওঠে, “সত্যি বামুনী কবে তার মতলব ছেড়েছে?”

নবকুমার সেই মুখের দিকে হাঁ করে তাকিয়ে থাকে। সত্যর হাসিটা দুর্লভ বলেই কি এত অপূর্ব? না, এ অপবাদ নবকুমার দিতে পারে না—সত্য বামুনী কখন তার মতলব ছেড়েছে! শুধু নবকুমারই বুঝতে পারে না, অকারণ সুস্থ শরীর ব্যস্ত করে কী সুখ পায় সত্য!

সঙ্গে সঙ্গে হাঁ করে তাকিয়ে থাকা চোখ ফিরিয়ে নিয়ে বেজার মুখে বলে নবকুমার, “কেন, এ বাসা আবার কি অপরাধ করল?”

“সে তোমাকে বললে তুমি বুঝবে না।”

“না, আমি তো কিছুই বুঝব না। যত বোঝার কস্তা তুমি। বাসা-ফাসা বদলানো হবে না। বারে বারে এক কেতন! পাখী-পক্ষী নাকি, যে রাতদিন বাসা বদলাবে? হবে না বলে দিচ্ছি—ব্যস।”

“তা বেশ, হবে না। সত্যি, কর্তার কথাই বজায় থাক।”

বলে সত্য উঠে যায়।

এ বাসা বদলানোর ইচ্ছে যে সত্যরই খুব আছে তা নয়। বাড়িটা সব দিক দিয়ে সুবিধেয়। কিন্তু ওই মাথার ওপর প্রভু নিয়ে “প্রজা” হয়ে থাকাটাই তার বরদাস্ত হচ্ছে না। আর মজাটাও দেখ নিজের বাড়িতে নিজের মতন থাকব তা নয়, ঝিটা এবাড়ি ওবাড়ি করে যন্ত্রণা ঘটাতে থাকবে। ওকে ছাড়িয়ে দিলেও কতকটা সুরাহা হয় বটে কিন্তু সেটাও ঠিক মনের সঙ্গে খাপ খায় না। মানুষটা দুটুপাজী নয়। উপকারীও আছে। দোষের মধ্যে হচ্ছে অবোধ। আর অবোধ বলেই অতিরিক্ত কথা হয়। সেই কথার জ্বালাতেই ছেলে দুটোর কুশিক্ষা জন্মাচ্ছে।

তা সেই কথাই বলে ছাড়িয়ে দিতে হবে পঞ্চর মাকে। বলতে হবে, “আমার ছেলের যদি তুমি শেখাও ‘মা নয়, রাক্ষসী’, তা হলে তোমায় কি করে রাখি বল তো বাছা? সামনের মাস থেকে অন্য কাজ দেখ।”

সেই কথাই ঠিক করে মনে মনে ।

এবাড়ি ওবাড়ি আনাগোনার কথা তুলে খেলো হবে না । আসুক কাল সকালে ।

কিন্তু কাল সকাল অবধি অপেক্ষা করতে হল না সত্যকে, সেই সন্ধ্যাতেই এসে হাজির হল পঞ্চুর মা, সম্পূর্ণ অপ্রত্যাশিত এক বার্তা নিয়ে ।

এ কী!

এ কোন্ বিপদ অপেক্ষা করছিল সত্যর জন্যে ?

সন্ধ্যার আগে দুপুরের কথাটা তা হলে বলে নিতে হয় ।

দত্তগিন্ণী পিচ্ করে পিক ফেলে বলেন, “হ্যাঁলা পঞ্চুর মা, তোর মনিবগিন্ণী বয়সে তো কাঁচা, ওর এত অঙ্কার কিসের বল্ দিকিনি ?”

দত্তগিন্ণীর চির মোসাহেব “ভাগ্নে-বৌ” হি-হি করে হেসে উঠে বলে, “ওই কাঁচা বয়সেরই অহঙ্কার গো মামী! নইলে অহঙ্কার করবার আর কিছু তো দেখছি না ।”

দত্তগিন্ণী ভারীমুখে বললেন, “উঁহু, এ বাপু বয়সের দেমাক নয়, এ হচ্ছে স্বভাবের দেমাক । সংসারের ওর আর কে আছে রে পঞ্চুর মা ?”

পঞ্চুর মা এ বাড়িতে কোনদিনই “পঞ্চুর মা” বৈ পঞ্চুর মা শোনে না, তাই ওই অগ্রাহ্যের ভঙ্গী তার গা-সহা । অতএব বিনয়ে বিগলিত হয়েই সে উত্তর দেয়, “আর কে ? ওই উনি, ওনার সোয়ামী, আর দুটো সাত আট বছরের খোকা!”

“অঃ! তাই! কথাতেই আছে, মেঘা খেয়ে রোদ হয় তার বড় চড়চড়ানি, আর বৌ হয়ে গিন্ণী হয় তার বড় ফড়ফড়ানি । তা শান্তডীমাগী বুঝি মরেছে ?”

পঞ্চুর মা কৌতূহলের ভঙ্গীতে বলে, “বলাই যাট! মরবে কেন ? শান্তডী আছে স্বত্তর আছে, আছে সবাই । দেশ-গেরামে আছে । উনি বাসায় এসেছেন স্বামীপুত্র নিয়ে । সোয়ামী সাহেবের আপিসে চাকরি করে ।”

“বটে! তাই তো বলি! তাতেই তেজে মটমট! দেশ কোথা ?”

“কোথা কি বিভ্রান্ত কে শুধাবে মা!” পঞ্চুর মা মনে মনে সত্যর প্রতি স্নেহশীল এবং সমীহপরায়ণ হলেও, নিতান্তই দত্তগিন্ণীর পুয়ো হতে মনিবের প্রতি অগ্রাহ্য দেখিয়ে বলে, “গপ্পো করবার সময় আছে তেনার ? ঘরের কলজ মিটল তো বই কেতাব মুখে দিয়ে বসল—”

বই কেতাব!

ঘরের মধ্যে একটা ব্যঙ্গহাসির ঢেউ খেলে যায়, “তাই নাকি ? ওরে পঞ্চুর মা, তুই যে দেখচি খুব ভাল বাড়িতে চাকরি ধরেছিস! দেখিস বাপু, গিন্ণীর হাওয়া লেগে তুই সুন্দ পণ্ডিতনী হয়ে যাস নি!”

পঞ্চুর মা হেসে বলে, “তা পারলে গিন্ণী আমাকেও বই ধরায় । বাব্বা, ছেলে দুটোকে ‘পড়া পড়া’ করে যা দিক করে । তবু ওই ছেলে দুটোই যা গপ্পোগাছা করে আমার সঙ্গে । ওদের মুখেই শুনেছি, বারুইপুর না কোথায় যেন দেশ, ঠাকুমা আছে ঠাকুন্দা আছে পিসি আছে আর মামার বাড়ি সেই ‘তিরবেণী’র কাছে নিত্যনন্দপুর না কি যেন । দাদামশায় কবরেজ খুব বড়মানুষ—”

সহসা ঘরের মধ্যে একটা মানুষের মুখ কেমন উদ্ভ্রান্তের মত হয়ে যায়, দেয়ালের কোলে একখানা পেতলের চৌকিতে পাতিয়ে পাতিয়ে পান সাজছিল সে, কাজ করা হাতটা তার থেমে যায় । হাঁ করে ভাকিয়ে থাকে পঞ্চুর মার মুখের দিকে, কানে যায় না দত্তগিন্ণীর মন্তব্য ।

“বড়মানুষের কি” বলেই এত দেমাক সাত নম্বর বাড়ির গিন্ণীর—সেই মন্তব্যই করেন দত্তগিন্ণী ।

পঞ্চুর মাও মন্তব্য দিয়ে পরিসমাপ্তি করে, “সেই তো!”

“শুনলাম নাকি ছাঁদার হাঁড়ি ছোঁয়ে নি—” ভাগ্নে-বৌ নিভন্ত আঙুনে কাঠ ফেলে, “চপ শোনে নি!”

“সেই কথাই তো বলে মরছি বৌদিদি—” পঞ্চুর মা আক্ষেপ করে, “এত এত নোকের সময় হল, আর তোর সময় হল না ? পাড়ার সকল ছেলে ঘরে বসে রইল, তোর ছেলেনদেরই ইকুলের মানি এত হল! ছেলে দুটোর জন্যে মরছি করকরিয়ে—”

“তা যাস, হাঁড়িখানা নয় তুই-ই নিয়ে যাস । দিস গিয়ে ছোঁড়াদের ।”

বলেন অপর এক মহিলা ।

কিন্তু পানসাজুনি বিধবাটির কানে বুঝি এসবের বিন্দুবিসর্গও যায় না। সে তেমনি হাঁ করে তাকিয়ে থাকে পঞ্চর মার মুখপানে, আর কি বলে সে সেই আশায়।

পঞ্চর মা কিন্তু আর কথা বাড়াই না। সত্যর বিরুদ্ধে কথা বলতে তার বিবেক তেমন সায় দিচ্ছে না, তবে নেহাৎ নাকি এ ঘরে এখন পালের হাওয়া উল্টো দিকে তাই। বড়মানুষের কথার ধামা তো ধরতেই হবে। তা ছাড়া সত্যর ওপর তার আজ সত্যিই বড় রাগ হয়েছে।

সে কোথায় ভেবে রেখেছিল সত্যকে নিয়ে এসে বড়লোকের বাড়ির জাঁকজমক দেখাবে, আর তার বোনঝি শৈলর যে এ বাড়িতে কতখানি মানমর্যাদা তা বুঝিয়ে ছাড়বে। একটা মানিয়মানের মাসী পিসি হওয়াও তো কম গৌরবের নয়।

মানিয়মান বৈকি!

দত্তগিনীর মেজছেলের সঙ্গে শৈলর দহরম-মহরম তো আর রাখা-ঢাকা নেই। মেজবাবুর উপর শৈলর আধিপত্য একেবারে প্রকাশ্য ব্যাপার। মেজবৌটাকে চিট রাখতে দত্তগিনী এ আঙনে রীতিমতই ইঞ্চন দিয়ে চলেন। শৈলর জন্যে গন্ধতেল গন্ধসাবান সরবরাহ হয় দত্তগিনীর নিজের ভাঁড়ার থেকে। শৈলর জন্যে পানে খাবার সব চেয়ে দামী 'কিমা' আসে গিনীর খরচে। শৈলর ফিতেপেড়ে শান্তিপুরী হাফশাড়ীর যোগানদার অবশ্য মেজবাবু স্বয়ং, তবে একটু ময়লা কি ছেঁড়া চোখে পড়লেই দত্তগিনী "গ্যাদারী বেজারমুখী" মেজবৌটাকে শুনিয়ে শুনিয়ে শৈলকে বলেন, "হ্যাঁলা, কাপড় এত ময়লা কেন? নেই বুঝি? বলতে পারিস না তোর মেজদাদাবাবুকে?"

এতজন থাকতে মেজদাদাবাবুকেই কেন, সে প্রশ্নটা অবশ্য উঠা থাকে।

তা এসব রঙ্গরসের গুণুপো অবশ্য পঞ্চর মার মনিবনীর সঙ্গে করার জো নেই, কিন্তু শৈলর দখলভিটা দেখানো যেত—তা হল না কিছুই।

মরুক গে।

যার যেমন বুদ্ধি।

বুদ্ধির দোষেই ঠকে মানুষ। বৌদিদি যে এত বুদ্ধিমতী, তা কই জিততে পারল কই, হেরেই তো মলো। নিজে ভাল করে খেলি না, স্বামীপুস্তরকে খেতে দিলি না, গান শুনলি না, সব দিকেই ঠকলি! ধুস্তর!

মনঃফুল্ল পঞ্চর মা পানসাজুনির দিকে এগিয়ে এসে বলে, "দাও বামুনদি, দুটো বেশ মচমচে করে পান দাও দিকি খাই—"

দুটো পান ভাড়াভাড়ি সেজে কম্পিউ হাতে সে দুটো পঞ্চর মার হাতে তুলে দিয়ে পানসাজুনি বামুনদি চাপা নীচু গলায় বলে, "কই তোর মনিবনীকে তো আমার দেখালি না?"

"ওমা শোন কথা! ক'দণ্ড থাকল তিনি? এল আর চলে গেল বৈ তো না।"

"তোদের কথাবার্তা শুনে একটু কৌতূহল হচ্ছে। বলি এত তেজদত্ত শুনছি—দেখাবি না একবার?"

"আর দেখানো! বৌদি কি আর এমুখো হবে? আর এ বাড়িতে আসবে? তবে যদি তুমি—"

বামুনদি আরও মৃদু গলায় বলে, "তবে তাই চল না, দেখে আসি।"

"ওমা! হঠাৎ আমার মনিবের ওপর এমন নেকনজর কেন গো বামুনদি?"

"আস্তে। এফুনি গিনীর কানে উঠবে আর 'না' করে বসবে!"

"বেশ, সন্ধ্যার পর নিয়ে যাব।"

যাবার মুখটায় কিন্তু বামুনদিদি কেমন যেন বিচলিত হয়, আগ্রহটা যেন ঝিমিয়ে আসে তার। বলে, "থাক গে পঞ্চর মা—কাজ নেই।"

"ওমা কেন? ত্যাখন অত 'মন' করলে!"

"হ্যাঁ, কোঁকের মাথায় তখন বলেছিলাম বটে, তা বলি কি, গেলে আবার এ গিনীর যদি গৌসা হয়?"

"শোন কথা! কে টের পাচ্ছে? তোমার আমার মতন চুনোপুটির খবর রাখতে ওনাদের দায় পড়েছে। কাজের বাড়িতে নানান গোলামাল, দশটা নতুন রাঁধুনী চাকরানী খাটছে, ফাঁকি দেবার এই তো সুযোগ।"

"না ভাবছি—গিয়েই বা কি হবে! শুনেছি নাকি দেমাকী, রাঁধুনী পানসাজুনির সঙ্গে যদি কথা না কয়!"

“ওমা না না, তু তুমি ভেবে না বামুনদি—” পঞ্চুর মা অভয় দেয়, “তাকে যদি কেউ ঘাঁটাতে না যায় সেও কিছু বলবে না। বাড়িতে অতিথি এলে বরং আদর-আভ্যনই করবে, রাঁধুনী চাকরানী বিচার করবে না। এই তো সেদিন তাঁতিনী মাপী গেছল, তাকে কত যত্ন করে বসাল, তেঁটার জল দিল পান দিল। কাপড় অবিশ্যি নিল না, বলল দরকার নেই, তবে দূর-ছাই তো করল না।”

অনেক অগ্রপশ্চাতের পর শেষ অবধি অগ্রেরই জয় হয়।

পেঁজা তুরতুরে সিন্ধের চাদরখানা গায়ে জড়িয়ে সন্ধ্যের দিকে খিড়কির দরজা খুলে পঞ্চুর মার সঙ্গে রাস্তায় নামল পানসাজুনি বামুনমেয়ে।

বামুনের মেয়ে একদা কাজের দরকার নিয়ে এসেছিল দস্তবাড়িতে। নেহাৎ ঝি-চাকরানীর কাজ তো দেওয়া যায় না তাকে, তাই এই কাজের ভার। অবশ্য ‘পান সাজা’ কথাটা শুনে যত হালকা, এ বাড়িতে সে ব্যাপারটা তত হালকা নয়। দৈনিক অন্তত হাজার তিনেক পান তাকে সাজতে হয়। তদুপযুক্ত সুপুরিও কেটে নিতে হয়। তাছাড়া সব পান ঠিক এক ধরনের সাজলে চলে না, তার আবার শ্রেণীবিভাগ আছে। কারুর কারুর মিঠাপানের খিলি বরাদ্দ, কারুর কারুর জায়ফল দারচিনি জৈত্রি কাবাবচিনি এলাচ কর্পূর সম্বলিত রাজকীয় পান, কারো বা দোস্তা খাওয়া মুখের রুচি অনুযায়ী শুধু ষয়ের দুপুরি। আবার সুপুরিও মিহি মোটা নানান প্রস্থ। এই সব পানের নৈবেদ্য সজিয়ে যার যার ঘরের বাটায় রেখে আসতে হয় গোলাপজলে ভিজানো ন্যাকড়া চাপা দিয়ে।

এছাড়া সরকার গোমস্তা লোকজন, অতিথি ফকির, ‘আসুত্তি যাউত্তি’, আশ্রিত অভ্যাগতদের জন্যে মোটা বাংলা পানের ব্যবস্থা আছে। সমস্ত ওই বামুনমেয়ের ঘাড়ে। শুধু পান নিয়েই সারাটা দিন তার প্রাণ যায়-যায়। তার ওপর আবার বাড়িতে যজ্ঞি হলে তো কথাই নেই। সেও তো আছে যখন তখন। বিয়ে, সাধ, মুখেভাত এসব বাদেও বাড়ির হরেক রকম মেয়েমানুষের হরেক রকম ‘বন্ত সারা’ও তো সারা বছর। লোকজন খাওয়া লেগেই আছে। দস্তগিনীর ছোটজা অনন্ত-চতুর্দশীর বন্ত সারল, তিন-চারশ লোক খেল। পতিপুত্রহারা বিধবা, জীবু কমতি কিছু হল না। বড়গিনী উদারমনা, বললেন, “তা হোক। ওই কেউ না থাক, আমি মুখের আছি আমিই ওর সব করাব। ইহকালটা তো বৃথাই গেল, পরকালটা বজায় থাক।”

ছোটগিনী অবশ্য বেইমান।

আড়ালে আবড়ালে বলে বেড়ায়, “আমার বুঝি ভাগ নেই দস্তদের বিষয়-সম্পত্তিতে? বানের জলে ভেসে এসেছি বুঝি আমি? কাঠ হাত করে ঢুকি নি আমি এদের উঠানে। গাঁটছড়া বেঁধে সঙ্গে করে নিয়ে আসে নি এদেরই একজন?” তাকে উল্কুনিও দেয় কেউ কেউ।

কিন্তু সে নেহাতই আড়ালে। বড়গিনীর সামনে সবাই ঠাণ্ড।

কিন্তু সে যাক।

পথ চলতে চলতে বামুনমেয়ের সঙ্গে নিম্নোক্ত কথাবার্তা হয় পঞ্চুর মার, “যতই হোক তুমি হলে স্বজাতি, তোমায় সমেহা দেখাবে।”

স্বজাতি অবশ্য সত্যবতীর। কারণ সেও বামুন।

বামুনমেয়ে কিন্তু এ আশ্বাসে উল্লসিত হয় না। উদাসভাবে বলে, “সোনারবেনের অন্ন খাওয়া বামুন আবার বামুন! তুইও যেমন পঞ্চুর মা। তোরা ‘বামুনদি বামুনদি’ করিস তাই, নিজেকে বামুনের মেয়ে বলে পরিচয় দিতে আমার ইচ্ছে করে না। নেহাৎ নাকি কাজ করতে এসে শুন্দুর বললে পাছে পা টিপতে, ছাড়া কাপড় কাচতে, এঁটো বাসন মাজতে বলে, তাই ওই পরিচয় দেওয়া।”

“তা কেন বামুনদি, তোমার আচার-আচরণ তো সদ বামুনের মতনই। নইলে রাঁধুনী কুটনোকুটনী ভাঁড়ারদিউনি আরও যে-সব বামনী ধনী আছেন, তাঁদের আচার-কেতা তো আর পঞ্চুর মার অবদিত নেই! খেঁচার মা তো সেদিন লুকিয়ে গরম মাছছাজা খেতে গিয়ে জিভে কাঁটা ফুটিয়ে হাতেনাতে ধরা পড়ল, তাই কি মাপীর হায়া আছে? আসল কথা কি জান বামুনদি, স্বভাব-চরিত্রটি যতক্ষণ ভাল আছে, ত্যাতোক্ষণ কক্ষনো সে আচারবিচার ছাড়বে না। আচার-অনাচার ত্যাগ করলেই বুঝবে মতিগতি বিপড়েছে। ধম্ব-কম্ব আচার-আচরণ হচ্ছে নদীর বাঁধ, যদি একবার ভাঙ্গে—”

বাসনমাজা ঝি পঞ্চুর মার এই জীবনদর্শনের ব্যাখ্যার শেষাংশটা আপাতত মূলতুবী থাকে। সত্যবতীর দরজায় এসে পড়েছে দুজনই। পঞ্চুর মা শানানো গলায় ডাক পাড়ে, “কই গো বৌদিদি কোথায়? একবার বেরিয়ে এসো গো। নতুন মানুষ এয়েছে তোমায় দর্শন করতে।”



অনেকদিন নিতাইয়ের সঙ্গে দেখা-সাক্ষাৎ নেই, ছাতাটা হাতে নিয়ে রোদের মধ্যে বেরিয়ে পড়ে নবকুমার। আজ ছুটির দিনে বাসায় আছে নিশ্চয়। নিতাই চলে যাবার পর প্রথম প্রথম নিতাইয়ের সামনে মুখ তুলে দাঁড়াতে লজ্জা করত, নিজেকে ভারী অপরাধী মনে হত, কিন্তু সময়ে সবই সয়। সেই লজ্জা একটু একটু করে কমেছে। সত্যবতীই বার বার ঠেলে পাঠিয়েছে নেমস্তন্ন করতে। আর অবাধ কাণ্ড, দিব্য সহজভাবে নিতাইয়ের সঙ্গে কথা কয়েছে সত্য, নিতাই যা বা ভালবাসে, মনে করে করে রেখেছে, অনুরোধ উপরোধ করে খাইয়েছে।

এই সব অসমসাহসিক কাণ্ডগুলো কী করেই যে করে সত্য! যাক, আজ নবকুমার নিজেই যাচ্ছে। আজ বাড়িতে মন বসল না। সেই যে পরশ সন্ধ্যাবেলা পঞ্চর মা কোথা থেকে একটা বিধবা মেয়েছেলে নিয়ে এসে বকবক করল, তারপর থেকেই সত্য যেন কেমন হয়ে গেছে। কথা, নেই বার্তা নেই, ছেলেদের সঙ্গে হাসিখুশি নেই, যেন কোন্ জগতে বাস করছে।

কথাটা সত্য—পরশ থেকে সত্য এক ধাঁধার জগতে বাস করছে।

কাকে নিয়ে এল পঞ্চর মা? শুধু দন্তবাড়ির পানসাজুনি? তাহলে কি জনোই বা এল সে?

সত্যকে দর্শন করার বাসনা এমন প্রবল হবার হেতু কি তার? তা তাই যদি হয়, মন খুলে কথাই বা কইল কই? কেমন চেপে চেপে রেখে রেখে কথা, থেমে থেমে নিঃশ্বাস, ভেতরে যেন কত কি!

ওকে কি সত্য আগে কোথাও দেখেছে? সত্যার খুব একটা ঠোনা মানুষের মতন কি দেখতে ও? কিন্তু সে মানুষটা তো এমন পোড়ামূর্তি ছিল না! ওর নিয়ন্ত্রিত কি শেষ অবধি আশুন হয়ে ওকে বলসা-পোড়া করে ছেড়েছে?

দু'জনের মধ্যেই যেন উত্তাল ঢেউ, কিন্তু কেউই নিজে থেকে এগিয়ে এসে খপ করে হাত ধরে বলে উঠল না, “তুমি সেই না?”

পঞ্চর মা খনখন করে বলে উঠেছিল, “কই গো বামুনদি, এত আগ্রহ করে এলে, অথচ বাকি-ওকি নেই কেন?”

সেই বামুনদি আস্তে আস্তে বলেছিল, “কথা কইতে তো আসি নি, দেখতে এসেছি।”

গলার শব্দটা কি সত্যার শোনা নয়?

যেন অনেক সাগরের ওপারে অনেক যুগের আগে সত্য এই স্বর শুনেছে। তবু বলতে পারা যায় নি, “আমার চোখকে তুমি ফাঁকি দিতে পারবে না গো, আমি বড় খুবকর মেয়ে।”

বাধা অনেক।

“হয় কি নয়, নয় কি হয়”—এর আলো-আধাঁরির বাধা, সমাজ-সামাজিকের বাধা, অবস্থার তারতম্যের বাধা, সর্বোপরি পঞ্চর মার উপস্থিতির বাধা, সেটাই হয়েছিল বোধ করি সব থেকে বড় বাধা। হঠাৎ একলা দু'জনে মুখোমুখি দাঁড়ালে হয়তো অন্য বাধাগুলো মুহূর্তে খসে পড়ত, হয়তো দ্বিধামাত্র না করে ঝপ করে বলে ফেলা হত, “শেষ অবধি তা হলে এই হাল হয়েছে? বেশ ভাল! সুখটা করলে ভাল!” আগে হলেও বলতো। অনেক যুগ আগে ছেলেমানুষ ছিল সত্য, এখন তো নেই।

তাই সে সব হল না। খানিক পরে পঞ্চর মা হাই তুলে বলল, “চল তা হলে বামুনদি, তোমাকে দুয়ার অবধি এগিয়ে দিয়ে আমি ঘরে যাই। সারাটা দিন রপটানি গেছে, চোখ ভেঙে ঘুম আসছে।”

“চল।” বলে উঠে পড়েছিল সে। বলে নি, “আর একটু থাকি না!”

সত্য বলে নি, “আর একটু বসো না!”

সেই অবধি বিমনা হয়ে রয়েছে সত্য।

নবকুমার বলেছিল, “পঞ্চর মার সঙ্গে ওই মাগীটা কে এসেছিল? কেন—”

কথা শেষ করতে পারে নি, তীব্র স্বরে থামিয়ে দিয়েছিল তাকে, “ছেলেপেলের সামনে অভিভাব্যর মত কথা কও কেন?” বলেছিল সত্য। আর তদবধিই যেন সত্য চিন্তামগ্ন।

ছুটির সকালটা দু-দু রান্নাঘরের দোরে বসে গল্প করতে কত ভাল লাগে। মনমেজাজ ভাল থাকলে সত্য অপূর্ব! সত্যি বলতে—মনমেজাজ ভাল না থাকলেও কী যে এক আকর্ষণ! নবকুমারকে যেন দড়ি দিয়ে বেঁধে রাখা। নেহাৎ অফিসের সময়টুকু ছাড়া বাড়ি থেকে বেরোতেই ইচ্ছে করে না! তুড়ু-খোকার পড়াটড়াগুলো একটু দেখতে হয়, কারণ মাস্টারমশাই আজকাল নিয়মিত আসেন না। কিন্তু ওই ছাই কর্তব্য কর্মটর্ম তেমন ভাল লাগে না, এক যা বাজার করাটা একটু ভাল লাগে। বাদে ইচ্ছে হয় দুজন মুখোমুখি বসে থাকি। তা হবার জো নেই। সত্যি, সংসার করাটা এত ভারী করে তোলার দরকারটাই বা কি? হাসলাম গল্প করলাম, খেললাম ঘুমোলাম চুকে গেল তা নয়—রাতদিন “দেশের একজন” হবার সাধ কর, ছেলেদের “মানুষের মতন মানুষ” করে তোলবার চেষ্টা কর, মান-মর্যাদা রইল কি গেল তাই ভেবে মাথা খারাপ কর, কেন রে বাবা? গাঁ-ভুঁই ছেড়ে বাসায় এসে তা হলে লাভটা কি হল? আমোদ-আহ্লাদে থাকা যাবে বলেই না আসা?

এই যে সেদিন তনল আপিসের বন্ধু রামরতনবাবু তার পরিবারকে নিয়ে নাকি থিয়েটার দেখতে গেছিল, “নিমাই সল্যাস” পালা, রামরতনের পরিবার নাকি দেখতে দেখতে কেঁদে বুক ভাসিয়েছে, বাড়ি এসে তিনদিন ধরে কেঁদে মরেছে। নবকুমার সত্যকে ধরে পড়েছিল যাবার জন্য, গেল না!

বলল কিনা, “এখন মাসের শেষ—হাতের টানাটানি। থিয়েটারে যেতে তো পয়সা লাগবে। তা ছাড়া তুড়ু-খোকাকে নিয়ে সমিস্যে। ওদের দেখবে কে রাত অবধি?”

ওদের নিয়ে যাবার কথা তো উড়িয়েই দিল। ছেলেদের ঘোড়দৌড়ের খেলা দেখাতে নিয়ে যেতে চেয়েছিল নবকুমার, তাও বারণ।

কেন যে সত্য এ রকম!

এক যুগ ধরে মনকে এই প্রশ্নই করে চলেছে নবকুমার।

আজ কপালটাই অভাগিয়ার।

নিতাইয়ের সঙ্গে দেখা হল না। কোথায় গেছে। তার মেসের এক ভদ্রলোক বললেন, “জানি না মশাই, মানুষের সঙ্গে তো মিশতেই চান না নিতাইবাবু। ভাবগতিও তেমন ভাল ঠেকে না আমাদের। চোখে না দেখলে কারুর নামে অপবাদ দিতে নেই। গুঁর পাশের সীটের হারাণবাবু যা বলেছেন তাই বলছি—স্বভাবচরিত্র ভাল নেই নিতাইবাবুর।”

“অ্যা! কী বললেন!”

প্রায় মাটিতেই বসে পড়ে নবকুমার।

এ কী সর্বনেশে সংবাদ!

ভদ্রলোক বললেন, “আপনার বিশেষ বন্ধু বুঝি? তবে তো আপনাকে কথাটা বলা আমার ভুল হয়েছে। তবে একরকম ভালও। দেখুন আপনি যদি বুঝিয়ে-সুঝিয়ে সুপথে আনতে পারেন। অবিশি ও পথ থেকে ফেরানো বড় শক্ত কথা।”

মনের মধ্যে একটা দারুণ যন্ত্রণা নিয়ে ভবতোষ মাস্টারের কাছে যায় নবকুমার। বোধ করি এই প্রথম সে সত্যর নির্দেশ ব্যতীতই একটা কাজ করে ফেলে।

মাস্টার একখানা বই সামনে রেখে উপুড় হয়ে পড়ে তা থেকে বাতায় কি সব লিখে নিচ্ছিলেন, নবকুমার কাছের গোড়ায় বসে পড়ে বিনা ভূমিকায় বলে ফেলে, “ভয়ানক একটা বিপদে পড়ে আপনার কাছে এসেছি মাস্টার মশাই!”

মাস্টার চমকে ওঠেন।

কী হল? কারুর অসুখবিসুখ নয় তো? সত্যবতী ফোন গালতে পুড়ে যায় নি তো? উঠানে আছাড় খেয়ে পড়ে যায় নি তো? চকিত হয়ে বলেন, “বসে বসো, আগে একটু স্থির হও। ব্যাপারটা কি?”

“ব্যাপারটা গুরুতর। নিতাইয়ের চরিত্রদোষ ঘটছে!”

“কী ঘটছে নিতাইয়ের?”

ঝোকের মাথায় কথাটা বলে ফেলেই লজ্জা পায় নবকুমার। এবার মাথাটা চুলকে নীচু গলায় বলে, “আজ্ঞে আজ গিয়েছিলাম নিতাইয়ের মেসে, তা দেখা হল না। একজন বলল, নিতাই কোথায় যায় কোথায় না যায় ঠিক নেই, আর—আর তার স্বভাবদোষ ঘটছে।”

ভবতোষ মিনিটখানেক চুপ করে থেকে বলেন, “লোকটা নিতাইয়ের শত্রুটর নয় তো?”

“আজ্ঞে না না। সেরকম কিছু না।”

“তবে তো সত্যিই বিপদ!” ভবতোষ নিজের মনে বিড়বিড় করে বলেন, “এই রকম একটা ভয়ই আমার ছিল।”

নবকুমার বলে, “আজ্ঞে কী বলছেন?”

“নাঃ, তোমায় কিছু বলি নি!”

“আপনি একবার তার সঙ্গে দেখা করে বোঝান মাস্টার মশাই।”

“বোঝাব?” ভবতোষ হাসে।

“এসব ক্ষেত্রে মাস্টারের বুঝ কোনো কাজে লাগে না নব!”

“কিন্তু একটা তো কিছু করতে হবে মাস্টারমশাই।”

চিরনিস্তেজ নবকুমারের এই ব্যাকুলতা মনকে স্পর্শ করে ভবতোষের। তিনি স্নেহাঙ্গুলি গলায় বলেন, “আচ্ছা আমি চেষ্টা করব। তবে কি জান—”

“আজ্ঞে কি বলছেন?”

“বলছি—মানে বলছিলাম কি, আমার বলার চাইতে অনেক বেশী কাজ হবে যদি বৌমা একবার—”

বৌমা!

নবকুমার বিমূঢ় নির্বোধ গলায় বলে, “কার কথা বলছেন, ইয়ে তুড়ুর মা?”

“হ্যাঁ, তাই বলছি। উনি যদি একবার নিতাইকে দিব্যি-দিলেশা দিয়ে বলতে পারেন, হয়তো কাজ হতে পারে!”

নবকুমার তেমন গলাতেই বলে, “আপনি বললে কাজ হবে না, হবে গুর কথায়?”

ভবতোষের মুখে রহস্যের জালে আবৃত সূক্ষ্ম একটু হাসির রেখা ফুটে ওঠে। ধীরে বলেন, “হলে গুর কথাতেই হবে। নচেৎ—”

“তবে তাই বলতে বলব।” বলে বিমূঢ় নবকুমার উঠে দাঁড়ায়। তবে মাস্টারের প্রস্তাবটা তার হৃদয়ঙ্গম হয় না। আর সত্যি বলতে কি, ভালও খুব লাগে না। ভাল লাগে না নিতাইয়ের সামনে সভ্যকে উপস্থাপিত করার কথাটা। যতই বন্ধু হোক নিতাই, তার যখন স্বভাব খারাপ হয়েছে তখন বিশ্বাস কি? কে জানে মদ-টদও ধরেছে কিনা। সম্মুখীন চিরত্রহীন, এদের কাছ থেকে ‘মেয়েছেলেদের’ শতহস্ত দূরে থাকা উচিত।

নবকুমারের বাপ নীলাম্বর বাড়ুয়ে নারীক ব্যক্তিটিও যে ওইসব অপরাধে অপরাধী এবং চিরদিন তিনি সমাজের মাথার ওপর বাস করে আসছেন, সেটা অবশ্য মনে পড়ে না নবকুমারের।

নিতাইয়ের এই অধঃপতনের খবরটা এবং ভবতোষ মাস্টারের ওই অনাসৃষ্টি প্রস্তাবটা কিভাবে সত্যর কাছে ফেলবে, আর সত্য সেটা কিভাবে নেবে ভাবতে ভাবতে বাড়ি ফেরে।

বেলাও হয়ে গেছে ঢের। সত্য হাঁড়ি নিয়ে বসে আছে। দ্রুত এসে দরজাটায় ধাক্কা দিতে যায় নবকুমার, কিন্তু ধাক্কার আগেই হাত ঠেকাতেই খুলে যায় সেটা। তার মানে আগল দেওয়া ছিল না।

কী কাণ্ড! ভবদুপুরে দোরটা খুলে রেখেছে! বলবে বলে ব্যস্ত হয়ে ঢুকেই দু-পা পিছিয়ে আসে।

দাওয়ার খুঁটির কাছে সত্য একজনের হাত ধরে দাঁড়িয়ে।

॥ পঁয়ত্রিশ ॥



না, হাত ধরার অপরাধে জাত যাবে না, পুরুষ নয় মেয়েমানুষ। বিহ্বল-দৃষ্টি এক বিধবা! শীর্ণ দেহ পোড়া রং। নবকুমারও বিহ্বল দৃষ্টিতে তাকিয়ে থেকে স্তব্ধ হয়ে পায়, সত্য তার নিজস্ব সবল ভঙ্গীতে বলছে, “হাতে যখন পেয়েছি, আর ছাড়ি? মেয়ে নিয়ে চলে এস তুমি আমার কাছে। আমার যদি দুবেলা দুমুঠো জোটে, তোমারও একবেলা একমুঠো জুটবে। আমার ছেলে দুটো যদি খেতে পরতে পায়, তোমার মেয়েটাও পাবে।”

গুনে গায়ের রক্ত হিম হয়ে যায় নবকুমারের। এসব আবার কি কথা? কে এ? কোথায় এর মেয়ে? সত্যর সঙ্গে কী সম্পর্ক এর? আবার হঠাৎ সেই হিম হয়ে যাওয়া রক্ত উত্তপ্ত হয়ে উঠল। পুরুষের রক্ত!

নবকুমারের সঙ্গে একবার পরামর্শ পর্যন্ত না করে দু-দুটো মানুষকে খেতে পরতে দেবার ভরসা দিয়ে বাড়িতে জায়গা দিতে চাইতে সত্য! এতই বা সাহস কেন মেয়েমানুষের? নবকুমার কিছু বলে না বলে বড় বড় বেড়ে গেছে!

নবকুমারের চিরদিনের প্রাণের বন্ধু নিতাই, বিনি অপরাধে তাকে বাড়ি থেকে সরিয়ে দেওয়া হল। যার জন্যে মনের দুঃখে, ঘেন্নায়, অভিমানে স্বভাবটাই খারাপ করে ফেলল ছেলেটা। নবকুমারের সঙ্গে এক বাড়িতে থাকলে কখনই এসব ঘটত না। মেসে কত রকম কুসঙ্গ!

নবকুমারের চোখে জল এসে গেল। তার পর ভাবল, এখন কিনা কে কোথাকার একটা মাগী, নবকুমার যাকে সাতজন্মেও চোখে দেখে নি, তাকে বাড়িতে প্রতিষ্ঠা করবার ষড়যন্ত্র আঁটা হচ্ছে!

চালাকি!

চলবে না, এসব চলবে না। নবকুমার সাফ জবাব দিয়ে দেবে—নবকুমারের বাড়িতে এসব চালাকি চলবে না।

নির্বাণ সত্যর বাপের বাড়ির দেশের লোক। তাই এত ভালবাসা! সত্যি বলতে কি একটা ঈর্ষাও অনুভব করে নবকুমার। নবকুমারের সম্পূর্ণ অপরিচিত জগতের কাউকে যে সত্য মনে জায়গা দেবে এ অসম্ভব। হোক না সে মেয়েমানুষ, তবুও!

মনের কথা যে মন ছাড়া আর কেউ জানতে পারে না, এ বাঁচোয়াতেই পৃথিবী টিকে আছে। নইলে পৃথিবী তার সমাজ সভ্যতা শিক্ষা সংস্কৃতি সব কিছুর বড়াই নিয়ে কোন্ কালে রসাতলের অতল তলায় তলিয়ে যেত।

মনের কথা অন্যে টের পায় না।

নিতান্ত মনের মানুষটাও না।

এই আনন্দের যথেষ্ট নেচে বেড়াচ্ছে মানুষ, যত পারে বড় বড় কথা বলছে। আর স্নেহ প্রেম ভালবাসার মহিমা দেখাচ্ছে। তা এ রহস্যটা মানুষ নিজেও খোঁসায় করে না, এই যা মজা।

নবকুমারও খোঁসায় করে না, বিধাতার কাছে একান্ত বড় পাওয়া পেয়ে বসে আছে সে। মনে মনে তাই শুধু সত্যকেই বাক্যবাণে বিদ্ধ করে না, বিধাতাপুরুষকেও করে। করে বিধাতা নবকুমারকে পুরুষ আর সত্যকে মেয়ে করেছেন বলে। সন্দেহ হচ্ছে না। এই হাত ধরা দৃশ্য আর সহ্য হচ্ছে না।

গলা ঝাড়ার শব্দ করল নবকুমার।

এতক্ষণ সত্য নিজের ঝাঁকে ছিল, খোঁসায় করে নি আর, আর একজন তো দরজার দিকে পিঠ করে দাঁড়িয়ে। গলার শব্দে উভয়েই সূচকিত হল। বিধবাটি একটু সরে গেল।

আর সত্য ধরা হাতটা ছেড়ে দিয়ে হাত তুলে মাথার কাপড়টা টানল।

বুদ্ধিমতী সত্য অবশ্য তক্ষুনি হৈ-হৈ করে আবির্ভূত মহিলার পরিচয় দিতে এল না। স্বামীর কাছে। তা ছাড়া লজ্জা-শরম বলেও কথা আছে। গুরুজনদের সামনে বরের সঙ্গে কথা বলা চলে না। তাই মাথার কাপড়টা টেনে গলা নামিয়ে আস্তে বলল, “চল বৌ, ও ঘরে গিয়ে বসবে চল।”

নবকুমার ভেবেছিল যা বলবে গলা চড়িয়ে বলবে, যাতে শুই মেয়েমানুষটার কানে পৌঁছয়। যাতে সে বুঝতে পারে বাড়ির প্রকৃত কর্তা কে। আর এও বুঝতে পারে বৃথা আশায় প্রলুব্ধ হয়ে কোনও লাভ নেই তার। সত্য ছেলেমানুষ, না বুঝেসুঝে কি না কি বলেছে, সেটা ধোপে টিকল না। এ সবই আশা করছিল নবকুমার।

কিন্তু গলা চড়ল না।

শুধু চড়ল না নয়, প্রায় বাকস্কৃতিই হল না। একটা গম্গমে রাগ-রাগ ভাব নিয়ে চান করে এসে খেতে বসল।

ভাতের খালা ধরে দিতে দিতে সত্য প্রশ্ন করে, “এত বেলা অবধি গিয়েছিল কোথায়?”

নবকুমার পাতের উপর হুসু করে সমস্ত ডালটা একসঙ্গে টেলে কেলে ভাত মাখতে মাখতে গম্বীর গলায় বলল, “যেখানেই যাই না, তোমার কাছে তার কৈফিয়ৎ দিতে হবে নাকি?”

“শোন কথা! কী কথার কী উত্তর! কৈফিয়ৎ দিতে হবে, এ কথা কে বলেছে? নাইতে খেতে বেলা গড়িয়ে গেল, তাই শুধাচ্ছি।”

“না, শুধোতে হবে না।” তেমনি গলাতে চালিয়ে যায় নবকুমার, “শুধোবার কোনও এক্সিয়ার নেই তোমার। কি জন্যে শুধোবে? তুমি আমায় মেনে চল? তাই আমি তোমায় মেনে চলব?”

সত্য অবাক হয়ে বলে, “রোদের তাতে হঠাৎ মাথাটা গরম হয়ে গেল নাকি? কী বলছ আবেল-তাবোল?”

“আবোল-ভাবোল! আবোল-ভাবোল বকছি আমি? আর নিজে যখন বলা নেই কওয়া নেই—”

গলা চড়াবার ব্যর্থ চেষ্টায় ‘বিষম’ খায় নবকুমার।

অগতাই তখন সত্যর চিকিৎসাবিদী হতে হয় সত্যর বীরপুরুষ স্বামীকে। জল-বাতাস, মাথায় ফুঁ। ধাতস্থ হতে সময় লাগে।

আর ধাতস্থ হওয়া মাত্রই সত্য নিম্নস্বরে বলে, “সংসারে আর দুজন মানুষ বাড়ল, একটু জানিয়ে রাখছি তোমায়। নইলে যেমন মতিবুদ্ধি তোমার, হঠাৎ হৈ-চৈ লাগাবে— কে এরা, কোথা থেকে এল?”

নবকুমার বলতে পারত, “তা সে কথা তো জিজ্ঞেস করবই আমি। সত্যিই তো—কে এরা, কোথা থেকে এল? কেন এল? আর আমিই বা খামোকা দুটো মানুষকে সংসারে জায়গা দিতে যাব কিসের জন্যে?”

বলতে পারল না।

সেই বিষম-খাওয়া ধরা-গলায় যা বলল সেটা হচ্ছে এই, “তা আমাকে জানাবার কি আছে? তুমি যা ভালো বুঝবে—”

কর গলা?

নবকুমারের?

নবকুমার এ কথা বলল কেন?

এতক্ষণ ধরে এই কথাটা বলবার জন্যেই কি “মহলা” দিচ্ছিল নবকুমার মনে মনে?

সেই সেদিন পঙ্কুর মার সঙ্গে একবারের জন্যে দেখা করে গিয়ে পর্যন্ত দস্তবাড়ির “পানসাজুনি”র প্রাণটা যে কেন দেয়ালে মাথা কুটতে চাইছিল তা ভগবানই জানেন। আর তার সাক্ষীও শুধু তিনিই।

তাই আবার যখন এদিন সে দিনদুপুরে পঙ্কুর মাকে ধরে রসল, “চুপি চুপি আর একবার আমায় নিয়ে যাবি?” তখন পঙ্কুর মা হাঁ হয়ে গেল।

বলল, “হ্যাঁগা, সেদিন তো কথাই কইলে না! আবার সাজ যাবে বলছ মানে?”

“কি জানি পঙ্কুর মা, মনটা কেমন টানছে। আমার একটা ছোট বোন ছিল, অনেকটা তেমনি দেখতে—”

পঙ্কুর মা বোধ করি একটা তবু মানে শোয়ে আশ্বস্ত হয়। তবে এ প্রশ্ন তোলে—দিন-দুপুরে চুপি-চুপিটা সম্ভব কি করে?

সে বুদ্ধি পানসাজুনিই দিয়েছে। কালীউলায় যাবার নাম করে বেরিয়ে পড়া। ঠনঠনের মা কালী জাহ্নত কালী, তাঁর কাছে সময়-অসময় যায়ও সবাই। ... দূরও বেশী নয়, এই তো একটু গেলেই।

দেবীদর্শনেই এসেছিল পানসাজুনি বায়ুনদিদি। আর সে দর্শন তার মিলেছিল।

তারপর তো সেই নবকুমারের প্রবেশ।

শঙ্করী বলে, “ঠাকুরঝি বলে ডাকবার মুখ নেই, তবু বলতে বড় সাধ যাচ্ছে তাই বলছি, “মিথ্যে ছেলেমানুষি করো না সত্য ঠাকুরঝি, তুমি যা বলছ তা হবার নয়।”

“হবার নয়?”

সত্য জোরালো গলায় বলে, “কিন্তু কেন হবার নয়, সেই কথাটাই আমায় বোঝাও কাটোয়ার বৌ! ভুল-ভ্রান্তি মানুষেই করে, তা বলে কস্মিনকালে আর সে ভুল শোধরাতে পাবে না সে?”

“শোধরাব বললেই হল? সমাজ সে আবদার শুনবে?” শঙ্করী নিঃশ্বাস ফেলে বলে, “মেয়েমানুষ যে মাটির পাত্তর ঠাকুরঝি, ও তো ছুঁলে গেই গেল!”

“মেয়েমানুষ যে মাটির পাত্তর, এ কথা বুদ্ধি বিধাতাপুরুষ তার গায়ে দেগে দিয়ে ধরাভূমিতে পাঠিয়েছিল?” সত্য তীক্ষ্ণ স্বরে বলে, “আর বেটাছেলেকে সোনার বাসন বলে ছাপ মেয়ে পাঠিয়েছিল? তাই তাদের বেলা যা করুক তাই বাহবা! হ্যাঁ, অন্যান্যই তুমি করেছিলে সত্যি, খুব করেছিলে। তুমি বয়সে বড়, গুরুজন সম্পর্ক, বলাটা আমার শোভা পায় না, তবু না বলেও পারছি না, যা করেছিলে তা মহাপাতক। তখন জ্ঞান-বুদ্ধি ছিল না, পুরো বুঝতে পারি নি, কিসের জন্যে কি! কিন্তু পরে তো বুঝেছি। বুঝে মিথ্যে বলব না, মনে মনে তোমায় নোড়া দিয়ে ছেঁচেছি আমি। শুধু মহাপাতক বলেই নয়, বাবার মতন মানিয়মান মানুষের উঁচু মাথাটা যে তুমি হেঁট করে দিয়েছিলে, সেই ঘেন্নার জ্বালায় তোমায় শতক দিক দিয়েছি। তবে এও তো সত্যি, অতি পাতকেরও প্রাচিতির আছে। যেমন মহাপাতক করেছ তুমি, তার মহা প্রাচিতিরই করেছ। তুযানলে জ্বলে জ্বলে খাক হয়েছ।”

“সত্য ঠাকুরঝি!”

শঙ্করী আবেগ-কম্পিত স্বরে বলে, “মানো ছোটের কথা বলি না, তবে তুমি আমার চেয়ে বয়সে আন্দেক, তাই পায়ের ধুলো নিলাম না তোমার। কিন্তু জিজ্ঞেস করি, রাতদিন যে আমি ডুযানলে জ্বলছি, এ তুমি কেমন করে টের পেলে?”

“শোন কথা! এর আবার টের পাবার কি আছে? প্রত্যক্ষ দেখতে পাচ্ছি না? দিষ্টহীন তো নই? ডুযানলে যে জ্বলছ, সে সাক্ষী দিচ্ছে তোমার ওই গোড়াকাঠ দেহ। কি সোনার বর্ণ রং ছিল, কী মোমে গড়া দেহ ছিল তোমার, সেটা তো আর ভুলি নি! তা যাক, রূপ গেছে বালাই গেছে, থাকলে আর কী ধুয়ে জল খেতে? ওই রূপই কাল হয়ে দংশন করেছে তোমায়। গেছে যাক, কিন্তু শরীর-স্বাস্থ্যটা তো দেখতে হবে? গলায় দড়ি দিয়ে বুলে এহকালের বালাইটা ঘোচাও নি যখন?”

শঙ্করী কাতর কণ্ঠে বলে, “সেই ইচ্ছে কি আর হয় নি ঠাকুরঝি? রাতদিন সে ইচ্ছে হয়েছে, কিন্তু পারি নি। ওই পেটের জঞ্জালটাই পায়ের বেড়ি হয়েছে। আমিই মহাপাতকী, ওর আর অপরাধ কী! ত্রিজনতে কেউ নেই ওর, মরে ওকে কোথায় ভাসিয়ে দিয়ে যাবো?”

সত্য ঝঙ্কার দিয়ে বলে, “যাক সে সুমুর্তিটুকু যে হয়েছিল তাও মঙ্গল। একে তো এই পাতকের বোঝা, তার উপর আবার আত্মঘাতী মরণের পাপ! নরকেও ঠাই হত না। যাক গে মরুক গে, গতস্য শোচনা নাস্তি। এখন সোজা কথা হচ্ছে—এতাবৎ যা করেছে, এখন আমার চোখে যখন ধরা পড়েছ, আর তোমার শুদ্ধুরের দাস্যবিস্তি করা চলবে না!”

শঙ্করী বিষণ্ণ হাসি হেসে বলে, “বয়েস হয়েছে, ছেলেপুলের মা হয়েছে, তবু স্বভাবটি তোমার দেখছি ঠিক তেমনি ডাকাবুকো আছে সত্য-ঠাকুরঝি। কিন্তু জগৎকে চিনতেও বাকি আছে। আমায় ঘরে ঠাই দিলে তোমাকে কি আর কেউ ঘরে ঠাই দেবে?”

হঠাৎ সত্যর মুখটা উজ্জ্বল হয়ে ওঠে। একটু মুখ টিপে হাসে সে। তার পর বলে, “কে ঘরে ঠাই দেবে না? তোমার ননদাই?”

“বালাই যাট! তা বলছি না! তিনি তোমায় চিরকাল রাজরাণী, মাথায় মণি করে রাখুন। এই সমাজের কথা বলছি। জানাজানি হয়ে গেলে—”

“জানাজানি হয়ে যাবার আবার কি আছে কাটোয়ারী বৌ! আমি কি লুকোছাপি করব? আমি তো ঠিক করছি আজই বাবাকে পত্তর দেব। বাবা এই কাজ করেছে আমি, এখন আমায় মারতে হয় মার, কাটতে হয় কাট আর রাখতে হস্ত রাখ!”

“বাবা” শব্দটা শুনেই শঙ্করী সহসা দু হাত জোড় করে কপালে ঠেকায়।

সেই “বাবা” নামক মানুষটার উদ্দেশ্যে কি ভগবানের উদ্দেশ্যে?

বোধ করি ভগবানের উদ্দেশ্যে।

সাহস করে সেই বাড়ি, মানুষগুলো, সর্বোপরি সেই দৃশ্যমূর্তি দেবোপম ব্যক্তিটি সম্পর্কে কোনও প্রশ্নই করতে সাহস ছিল না শঙ্করীর। ভয়, লজ্জা, অপরাধের সঙ্কোচ, এসব তো আছেই, তার ওপর এক আশঙ্কার আভাস। যদি প্রশ্ন করতে গিয়ে শোনে, মানুষটা নেই? সে বড় ভয়ঙ্কর!

কিন্তু সত্য বলছে, “বাবাকে পত্তর লিখব।” তাই কপালে হাত ঠেকিয়েছে শঙ্করী।

আতঙ্কটা যাবার সঙ্গে সঙ্গে ভয় লজ্জা সঙ্কোচ সবই যেন একটু সরে দাঁড়ায়। যেন শঙ্করীর অবস্থা দেখে দয়া হয়েছে ওদের।

তাই শঙ্করী ঈশ্বর ইতস্তত করে বলেই ফেলে, “মামাঠাকুরের শরীরগতিক মঙ্গল?”

শরীরগতিক!

সত্য নিঃশ্বাস ফেলে বলে, “খুব ভাল নয়, তবে মানুষটাকে তো জান? ভাঙব তবু মচকাব না। নইলে মা মারা যাওয়ার পর থেকে ভেতরে ভেতরে দেহ ভেঙে গেছে। কলকাতায় আসার আগে দেখা করে এলাম তো।”

মা মারা যাওয়া!

শঙ্করী ভাবে, এ ‘মা’ রামকালীরই মা, দীনতারিণী। ভাবে তা তিনি মরবেন এটা তো আশ্চর্য্যও নয়, দুঃখের নয়, তার নাকি রামকালী হৃদয়বান পুরুষ, মাতৃশোককে মর্যাদা দিয়েছেন। তবু বলে, “তিনি জ্ঞানবান মানুষ হয়ে এত কাতর হয়েছেন? তা বড়দিদিমা মারা গেছেন কতদিন হল?”

“বড়দিদিমা!”

সত্য ভুরু কুঁচকে বলে, “ঠাকুরমার কথা শুধোচ্ছ? মারা গেছেন এই ক’বছর যেন হল। আমি আমার মার কথা বলছি। মা তো চলে গেছেন—”

সত্য চুপ করে যায়।

গলার কম্পন কেউ ধরে ফেলবে, এতে সত্যর বড় লজ্জা।

শঙ্করী স্তম্ভিত দৃষ্টিতে তাকিয়ে বলে, “মেজমামীমা মারা গেছেন?”

সত্য নীরব।

সত্য নভদৃষ্টি।

অনেকক্ষণ পর শঙ্করী একটা পরিতাপের নিঃশ্বাস ফেলে বলে, “কতদিন হল?”

“এই আমার বড় খোকা তখন আঁতুড়ে।”

আস্তে আস্তে উদ্বেলিত নিঃশ্বাস শান্ত হয়ে যায়। ক্রমশ ধীরে ধীরে কখন যে নিঃশ্বাস ফেলার ধাপ থেকে গল্প করার অবস্থায় এসে পৌঁছে গেছে ওরা, তা ওদের নিজেদেরই খেয়াল থাকে না।

অতীত স্মৃতির রোমন্থনে সময়ের জ্ঞান হারায় বুঝি।

শঙ্করী প্রশ্নকত্রী।

সত্য উত্তরদাত্রী।

শঙ্করী যেন গভীর সমুদ্রে হাতড়ে হাতড়ে কী এক হারানো মানিক খুঁজতে চাইছে, আর সত্য যেন শঙ্করীর সেই প্রশ্নের হাতড়ানির মধ্যে দিয়ে ফিরে পাচ্ছে তার হারানো শৈশবকে।

নিত্যানন্দপুরের রামকালী কবরেজের অন্তঃপুরটা না একদা সশস্ত্র-গ্রহরী-বেষ্টিত অন্ধকার কারাগারের মত লাগত শঙ্করীর?

তবে আজ সেই অন্তঃপুরটা আলোকোজ্জ্বল স্বর্গের মতো মনে হচ্ছে কেন তার?

সেই স্বর্গকে দেখেই হারিয়েছে শঙ্করী! ভাঙা মাটির বাসনের মত হেলায় পথের ধুলোয় আছড়ে ফেলে শয়তানের ছলনায় স্বর্গে!

অনেক কথা অনেক নিঃশ্বাস।

ভারী হয়ে উঠেছে বাতাস।

তবু আবার একটা গভীর নিঃশ্বাস ফেলে বলে সত্য, “আজ তুমি ওই দণ্ডবাড়ির পানসাজুনিগিরি করছ কাটোয়ার বৌ, কিন্তু এর থেকে হাজার গুণ সখ্যাদা ছিল যদি তুমি কবরেজবাড়ির উঠোনটা ঝেঁটিয়েও খেতে।”

“মতিছন্ন! পূর্বজন্মের মহাপাতক! আর কিছু বলার নেই আমার।”

“যাই হোক, তুমি আর দ্বিধা করো না বৌ, মেয়ে নিয়ে একবস্ত্রে চলে এস। পেটের ভেতরের অন্তঃস্থ তো আর এক কথায় ধুয়ে মুছে সাফ হবে না, তবে পরনের ওই সব পতিত বস্ত্র পরিত্যাগ দিতে হবে। ও ত্যাগ না দিলে গলদ আর দূর হতে চাইবে না। সে যাক, মেয়ে কত বড়টা হল?”

“কত বড়? মানে বয়সের কথা বলছ?”

শঙ্করীর চোখের ছায়ায় যেন একটু ধূসর শূন্যতা। সে শূন্যতার স্পর্শ তার কণ্ঠে এসে লাগে।

“বয়স? তোমার কাছে আর লুকোছাপা করব না ঠাকুরঝি, পষ্টই বলছি—বয়স চৌদ্দ উত্তরে গেছে এই মাঘে।”

“মাঘে! তাহলে পনেরোই! পনেরো চলছে!” সত্য বিমূঢ় ভাবে বলে, “বিয়ে?”

“বিয়ে!” শঙ্করী ক্ষুদ্র ব্যঙ্গমিশ্রিত একটু হাসে। এ ব্যঙ্গ ভাগ্যকে। এ ক্ষোভ সত্যর প্রশ্নতে।

সত্য একটু চুপ করে থেকে বলে, “তা যাদের সংসারে আছ, তারা কিছু বলে না? তাদের কি জবাব দাও?”

শঙ্করী তেমন একটু হেসে বলে, “সে জবাব আগে থেকেই ঠিক করে রেখেছিলাম। বলেছি পাঁচ বছরের বিয়ে, সাত বছরে বিধবা, শ্বশুরবাড়ি চক্ষে দেখে নি—”

সত্য ইতিমধ্যে শিউরে উঠেছে।

“বল কি বৌ, কি সন্দেহে মা তুমি!” আইবুড়ো মেয়েটাকে ‘বিধবা’ বলে পরিচয় দিয়েছ? সমগ্র পৃথিবীতে এমন কথা কেউ কখনো শুনেছে? বলি এই কাণটা যে করে রেখেছ, আজন্ম তো তাকে আলোচাল কাঁচকলা গিলতে হচ্ছে?”

“তা হচ্ছে বৈকি। আমার যা তারও তাই। তার বেশী জুটছেই বা কোথা থেকে ঠাকুরঝি?”

সত্য পরিতপ্ত সুরে বলে, “তা যেন হল। কিন্তু এর পর ওর বিয়ে দেবে কি করে?”

শঙ্করী নিঃশ্বাস ফেলে বলে, “সে পরিচয় না দিলেই কি বিয়ে দিতে পারতাম ঠাকুরঝি? বাপ-ঠাকুরদার পরিচয়হীন মেয়েকে কে বৌ বলে ঘরে তুলবে?”

সত্য ভুল কুঁচকে বসে থাকে কিছুক্ষণ, তার পর বলে, “তা সেই নগেন না কে, যার সঙ্গে বিয়ে তোমার হয়েছিল বললে—”

“ফাঁকি, ফাঁকি, সব ফাঁকি, বুঝলে ঠাকুরঝি, সেই নরকের কীট পাপিষ্ঠ শয়তান ফাঁকি দিয়ে আমাকে—”, রুদ্ধকণ্ঠ পরিষ্কার করে বলে শঙ্করী, “কী বলব ঠাকুরঝি, ওই ভোগায় না পড়লে কি দুর্ঘটিত হত আমার ? বলল, কলকাতায় এখন বিধবা বিয়ের চল হয়েছে। কত অল্পবয়সী বিধবা আবার সুখে-স্বচ্ছন্দে ঘর করছে। সেই ভোগায় ভুলে পাতালের সিঁড়িতে পা ফেললাম।”

সত্য বিরসমুখে বলে, “তা হলে বিয়ে করে নি ?”

“না, সে মিথ্যে বলব না, করেছে। বিধবা বিয়ে দিতে রাজী হয় এমন পুরুত ডেকে অগ্নি নারায়ণ সাক্ষী করে ঠাট্টা একটা দেখিয়েছিল। কিন্তু সেই বিয়েকে যদি সে মনেপ্রাণে সত্যি বলে মানত, তা হলে কি পেটে সন্তান এসেছে ওনেই আমাকে ছেঁড়া কাপড়ের মতন ফেলে চলে যেত ?”

“তা যাক।” সত্য একটা অস্বস্তির নিঃশ্বাস ফেলে, “তার চরিত্রের উপযুক্ত কাজই সে করেছে। কিন্তু তুমি তো একপ্রকার ধর্মে খাঁটি আছ। আর তোমার মেয়েকেও অধর্মের সন্তান বলে চলে না। বিধবা বিয়ে আমার চোখে অবিশ্যি ভাল ঠেকে না, তবে মন্দের ভাল। বড় বড় পণ্ডিতেরা যখন শাস্ত্র পড়ে বুঝেসুঝে বিধান দিয়ে রেখেছেন, তখন একেবারে তো উড়িয়ে দেওয়া যায় না। তাঁদের চেয়ে আমি পণ্ডিত নই। তবু বলব কাটোয়ার বৌ, মেয়ের এই মিথ্যে বিধবা পরিচয়টা তোমার দেওয়া উচিত হয় নি। তার কাছেও তো একটা জবাব আছে ? সে যখন বড় হবে, পাঁচজনের বিয়েথাওয়া গয়নাকাপড় ঘরবর দেখবে, তখন তার প্রাণের ভেতরটি কেমন করবে ? তখন তোমায় একদিন শুধাবে না, “মা, মা হয়ে তুমি আমার এই করলে—”

শঙ্করী কথায় মাঝখানেই উদাস গভীর সুরে বলে, “সে জিজ্ঞেসের গোড়াও মেরে রেখেছি ঠাকুরঝি। তাকে ওই কথায় বুঝিয়ে রেখেছি। বলেছি পাঁচ বছর বয়সের ঘটনা, তোর স্মরণে নেই।”

“বৌ!”

আবেগ-কম্পিত স্বরে শুধু এই একাক্ষর শব্দটুকু উচ্চারণ করে সত্য।

শঙ্করী সত্যর সেই ক্ষুদ্র বিস্মিত আহত মুখের দিকে তাকিয়ে বলে, “তা তুমি শতক ব্যাটা মারতে পার ঠাকুরঝি, কিন্তু এ ছাড়া আর কোনও উপায় আমি দেখতে পাই নি। বলতে পার আমি না নই রাফসী, কিন্তু তবু তো সেই দুর্দিনে গর্ভসূক্ত গঙ্গায় ডুবে মরতে পারি নি ? আর ওর জন্যেই দোর দোর ঘুরেছি, হাজার লাখি ব্যাটা খেয়েছি, মান-অপমান জলাঞ্জলি দিয়েছি, আর আজ সোনারবেনের দাসত্ব করে ভাত খাচ্ছি। কিন্তু বাড়ি ভাল নয়। লোকে বলে অনুদাতার নিন্দে করতে নেই, তবু না বলে উপায় নেই, সোমন্ত মেয়ে নিয়ে ও বাড়িতে থাকা কাঁটা হয়ে থাকা। শুধু মেয়েটাকে যদি তুমি—” চুপ করে যায় শঙ্করী।

অনেকক্ষণ নীরবতার পর সত্য আন্তে বলে, “নাম কি রেখেছ ?”

“নাম!” শঙ্করীর কণ্ঠে যেন অপরাধের সুর বাজে, “দু মাস বয়স থেকে হাসিটা লক্ষীছাড়ির এত মন-কাড়া ছিল যে নাম রেখে বসেছিলাম সুহাসিনী!”

তা অপরাধের সুর আসাই স্বাভাবিক, ওই হতভাগ্য মেয়েটার নাম ‘মলিনা’ কি ‘অশ্রমতী’ নিদেনপক্ষে ‘ছায়া’ কি ‘দাসী’ এমনি একটা হলেই যেন শোভা পেত!

কিন্তু সত্য সে খোঁটা দিল না। সত্য বলল, “তা মন্দ নয়। সে যাক, বাড়ি যখন অমন বলছ, আর তো থাকা ঠিক নয়। মেয়ে নিয়ে অবিলম্বে চলে এস।”

“হ্যাঁ, বাড়ি ওদের অমনি!” নবকুমারের কাছে বসে সত্য চাপা তীব্র স্বরে বলে, “ভদ্রঘরের মেয়ের এসব কথা মুখে আনলেও পাপ, তবে অবস্থাটা তোমায় স্পষ্ট করে খুলে না বললেও তো বুঝবে না তুমি। ওই রূপের ডালি মেয়ে নিয়ে কি কাঁটা হয়ে থাকে বৌ বুঝে দেখ। বলে, নীচের তলায় রান্নাবাড়ির কাছে একখানা ছোট ঘর আছে, তাতে নাকি কাঠ-মুঁটে থাকত, সেই ঘর পরিষ্কার করে ময়ে-ঝিয়ে আছে। কেন ? না পাছে কারুর চোখে পড়ে যায়! দিনান্তে একবার নাইতে খেতে ঘর থেকে বেরোতে দেয় মেয়েকে, তাও নিজের কড়া পাহারায়। আইবুড়ো মেয়েটাকে ‘বিধবা’ পরিচয় দিয়ে রেখে দিয়েছে! ভাব কষ্ট!”

নবকুমার কিন্তু বেশী বিচলিত হয় না, বরং নিতান্ত ব্যাজার মুখে বলে, “তা সে যার কথা সে বুঝবে, তোমার এত আগ বাড়াবার দরকার কি ? শুধু গরীব দুঃখী অঝোরে বিধবা ভাজ হত তার মানে ছিল। এসব কি ? না না, এসব কেঙ্হাকেলেকারী আমার বাড়িতে ঢোকানো চলবে না। বাসাতেই নয়

এসেছি, তা বলে তো বেওয়ারিশ নই আমি। মা শুনেলে আর আমার মুখ দেখবে, না তোমার হাতে জল খাবে ?”

সত্য স্থিরকণ্ঠে বলে, “বলার আমার অনেক কথা ছিল, কিন্তু বলব না সে সব। শুধু বলছি, আমি যদি তাঁদের মত করাতে পারি ?”

“হ্যাঁ, মত করাতে পার!” নবকুমার বলে ওঠে, “এ তোমার কাছা-আলগা নবকুমার বাঁড়ুয়োর কিনা, যে তোমার কথায় উঠবে বসবে! সে বড় শক্ত ঘাটা!”

সত্য জ্রভঙ্গী করে বলে, “নিজের মুখে নিজের ব্যাখ্যানটা আর নাই করলে। বেশ, ওনাদের মতটা পেলেই তো হল ?”

“তা তোমাকে বিশ্বাস নেই। তুমি যা ডাকাত, হয়তো শ্বশুর-শাশুড়ীর গলায় গামছা মোড়া দিয়ে মত আদায় করবে। কিন্তু এত ঝামেলায় দরকার কি শুনি ? আমি বলে দিচ্ছি—আমার সংসারে ওসব চলবে না—”

সত্য সহসা জ্রভঙ্গী ত্যাগ করে উদাস মুখে বলে, “বেশ তাই ভাল। সেই কথাই বলে দেব ভাজকে। বলব, না বৌ, এ সংসারে তোমার ঠাই হবে না, ভুল করে ভেবেছিলাম, সংসারটা বুঝি আমার, তা মস্ত একটা হাতুড়ির ঘায়ে ভুলটা ভেঙেছে। চোখ ফুটে গেছে। ভালই হল, শিক্ষা হয়ে গেল।”

নবকুমার বসে পড়ে।

নবকুমার চোখে সর্ষেফুল দেখে।

নবকুমার সমস্ত বীরত্ব ত্যাগ করে ওই সেই চিরমুখস্থ কথাটা বলে বসে, “হল তো! অমনি রাগ হয়ে গেল ? রাগের কথা কিছু বলি নি আমি। শুধু বলেছি সুখে থাকতে ভূতের কীল খাওয়া কেন ?”

সত্যর মুখের কাঠিন্য কিছুটা হ্রাস হয়।

সত্য স্থির স্বরে বলে, “আর একদিন তোমার এ প্রশ্নের উত্তর দিয়েছিলাম, আজ আবার দিচ্ছি, কীল খাওয়া কেন জান ? মানুষ জাতটা ‘মানুষ’ বলে। গরু-গাধা-স্বাধী-পক্ষী নয় বলে।”

“আর ওই যে আবার একটা মেয়ে রয়েছে—”

“রয়েছে সে কথা তো হয়েই গেছে।”

“সেও মায়ের মত হবে কি না—”

“যাতে না হয় সেই চেষ্টাই করতে হবে।”

সত্য উঠে যায় দৃঢ় সংকল্পের মুখ নিয়ে

সুহাসিনী!

ডাকনাম সুহাস।

হ্যাঁ, বয়সের সঙ্গে সঙ্গে রূপের ডালিই হচ্ছে। শঙ্করীর বাস্তুহারা কৈশোর মূর্তি যেন গুর মধ্যে এসে পুনর্বাসন করেছে। এত দুঃখ-ধাক্কা, এত লাঞ্ছনা-গঞ্জনা, মায়ের এত কড়া শাসন, তবু কলায় কলায় ভরে উঠেছে দেহ। পনেরো কলা ভর ভর, আর একটা কলা হলেই সম্পূর্ণ।

মেয়ের মুখ দেখে শঙ্করীর বুক ভয়ে ওঠে। মেয়ের রূপ দেখে শঙ্করীর বুক কেঁপে ওঠে। তাই কখনো মেয়েকে কোলে নিয়ে কাঁদে, কখনো মেয়েকে দাঁতে পেঘে।

মেয়েকে দাঁতে পেঘা তো নয়, নিজেকেই জাঁতার পেঘা। কিন্তু করবে কি শঙ্করী, তার যে বেড়া আগুন!

যেদিন সত্য হাত ধরে বসল—সে রাত্রে মেয়েকে যাচ্ছেতাই করল শঙ্করী। বলল, “তবে আন খানিক বিষ্ আন, তুইও খা, আমিও খাই। সকল জ্বালা জুড়োক। সকল সমস্যা মিটুক।”

কথাটা এই, মার মারফত সত্যর প্রস্তাব শুনে সুহাস একেবারে বঁকে বসেছে। ওসব অনাসৃষ্টির মধ্যে যেতে রাজী নয় সে। অনেক হাঁড়ির হালের শেষ, অনেক ঘাটের জল পার করে এতদিনে যদি পায়ের তলায় একটু মাটি মিলেছে, যার তুল্য নেই রাজবাড়িতে আশ্রয় জুটে গেছে, এখন আবার অনিশ্চিতের সমুদ্রে ঝাঁপ দিতে যাবার কী দরকার ?

আপনার লোক!

তিনকুলে কেউ ছিল না, একমুঠো পোড়ামুড়ি নিয়ে কেউ এগিয়ে আসে নি, এখন হঠাৎ তুই ফুঁড়ে আপনার লোক গজাল! হতে পারে কোন এক সময় দেশের লোক ছিল, কিন্তু তাতে কি চারখানা হাত-পা বেরোচ্ছে ? হঠাৎ তাঁর এত দরদ উথলে ওঠবার কারণটাই বা কি ? আর কিছুই নয়,

বিনি মাইনের দাসী-রাধুনী পেয়ে যাবার আশ্বাস। ভেবেছে দুটো দরদের কথা কয়ে একবার বাড়িতে পুরে ফেলতে পারলে হয়।... শঙ্করী যেমন বোকা তাই বুঝতে পারে না, এর পর একূল ওকূল দুকূল যাবে।

হ্যাঁ, প্রথমটায় এত কথাই বলেছিল সুহাস। এত কথাই বলতে পারে সে। অবিশ্যি আর কারুকে নয়, শুধু মাকেই। মায়ের ওপর দাপটের অবধি নেই। জন্মাবধি যত দুঃখ-কষ্ট অভাব-অসুবিধে পেয়েছে, চিরদিন তার ঝাল ঝেড়েছে মায়ের ওপর।

তবু তো সম্পূর্ণ ইতিহাস জানে না। সত্যি ইতিহাস জানে না। জানে—গর্ভে নিয়ে বিধবা বলে সে সন্তানকে 'অপয়া' বলে দূর দূর করেছিল বাড়ির লোক, তাই শঙ্করী দুঃখে অভিমানে মেয়ে নিয়ে পথে বেরিয়েছিল।

সেইটাই অভিযোগ সুহাসের।

মার অবিম্ব্যকারিতাতেই যে তাদের এই হাঁড়ির হাল সে বিষয়ে সন্দেহ নাশি।

যাক, সে যাহোক হয়ে গেছে।

এখন আবার এ কী!

মায়ে ঝিয়ে তর্ক বাধে।

শঙ্করী যাচ্ছেতাই করে মেয়েকে।

এবং সুহাস সতেজে বলে, "ঠিক আছে। আমি যখন এতই পাথর তোমার গলার, সে পাথর সরিয়ে দিয়ে যাব।"

॥ ছত্রিশ ॥

কথায় আছে মাটি বোবা।

কিন্তু কলকাতার মাটি বোধ করি কথা কয়। শোষণ করি তার মূল বনেদে অনন্তকালের সহস্রস্তরের ঐতিহ্য নেই বলেই প্রকৃতিতে তার উঠতি বয়সের মেয়ের চপলতা আর মুখরতা। সেই মুখরতার ঝাপটায় সে মুককে বাচাল করে তুলতে পারে। তাই কলকাতার বাসিন্দারা কিছু না শিখেও পণ্ডিত, কিছু না বুঝেও বোদ্ধ।

সত্য বলে, এ নাকি শুধু কলকাতার হাওয়ারই নয়, কলের জলেরও গুণ।

তা হতেও পারে।

আদি অনন্তকাল তো লোকে পৃথিবীর গহ্বর থেকেই আঁজলা ভরে নিয়ে তৃষ্ণা নিবারণ করেছে, জীবনযাত্রার প্রয়োজন মিটিয়েছে। যেখানে সে গহ্বর আছে ভাল, যেখানে নেই সেখানে কোদাল চালিয়ে গহ্বর খুঁড়েছে। তার পর তার কাছে এসেছে ঘট নিয়ে কলসী নিয়ে, ভরে নিয়ে গেছে অসময়ের জন্যে। কে কবে মাটির নীচে নল চালিয়ে জলকে হাতের মুঠোয় পৌঁছে দিয়ে তাকে হুকুমের চাকর বানিয়ে ফেলবার কল গড়তে শিখেছিল? শেখে নি।... কলকাতা শিখে ফেলেছে। জল হেন দুর্লভ বস্তু, কল মোচড় দিয়েই তাকে আদায় করছে। এ কী কম তাজ্জব!

এ জলের বিশেষ গুণ শরীরে বর্তাবে বৈকি। আর কিছু না হোক, কলের জলটা সাহসের যোগানদার।

নইলে আর নবকুমারের সাহস হয় ভবতোষ মাস্টারকে মুখের ওপর বলতে, "আমরা আপনাকে গুণ্য করলাম মাস্টার মশাই। ভবিষ্যতে আপনি আর আমাদের বাড়িতে মাথা গলাতে আসবেন না।"

বলেছে সে খবরটা নবকুমার নিজেই গিয়ে পৌঁছে দিল নিতাইকে। বলল, "রেখে ঢেকে বললাম না, বুঝলি? আচ্ছা করে শুনিয়ে দিলাম। যখন মান্যের ছিলেন তখন মান্য করেছি, এখন উনি যদি মান্যের মর্যাদা নিজে ঘুচিয়ে গালে মুখে চুনকালি লেপেন, মান্য রাখবার দায় আমার নয়। এই বুড়ো বয়সে উনি যদি ধর্ম খোয়াতে পারেন, মানুষের ছেদ্দা-ভক্তি-ভালবাসা সবই খোয়াতে হবে। ছি ছি, কি করে যে এ দুর্মতি হল মাস্টারের, ভেবে কূলকিনারা পাচ্ছি না। বিদেশবিড়ুই জায়গায় একটা অভিভাবকের মত ছিলেন সেটা ঘুচল।"

নিতাই একটু পরিতৃপ্তির হাসি হেসে বলে, "সম্পর্ক আর রাখবি না তা হলে?"

"ক্ষেপেছিস! উনি তো 'পতিত'! পতিতের সঙ্গে আবার সম্পর্ক কি?"



না, নিতাইকে “পতিত” বলে ত্যাগ করে নি নবকুমার। প্রতিদিন ওর মেসে খর্না দিয়ে যায়, আর হাতে পায়ে ধরে বলে, এবং শেষ অবধি ভবতোষ মাষ্টারের পরামর্শমত সত্যকে দিয়ে বলিয়ে সুরাহার পথে এনেছে তাকে।

অবিশ্যি সেও হয়ে গেল অনেকদিন। নবকুমারের বড় ছেলে, যার ভাল নাম নাকি সাধনকুমার, সে তখন ফোর্থ ক্লাসে পড়ত, আর এখন সে এনট্রেন্স পাসের পড়া পড়ছে। সত্য বলেছে জলপানি নেওয়া চাই। বলেছে জলপানি নিয়ে পাস করতে না পারলে সত্যর জীবনের সাধনাই মিথ্যে।

গাঁয়ের হেলেরা পাঁচ মাইল রাস্তা ভেঙে ইঙ্কলে পড়ে পড়ে যেটুকু করছে, সত্যর সাধনকুমারও যদি এতখানি সুযোগ সুবিধে পেয়েও সেইটুকু করে, কি হল এই যুদ্ধ আর বলক্ষয়ে ?

অবিশ্যি শুধু জলপানি পাওয়াটাই শেষ কথা নয়। মানুষের মত মানুষ হতে হবে সত্যর ছেলেদের। কিন্তু লেখাপড়ায় মুখোজ্জ্বলটা তো তার প্রথম সোপান।

তা ছেলেটা মুখ রাখবে বলে মনে হয়। অন্তত ওর মাষ্টার তো তাই বলে, নগদ মাস মাস দশ-দশটা টাকা দিয়ে যে মাষ্টারকে পুষছে নবকুমার।

কিন্তু নবকুমারের মাষ্টার যে এভাবে নবকুমারের মুখ পোড়াবেন, এ কথা কে কবে ভেবেছিল ?

স্বস্তি জিনিসটা কি এতই দুর্লভ!

সেই কভদিন তো গেল নিতাইয়ের দুর্মতির গ্রানিতে। কত হাঁটাইটি করতে হয়েছে তার মেসে, কত কাকুতিমিনতি করতে হয়েছে তার কাছে, হেসে উড়িয়েছে নিতাই। জ্বালাভরা তিক্ত হাসি। বলেছে, “আমাদের মতন একটা অখন্দ্যে অবদ্যের জন্যে আবার ভাবনা! রইলাম কি উচ্ছন্ন গেলাম ত্রিভুবনের কার কি এসে গেল তাতে ? বেশ আছি। খাচ্ছিদাচ্ছি রঙিন নেশা নিয়ে পড়ে আছি। তোমরা বাবা গুড় বয়, দামী মাল, জগতে তোমাদের দরকার আছে, তোমরা ভাল হও গে।”

কিন্তু এই এক জায়গায় নবকুমার হালছাড়া হয় নি, দৃঢ় থেকেছে। নিতাইকে সুপথে আনতেই হবে।

শেষ পর্যন্ত ভবতোষ মাষ্টারের নির্দেশমত সত্যর কাছেই নিতাইকে টেনে এনে হাজির করেছিল নবকুমার। বলেছিল, “নাও এবার মোকাবিলা কর দাঃস্বরের সঙ্গে। বোঝাও সংসারে ওর দাম আছে কি নেই ?”

সত্যর তখন শঙ্করীর ব্যাপারে মনপ্রাণ ভাঙ সয়, তাই থমথমে মুখে বলেছিল, “দাম আছে কি নেই সে কথা আমি বোঝাব ?”

নবকুমার মাথা চুলকে বলে, “ও জেঃ তাই বলছে। মানে, বলছে, ও উচ্ছন্ন গেলে কারুর কিছু এসে যাবে না।”

হঠাৎ স্পষ্ট করে চোখ তুলে তাকিয়েছিল সত্য নিতাইয়ের দিকে, বলেছিল, “কারুর কিছু এসে যাবে না, সেটা জেনে ফেলেছ ? সবজান্তা তুমি ?”

নিতাই সেই দৃষ্টির সামনে মাথা নীচু করেছিল।

সত্য তীব্রস্বরে বলে উঠেছিল, “আমি বলছি, আমার এসে যাবে। মানবে সে কথা ?”

নবকুমার এই তীব্রতার মানে খুঁজে পায় নি, ঘাবড়ে গিয়েছিল। ওর ধারণা ছিল সত্য কাকুতি-মিনতি করবে, দিব্যিদিলেশা দেবে। কিন্তু কই! তেমন তো দেখা গেল না!

ধমকই কি দিল ?

মনে হচ্ছে না তা, অথচ কথাটা যে জোরালো তাতে সন্দেহ নেই। আবার তেমনি জোরালো সুরেই বলে সত্য, “আমি বলছি তোমায় ভালো হতে হবে, সভ্য-ভব্য ভদ্রলোক হতে হবে। মানুষ যে বনের জন্তু-জানোয়ার নয় সেটা মনে রাখতে হবে। আপিসে ছুটি নাও দশ দিন, দেশে যাও, বৌ নিয়ে এস। আমি এখানে বাসার ব্যবস্থা করে রাখছি।”

বৌ!

বাসা!

নিতাই আন্তে আন্তে মাথা নাড়ে।

“সে অসম্ভব।”

“অসম্ভব! কেন, অসম্ভবটা কিসে ?”

“বাড়িতে রাজী হবে না।”

“কে রাজী হবে না ? তোমার বৌ ?”

সত্যর স্বর তীব্র।

“না, মানে একরকম তাই।” নিতাই মলিন স্বরে বলে, “মামা-মামী রাজী হবে না, কাজে কাজেই সেও—”

“কাজে কাজেই সেও ? এ তো দেখি আচ্ছা স্বার্থপর মেয়ে!”

স্বার্থপর!

নিতাই আকাশ থেকে পড়ে।

যেখানে পরার্থপরতার চরম পরাকাষ্ঠা, সেখানে কিনা স্বার্থপরতার অপবাদ!

“আপনার কথাটা ঠিক বুঝতে পারলাম না বৌঠান।”

সঙ্গে সঙ্গে নবকুমারও বলে, “তাই তো! এ কথাটা তোমার আবোল-তাবোল হল বড় বৌ।”

“বুদ্ধি খরচ করলে বুঝতে আবোল-তাবোল নয়। বলি ওপরওয়ালাদের গোড়ে গোড় যে দেবে বৌ, সে কি ছেদ্দায়, না ভালবাসায় ? বোঝাও তুমি আমায়। স্বামীর থেকে বেশী ভালবাসে তাদের ? স্বামীর কাছে থেকে স্বামী রেঁধেবেড়ে খাইয়ে যত্ন করে যে পরিতৃপ্তি পাবে, তার থেকে বেশী পরিতৃপ্তি পাচ্ছে তেনাদের যত্ন করে ? হুক কথা বল ?”

প্রশ্নটা নিতাইকেই, তবে উত্তর দেয় নবকুমার।

বলে, “আহা এটা আবার কথা নাকি ? বাসায় আসতে চাইলে লোকনিন্দে নেই ? পাঁচজনে মন্দ বলবে না ? তোমার মতন—”

“হ্যাঁ, আমার মতন ডাকাত আর কে আছে! সে যাক, অনেক দিনের পুরনো কথা ওটা। বলি পাঁচজনে আমায় একটু মন্দ বলবে এই ভয়ে স্বামী হেন বন্ধুকে ভাসিয়ে দেব, হোটেলের ভাতে ছেড়ে দিয়ে শরীর স্বাস্থ্য খোচাব তার, উচ্ছন্নতার পথে যেতে দেব তাকে, এটা স্বার্থপরতা নয় ? পাঁচজনের মন্দ বললে কি আমার গায়ে ফোসকা পড়বে ? কাজটা যে মন্দ নয়, সেটা আমার অন্তরাঙ্গা বুঝবে না? সে তো আবার বাঁজা মানুষ। কি নিয়ে আছে শুনি ? উদয়াস্ত জগতের যাবতীয় গঁচা কাজ নিয়ে পড়ে আছে, তার বিনিময়ে লোকে সুখ্যাতি করছে, এই কি একটা মনিষ্যির জীবন ? আমি তোমায় বলছি ঠাকুরপো, যদি নিজের হিত চাও, বৌকে নিজের কাছে এনে রাখ। বাসা আমি দেখছি।”

হঠাৎ আরও একদিনের মত নিতাই একটা কাজ করে বসে। হেঁট হয়ে সত্যর দুই পায়ে হাত দিয়ে সে মাথায় হাত ঠেকিয়ে বলে, “নিজের দ্বিত্ব অহিত আমি বুঝি না বৌঠান, বুঝি শুধু আপনাকে। আপনি যদি হুকুম করেন, তা হলেই—”

“হ্যাঁ, হুকুমই করছি আমি।” সত্যর দুট স্বরে বলে, “হুকুম করছি মানুষের মত ঘর-সংসার কর, অলীক স্বপ্ন নিয়ে মাথা ঘামিও না।”

নিতাই চলে যায়।

সত্য চলে যায় নিজের কাজে। নবকুমার বোকার মত দাঁড়িয়ে থাকে ফ্যালফেলিয়ে। প্রকৃত ঘটনা যে কি ঘটল, তা যেন অনুধাবন করতে পারছে না। অথচ ওর চোখের ওপরই এমন একটা কিছু ঘটল, যেটা ঠিক সচরাচরের নয় এ বোধ আসছে। সত্য আর নিতাই যেন উর্দু ফার্সি অন্য আর এক ভাষায় কথা বলল।

অথচ সত্যকে এখন জিজ্ঞেস করে ব্যস্ত করাও চলে না। শঙ্করীর কীর্তিতে সত্য নিতান্তই মনমরা এখন।

সত্যি, শঙ্করী যে সত্যর সঙ্গে এত বড় শত্রুতা সাধবে, এ কি সত্য স্বপ্নেও ভেবেছিল ? এ যেন পূর্বজন্মের শত্রুতার স্বপ্নশোধ করে গেল শঙ্করী!

নইলে চিরদিনই হারিয়ে যাওয়া মানুষটা, একদিনের ভরে মনের কোণেও যাকে আনে নি, সে হঠাৎ এমন আচমকা দেখাই বা দেবে কেন, চেনাই বা করবে কেন ?

কত সুখে কাটাছিল সত্য, হঠাৎ যেন শঙ্করী তার সেই সুখের প্রাণে একটা ছুরির আঁচড় টেনে ক্ষত করে দিয়ে গেল।

সেই যে গল্প আছে কবর থেকে প্রেতাঙ্গা উঠে এসে মানুষকে যন্ত্রণা দেয়, সেই প্রেতাঙ্গার মতই করল শঙ্করী।

কী করেছিল সত্য তার কাছে যে এইভাবে দাগা দিয়ে গেল সত্যকে ?

বাবাকে চিঠি লিখেছিল সত্য, শঙ্করীকে পাওয়ার খবর জানিয়ে, বাবা কি বলেন না বলেন জানতে। সে চিঠির জবাব আসার আগেই নতুন খবর ঘটল শঙ্করী।

দু দিনও তর সইল না তার ?

এ যেন সত্যিই সত্যকে ধরল আর ধারালো অন্তরখানা শানিয়ে ভুলে বসিয়ে দিল সত্যর বুকেন মাঝখানে!

এই দীর্ঘকাল ধরে শত লাঞ্ছনা আর শত ধিক্কারের ভাত খেয়ে খেয়ে যে প্রাণটাকে পুষে রেখেছিল শঙ্করী, একটা দিন সত্যর কাছে ভালবাসার ভাত খেয়ে হেলায় বিসর্জন দিলে সেই প্রাণটাকে ?

এর চাইতে ভয়ঙ্কর নিষ্ঠুরতা আর কি আছে ?

খবরটা শুনেই সত্য মাথায় হাত দিয়ে বসে পড়ে সেই কথাই বলেছিল, “জানি, জানতাম। চিরকালে পাষণ! মেয়েমানুষ এত বড় নিষ্ঠুর, উঃ!”

তারপর ডাক ছেড়ে বলে উঠেছিল, “ওগো বৌ, কৃষ্ণে আমার সঙ্গে দেখা হয়েছিল তোমার, কৃষ্ণে আমি বলেছিলাম তোমার মেয়েটার ভার নেব! কেন মরতে বললাম গো! না বললে তো তুমি এমনভাবে দায়মুক্ত হতে পারতে না!”

তা কথাটা তো ভুল নয়, সুহাসের দায়েই তো এ যাবৎকাল অত বড় গ্লানির জীবন বয়ে বেড়াচ্ছিল শঙ্করী!

সে দায় থেকে মুক্ত হল বলেই তো—

নাকি শুধু সাময়িক উত্তেজনার ফল ? মেয়ে যখন মায়ের সঙ্গে কৌদল করে বলে বসেছিল, “আমি যখন এতই গলার পাথর তোমার, সে পাথর সরিয়ে দিয়ে যাব—”, তখন কি শঙ্করীর মুখে একটা ক্রুদ্ধ আক্রোশের তীব্র হাসি ফুটে উঠেছিল ? ভেবেছিল কি, “বটে! চিরকাল আমিই শুধু জন্ম হব তোমার কাছে ? পাপের প্রাচীর আর হচ্ছে না আমার ? জন্মাবধি জন্ম করে রেখেছ তুমি আমাকে, আবার মরে জন্ম করতে চাও ? আচ্ছা দেখ এবার কে কাকে জন্ম করে!”

কে জানে কোন কথাটা সত্যি!

ঠাণ্ডা মাথায় ভেবেচিন্তে দীর্ঘকালের পরিকল্পনাকে রূপ দিয়েছিল শঙ্করী, নাকি ক্ষণিক মুহূর্তের অসতর্কতায় কূলে এসে ওঠা নৌকোখানাকে ডুবিয়ে বসেছিল ?

না, প্রকৃত কথা কেউ জানে না।

আত্মহত্যা করবার আগে যে একটু লিখে রেখে যেতে হয়, “আমার মরার জন্যে কেউ দায়ী নয়—” সেটুকুও জানত না শঙ্করী। অথবা সে রেওয়াজ তখনও চালু হয়নি।

লিখতে ওরা শেখে নি বলেই হয়তো চালু হয় নি।

চালু হয় নি, তাই রাত পোয়াতেই দস্তদের বাড়ির অন্দরে হৈ-হৈ উঠল। রাতে রান্নাঘরের পাশের ঘরে আড়ায় দড়ি বেঁধে জুলে মরেছে পানপাঁজুনি বামুনদিদি।

ওমা কেন গো!

কী দুঃখে!

এই যে কাল আহাদের সাগরে ভাসছিল, দেশের লোকের সন্ধান খবর পেয়ে, তাঁদের কাছে আদরের ভাত খেয়ে। চাকরি ছেড়ে দিয়ে চলে যাবই তো বলেছিল, বলেছিল, “দেশের লোক, চিরকালের চেনা-জানা, ছাড়ছে না, মেয়েটার সুন্দর ভার নেবে বলেছে, এ সুযোগ ছাড়তে পারব না মা। অনেক দিন তো দাস্যবিস্তি করলাম।”

কালীতলায় নাকি পরিচয় হয়েছিল।

কিন্তু মানুষটা আর কেউ না, দস্তদের সাত নম্বর বাড়ির সেই অহঙ্কারী ভাড়াটে।

তার কাছেই আশ্রয়ের আশ্বাস পেয়েছিল সে।

চলেই যেত।

তবে দিনক্ষণের ছুতো দেখিয়ে বলেছিল, “চৈৎ পোষ ভাদ্রর এ তিনটে মাসে পোষা বিড়ালটাকেও বিদেয় দিতে নেই মা, দিলে গেরস্থর অকল্যাণ। এতদিন নেমক খেলায়, অকল্যাণ করব না তোমার। এ মাসটা আর যাব না।”

হঠাৎ সংবুদ্ধি কি করে বিনষ্ট হল শঙ্করীর ? কি করে বিস্মৃত হল সে নিমকের ঝণ!

তাই অদিনে অক্ষণে গেরস্থর অকল্যাণ ঘটিয়ে চিরদিনের মত বিদেয় হয়ে গেল ?

হৈ-হৈ হল।

তবে নাকি বড়মানুষের অন্দর, আর দীনদুঃখী চাকরানী বিধবার প্রাণ। তাই সে হৈ হৈ ফুটল আর মরল। থানা পুলিশ তো দূরের কথা, বৈঠকস্থানার কর্তারাও সবাই টের পেলেন কি না পেলেন। অন্তত টের পেয়েছেন এ লক্ষণ প্রকাশ পেল না তাঁদের আচরণে।

গড়গড়ায় একটানা শব্দটার একবার হয়তো একটু ছন্দপতন হল, গলা থেকে একবার হয়তো একটু হস্কার উঠল, তার বেশী নয়।

দণ্ডদের খিড়কির দরজা দিয়ে বার হয়ে গেল শঙ্করীর মৃতদেহ। নিজের দরজায় কাঠ হয়ে দাঁড়িয়ে দাঁড়িয়ে দেখল সত্য। যখন চলে গেল, চোখছাড়া হয়ে গেল, হাত দুটো একবার তুলে নমস্কার করে মনে মনে বলল, “এত পতনেও ভেতরে ভেতরে তুমি খাড়া তেজী ছিলে বৌ, বুঝতে পারছি। তাই ছোট ননদের করুণার আশ্রয়ে থাকতে আর রইলে না। সবাই শুধোচ্ছে— “কারণ, কারণ! হাড়ে হাড়ে বুঝেছি, আমিই কারণ। কি করব, আমার নিয়তি! ভগবান যাকে যার নিমিত্ত করেন!”

ঠিক এই সময়ে ও-বাড়ি থেকে একজন দাসী ডাকতে এল সত্যকে, “বড় গিল্লীমা ডাকতেছে।” সত্য দ্বিরুক্তি করল না।

হয়তো এই ডাকটির প্রতীক্ষাই করছিল।

অবশ্য ডেকে ওকে সন্দেহ খাওয়াবেন দত্তগিল্লী, এমন আশা করবারও হেতু ছিল না। তবে এটাও ভাবে নি সত্য। ভাবে নি ন ভুতো ন ভবিষ্যতি করে গাল পাড়বেন তিনি তাঁর সাত নম্বরের প্রজ্ঞার বৌকে। একবার যেন পুলিশেরও ভয় দেখালেন, কারণ দশেধর্মে সাক্ষী দেবে, সত্যের পরামর্শতেই হঠাৎ সাদাসিধে ভালমানুষটা কেমন বিগড়ে গেছিল।

“তুমিই ওর মৃত্যুর কারণ। নইলে বেশ তো ছিল এযাবৎ!” বললো দত্তগিল্লী।

সত্য মাথা নীচু করে সব অভিযোগ মেনে নিয়ে শুধু বলল, “যা হবার তা তো হয়েই গেল, মেয়েটাকে আমায় দিন।”

“তোমায় দেব ? মেয়েটাকে ?”

অমন একটা রূপবতী উঠতি বয়সের মেয়েকে অমন এক কথায় বিলিয়ে দেবেন, এত বোকা নন দত্তগিল্লী! ও জিনিস হল হাতের একটা হাতিয়ার। ওকে দিয়ে সময়ে অসময়ে কত কাজ হাসিল হতে পারে, কত কাজে লাগতে পারে। তাই ভুরু কুঁচকে মগ্ন তিনি, “তোমায় দেব মানে ? তুমি কি ওর অছি ? আমার সংসারেই থাকবে ও। যেমন ওর মা ছিল।”

সত্য মুখ তুলে প্রশ্ন করে, “পানসাজুনি চাকরানী হয়ে ?”

দত্তগিল্লী কালিমুখে কঠিন গলায় বলেন, “তা চাকরানীর মেয়ে চাকরানী হবে না তো কি রাজরানী হবে ? তবে কিনা আমাদের ঘরের পুরুষ বেটাছেলেদের দয়ার শরীর, নজরে পড়তে পারলে তাও হওয়া আশ্চর্য নয়।”

এই বিষাক্ত ছলটা যে দত্তগিল্লী জেনে বুঝে ইচ্ছে করে ফোটালেন, তাতে আর সন্দেহ কি! আসল কথা শঙ্করীর মরণটার জন্য আগাগোড়া সত্যকে দায়ী করে বসে আছেন তিনি, কি না জানি মন্তর কানে দিলে, আর জলজ্যান্ত ভাল ঝিটা তাঁর কর্পূরের মত উপে গেল! এর ওপর আবার তার মেয়েটাকে দাবি করতে আসছে!

ওরে আমার কে রে!

তোমার অহঙ্কার ভাঙবার দিন এবার এসেছে আমার। বুঝেছি তোমার ভেতরের শাঁস। ওই সুহাসের মা তোমার ‘দেশের লোক’! কোন্ না আত্মীয়ই! তুমিও তবে সেই পদেরই লোক। মুখে অহঙ্কার দেখিয়ে আমার সঙ্গে টেকা ?

সত্যবতী দত্তগিল্লীর মনের কথাটা বোধ করি মুখের ভাষা থেকেই আবিষ্কার করে ফেলে। তাই বিচলিত হব না প্রতিজ্ঞা করেই বলে, “তা হলে তো সুবিধেই। আপনাদের ঘরের পুরুষদের যখন এত দয়ার শরীর, তখন আর ওর কী গতি হবে ভেবে কাতর হই কেন ? সদগতিই হবে মনে হচ্ছে!”

দত্তগিল্লী ভুরু কুঁচকে বলেন, “কী বললে ?”

“ওই তো বললাম!”

“সদগতির কথা কি বললে ?”

“ওই তো বললাম, যদি বুঝতে না পেরে থাকেন, তবে বোঝাতে পারব না, পরে বুঝবেন। আচ্ছা তা হলে যেতে অনুমতি দিন।”

দত্তগিল্লী আবার নিজমূর্তি ধলেন। বললেন, “তোমায় আমি পুলিশে দিতে পারি জান ? বলতে পারি, আমার লোক তোমার প্ররোচনায় মরেছে ?”

সত্য মুদু হেসে বলে, “তবে সেই চেষ্টাই করুন। কিন্তু আপাতত আপনাদের কোন দাসী কি ছোট ছেলেকে আমার সঙ্গে দিন, দেখিয়ে দেবে কোথায় আপনাদের বৈঠকখানা!”

“বৈঠকখানা দেখিয়ে দেবে ? বৈঠকখানায় যাবে তুমি ? তোমার মতলবখানা কি তাই বল তো ?”

“দয়ার মানুষদের কাছে একটু ভিক্ষে চাইব। বামুনের মেয়ের তাতে দোষ নেই।”

“এ তো আচ্ছা জাঁহাবাজ মাগী!” দত্তগিনী তেড়ে খাট থেকে উঠে দুম দুম করে মাটিতে নেমে আসেন, বলেন, “তোমার রীতি-নীতি তো ভাল দেখছি না! বৈঠকখানা বাড়িতে গিয়ে পুরুষদের কাছে কী ছলা-কলা করতে যাবে শুনি ? বলি একটু লাজ লাগবে না ?”

সত্যর মাথার কাপড়টা খসে পড়েছিল, সত্যর মুখটা লাল হয়ে উঠেছিল, দুটোকেই সংবরণ করে সত্য শান্ত সুরে বলে, “লজ্জার কি আছে ? শুদ্ধুর মায়েই ব্রাহ্মণকন্যার সন্তানতুল্য। সন্তানের কাছে মায়ের ‘লজ্জা’র কথাটা উঠবে কেন ?”

তারপর কিসে কি হল দত্তগিনীর অজ্ঞাত!

তবে সুহাসিনীকে সত্যর সংসারেই ভর্তি করে দিতে হল তাঁকে।

মেজকর্তা অর্থাৎ মেজ দ্যাওর চটি ফটফটাতে ফটফটাতে অন্দরে ঢুকে এসে আদেশ দিলেন, “ওই বামনী-মাগীর মেয়েটাকে সাত নম্বর বাড়িতে চালান করে দাও গে বড়বৌ, মেয়েটা নাকি ওদের দেশের লোক।”

বৌ-মরা দ্যাওর, বলতে গেলে বড়গিনীর হাতের মুঠোর সম্পত্তি, তাই ঝড়ঙ্গী করে প্রশ্ন করেন তিনি, “কে কার দেশের লোক, সে খবর তোমার কানে আসে কোথা থেকে ?”

“আসে কোথা থেকে! শোন কথা! কানে গিয়ে ঢেলে দিয়ে এলে আসবে না ? ওই বাঁড়ুয়োর পরিবার তো নিজে গিয়ে বলল—”

“বলল! তোমার সঙ্গে কথা কয়ে বলল!”

“আহা পষ্টাপষ্ট কথা কয়ে কি আর বলল ? একটা চাকরানীকে দিয়ে বলল—”

“আর তুমি অমনি সোন্দর মুখ দেখে গলে গলে! ধন্য বটে! এসব অন্দরমহলের কথায় তোমার থাকবার দরকার নেই মেজবাবু। পুরুষ-মজানি মেয়েমানুষকে কি করে শায়েস্তা করতে হয় আমার জানা আছে।”

মেজবাবু বিচলিত হলেন।

“আঃ, কী যা-তা বলছ ? ভদ্রঘরের মেয়েছলে, বলতে গেলে আমার মেয়ের বয়সী, এসব কী কথা! ছি ছি!”

বড়গিনী চাপা ক্রুদ্ধ কণ্ঠে বলেন, “ইল্লি-মারি গুরু গোসাই! কত ছলাই জানো! মেয়ের বয়সী মেয়েমানুষ আর কখনো দেখি নি আমি! যাও যাও, যেখানের মানুষ সেখানে যাও। সুহাসকে আমি কোথাও পাঠাব না, ব্যস।”

মেজকর্তা নিরুপায় ভঙ্গীতে বলেন, “কিন্তু আমি যে কথা দিয়েছি। আমার কথাটার একটা দাম আছে তো ?”

“ওঃ! আর আমার কথার দাম নেই, কেমন ?”

“কী মুশকিল! সে কথা কে বলছে—”, মেজকর্তা কূট-কৌশল ধরেন, “আমি বলছি ও তোমার যখন বিনি চেটায় আপদ বিদেয় হচ্ছে হতে দাও! জানই তো গলায়-দড়ি-মড়ার সদগতি হয় না ? আর পৃথিবীতে যার প্রতি বেশী টান ছিল, তার ধারে কাছে ঘুরে ঘুরে আসে। ওই মেয়েটা তো ওর একটাই সন্তান, অবিশ্যি টান ছিল খুব।”

বড়গিনী শিউরে রামনাম করে উঠলেন।

খুব!

খুব বললে আর কতটুকু বলা হয় ? সন্তানে এত আকর্ষণ দত্তগিনী অন্তত দেখেন নি কখনো।

যাক আর কাঠ-খড় পোড়াতে হল না, ওই এক মশালেই কার্যসিদ্ধি হয়ে গেল মেজবাবুর।

সুহাসিনী শত অনিচ্ছে নিয়ে সত্যর সংসারে এসে উঠল।

অনিচ্ছে সকলেরই।

নবকুমারের তো ষোল আনাই অনিচ্ছে, সত্যরও আগের সেই বেশ একটি মধুর কর্তব্যের আনন্দ রইল না আর। নেহাতই নীরস কর্তব্যের দায়ে ঘরে আনল তাকে। বাক্যদত্ত হয়েছিল শঙ্করীর কাছে তাই।

তা এসব তো সেই বছর চারেক আগের কথা।

এখন তো বেথুন কুলে তিন ক্লাস পড়া হয়ে গেল সুহাসিনীর।

কুলে সুবিধের জন্যেই হোক আর দত্তবাড়ির আওতা-মুক্ত হতেই হোক, মুক্তারাম বাবু স্ট্রীটের সেই বাড়ি ছেড়ে বাগবাজারে উঠে এসেছিল সত্য। এ বাড়িতে ভাড়া বেশী, অসুবিধের ঢের, তবে পরম লাভ গঙ্গা খুব নিকটে। নিত্য গঙ্গানানের পুণ্য অর্জন হয়।

আর ?

আরও একটা আকর্ষণ আছে, যে খবর নবকুমারের অজ্ঞাত। নবকুমারের অজানিতেই দুপুরবেলা একটা জায়গায় আনাগোনা শুরু করেছে সত্য।

যাক, সে তো নবকুমারের অজানিতেই, তার জন্যে নবকুমারের সুখ-দুঃখ নেই, মোটামুটি সুখেই তো থাকবার কথা তার। কারণ বাড়ির ভাড়া যেমন বেড়েছে, তেমনি অফিসের মাইনেও তার বেড়েছে অনেক। ছেলে দুটি প্রত্যেক বছর ফার্স্ট সেকেণ্ড হয়ে ক্লাসে উঠেছে, একজন পাস দিয়েছে। সত্যর অটুট স্বাস্থ্য আর অপরিসীম কর্মক্ষমতা সংসারটিকে একখানি নিটোল মুক্তোর মত করে রেখেছে।

দেশের বাড়িতে মা-বাপও আছেন ভাল।

নিতাইটারও মতিগতি ফিরেছে বলা চলে। আর কি চাইবার আছে ?

ছিল না।

চাইবার আর কিছু ছিল না, কিন্তু হঠাৎ ভয়ানক লোকসান ঘটে গেল।

হ্যাঁ, হঠাৎই। আর যা হয়েছে তার চারা নেই।

বিনা মেয়ে বজ্রাঘাত ঘটেছে নবকুমারের, ষোলো সুখে বিষাদ!

ভবতোষ মাস্টার ব্রাহ্মধর্ম গ্রহণ করেছেন!

'পতিত' হয়েছেন!

॥ সাঁইত্রিশ ॥

দেশের বাড়িতে আর এক চেহারা ছিল ভাবিনীর। সারাদিন গাধার মত ষাটুনি, সারারাত মোষের মত ঘুম। সন্ধ্যা চড়ে মুখে 'রা' নেই। মামাশুশুরবাড়ির তামস্ত প্রাণীকে যমের মত ভয়।

কলকাতার বাসায় আসার আগে, একখানি বয়েস পর্যন্ত নিতাইয়ের সঙ্গে কটা কথা বলেছে তার বৌ, বোধ করি হাতে গুনে বলতে পারে নিতাই। শুধু সেই অনেকদিন আগে যখন একবার বাসায় আসার কথা উঠেছিল, তখনই যা বৌয়ের একটু স্পষ্ট গলা শুনে পেয়েছিল নিতাই।

বৌ বলেছিল, "গলায় দড়ি আমার! লোকলজ্জা ভাসিয়ে গালে মুখে চুনকালি মেখে বাসায় যাব তোমার সঙ্গে ?"

আশেপাশে কোনোখান থেকে যে 'আড়িপাতা'র লীলা চলেছে, এ জ্ঞান টনটনে থাকার দরুনই বোধ হয় বৌয়ের এই উচ্চ কণ্ঠ।

শুনে নিতাইয়ের চুন মুখ আরো চুন হয়ে গিয়েছিল।

পরদিন মামী বলেছিল, "কি রে নিতাই, পরিবারকে বাসায় নিয়ে যাবি নাকি, তোর ওই পেরাণের বন্ধুটার মতন ?"

নিতাই উড়িয়ে দিয়ে বলেছিল, "কী যে বল! ফেপেছ ?"

মামী বলেছিল, "দ্যাখো বাপু, ভবিষ্যতে আমায় দুশো না। বৌমাকে আমি বলেছিলাম, মনের বাসনা চেপে এখানে পড়ে থাকার দরকার নেই, যাবে তো যাও। তা আবাগীর বেটি বলে কি, 'তোমাদের পা আঁকড়ে পড়ে থাকব, দেখি আমায় কে নিয়ে যেতে পারে তোমাদের আচ্ছয় থেকে।'"

মামীর কণ্ঠে পরিতৃপ্তির সুর ঝরে পড়েছিল।

আর নিতাই তার ধর্মপত্নীর ধর্মজ্ঞানের পরিচয়ে পরিতৃপ্ত হয়েই কলকাতায় এসে নবকুমারের সংসারে ভর্তি হয়েছিল।

কিন্তু সে তো সেই গোড়ার দিকের কথা।

তারপর তো কত জল গড়াল, কত জল ঘোলাল। নিতাইয়ের দশ দশা ঘটল। এবং অবশেষে বন্ধুপত্নীর নির্দেশে অথবা আদেশে আবার সেই পুরনো প্রস্তাব নিয়ে দেশে গেল!

ভেবেছিল বেশ একটু লড়তে হবে।



কিন্তু আশ্চর্যের বিষয়, এবারে বিনাযুদ্ধেই রাজ্য দখল হয়ে গেল। ঈশ্বর জানেন কে কোথায় কি কলকান্ঠি নেড়েছিল, তবে নিতাইয়ের বলার আগেই মামী বললেন, “কতকাল আর ‘মেছে’র ভাত খাবি, বৌমাকে এবার নিয়ে যা।”

মামাও তাই বললেন।

এবং দেখা গেল বৌ বিনাবাক্যে সুড়সুড় করে নিতাইয়ের পদাঙ্ক অনুসরণ করল। তার গায়ে যে চুনকালি পড়েছে, এমন মনে হল না ভাবগতিক দেখে।

তাহলে ব্যাপারটা এই—

নিতাইয়ের চরিত্র-চ্যুতির খবর দেশ পর্যন্ত পৌঁছেছিল। কারণ নিন্দে আর মন্দ খবরের পাখা থাকে। আর সে পাখা অনেক ‘অশ্বশক্তি’ সম্বলিত।

শনে অবধি বৌ ধরাশয্যা নিয়েছিল, আর অভিজাবকরা চিন্তান্বিত হয়ে স্থির করেছিলেন, ঘাঁটি আগলাতে সেনাপতি পাঠানো প্রয়োজন। আর ইতিমধ্যে তো গ্রামের বেশ কয়েকটা বৌ-ই গ্রাম ছেড়েছে। মামীর নিজের বাপের বাড়ির গ্রাম থেকেই চার-চারটে বৌ জামালপুরে চলে গেছে। এখানের একটা গেছে কাঁচড়াপাড়ায়, একটা সাহেবগঞ্জে। “রেলের চাকরি” হয়েই ছোঁড়াগুলো সাপের পাঁচ পা দেখছে, লজ্জাসরমের মাথা খেয়ে বৌ নিয়ে বাসায় যাচ্ছে।

অতএব নিতাইয়ের বৌ যদি কলকাতায় যায়ই, জাতিপাত হবে না। তা ছাড়া নেহাৎ অগঙ্গার দেশও নয় যখন। বরং কালীঘাটের কালীমাতা বিদ্যমান।

জমি আপনিই প্রকৃত হয়ে ছিল।

তবে নিতাই এত জানত না। নিতাই এক কথায় মত পেয়ে অবাক হয়েছিল।

কিন্তু সে আর কতটুকু ?

এখন নিতাইকে মুহূর্তে মুহূর্তে অবাক করছে ভাবিনী!

সে যেন আর এক মূর্তি পরিগ্রহ করেছে।

নিতাই কি স্বপ্নেও ভেবেছিল ভাবিনীর এত ‘মুখ’ আছে ?

কিন্তু ভাবিনীকেও দোষ দেওয়া যায় না।

প্রথম কথা, সে এসেছে ঘাঁটি রক্ষা করতে, করকে শায়স্তা করার ব্রত নিয়ে। দ্বিতীয় কথা, এই এতদিনের বিবাহিত জীবনে ‘মুখ’কে অবিরত চুপ করিয়েই রেখে এসেছে ভাবিনী, তা সে ভয়েই হোক আর সুখ্যাতি কিনতেই হোক। সেই-স্বাখার একটা প্রতিক্রিয়া তো দেখা দেবেই।

তৃতীয় কথা হচ্ছে, এখন আর সে মুখকে চুপ করিয়ে রাখার কোনও প্রয়োজন নেই। অতএব এই দীর্ঘকালের রুদ্ধ জল বাঁধ ভেঙে প্রবল কল্লোলে নিজেকে বিস্তার করতে শুরু করেছে।

উঠতে বসতে নিতাই বাক্যবাহুে জরজর!

অথচ উল্টে চড়ে ওঠবার মুখ তার নেই, কোথায় যেন হার হয়েছে তার। বোঝা যায় না হারটা কোথায়, অথচ কী এক লজ্জা মাথা তুলতে দেয় না।

আবার সব থেকে মর্মান্তিক এই, যেখানে নিতাইয়ের পূজার বেদী হৃদয়ের নৈবেদ্য, ঠিক সেখানেই যেন ভাবিনীর যত আক্রোশ। সত্যবতীর নামে জ্বলে ওঠে সে। অথচ কেন এই অগ্নিদাহ, হৃদয়ঙ্গম হয় না নিতাইয়ের। মানুষ জাতটা কি এতই অকৃতজ্ঞ!

নিতাই ভাবে, কার দয়ায় ‘বাসা’য় আসতে পেলি তুই ? কে তোর জন্যে সংসার গুছিয়ে রেখেছিল ? কে তোর স্বামীকে বিপথ থেকে সুপথে আনল ? এত স্বাধীনতা এত বাবুয়ানা থাকতো কোথায় তোর যদি সত্যবতী না সুপারিশ করত ? ধান সেদ্ধ করতে করতে, স্কার কাচতে কাচতে আর টেকিতে ‘পাড়’ দিতে দিতেই তো জীবন কাটছিল, আর তাই কাটত!

তা তার জন্যে কৃতজ্ঞতার বালাই মান্তর নেই! জানে না নাকি! নিতাই তো কলকাতার বাসায় পা দিয়েই বলেছিল, “এই যে গিল্পেপনার স্বাধীনতাটি পেলে, এর কারণ স্বরূপ হচ্ছে সেই মানুষটি! বৌঠান না হুকুম করলে কোন্ শালা এত ঝামেলা পোহাতে যেত।”

ভাবিনীর যে ‘মুখ’ বলে একটা বস্তু আছে, সেই দিনই যেন হঠাৎ একটু আভাস পেয়েছিল নিতাই। ঝপ করে বলে উঠেছিল ভাবিনী, “সত্য শহরে বাসা করলে বুঝি কথাবাতা এমন চোয়াড়ে হয়!”

তা ইদানীং কথাবার্তা একটু অসভ্য হয়ে গিয়েছিল নিতাইয়ের। যে সঙ্গের যে ফল! যে ‘বন্ধু’ তাকে উচ্চনের পথ চেনাচ্ছিল, সে নিজে যে দরের, তার গতিবিধিও তেমনি দরের ঘরে। কাজেই কথাবার্তা চালচলনে একটু প্রভাব পড়বেই, না পড়ে যাবে কোথায় ?

নিতাই 'শালা' শব্দটা উচ্চারণ করেই ঈষৎ লজ্জিত হয়েছিল, ভাবিনীর মস্তব্যে আরো দমে গিয়ে বলল, "এ্যাই দেখো! বাসায় পা দিতে না দিতেই যে গিন্নীত্ব শুরু করলে!"

সেদিন ওইটুকুর ওপর দিয়েই গিয়েছিল।

কিন্তু "দিনে দিনে কলা চাঁদ বেড়ে যায়"। এখন ষোল কলায় বিকশিত হয়ে উঠেছে ভাবিনী।

আজ সকালেই হয়ে গেল একচোট।

রাত থেকে মাথাটা টিপটিপ করে সর্দিজ্বর মত হয়েছিল নিতাইয়ের, বলেছিল ভাতও খাব না, অফিসও যাব না। শুনে একটু প্রসন্নই হয়েছিল ভাবিনী। বাজা মানুষ, সারাটা দিন একাই কাটে, এ তবু বাড়িতে থাকবে লোকটা। চোরের রাত্রিবাস, একটা দিন একটা দিনই! ছুটির দিনগুলো তো নিতাইয়ের কাটছে আজকাল এক নতুন নেশায়। ঠিক নতুনও নয়, পুরোনো নেশা ঝালানো। দেশ-গ্রামে তো ওই ছিল একমাত্র আনন্দ। মাছধরা ধরেছে আজকাল নিতাই আর নবকুমার ফি রবিবার।

অফিসের সহকর্মীদের মধ্যে অনেকেই একটু এদিকে সেদিকে বাড়ি বাগান পুকুর আছে, তারা নেমন্তন্ন করে মাছ ধরতে। অতএব শনিবার দুপুর থেকেই ছিপ হুইল বঁড়িশি 'চার' নিয়ে ব্যস্ততা পড়ে যায় দু বাড়িতে।

সে যাক।

আজ রবিবার নয়, তাই খুশি হল ভাবিনী। আর শহরের বাসায় কম কাজ করে করে আয়েসী হয়ে যাওয়া মনে ভাবল, যাক, তাহলে আজ রাঁধবই না। ও যেমন ভাতের বদলে মুড়ি চিড়ে খেয়ে থাকবে, আমিও তাই থাকব। তবে আজ তিথিটা ভাল নয়, দশমী। এয়াৎ রক্ষ করতে একটু মাছ মুখে দেওয়া দরকার। তা রাতে সে লক্ষণটুকু পাললেই হবে। কলসীতে কৈ মাছ জিয়ানো আছে।

সেই মন নিয়েই খানিক বেলায় আধসেলাই কাঁথাখানা আর ছুঁচসুতো পেড়ে নিয়ে বসেছিল ভাবিনী। নিতাই ঘরে গিয়ে পা নাচাচ্ছিল। হঠাৎ উঠে এষে বলল, "এ কী, রান্না না চড়িয়ে কাঁথা পেড়ে বসেছ যে?"

ভাবিনী মুখ কুঁচকে বলে, "তুমিই যখন খাচ্ছ মা, তখন আর নিজের জন্যে কে আবার হাঁড়ি নাড়ে!"

নিতাই অবাক হয়ে বলে, "তার মানে? আমি খাব না বলে তুমিও হরি মটর? ছি ছি, এ আবার একটা কথা নাকি? খাবে কি?"

ভাবিনী একটা উচ্চস্বের দার্শনিক সঙ্গী করে বলে, "মেয়েমানুষের আবার ঝাওয়া! ও তোমার সঙ্গে দুটো খই-মুড়ি খেলেই হবে।"

"এ্যাই দ্যাখো! চুলোই জ্বালবে না?"

"দরকার তো দেখছি না কিছু—"

নিতাই ইতস্তত করে বলে, "তবে আর কথা কি! নইলে ভাবছিলাম—"

"কি ভাবছিলে?"

"নাঃ থাক!"

ভাবিনী কাঁথা সরিয়ে রেখে বলে, "থাকবেই বা কেন? বলই না?"

নিতাই বলে, "না, মানে বলছিলাম কি— তেমন কিছু জ্বর তো হয় নি, আলুমরিচের দম দিয়ে দুখানা গরম গরম রুটি খেলে মন্দ হত না।"

রুটি!

রুটি শুনেই ভাবিনীর মাথায় বজ্রাঘাত হয়। রুটি কথাটাই শুনেছে এ যাবৎ, হাতে করে গড়ে নি কখনো। তাদের গাঁয়ে-ঘরে ও বস্তুর চলনই নেই। ভাত খাও ভাত, না খাও মুড়ি আছে চিড়ে আছে, খই বাতাসা ফুলুরি কলাইসিন্দ আছে, যেমন যার শরীরের অবস্থা বুঝে 'সেবা' কর। রুটির কথা ওঠে না!

কলকাতায় এসে নিতাই এই চালটি শিখেছে। আর একদিন অমনি সন্ধ্যাবেলা ফিরে বলে বসেছিল, "দেহটা কেমন ম্যাজম্যাজ করছে, দুখানা রুটি গড়ে না। আটা নিয়েই এসেছি একেবারে।"

সেদিন একটু অন্তর্ভাষণ করতে হয়েছিল ভাবিনীকে। স্বামীর কাছে মিথ্যা বলার পাপের জন্য অলক্ষ্যে একবার নাকটা কানটা মলে নিয়ে বলেছিল, "ও হরি! তা কি জানি ছাই! ভাত তো চড়িয়ে ফেলেছি!"

নিতাই অবশ্য রান্নাঘর খানাতলাস করতে যায়নি, “তবে থাক তবে থাক” বলে আটার ঠোঙটা নামিয়ে রেখেছিল। সেই ঠোঙাসুদ্ধ আটা মজুত আছে নিতাইয়ের জানা, কাজেই বাসনাটা প্রকাশ করে ফেলে, অন্য চিন্তায় পড়ে না।

কিন্তু ভাবিনীর মাথায় যে দৃষ্টিভঙ্গির পাহাড় চাপল।

“রুটি গড়তে পারব না” বলাটাও যেমন কঠিন, “রুটি গড়তে জানি না” বলাটাও তেমনি কঠিন।

তবু শেষ চেষ্টা করে সে।

বলে, “দিনদুপুরে শুকনো রুটি আর কেন খাবে তবে? বরং একটু খিচুড়ি চড়িয়ে দিই, তাই গরম গরম—”

“না না, খিচুড়ি না,” নিতাই ভাবিনীর আশার মূলে কুঠারঘাত করে, “অন্ন দ্রব্যটা থাক, ওতে শরীর রসস্থ হয়। রুটিটা নেয়াও শুকনো না কর, গাওয়া ঘি একটু মাখিও। মেলা করো না, ওই খান বারো-চোদ্দ। অল্লাহারই ওষুধ!”

অগত্যাই আটার ঠোঙা নিয়ে রান্নাঘরে চুকতে হয় ভাবিনীকে ভাগ্যকে ধিক্কার দিতে দিতে। কোথায় আজ কাঁথাখানা মিটিয়ে ফেলবে আশা করছিল, আশা করছিল উনুনের দায়ে ধরা পড়বে না, সে জায়গায় কিনা একেবারে মাথায় আকাশ!

বলা বাহুল্য রুটির ব্যাপারে ভাবিনীর প্রচেষ্টা সাফল্যমণ্ডিত হল না।

কারণ প্রথমেই প্রয়োজনতিরিক্ত জল ঢেলে আটাটাকে প্রায় “শির্শী”তে পরিণত করে ফেলেছিল সে। তার পর যদিও ছিড়েখুঁড়ে বহুকোণবিশিষ্ট খানকয়েক আটার চাকলা বানাল হিমসিম খেয়ে, তাদের উনুনে ফেলে তুলতে তুলতে পুড়ে উঠল প্রায় সবগুলোই। অথচ আবার গঠন-সৌকুমার্যে জায়গায় জায়গায় কাঁচাও বর্তমান।

ওদিকে দুপুর গড়িয়ে যায়।

নিতাই অনুমান করে, নিজের জন্যেও রুটি করছে ভাবিনী। আর সে রুটির সংখ্যা অনুমান করে মনে মনে একটু হেসে ধৈর্য ধরে বসে থাকে।

কিন্তু ধৈর্যেরও তো একটা সীমা আছে। পেটের মধ্যে যে সাড়া উঠেছে।

বার বার সাড়া দিয়ে উসখুস করে অবশেষে রান্নাঘরের দরজাতেই এসে দাঁড়ায় নিতাই, “কী এত নশো-পঞ্চাশ ব্যঞ্জন রাঁধ? বললাম যে শুধু দুখানা রুটি আর আলু মরিচের দম হলেই হবে—”

ভাবিনী আজও মনে মনে নাক-কান মলে বলে, “ওমা তাই কি আবার খেতে পারে মানুষ? একটু সোনামুগের ডাল চড়াচ্ছি—”

“এ্যাই দ্যাখো! আবার ওই সব! তাই এত দেরি হচ্ছে! দরকার নেই দরকার নেই, ওই যা হয়েছে তাই দিয়ে দাও।”

দিয়ে তো দেবে, কিন্তু আলু-মরিচের দম কই?

আলু তো এখনও বুড়িতে।

অগত্যাই হাটে হাঁড়ি ভাঙতে হয় ভাবিনীকে। সবটা নয়, হাঁড়ির কানাটা। বলতে হয়, “একটু অপেক্ষা কর, দেরি আছে।”

নিতাই ছটফট করে আর বলতে থাকে, “ও না হয় পরেই হবে। শুধু গুড়-রুটিও মন্দ না।”

অতএব শুধু গুড়-রুটিই ধরে দিতে হয় ভাবিনীকে স্বামীর পাতের গোড়ায়।

আর জোর ক্ষিদের মুখে সেই গুড়ের ডেলা এবং আটার পিণ্ডি দর্শনে নিতাইয়ের সমস্ত রক্তকণিকা মুহূর্তের মধ্যে অগ্নিকণিকায় পরিণত হয়ে “মার মার” করে ওঠে।

থালটা ধরে দিয়েই ছুতো করে রান্নাঘরে চুকে পড়েছিল ভাবিনী। হঠাৎ থালা-আছড়ানোর ঝনঝন শব্দে চমকে বেরিয়ে এসে দাঁড়িয়ে পড়ল। এতটা আশঙ্কা ছিল না তার। কিন্তু দেখল থালাটা অদূরে নিক্ষিপ্ত।

সব কথানা রুটি একসঙ্গে তাল করে হাতে চটকে নিতাই চোঁচাচ্ছে, “কী হয়েছে কী এ? আমার ছেরান্দর পিণ্ডি! বলি দুখানা রুটি গড়বারও যদি ক্ষমতা না থাকে, বল নি কেন আগে? কোন্ শালা বেকুব খেতে চাইত তা হলে? আমার যেমন মুখ্যামি! বাজার থেকে দু আনার পুরী-তরকারি কিনে এনে খেলেই চুকে যেত। তা নয়, সাধ করে রুটি খেতে চাইলাম আমার কর্মিষ্ঠ পরিবারের কাছে। হুঁ! বোঝা উচিত ছিল এসব সভ্য কাজ সবাইয়ের জন্যে নয়। সেই যে বলে— ‘বাপের জন্যে নেইকো চাষ, ধানকে বলে দুর্বোঘাস!’ এ হচ্ছে তাই। তা শহরে যখন এসেছ, সভ্য কাজ একটু শিখতে হবে

বৈকি। তোমার ধান সেদ্ধ ঢেঁকি কোটার মহিমা তো চলবে না এইখানে। তাই পরামর্শ দিই—
একবার আধবার বৌঠানের কাছে গিয়ে মানুষের মতন কাজকর্ম শিখে এসো দু-একখানা—”

বড্ড বেশী খিদের মাথায় বড্ড বেশী আশাভঙ্গ হয়েই বোধ করি মেজাজের ওপর রাশ রাখতে
পারে নি নিতাই। কিন্তু সকলেরই ধৈর্যের সীমা আছে।

বিশেষ অপ্রতিভ হয়ে গিয়েছিল বলেই এতগুলো কথা নীরবে শুনেছিল ভাবিনী, মানুষটার খিদের
মাথায় উত্তর-প্রত্যুত্তর করবে নাই ভাবছিল, এবং মনে মনে আঁচ করছিল রাগটা একটু নরম হলে বরং
তুতিয়ে পাতিয়ে চারটি খই দুধ—

কিন্তু শেষরক্ষা হল না।

শেষ টানটা আর সইতে পারল না যন্ত্রের তার। ছিঁড়ে পড়ল বান্ধনিয়ে।

পড়বেই।

তোমার গায়ে আমার পায়ের আগাটা একটু ঠেকে গেছে বলে তুমি আমায় কষে লাথালে আমি
সইব ? তোমার গোয়ালে আমার তামাকের কাঠকয়লাখানা ছিটকে পড়েছে বলে আমার ঘরে তুমি
আঙুল দেবে আর আমি চুপ করে থাকব ? তোমার বাগানে আমার ছাগলটা একবার মুখ লাগিয়েছে
বলে গরুর পাল ঢুকিয়ে আমার ভাবৎ বাগান তুমি মুড়োবে, আমি ফ্যাল ফ্যাল করে তাকিয়ে থাকব ?
ইয়ার্কি নাকি ?

মানুষ মানে পাথর নয়।

তাই শেষরক্ষে হল না। নিতাইয়ের কথাটা শেষ হবার আগেই ভাবিনীও “রে-রে” করে তেড়ে
এল।

“কী! কী বললে ? আর একবার বল তো শুনি ? তোমার পেয়ারের বৌঠানের কাছে আমি যাব
রান্না শিখতে ? বলি আর কত অপমান তুলে রেখেছ আমার জন্যে ? যা রেখেছ একসঙ্গে বার কর।
একেবারে বুকে ভরে নিয়ে মা-গঙ্গার কোলে আশ্রয় নিই যেন— রেখে এস, আজ আমায় রেখে এস
বারুইপুরে। এত অপমান সয়ে থাকতে পারব না, এই বলে দিলাম সাদা বাংলা— ওগো মাগো, এই
সুখ করাতে তুমি আমায় শহরে এনেছিলে ? ঝাড় ফুলি আমি অমন সুখের মাথায়! ভাবছিলাম দোষ
হয়ে গেছে, ঘাট মানব, চুকে যাবে ন্যাটা, তার আর ডালপালা গজাবে না। ওমা এ যে দেখি থামেই
না! শক্তের ভক্ত আর নরমের যম তুমি, কেমন ? উঠতে বসতে নড়তে চড়তে খালি ‘বৌঠান আর
বৌঠান’ বলি এতই যদি মন্তরপূত করে রেখেছিলো বৌঠান তো আমাকে আবার আনতে গেছেল
কেন ? লোকের কাছে মুখ রাখতে ? শরক দিয়ে মাছ ঢাকতে ? তোমার—”

আবার শেষ ঘাটে ধাক্কা!

আবার কথার উপর হাতুড়ি!

নিতাই আসন থেকে দাঁড়িয়ে উঠে গলা ফাটিয়ে বলে, “কী বললি ?”

“অ্যা! ‘তুই’! ‘তুই’ বললে তুমি আমাকে হাড়ি-কাওয়ার মতন ? এও বোধ হয় শহুরে
সভ্যতা ?” ভাবিনী খেঁই খেঁই করে ওঠে, “তোমায় আমি কড়ে আঙ্গুলের ছেদা করি না, বুঝলে ?
কানা কড়ার না। দুশ্চরিত্র স্বামী আবার স্বামী ? হুঁ! আমি যাব সেই মায়াবিনী ডাকিনীর কাছে শিক্ষে
করতে। গলায় দেবার দড়ি জুটেবে না আমার ? যাও তুমি যাও, দু-বেলা তার পাদোদক খাও গে—”

নিতাই সহসা গম্ভীর হয়ে যায়। হাত দুখানা আড়াআড়ি করে বুকের ওপর রেখে বার দুই
পায়চারি করে হঠাৎ দাঁড়িয়ে পড়ে বলে, “পাদোদক যদি জোটে তো শুধু ‘খাবো’ কেন, মাথায় মেখে
বর্তাব! তবে এই তোমার মতন মেয়েমানুষেরও সেটা করা উচিত। বিশ বছর তাঁর পায়ের কাছে বসে
শিক্ষে করলে, আর দুবেলা পা-ধোয়া জল খেয়ে যদি তাঁর কড়ে আঙ্গুলের নখের যুগিও হও!”

নিতাই চরম অভিব্যক্তিতে তার হৃদয়ের শ্রদ্ধা প্রকাশ করতে পারে, কিন্তু স্ত্রীর পক্ষে যে পরস্ত্রীর
প্রতি এ শ্রদ্ধা প্রকাশ কাটাঘায়ে নুনের ভুল্য তাতে তো আর সন্দেহ নেই। অতএব এর পর ভাবিনী
যদি কোমরে কাপড় জড়ায়, তাকে দোষ দেওয়া যায় না। ভাবিনী জীবনাবধি যা দেখেছে তাই
শিখেছে। ‘দেখা’র উর্ধ্ব শেখবার মত অনুভূতি কটা মেয়েমানুষের থাকে ?

তা ছাড়া যে মেয়েমানুষ যতই নীরেট হোক নির্বোধ হোক, স্বামী মন পেলাম কিনা বুঝতে বাধে
না তার। আর সে মনের অধীশ্বরী যদি আর কেউ থাকে, তাকে চিনতেও দেরি হয় না। কলকাতার
মাটিতে পা দিয়েই তাকে চিনেছে ভাবিনী। সেই জ্বালাকর সততা বুঝে ফেলেছে।

এই ভয়ঙ্কর জ্বালা ভাবিনী মহান উদারতায় সহ্য করে যাবে, এ তো আর হয় না।

অতএব কোমরে কাপড় জড়িয়ে কী যেন একটা ছড়া আউড়ে ছিটকে কাছে সরে আসে ভাবিনী।

“বটে! বটে! কড়ে আগুলের যুগ্ম! চরিত্রহীন পুরুষের উপযুক্ত কথাই বলেছ! পরের ইত্তিরীর সবই মিষ্টি যাদের! বলি তোমার প্রাণের নিধি বৌঠানের সব ‘খেলা’ জান ? ও কথা তুলি না, তুলতে পিরবিত্তি হয় না তাই বলি না। তুললেই তো পুরুষের মুখ বুক সব খুলে যাবে। যা দেখবে তাই সুচক্ষে দেখবে। নইলে জেনেছি অনেকদিন। এইবার তোমায় জানাই— স্বামীকে নুকিয়ে রোজ ভরদুপুরে বিবিটি সেজে কোথায় যান গিন্নী, জান সেকথা ?”

“স্বামীকে লুকিয়ে মানে ?”

নিতাই যেন দুর্বল পক্ষ হয়ে পড়ে। অতএব সবল পক্ষ ভাবিনী কুটিল হেসে বলে, “নুকিয়ে মানে নুকিয়ে! ঝি মাগীই বলেছে আমার ঝিকে, ছেলেদেরকে শেখানো আছে ‘বলিস নে’।”

নিতাই বিশ্বাস করতে পারে না সত্যবতীর পক্ষে লুকোচুরি সম্ভব। তাই সগর্জনে বলে, “বিশ্বাস করি না।”

“ওঃ, তাই নাকি ? এইটুকুই বিশ্বাস কর না ? আর গুনলে না জানি কি বলবে!... বলি তোমাদের ওই জাতধর্ম খোয়ানো মাষ্টারটার সঙ্গে তলে তলে দহরম মহরম তা জান! তেনার সঙ্গে তো বেঞ্চধর্মের আপিসে পর্যন্ত যাওয়া হয়েছিল। বলি নি এতদিন, ওর কথা তোমার কাছে কইতে যেন্না হয়, তাই বলি নি। আমি বলছি ও মেয়েমানুষ একদিন—”

“খবরদার!”

নিতাই তীব্র চীৎকারে এগিয়ে আসে, “মিথ্যাবাদী! মিছিমিছি করে আর কিছু বলতে যাস তো জিত খসে পড়বে! চুপ, একেবারে চুপ!”

দিশেহারা দেখায় নিতাইকে।

একে তো দুটো অপবাদই ভয়ানক মারাত্মক, অথচ এমনই সর্বনেশে সত্যগন্থী মত যে একেবারে উড়িয়ে দিতেও বুক বল আসে না। তদুপরি আবার সেই ভবতোষ মাষ্টার। মাষ্টার জাতধর্ম খুইয়ে বেঞ্চ হয়েছিল, নিতাইয়ের হাড়ে বাতাস লেগেছিল। ভেবেছিল অন্তত নবকুমারের বাড়িতে আসা-যাওয়ার পথে তার কাঁটা পড়ল!

কিন্তু এ কী কথা শোনা যায় মন্থরার মুখে ? দিশেহারা হয়ে যায় নিতাই।

এই সুযোগে ভাবিনী কোমরের আঁচলটা আর একটু শক্ত করে।

“বলি গায়ের জোরে চুপ করিয়ে রাখলেই তো আর সত্যিটা মিথ্যে হয়ে যাবে না ? আমি এই তোমায় বলে রাখছি, ওই তোমার পেয়ারার বৌঠান বেঞ্চ হবে হবে হবে। ওই যে একটা বুড়ো ধিক্কী মেয়ে পুষেছে, মিছে করে বলে ভাইঝি, ভগবান জানেন বেধবা না আইবুড়ি, বয়সের তো গাছপাথর নেই, সেটাকে তো আর হিন্দুর সংসারে গছাতে পারবে না ? তাই বেঞ্চ হয়ে তার—”

“তুমি চুপ করবে ?”

ভাবিনী মুখে একটা আঙ্গুল ঠেকিয়ে ভেঙিয়ে উঠে বলে, “তবে এই করলাম! কিন্তু আমি চুপ করলেই তো আর জগৎ চুপ করে থাকবে না ? জানতে সবাই পারবে।”

চুপ সত্যিই তখন করেছিল ভাবিনী।

বোধ করি অন্নাত অজ্ঞত স্বামীকে পরাজিত শত্রুপক্ষের মতই দেখতে লেগেছিল বলে অন্ন সংবরণ করেছিল।

কিন্তু নিতাই ছটফটিয়ে বেড়িয়েছিল পাগলের মত।

বৌঠানের দ্বারা এসব সম্ভব ?

লুকোচুরি, অভিসার, ব্রাহ্মসমাজের যাতায়াত, ভবতোষের সঙ্গে চুপি চুপি মেলামেশা! ভাবিনীর অভিযোগ যদি সত্যিই হয়, তা হলে তো ধর্ম মিথ্যে, ভগবান মিথ্যে, জগতে যা কিছু বস্তু আছে সবই মিথ্যে!

অসুস্থ শরীর, না-স্নান, না-আহার আরও উদ্ভ্রান্তি আনছিল। ভাবিনী এক-সময় এসে পায়ে ধরে মাপ চেয়ে দুটো নারকেলনাড়ু আর একটি ঘটি জল নিয়ে সেধেছিল, গলা দিয়ে নামাতে পারে নি নিতাই, “পরে হবে—” বলে সরিয়ে রেখে বালিশে মাথা ঘষতে ঘষতে অবশেষে একসময় ঘুমিয়েও পড়েছিল।

ওবেলা ঘটেছিল এসব।

ঘুম ভাঙল পড়ন্ত বেলায় নবকুমারের ডাকে।

নবকুমার ব্যস্তসমস্ত হয়ে ঠেলা মেরে প্রশ্ন করছে, “নিতাই নিতাই, তোদের বৌঠান এসেছে এ বাড়িতে ?”

ধড়মড়িয়ে উঠে বসে নিতাই।

উপবাসক্রিষ্ট শরীরের মাথাটা ঝিমঝিম করে ওঠে, প্রশ্নের কথাটা চট করে হৃদয়ঙ্গম হয় না। তাই উত্তরের বদলে নিজেই সে প্রশ্ন করে, “কি ? কে এসেছে ?”

“আরে বাবা তোর বৌঠান ছাড়া আর কে ? আর কাকে খুঁজে বেড়াব আমি ? ভেতরে গিয়ে একবার খবর নিয়ে আয় দিকি, বৌমার কাছে বেড়াতে এসেছে কিনা ?”

নিতাই হতচকিত দৃষ্টি মেলে আস্তে মাথা নাড়ে।

“কী মুশকিল! বসে বসে হাত গুনছিস কেন ? তুই তো ঘুমোচ্ছিলি মন্দারাম! ইত্যবসরে এসেছে কিনা—”

এতক্ষণে বড়সড় একটা কথা বলে নিতাই ভেবেচিন্তে, “কেন, বাড়িতে নেই ?”

“এই দেখ! থাকবে যদি তো আমি ছুটে এসে হামলা করছি কেন ? ওহু তুই একবার—”

অগত্যা উঠতে হয় নিতাইকে।

এবং বাড়িতে তৃতীয় ব্যক্তি না থাকার অসুবিধেটা হঠাৎ এখন স্পষ্ট করে উপলব্ধি করে নিতাই।

ভিতরে গিয়ে ওই প্রশ্নটা এখন করতে হবে ভাবিনীকে! নিতাইয়ের মুখ থেকেই বার করতে হবে, “বৌঠান এসেছেন ?”

উত্তরটা যা আসবে সে তো নিতাইয়ের জানাই। নেহাৎ নবকুমারের নির্দেশেই ওঠা। নইলে সত্যবতী এসেছে, আর নিতাই টের পায় নি ? ঘুমিয়েছিল বৈ তো মরে ছিল না ?

খানকয়েক বাড়ির ব্যবধানেই দুটো বাড়ি। আসা-যাওয়া তো আছেই। ভাবিনী আসার পর তার সুবিধে অসুবিধে দেখতে প্রথম প্রথম খুবই এসেছে সত্য, কিন্তু ভাবিনীর অনাগ্রহেই যাওয়াটা আসাটা কমিয়ে ফেলেছে।

কিন্তু সে সব আসা বেশীর ভাগই নিতাইয়ের অনুপস্থিতিতে। উপস্থিতিতে দৈবাৎ। আজই কি আর হঠাৎ সেই সৌভাগ্য—

নবকুমারের অধীরতায় উঠে গেল নিতাই। উত্তরের গিয়ে এদিক-ওদিক ঘুরে চলে এসে মাথা নাড়ল।

মান খুইয়ে জিজ্ঞেস আর করতে হল না।

দেখল ভাবিনী একা বসে সন্ধ্যার অন্ধকার তুচ্ছ করে কাঁথাখানাই সেলাই করছে। ভরসন্ধ্যায় যে ছুঁচসূতো হাতে করতে নেই, এ শিক্ষাপ্ত যেন বিস্মৃত হয়ে গেছে ভাবিনী।

“কী হবে নিতাই ?” নবকুমার প্রায় ‘ভ্যাক’ করে কেঁদে ফেলে।

নিতাই গুরুমুখে বলে, “আর কোথাও গেছেন হয়তো!”

“আর কোথায় যাবে ? একা আর কোথা যাবে ?” নবকুমার কাতর ভাবে বলে, “কপালক্রমে ঠিক এই সময় তুড়ু খাকা দুদিনের জন্যে ওদের ঠাকুমা-ঠাকুন্দাকে দেখতে বারুইপুর গেছে—”

“একা গেছে ?” চমকে ওঠে নিতাই।

“না না! আমাদের অবনী যাচ্ছিল দেশে— ভাবলাম ওদের তো ছুটি রয়েছে, যাক দুদিন। দেশভিটে কিছুই তো চিনলো না! কী করে জানব এই ফাঁকে এই বিপদ হবে!”

নিতাই আরও গুরুকণ্ঠে বলে, “তোমার সঙ্গে কোনও বচসা-টচসা হয় নি তো ? মানে গঙ্গার দিকেটিকে—”

“না না। সে সব কিছু নয় নিতাই। তবে আমাকে না জানিয়ে তো তুড়ুর মা কোথাও—”

আবেগের মুখে এসেছিল নিতাইয়ের, “তা তিনি যান ! শুনেছি সে খবর—”

কিন্তু আবেগকে প্রশমিত করে। আস্তে আস্তে অন্য কথা বলে, “সেই যে মেয়েটা— মানে সুহাস আর কি— সে নেই ?”

“সে তো ইস্কুল থেকে এসে পর্যন্ত না দেখে ভাবনা করছে। কিটাও কিছু জানে না। কী হবে নিতাই ?”

কী হবে, কী হচ্ছে, কী হতে চলেছে, তার কি কিছুই জানে নিতাই ? তার শূন্য মস্তিষ্কে যেন সহস্র বোলতা শনশনিয়ে ওঠে। মাথার ভার ঘাড় বহন করতে রাজী হয় না। বালিশে ধপ করে মাথাটা ফেলে ভাঙা গলায় বলে ওঠে নিতাই, “আমি তো কিছুই বুঝতে পারছি না।”

কিন্তু আর একজন তো সবই বুঝতে পেরে ফেলেছে।

নিতাইয়ের ওই একবার নিঃশব্দে অন্তঃপুরে পাক খেয়ে আসার পরমুহূর্তেই কাঁথা ফেলে উঠে এসেছে ভাবিনী।

দরজার ফাঁকে চোখ কান রেখে আড়ি পেতে এপিঠের কথাবার্তা শুনেছে, এবং শুনেই সমস্ত রহস্য হৃদয়ঙ্গম করে ফেলেছে।

একটা বদ বিচ্ছিন্ন মেয়েমানুষের জন্যে দু-দুটো দসিাপুরুষ যে এরকম মচ্ছি হয়ে পড়বে, এও তো অসহ্য! চোখে দেখাই শক্ত!

ওই অসহ্য ব্যাপারটা আর বেশীক্ষণ বরদাস্ত করতে পারে না ভাবিনী, ঠনঠনিয়ে দরজার শেকলটা নেড়ে দেয়।

সেই ঠনঠনানির মধ্যে যেন কোনও রহস্যবার্তার ইশারা।

ছেলের বৌ যেমনই হোক, নাতি বড় জিনিস। বংশধর, সর্বেশ্বর, নাড়িতে নাড়িতে বাঁধন। ছেলে দুটো আসা অবধি এলোকেশী যেন উথলে বেড়াচ্ছেন। অবিশ্যি সঙ্গে সঙ্গে বৌয়ের নিম্দেরও বিরাম নেই। ‘যে ছোটলোকের বেটা’ তাঁকে এই পরম বস্তু থেকে বঙ্ছিত করে রেখেছে, তার যে কখনো ভাল হবে না, এ বিষয়ে শেষ রায় দিয়ে এলোকেশী নাতিদের যত্নে তৎপর হয়ে বেড়াচ্ছেন। কারণ এবার ওরা একা এসেছে। কোন-কোনবার পূজায় আসে, বাপের সঙ্গে তিন-চারটে দিন মাত্র থাকে, বিশেষ হাতে পান না। না, সত্য আর আসে নি। এলোকেশী আর তার মুখ দেখতে চান না, সেটা বড় গলায় জানিয়ে দিয়েছেন। ছেলেদের পৈতে দিয়ে গেছে ভিত্তিয়ে এসে, তাও নবকুমার একা। দুই ছেলের একসঙ্গে মাথা মুড়িয়ে দিয়েছে। কৃপণস্বভাব নীলাধরের বাড়িতে সমারোহময় কাজের ধরনও নেই। নবকুমার শেখে নি।

আর সত্য ? তার যদি বা কোন সাধ থেকেও থাকে, এলোকেশীর কথা ভেবে সে তুলে রেখেছে সমারোহ করতে গেলেই তো তাঁদের সঙ্গে যোগাযোগ করতে হবে। এ বরং কদিন খিকে রাস্তিরে থাকতে বললেই বেশ থাকতে পারবে সত্য। তাই থেকেছে।

ভারি তো মনিষ্যি সাধন সরল, তুড়ু খোকা ছাড়া পোশাকী নামে যাদের আজ পর্যন্ত কেউ ডাকে নি, বড় একেবারে খাইয়ে, তবু তাদের জন্যে পুকুরে জাল ফেলা হচ্ছে, টাটকা চিড়ে কোটানো হচ্ছে, পিঠে পায়ের, নাড়ু, পাটিসাপটা গোকুলপিঠে, ক্ষীরতক্তি ইত্যাদি করে যতরকম জানা আছে এলোকেশীর, একটু ভুল বলা হলে— যত রকম পুরানোতে জানা আছে সদুর, সব চলছে একধার থেকে।

নাকে নল ছেঁচে যাচ্ছে সদুর।

নীলাধর অবশ্য এক-আধবার বলছেন, “ওরে তোদের পেট-টেট ভাল আছে তো ? দেখিস, দিনকাল ভাল নয়। শেষে আবার কলকাতায় ফিরলে তোদের মা না বলে ঠাকুরমার কাছে আদর খেয়ে পেটের রোগ ধরিয়ে এনেছে!”

কিন্তু এলোকেশী সে কথায় কর্ণপাত মাত্র করছেন না।

নাতিদের অসুখ এবং বৌয়ের ‘কথা’ শোনানো সম্পর্কে তাঁর মনে লেশমাত্রও ভয় আছে বলে মনে হচ্ছে না। বরং স্বস্তির দিয়ে বলে উঠেছেন, “তুমি থাম তো! অসুখই বা হতে যাবে কেন ? বালাই ষাট। আমি কি পচা পান্তো খাওয়াচ্ছি নাতিদের ? অসুখ যদি হয় তো বলতে হবে যে ওদের গর্ভধারিণীর গুণেই হয়েছে। শহরে গিয়ে শহুরে চাল ধরেছেন, ছেলে দুটোকে আধপেটা খাইয়ে খাইয়ে পেট মেরে রেখেছেন। সারা দিনমানে একবার বৈ দুবার ভাত নয়।... আর নবুকে আমার আমি তিনবার করে ভাত দিতাম। সকালবেলা কী যাচ্ছে ছেলেরা, না গজা জিলিপি তিলকুট! দোকান থেকে কিনে আনিয়ে রাখে। কেনা খাবারে ছেলেপিলের পেট ভরে ? কেন সকালে একবার দুটো ফেনাভাত দিতে হাতে পোকা পড়ে ?... ইঙ্কল থেকে এসে খাবার কি ? না পরোটা! খিদের সময় ময়দা ? দেখলে চোখ ফেটে জল আসে না ছেলেদের ?... নবু আমার একদিন যদি ইঙ্কল থেকে এসে মাছভাতের বদলে অন্য কিছু দেখেছে তো ছুঁড়ে ফেলে দিয়ে কেঁদেছে!”

সদু এক আধবার বলতে চেঁটা করেছিল, “তা নবুর ছেলেদেরও যে কান্না আসে, তা বলেছে ওরা তোমাকে ?”

এলোকেশী সে কথাও উড়িয়েছেন।

বলেছেন “বলবে আর কোন সাহসে ? যে খাগরনী মা, ভয়ে তার বিপুলে কথা একটা বলতে পারে ? বড়টাকে খুঁচিয়ে খুঁচিয়ে যদিবা দু-একটা পেটের কথা টেনে বার করছি, ছোটটা একেবারে তুখোড় পাকা। জানে কথা প্রকাশ পেয়ে গেলে মা আর আমার কাছে পাঠাবে না, তাই—”

“আহা প্রকাশেরই বা আছে কি ? বৌ তো আর বাসায় গিয়ে চুরি ডাকাতি করছে না ?”

“চুরি-ডাকাতি না করুক, অনেক কাণ্ডই তো করছে। কোথাকার একটা অখন্দ্যে-অবদ্যে ছুড়িকে তো পুষছে, তাকে পয়সা খরচ করে ইঙ্কলে দিয়েছে, বই খাতা কিনে দিচ্ছে, সে তো গেল। নিজে নাকি রোজ দুপুরে কোথায় গিয়ে মেয়ে পড়াচ্ছে। বিদ্যেবতী নীলাবতী! বলি চুরি-ডাকাতির চেয়ে কমটাই বা কি হল তা হলে? বাবার জন্যে শুনেছিস কেউ এ কথা? ভন্দরঘরের বৌ যায় গুরুমশাইগিরি করতে?”

নীলাবতীর অবশ্য এ সংবাদে ছিটকে উঠেছিলেন, গাল দিয়ে নবকুমারের পিতৃশ্রদ্ধ ঘটিয়ে সংকল্প ঘোষণা করেছিলেন, নিজে গিয়ে খড়ম পেটা করে ছেলে বৌকে গায়ে ফিরিয়ে নিয়ে আসবেন, পরে সে সংকল্প ত্যাগ করেছেন। বলেছেন, “নাঃ, গায়ে এনে আর দরকার নেই! জাত যা যাবার তা তো গেছেই, ও বৌয়ের হাতের ভাত তো আর খাচ্ছি না আমরা, মিথ্যে আর ধরা-বাঁধার দরকার কি? এ বরং বাইরে আছে, এখানে আনলেই তো পাড়া জানাজানি। ঘোমটা দিয়ে কোণে বসে থাকবার বৌ যখন নয়, তখন চোখের আড়ালে থাকাই মঙ্গল। বরং ছেলে দুটোকে যদি হাত করতে পার সেই চেষ্টা দেখ। আখেরে বুড়ো-বুড়ীকে দেখবার একটা তো চাই!”

এলোকেশী গলা খাটো করে মুচকি হেসে উত্তর দিয়েছিলেন, “সে চেষ্টার কসুর করছি মনে করছ? মায়ের ওপর মন বিষ করে তোলবার জন্যে, মায়ের যত গুণাগুণ সবই ব্যক্ত করছি। তবে মায়াবিনীর যে মহামন্তর জানা! ছেলেরা মাতৃভক্তিতে ডগমগ! মন্তর নইলে আমার নিজের পেটের ছেলেটা অমন পর হয়ে যায়?”

সাধন সরল অবশ্য ভেতরের এত কথা জানে না, তারা প্রাণভরে ছুটির আনন্দ উপভোগ করছে। কলকাতার ধরা-বাঁধা জীবনের বাইরে এসে, শৈশবের নীলাভূমি ফিরে পেয়ে, মাঝে মাঝে সত্যিই মায়ের ওপর রাগ হচ্ছে তাদের। মার জেদের জন্যেই যে কলকাতায় বাস, সেটা সবিস্তারে এবং স-নিন্দেয় শুনেছে তো উঠতে বসতে।

তবে সদু ন্যায্য কথা কয়।

অবশ্য মামীর সামনে তত নয়, কারণ এলোকেশীর রণরঙ্গিনী মূর্তিকে সে বড় ডরায়। রাতের খাওয়ার সময় একলা পায় ভাইপোদের, এলোকেশী সন্ধ্যার মধ্যে বিছানা নেন। সদু ভাত বেড়ে দিয়ে কাছে বসে গল্প করে। বলে, “ঠাকুরমার কথায় তো মাকে দুখইস, বলি মা যাই টেনে হিচড়ে নিয়ে গেছল তাই না এই বয়সে এতটা পড়া করেছিস, ভাল ভাল করে পাস করছিস। এখানে থাকলে হত এসব? দেখছিস তো এখানে তোদের বইসী ছেলেদের। কেউ এরই মধ্যে পড়া ছেড়ে দিয়ে মাছ ধরছে আর তামাক খাচ্ছে, কেউবা একটা কেলাসে তিন-চার বছর ঘষটাচ্ছে। না সভ্যতা, না ভব্যতা। বামনের ঘরের ছেলেটা আর চাষার ঘরের ছেলেটার তফাৎ বোঝবার উপায় নেই।”

সাধন ঠাকুরমার মুখের বচন ঝেড়ে বলে, “তা এত এত দিন, এত এত যুগ ধরে লোকে তা দেশগায়েই থেকেছে? তারা কি আর মানুষ নয়? মায়ের বাবাও তো পাড়াগাঁয়ের ছেলে?”

“তোদের দাদামশাইয়ের কথা বলছিস? তাঁর কথা বাদ দে। তিনি হলেন হাজারে একটা। তবে তিনি কি আর তোর এই ঠাকুরমার মতন বন্ধুজলা? তিনি হলেন নদীর মতন। শুধু পাড়াগাঁয়ে কেন? শহর-বাজারেই তাঁর অনেকদিন পর্যন্ত কেটেছে। তা হ্যাঁ রে— মামারবাড়ি যাস-টাস না?”

“না তো!”

“যাস না? আমি বলি, এখন তোর মা স্বাধীন হয়েছে, হয়তো—”

হঠাৎ সরল ফট করে বলে বসে, “মা আবার একলা একলা কি স্বাধীন হল? আমাদের দেশেরই কেউই তো স্বাধীন নয়, ভারতবর্ষটাই তো পরাধীন!”

সদু কথটা চট করে অনুধাবন করতে পারে না, বলে, “ভারতবর্ষটা কি বললি?”

“পরাধীন, পরাধীন! গোরা সাহেবরা রাজা নয়?”

সদু বিস্ময়ে প্রশ্ন করে, “ওমা? শোন কথা, ওদের রাজ্য ওরা রাজা হবে না?”

“বাঃ, ওদের রাজ্য কি করে হবে? ওরা কি আমাদের এ দেশের লোক?”

“তা ওরা তো রাজার জাত? তা ছাড়া ওরা সমুদ্রের ওপার থেকে এসে তোদের কত ভাল করছে।”

“ভাল করছে না হাতী! অনেক লোকসানই করেছে বরং। আর মা বলেন, যে যার নিজের দেশের মালিক হবে এই নিয়ম। যারা পরের দেশে এসে লোভ করে সেখানে শেকড় গেড়ে বসেছে, তাদের—”

সদু অবাক হয়ে বলে, “এই সব কথা বলে তোদের মা ? তা হলে তো দেখছি মামী যা বলে মিথ্যে নয়! মাথারই দোষ! কিন্তু ওসব কথা বলতে নেই রে খোকা, সাহেবরাই তোদের বাপের অন্নদাতা।”

অন্নদাতা কথাটার সম্যক অর্থ বুঝতে না পেরেই বোধ করি সরল উত্তর দেয় অন্য পথে, “মা তো সাহেবদের নিন্দে করেন না, শুধু বলেন, সব ছেলেরই মনে এই চিন্তা নিয়ে মানুষ হওয়া দরকার, পৃথিবীর মধ্যে মাথা উঁচু করে দাঁড়াতে হবে। তা দেশটাই যাদের পরাধীন, তারা আর মাথা উঁচু করতে কি করে ?”

সদু হতাশ নিশ্বাস ফেলে বলে, “কি জানি বাবা, ওসব কথার মর্ম বুঝি না। তোর মায়ের চিরদিনই চোটেপাট কথা, উদ্ভূটে বিদঘুটে চিন্তা। এত দেশ থাকতে কিনা সাহেব বাঙালী নিয়ে মাথা ঘামানো, কে রাজা কে প্রজা তার ভাবনা! আজন্ম পরাধীনতার কাটল, স্বাধীনতা কাকে বলে তাই জানলাম না। তার মর্ম বুঝবো কি ছাই! মানুষ পরাধীন হয় তাই জানি, দেশের আবার স্বাধীন পরাধীন ? যাক গে মরুক গে ওসব কথা, তোর মা নাকি গুরুমশাইগিরি করতে যায় রে ?”

সাধন সরল দুই ভাই একবার মুখ-চাওয়াচাওয়ি করে, তার পর সরলই সহসা সবেগে বলে ওঠে, “তা বল না দাদা, ভয়টা কি ? মা তো বলেছেন, লুকোচুরি মিথ্যে কথা, এর বাড়া পাপ নেই। তবে বাবাকে বলতে মানা, বাবা পাছে মাকে যেতে নিষেধ করেন। নিষেধ করলে তো মুশকিল। অথচ মাস্টার মশাই বলেছেন—”

সদু চোখ কুঁচকে বলে, “মাস্টার মশাই কে ?”

“বাঃ, মাস্টার মশাই কে জান না ? ভবতোষবাবু! বাবাকে যিনি—”

“বুঝেছি বুঝেছি! তা সে না ব্রহ্মজ্ঞানী হয়ে গেছে ?”

সাধন ভয়ে ভয়ে মাথা কাত করে।

“তার সঙ্গে বৌ কথা কয় ?”

সাধন ততোধিক নম্রতায় আর একবার মাথা কাত করে

“ব্রহ্মজ্ঞানী হয়ে যাবার পরও তোদের বাড়িতে আসে সে ?”

“না, বাড়িতে আসে না—”, সরল গঞ্জীরে ভাবে বসে, “বাবা তো তাঁর মান রাখেন নি, বাড়িতে ঢুকতে বারণ করেছেন। তাই মা বলেন, ‘বেশ আমিই তাঁর বাড়ি যাব।’ মাস্টারমশাই কত উপকারী—”

সদু গালে হাত দিয়ে বলে, “তোমার কথা শুনে আমি তাজ্জব হয়ে যাচ্ছি তুড় ইচ্ছে হচ্ছে গিয়ে দেখে আসি তোদের মার আর দুখানা হাত-পা বেরিয়েছে কিনা। যা ত্রিভুবনে কেউ শোনে নি, সেই সব ঘটনা ঘটাচ্ছে সে ? কিন্তু এও বলি, এক-কালে মাস্টার উপকার করেছে বলে এখন জাতধর্ম নষ্ট করার পরও কি দরকার তাঁর কাছে যাবার ?”

যে কথা মনে আনাও পাপ, হঠাৎ তেমনি একটা সন্দেহ দংশন করে ওঠে সদুকে। তাই এই প্রশ্ন।

কিন্তু সাধন ততক্ষণে সদুত্তর দিয়েছে।

“পাঠশালা তো মাস্টার মশাই-ই বানিয়েছে। বুড়ো বুড়ো গিন্ধীরা অ আ ক খ শিখতে আসে। মাস্টার মশাই বলে, দিনভোর গালগল্প করে, তাস খেলে আর কৌন্দল করে— নয়তো বা ঘুমিয়ে নষ্ট করার চাইতে কত ভাল কাজ লেখাপড়া শেখা, তাই ‘সর্বমঙ্গলা তলা’য় দুপুরবেলায় ওই পাঠশালা খুলে দিয়েছে। তোমাদের মতন বড়রাও পড়তে আসে।”

সদু একটা নিঃশ্বাস ফেলে বলে, “এজন্যে যদি কখনো মরি, তবে আবার তোদের ওই কলকাতায় জন্মাব, আর তোর মার ইঙ্কলে পড়ব।”

“তা এখনই তো পড়তে পার ?”

“পারব সেই একেবারে যখন চিতায় শোব! নে, ভাত কটা যে পাত্রে পড়েই আছে।”

“খাচ্ছি। বাবা, রাতদিন যা খাচ্ছি— আর পেটে ধরছে না!”

“তবে থাক, জোর করে খাস নে।”

সাধন সদুর সেই হঠাৎ স্থির হয়ে যাওয়া মুখটার দিকে একটুকুণ তাকিয়ে থেকে আস্তে বলে, “পিসি, তুমি চল না আমাদের সঙ্গে—”

“আমি ?” সদু হঠাৎ চড়ে উঠে বলে, “আমি কলকাতায় যাই আর এই বুড়ো-বুড়ী দুটো না খেয়ে মরুক!”

“আহা চিরকাল কি ? দু-একদিনের জন্যে বেড়াতে—”

“থাক বাবা। তুই যেতে বললি এই ঢের, বেড়াতে আর এজন্যে কোথাও যাচ্ছি না, যাব তো চিরকালের মতন সেই যমরাজের বাড়িতে। তবে বড় হয়েছিস তুই, চুপি চুপি একটা যদি কাজ করতে পারিস। কাউকে কিন্তু বলতে পারবি না। যে বলবে সে আমার মরা মুখ দেখবে—”

“আহা কি কাজ তাই বল না ?”

“বলছি— তোদের ওই বাগবাজারেই, তাই বলছি। ওখানের একটা বাসার ঠিকানায় একখানা চিঠি দেব, পৌছে দিতে পারবি ?”

সাধন মহোৎসাহে বলে, “কেন পারব না, কত নম্বর বল ?”

“লেখা আছে দেব। কিন্তু— শোন কেউ যেন না জানতে পারে।”

“জানতে না পারে ? কেন বল তো পিসি ?”

“পরে বলব।”

॥ আটত্রিশ ॥

হারিয়ে যাওয়া সত্য যখন ফিরল, তখন সন্দেহ হয়-হয়। একটা ভাড়াটে ঘোড়ার গাড়ি থেকে নামল সত্য, সঙ্গে একটি গিল্লীবান্ধি বিধবা।

“তুমি একটু দাঁড়াও বাছা, গাড়োয়ানকে আগে বিদেয় করি—”, বলে সত্য ভিতরে ঢুকে আসে। সুহাস তখন এ-জানালা ও-জানালা করে ছটফটিয়ে বেড়াচ্ছে, নবকুমার নিতাইয়ের বাড়ি থেকে ফেরে নি।

সত্যকে দেখেই সুহাস প্রায় চেঁচিয়ে ওঠে, “পিসীমা!” সে স্বরে অভিযোগ।

সত্য ব্যস্তকণ্ঠে বলে, “হবে, জবাবদিহি হবে, এখন গঙ্গাজলে হাত ধুয়ে আমার ওই হাতবান্ধি থেকে চার আনা পয়সা বার করে দে দিকি, গাড়ির কাপড়ে আর স্ত্রীস্বস্তি ছোঁব না।”

আঁচলের গিট খুলে চাবিটা ফেলে দেয় সত্য সুহাসের সামনে।

সুহাস স্বল্পভাষিনী, নেহাৎ অস্থির হয়েই চেঁচিয়ে উঠেছিল। আর কথা বলে না, নিঃশব্দে আদেশ পালন করে। শুধু অলক্ষ্যে বার বার দৃষ্টি নেয় সত্যকে। রহস্যময়ী সত্যকে।

গাড়ির ভাড়া দিয়ে গাড়োয়ানকে বিদেয় করে সত্য সেই মেয়েমানুষটিকে বলে, “নাও বসো, হাতেমুখে একটু জল দাও, একটু মিষ্টিমুখ কর, তবে যেও।”

মেয়েমানুষটি হুটচিন্তে বলে, “আবার মিষ্টি কেন মা ? তোমার ঘরদোর দেখলাম, চিনে গেলাম, এই ঢের। তোমার মিষ্টি কথাই ‘মিষ্টি’ মা, গুনলে শরীর শীতল হয়।”

“তা হোক, তুমি আমার জন্যে এতটি করলে, একটু মিষ্টিজল না খাইয়ে ছাড়ব না।” বলে সত্য ফট করে গায়ের সিল্কের চাদরটা রেখে কলের ঘরে ঢুকে কাপড়টা সেমিজটা কেচে ফেলে ভিজে কাপড়েই ভাঁড়ার থেকে দুটো নারকেল নাড়ু বার করে এক ঘটি জল দিয়ে খেতে দেয়।

মেয়েমানুষটি বিদায় নিলে সত্য শুকনো কাপড় পরে ঘরে এসে বসে সুহাসকে উদ্দেশ্য করে বলে, “তার পর ? আমার নামে ছলিয়া বেরিয়ে গেছে বোধ হয় ?”

সুহাস অন্যদিকে ঘাড় ফিরিয়ে বলে, “ছলিয়া আবার কি ? পিসেমশাই অস্থির হয়ে বেরিয়ে গেলেন, এই পর্যন্ত।”

“এই একদিনেই তোর পিসের কাছে আমার সব কীর্তি ফাঁস হয়ে গেল দেখছি—” সত্য বলে, “পাঠশালার খবরটা এখাবৎ চেপেচুপে ছিলাম—”

সুহাস বোধ করি আজকের সুযোগে তার মনের সন্দেহটা প্রকাশ করে বসে। মুখ তুলে ঝপ করে বলে ফেলে, “তা চাপাচাপিই কি ভাল ? এদিকে তো তোমরা নিজেরাই বল স্বামী মেয়েমানুষের দেবতা।”

সত্যর মুখে আসছিল বলে, “তোমার যে দেখি স্বামী না হতেই স্বামীভক্তি!” কিন্তু সামলে নেয়। কে জানে মেয়েটার কপালে “স্বামী” আছে কিনা। নিরুপায় বুদ্ধিহীন মা তো কুমারী মেয়েকে বিধবা পরিচয় দিয়ে তার ভবিষ্যতের পায়ে কুড়ল মেরে রেখে গেছে। এই রূপে ডালি মেয়ে, সত্য, নন্দ, লেখাপড়ায় কত চাড়, এ মেয়েকে যে স্বামী পেত, সে তো ধন্য হত!

কিন্তু হয়তো দুঃখিনীর ভাগ্য দুঃখেই যাবে। তবু মনে স্থির করে রেখেছে সত্য, শেষ অবধি লড়বে মেয়েটার জন্যে। তাই না ব্রহ্মজ্ঞানীদের সম্পর্কে ঔৎসুক্য সত্যর, তাদের সঙ্গে চেনাজানার বাসনা।

ব্রহ্মজ্ঞানীরা নাকি খুব উদার।

বালবিধবা মেয়ের বিয়েতে নিন্দেও নেই তাদের। সত্য প্রথমে ভেবেছিল সত্য ঘটনা প্রকাশ করে দেবে সুহাসের কাছে।

কুমারী পরিচয়েই স্থলে ভর্তি করে দেবে তাকে, কিন্তু সাতপাঁচ ভেবে সে ইচ্ছে স্থগিত রাখতে হয়েছে। প্রথম তো এত বড় আইবুড়ো মেয়ের কৈফিয়ত অনেক, জাত যাওয়ার প্রশ্নও আছে। তা সে হয়তো সত্য তার ন্যায়ভাষণের জোরে একরকম করে মানিয়ে নিত, “গরীবের মেয়ের বিয়ে দিয়ে দিতে পারে না সমাজ, জাতটা নিয়ে নিতে পারে?” এ তর্ক তুলত। কিন্তু বাধা অন্যদিকেও।

এত বড় নিষ্ঠুর সত্য প্রকাশ হয়ে পড়লে মাকে কী ভাববে সুহাস? কোন দিনই কি প্রাণ থেকে ক্ষমা করতে পারবে মাকে? যখন শুনবে কেবলমাত্র নিজের সুবিধার্থে মা তার কপালে দুর্ভাগ্যের ছাপ দেগে রেখে দিয়েছে, আজন্মকাল ষাওয়া পরা থেকে বঞ্চিত করে রেখেছে, মা কি নিতান্ত ছোট হয়ে যাবে না তার চোখে? স্বার্থপরতার নির্মমতায়? সে যে মড়ার ওপর ঝাঁড়ার ঘা!

আর যদি মাকে সে দেবীর আসনে বেদীতে বসিয়ে রেখে থাকে, বিশ্বাসের ভালবাসার ভক্তির নড়াচড়া না হয়, তা হলে হয়তো বা সত্যকেই সন্দেহ করে বসবে। ভাববে সত্যই এখন তার বিয়ের সুবিধে করতে—

এই সব সাতপাঁচ ভেবেছে সত্য সুহাসের সম্পর্কে। ভেবেছে, থাক, আর একটু জ্ঞানবুদ্ধি বাড়ুক। সত্যিমিথ্যে বোঝবার চোখ হোক। তখন দেখা যাবে।

তাই এখন ওদিক দিয়ে না গিয়ে সত্য দোষ মেনে নেওয়ার ভঙ্গীতে বলে, “স্বামী দেবতা এ কথা শুধু আমরা কেন, ত্রিজগতের সবাই বলে। কিন্তু দেবতার অসন্তোষ ঘটানোও তো দোষের রে। আমি পাঠশালা খুলে গুরুমশাইগিরি করছি শুনলে তোর পিসে অসন্তোষের পরাকাষ্ঠা করবে বৈ তো না? অনর্থক রাগিয়ে দিয়ে লাভ? তাকেই মনে যত্ননা দেওয়া। আর না বুঝেসুঝে দুম করে যদি বারণ করে একটা দিবিয়াদিশলা দিয়ে বসে, তাতেও তো বিপদ।”

সুহাস একটু চুপ করে থেকে আন্তে আন্তে বলে, “তা পিসেমশাই যাতে রাগ করতে পারেন, সে কাজ তোমার না করাই উচিত।”

সত্য সুহাসের এই সন্ধিবোচনার কথায় স্থগিত হয়, তবে সত্য মনে মনে একটু হাসে। ভাবে তাই যদি উচিত হত, তুই কোথায় থাকতিস? বাপু? এত কথা ভাববার মত বুদ্ধিই বা পেতিস কোথা থেকে? কম লড়ালড়ি করতে হয়েছে ওর সঙ্গে তোর জন্যে? তোকে কাছে রাখা নিয়ে তো বটেই, তাছাড়া ইচ্ছলে ভর্তি করা নিয়ে?

সাহেবী ইচ্ছলে পড়ালে মেয়েকে, সে মেয়ের হাতের জল ষাওয়া চলবে না, এ বলেও নিবৃত্ত করতে চেয়েছে নবকুমার। তবু সত্য ব্যাপারটা ঘটিয়ে তুলেছে।

মনে পড়ে গেল সত্যর সেই কথাটা এই ‘উচিত অনুচিতের’ প্রসঙ্গে। মুখেও আসছিল, সামলে নিল, মৃদু হেসে বলল, “তুই তো দেখছি অনেক শিখে ফেলেছিস! হ্যাঁ, বলেছিস ঠিক, উচিত নয়। কিন্তু দেখ, সব নিয়ম সব ক্ষেত্রে খাটে না। কত স্বামী হরিনামে অসন্তুষ্ট হয়, হরিনাম শুনলে জুলে ওঠে, তা বলে তার স্ত্রী করবে না হরিনাম? তবে আবার তার কানের কাছে খোল পিটিয়ে নাম সংকীর্তন করাও ভাল নয়। আসল কথা, যে কাজটা করতে যাচ্ছ, আগে দেখবে সে কাজ ভাল কি মন্দ, সেই বিবেচনাটুকু রাখতে হবে, তার পর যতটা পারা যায় কাউকে না চটিয়ে সে কাজকে সামলে নিয়ে উদ্ধার করা। যারা পছন্দ করে না তাদেরকে অগ্রাহ্য করাও হলে না, কাজটাও হলে।”

সুহাসকে কি একেবারে বড়র দলে ফেলেছে সত্য? তাই তার কাছে এত কৈফিয়ত? অথবা সুহাসকে উপলক্ষ্য করে সত্য নিজের মনকেই কৈফিয়ত দিচ্ছে? স্বামীর সঙ্গে লুকোচুরি করতে, ভিতরে ভিতরে যে সূক্ষ্ম বিবেকের পীড়ন অনুভব করে সে, এ কৈফিয়ত তার জন্যে?

সুহাস অবশ্য নিজেকে বড়ই ভাবে, পুরো একটা মানুষই ভাবে, তাই সত্যর কৈফিয়ত শুনেও আবার মতামত ব্যক্ত করতে সাহসী হয়। আর সত্যর কাছে আর যাই হোক সাহসী হতে বাধা নেই। তাই আন্তে বলে, “আমার তো মনে হয় হরিনামটা ভাল কাজ, সেটা বুঝিয়ে দিয়ে—”

সত্য হেসে ওঠে।

বলে, “কম বয়সে আমিও তোর মত করেই ভাবতাম সুহাস, সব কিছু নিয়ে লড়াই করতাম, তবু করে অপরকে বুঝিয়ে ছাড়বার চেষ্টা করতাম, কিন্তু এখন বয়সে বুদ্ধি বাড়ার সঙ্গে সঙ্গে এইটা

বুঝেছি অবিবর্তিত লড়াইয়ে কেবল শক্তিক্ষয়। কাজের জন্যে যে শক্তি থাকা দরকার, সে শক্তির অনেকটা যদি তাকেই খরচ করে ফেলি, তবে কাজটায় যে ঝিমিয়ে যাব। তাই যাতে সাপও মরে লাঠি না ভাঙে, সেই পথই ধরি। তবে ওই যা বললাম, ক্ষেত্রবিশেষে। আর সেই ‘বিশেষ’টা চেনবার চোখ চাই, বুঝলি ? ‘মেয়েমানুষ’ কি মানুষ নয় বলে অনেক তর্ক করেছে, কিন্তু দেখছি ক্রমশ সে তর্ক সমুদ্রে বালির বাঁধ। এই আমাদের পোড়া দেশে মেয়েমানুষ হওয়ার অনেক জ্বালা, বুঝলি ? একটা সং কাজ করতে যাও, তাও পায়ে পায়ে বাধা। মাস্টার মশাই বলেন, অনুদানের চেয়েও বড় পুণ্য বিদ্যাদানে। মানুষের আর জন্তু-জানোয়ারে যে তফাৎ সে তো ওই বিদ্যে থেকেই। নইলে প্রাণী মন্তরেই তো খায়, ঘুমায়, ছানা পাড়ে। মানুষ থেকে কীটপতঙ্গ পর্যন্ত। তাই সে বিদ্যে বহুটা যার মধ্যে এতটুকুই আছে, তার উচিত আর একজনকে সে বিদ্যার ভাগ দেওয়া। এ জিনিস তো দানে কমে না, বরং বাড়ে। কিন্তু এসব কথা কজন বুঝতে চায় বল! চায় না !... আগে ভাবতাম, যা ঠিক, তা সবাইকে বুঝিয়ে ছাড়ব। বুঝিয়ে সোজা করব, এখন বুঝতে শিখেছি সে চেষ্টা হচ্ছে হাত দিয়ে হাতী মাপা, আকাশের তারা গানা। তার চেয়ে নিজের বিবেচনায় যা ঠিক বলে বুঝব, করে যাব একমানে। একদিন না একদিন বুঝবে লোকে ঠিক কি ভুল। যারা বিরক্ত হয়েছে, অপছন্দ করেছে, তারাই মেনে নেবে।”

অনেকগুলো কথা একসঙ্গে বলে সত্য একটু চূপ করে জিরিয়ে নেয়। সুহাস সেই অবসরে চট করে উঠে গিয়ে এক ঘটি মিশ্রীর পানী এনে সত্যর মুখের সামনে ধরে।

সত্যর ভেতরটা বোধ করি এমন একটা শীতল পানীয় চাইছিল। কোন্ কালে বাড়ি থেকে বেরিয়েছে। বিনাবাক্যে চকচক করে মিশ্রীর জলটা খেয়ে নিয়ে মৃদু হেসে বলে, “মনের কথা টেনে নিয়ে তেঁতার জল দিতে শিখেছিস, আর তোর শেখবার কিছু বাকী নেই সুহাস। জগৎ-সংসারে শুধু এইটুকু শিক্ষার সম্বল থাকলেই যথেষ্ট।”

সুহাস লজ্জায় মাথা হেঁট করে।

সত্য তাকিয়ে দেখে।

রূপে গুণে যেন আলো করা মেয়েটা! কিন্তু, কিন্তু গুণ কি ছিল এমন ?

সত্যর মনে পড়ে প্রথম দিনকার কথা। কী উদ্ধত অনমন, ভেতর-চাপা, মুখ-গোঁজা গোছের স্বভাব ছিল সুহাসের। প্রতিনিয়ত তাকে নিয়ে অসুবিধেয় পড়তে হয়েছে সত্যকে। নেহাৎ যে সত্য নিজেকে সামলে থেকেছে, সে শুধু মেয়েটা সদ্য-মাতৃহারী বলে আর তার ওপর মায়ের মৃত্যুটা বড় মর্মান্তিক বড় আকস্মিক বলে।

ক্রমশ সুহাসের প্রকৃতিতে এসেছে নম্রতা, সভ্যতা, কোমলতা। দণ্ডবাড়ির দরুন বহুবিধ বদভ্যাস, যা সত্যকে পীড়িত করত, বিরক্ত করত, সেগুলো অন্তর্হিত হল আশ্তে আশ্তে, একটা মেয়ের মত মেয়ে হয়ে উঠল সুহাস।

তবে স্বভাবটা একটু গম্ভীর, চাপা।

হৃদয়-বৃত্তির বহিঃপ্রকাশটা কম। আনন্দ-বেদনা, সুখ-দুঃখ, খুশী-অখুশী বোঝা যায় না ফট করে, বোঝা যায় না শ্রদ্ধা কৃতজ্ঞতা স্নেহ। তাই আজ হৃদয়বৃত্তির এই প্রকাশটুকুতে বড় বেশী পরিতৃপ্ত হয় সত্য।

সুহাসের ওই লজ্জানত মুখের দিকে তাকিয়ে বলে, “তা আমার এত দেবির কেন, তা তো জিজ্ঞেস করলি না কই ?”

সুহাস মৃদু হেসে বলে, “জিজ্ঞেস করতে যাব কেন ? বলবার হলে তুমি নিজেই বলবে।”

“বলবার হলে ? শোন কথা!” সত্য বলে, “বলবার নয়, এমন কাজ তোর পিসি করে বেড়ায় বুঝি ?”

“বাঃ, তাই বলেছি নাকি ? বলেছি—”

তা সুহাসের আর কথার শেষটা বলা হল না, উঠানের দরজা ঠেলে দুই মূর্তিমান ঢুকলেন। নবকুমার আর নিতাই।

দুজনের মুখ থেকেই একটা করে সম্বোধন বেরোল।

“বড়বৌ!”

“বৌঠান ?”

সত্য মাথার কাপড়টা একটু টেনে উঠে দাঁড়ায়।

নবকুমার বসে পড়ে।

বসে পড়ে বলে, “কী ব্যাপার তোমার বড়বৌ ? ভরদুপুরে রোজ তুমি যাও কোথায় ? আজই বা এতক্ষণ ছিলে কোথায় ? তোমার এসব রীতনীত তো ভালো ঠেকছে না আমার ?”

সত্য এক মুহূর্ত নবকুমারের সেই বিপর্যস্ত মূর্তির দিকে তাকিয়ে, একটু মুখ টিপে হেসে বলে, “তাই বুঝি ? আমার রীতনীত আর ভাল ঠেকছে না তোমার ?”

হাসি!

সত্য হাসছে!

তার মানে, হয় তার মনে কোনও অপরাধ-বোধ নেই, নয় সে পাকা ঘুষ। নিতাইয়ের জ্ঞান থাকে না যে সে হাঁ করে সেই চাপা হাসিতে উজ্জ্বল অর্ধাণুষ্ঠিত মুখের দিকে তাকিয়ে আছে এবং রীতিনীতির দিক দিয়ে সেটাও খুব শোভন নয়।

নবকুমার কিন্তু এখন বিহ্বল নয়। এই এতক্ষণার উদ্বেগ অশান্তি দুশ্চিন্তা সব কিছুই যন্ত্রণা তার রাগের ঝাঁজ হয়ে ফুটে ওঠে। সত্যর হাসিটা তাতে ইন্ধন যোগায়। তাই এবার তেড়ে দাঁড়িয়ে উঠে বলে; “না, ঠেকছে না। আমার মনে হচ্ছে তোমার মতিবুদ্ধি মন্দপথে যাচ্ছে।”

শুধু নবকুমার থাকলে সত্য দম্প করে উঠত কিনা কে জানে, কিন্তু এখন সঙ্গে নিতাই। ওর সামনে রেগে উঠলে মান থাকে না। তাই সত্য তেমনি ভাবেই বলে, “তা তোমার যখন মনে হচ্ছে, তখনই অবিশ্যি তার একটা ন্যায্য কারণ আছে। বিজ্ঞ বিচক্ষণ পুরুষ তুমি। তা হলে এখন এই দুট্ট পরিবারকে নিয়ে কি করবে বল ? অগ্নিপরীক্ষা ? না কেটে গঙ্গায় বিসর্জন ?”

এ কী দুঃসহ স্পর্ধা! নবকুমারের মুখে কথা যোগায় না।

নিতাই এতক্ষণে কথা বলে।

বলে, “কিন্তু বৌঠান, আপনি যে আমাদের ধাঁধায় ফেলে মজা দেখছেন, তারও তো একটা বিহিত চাই। এই আজ বিকেল থেকে ও হতভাগার কী গেরো! আর আমিও আজ এই সমগ্র দিনটা না খাওয়া, না দাওয়া, তার ওপর বৌয়ের কাছে মুখ হেঁট—”

“ওমা! ধাঁধায় যে তুমিই আমাকে ফেলছ ঠাকুরপো! স্ত্রীমার খাওয়াদাওয়াতেই বা আমি হস্তারক হলাম কি করে ? আর বৌয়ের কাছে মুখ হেঁট হবার দায়ীকই বা হলাম কেন ? কিছু তো বুঝতে পারছি না!— মুখ তো দেখছি কড়ি হয়ে গেছে!”

বেচারি নিতাই, উপোস সে একবারে সহ্য করতে পারে না, সেই উপোস আজ সারাদিন, তার উপর এত রকম কথাবার্তা, সর্বোপরি এই স্ত্রীমার, তার চোখের স্নায়ু দুর্বল হয়ে বিশ্বাসঘাতকতা করে বসে। আর সেই বিশ্বাসঘাতকতার লজ্জাটা ঢাকতে সে তার বৌয়ের কাছে হেঁট হয়ে যাওয়া মাথাটা আর একবার হেঁট করে।

“নাঃ, এই দুটি বড়ো খোকা হয়েছেন সমান,” সত্য এবার ব্যঙ্গের রূপ ছেড়ে সদয় রূপে আসে, “এই অবুঝপনার জন্যেই আমাকেও বড়ো বয়সে ছলচাতুরী ধরে মরতে হচ্ছে।... কিন্তু তার আগে ঠাকুরপো, কিছু খাও দিকি, মনে হচ্ছে বৌয়ের সঙ্গে ঝগড়া করে হরিমটর চালিয়েছ আজ।... সুহাস, আগে তোর ছোট পিসেমশাইকে একটু কিছু খেতে দে তো—”

“না না, আমার কিছু লাগবে না—”, বলে প্রতিবাদ করে ওঠে নিতাই।

সত্য মৃদু হেসে বলে, “লাগবে কি না লাগবে সে কি তুমি বুঝবে ?”

সুহাস বিনা বাক্যে দুখানি ঝকঝকে কাঁসার রেকাবে দুই পিসের জনোই খাবার এনে ধরে দেয়। বাড়িতে মজুত খাবার যা হয়, দুটি নারকেলনাড়ু খানচারেক জিবেগজা আর একবাটি মুড়ি।

হঠাৎ নিতাইয়ের ভারী দুঃখ হয়। তার ঘরেও তো এমন কিছু অপ্রতুল নেই, অথচ এমন পরিপাটিত্ব কোন সময় চোখে পড়ে না। এই যে নবকুমার মাঝে মাঝে যায়, কই নিতাইয়ের বৌ তো কোনদিন এক গেলাস জল এগিয়ে দেয় না ? খিদে দুর্দমনীয় হলেও, হাত বাড়িয়ে নিতে ইচ্ছে হচ্ছে না যেন!

নবকুমারও ভারী মুখে বলে, “আমার খাবার দরকার নেই।”

সত্য গম্ভীরভাবে বলে, “তোমাদের দরকারে তো খেতে বলা হচ্ছে না, আমার দরকারেই বলা হচ্ছে। খাও, আমি বসে বসে আমার অপরাধের জবানবন্দী দিচ্ছি।”

অগত্যা দুজনকে হাত বাড়াতে হয়।

সত্য বলে, “রোজ কোথায় যাই, সে বিস্তারিত সুহাস জানে, ছেলেরা জানে, জান না শুধু তুমি। জানাব তোমাকে, তবে তার আগে কথা দিতে হবে, যে কাজ করছি নিষেধ করবে না।”

“বাঃ! এ যে সাদা কাগজেই সই—”, নবকুমার বলে, “কাজটা ভাল কি মন্দ না জেনে—”

সত্য এক মুহূর্ত চুপ করে থেকে শান্ত স্থির গলায় বলে, “তাকাও আমার দিকে। দু বকু আছ, দুজনেই তাকাও, পষ্ট তাকিয়ে বল, আমি একটা মন্দ কাজ করছি, এ সন্দেহ সত্যি আছে তোমাদের মনে ? বল তবে আমি তোমাদের কথার উত্তর দেব।”

বলা বাহুল্য দু বকুর কেউই চোখ তুলে তাকায় না, বরং দুজোড়া চোখ একেবারে নতমুখী হয়ে যায়।

সত্য একটু অপেক্ষা করে বলে, “বুঝলাম। শোন, রোজ দুপুরে আমি পাঠশালে পড়াতে যাই।” নবকুমার একবার চোখ তেলে।

চমকে! শিউরে!

নিতাইও প্রায় তাই। বলে, “পড়াতে।”

“হ্যাঁ, পড়াতে। সর্বমঙ্গলাতলায় রোজ দুপুরে মেয়েমহলের একটা আড্ডা হয়। গিল্পী, মাঝবয়সী। বৌ ঝি আছে দু-একজন। সাধ করে কেউ বা মায়ের ফুল বিলপন্তর বেছে রাখেন, কেউ বা মালা গাঁথেন, একজন আছে মুখে মুখে পুরাণ-কাহিনী রামায়ণ-মহাভারতের কাহিনী বলেন, পাঁচজনে শোনে। আবার গালগল্পও খুব চলে। এটা দেখে মাস্টার মশাইয়ের মাথায় এসে গেল—”

আবার মাস্টার মশাই!

নবকুমারের মুখটা বিকৃত হয়ে ওঠে। সত্য সেটা দেখেও দেখল না, বলতে লাগল, “মাথায় এসে গেল এই মেয়েমানুষদের নিয়ে একটা পাঠশালা খুললে কেমন হয়, বৃথা গালগল্পে সময় নষ্ট না করে— খুলে দিলেন ‘সর্বমঙ্গলা বিদ্যাপীঠ’! আমায় ধরলেন পড়াতে। বললেন, ‘গুরুকে এবার গুরুদক্ষিণা দাও, পড়াও এদের।’ দেখলাম কাজটা পুণ্যের, বললাম, ‘বেশ’।”

“বললাম বেশ!” নবকুমার চঞ্চল হয়ে বলে ওঠে, “আমাকে একবার শুধোবারও দরকার নেই ?”

“আহা, সে অপরাধ তো একশোবার স্বীকার করছি, কিন্তু তুমি যদি ‘দুম’ করে দিবি দিয়ে বসতে ? সে ঠেলে তো আর করা হত না ? তাই মা সর্বমঙ্গলার নাম করে লেগে গেলাম।... বই খাতা শেলেট সব মাস্টার মশাইয়ের খরচ।”

“তোমার এত বিদ্যে যে মাস্টারি করতে এগোও।”

নবকুমারের এই ব্যঙ্গোক্তি সত্য মদু হেসে বলে, “মাস্টারি করা তো সত্য বামনীর জন্মগত পেশা গো, আজন্ম তো মাস্টারি করে এলাম। ছুড়ীবের দোষেই এগিয়ে পড়লাম। আর বিদ্যের ? সে ওই পড়াতে পড়াতেই এগোবে। যতটুকু পারি ততটুকুই করে যাব।”

নিতাই আস্তে আস্তে বলে, “বয়স ওলী মেয়েরা পড়ায় মন দিচ্ছে ?”

“খুব খুব! দু-একজন বাদে শিখেও ফেলেছে চটপট! দেখলে বুঝতে, নিজেরা রামায়ণ-মহাভারত পুরাণকাহিনী পড়বার জন্যে কী আগ্রহ! দেখে মনে হয় জীবন সার্থক হচ্ছে আমার।”

নবকুমারের মুখ তথাপি হালকা হয় না। বলে, “মাস্টার মশাই যে ধর্মের মাথায় ঝাড়ু মেঝে বেঘ্ন হয়েছে, সেকথা নিশ্চয় জানে না ওরা ?”

“জানবে না কেন ? তবে তোমার মতন সবাই অত গোঁড়া নয়। মাস্টার মশাইয়ের হাতে ভাত তো খেতে যাচ্ছে না কেউ। আর ধর্মের মাথায় ঝাড়ু মারাই বা বলছ কেন ? ব্রাহ্মধর্মও হিন্দুধর্ম। কান দিয়ে শোন না তো কিছু ? এই যে আজ অত বড় ব্রাহ্মসমাজের চাঁই কেশব সেনের বাড়ি পরমহংস এসেছিলেন—”

“কী কী! কোথায় কে এসেছিলেন ?”

নবকুমার কাছা খুলে দাঁড়িয়ে ওঠে।

“পরমহংসদেব,— বলি তাঁর নামটাও কি শোন নি কখনো ?”

“শুনব না কেন ?” বেজার মুখে বলে নবকুমার, “দক্ষিণেশ্বরে দেখেও তো এসেছি সেবার আপিসের বন্ধুদের সঙ্গে। তা তিনি—”

“হ্যাঁ, তিনি। কেশব সেনের বাড়িতে এসেছিলেন। সেই দেখতেই তো আজ আমার এত দেরি, আর তোমাদের কাছে সব ফাঁস!”

নবকুমার স্তম্ভিত দৃষ্টিতে কিছুক্ষণ তাকিয়ে থেকে বলে, “তোমাকে আর কিছু বলবার নেই আমার বড়বৌ, তুমি আমার নাগালের উর্ধ্বে চলে যাচ্ছ। কিন্তু কেশববাবুর বাড়ি গেলে কি করে ?”

“কি করে আবার ? একা নাকি ? আরও কত মেয়েমানুষ গেল। দল করে শেয়ারের ঘোড়ার গাড়ি ভাড়া করে— যেখানে দল, সেখানেই বল। কত চমৎকার গান হল, প্রাণ যেন জুড়িয়ে গেল।”

“বুক কাঁপল না ?”

“বুক কাঁপবে কেন ?” সত্য অবাধ দৃষ্টিতে বলে, “এই যে মেয়েমানুষেরা তীর্থে যায়, যোগে গঙ্গাস্নান করতে যায়, দেবস্থানে মেলা দেখতে যায়, সাধুসন্নিসী দর্শনে যায়, কই বুক কাঁপার কথা ওঠে না! এসব জায়গায় মাঝে মাঝে যেও গো, তা হলে দিগ্টিটা খুলবে।”

“আমরা যাব ? হুঁ!” নবকুমার বলে, “আমরা ‘ক্ষুদ্র প্রাণী’, আমাদের অত সাহস কোথা ?”

সত্য উঠে পড়ে বলে, “নিজেকে চকিশ ঘন্টা ‘ক্ষুদ্র প্রাণী’ ভাবলেই মনটা ক্ষুদ্র হয়ে যায়। ক্ষুদ্রই বা ভাবতে যাব কেন ? সব মানুষের মধ্যেই ভগবান আছেন, এটা মানো তো ? সেই ভগবানের জোরেই জোর। সেই ক্ষেত্রে সবাই বড়।”

নিতাই সন্তর্পণে একটা নিঃশ্বাস ফেলে।

তার বৌকে সে বৌঠানোর কাছে আসতে বলে। সাতজন্য পার করে এসেও নিতাইয়ের বৌয়ের সাধ্য হবে এসব চিন্তা করতে ?... নবকুমার ঠিকই বলেছে, সত্য যেন তাদের নাগালের উর্ধ্বে চলে যাচ্ছে।

নবকুমার তাই টেনে নামাতে চেষ্টা করে, “তা সে যাই হোক, বেহুবাড়ি থেকে এসে কাপড়-চোপড় ছেড়েছ ? মাথায় একটু গঙ্গাজল স্পর্শ করেছ ?”

সত্য মৃদু হেসে বলে, “সেটা করেছি বাড়ির জন্য নয় গাড়ির জন্যে। গাড়ির কাপড়ে কোনকালেই থাকি না। ভেবেচিন্তে বুঝি এই মাথায় আনলে এতক্ষণে ?... যাক, ছেলেরা কবে আসবে? ওরা নেই, বাড়ি ফাঁকা ফাঁকা ঠেকছে—”

নবকুমার বেজার মুখে বলে, “তোমার আবার ফাঁকা ঠেকা! তোমার মনপ্রাণ তো সব তত্ত্বজ্ঞানে ঠাসা। সেখানে আবার স্বামী-পুত্রের জায়গা কোথা ? বেশ বুঝছি তোমার বাপের মতই কাঠ-কঠিন হয়ে যাবে তুমি—”

সত্য শান্ত গলায় বলে, “বাবার মতন ? বাবার চরণের নখের এক কণা হতে পারলেও ধন্য মনে করব নিজেকে।...কিন্তু আজ আবার এ কথা কেন ? নিজে মুখই তো বলেছিলে, ‘বাবা মানুষ নয়, দেবতা’।”

“সেকথা এখনও বলছি। কিন্তু দেবতাকে দূরে থেকে পুষ্পাঞ্জলি দেওয়াই ভাল, নিয়ে ঘর করায় কোন সুবিধে নেই।”

সত্য হেসে ফেলে বলে, “দেখ ঠাকুরপো, তোমার বন্ধুর কত উন্নতি হয়েছে! কত বাকি শিখেছেন!”

আর নিতাই এতক্ষণে কিঞ্চিৎ ধাতস্থ হয়ে বলে, “না শিখলে তো শান্তরই মিথ্যে বৌঠান! সদগুণ বলে কথা—”

কথার মাঝখানে হঠাৎ সুহাস পাশের ঘর থেকে এসে বলে, “কে যেন আসছেন মনে হচ্ছে।”

পাশের ওই ঘরের দুটো জানলাই রাস্তামুখো, সুহাস খুব সম্ভব সেখানেই দাঁড়িয়েছিল।

এরা সন্ত্রস্ত হয়ে বলে, “কে ? কে আসছেন ?”

“চিনি না। বুড়ো মতন, কিন্তু খুব লম্বা,—ফর্সা—সোজা—”

লম্বা ফর্সা সোজা—

সত্যর বুকটা ছাঁৎ করে ওঠে। আর পরক্ষণেই সেই ছাঁৎ-করা বুকটা হিম করে দিয়ে উঠানের ওধার থেকে একটি মৃদু গম্ভীর ভারী গলায় প্রশ্ন ধ্বনিত হয়, “বাড়িতে কে আছেন ?”

“বাবা!”

সত্য বিদ্যুৎগতিতে ঘর থেকে বেরিয়ে আসে। তারও আগে নিতাই বেরিয়ে পড়ে, পিছনে নবকুমার। আর ততক্ষণে সেই মৃদু গম্ভীর ভারী গলায় আর একটি প্রশ্ন উচ্চারিত হয়, “এইটাই কি নবকুমার বন্দ্যোপাধ্যায়ের বাড়ি ?”

“বাবা! বাবা গো! তুমি!”

সত্য প্রশ্ণামের মাথাটা না তুলেই বলতে থাকে, “আমার যে সত্যি বলে বিশ্বাস হচ্ছে না—”

“তবে স্বপ্নই ভাব।” বলে মৃদু হেসে রামকালী দাওয়ায় ওঠেন।

নবকুমার নিতাই দুজনেই প্রশ্ণাম করে। আর মনে মনে ভাবে, অনেক দিন বাঁচবেন ইনি। ঠিক যে মুহূর্তে গুঁর কথা হচ্ছিল, সেই মুহূর্তেই এমন আকস্মিক এসে পড়া—

আবেগের উচ্ছ্বাস প্রশ্ণমিত হতে এবং কুশল বিনিময় হতে কিছুক্ষণ যায়। তারপর আসার কারণ ব্যক্ত করেন রামকালী। তিনি কাশীবাসের সংকল্প করেছেন, তাই শেষ একবার সত্যকে দেখতে এসেছেন।

কাশীবাস!

সত্য ভেঙে পড়ে বলে, “বাবা! এই সংকল্প করছে তুমি? তাই এই হতভাগা মেয়েটাকে দেখা দিতে এসেছ? আমি যে কিছু জানি না বাবা, তাহলে সব ফেলে ছুটে চলে যেতাম তোমার কাছে!”

রামকালীর এই আকস্মিক আবির্ভাবে সত্য যেন তার চির-অভ্যস্ত স্থিরতা হারিয়ে ফেলতে বসেছে।

একে তো অপ্রত্যাশিত আনন্দের আবেগ, তার সঙ্গে অন্তর্নিহিত এক চিন্তা—তাদের এই বাসাবাড়িতে বাবা জলগ্রহণ করবেন কিনা। জলও তো কলের জল। যদি এ জল না খান, না হয় গঙ্গাজলেরই ব্যবস্থা করবে, কিন্তু বাসাবাড়ির দোষ খণ্ডাবার উপায় কি?

গেরস্তবাড়িতে গুরু আসা দেখেছে সত্য, সেভাবে করতে পারে, কিন্তু বাবা কি সেই অতি যত্ন অতি সেবা নেবেন? এই সব চিন্তার সঙ্গে উপচে উঠছে এক অব্যক্ত বিচ্ছেদ-ব্যাকুলতা।

বাবাকে সে নিত্যা দেখছে না সত্যি, কিন্তু জানে বাবা রয়েছেন, সত্যর সেই চির-পরিচিত পরিবেশের মাঝখানে বাবার চিরঅভ্যস্ত জীবনে।

কিন্তু কাশীবাস!

সে যে চিরবিবাহের সমতুল্য। এ তো এক প্রকার মৃত্যু। কাশীবাসের সংকল্প মানেই সংসার থেকে মুখ ফিরোনে। সাতপাঁচ চিন্তায় সত্যর কণ্ঠে এই আবেগ, এই আকুলতা!

রামকালী বোঝেন।

তাই রামকালী এই অস্থিরতাকে ঈষৎ প্রশয়ের দৃষ্টিতে দেখেন। আর মেয়ের কথার উত্তরে মৃদু হেসে বলেন, “তুমি যাও নি, আমিই তোমার কাছে এলাম। একই কাজ হল।”

প্রণামান্তে নিতাই চলে গিয়েছিল, নবকুমার সত্যর কথা বলার সুবিধের জন্যে একটু তফাতে গিয়ে বসেছে। সত্য তাই স-আক্ষেপে বলে, “দুই কি আর এক হল বাবা? সে আমি বাপের মেয়ে বাপের কাছে গিয়ে পড়তাম, আগের ছোটটি হয়ে যেতাম।” যা প্রাণ চায় বলতাম। আর এ তুমি কুটুমবাড়ি এসেছ, আমি পরের ঘরের বৌ, আমার প্রতিপদে বাধা। কী বা বলব, কী বা কইব!”

নবকুমার তফাতে বসলেও এতো তফাতে নবকুমার সত্যর বাক্যাবলী তার কর্ণগোচরিত হতে কোনও বাধা হচ্ছে। সে সহসা নৈর্ব্যক্তিক স্বগণ্ডোক্তি করে ওঠে, “হায় ভগবান! প্রতি পদে বাধা! পা আরো অবাধ হলে কি যে হত।”

রামকালী সচকিত হয়ে বললেন, “কী বললে বাবাজী?”

নবকুমার গম্ভীর গলায় বলে, “না, এমন কিছু নয়। তবে নাকি আপনার মেয়ে আক্ষেপ করছেন, প্রতিপদে বাধা, তাই বলছিলাম। আপনার নিত্যানন্দপুরে এমন কোন মেয়েটা আছে, আর আমাদের বারুইপুরে এমন কোন বৌটা আছে, যে আপনার মেয়ের সমতুল্য স্বাধীন, তাই বরং জিজ্ঞেস করুন।”

রামকালী অনুভব করেন নালিশের সুর।

তাই মৃদু হাসেন।

বলেন, “তা যদি হয় সেটা তো ভালই। আমার মেয়ে যে ‘ঝাঁকের কৈ’ হবার জন্যে জন্মায় নি, সে আমি তার শৈশবকালেই বুঝেছি।”

সত্য তার বাপের উপস্থিতি স্বামীর উপস্থিতি ইত্যাদি মানতে পারে না, ঘোমটাটা আর একটু টেনে বলে, “আচ্ছা বাবা, তুমি এই ভেতেপুড়ে এসেছ, এ সময় নালিশ ফোরেন্দ করতে বসটা খুব ভাল হচ্ছে? থাকবে তো দু’চার দিন, পরে যত খুশি—”

“ওরে বাবা! দু’চার দিন কি রে? একটা দিনের জন্যে চলে এলাম। কাল যাবো।”

“একটা দিন! বাবা, মাস্তুর একটা দিনের জন্যে এলে তুমি?” সত্য কেঁদে ফেলে, “তোমার সঙ্গে যে আমার অনেক কথা—”

হ্যাঁ, বাবার সঙ্গে সত্যর অনেক কথা।

কতদিন ভেবেছে চিঠি লিখে সব বলে বাবাকে, প্রশ্ন করে— কোনটা ঠিক, কোনটা ভুল, কিন্তু লিখতে গিয়ে দেখেছে অগাধ কথা; এত কথা কি চিঠিতে লেখা যায়? তা ছাড়া উত্তর-প্রত্যুত্তরের মধ্যে বক্তব্য বোঝানো যায়, শুধু একতরফা পেশ করা যেন কৈফিয়ত দাখিল করা।

বাবা যদি উত্তরে লেখেন, এত কথা আমায় লেখার উদ্দেশ্য কি?

অথচ ব্রাহ্মধর্ম কি, কোন একজন চিরহিতৈষী গুরুজন যদি হঠাৎ ব্রাহ্মধর্ম নিয়ে বসেন, তাঁকে ত্যাগ করাই সমীচীন কিনা, “গেরস্তঘরের মেয়ে, অথবা গেরস্তঘরের বৌ”, এই অপরাধে জগৎ-

সংসারের সকল প্রকার কাজ থেকে তাদের বঞ্চিত হওয়াই বিধি কিনা, স্বামী যদি হিতাহিতে অন্ধ হন, মেয়েমানুষের সেই অন্ধপথেই চলা নিয়ম কিনা, এমন অনেক প্রশ্ন তো আছেই, সর্বোপরি প্রশ্ন শঙ্করীর মেয়ের প্রশ্ন। শঙ্করীর কথা বলে যখন বাবাকে চিঠি লিখেছিল, তখন রামকালী উত্তর দিয়েছিলেন, “যে যত বড় অপরাধেই অপরাধী হোক, সে যদি অনুতপ্ত হয়ে থাকে, তাকে ক্ষমা করাই কর্তব্য। তা ছাড়া তোমার বিবেচনার ওপর আমার আস্তা আছে।”

সুহাস সম্পর্কে কোন্ সিদ্ধান্ত গ্রহণ করবে, এ একবার বাবাকে জিজ্ঞেস করবার তার বিশেষ ইচ্ছে।

কিন্তু বাবা কিনা একদিন মাত্র থাকবেন ?

তার মানেই সত্যর এই বাসাবাড়িতে তিনি খাওয়া-মাথা করবেন না। হয়তো ফলমূল আর গন্ধাজল খেয়েই একটা বেলা কাটিয়ে দেবেন। সত্যর আর পিতৃসেবার পুণ্য হবে না। এত সব উদ্ভাস মনের মধ্যে আলোড়িত হতেই চোখের জল বাঁধ মানে না।

রামকালী আস্তে তার মাথায় একটু স্পর্শ রেখে বলেন, “একটা দিনই কি কম হল রে ? কত কথা বলবি, বল না ?”

“আর কথা! আমার তো শুধু উপচে উপচে কান্নাই আসছে বাবা!”

আঁচল ভিজে জব্বাবে হয়ে ওঠে সত্যর।

অনেকক্ষণ পরে প্রশমিত হয় সে কান্না। কথাও হয়। যত কিছু বলার ছিল সব বলে ফেলে সত্য, তার চিরদিনের ধ্রুবতারার কাছে।

রামকালী নবকুমারকে মৃদু ভর্সনা করেন। বলেন, “সে কি! মাস্টার মশাই তোমার চিরহিতৈষী, তাঁকে ত্যাগ করবে কি ? তাঁর ধর্ম, বিশ্বাস তাঁর কাছে। এই যে আমি, আমি শাক্ত কি বৈষ্ণব, এইটা কি দেখতে যাবে তোমরা ? না দেখবে— বাবা ? গুরু, শিক্ষক এঁরাও তেমনই পিতৃতুল্য। তা ছাড়া তিনি তো তাঁর ধর্ম বিশ্বাস তোমার ওপর চাপাতে আসছেন না ? তোমার কোনো অনিষ্ট আসছে না তা থেকে ? তবে ?”

সত্যর ওই পাঠশালায় পড়ানো শুনে রামকালী কিছুক্ষণ চুপ করে থেকে আস্তে একটি নিঃশ্বাস ফেললেন। তারপর বললেন, “সত্য, তোর মাকে তোর মনে পড়ে ?”

“মাকে মনে পড়ে না ? কী বলছ বাবা ?” সত্যর সত্যর চোখ উপচে ওঠে।

“না, তাই বলছি। তোর মা থাকলে, একথা শুনে ভয় পেত, বুঝলি ? নির্যাত ভয় পেত। আবার আড়ালে বলতো, আমি জানি ও আমার স্বপ্নজন্মা মেয়ে।”

উত্তর পেয়ে যায় সত্য। তার কাজ ভুল কি ঠিক জেনে যায়।

শুধু সুহাসকে নিয়ে কিছুক্ষণ আলোচনা চলে। কিছুটা বাদ-প্রতিবাদও বুঝি। তখনও সত্য সুহাসকে সামনে আনে নি রামকালীর।

রামকালী বলতে চাইছিলেন, বিয়ের চেষ্টার প্রয়োজন কি ? বেশ তো, লেখাপড়া শিখছে ভাল কথা। নিজের জীবিকা নিজে অর্জন করতে পারে, সেটা মঙ্গল। কলকাতায় তো আজকাল এ রকম হচ্ছে। বিদ্যুষ্টি মেয়েরা গৃহশিক্ষয়িত্রী হয়ে অথবা মেয়েস্কুলে পড়িয়ে উপার্জন করছে!

“কিন্তু বাবা—”, সত্য বলে “মা-টা তো চিরদুর্গমিনী হয়ে দুঃখে-দুঃখেই মরল। মেয়েটাও কোনদিন ঘর-সংসারের মুখ দেখবে না ?”

“মা-বাপের প্রায়শ্চিত্ত তো সন্তানকেই করতে হয় সত্য।”

“আর যদি ইচ্ছে করে কেউ ওকে বিয়ে করতে চায় ?”

রামকালী মাথা নেড়ে বলেন, “কে চাইবে ? একে তো জন্মের গোড়াতেই অত বড় গলদ, তার ওপর মেয়ের যথেষ্ট বয়স হয়ে গেছে, বিধবা কি কুমারী তারও নিশ্চয়তা নেই—”

সত্য তখন নিজের গোপন ইচ্ছে ব্যক্ত করে। মেয়েটাকে যদি ব্রাহ্মধর্ম গ্রহণ করিয়ে ব্রাহ্মসমাজের কোনও সমাজ-সংস্কারক পরহিতৈষী যুবকের হাতে তুলে দেওয়া যায়! সুহাসের যোগ্য বয়সের অবিবাহিত ছেলে ও সমাজে পাওয়া যায়।

রামকালী যেন এ প্রস্তাব সমর্থন করেন না। তুচ্ছ একটা মেয়ের বিয়ে বিয়ে করে এত কাণ্ড দরকার কি, এই যেন তাঁর মত। তাই সহসা গম্বীর হয়ে গিয়ে বললেন, “যদি জিজ্ঞেসই করছ তো তা হলে বলি, একটা খুঁতগলা বয়সের ধারা বাড়িয়ে চলে লাভ কি ?”

“লাভ ওই মেয়েটার সংসার। মেয়ে বলেই কি ‘তুচ্ছ’ বাবা ? একটা মানুষের জীবন তো ?”

“মানুষের জীবন শুধু ভোগেই সার্থক নয় সত্য, ত্যাগেও সার্থকতা আছে। ও তো জানে ও বিধবা, বালবিধবার যেমন ভাবে জীবন কাটে—”

“কী ভাবে আর তাদের কাটে বাবা!” সত্য হতাশ নিঃশ্বাস ফেলে বলে, “চিরদুঃখেই কাটে। পিসঠাকুমার মতন আর ক’জন হয়? তাও তিনিও মনের দাহয় শুচিবাই করে বিশ্বসুদ্ধ লোককে অতিষ্ঠ করেছেন—”

রামকালী সহসা স্তব্ধ হয়ে যান। যেন মোক্ষদাকে চোখের ওপর দেখতে পান। পূর্বের সেই সুবর্ণবর্ণা তীব্র দীপ্তময়ীকেও দেখেন, আর তার পিছনে—কায়ার পিছনে ছায়ার মত, সূর্যের পিছনে রাহুর মত, বর্তমানের রোগজীর্ণ মোক্ষদার শ্রেতাঙ্কাকেও দেখতে পান। যে মোক্ষদা এখন ভীমরতি হয়ে যা-তা করে বেড়াচ্ছেন। লুকিয়ে-চুরিয়ে খাবার জন্যে নাকি সর্বদা ছোক ছোক করে বেড়ান তিনি, “দেখ, তোর, না দেখ মোর” নীতিতে মুঠো করে মাছভাজা নিয়ে মুখে পুরে বসে থাকেন!

আর সারদা রাতদিন গালমন্দ করে টেনে টেনে নিয়ে গিয়ে পুকুরে চুবিয়ে আনে।

একথা তবু জানে না সত্য।

সত্য সেই শুচিবাইটাই জানে।

রামকালী একটু চুপ করে থেকে বলেন, “দেখ, তেমন পরোপকারী ভাল ছেলে যদি পাও।”

“তোমার আশীর্বাদ না পেলে, এত বড় কাজ করতে ভয় পাচ্ছি বাবা। তুমি মন খুলে সায় দিয়ে যাও—”

রামকালী একটু হেসে বলেন, “মন কি ঘরের জানলা-দরজা সত্য, যে গায়ের জোরে খোলাবি? তবে—আশীর্বাদ আমি করছি। তোর কাজে ভগবান সহায়।”

সত্যর আশঙ্কাই ঠিক।

রামকালী সামান্য কিছু ফলমূল গ্রহণ করেন এবং জানান পরদিনও তাঁর পূর্ণিমার ব্রত।

“এই বুঝেই তা হলে তুমি এসেছ বাবা?” সত্য কাঁদে কাঁদে হয়ে বলে, “আমি তোমার এমন অধম মেয়ে যে জীবনে একদিন রেঁধে ভাত দিতে পারলাম না।”

রামকালী সহসা একটি গভীর নিঃশ্বাস ফেলে বলেন, “জীবনের কথা কি এখন বলে শেষ করে ফেলা যায় সত্য? জীবনের পরিণতি গুহার অন্ধকূলে।”

তারপর বলেন, “এত কথা হল, কই সে মেয়েটাকে তো দেখলাম না?”

“কি জানি বাবা, কি লজ্জা ঢুকেছে তার মনে, চৌকিতে পড়ে কাঁদছে।”

কাঁদছে! রামকালী একটু চকিত হন।

আর কিছু বলেন না।

কিন্তু পরদিন সকালে যখন স্নান-আফিক সেরে বসেছেন, তখন সুহাস মাথা নীচু করে এসে আশ্তে আশ্তে প্রণাম করে রামকালীকে।

পূব জানলা দিয়ে সকালের আলো এসে মেয়েটার মুখে পড়ে যেন তাকে একটা স্নিগ্ধ কৌমাৰ্যের দ্যুতিতে স্নান করিয়ে দিয়েছে। আর নম্র অথচ দৃঢ় মুখের রেখায় একটি প্রত্যয়ের আভা। পাতলা ঋজু দীর্ঘ দেহের গড়নেও সেই প্রত্যয়ের দৃঢ়তা।

রামকালী বুঝি এমনটি আশা করেন নি।

রামকালী যেন বিচলিত হন। ... হঠাৎ বহুদিন পূর্বের একটি কথা মনে পড়ে যায় তাঁর। মনে পড়ে যায়, পুকুরঘাটের ধারে বসে থাকা একটা বিধবা মূর্তি। কেমন সেই মূর্তি, রামকালী কি দেখেছিলেন?

মাথায় হাত ঠেকিয়ে আশীর্বাদ করেন রামকালী।

তার পর গভীর শান্ত গলায় বলেন, “সত্য, এ যে তপস্বিনী উমা!”

সত্য হাসি হাসি মুখে সুহাসের মুখের দিকে তাকায়। এ প্রশংসা যে তারই। সুহাস যে তার হাতে গড়া প্রতিমা।

কচি নয়, শিশু নয়, পনেরো বছরের ধাড়ী মেয়েটাকে কাছে এনেছিল সত্য, তারা বহুবিধ অশিক্ষা কুশিক্ষা আর চরিত্রগত বহু দোষের সমষ্টি সমেত।

এই ক’বছরে মাত্র ভেঙেচুরে গড়েছে সেই মেয়েকে।

অবশ্য প্রকৃতির নিয়মে তার নিজের ভিতরেও একটা প্রবল ভাঙগড়ার কাজ চলেছে। মায়ের ওই আকস্মিক বীভৎস মৃত্যু, এবং তার পরবর্তীকালে মায়ের জীবন-ইতিহাস জানার ফলে সেই বিরাট ওলট-পালটটা সংঘটিত হয়েছিল।

তার পর এসেছে সুহাসের নবজন্মের পালা।

কোথায় দণ্ডদের বাড়ির সেই বিলাসিতায় আবিল অভূত আবহাওয়া, আর কোথায় সত্যর দৃঢ় চরিত্রের দৃষ্টান্ত! তা ছাড়া স্কুলের জীবন! সে যেন স্বর্গের জগৎ!

সুহাসের প্রকৃতিই শুধু বদলায় নি, আকৃতিও বদলেছে। যেমন বাচাল মেয়েটা মিতভাষিনী হয়ে গেছে, তেমনি হঠাৎ লম্বা হয়ে গিয়ে গোলগাল পুটদেহ মেয়েটা হয়ে উঠেছে বেতের ডগার মত ছিপছিপে লম্বা পাতলা। একটু বুঝি কুশই।

যে কুশতাকে দেখে উপস্থিতী উমার তুলনা মনে পড়েছে রামকালীর।

সত্য হাসি হাসি মুখে বলে, “পর পর দু বছর ফার্স্ট হল—।”

“সত্যি নাকি!” বলেন রামকালী।

সুহাস বোধ করি লজ্জা পেল। মৃদু কণ্ঠিত একটু হাসি হেসে বলল, “দাদুর নাতিদের ফার্স্ট হওয়ার খবর তোলা থাকল, আর—”

তোলা নেই।

সেকথা শুনেছেন রামকালী। নবকুমার বলেছে। নাতিদের সঙ্গে দেখা হল না বলে দুঃখ প্রকাশও করেছেন। রামকালী বলেছেন, “তা সত্যি, দেখি নি অনেক দিন। জলপানি পেয়েছে শুনে খুশি হলাম।”

এসব গত রাত্রের কথা।

সুহাস জানে। সুহাস নিজের লজ্জা ঢাকতে তাড়াতাড়ি ওদের কথা তোলে।

রামকালী মৃদু হেসে বলেন, “নাতির ফার্স্ট হওয়া আহ্লাদের কথা, কিন্তু নতুন কথা নয় যদি, নাভিনীর ফার্স্ট হওয়াটাই নতুন কথা। ... আশীর্বাদ করি সুখী হও, সৌভাগ্যবতী হও!”

সত্যর দিকে ফিরে বলেন, “মন বুলেই আশীর্বাদ করলাম রে!”

সত্যর চোখ আবার জলে ভরে আসে।

বাবার কথাবার্তার ধরন বদলে গেছে। চিরদিনের সেই দুরত্ব বজায় রাখা মাপাজোপা কথার জায়গায় এখন যেন নিকটের সুর।

সংসার থেকে মুখ ফিরেবার কালে কি সহসা সংসারের প্রতি মমত্ব বোধ করেছেন রামকালী?

নাকি তাঁর এই সৃষ্টিছাড়া সংসার-ছাড়া মেয়েটির কার্যকলাপ তাঁকে বিচলিত করছে?

যাত্রাকাল যত নিকটবর্তী হয়, সত্যর স্কুলার শব্দ তত ভার হয়ে আসে। “থেকে যাও” বলে অনুরোধ করারই বা পথ কোথা? এখানে একমুঠো ভাত খাবার অনুরোধ চলবে না। যেতেই দিতে হবে।

ছোট ছোট কথা, ছোট ছোট নিঃশ্বাস।

“কবরেজী কি ছেড়ে দেবে বাবা?”

“ছেড়ে দেব? না, ছেড়ে দেব কেন সত্য? ওই বিদ্যোটুকু দিয়ে যতটুকু যার উপকার হয়—তবে পেশাটা ছেড়ে দেব।”

অর্থাৎ “দক্ষিণাটা বাদ।

“খুব কষ্ট করে থাকবে না তো বাবা?”

“বিশ্বনাথের খাসমহলে কষ্ট কিরে পাগলী!”

“শরীর-অশরীরে এই বেয়াড়া অবাধ্য মেয়েটা একটু খবর পাবে তো বাবা?”

“সে বাপু এখন বাক্যদত্ত হতে পারছি না।”

“সে জানি। সে কি আর জানতে বাকী আছে আমার!”

নবকুমার পায়ের ধুলো নিয়ে বলে, “কবে যাত্রা?”

“এই সামনের অষ্টমী তিথিতে নৌকা ছাড়বে।”

“নৌকো!” নবকুমার সাহসে ভর করে বলে, “কেন, এখন তো রেলগাড়ি চলছে—”

“চলছে। নৌকোও তো চলে এসেছে!” রামকালী হাসেন, “সে তো চলৎশক্তি হারায় নি!”

“ওতে একদিনে পৌঁছে যেতে—” সত্য এগিয়ে এসে বলে।

রামকালী মৃদু হাসেন, “অত তাড়াতাড়িই বা কী? মুমূর্ষু রোগী দেখতে তো যাচ্ছি না? তীর্থের পথটাই তীর্থ, পথটাকে চোখ বুজে অতিক্রম করে লাভ কি! এ একেবারে মা গঙ্গার কোলে চড়ে বসবো, কোলে কোলে চলে যাব।”

“বাবা, ঠিকানা?”

“ঠিকানা ? সে কি আমি এখান থেকে ঠিক করে যাচ্ছি রে ?”

“গিয়ে পৌঁছানো খবরে জানাবে তা হলে ?”

“এই দেখ! এ মেয়ের কেবল সত্যবন্দী করিয়ে নেবার ফন্সী!”

“হবেই তো। যেমন নাম রেখেছ!”

একেবারে যাবার সময়, রামকালী সহসা বেনিয়ানের পকেট থেকে দুখানি পাকানো কাগজ বার করে বললেন, “এই নাও, এই দুটি জিনিস রাখো।”

“কী এ ?”

সত্য হাত পাতে না, চমকে তাকায়।

রামকালী বলেন, “একখানি তোমার জন্মপত্রিকা। আমার কাছে ছিল এযাবৎ—”

“ও আমি নিয়ে কি করব বাবা ?”

“থাক। থাকা ভাল। আর এইটা—”, রামকালী একটু থামেন, “দেশের বিষয়-আশয় যা কিছু বংশের ছেলেদেরই থাকল। ত্রিবেণীতে আলাদা কিছু লাখরাজ জমি ছিল, সেটা তোমার নামে—”

“না বাবা না,” সত্য কেঁদে ওঠে, “ও আমি চাই না। আমি তোমার মেয়েসন্তান, শুধু স্নেহের অধিকারী—”

“তা এটুকু সেই স্নেহেরই চিহ্ন ধরে নাও।”

“বাবা গো, চিহ্ন দিয়ে স্নেহ বুঝবে তোমার ? না বাবা, দরকার নেই আমার।”

সত্য হাতও পাতে না, চোখের আঁচলও নামায় না।

এত কান্না বোধ করি সারা জীবনে কান্দে নি সত্য। মা মরতেও নয়।

রামকালী মুখটা ফিরিয়ে আত্মস্থ করে নেন নিজেকে, তার পর নবকুমারের দিকে বাড়িয়ে দিয়ে বলেন, “রাখো!”

নবকুমার সত্যর এই বাড়াবাড়িতে চাঞ্চল্য বোধ করছিলেন।

ভাবছিল, ছেলে নেই, মেয়ের তো সবই পালার কথা। বলে মহারানী ভিক্টোরিয়া রাজ্যটাই পেলেন। সে সব কিছুই না, মুষ্টিভিক্ষের উপস্থান, তাও মেয়ে নিচ্ছেন না! অতএব নবকুমারের হাত বাড়তে দেরি হয় না।

রামকালী পালকিতে ওঠেন।

আপাতত পালকিতেই চড়লে, কলকাতার বিশিষ্ট কয়েকটি দেবস্থান দেখবেন, তার পর নৌকোয় উঠবেন। রেলটা পছন্দ করেন না রামকালী। বললেন, “তেমন তাড়া না থাকলে দরকার কি?”

পালকিটা যতদূর দেখা যায় দরজায় দাঁড়িয়ে দেখে সত্য। তার পর বাড়ির মধ্যে ঢুকে এসে বসে পড়ে। অনেকক্ষণ পরে চোখ মুছে নিঃশ্বাস ফেলে বলে, “নেহাৎ নিরুপায় যদি না হতাম, ঠিক আমি বাবার সঙ্গে চলে যেতাম!”

নবকুমার বলে, “তা নিরুপায় আর কি ? কটা দিন নয় সুহাস চালিয়ে দিত, গেলেই পারতে! যে দুদিন না কাশী যান উনি, থেকে আসতে। বললে না তো ?”

সত্য আর একটা লজ্জা আর ক্ষোভ মেশানো নিঃশ্বাস ফেলে বলে, “সংসার চালানোর কথা নয়। অন্য কথা। শরীরের অবস্থাই আমার মনে হচ্ছে ভাল নয়। জানি না বুড়ো বয়সে আবার কপালে কী গেরো আছে—”

নবকুমার কিছুক্ষণ হাঁ করে তাকিয়ে থাকে সত্যের সেই লজ্জা-বিক্ষুব্ধ বিপন্ন মুখের দিকে, খবরটা হৃদয়ঙ্গম করতে তার কিছুক্ষণ লাগে। তারপর অকস্মাৎ এক অপ্রত্যাশিত পুলকে রোমাঞ্চিত হয়ে ওঠে সে।

ওঃ, ভগবান!

এইবার তাহলে সত্যর পায়ে একটু ছেকল পড়বে। এই ছেকল পড়ার কথাটাই সবচেয়ে আগে মনে পড়ে নবকুমারের। আর তাতেই আল্লাদ উথলে ওঠে। হঠাৎ সত্যর একটা হাত চেঁপে ধরে বলে, “সত্যি ?”

আগুন্তে হাতটা ছাড়িয়ে নিয়ে সত্য বলে, “অল্লাহদে নাচবার কিছু নেই।”



ভরা দুপুর।

নৌকো মাঝগঙ্গায়।

দাঁড়টানার একটানা একটা শব্দ ছাড়া আর কোন শব্দ নেই। শুধু খানিক খানিক সময় অন্তর দাঁড়ি-মাঝিদের এক-একটা দুর্বোধ্য হাজার স্তব্ধ প্রকৃতিকে যেন চমকে চমকে দিচ্ছে।

নৌকার আশেপাশে দাঁড়ের ধাক্কায় ভেঙে পড়া জলের বৃত্তরেখা, দূরে ঢেউ-খেলানো জলের রেশম চিকন গায়ে বাতাসের মৃদু কাঁপন।

সেই ঢেউ-খেলানো ঘি রঙা রেশমী ওড়নার গায়ে হীরেকুচি রোদের

উজ্জ্বল সমারোহ।

রামকালী সেই সমারোহের দিকে তাকিয়ে স্তব্ধ হয়ে বসেছিলেন।

ভরদুপুরের অচঞ্চল গঙ্গা, নৌকার গতি, মৃদু-মহুর, তাই ভিতরে আলোড়ন নেই।

কিন্তু মনের ভিতরে ?

যে মন ওই স্তব্ধ দেহদুর্গের মধ্যে চিরদিন সমাহিত থেকেছে ?

না, আলোড়ন নয়, শুধু যেন সেই চিরসমাহিত মনটাকে আজ একটু মুক্তি দিয়ে ফেলেছেন রামকালী। ছেড়ে দিয়েছেন ইচ্ছেমত ঘুরে বেড়াবার জন্যে।

এই আটঘণ্টা বছর ধরে যে দীর্ঘ প্রান্তরটা পার হয়ে এলেন রামকালী, সেই প্রান্তরের এ-প্রান্ত থেকে ও-প্রান্ত অবধি পাক খেয়ে বেড়াচ্ছে সেই হঠাৎ ছাড়া পাওয়া মনটা।

এর আগে কোন দিন এমন করে স্মৃতি-রোমন্থন করেন নি রামকালী। আজ করছেন। হয়ত বা অজ্ঞাতসারেই করছেন।

আজ সংসারের কাছ থেকে বিদায় নিয়েছেন রামকালী, পিঠ ফিরিয়েছেন তার দিকে। কিন্তু বিদায় গ্রহণের প্রাক্কালে কত ব্যবস্থা, কত হিসেবনিকেশ, কত নির্দেশ, কত বন্দোবস্ত।

গ্রামে যে টোলটি স্থাপন করেছেন, যে দুঃস্থ-কিন্দারী কজনের প্রতিপালনের ভার গ্রহণ করেছেন, একজন কবিরাজ বসিয়ে যে দাতব্য কবিরাজস্নানাটি প্রতিষ্ঠা করেছেন, গ্রীষ্মের দিনের জন্যে যে জলসত্রটি খুলেছেন, সেগুলি যাতে বন্ধ হয়ে না যায়, তার জন্য উচিতমত নিষ্কর জমি দানপত্র করে দিয়ে আসতে হল। যে কজন দুঃস্থ পণ্ডিত বৃত্তি পেয়ে আসছিলেন, তাঁদের বৃত্তি বজায় রাখার জন্যও জমির ব্যবস্থা করতে হল। তাছাড়া বরাবর গ্রামের কন্যাদায়গ্রন্থ দরিদ্র পিতা, অবীরা অসহায় বিধবা, রূপণ অপটু পুরুষের অথবা মাতৃপিতৃহীন শিশুর একরকম আশ্রয়স্থল ছিলেন রামকালী।

দূর দূর জায়গা থেকেও লোক এসে হাত পেতেছে রামকালীর কাছে।

এসব লোক যাতে একেবারে না বঞ্চিত হয়, একেবারে না বিতাড়িত হয়, তার জন্যও রাসুকে নির্দেশ দেওয়া হয়েছে একখানা বড় তালুকের মাধ্যমে।

অবশ্য রাসু যদি নিয়ম বজায় না রাখে, রাসু যদি সে তালুকের উপযত্ব আত্মসাৎ করে, করবার কিছু নেই। কারণ এটা একটা অনিয়মিত ব্যাপার।

তবু রাসুকেই ভার দিয়ে আসতে হল। রাসু ছাড়া আর কে মানুষ হল ? নেড়ুটায় তো উদ্দেশ্যই পাওয়া গেল না প্রায়। ঠিকানা না জানিয়ে দু'একটা চিঠি দিয়েছিল কবে কবে যেন। তাতেই জানা আছে, মরে নি বেঁচে আছে। রাসুর আর ভাইগুলো তো অমনিন্দ্য। সেজকাকার দুই ছেলে কুচুটের রাজা। রাসুর বড় ছেলেটা বাবুর শিরোমণি হয়ে উঠেছে। হচ্ছে সারদার দোষেই কতকটা।

সারদা যেন স্বামীর সঙ্গে রেঘারিষি করে ছেলেকে 'বাবু' করে ডুলতে বন্ধপরিষ্কার। সব কথায় বলে, 'ও পারবে না।'

ওই একটা মেয়ে। অদ্ভুত উল্টোপাল্টা।

রামকালী নিঃশ্বাস ফেলে ভাবলেন, ওর বিধাতা কি ওকে কতকগুলো উল্টোফাল্টা জিনিস দিয়েই তৈরী করেছিলেন, নাকি জীবনটা ওর উল্টো শ্রোতের মুখে পড়ল বলেই ?

রামকালী ওর হৃদয় পান না।

কখনো ওর ভারসহ কর্মনিষ্ঠা, ওর অসাধারণ নৈপুণ্য, ওর অগাধ সহিষ্ণুতা দেখে তাক লেগে যায়, কখনো ওর বিশ্বয়কর নির্লিপ্ততা, দৃষ্টিকটু ঔদাসীন্য দেখে স্তব্ধ হতে হয়।

দুর্গোৎসবের সমস্ত ভার সারদা একা মাথায় তুলে নিতে ভয় পায় না, দিয়েও নিশ্চিত হন রামকালী। কিন্তু এবারে হঠাৎ সারদা শান্ত ঘোষণায় জানিয়ে দিল, খুড়োঠাকুর যেন এ ভার আর কারো উপর ন্যস্ত করেন।

কেন ?

'কেন'র কিছু নেই।

বাড়িতে তো আরো লোক আছে।

গ্রামের কজন বয়স্ক ব্রাহ্মণ-কন্যাকে ডেকে রামকালী জানিয়েছিলেন বড় বৌমার শরীর অসুস্থ, অতএব তাঁরা যদি—

তা তাঁরা এসেছিলেন, তুলেও দিয়েছিলেন পূজো।

কিন্তু অনেক সন্ন্যাসীতে গাজন নষ্ট।

পুরোহিত পূজোয় বসে হাতের কাছে উপকরণগুলি ঠিকমত না পেয়ে রেগে আঙন।

তবু রামকালী যেন সারদার উপর রাগ করতে পারেন না। পারেন না অগ্রাহ্য করতে। অনুভব করেন সারদার মধ্যে 'বস্তু' ছিল, কিন্তু ভাগ্যের প্রতিকূলতায় সেটা খণ্ড খণ্ড হয়ে গেছে।

ভাগ্যের প্রতিকূলতায় ?

এইখানেই কোথায় যেন একটা খোঁচ। অনেকবার ভেবেছেন রামকালী, ভাগ্য ছাড়া আর কি ? মানুষ তো নিমিত্ত মাত্র, কিন্তু সে বিশ্বাসে অটুট থাকতে পারেন নি।

যাক, তবু সকলের যথাসাধ্য সুব্যবস্থা করে এসেছেন রামকালী, এখন যার যা নিয়তি। তথাপি অনেকগুলো মুখ যেন হতাশ দৃষ্টি মেলে তাকাচ্ছে রামকালীর দিকে। যেন বলছে...ফেলে চলে গেলে আমাদের ?... সত্যি!... কই যাবে এ কথা তো বল নি কোনদিন ? আমরা যে বড় নিশ্চিত ছিলাম।

এই মুখগুলোর মধ্যে সারদার মুখটা বড় স্পষ্ট, সারদার চোখটা বড় তীব্র। হতাশা নয়, যেন সে দৃষ্টিতে অভিযোগ।

কিন্তু অনেক বছর আগে আর একবার যখন সংসার ত্যাগ করেছিলেন রামকালী ?

তখন কি একবারও পিছনপানে তাকিয়েছিলেন ? নাঃ, কী হালকা বন্ধনহীন মন নিয়ে সেই যাওয়া!

বৈরাগ্যের কারণটা নিতান্তই স্থূল ছিল সত্যি, বাপের খড়ম থেকে সে বৈরাগ্যের উদ্ভব। রাগ দুঃখ অভিমান ক্ষোভ সব মিলিয়ে তীব্র একটা অনুভূতি যেন ঠেলে ঘরের বার করে দিয়েছিল সেই কিশোর বালককে, যাকে এখন যেন চোখের সামনে দেখতে পাচ্ছেন রামকালী।

ছেলেটা একখানা নৌকোর পাটাতনের মধ্যে ঢুকে বসে রইল সারটা দিন, কেউ তেমন লক্ষ্য করল না, একসময় ছেড়ে দিল নৌকো। ছেলেটা রইল ঘাপটি মেরে।

তারপর অনেকক্ষণের পর ধরা পড়ল।

তখন নৌকো অনেক এগিয়েছে।

রামকালী দেখছেন, মাঝি-মান্নারা জেরা করছে ছেলেটাকে। ছেলেটা স্বচ্ছন্দে উত্তর দিচ্ছে—তার কেউ কোথাও নেই, গরীব ব্রাহ্মণসন্তান, ভাড়া-টাকা দিতে পারবে না, নৌকো যেখানে যাবে, সেখানে পর্যন্ত যদি তাকে দয়া করে নিয়ে যায় তারা।

অবস্থা বুঝেই মমতাবশতই হোক অথবা দেবকান্তি রূপ দেখেই হোক ছেলেটাকে তারা সমাদর করে নিয়ে গিয়েছিল মুকসুদাবাদ অবধি।

সেখানে মিলে গেল গোবিন্দ গুপ্তের আশ্রয়।

সে যেন ঈশ্বরের প্রত্যক্ষ আশীর্বাদের মত।

সেই নিতান্তই কিশোর ছেলেটার মনে হয়েছিল পৃথিবীটা এত বড়! ভগবান এত দয়ালু! অথবা ইনিই ভগবান ? পুরাণ উপপুরাণের গল্পের মত ছদ্মবেশ ধরে রামকালীকে কৃপা করতে এসেছেন।

গঙ্গার ঘাটেই বসেছিল ছেলেটা।

কবিরাজ স্নানে এসেছিলেন।

থমকে দাঁড়িয়ে পড়ে বললেন, "চিনছি না তো তোমাকে ? কাদের ছেলে বাবা ?"

এখন ভেবে হাসি পাচ্ছে, রামকালী স্বচ্ছন্দে বলেছিলেন, "তোমার সে যোজ্ঞে দরকার কি ?"

"দরকার কিছু আছে বৈকি!" গোবিন্দ গুপ্ত একটু হেসে বলেছিলেন, "কাদের ছেলে, কেন একা ঘুরে বেড়াচ্ছে, রীত-চরিত্তিরই বা কেমন এসব না জানলে চলবে কেন ?"

"চলবে না ?"

"না। ভিনগায়ের ছেলেকে বিশ্বাস কি ?"

পরে জেনেছিলেন রামকালী, ওটা একটা চালাকি। রাগিয়ে দিয়ে পরিচয় আদায়ের চেষ্টা। কিন্তু সেদিন সেই ছেলেটার কথা বোঝবার ক্ষমতা ছিল না। সে তার জুঁক গলায় বলে উঠেছিল, “বিশ্বাস করতে কে পারে ধরছে তোমায়? আমার ইচ্ছে আমি বসে আছি। ঘাট কি তোমার কেনা?”

সেই সৌম্যদর্শন প্রৌঢ় ছেলেটার কথায় বেশ কৌতুক অনুভব করেছিলেন তাতে সন্দেহ নেই। এবং ইচ্ছে করেই খানিকক্ষণ ধরে বাদবিতণ্ডা চালিয়েছিলেন মজা উপভোগ করতে।

তারপর কেমন করেই যেন সন্ধি হয়ে গেল। আর কেমন করেই যেন ছেলেটা আশ্রয় পেয়ে গেল তাঁর কাছে।

কিন্তু শুধুই কি আশ্রয়?

নিঃসন্তান দম্পতির হৃদয় উজাড় করা ভালবাসার অধিকারী হয় নি সেই মুখর ছেলেটা?

আস্তে আস্তে সেই মুখরতা চপলতা সব অন্তর্হিত হয়ে স্থির শান্ত মেধাবী একটি ছাত্রে পরিণত হল সে। আর শুধু স্নেহেরই নয়, তাঁদের যথাসর্বস্বের উত্তরাধিকারী হয়ে উঠল।

আশ্চর্য! তবু এক দিনের জন্য নিজে হাতে রৈঁধে খাওয়ান নি কবিরাজগৃহিণী। অন্য এক ব্রাহ্মণবাড়িতে খাওয়ার ব্যবস্থা করে দিয়েছিলেন।

সমস্ত দৃশ্যগুলো যেন হঠাৎ চোখের উপর জলজলিয়ে উঠেছে।

রামকালী আবদার করেছেন, জেদ করেছেন, “আমি তো তোমাদের জাতেরই হয়ে গেছি” বলে যুক্তি খাড়া করেছেন, “কবিরাজ-গৃহিণী হাসিভরা মুখ আর চোখভরা জল নিয়ে বলেছেন, “পাগলা ছেলে, তাই কখনো হয়?”

“তোমাদের তো পৈতে আছে—”

বলেছিলেন রামকালী।

গোবিন্দ গুপ্ত হেসেছিলেন, “আছে, তা সত্যি। তবে কি জানিস? সবেই তো জাত থাকে? কেউটে গোখরো আর টোড়া বোড়া যেমন এক নয়, তেমনি তোর পৈতে আর আমার পৈতে এক নয়। তোকে তো আমার দত্তক নিতে ইচ্ছে করে, কিন্তু নিই না। কখন কি অপরাধ ঘটে কে জানে!”

স্নেহের সঙ্গে শ্রদ্ধার এক আশ্চর্য সংমিশ্রণ!

রামকালী প্রথমে বলেছিলেন, “আমার কেউ কোথাও নেই।”

তারপর ধীরে ধীরে সবই প্রকাশ পেয়ে গিয়েছিল।

গোবিন্দ গুপ্ত বলতেন, “দেখ, তোর মা-বাপকে খবর না দেওয়া আমার পক্ষে মহাপাপ হচ্ছে, তুই নিষেধ করিস না, আমি কোন প্রকারে খবর দিই।”

রামকালী বলতেন, “কেন? আমি বুঝি তোমার চক্ষুশূল হচ্ছে এবার? বেশ, পুণ্যের ভরা করে খবর দাও তুমি, দেখবে আবার পাখী ফুড়বে!”

কবিরাজ-গৃহিণী ঘাট ঘাট করে শিউরে উঠতেন। বলতেন, “তুমিই বা পাপ-পাপ করে ব্যস্ত হচ্ছে কেন বাপু? ওর মা-বাপ, বুঝবে। ছেলের প্রাণ যদি মা বলে না কাঁদে, বুঝতে হবে মায়ের প্রাণে কোথাও ঘাটতি আছে।”

“মায়ের প্রাণে কি ঘাটতি থাকে বড়বৌ?”

কবিরাজ বলতেন সহাস্যে।

রামকালী চড়ে উঠতেন। বলতেন, “আছে। খুব আছে। আমাকে মা দু-চক্ষে দেখতে পারে না। নইলে পিসি যখন শাসন করে, তখন ইচ্ছে করে আমার নামে আরো লাগায়?”

“সে বোধহয় ননদের ভয়ে।”

“ইং, ভারী আমায় ভয়! মায়ার চেয়ে ভয় বড় হল?”

পরে অনেক সময় ভেবেছেন রামকালী, সত্যি মার জন্যে তো একটুও মন কেমন করত না তাঁর। বরং কবিরাজ-গৃহিণী যখন অসুখে পড়তেন আর শেষে যখন মারা পড়লেন, লুকিয়ে লুকিয়ে কেঁদে কেঁদে শিরঃপীড়া জন্মে গিয়েছিল।

কেন এমন হয়েছিল?

রামকালী নিষ্ঠুর?

না তার মা-বাপই স্নেহহীন?

বাপের সম্পর্কে এক কথায় রায় দিয়ে দিলেও মায়ের সম্পর্কে সে রায় দিতে একটু বাধতো। হয়তো বিবেকেই বাধতো।

কিন্তু জীবনের এই শেষপ্রান্তে এসে যখন জীবনটাকে ওই ফেলে আসা গঙ্গার স্রোতের মতই সম্পূর্ণ আর স্পষ্ট দেখতে পাচ্ছেন, তখন রামকালী নিঃশ্বাস ফেলে ভাবলেন, ভালবাসা জীবনে সেই একবারই লাভ করেছিলেন।

সেই এক শ্রৌচা দম্পতির কাছে।

সারা জীবনের অনেক পেয়েছেন রামকালী, শ্রদ্ধা সমীহ ভয় ভক্তি, ভালবাসা পান নি। সবাই তাঁকে দূরে রেখেছে, দূরে থেকে শ্রণাম জানিয়েছেন।

রামকালীর নিজেরই দোষ।

দূরত্বের গতি নিজেই রচনা করেছেন তিনি। ইচ্ছে করে নয়, স্বভাবে।

কোনদিন কি ভাবতে পেরেছেন তিনি, গ্রামের কোনো কাজকর্মে তিনি ব্রাহ্মণভোজনের সারিতে পাত পেতে বসেছেন? ভাবতে পেরেছেন তিনি কোথাও 'দান' নিচ্ছেন?কারো চণ্ডীমঞ্জল বসে গালগল্প করছেন? তাস-পাশা খেলছেন?

ভাবলে হাসি পাবে কি, ভাবতেই পারেন নি।

অথচ গ্রামের অনেক কুলীন সন্তানই এমনি সাধারণের ভূমিকায় জীবন কাটাচ্ছেন।

কৌলীন্যটার সত্যকার বাস তবে কোথায়?

কিন্তু আজ সংসারকে পরিভ্যাগ করে যাবার সময় হঠাৎ মনে হচ্ছে রামকালীর, সারা জীবন বিজয়ীর ভূমিকা নিয়ে কাটালাম, কিন্তু সত্যি কি বিজয়ী হতে পেরেছি?

তা হলে কেন মনে হচ্ছে, ভয়ানক একটা লোকসানকে টেনে এনেছেন তিনি সারাজীবন ধরে?

লোকসানটা কী? পরাভবটা কোথায়?

লোকসানের কথা ভাবতে অপ্রাসঙ্গিক একটা কথা মনে এল রামকালীর। কিংবা অপ্রাসঙ্গিক নয়।

সত্য বড় আক্ষিপ করে বলেছিল, "এই খেদ রয়ে গেলে বাবা, তোমায় একদিন রেঁধে খাওয়াতে পারলুম না!"

আচ্ছা কতটুকু ক্ষতি হত রামকালীর, যদি সত্যর এই খেদটুকু না রাখতেন? নিয়মের সেই সামান্যতম হানির লোকসানটাই কী মস্ত একটা লোকসান হত?

রামকালী তাঁর জীবনে যে বস্তুকে পরম মূল্য দিয়ে এসেছেন, সত্যিই কি সেটাই মূল্যের শেষ কথা?

যদি তাই হয়, তবে কেন বার বার ভুবনেশ্বরী অদ্ভুত এক বিজয়িনীর হাসি হেসে চোখের সামনে এসে দাঁড়ায়?

কেন বলে, জীবনে তো অনেক পেলে, পয়ওয়ার গৌরবে পৃথিবীর দিকে তাকিয়ে দেখ নি, কিন্তু আসল ঘরটাই যে ফাঁকা পড়ে রইল তোমার, সে হিসেব কছে কোন দিন? কর্তব্যই করলে চিরকাল, ভালবাসতে পারলে কাউকে?

মনের মধ্যে ডুব দিয়েছেন রামকালী।

ভালবাসা? কার জন্যে সঙ্কিত থেকেছে?

সত্যর মুখ ছাড়া আর কোনও মুখ-চোখ ভেসে উঠছে না।

আর সব যেন 'জীবের' প্রতি করুণা।

সত্য আছে হৃদয়ের নিভূতে অনেকখানি জায়গা দখল করে। কিন্তু সেটুকু কি সত্যকে কোনদিন জানতে দিয়েছেন রামকালী? জানানো দুর্বলতা ভেবে অনবরত বালি চাপা দিয়ে আসেন নি কি?

হঠাৎ 'দুর্গা দুর্গা' করে উঠলেন রামকালী। ছেড়ে দেওয়া মনকে যেন বেঁধে ফেললেন, বললেন,

"ওহে, মুঙ্গের পৌঁছবে কখন নাগাদ?"

মাঝি বলল, "আজ্ঞে কর্তা, এই তো এসে পড়লাম বলে—"

"আচ্ছা ভাল। কষ্টহারিনীর ঘাটে নৌকো বাঁধবে।"

॥ চল্লিশ ॥



সাধন সরল পিসির কাছে দেওয়া প্রতিশ্রুতি ভঙ্গ করে নি, তবু সবই প্রকাশ হয়ে পড়ল। প্রকাশ হয়ে পড়ল সদূর দীনতা, আর তার ভাইপোদের মিথ্যা কথা।

কাঁচা পাকা চুল, বেঁটে খাটো শঙ্কু সমর্থ চেহারার যে ভদ্রলোকটির বাসা খুঁজে খুঁজে সেদিন পিসির দেওয়া চিঠিখানা পেশ করে এসেছিল ওরা, সেই ভদ্রলোক তার পরের রবিবারের সকালে এদের এখানে এসে হাজির হলেন।

এ হেন সঞ্জাবনার কথা স্বপ্নেও মনে আসে নি ওদের। অবশ্য সেদিন ব্রহ্ম শঙ্কিত পলায়নপর ছেলে দুটোকে প্রায় জোর করে দাঁড় করিয়ে

তাদের নাম কি, দেশ কোথায়, কলকাতায় বাসা কোন্ রাস্তায়, ইত্যাদি পুঙ্খানুপুঙ্খ জেনে নিয়েছিলেন ভদ্রলোক, তথাপি সেটাকে নিছক কৌতূহল ছাড়া কিছু ভাবে নি ওরা দুই ভাই। সন্দেহমাত্র করে নি, দু-দিন না যেতেই “কৈ গো খোকারা” বলে এসে হানা দেবেন।

এ যেন বিনা মেঘে বজ্রাঘাত।

ভয়ে প্রাণ উড়ে গেল ওদের।

সভয়ে পরস্পর মুখ-চাওয়াচাওয়ি করল দু ভাই, তারপর সরল নিঃশব্দে দুটো হাত উল্টে এমন একটা বেপরোয়া ভঙ্গী করল, যার অর্থ দাঁড়ায়—“তা আমাদের কি দোষ? আমরা তো ওনাকে আসতে বলি নি, পিসি বারণ করে দিয়েছিল তাই না—”

কিন্তু—

এটাও বিনা শব্দে শুধু চোখের ইশারায় উচ্চারিত হল, কিন্তু আমরা সেদিন মিছে কথা বলেছি। মা যখন বলল, ইঙ্কল থেকে ফিরতে দেরি কেন, তখন বলেছি ইঙ্কলে বল খেলা ছিল।

কিন্তু এত সব ভাববিনিময় মুহূর্তেই ঘটল, কারণ ইত্যবসরেই ভদ্রলোক বাড়ির টোকাঠ ডিঙিয়ে উঠোনে এসে দাঁড়িয়ে বাজখাঁই গলায় পুনঃপ্রশ্ন করেছেন, “খোকারা বাড়ি নেই নাকি?” এবং সত্যবতী মাথার কাপড় টেনে রান্না ঘর থেকে বেরিয়ে এসে স্পষ্ট গলায় উচ্চারণ করেছে, “তুডু, দেখ তো কে? জিজ্ঞেস কর কাকে চান?”

তুডুকে আর কষ্ট করে জিজ্ঞেস করতে হল না, যাঁর কানে যাবার স্বচ্ছন্দেই গেল। আর তিনি সহাস্যে এগিয়ে এসে উত্তর দিলেন, “ননদাই গো ননদাই, আপনি হচ্ছেন শ্যালাজ ঠাকুরন?”

শুনে সত্যবতী হাঁ।

এইমাত্র নবকুমার বাজারে গেল, আর এখন এই ঝামেলা! কে জানে লোকটা কে! কোন বদবুদ্ধি লোক না বাসা ভুল করে—সেই কথাটাই বলে সত্যবতী, ছেলেদের মাধ্যমে মাত্র করে, “তুডু বল, আপনি বোধ হয় বাসা ভুল করেছেন—”

“বাসা ভুল!”

ভদ্রলোক হেসে উঠলেন, “মুকুন্দ মুখুয্যে এত কীটা ছেলে নয় যে উচিতমত তল্লাস না করে কারুর অন্দরে ঢুকে পড়বে। দস্তুরমত পাড়ার লোককে শুধিয়ে সঠিক জেনে তবে ঢুকেছি। বলি তুমি বারুইপুরের নীলাম্বর বাঁড়ুয়োর ব্যাটা নবকুমার বাঁড়ুয়োর পরিবার নয়? অস্বীকার কর?”

বলে আপন রসিকতায় হেঁ হেঁ করে টুকু টুকু হাসতে থাকেন।

কথার ভাষা এবং ভঙ্গিমা এমনি অমার্জিত যে, রাগে আপাদমস্তক জ্বলে যায় সত্যবতীর। নিঃসন্দেহে যে কোন বদলোক, নামটা পরিচয়টা সংগ্রহ করে বাড়ি ঢুকে ভয় দেখাতে চায়।

চাক। সত্য বামনীকে চেনে না।

দৃঢ় আর বিরক্ত স্বরে বলে ওঠে সত্যবতী, “তুডু বল, পাড়া-পড়শীকে শুধিয়ে কারুর নাম পরিচয় জানা এমন কিছু কঠিন কাজ নয়। আমরা ও নামে কাউকে চিনি না, উনি যেতে পারেন!”

কিন্তু মুকুন্দ মুখুয্যে এত সহজে অপমানিত হন না। হাস্যকণ্ঠ বজায় রেখেই বলেন, “চেনো না তা সত্যি! জানার সুযোগ আর ঘটল কই? তোমার ননদ ঠাকুরন তো আমাকে ত্যাগ দিয়ে নিশ্চিন্দী আছেন। তা এতদিন পরে বিশ্বরণ রাজার শরণ হল কেন, সেই কথা শুধোতেই আসা। কিন্তু খোকারা, তোমরা একেবারে চুপটি মেরে মুখটি সেলাই করে বসে আছ যে? সেদিন অত আলাপ পরিচয় হল, চিঠি পৌঁছে দিলে, আর আজ যেন চিনতেই পারছ না! মাকে বুঝি বল নি? তাই উনি ‘সোবে’ করছেন লোকটা শুণ্ডা বদমাশ!”

এতক্ষণ তাই-ই ভাবছিল বটে সত্যবতী, কিন্তু ভদ্রলোকের শেষ কথাটায় যেন অকূল সমুদ্রে পড়ে।

এসব কি কথা!

বিন্দুবিসর্গও তো বুঝতে পারছে না সত্যবতী। নিজের ছেলেদের মুখের দিকে তাকিয়ে দেখল। সেখানে স্পষ্ট অপরাধীর ছাপ। কী এ?

লোকটা কি বারুইপুরের কেউ?

তুডু খোকা যখন দেশে গিয়েছিল তখন দেখেছে এখন চিনতে পারছে না? কিন্তু ‘চিঠি’ কিসের? ভগবান জানান বাবা! একেই তো শ্বশুরবাড়িতে সত্যর নাম জাঁহাবাজ বৌ, আবার এককাঠি বাড়ল বোধ হয় সে বদনাম। ছেলে দুটো যেভাবে শুকনো মুখে দাঁড়িয়ে আছে, তাতে সন্দেহ নেই ঘটেছে কিছু।

কিন্তু তথাপি মুখে হারে না সত্য। দৃঢ় হলেও একটু নরম সুরে বলে, “খোকা বল, বাড়ির পুরুষজন এখন বাড়ি নেই, আপনি একটু ঘুরে আসুন। যা বলবার তাঁকেই বলবেন।”

মুকুন্দ মুখুয্যে এবার একটু গম্ভীর হন। বলেন, “বলবার আমার কিছুই ছিল না। তবে আপনার নন্দন ঠাকুরপাণ শ্রীমতী সৌদামিনী দেবী হঠাৎ তাঁর ত্যাগ দেওয়া স্বামীকে একখানা পত্র কেন দিলেন, তারই তদ্বাস করতে—”

“ঠাকুরঝি পত্র দিয়েছেন! আপনাকে! মানে আপনি—”

“যাক এতক্ষণে চিনলে? বাবাঃ, কোথায় ভেবেছিলাম শালার বাড়িতে এসে একটু জামাই-আদর পাব, তা নয়—”

“কিন্তু ঠাকুরঝি চিঠি লিখেছেন!” সত্য আরক্ত মুখে বলে, “আমার বিশ্বাস হচ্ছে না—অসম্ভব।”

মুকুন্দ মুখুয্যে কথাটার অন্য অর্থ ধরেন। বলেন, “আহা, নিজে হাতে কি আর লিখেছে? কাউকে ধরে লিখিয়েছে নিশ্চয়। এই তো তোমার এই খোকায়ই দিয়ে এল পরভদ্রদিনকে—”

“আমার খোকারা? পরভদ্রদিনকে?”

সত্যবতীও বিচলিত হয়।

বিচলিত স্বরে বলে, “তুড়ু! খোকা!”

তুড়ু-খোকার নত বদন, যে বদনে অপরাধের কালিমা।

সত্য যেন একটু অসহায়তা অনুভব করে, আর এই প্রথম বোধ কবি নবকুমারের অনুপস্থিতিতে কাতরতা বোধ করে। মুকুন্দ মুখুয্যের চোখে সত্যর এই বিচলিত ভাবটা ধরা পড়তে দেরি হয় না। এবং ব্যাপারটা অনুধাবন করতেও দেরি হয় না। ছেলেমানুষদের যা হোক বুঝিয়ে চিঠিটা সৌদামিনী চুপিচুপিই পাঠিয়েছে। আগে এটা বুঝলে মুকুন্দ মুখুয্যে অন্যভাবে নিজেকে উপস্থাপিত করতেন। ছেলে দুটো খতমত খেয়ে যাচ্ছে, যাবেই তো, মা জননীটি যে খাঞ্জরনী তা তো বোঝাই যাচ্ছে। বাবাঃ, যেন পুলিশের ধমক!

কিন্তু মুকুন্দও পুলিশের বাবা।

আটঘাটটি বেঁধে তবে এসেছেন। চিঠিটা মূগে এনেছেন। তবে ভদ্রলোকের ধারণায় একটু ভুল ছিল। ভেবেছিলেন সৌদামিনী নিশ্চয় কলকাতায় ভাইয়ের বাসায় এসেছে, আর ভাইপোদের সেটুকু চেপে যেতে বলেছে। নইলে সাতজননে যে কখনো কোন বার্তা দিল না, সে কেন হঠাৎ..., কিন্তু ধারণাটা ভুল তা তো বোঝাই যাচ্ছে। সৌদামিনী এখানে নেই!

সত্যি তবে কেন হঠাৎ—?

সে চিন্তা যাক। ফতুয়ার পকেট থেকে সৌদামিনীর সেই গোপনতম দুর্বলতার ইতিহাসটুকু বার করে মেলে ধরেন মুকুন্দ মুখুয্যে দাওয়ান ধারে মেজেয়। আর দেখে এক মুহূর্তেই চিনে ফেলে সত্য—হাতের লেখাটা তারই বড় ছেলের। অর্থাৎ তুড়ুকে দিয়েই লিখিয়েছে সৌদামিনী।

সমস্ত ঘটনাটা স্পষ্ট হয়ে যেতে দেরি হয় না আর। দিনের আলোর মত স্পষ্ট হয়ে ওঠে। শুধু নিজের ছেলের এই দুর্বোধ্য আচরণটা অন্ধকারেই থেকে যায়। সত্যবতীকে বিন্দুবিসর্গ না জানিয়ে এত কাণ্ড করবার সাহস কি করে হল ওদের?

পড়ে থাকা চিঠিখানিতে চোখ ফেলা মাত্রই পাঠোদ্ধার হয়ে গেছে, কারণ অন্ধরের ছাঁদ আর তার প্রতিটি টান, প্রতিটি বাঁক তো সত্যবতীর মুখস্থ।

না, প্রেমপত্র নয়, ভাইপোকে দিয়ে লেখানোর আপত্তির কিছুই নেই। সৌদামিনী লিখেছে—

পরম পূজনীয় শ্রীচরণকমলেশু—

বহুকালাবধি আপনার কোনো সংবাদাদি জানি না, আপনিও সংবাদ নেন না অধীনা জীবিত কি মৃত। আমার কথা থাক, আপনার সংবাদ পাইতে ইচ্ছা হয়। আমার ভ্রাতা নবকুমার কলিকাতায় বাসা করিয়া আছে, তাহার সহিত সাক্ষাৎ হইলে জানিতে পারি। ইহারা নবকুমার ভাইজীবনের পুত্র সাধনাকুমার ও সরলকুমার। পত্রদানের ধৃষ্টতা মার্জনা করিবেন।

অধিক কি লিখিব! ভগবানের নিকট নিয়ত আপনার কুশল প্রার্থনা করি।

শতকোটি প্রণামান্তে

চরণের দাসী

শ্রীমতী সৌদামিনী দেবী।

পাঠোদ্ধার করে যেন স্তব্ব হয়ে যায় সত্য। এই সৌদামিনী দেবী কোন্ সৌদামিনী? সেই তাদের সদুদি? সেই সদুদি নিয়ত ভগবানের কাছে সেই লোকটার কুশল প্রার্থনা করে? এই বেঁটে-খাটো খাটমুণ্ডের গড়নের আধবুড়ো লোকটার?

এও কি সম্ভব ?

সৌদামিনী বিধবা নয় এইটুকু মাত্র জানা যেত ভাত খেতে বসার সময়। হেঁসেলের ভাতটা নিয়ে বসত সে মামীর সঙ্গে, ভাই-বোয়ের সঙ্গে, মাছের ভাগটা নিয়ে। এই যা।

তা ছাড়া আর কখনো কোনদিন কোন সময় টের পাওয়া যেত না সদুর স্বামী আছে। আশ্চর্য! আশ্চর্য! মানুষ কী অদ্ভুত জীব গো! শুধু মনে থাকাই নয়, স্বামীর সংবাদের জন্য উতলা হয় সে! এতই হয় যে মান-মর্যাদা জলাঞ্জলি দিয়ে “চরণ্যের দাসী” সাক্ষরিত চিঠি পাঠায়!

এ কী দীনতা!

এ কী দুর্বলতা!

বয়সকালে চিরদিন স্থির থেকে এখন এই ভাঁটা-পড়া বয়সে এমনই অস্থির হল যে মান-অপমান জ্ঞান হারাল ?

সৌদামিনীর এই পদস্থলন যেন সত্যবতীর মাথাটা লুটিয়ে দিল।

পদস্থলন!

হ্যাঁ, পদস্থলনই মনে হল সত্যবতীর। আর অকস্মাৎ তার বড় একটা যা না হয় তাই হল, দুই চোখ জলে ভরে উঠল।

তবু কষ্টে নিজেকে সামলে মাথার কাপড়টা আর একটু বাড়িয়ে সত্য বড় ননদাইয়ের পায়ের ধুলো নিয়ে শান্ত্বন্বরে বলে, ‘মনে কিছু করবেন না, চেনা-জানা তো নেই কখনো। দাওয়ায় উঠে বসুন। তিনি বাজারে গেছেন, এসে পড়বেন এখনই।’

গুরুজনদের সামনে “উনি” বলাটা অশোভন, তাই “তিনি” বলে সত্যবতী।

অবশ্য তাতে বুঝতে অসুবিধে হয় না, সংসার করে ঝানু হয়ে যাওয়া মুকুন্দ মুখুয্যের। এতক্ষণে তিনি শালাবোয়ের আচরণে প্রীত হন এবং প্রণতাকে “ধাক ধাক” করে সৌজন্য দেখিয়ে গর্বিত ভঙ্গীতে উঠে গিয়ে দাওয়ায় পাতা জলচৌকিতে জাঁকিয়ে বসেন।

সত্যবতীর চোখের ইশারায় ছেলেরাও তাদের নবলক্ষ্য পিসেমশাইকে প্রণাম করে এবং চোখের ইশারাতেই তামাক সেজে আনতে যায় সরল। যদিও নবকুমার তামাক খায় না, তবুও তামাকের পাটটা বাড়িতে রেখেছে সত্যবতী অতিথি-অভ্যাগতদের জন্য।

আপায়ন করতে হবে বৈকি!

পিতৃঋণ মাতৃঋণ দেবঋণ গুরুঋণ! তা অলক্ষ্য জগতের, আর তার শোধের কথা তো কথার কথা। আসলে কুটুম্ব-ঋণের তুল্য ঋণ নেই, আর তার শোধটা নিতান্তই প্রত্যক্ষ বাস্তব। দুর্লভ্য নীতিকে লঙ্ঘন করতে সত্য, লোকটা কুটুম্ব নামের অযোগ্য বলে ?

তা পারে না ?

এখন আর পারে না।

এ সেদিনের সেই কিশোরী সত্যবতী নয়, একদা যে স্বস্তরকে অপবিত্র জ্ঞান করে তার পূজোর গোছ করে দিতে অস্বীকৃত হয়েছিল। এ সত্যবতীর অনেক বাস্তববুদ্ধি হয়েছে। এখনকার সত্য জানে কতকগুলো ব্যাপারকে মনের সঙ্গে রফা করতে না পারলেও, বাইরে খানিকটা রফা করে নিতে হয়। নইলে অসামাজিকতা অভদ্রতা ইত্যাদির দায়ে পড়তে হয়। সংসার যখন করতে বসেছে, সামাজিকতার দায় পোহাতে হবে বৈকি।

তাই একটা নিঃশ্বাস ফেলে রান্নাঘরে ঢুকে উনুনে চাপানো হাঁড়িটা নামিয়ে রাখে। তারপর বড়ছেলেকে হাতের ইশারায় ঘরে ডেকে তার হাতে রসগোল্লা আনবার পয়সা দিয়ে ঘরের দরজার কাছে এসে বসে। সেখান থেকে সরাসরি না হলেও ননদাইকে অবলোকন করা যায়।

নবকুমার যতক্ষণ না ফিরছে, ততক্ষণ এই বন্ধন-যন্ত্রণা সইতেই হবে তাকে।

হাঁকোয় একটি সুখটান দিয়ে মুকুন্দ মুখুয্যে রাশভারী গলায় প্রশ্ন করেন, “কতদিন হল বাসা করে থাকা হয়েছে ?”

সত্য মৃদুস্বরে বলে, “অনেক দিন। সাত-আট বছর।”

“বল কি ? তখন তো তুমি প্রায় কাঁচা যুবতী গো! তা বুড়ো-বুড়ী যে মত দিল ? নাকি মরেছে তারা ?”

সত্যর ইচ্ছে হয় মুখের সামনে ঘরের দরজাটা বন্ধ করে দিয়ে বসে থাকে গুম্ব হয়ে। কিন্তু করে না। সংক্ষেপে বলে, “আছেন। মত না দিলে চলবে কেন ? ছেলেরদের লেখাপড়া—”

“হঁ, তা বটে। একালে তো আর পাঠশালা পড়া বিদ্যায় চলবে না। তা মাস্তর ওই দুইটি নাকি ? কুচোকাচা দেখছি নে তো!”

এ কথার আর উত্তর কি দেবে সত্য, চূপ করেই থাকে। “আর হয় নি” এটা বলতেও বুঝি কোথায় কাঁটার মত একটু বাধে। অদৃশ্য সেই কাঁটাটা বুঝি আস্তে আস্তে অবয়ব নিচ্ছে এক নিভৃত অন্ধকারে।

মুকুন্দ কিন্তু নাছোড়, ফের বলেন, “বাপের সঙ্গে বেরিয়েছে বুঝি?”

এ প্রশ্নের উত্তরটা সরলই দিয়ে ফেলে, “আমরা শুধু দুই ভাই।”

মুকুন্দ যে এর মধ্যে নিরে কী “ভাল” আবিষ্কার করেন কে জানে, সশিত মুখে বলেন, “তা ভাল! আপদের শান্তি! এ দিবাি বাড়ী-হাত-পা-হয়ে যাওয়া। এখন তীর্থ কর ধর্ম কর, দস্যবিত্তি করে সংসার কর, কোনো বালাই নেই। বাবাঃ, আমার ঘরের এণ্ডিগেণ্ডিগুলো দেখলে আমার মাথা কেমন করে! মানুষের ছাঁ তো নয়, যেন হাঁস-মুরগীর পাল!”

এবার বোধ করি সত্য বিরক্ত হতেও ভুলে যায়, চমৎকৃত হয়েই তাকিয়ে থাকে। বেটাছেলেতে যে এমন ধরনের কথা কইতে পারে এ তার জানা ছিল না। তার বাপের বাড়ির দেশে অনেককে দেখেছে সে, মেয়েলী বেটাছেলেও দেখেছে, দেখেছে নীলাধরকে, নবকুমারকে, সত্যর আদর্শ অনুযায়ী ‘পুরুষ বেটাছেলের’ রূপ কোথাও দেখে নি সত্য, কিন্তু এ কী!

গ্রামের গাঁইয়ামির মধ্যেও এক ধরনের শোভন-সভ্যতা আছে, এই শহুরে গৈয়োটাও এক কথায় বিশ্রী কুর্হসিত!

অথচ দেখলে বোঝা যায় লোকটা এককালে ‘সুপুরুষ’ বলেই গণ্য হত। একটু বেঁটে, তবে রংটি হর্তেলের মত, মুখাকৃতি দিব্য, কাঁচা-পাকা হলেও চুলে কেয়ারি আছে, আর সর্ব অবয়বে তোয়াজের চিহ্নটি পরিস্ফুট।

হাঁস-মুরগীর পালের সংসার হলেও, ভদ্রলোক নিজের তোয়াজটি ভালই বাগিয়ে নেন সন্দেহ নেই। সদৃশির সতীনকে মনে মনে একপ্রকার ব্যাঙ্গাত্মক তারিফ করে সত্য।

কিছুক্ষণ নীরবতা।

মুকুন্দ হাঁকা টানছেন, সত্য উৎকর্ষিত দৃষ্টিতে সদৃশির দরজার দিকে তাকিয়ে আছে, আর বেচারি সরল মনে মনে কাঠ হয়ে চূপচাপ দাঁড়িয়ে আছে উদ্যত বল্লের নীচে প্রতীক্ষারতের মত। এই লোকটা চলে যাওয়ার পর যে তাদের বিচার হবে সে বিষয়ে সন্দেহ নাশিত।

প্রতীক্ষার মুহূর্ত দীর্ঘ। সত্যর মনে হয়, মুকুমার যেন কতকাল বাজারে গেছে। আর তুড়ুটাও কম দেরি করছে না। ময়রার দোকান তো একি কাছেই।

নীরবতা ভঙ্গ করলেন মুকুন্দ।

বলেন, “তা তোমার ননদ ঠাকরুণই বোধ হয় মামা-মামীর সেবা করছে?”

কণ্ঠে যেন একটু চাপা অসন্তোষ।

সত্য আস্তে বলে, “উনিই তো কাছে আছেন বরাবর।”

“তা থাকতেই হবে, বেটা বেটার-বৌ যখন উড়তে শিখেছে। কিন্তু স্বামীর সংসারের প্রতিও তো একটা কর্তব্য আছে? এই তো আমার ঘরে, সংসারটা একটা ‘মানুষ’ বিহনে ফুটোনৌকার তুল্য। দ্বিতীয় পক্ষটি তো আমার হরঘড়ি আঁতুড়ঘরে ঢুকতে গুস্তাদ, বাচ্ছা-কাচ্ছাগুলোর হাড়ির হাল। এখন বড় গিন্নী এসে থাকলে সবদিকই রক্ষা হয়, আর তারও—”

বোধ করি নিতান্তই অসহ্য বিশ্বয়ে স্তম্ভ হয়ে গিয়েছিল বলে সত্য এতগুলো কথা বলবার অবকাশ দিয়েছিল লোকটাকে, কিন্তু স্তম্ভতার ঘোর কাটল। আর লোকটা যে সদ্য আগভুক এবং হিসেবমত গুরুজন, সে কথা বিশ্বস্ত হয়ে মূদু হলেও তীব্রবরে বলে উঠল, “আপনার অবিশ্যি সবদিক রক্ষ হয়, বিনি মাইনের রাঁধুনী-চাকরানী-ঘরুনী সব পেয়ে যান, কিন্তু তাঁর কী উপকারটা হবে শুনি?”

মুকুন্দ মুখুয্যে ক্ষণকালের জন্য খতমত খেয়ে যান, কারণ এ হেন তীব্রতার মুখোমুখি দাঁড়াতে হবে এ কল্পনা নিশ্চয় ছিল না তাঁর, তবে আত্মস্থ হতেও দেরি লাগে না। সেই আত্মস্থ ভঙ্গীতে মূদু হাস্যের প্রলেপ লাগিয়ে বলেন, “শালাবাবুর আমার পরিবার-ভাগিটি তো দেখছি বেশ ভালই। একে রূপসী ভায় বিদুষী, নাটক নভেল পড়ার অভ্যেস আছে বোধ হয়! তা জিজ্ঞেসই যদি করলে তো বলি, উপকারের কিছু না হোক পরকালের কাজটাও তো হবে? মামার ঘরে দাস্যবিত্তি করার চাইতে স্বামীর ঘরে দাস্যবিত্তি কিছু আর অপমান্যির নয়?”

সত্য উঠে দাঁড়ায়, ধীর স্বরে চেষ্টা করে বলে, “মেয়েমানুষের কোনটা মান্যের আর কোনটা অমান্যের সে জ্ঞান থাকলে আর এ কথা বলতে পারতেন না। তবে ঠাকুরঝি যে আপনাকে ত্যাগ দেয় নি, আপনিই ত্যাগ দিয়েছেন তাকে, জানা আছে আমার সে কথা। এখন সংসারে ঝিয়ের দরকার হয়েছে বলে তার পরকালের চিন্তা নিয়ে মাথা ঘামাতে এসেছেন—”

যতই ধীরভাবে বলতে চেষ্টা করুক, তবু উত্তেজনায় মুখটা লাল হয়ে ওঠে সত্যর। আর এ উত্তেজনা শুধু ওই চোখের চামড়াহীন বর্বরটার নিলজ্জতাতেই নয়, সদূর নিলজ্জতাতেও। এই হতশ্রদ্ধা লোকটাকে এসব কথা বলার সুযোগটাও তো সদূর দিয়েছে।

মুকুন্দ মুখ্যে এর উত্তরে কী বলতেন অথবা সত্য কিভাবে কথা শেষ করতে জানে, বাধা পড়লে পিতা-পুত্রের আগমনে। সাধন এসেছে রসগোল্লা নিয়ে, সঙ্গে সঙ্গে নবকুমারও। পথে বাবার সঙ্গে দেখা হয়ে যাওয়ায় সমাচারটা জানিয়ে দিয়ে অবহিত করিয়ে এনেছে সাধন। বাবার দেখা পেয়ে যেন আপাতত বেঁচেছে বেচারার, সরাসরি মার মুখোমুখি দাঁড়াতে অন্তত কিছুটা বিলম্ব হবে।

নবকুমার অবশ্য গুরুজন এবং দুর্লভ কুটুম্বের সম্মান জানে। শশব্যস্ত হাতের জিনিস নামিয়ে হেট হয়ে পায়ের ধুলো নিয়ে সম্মিত বচনে বলে, “কী ভাগ্য আমার, পায়ের ধুলো পড়ল এতদিন পরে! কতক্ষণ এসেছেন?”

সত্য ততক্ষণে রসগোল্লার ভাঁড় নিয়ে ঘরে ঢুকে গেছে। মুকুন্দ অন্তরালবর্তিনীর কর্ণগোচর হতে পারে এমন উদ্ভাস স্বরে উত্তর দেন, “তা এসেছি অনেকক্ষণ! এতক্ষণ ‘হাঁ’ হয়ে বসে তোমার বিদুষী পরিবারের লেকচার শুনাছিলাম। কলকোতারই মেয়ে বুঝি? মেমের কাছে লেখাপড়া শেখা?”

লজ্জায় মাথাটা হেট হয়ে যায় নবকুমারের, মুখটা টকটকে হয়ে ওঠে। আর সত্যর প্রতি অপরিসীম ক্রোধে যেন হতবাক হয়ে যায়।

আশ্পদার কী একটা সীমা নেই? কথা বলতে জানে বলে যাকে যা ইচ্ছে বলবে? অতবড় বুড়ো ননদাই, তাও আবার চিরদিনের অদেখা, তার সঙ্গে জো কথা কইবরই কথা নয়, ঘোমটা দিয়ে ঘরের মধ্যে ঢুকে পড়বার কথা, তা নয়, এমন কথা শুনিয়েছেন বসে বসে যে এই উপহাসের জুতোটি খেতে হল নবকুমারকে।

ছি ছি!

কিন্তু এখন হচ্ছে মনের রাগ মনে চাপা, কিল খেয়ে কিল ফুরি। জুতোটাকে বোনাইয়ের রসিকতা বলে ঘরে নিয়ে হেঁ হেঁ করে হাসা।

সেই হাসিই হাসতে থাকে নবকুমার এবং সত্য নিঃশব্দে রসগোল্লার রেকাবি আর জলের গ্লাসটা নামিয়ে বাজারের ধামাটা তুলে নিয়ে ঘরে চলে গেছে। বোনাই নিজেই যখন রেকাবিটি হাতে উঠিয়ে ব্যঙ্গ হাস্যে বলেন, “জুতো মেরে গরুদান? তা মন্দ নয়। যাক, বামুন মুচি-বাড়িতেও লুচি খেতে ছোটো—” তখনও নবকুমার সেই হেঁ হেঁ হাসি হাসতে থাকে। বরং মাঝটা আরো বাড়িয়ে দেয়।

অতঃপর সত্য আর বেরোয় না।

ছেলে দুটো গুটি গুটি ঘরে ঢুকে বই নিয়ে পড়তে বসে।

নবকুমারের সঙ্গেই অনেকক্ষণ কথা চালান মুকুন্দ।

সুহাসিনী বাড়িতে নেই, রবিবার সকালে সে পাশেরই এক বড়লোকের বৌয়ের কাছে লেস বোনা শিখতে যায়। বৌটির ছেলেমেয়ে নেই, বাড়িতে প্রচুর চাকরদাসী, স্বামীটি রবিবার হলেই সঙ্কাল থেকে তাদের আড্ডায় চলে যায়, অতএব রবিবার সকালে তো বটেই, এমনিতেও বৌটির অফুরন্ত অবকাশ।

সুহাসিনীর কুলে যাবার পথে জানলা দিয়ে ডেকে নিজেই আলাপ করেছিল বৌটি।

“ওই লোকটা থাকতে থাকতে সুহাস না ফিরলেই বাঁচি,” রান্না করতে করতে ভাবল সত্য। ফিরলে তো গুরই চোখের সামনে দিয়ে ফিরবে? অতি বদ প্রকৃতির লোক। দেখলে নিশ্চয় ওই সুহাসের কথায় সাতশ কৈফিয়ত চাইবে।

মানুষ যে কেন এমন অসভ্য হয়!

আন্তে আন্তে অন্য ভাবনায় চলে যায় সত্য, শুধু কি অসভ্যই হয়? হ্যাংলাও হয় না কি? নইলে সদূ ওই বদ লোকটাকে এখনো স্বামীজ্ঞান করে বসে থাকে? শুনেছে নবকুমারের কাছে ইতিহাস। নির্ঘাতনের জ্বালায় চলে গিয়েছিল সদূ, তারপর এই নির্ঘাতক স্বামীর ঘরে সতীন-কাঁটা পুতেছে, সে খবরও জানা। তবে? এত সন্তোষ কি চিরদিন মনে মনে গুর চরণের দাসী হয়ে থেকেছে সৌদামিনী? না গুটা একটা নিয়মরক্ষের ‘পাঠ’ মাত্র?

হয়তো এদিকে মামীর নির্ঘাতনে সাময়িকভাবে কোনদিন দৈয়্যচ্যুত হয়েই এ কাজটা করে বসেছে।

কিন্তু তাই কি?

এ তো মনে হচ্ছে বেশ পরিকল্পনার ব্যাপার। রাগের মাথায় কিছু করে ফেলা নয়। পাড়ার কোনো ছেলেপুলেকে দিয়ে লেখালে লোক-জানা জানি হবার ভয়েই হয়তো এতদিন পারে নি। এখন নিজের ভাইপোদের দিয়ে—

সন্দেহ নেই কথাটা প্রকাশ করতে বারণ করেছে ছেলেদের। সদূর ওপর এজন্যেও রাগ হয় সত্যার। পিসি হয়ে লুকোচুরি করার বিদ্যেটায় হাতেখড়ি দিলে তুমি!

এখন সত্য কি করে ওদের তিরস্কার করবে ?

সেটা কি ঠিক হবে ?

পিসিও তো গুরুজন। তার কাছে যখন কথা দিয়েছে। “সত্যরক্ষা” যে মানুষের জীবনের সারধর্ম, এ কথা সত্যই শিখিয়েছে ছেলেদের।

কিন্তু যতই যা শেখাও, তুড়ুটা ঠিক তার বাপের ধাচে যাচ্ছে। মেরুদণ্ডহীন অসার। তবে নবকুমারের আবার তার ওপর মুখে তড়পানি আছে, এর সেটা নেই এই যা! মৃদু ভালমানুষ ছেলেটা। কিন্তু ভালমানুষই কি প্রার্থনীয় ? ওই ‘ভাল’টা বাদ দিয়ে যেটা হয়, সেটাই যে চায় সত্য।

সরলটা হয়তো একটু অন্যরকম হবে।

কিন্তু সে কোন্ রকম ?

সত্যবতীর মনের মধ্যে মানুষের যে ছাঁচ গঠিত আছে, তার ধারে-কাছে পৌঁছবে ?

নাঃ, সে আশা নেই সত্যার। লেখাপড়া শিখবে, রোজগারপত্র করবে, পাঁচজনে “ভাল” বলবে এই পর্যন্ত। তার বেশী নয়, বুঝে নিয়েছে সত্য। যদি তার বেশী হত, এতদিনে ধরা পড়ত সে দীপ্তি, সে ঔজ্জ্বল্য।

বরং সুহাসিনীর মধ্যে “বস্ত্র” দেখতে পায় সত্য, দেখতে পায় দীপ্তির চমক। যে সুহাসিনীর কৈশোরকাল পর্যন্ত কেটেছে এক কুশী পরিস্থিতির মধ্যে। জীবনের বনেদে যার গুণ্ডাই শূন্যতা।

হয়তো সেই জনোই।

আলো আর অন্ধকারের পার্থক্যটা ওর কাছে তীব্র হয়ে ধরা পড়েছে। এদের কাছে সে তীব্রতা নেই। এরা তাই ঝাপসা-ঝাপসা। চোন্দ-পনেরো বছর বয়স হল, এখনো বোঝা যাচ্ছে না ওরা নিজেদের নিয়ে কিছু ভাবে কিনা, ভাবতে শিখেছে কিনা। কোন্টা ভালো কোন্টা মন্দ সেটা চিন্তা করে কিনা।

আশ্চর্য!

সত্যবতীর মনের মধ্যে যে ছাঁচ, সত্যবতীর সর্ভের ছাঁচ তার নাগাল পেল না।

ঈশ্বর জানেন এই সুদীর্ঘকাল পরে সত্যবতীর সত্তার মধ্যে আবার কোন্ ছাঁচ গঠিত হচ্ছে! প্রথমটা ভারী একটা বিপন্নতা বোধ করেছিল সত্য, বিপদ বলে মনে হয়েছিল ঘটনাটাকে, ক্রমশ মনটা কোমল হয়ে আসছে। এমন কি মাঝে মাঝে ভাবতেও ইচ্ছে করছে, পালা বদল হলে মন্দ হয় না, একটি মেয়ে হলে বেশ হয়।

আজ হঠাৎ মনে হল সত্যবতীর, যদি তা-ই হয়, কে বলতে পারে সে মেয়ে তার পিতামহীর আকৃতি আর প্রকৃতি নিয়ে অবতীর্ণ হবে কিনা!

হয়তো তাই হবে।

সত্যবতীর একাধি ইচ্ছার নিরন্তর তপস্যা কোনো কাজেই লাগবে না। মেয়ে মানুষের এ এক অদ্ভুত নিরুপায়তা। নিজের রক্ত মাংস মন বুদ্ধি আত্মা সব কিছু দিয়ে যাকে গড়ছি, জানি না সে কী হবে!

নিঃশ্বাস ফেলে ভাবল, শুনেছি শাস্তরে আছে নরাণাং মাতুলক্রমঃ! কিন্তু মাতুল না থাকলে ? দাদামশাইয়ের আত্মজই তো মাতুল ? তবে ? দাদামশাইয়ের কথা শাস্ত্রে লেখে নি।

চিন্তায় ছেদ পড়ল।

বাইরে সেই বাজরাংই গলা বেজে উঠল, “কই গো বাড়ির গিল্লী, অত লেকচার-টেকচার শুনিয়ে হঠাৎ একেবারে ডুব যে! অধম তাহলে এখন বিদায় নিচ্ছে। মাঝে মাঝে আসতে অনুমতি হবে তো?” সত্য বাইরে বেরিয়ে এসে হেঁট হয়ে নমস্কার করে শান্ত গলায় বলে, “আসবেন বৈকি।”

কিন্তু এতে, ওই শান্ত বচনেতে কোন কাজ হল না।

মুকুন্দ বিদায় নিতে নবকুমার ‘রে রে’ করে পড়ল।

“বলি তোমার ব্যাপারটা কী ? কী সব যাচ্ছেতাই কথা বলছ মুখুয্যে মশাইকে ?”

সত্য বিরক্তভাবে বলে, “যাচ্ছেতাই আবার কী বলতে যাব ?”

“তা যাচ্ছেতাই ছাড়া আবার কী ? উনি কিছু য়েচে আসেন নি ? দিদি তন্দ্ৰাস করেছিল তাই—”

কথা থামিয়ে দিয়ে সত্য বলে ওঠে, “সেই ঘেন্নাতেই গলায় দড়ি দিতে ইচ্ছে হচ্ছিল আমার।”

“তার মানে ?”

“মানে ভেবো খেয়ে দেয়ে নিশ্চিন্দ হয়ে। এখন চান কর গে।”

“খাম! বলি দোষটা কি করেছে দিদি? স্বামী তো বটে?”

“তা তো নিশ্চয়।”

“তবে?” নবকুমার সোৎসাহে বলে, “মুখুয্যোমশাই যা বললেন, তাতে বুঝলাম ওঁর দুঃখটা। আর যাই হোক লোকটা কপট নয়। বললেন, একসময় দোষ ঘটেছিল চের, কুসঙ্গে পড়ে নেশাভাঙ কুর্কম কিছুই বাকী রাখি নি ডায়া, সতী-সাধীকে লাঞ্ছনাও করেছে। কিন্তু পরে চৈতন্য হয়েছে।”

সত্য নিরীহ গলায় বলে, “হয়েছে বুঝি!”

“হয়েছে বৈকি। এখন তো এ তামাকটুকু ছাড়া আর কোনো নেশাই নেই। তাই বলছিলেন, কত ইচ্ছে হয়েছে গিয়ে ক্ষমা চাই, মামার পায়ে ধরে চেয়ে আনি কিন্তু লজ্জায় পারি নি। তা তোমার দিদি যেকালে আশু বাড়িয়ে লজ্জাটা ভেঙ্গে দিল, তাতে—”

“তা বেশ তো, সুখের কথা। দিদিকে আনিয়ে নিয়ে আবার নতুন করে গাঁটছড়া বেঁধে পাঠিয়ে দাও। দুই সতীনে সুখে সংসার করুন—” বলে একটু তীক্ষ্ণ হেসে সরে যাচ্ছিল সত্য, কিন্তু মুহূর্তে ঘটে গেল এক বিপর্যয়।

নবকুমার বোধ করি কিছু না ভেবেচিন্তেই ক্ষণপূর্বে শোনা একটি কথা যথাযথ উচ্চারণ করে বসল, “তা সে সতীন-জ্বালা আর বেশী দিন নয়। গুনলাম নাকি এ পক্ষের সৃতিকা ধরেছে। তবে? সে কাঁটা আর কদিন?”

মুহূর্তে যেন একটা বোমা ফেটে গেল। সত্যবতী উন্মাদের মত নিজের কপালে একটা খাবড়া মেরে চিৎকার করে উঠল, “চুপ করবে তুমি? দয়া করে একটু চুপ করবে? যদি তা না পারো তো যে করে পারো, আমায় জন্মের শোধ কালা করে দাও!”

একার সংসারে এতদিন ধরে অরুচি আর অক্ষিদেয় না খেয়ে খেয়ে ভিতরে ভিতরে দুর্বল হয়ে যাওয়া শরীরটা এই উদ্বেজনার বার বইতে পারল না। হুড়মুড়িয়ে পড়ে গেল।

ছেলে দুটো হাউমাউ করে জল আর পাখা আনতে ছুটল, নবকুমার ঘর থেকে একটা বালিশ এনে সত্যর লুটিয়ে পড়া মাথার তলায় গুঁজে দিতে বসল, আর এই সময় সুহাসিনী ও-বাড়ি থেকে এসে পাথর হয়ে দাঁড়িয়ে পড়ল।

আজ ভারী উৎফুল্ল হয়ে আসছিল সুহাস, কারণ তার শিক্ষা-গুরু বৌটি বলেছেন, “তুমি যদি ভাই রাজী থাক তো আমার মাস্টারী কর। বড়লোকের বাড়িতে কেবল খেয়ে শুয়ে জীবনে যেন যেন্না ধরে গেছে। তোমায় দেখে মনে হয়, যদি তোমার মতন বই-টাই পড়তে পারতাম, তা হলেও বা দিনটা কাটত। তা ইঙ্কলে যাওয়া তো আর জীবনে হবে না, তবু তোমার কাছে যদি—”

মাস মাস আটটা করে টাকা দিতে চেয়েছে সে। সুহাস অবশ্য টাকার কথায় আপত্তি করেছিল, বলেছিল, “টাকা কেন ভাই! তুমি আমায় একটা বিদ্যে শেখাচ্ছ, আমি না হয় তার বদলে তোমাকে একটা—”

কিন্তু সে হাতে ধরে কাকুতি-মিনতি করেছে। বলেছে, “আমায় শখের জন্যে টাকা খরচ করতে তো আমার বর সর্বদা রাজী! একদিন থিয়েটারে নিয়ে যেতে পঁচিশ-তিরিশ টাকা খরচ করে, এও তো আমার একটা শখ! গুরুকে দক্ষিণে না দিলে বিদ্যে হয় না।”

সুহাস রাজী হয়ে এসেছে।

উৎফুল্ল হৃদয়ে সত্যর কাছে বলতে আসছিল, “দেখ পিসীমা, বড়লোক মাঝেই খারাপ হয় না। তাদের মধ্যেও মহৎ আছে—”, কিন্তু এসেই এই দৃশ্য।

তাড়াতাড়ি সবাইকে সরিয়ে দিয়ে সেবার ভারটা হাতে তুলে নিল সে। আর সেই প্রথম খবরটা জানল। আত্মগত ভাবেই বলে ফেলল নবকুমার, “শরীরটায় পদার্থ নেই দেখছি। বাচ্চা-কাচ্চা হবার আগে মেয়েছেলে মা-ঠাকুমার কাছে যায়, তা সে গুড়ে তো বালি! বারুইপুরেই পাঠিয়ে দিতে হবে দেখছি!”

কিছুটা সময় দিশেহারা হয়ে তাকাল সুহাস। তার পর নিজের ওপর ধিক্বারে অবাধ হয়ে গেল। ছি ছি, এত বড় বুড়ো মাগী সে, এমনই অবোধ! এক ঘরে একসঙ্গে, কিছু টের পায় নি? তুড়ু-খোকার চাইতে তা হলে কোন তফাৎ নেই তার? পিসীমার যে শরীরে এমন অবস্থা হয়েছে, প্রথমে তো তারই বোঝা উচিত ছিল। যত্ন-আত্তিও করা উচিত ছিল।

বুঝতে পারে নি।

সত্যর ছেলে দুটো এত বড় হয়ে গিয়েছে যে, এ ধরনের চিন্তা মাথাতেই আসে নি। তা শুধু লজ্জাই নয়, আজ সত্যর ওই চৈতন্যহীন পাংগু মুখের দিকে তাকিয়ে অজানা একটা ভয়েও বুকটা কেঁপে উঠল সুহাসের।

সুহাসের ভাঙা ভাগ্যে যদি তার এই আশ্রয়ের ভেলা ডুবে যায় ? যদি সত্যের কিছু ঘটে ?

অনেকদিন পরে ছেলেপুলে হলে তো বিপদ হতে পারে শুনেছে, বুকটা কেঁপে নিখর হয়ে এল সুহাসের। আর বোধ করি এই প্রথম উপলব্ধি করল সত্যকে কতটা ভালবাসে সে। শুধু আশ্রয়ের ভেলা বলেই নয়, 'মানুষ'টা বলেও প্রাণের আসনে বসিয়ে রেখেছে সুহাস সত্যকে প্রতি মুহূর্তের সংস্পর্শে।

মা-ঠাকুমা নেই বলে যত্ন পাবে না সত্য ? সুহাসের কি ব্যয়স হয় নি সেবা করবার ?

॥ একচল্লিশ ॥



অনুতাপ-দঙ্ক সুহাসের দৃঢ় সংকল্প অবশ্য কাজে লাগল না। কারণ মাত্র একটা বেলার বেশী বিছানায় শুয়ে থাকল না সত্যবতী। সুহাসের অনুন্নয়-বিনয় এবং নবকুমারের ব্যস্ত ভর্তসনাকে উপেক্ষা করে উঠে পড়ল সে। বলল, "ঠিক হয়ে গেছি বাবা। তোমরা আর তিলকে তাল করো না।"

কিন্তু এই আকস্মিক দুর্বলতার ঘটনায় গভীর একটা চিন্তা দেখা দিল সত্যবতীর মধ্যে। সে চিন্তা স্বামী-পুত্রের জন্য নয়, ওই অনাথা মেয়েটার জন্যেই। নিশ্চিন্ত হয়ে বসে আছে সত্য, কিন্তু যদি সত্যর একটা কিছু ঘটে, ওর কি হবে ? অবিশ্যি মরে এশুকনি যাবে সত্য তা নয়, তবু বলা

কি যায়! বুড়ো ব্যয়সে আবার যখন কেঁচে-গড়ুঘের পালা পড়ল তখন ভয় আছে বৈকি। ছেলেদের জন্যে ভাবনা নেই, ওরা প্রায় মানুষ হয়ে এল, নবকুমারের মা-বাপ আছে এখনও, হয়ে যাবে কোন ব্যবস্থা, ওই মেয়েটারই অজল অস্থল অবস্থা। ওই রূপের ছাড়া মেয়েকে এলোকেশী নিশ্চয়ই সুচক্ষে দেখবেন না। তা ছাড়া শুধু দেখার প্রশ্নই তো নয়। এতদিন নিশ্চিন্ত হয়ে বসে থাকার জন্য নিজেকে ধিক্কার দিল সত্য এবং পরদিন নবকুমারের কাছে একটা অসমসাহসিক আবেদন করে বসল।

সত্য মাথা ঘুরে পড়ে যাওয়ার সঙ্গে সঙ্গে নবকুমারেরও মাথা ঘুরে গিয়েছিল এবং এই কদিন নিতান্তই বোচারার মত কিসে সত্যর সম্ভাষণ-বিদ্বান হতে পারে তার চেষ্টা করছিল, কিন্তু সত্যর এই আবেদনে তার নতুন করে আবার মাথা ঘুরে গেল। অবাক হয়ে বলল, "মাস্টার মশাইয়ের বাড়ি যাবে তুমি! কেন ? হঠাৎ এমন কি দরকার পড়ল ?"

"আছে দরকার।"

"কিন্তু নিতাই শুনলে কি আশু রাখবে আমায় ?"

"আশু রাখবে না ?" সত্য মৃদু একটু ব্যঙ্গ হাসি হেসে বলে, "একবারে ভেঙেই ফেলবে ?"

"তা প্রায় তাই। তা ছাড়া, মানে দরকারটা কি ?"

"বললাম তো আছে দরকার।"

নবকুমার নম্রতা ভোলে, ক্রুদ্ধকণ্ঠে বলে ওঠে, "ওই বেধর্মী লোকটার সঙ্গে তোমার দরকারটাই বা কি তাই শুনি ?"

বলে ফেলেই অবশ্য ভয়ে কাঠ হয়ে যায়। কে জানে বাবা, এ কথাতেও সত্য অজ্ঞান হয়ে যাবে কিনা ? কিন্তু না, অজ্ঞান হয়ে যায় না সত্য, শুধু মিনিটখানেক পাথরের চোখ নিয়ে স্বামীর দিকে তাকিয়ে থেকে বলে, "একটা পরামর্শ করব।"

"পরামর্শ! বাপ-পিতেমোর নাম গেল হিদে জোলায় নাতি! জাতে-জাতে পরামর্শর মানুষ মিলল না, পরামর্শ করতে যাবে ওই ধর্মখোয়ানো ইয়ের সঙ্গে ?"

সত্য বোধ করি রাগবে না বলেই দৃঢ়সংকল্প, তাই স্থিরভাবে বলে, "জাতে-জাতে 'মানুষ' আর পাচ্ছি কোথা ? পাখী-পক্ষীর সঙ্গে তো আর পরামর্শ হয় না ? যাক গে, তুমি যখন নিয়ে যেতে পারবে না, আমি নিজেই যে করে হোক—"

"নিজেই যে করে হোক!"

নবকুমার আরো ক্রুদ্ধ গলায় বলে, "এই এক একবগুগা গৌ। যা ধরব তা করবই। বেশ এতই যদি দরকার, তাঁকেই তবে ডেকে আনব গলবস্ত্র হয়ে গিয়ে!"

"না।"

"না ?"

"না-ই তো। একদিন নিজের মুখে তুমি তাঁকে এ বাড়িতে আসতে বারণ করেছ—"

“করেছি, এবার গলবস্ত্র হয়ে সে অপরাধ ক্ষয় করব।”

“ক্ষয় হয় না এমন অপরাধও তো জগতে আছে গো ? যাক, তবু আমি করতে চাই না, তবে এ বাড়িতে আর পা ফেলতে বলব না তাঁকে, নিজেই গিয়ে যা পারব—”

“এই তোমার জন্য একদিন দেশত্যাগী হতে হবে আমায়!”

নবকুমার মুখের চেহারা বিরক্তির চরম নমুনা দেখায়। কিন্তু সত্য নির্বিচার, বলে, “দেশত্যাগী হবে বললেই কি হওয়া যায় ? যায় না। যাক গে, তুমি আর এ নিয়ে মাথা খারাপ করো না। আমিই ব্যবস্থা করে নেব। তবে জানানোটা হয়ে থাকল।”

মাথা খারাপ করতে বারণ করলেই কি আর নিজের দায়িত্ব ত্যাগ করতে পারে নবকুমার ? মাথা সে খারাপ করছেই। শেষ অবধি ভেবে হৃদিস না পেয়ে হাল ছেড়ে দেয় সে, আর ইত্যবসরে সত্য স্বাধীন অভিযান চালায়। নিজেও রওনা হয় ভবতোষের বাড়ি।

পথের সঙ্গী ?

আর কেউ নয়, সুহাস।

হ্যাঁ, সুহাসের সঙ্গেই গিয়েছিল সত্য। সুহাস ঠিকানাটা শুনে বলেছিল, “ওমা, এ তো আমাদের ইকুলের কাছেই—”

“ঠিক আছে, তবে তোতে আমাতেই যাব—”

বলেছিল সত্য, আর বোধ করি মনের নিভৃত কোণে এটুকু গুণ্ড বাসনা ছিল, ভবতোষকে একবার ‘কনেটা দেখিয়ে দিতে। ঘটকালি যখন করবেন, তখন অন্তত মেয়ে কেমন তা যাতে বলতে পারেন!

এবার আর মাধ্যম নয়, সরাসরি নিজেই কথা।

ভবতোষ যেন হাঁ হয়ে গেলেন।

সত্য একটা অনাথা মেয়ে পুষেছে এ তিনি জানতেন, কিন্তু সে মেয়ে যে এমন মেয়ে আর এত বড় মেয়ে তা তাঁর ধারণার বাইরে ছিল। বিহ্বল দৃষ্টিতে কিছুক্ষণ তাকিয়ে থেকে চোখ নামিয়ে নিয়ে বললেন, “এ মেয়ের আবার পাশুরের ভাবনা, বৌমা ?”

“সে আপনি স্নেহ করে বলছেন। দিন তবে নর্তিনীর একটা ব্যবস্থা করে। আপনার সমাজে শুনেছি অনেক উদারমন ছেলে আছে যারা বিধবা বিয়ে করতে রাজী—”

বিধবা!

ভবতোষ খতমত খান, “বিধবা! এ মেয়ে যে লক্ষ্মী-প্রতিমা বৌমা, বিধবার মতন তো কোন লক্ষণ—”

সত্য সহসা বলে ওঠে, “তুই একবার পাশের ঘরে যা তো সুহাস, আমার একটু কাজ আছে।”

সত্যর এই দুঃসাহসিক স্পর্ধায় সুহাসও স্তম্ভিত হয়ে যায়। একেই তো এভাবে একটা পুরুষের বাসায় একা দুটো মেয়েছেলে আসাই ভয়ঙ্কর ঘটনা, তার ওপর কিনা “সুহাস তুই পাশের ঘরে যা!”

প্রায় হতভম্ব হয়েই চলে যায় সুহাস।

ভবতোষ হতভম্ব দৃষ্টিতে তাকিয়ে থাকেন এই ক্লকিনারাহীন দুঃসাহসের দিকে। আর সত্য নিঃস্বপ্ন মৃদুস্বরে বলে, “এসেছি যখন তখন আপনার কাছে ওর সব ইতিহাসই বলব।”

হ্যাঁ, সুহাসের সব ইতিহাসই বলেছিল সেদিন সত্য ভবতোষ মাষ্টারের কাছে। সুহাসের জনুর আগের বৃত্তান্ত থেকে শুরু করে পরিচয়ও বাদ দেয় নি। শঙ্করীর কুলত্যাগের পর রামকালীর স্পষ্ট স্বীকারোক্তির কথাটাও এসে পড়েছিল।

সব শুনে ভবতোষ গভীর একটা নিঃশ্বাস ফেলে বলেছিলেন, “এখন বুঝতে পারছি বৌমা, কোথা থেকে এ ধাতু পেয়েছ! অমন বাপ তাই—, কিন্তু কথা হচ্ছে বৌমা, এই আমাদের নতুন সমাজকে তুমি যে রকম উদার ভাবছ, ঠিক সে রকম নয়। এর মধ্যেও দলাদলি আছে রেঘারেশি আছে, তা ছাড়াও যে মেয়ের বংশপরিচয় নেই, সে মেয়েকে বিবাহ করার মত মনোবলসম্পন্ন যুবক পাওয়া শক্ত।

সত্য মৃদুস্বরে বলে, “শক্ত সহজ বুঝি না, চিরদিন জানি আমার কথা আপনি ফেলতে পারেন না, তাই জোর করতেই এসেছি। ওই মেয়েটার ব্যবস্থা আপনাকে করতেই হবে।”

ভবতোষ বিচলিত স্বরে বলেন, “আমি তোমার কথা ফেলতে পারব না, এ কথা তুমি জানলে কি করে বৌমা ?”

সত্য মুখ তুলে পরিষ্কার এবং শান্ত গলায় বলে, “এক কথা জানতে খুব বেশী কিছু লাগে না মাষ্টার মশাই, আমি তো মাটি পাথর নই। কিন্তু সে কথা থাক, আপনি শুধু আমায় ভরসা দিন—”

ভবতোষ একটু হাস্যের সঙ্গে বলেন, “চেষ্টা অবিশ্যি করব বৌমা, কিন্তু জোর করে তো বলতে পারছি না। যদি নিজেকে দিয়ে হত, তা হলে নয় আজন্মের ব্রত ঘুচিয়ে একবার তোমার সুন্দরী মেয়ের জন্যে বরসাজ সেজে নিতাম।”

সত্যও হেসে ফেলে। তারপর সকৌতুকে বলে, “তেমন ভাগ্য ওর থাকলে তো ? আমি কিন্তু বলে যাচ্ছি সব ভার আপনার ওপর রইল!”

ভবতোষ আকুলতা করেন, ভবতোষ ব্যাকুল হয়ে ওঠেন, বার বার বলতে থাকেন, “এ তুমি কি করলে বৌমা ? আমাকে এভাবে সত্যবন্দী করে রাখলে—”

সত্য বিচলিত হয় না।

সত্য দৃঢ়স্বরে বলে, “আমি ঠিক জায়গাতেই ঠিক কথা বলছি মাস্টার মশাই, এখন আপনি আছেন এই ভরসা।”

ভবতোষ আকাশ পাতাল ভাবতে থাকেন কোথায় সেই পাত্র যার হাতে ওই সোনার প্রতিমাটিকে দেওয়া যায়, আর যে ওর সমগ্র ইতিহাস শুনেও নিতে রাজী হয়।

ভেবে পান না।

একটা নিঃশ্বাস ফেলে বললেন, “এখন চট করে মাথায় আসছে না বৌমা, দেখি। কিন্তু একটা প্রশ্ন করি, এই যে তুমি এসেছ নবকুমার জানে ?”

সত্য মাথা কাত করে। অর্থাৎ “হ্যাঁ”।

ভবতোষ উদ্ভিগ্ন কণ্ঠে বলেন, “তবে ?”

“তবে আর কি ? ওনার অমতেই করতে হবে।”

“কাজটা কি ভাল হবে বৌমা ?”

সত্য মুখ তুলে বলে, “কিন্তু ওই মেয়েটার আখেরের কথা না ভেবে নিশ্চিন্দা হয়ে বসে থাকাই কি ভাল হবে মাস্টার মশাই ? আমার ঘরে সংসারে হয়তো একটু মনোমালিন্য হবে, হয়তো শ্বশুরবাড়ির মানুষেরা আমার মুখ দেখবে না, কিন্তু আদ্যের সেই সামান্য লোকসানটা কি একটা মেয়ের জীবনটা বরবাদ হয়ে যাওয়ার থেকে বেশী লোকসানের হল ?”

ভবতোষ এক মুহূর্ত নির্নিমেষে তাকিয়ে হঠাৎ ব্যাকুল রুদ্ধ কণ্ঠে বলে ওঠেন, “সন্ধ্যা হয়ে আসছে বৌমা, তুমি বাড়ি যাও। তোমায় কথা দিচ্ছি, ওর বিয়ের ভার আমি নিলাম।”

সত্য আকাশের দিকে তাকিয়ে দেখে, সন্ধ্যার চিহ্নমাত্র নেই। মাথাটা একটু নিচু করে বলে, “চিরতাকাল আপনার কাছে অন্যান্য আকর্ষণ করে আর পেয়ে সাহস বেড়ে গেছে মাস্টার মশাই, আমায় মাপ করবেন।”

“মাপ ? তোমায় আর আমি কি মাপ করব বৌমা ? নিজেকে যদি মাপ করতে পারতাম! সে যাক, মেয়েটি কোথায় গেল ?”

মেয়েটি! তাই তো!

তার তো, তদবধি আর কোন সাদা নেই। সত্য ব্যস্তভাবে বেরিয়ে আসে ঘর থেকে আর এই প্রথম খেয়াল হয় অনেকক্ষণ ধরে সে এই তৃতীয় মানুষহীন ঘরে একজন পুরুষের সঙ্গে নিশ্চিন্তে কথা বলছে বসে বসে।

সুহাস কি বিরক্ত হল ?

পাশের ঘরে চলে যেতে বলেছে বলে অপমানিত হল ?

পাশের ঘরের দরজায় এসে দাঁড়াল সত্য, কোথায় সুহাস ?

একা চলে গেল না তো ?

সহসা একটা আতঙ্কের বিদ্যুৎশিখা মাথা থেকে পা পর্যন্ত যেন শিউরে উঠল সত্যবতীর। নিশ্চয় তাই!

“কই ?”

প্রশ্ন করলেন ভবতোষ।

সত্য অক্ষুটে বলল, “কই দেখছি না তো! একা চলে গেল না তো ?”

একা!

একা চলে যাবে!

ভবতোষ সন্দেহের সুরে বললেন, “তাই কখনো হয় ? ওই কোণের ঘরটায় আছে বোধ হয়—”

“কোণের ঘরে ? ওখানে কি আছে ?”

“কিছু না। শুধু কতকগুলো—”

কথা শেষ হয় না। মুখে একঝলক আলো মেখে সুহাস সেই কোণের ঘরটা থেকে ছুটে আসে, স্বভাব-বহির্ভূত উচ্ছ্বাসে বলে ওঠে, “পিসিমা পিসিমা, দেখবে এস কত বই! উঃ, আমার আর এখন থেকে যেতে হচ্ছে করছে না!”

॥ বিয়াল্লিশ ॥



সময়ের বাড়া কারিগর নেই।

সময়ের ‘স্বাদার’ নিচেয় পড়ে সব অসমানই সমান হয়ে আসে, সব এবড়ো-খেবড়োই ভেলা হয়ে যায়।

সকল সংসারের মত নিতাইয়ের সংসারেও এই লীলা চলছে বৈকি। প্রথম দিকে এক-একদিন এক-একটা ছুতোয় মনে হত, নিতাই বোধ করি এই দণ্ডে বৌকে দেশে রেখে আসবে। অথবা বৌ ভাবিনী সেই রাগেই আড়ায় দড়ি ঝুলিয়ে নিজে ঝুলে পড়বে। কিন্তু কার্যকালে তেমন কিছুই হল না।

ক্রমশই, বোধ করি নিজেদের অজ্ঞাতসারেই, ভাবিনী স্বাধীন সংসারের সংসার-রসে এবং নিতাই আর এক স্থল রসে মজতে শুরু করল, অতঃপর দুজনেই পরস্পরের কাছে অপরিহার্য হয়ে উঠল।

অতএব খণ্ড প্রলয়ের সেই অবস্থাটি কোন ফাঁকে ফিকে হতে হতে বিলীন হয়ে গেল, দৈতো হাসি বাজার দখল করল।

এখন দেখা যাচ্ছে—নিতাইয়ের বৌ কুটি গড়তে শিখেছে, এবং নিতাই বৌকে ভয় করতে শিখেছে।

ভয় থেকেই আসে মনোরঞ্জন-চেষ্টা। ক্রমশই অনুধাবন করছে নিতাই, সত্যবতীর নিন্দাবাদটি হচ্ছে বৌয়ের মনোরঞ্জনের একটি প্রশস্ত পথ, মনোবৈকল্যের একটি প্রকৃষ্ট ওষুধ।

অতএব সেই প্রশস্ত আর প্রকৃষ্ট উপায়টিই বেছে নিয়েছে নিতাই। না নিয়ে করবেই বা কি? পরিবারে পরকলায় জগৎকে দেখতে না শিখলে যে জগৎ দুঃসহ হয়ে ওঠে। অন্তত নিতাইদের মত নিতান্ত গৃহগতপ্রাণ গেরস্থ জীবদের। এদের ও ছাড়া উপায় নেই।

আগুনের মালসা কোলে করে ছোঁ আর ঘর করা যায় না। আগুনে জল ছিটোতেই হয়। তদগতপ্রাণ বশব্দ হয়ে পড়াই সেই শীতল জল।

নারীজাতী যতই অবলা কোমলা হোক, স্বক্ষেত্রে সে বাধিনী। আর ইচ্ছাপূরণের অভাব ঘটলে ষণাধরা নাগিনী হয়ে উঠতেও পিছপা নয়। শান্তিকামী পুরুষজাতি যতক্ষণ না এটা ধরতে পারে, সংঘর্ষ বাধে, ততক্ষণ মনে করে এটা মেনে নেব না, অবস্থা আয়ত্তে আনা অসম্ভব হয় অথচ একবার বশ্যতা স্বীকার করলেই মিটে গেল গোল। কিসে তুষ্টি ধরতে পারলেই বিশ্বশান্তি।

অতএব এখন ভাবিনী যে কোন কারণেই মেজাজ গরম করুক অথবা বাক্যালাপ বন্ধ করুক, নিতাই এটা ওটা কথার ছলে স্বগতোক্তিক সুরে সত্যবতীর প্রসঙ্গ এনে ফেলে। সে প্রসঙ্গ আর যাই হোক প্রশস্তির পর্যায়ে পড়ে না।

দু-চারবার চেষ্টার পরই কার্যসিদ্ধি হয়, মৌনব্রতধারিণী ঝঙ্কার দিয়ে বলে ওঠে, “কেন, এখন আবার এসব কথা কেন? চিরদিনই তো শুনে আসছি তিনি গুণের গুণমণি! তাঁর পাদোদক জল খেতে পারলে তবে যদি আমাদের মত অধমদের উদ্ধার হয়!”

নিতাই সোৎসাহে কাজে এগোয়, “তা বলতে অবিশ্যি পার, এই মুখেই অনেক গুণগান করেছি বটে। কিন্তু এখন? এখন আর নয়। এখন আর তাঁকে চিনতে বাকী নেই। কি বলব তোমাকে, ওই ‘বেঙ্কট’ আর সঙ্গে যা নটঘটি, দেখে দেখে চিন্তির চটে গেল। অবশ্যি—” নিতাই মুখ কৌচকায়, “সন্দেহ একটু আধটু বরাবরই ছিল, তবে সে সন্দেহকে আমল দিতাম না। বলি, না না, ছিঃ! বামুনের ঘরের মেয়ে—কিন্তু এখন তো দেখছি চোখের চামড়াহীন বেপরোয়া! একলা ঘোড়ার গাড়ি ভাড়া করে তার বাড়ি গিয়ে গিয়ে—”

“তা তোমার বন্ধু কি কানা না বোবা?” ভাবিনী চিপ্টেন কাটে।

নিতাই মুচকে হেসে বলে, “পুত্রের পুরুষ শুধু কানা বোবা কেন, বোবা কানা কানা হাবা বুদ্ধ ভেড়া সব। ক্রমশই যে অবস্থা আমার ঘটছে আর কি!”

ভাবিনীর কালো কালো ডাবর ডাবর মুখে অহ্লাদ রসের হাসি উছলে ওঠে। সেও মুখটিপে বলে, “আহা লো মরি মরি! তবু যদি না রাতদিন এই বাঁদী খরহরি কম্প হয়ে থাকত! বেড়াপুরুষ কেমনধারা একবার দেখতে সাধ যায়।”

সেদিন নিতাই এই কথার পিঠে বলে ওঠে, “সাধ যায় তো চল না দেখবে। ও বাড়ি তো যেতেই চাও না।”

“পরের বাড়ি গিয়ে দেখে আর কি হবে?”

ভাবিনী “গুলি” চোখে কটাক্ষ হানে।

নিতাই বলে, “তা সকল বস্তুই কি আর ঘরেই মেলে গো? তবু দৃষ্টি সার্থক করবে তো চল। গুনলাম দেশ থেকে সদুদি এসেছে বোয়ের আঁতুড় ভুলতে। দেখা হবে—”

“সদুদি এসেছে?” ভাবিনী গালে হাত দিয়ে বলে, “আঁতুড় কলকাতাতেই উঠবে? গিন্গী দেশে যাবেন না? এঁ সময়ও শাউড়ীর ধার ধারবেন না?”

“তাই তো গুনছি। বলেছেন নাকি, কেন, কলকাতায় কি আর জন্মমৃত্যু হচ্ছে না?”

“তা ভাল!”

নিতাইয়ের বোয়ের মুখে অন্ধকার নামে। সত্যবতীর “খবরটা” শুনে অবধি একটা আশা ছিল কিছুদিনের মতন অন্তত ওই চক্ষুশূলটা চোখছাড়া হবে। আর সেই অবসরে ভাবিনী সত্যবতীর স্বামী-পুত্রকে নেমস্তন-আমস্তনর ছলে খাইয়ে মাখিয়ে বশ করে ফেলে বরকে তাক লাগিয়ে দেবে।

তা না এই বার্তা!

বাসায় বসে আঁতুড় তোলাবেন!

ত্রুন্ধকণ্ঠে বলে ওঠে ভাবিনী, “তা ভেড়া বর তাতেই রাজী তো? মা-বাপের মুখে চুনকালি দিয়ে বৌ আপনি স্বাধীন হয়ে বেটা-বেটি বিয়াবে—”

নিতাই চোখ মটকে বলে, “তা হোক। ও তো বাঁচল। খরিবারকে চোখছাড়া করতে হল না।”

কথাটা নিতাই অনুমানে বলল মাত্র। প্রকৃত ঘটনা কিন্তু তা নয়।

সত্যবতীর এ প্রস্তাবে নবকুমার শিউরেই উঠেছিল এবং “অসম্ভব” বলে উড়িয়েই দিয়েছিল।

“আঁতুড় পর্বের” মত একটা ভয়ঙ্কর পর্বের দেশের বাড়িতে গিয়ে না পড়ল মিটতে পারে, এ তার ধারণার বাইরে।

কিন্তু শেষ অবধি বরাবর যা হয় তাই হল। সত্যবতীর তীক্ষ্ণ যুক্তির বাণে নবকুমারের দ্বিধা লজ্জা ভয় সব টুকরো টুকরো হয়ে গেল।

ভয়টা কিসের?

কলকাতায় জন্ম মৃত্যু হচ্ছে না? ভূমিষ্ঠ শিশুর নাড়ি কাটা বাকী থাকছে?

লজ্জা?

লজ্জার অর্থ?

বুড়ো বয়সে যদি আবার কেঁচোগল্পে লজ্জা না হয় তো বাসায় আঁতুড় তোলাতেই লজ্জা?

অতএব?

দ্বিধার প্রশ্নটা অবান্তর।

নবকুমার অবশ্য এই ‘বুড়ো বয়সে’ কথাটায় রেগে উঠেছিল। বলেছিল, “বুড়ো বয়স বুড়ো বয়স করছ কেবলই কেন বল তো? আমার ছোট মাসীর পৌত্রুরে উপনয়ন হয়ে যাবার পর আবার একটা মেয়ে হয়েছিল—”

সত্য জ্বলন্ত দৃষ্টিতে শুধু তাকিয়েছিল একবার, তারপর সংক্ষেপে বলেছিল, “ওসব কথা থাক, এখানেই ব্যবস্থা করতে হবে সেই কথাটাই জানিয়ে রাখলাম।”

বলা বাছল্য মাত্র এইটুকুতেই কাজ হয় নি।

নবকুমার বিস্তর হাত-পা আছড়েছিল, বিস্তর আক্ষেপ জানিয়ে বলেছিল, “আমি ওসবের কি জানি? এখানে কাউকে চিনি আমি? ব্যবস্থা করতে হবে বললেই হল?”

তার পর সত্যর একটি তীব্র মন্তব্যে সহসা চুপ করে গিয়েছিল! আর অতঃপর একদিন বুদ্ধি করে চুপি চুপি গিয়েছিল সদুর বরের কাছে। গুনেছিল তার গণা তিন-চার ছেলেমেয়ে। সেগুলো নাকি কলকাতাতেই জন্মেছে, অতএব লোকটা অভিজ্ঞ।

তা অভিজ্ঞ লোকটা দরাজ ভরসা দিয়ে আশ্বস্ত করল নবকুমারকে এবং সেই সঙ্গে সদুকে আনিয়ে নেবার পরামর্শটা দিল।

দিন তিনেক ছুটি নিয়ে বারুইপুরে গিয়ে সদুকে এনে ফেলল নবকুমার।

কিন্তু যত সহজে বলা হল, কাজটা কি তত সহজে হয়েছিল ?

পাগল ? তাই কি সম্ভব ?

এলোকেশী একাধারে রাধুণী পরিচর্যাকারিণী এবং নিঃসঙ্গ সংসারের সঙ্গিনী সদুকে কি এক কথায় ছাড়তে রাজী হয়েছিলেন ?

হারামজাদী শতকথোয়ারী হাড়বজ্জাত বৌটার নামে একশো পালাপালের ছড়া কেটে, বেয়াক্কেলে বেহায়া বৌয়ের দাসানুদাস ছেলেকে কি শুধু-হাতে বিদায় করতে উদ্যত হন নি ? হয়েছিলেন।

কিন্তু ভেসে দিল স্বয়ং সদু।

সে বলে বসল, “আমি যাব।”

“তুই যাবি ?” এলোকেশী গর্জে উঠেছিলেন, “আক্কেলখাকী, চোখের মাথাখাকী, নেমকহারাম লক্ষীছাড়ি! তুই আমাদের একা ফেলে সেই হাড়হাবাতির পাদোদক খেতে যাবি ?”

কিন্তু সদু অনমনীয়।

সদুর যে এত গৌ আছে, এ কথা কে কবে জানত ?

এ যেন আর এক সদু।

সামান্য দু-চারখানা কাপড়ের সম্বল নিয়ে সদু সদরে দাঁড়িয়ে প্রত্নত।

আজনা অগঙ্গার দেশে মুখ খুবড়ে প্রাণ গেল সদুর, কালী-গঙ্গার দেশে যেতে পাবার এই সুযোগ ছাড়বে না।

তোমাদের কন্যা ? সে তো চিরকাল করে এল! সদুর কি ছুটি নেই ? সদু যদি মরে ? তোমরা কি না খেয়ে থাকবে ?

কে সদুকে এই বিদ্রোহের শক্তি দিল ঈশ্বর জানেন।

“খ” হয়ে গেলেন এলোকেশী, হকচকিয়ে গেল নবকুমার।

নীলাস্বর বাঁড়য্যের ত্রুঙ্ক গলায় বললেন, “যাচ্ছ যাও, কিন্তু আর কখনো এ ভিটেয় মাথা গলাতে এস না বলে রাখছি।”

সদু প্রণাম করে নম্র গলায় বলল, “আচ্ছা।”

দিশেহারা নবকুমার বলল, “ভয়ে আমার নাড়ি ছেড়ে আসছে সদুদি, থাক তোমায় যেতে হবে না। বৌয়ের যদি পরমায়ু থাকে বাঁচবে, আর যদি কপালে মৃত্যু থাকে—”

সৌদামিনী মৃদু হেসে বলল, “তোর বৌকে বাঁচাতে যাচ্ছি ভেবেছিস ? মোটেও না। নিজের কপালটা ফের আর একবার যাচাই করতে ইচ্ছে হয়েছে, তাই যাচ্ছি।”

এ কথার মানে নবকুমার বুঝতে পারে নি। চোরের মত মা-বাপের সামনে থেকে পালিয়ে এসেছে।

এলোকেশী উচ্চকণ্ঠে ভগবানকে ডাক দিয়ে আদেশ করেছেন—“ভগবান, যে সর্বনাশী আজীবন আমার বুকে কুলকাঠের আংরা জেলে রেখে দম্ভাল, আর বুড়ো বয়সে এই কোমরের বলটুকু পর্যন্ত কেড়ে নিয়ে মজা দেখতে বসল, তুমি তার বিচার করো। যদি ‘ন্যায়পরায়ণ’ হও তো সর্বনাশীর যেন তেরান্তির না পোহায়! তার ভরা ঘরে যেন দোর পড়ে, তার মুখের গেরাস যেন বাসি চুলোর ছাই হয়ে যায়, পরকালে এহকালে যেন তার গতি না হয়।”

সত্যবতীর আরো অনেক ভয়াবহ পরিণতির জন্য ন্যায়পরায়ণ ভগবানের কাছে আবেদন জানাতে থাকেন এলোকেশী সুর করে ছন্দে গাঁথে।

না, কথাটাকে মিথ্যা ভাববার হেতু নেই, বাড়াবাড়ি ভাবলেও ভুল ভাবা হবে, সত্যবতীদের আমলে এলোকেশীরা নিতান্তই বিরল ছিল না।

আর আজই কি আছে ?

নেই। শুধু হয়তো অভিশাপের বাণীগুলি সভ্য মার্জিত স্মৃষ্ণ হয়েছে। তীব্র চিৎকারটা তীক্ষ্ণ মন্তব্যে পরিণত হয়েছে।

সে যাক, সত্যবতীর কানে এসব পৌঁছল না। বিনা নোটিশে হঠাৎ সদুর আবির্ভাব প্রথমটা একটু বিমূঢ় হয়ে পড়েছিল সে। তার পরই অবশ্য সামলে নিল। হাসিমাথা মুখে বলল, “যাক, ভালই হল। সংসারটা একজনের হাতে তুলে দেবার লোক হল। এবার নিশ্চিন্দ হয়ে মরে বাঁচব!”

সদু ভুরু কৌঁচকাল, “কেন, মরার কি হল ? রাজ্যসুদ্ধ মেয়েমানুষ মরছে ?”

সত্যবতী হাসল, “কি জানি, এবার কেবলই মনে হচ্ছে মরে যাব। কালের ঘণ্টা কানে বাজছে যেন।”

তা যে ঘণ্টাই কানে বাজুক, মরে অবিশ্যি গেল না সত্যবতী। শুধু দীর্ঘকাল যমে-মানুষে টানাটানি চলল, শুধু সত্যবতীর সংসারে অনেক গুলটপালট কাণ্ড ঘটে গেল, আর সত্যবতীর মনোজগতে অনেক বিপর্যস্ত ধাক্কা মেরে মেরে আরো দৃঢ় করে তুলল সত্যবতীকে।

এরই মাঝখানে সত্যবতীর নবজাত কন্যা কেবলমাত্র কান্নার জগৎ থেকে হাসির জগতের উঁকি দিতে শিখে ফেলল।

সাধন সরল দুই ডাই কাঁচের পুতুরের মত মেয়েটাকে ‘গলার হার’ করে তুলল, আর নবকুমারের দেখা দিল প্রবল একটি বাৎসল্যরসের ধারা। তবু তার যেন নববধুর লজ্জা!

যদিচ মেয়ে সন্তান কানাকড়ি মাত্র, তথাপি দেখতে হচ্ছে করে, নাড়াচাড়া করতে হচ্ছে করে। আর স্নেহের বস্তু বলে মিষ্ট একটা অনুভূতি আসে।

সাধন সরল তার অপরিণত বয়সের ফল। সে বয়সে বাৎসল্যরসের সৃষ্টি হয় নি। বরং সেই নবযৌবনের তীব্র আবেগের সময় গুদের আপদ বালাইয়ের মতই মনে হত।

এখন সকাল নেই।

এখন সত্যবতী তো হাতছাড়াই। তবু এর সূত্রে যদি আবার একটু সরসতা আসে এই আশা। যমে-মানুষে টানাটানির লড়াইয়ের মানুষই জিতেছে, তাই মেয়েকে পয়মস্তও মনে হচ্ছে নবকুমারের!

মোট কথা সংসার বেশ ভালই চলছে নবকুমারের।

কিন্তু এ বাড়িতে সুহাস বলে যে একটা মেয়ে ছিল? সে কোথায় গেল? তাকে তো আর দেখা যায় না? সে কি তবে মারা গেছে? নাকি তার কুলত্যাগিনী মায়ের পদাঙ্ক অনুসরণ করে কুলত্যাগই করেছে?

তা নবকুমার তাই বলেছে।

প্রায় কুলত্যাগের দিক্কারই দিয়েছে তাকে। জীর্ণদেহ সত্যবতীর সামনে তীব্রকণ্ঠে দিক্কার ঘোষণা করতেও দ্বিধা করে নি। বলেছে, “আর যেন গুট্টি এ বাড়ির ছায়া না মাড়ায়! কুলত্যাগে আর ধর্মত্যাগে তফাতটা কি? না-ই বা বিয়ে হত? হিন্দুর ঘরের মেয়ে, ঠাকুর-দেবতার পূজোপাট করে জীবনটা কাটিয়ে দেওয়া যেত না? একটা স্বাপ্নের বয়সী বুড়োর সঙ্গে—ছি ছি ছি!... বুঝলে তুড়ুর মা, আমড়া গাছে কখনো ন্যাংড়া ফলে না! এই যে তুমি এতদিন গাছের গোড়ায় জল ঢাললে, এত সার দিলে, ন্যাংড়া কি ফলল? আমড়ার ছান্দা আমড়াই হল!”

সত্যবতী হাত নেড়ে ধামবার ইশারা করে পাশ ফিরেছিল।

এখন আর সত্য শয়্যাগত নয়, তবু বেশীর ভাগ বিছানাতেই পড়ে থাকে। সদু এসে তার সংসারভার হাতে তুলে নেওয়ায় সত্য যেন অদ্ভুত একটা মুক্তির স্বাদে মগ্ন হয়ে আছে। সদু যেই বলে, “থাক থাক বৌ, তুমি আবার কেন উঠে এলে রোগা মানুষ—” অমনি সত্য গিয়ে ঝুপ করে গুয়ে পড়ে। আগের মত তর্ক করে না, বলে না, এখন তো ভাল আছি। গুয়ে পড়ে—

আর বেশীক্ষণ গুয়ে থাকলেই সেইদিনের অভিনীত নাটকটার দৃশ্যগুলোই তার চোখের পর্দায় ছুটোছুটি করে বেড়ায়।

গোড়া থেকে সবটাই জানে সত্য।

সত্যর জ্ঞান-চৈতন্য নেই ভেবে আঁতুড়ঘরের দোরে বসে সদু আর ভাবিনী সশব্দেই আলোচনাটা চালাচ্ছিল। কিন্তু অসুখট চৈতন্যের মধ্যেও সত্যর মাথার মধ্যে গুদের কথাগুলো যেন হাতুড়ির ধাক্কাই ধাক্কাই টুকে পড়তে লেগেছিল। অথচ গুদের নিষেধ করবার ক্ষমতা হয় না। না পারে হাত নাড়তে, না পারে কথা বলতে।

আর ভাবিনী হাতমুখ নেড়ে—হ্যাঁ, ভাবিনীই বজা, সদু শ্রোতা। দেশে থাকতে ভাবিনীর সাধ্য ছিল না যে পাড়ার বয়স্কদের সঙ্গে কথা বলে। কিন্তু এখানে আলাদা, এখানে ভাবিনী ‘একজন’। তাই হাতমুখ নেড়ে কথা বলতে বাধে না, “আর বলো না বামুন-ঠাকুরঝি, দেখে আমরা ‘খ’ হয়ে গেছি। ওই একটা বেজাতক বেজান্না আইবুড়ো ধুবড়ি মেয়েকে নিয়ে নাচানাচি, কী নাচানাচি!”

“জন্মের কথা কী বললে কায়ত বৌ?”

শিউরে উঠেছিল সদু।

অথবা শিউরে উঠেছিল সদুর চিরদিনের সংস্কারে পুষ্ট রক্তকণিকা।

সদু যে ওই মেয়েটার হাতে খাচ্ছেদাচ্ছে গো!

সে কথাই বলে ফেলল সদু।

“কে না খাচ্ছে ?”

ভাবিনী ঠোট উন্টেছিল, “নারায়ণের ঘরের ভোগ রোধবার দরকার হলেও বোধ হয় গিন্নী ওই ভাইঝিটিকে এগিয়ে দেবেন—”

“ভাইঝি!”

সদু বলেছিল, “রোস দিকি, আমায় আগে বুঝতে দাও সবটা। এই তো শুনছিলাম বিধবা, আবার তুমি বলছ আইবুড়ো, একবার জন্মের ষোঁটা শোনালে, আবার বলছ ভাইঝি, সব কেমন গোলমালে ঠেকছে যে!”

অচৈতন্য সত্যবতীর কানে বিষের তীর বিধতে থাকে, “ভাইঝি আমি বলছি না গো, উনিই ওই পরিচয় রটিয়ে রেখেছেন। যে ভাজ বারো বছরে বিধবা, তার বাইশ বছর বয়সের গর্ভের এই রত্ন! বোঝ ! মা কুলে কলঙ্ক ঘটিয়ে বাড়ি থেকে বেরিয়ে গেল, মামাশ্বশুর—মানে গিয়ে তোমাদের বৌয়ের বাবা, নাকি ঢাকে কাঠি দিয়ে দশজন মানিগণি লোককে ডেকে সেই বার্তা বড় গলা করে শোনালেন। আবার ইনি এককাল পরে সেই আঁস্তাকুড়ের জঞ্জালকে মাথায় করে এনে ঘরের মধ্যে দেবীপতিষ্ঠে করেছেন। কী বলব ভাই, তোমাদের বামুনের ঘরের রীতিনীতি দেখে আমরা হাঁ। বলছিলে বিধবা ? বিধবা নয় গো, খুবড়ি, আইবুড়িই। কে ওই জাতজন্মহীন ধরজাকে বে করবে যে বে হবে ? মা মাগী লোকলজ্জায় আর মেয়ের কাছে ঘেন্না ঢাকতে বলে বেড়াতে, পাঁচ বছরে বে, পাঁচ বছরেই বিধবা! ইনিও সেই কথাই চালিয়ে আসছেন। আবার শুনি নাকি বেঙ্কবাড়িতে বে দেবে বলে বর ঝুঞ্জছে।”

সদু কিছুক্ষণ গালে হাত দিয়ে বলে, “তা দিতেই পারে। মেয়েদের ইকুলে পড়াচ্ছে যখন। বৌয়ের শরীরে অনেক গুণ ছিল, ওই বুকের পাটাতেই সব হরে গেল। অতিরিক্ত তেজ, অতিরিক্ত আশ্পন্দা! নইলে কোন মেয়েমানুষের এ সাহস হয়, নন্দমার পাঁচ তুলে নিয়ে এসে পূজিয়া করে ? শুনে আমি হাঁ হয়ে যাচ্ছি কায়েত বৌ! রেখেছিস রেখেছিস, তার হাত্রে ভাত জল খাচ্ছিস কোন আক্কেলে ? নবাটাও তো—”

‘ওনার কথা আর তুলো না ঠাকুরঝি। উনি একেবারে কামরূপ কামিখোর ভেড়া। নচেৎ আর এতখানিটা হয় ? উনি সুদ্ধা হা সুহাস যো সুহাস! এদিকে তো মূনির মন টলে এমন রূপ! ওই কি ভাল থাকবে নাকি! দেখো কোন দিন কি করে বসে। মিশ্রো বলব না ভাই, ওই ভয়ে তোমাদের ভাইকে আমি সাধাপক্ষে এ বাড়িতে একা আসতে দিই নে। পুরুষ হচ্ছে মাছির জাত, ফুল থেকে উঠে পাঁচড়ায় গিয়ে বসে। ওই ছুড়ি—”

সহ্যের সীমা অতিক্রম করলে বৃষ্টি ষেবারও বোল্ ফোটে। তাই “অজ্ঞান অচৈতন্য” সত্যবতীর মুখ থেকে সহসা ক্রুদ্ধ গর্জন বেরিয়ে আসে। যেন মুখ চেপে ধরা কোন ক্রুদ্ধ জন্তুর আর্তনাদ!

এরা চমকে ওঠে।

“কি হল” বলে আঁতুড়ঘরের ঝিকে ডাক-পাড়াপাড়ি করতে থাকে এবং তার ঘণ্টা কয়েক পরেই সারাবাড়িতে অন্য একটা সোরগোল ওঠে।

প্রশ্ন আর বিস্ময়!

নেই ?

কোথায় গেল ?

শেষ কখন কে দেখেছে ?

কে দেখেছে ঠিক কেউ মনে করতে পারে না। দেখেছিল তো সর্বক্ষণ সবাই, হঠাৎ জলজ্যান্ত একটা মানুষ হাওয়া হয়ে যাবে ?

অথচ তাই গেল।

সুহাসকে পাওয়া গেল না।

সত্য চোখ বুজলেই যেন সেই কথাগুলো শুনতে পায়। সদু আর ভাবিনীর সেই নিতান্ত সহজ অসতর্ক উক্তি।

তার পর পট পরিবর্তন হয়।

আর এক দৃশ্য চোখে ভাসে।

যা নিয়ে পরে বহু শ্রেষায়ক কথা শুনতে হয়েছে সত্যকে। কিন্তু নাটকের সেই অঙ্কের উপর তো সত্যর কোনও হাত ছিল না। সেটা শুধু সত্যর চোখের সামনে ঘটেছিল।

আঁতুড়ঘরের দরজায় এসে দাঁড়িয়েছিলেন ভবতোষ মাস্টার।

দরজার একটা পাল্লা ধরে ভাঙ্গা গলায় আর্তনাদ করে উঠেছিলেন, “বৌমা!”

সত্য চমকে তাকিয়েছিল।

অবাক হয়ে চারিদিকে তাকিয়েছিল। এখানে উনি কেন! এ কি অঘটন? এমন উদ্ভ্রান্ত ভাবই বা কেন গুর? কী বলছেন এসব?

বুঝতে সময় লেগেছিল।

লাগবারই কথা।

কে ভাবতে পেরেছিল এ বাড়ি থেকে পালিয়ে গিয়ে আশ্রয় নিতে আর জায়গা পেল না সুহাস, নিতে গেল ভবতোষ মাষ্টারের বাড়ি! জীবনে যার বাড়িতে একবার মাত্র গিয়েছে, আর জীবনে যার সঙ্গে একবারও কথা বলে নি!

কিন্তু এবার গিয়ে কথা বলেছে।

অনেকগুলো কথা।

ভবতোষ তেমনি রুদ্ধকণ্ঠে আস্তে আস্তে উচ্চারণ করেন, “বলে কিনা—আপনার বাড়িতে একটা কিয়েরও তো দরকার হয়। সেই ভাবেই থাকব আমি। সব কাজ করব। আপনি তো উদারধর্মী, আপনার তো আমার হাতে খেতে খেন্না করবে না! শোন দিকি কথা—তোমার ওই দেবকন্যার মত মেয়ে, তার হাতে খেতে খেন্না করবে!”

সেদিন সত্যর বাক্যক্ষুভিত শক্তি ছিল। সেদিন সত্য আস্তে আস্তে বলেছিল, “আপনি তো একথা বলছেন, লোকের যে খেন্না করে!”

“খেন্না করে?”

“করবে বৈকি!” সত্যবতী বালিশ থেকে ঘাড়টা একটু তুলে ক্ষুব্ধ হেসে বলে, “করবে না কেন? আপনি তো গুর সবই জানেন মাষ্টার মশাই, বিশ্বসুদ্ধ লোকই ওকে খেন্না করবে।”

“করতে পারে”, ভবতোষ আবেগরুদ্ধ কণ্ঠে বলে উঠেছিলেন, “আমি তা হলে তোমার এই বিশ্বসংসারে কেউ নই বৌমা!”

সত্য এক লহমা অপরকে গুর মুখের দিকে তাকিয়ে বলেছিল, “জানি। আর সে মুখপুড়ীও এক নিমেষে সে কথা জেনে ফেলেছিল। তাই আগুনের ঝাপটা থেকে বাঁচতে ছুটে গিয়েছে আপনার কাছেই শরণ নিতে।”

“কিন্তু এক্ষেত্রে আমি কী করব?” ভবতোষ ব্যাকুল বিব্রত বিভ্রান্ত, “আমার বাসায় মেয়েছেলে বলতে কেউ নেই—”

“নাই বা থাকল—” সত্য মৃদু হেসেছিল, “ও সব চালিয়ে নিতে পারবে।”

চালিয়ে নিতে পারবে?

ভবতোষ হতাশ স্বরে বলেন, “তুমিও কি তোমার ভাইবির মত পাগল হয়ে গেলে বৌমা? তাকেও তো কিছুতেই বোঝ মানাতে পারলাম না। গাড়ি দাঁড় করিয়ে রেখে শত সাধ্যসাধনা করলাম, সেই এক কথা, ‘আপনার সব কাজ করে দেব, তার বদলে এক কোণায় একটু থাকতে দিন আর আপনার বইগুলো পড়তে দিন। আর কিছু চাই না আমি।’ শোন পাগলামি!”

সত্য হঠাৎ গাঢ়স্বরে বলে, “পাগলামি কেন বলছেন মাষ্টার মশাই, এর থেকে ভাল আশ্রয় ও আর কোথায় পাবে? গুর জনুর বিস্তান্ত গুনেও কে ওকে ছেঁদা করবে, স্নেহমমতা করবে?”

ভবতোষ আরও ব্যাকুল হয়ে বলেন, “সে সব তো বুঝলাম, গুই জনোই পাত্র যোগাড় করে উঠতেও পারছি না। অথচ তুমি বলেছ সব কথা খুলে বলতে। কিন্তু একটা কথা তুমি বুঝছ না—”

ভবতোষ থামেন।

সত্য শান্তস্বরে বলে, “বলুন?”

“বলছি—” ভবতোষ কেসে বললেন, “আমার জন্যে ভাবি না, আমার তিনকুলে কে বা আছে, গুর জনোই বলছি—যতই আমি তিনকুলে বুড়ো হই, লোকনিন্দের তো কসুর হবে না তাতে! আমার বাসায় কী পরিচয়ে রাখবো ওকে?”

সত্য একটু হেসে বলে, “দাসী পরিচয়েই রাখুন।”

“তুমি বোধ করি আমায় নিয়ে মজা দেখছ বৌমা!” ভবতোষের আক্ষেপটা যেন আছড়ে পড়ে।

আঁতুড়ের দরজায় এই দীর্ঘস্থায়ী দৃশ্য।

সদু গালে হাত দিয়ে দালানে বসে, আর নবকুমার খাঁচার বাঘের মত ছটফট করছে। আর ধৈর্য থাকে না। নবকুমার এগিয়ে এসে বলে, “মাষ্টার মশাই, বাইরে কি আপনার গাড়ি অপেক্ষা করছে? না একখানা ডাকতে পাঠাব?”

ভবতোষ বিমূঢ় দৃষ্টি মেলে তাঁর একদা ভক্ত শিষ্যের মুখের দিকে তাকান, এবং সেই মুহূর্তে গুনতে পান সত্যবতীর ক্ষীণ কিন্তু স্পষ্ট স্বর আদেশের সুরে উচ্চারিত হল, “থাক, গাড়ির জন্যে কারুর ব্যস্ত থাকতে হবে না মাস্টার মশাইয়ের সঙ্গে আমার এখনো দুটো দরকারী কথা আছে, আর সকলের একটু ওদিকে গেলে ভাল হয়।”

আর সকলের ওদিকে গেলে ভাল হয়!

এর চাইতে সত্য কেন একখানা থান ইট মারল না নবকুমারের মাথায়? কিন্তু উপায় নেই। ডাক্তার বলে গেছে রুগীর বুক হালকা, রাগ দুঃখ কোন কিছুতেই যেন বেশী উত্তেজিত না হয়।

কাজে কাজেই মনের রাগ মনে চাপা।

হ্যাঁ, ডাক্তার ডাকতে হয়েছিল, আঁতুড়ঘরে ডাক্তার আসা সদু নবকুমার সকলের জানেই এই প্রথম। তা উপায় কি? সদুই জোর করে আনিয়েছিল। বলেছিল, “যে কালের যে শাস্ত্র। তুই আর ইতস্তত করিস নে নবু। কলকেতায় যখন বাসা করে আছিস, কলকেতার মতই হোক। বারুইপুরের সেই গর্তয় গিয়ে পড়লে তো মরেই যেত, এ যদি—”

তা সেই ডাক্তারের নির্দেশেই স্নান মাথাঘষা বন্ধ, কাজেই একুশে ষষ্ঠীও মূলতুবী। একুশ দিনের আঁতুড় একত্রিশ দিনে গিয়ে ঠেকেছে।

তা ছাড়া মুশকিলই কি কম?

বাড়ির লোকের সেবা-যত্নটা তো পাচ্ছে না! সেবা বলতে সেই হাঁড়ি দাই মাতঙ্গিনী। সেরে উঠবে কি করে?

অথচ আঁতুড়ের দরজাতেই এই সব কাণ্ড।

“চলে যেতে হবে! ও!” বলে দুমদুম করে চলে যায় নবকুমার।

ভবতোষ অপ্রতিভের একশেষ হয়ে বলেন, “আমি যাই বোমা!”

“না।”

সত্য দৃঢ়স্বরে বলে, “কথা তো শেষ হয় নি। আপনি বললেন, আমি আপনাকে নিয়ে মজা দেখছি, এই কি একটা কথা?”

“কি করব বোমা, দিশেহারা হয়ে যাচ্ছি বলেই—”

“কেন হবেন?” সত্য স্থির স্বরে বলে, “দিশেহারা সামনেই রয়েছে। আপনি সেদিন ঠাট্টা করে বলেছিলেন, সুন্দরী নাতনীর জন্যে যদি আপনার শিক্ষায় টোপের দিতে হয় তো দেবেন। সেই ঠাট্টাটাই সত্যি করে তুলুন।”

“বোমা!”

“অস্থির হবেন না মাস্টারমশাই, আমি বলছি এই ভাল হবে।”

“এই ভাল হবে!”

“হ্যাঁ। আপনি আর দ্বিধা করবেন না। বিনা পরিচয়ে একটা মেয়েছেলের থাকায় নিন্দে, আপনিই পরিচয় দিয়ে দিন ওকে। পরিচয়ের মত পরিচয়।”

“তুমি কি আমাকে আমার চিরদিনের অপরাধের শাস্তি দিতে চাও বোমা?”

ভবতোষের কণ্ঠে দৈন্যের সঙ্গে একটা জ্বালা ফুটে ওঠে বুঝি।

কিন্তু সত্যবতীর কণ্ঠে ফুটে ওঠে স্নিগ্ধ স্নেহের করুণা।

“ছি ছি, ওকথা বলছেন কেন মাস্টার মশাই! বরং বলুন এ আমার এতকালের শিক্ষা-দীক্ষার গুরুদক্ষিণা। লেখাপড়া জানা বুদ্ধিমত্তী মেয়েরা আপনার প্রিয়, এ আমার জানা, সুহাস আপনার অপছন্দের হবে না।”

ভবতোষ ক্ষুব্ধ হাস্যে বলেন, “পছন্দ জিনিসটা শুধু বেটাছেলের একচেটে নয় বোমা! সে এই জেঠার বয়সী বুড়োটাকে—”

“তাতে কি?”

সত্য সর্কৌতুক হাস্যে বলে, “মহাদেবও তো বুড়ো, তবু তো মেয়েরা তাঁকেই বর চেয়ে “বস্ত” করে। সুহাস যদি সেকথা না জানত তো আপনার কাছেই ছুটে যেত না।”

আন্তে আন্তে কণ্ঠস্বর গাঢ় হয়ে আসে সত্যবতীর, “সুহাস আপনাকে ভক্তি করে, জেনে বুঝেই সে আপনার আশ্রয় নিতে গেছে। আপনিই শুধু বুঝতে পারছেন না। মেয়েমানুষ মুখ ফুটে আর কত বলবে?”

“কিন্তু আমি তো ভেবে কুল পাচ্ছি না বোমা, হঠাৎ এমন কি নতুন ঘটনা ঘটল যে সে অমন করে ছুটে গিয়ে—”

“বলব, সব বলব। আজ আর পারছি না।”

সত্য একটু ক্লান্ত হাসি হাসে।

তবু ভবতোষ কথা বলেন।

কাতরকণ্ঠে বলেন, “এই কি তোমার শেষ রায় বৌমা? এই শান্তিই মাথায় তুলে নিতে হবে আমাকে?”

সত্য আবার একটু কৌতুকের হাসি হাসে, “এবার কিন্তু আমি রেগে যাব মাষ্টার মশাই! আমার জামাই হওয়া বুঝি আপনার শান্তি?”

ভবতোষ একটুক্ষণ চুপ করে তাকিয়ে থেকে বলেন, “তবু আমি হয়তো কোনদিনই আমাকে ক্ষমা করতে পারব না বৌমা! মনে হবে—”

“তুল ভেবে মনে কষ্ট করবেন না। এখন কি মনে হচ্ছে জানেন? মনে হচ্ছে—” শেষের কথাটা যেন নিজেকেই নিজে বল সত্য, “মনে হচ্ছে, সুহাসকে বুঝি এমন মনের মত গড়তে চেষ্টা করেছে আপনার কথা ভেবেই। শুধু সে কথা নিজেই টের পাই নি এতদিন।”

॥ তেতাল্লিশ ॥

একেই বুঝি বলে “পরকীয়া ভাব”।

শোনা যায় ভগবানকে ভজবার এ একটা সহজ রাস্তা। মুখ্যে মশাই এই পথটাই ধরেছেন। অবশ্য ভগবানের ধার ধারেন না মুখ্যে মশাই, মানুষ নিয়েই কারবার তাঁর। তবে তাজ্জবের কথা এই, যে মানুষটাকে একদিন ঢিল পাটকেলের মত লাথি মেরে ছুঁড়ে ফেলে দিয়েছিলেন, এখন তার আশেপাশেই ঘুরঘুর করে বেড়াচ্ছেন।

মুখ্যে মশাই এখন নবকুমারের সংসারের প্রায় প্রতিদিনের অতিথি। বেশীর ভাগ সন্ধ্যার দিকটিতেই আসেন, সদুর যখন সাংসারিক কাজগুলো হালকা হয়ে আসে। হ্যাঁ, সত্যবতীর সংসারের কাজই স্বৈচ্ছায়

নিজের কাঁধে তুলে নিয়েছে সদু, হয়তো বা ঐ গুণশরীর সত্যর প্রতি মমতাবশে, হয়তো বা নিজস্ব অভ্যাসবশে, আর নয়তো বা এ সংসারে নিজের প্রয়োজনীয়তা স্পষ্ট প্রত্যক্ষ রাখবার বাসনায়। হয়তো মনে করে— নবকুমার যেন না ভাবে “আর কেন”। সত্যকে কুটোটি ভাঙতে দিলে নবকুমারের সদুর সম্পর্কে সহজে আস্থা আসবে না।

তা মনের কথা মনই জানে। মোটের উপর সদু কলকাতাতেই রয়ে গেছে এখনো এবং এ সংসারে জুতো সেলাই থেকে চণ্ডীপাঠ সব করছে। তবু সন্ধ্যার দিকে বসে থাকবার সময় পায় সদু। একে তো এখানের এই শহরে সংসারের কাজ তার কাছে তৃণসম, তা ছাড়া প্রবল এক উৎসাহে রাত্রের রান্নাটা সে বিকেলেই সেরে ফেলে।

সন্ধ্যার দিকে মুখ্যে মশাই আসেন।

সদু মনে নবোঢ়ার লজ্জা আর মুখে নবোঢ়ার আভা নিয়ে ভাইপোদের চোখ বাঁচিয়ে তামাকে ফুঁ দিতে দিতে এসে কাছে দাঁড়ায়।

এ ঘরটা সেই কোণের দিকে ছোট ঘরটা, যে ঘরে সুহাস থাকত। সুহাস তার সমস্ত ব্যবহারের জিনিসগুলি ফেলে চলে গেছে। সুহাসের স্মৃতি আঁকড়ে সে ঘর তার মত করে সাজিয়ে রেখে দেবে, এত ভাবপ্রবণতা এ সংসারের নতুন ব্যবস্থাপনায় নেই। সত্য তো ঢোকেই না এ ঘরে।

সদু এ ঘরটায় রাজ্যের আজোবাজে জিনিস এনে ঠেলে রেখেছিল, শুধু সুহাসের শোবার চৌকিটায় একটা সভ্যভাব শতরঞ্জি বিছানো আছে। আছে তাকিয়া।

মুখ্যে মশাই প্রায় যেন চুপিচুপিই এসে সেই তাকিয়ায় কনুই ঠেসিয়ে সেই চৌকিটিতে বসেন, সদু তামাক এনে হাতে দেয়।

মুখ্যে মশাই একটু রহস্যঘন হাসি হেসে কলকে ধরা হাতটাও কাছে টেনে বলেন, “এখনও তোমার কনে-বৌয়ের লজ্জা গেল না। বসো না এখানে।”

বলা বাহুল্য ‘এখান’টা সেই স্বল্পপরিসর চৌকির সামান্যতম ফালিটুকু। ভারী মুখ্যে মশাই তো প্রায় বাকী সব জায়গাটাই দখল করে আসছেন। অতএব বসতে গেলে নিতান্ত ঘনিষ্ঠ হওয়া ছাড়া উপায় নেই।

তবে সদু পতিদেবতার এ অনুরোধটুকু রাখে না। “নাঃ, এই বেশ বসছি!” বলে মাটিতেই বসে চোকির সামনে।

খুব কি গল্প করে সদু তার এতদিনের ফিরে পাওয়া বরের সঙ্গে ?

নাঃ, তা করে না।

কথা কোথায় ?

কথার বয়সই বা কোথায় ?

অনেকক্ষণ ভুড়ভুড় করে তামাক টানতে থাকেন মুখুয্যে মশাই, তারপর এক সময় হয়তো বললেন, “তারপর গরীবখানায় কবে যাচ্ছে বড়বৌ ?”

সদু এতক্ষণে বসে বসে হাতের নখ খুঁটছিল কি আঁচলের খুঁটটা আঙুলে জড়াঙ্ছিল, এ প্রশ্নে সচকিত হয়ে নড়েচড়ে বসে বলে, “এখন আর ছেড়ে দিয়ে তোড়ে ধরে কি হবে ? জীবনটা তো বয়েই গেল!”

মুখুয্যে মশাই নিটোল বপুটি দুলিয়ে বেশ একটু হেসে নিয়ে বলেন, “ও কথা শুনেছে কে গো বড়গিন্নী ? গড়নে পেটনে এখনও তো ছুকরিটি আছ। বরং আমার বাড়ির ওটি একেবারে বুড়ীর বুড়ী তস্য বুড়ী হয়ে গেছে। মাথার সামনে কপালজোড়া টাক, দাঁতগুলো খুলে নড়বড় করছে, হাতে পায়ে হাজা, আর গড়ন ? সে আর কী বলব তোমায়—” বিস্মী একটা মুখভঙ্গী করে কথাটা শেষ করেন মুখুয্যে মশাই, “তাকাতে ঘেন্না করে। আমি তাই এখনো ঘরে রেখেছি, অন্য স্বামী হলে টান মেরে বাপের বাড়িতে ফেলে দিয়ে আসত।”

সদু অবশ্য সতীনের সম্পর্কে স্বামীর এই অকচিকর মন্তব্যে পুলকিত হয় না বরং বেজার ভাব দেখিয়ে বলে, “তা তো বলবেই এখন। তার শাঁস-মাস সব খেয়ে ছোবড়াটাকে টান মেরে ফেলে দেবার কথা তোমার মুখেই শোভা পায়। সাধে কি আর বলেছে পুরুষ প্রজাপতির জাত।”

মুখুয্যে এ অপবাদে লজ্জিত হন না। বরং ফ্যাক ফ্যাক করে হেসে বলেন, “তা সে দোষ তবে বিধাতার। তিনি যে জাতকে যেমন করে গড়েছেন। কিন্তু মাই বল বড়বৌ, আমিও তো এতগুলো ছেলপুলের বাপ হয়েছি, তারপর তোমার গিয়ে দু-দুটো মেয়ের বে দিলাম, নাতির অনুপ্রাশনে ঘটা করলাম, এ সংসারের যাবতীয় করণ-কারণ করে চলেছি, আর ওই শূয়োরের পাল পুষছি। টসকেছি একটু ? রূপ-যৌবন রাখতে জানা চাই, বুঝলে বড়বৌ ?”

বলেই হাতটা বাড়িয়ে সদুর গালে একটি টোকা মেরে বললেন, “তা তোমাকে সে কথা শোনানো চলে না। তুমিও জান নচেৎ তুমি কিছু এযাবৎ আমার সংসারে সোনার খাটে গা রূপোর খাটে পা দিয়ে বসে থাক নি! দাসীবিপ্তি কর্তে করতে জীবন গেছে, তবু কেমন চেকনাইটি!”

সদু কি এই স্তাবকতায় ভুলবে ?

সদু কি বলে উঠবে, “এই বুড়ো বয়সে তুমি আমার মনের দিকে না তাকিয়ে শরীরের চেকনাইয়ের দিকে তাকাচ্ছ ? লজ্জা করছে না ?”

কিন্তু কি করেই বা বলবে ?

সদুর এই তুচ্ছ শরীরটার দিকেই বা কে কবে তাকিয়েছে ? এই লোকটাই তো মারের চোটে ঘরছাড়া করেছে সদুকে। তখন তো সদুর বয়সকাল, কী অগাধ স্বাস্থ্য, আর রূপটাও ফেলনা ছিল না।

আর কত হাসি-খুশি স্বভাব ছিল।

সদু তখন বৃদ্ধ না, হয়তো বা এখনো বোঝে না, সে অগাধ স্বাস্থ্য আর বপুটাই অনিষ্টকারী হয়েছিল সদুর। হাসিটাও। সংসারে তখন মেলাই লোক— দ্যাওর, ভাণ্ডর, বড় বড় ভাগ্নে— তাদের চোখের সামনে থেকে সেই স্বাস্থ্য আর লুকিয়ে বেড়াবার কথা মাথায় আসত না সদুর। তাই সদুর দুর্দান্ত বরের মাথায় রক্ত টগবগ করে ফুটত।

অতএব রাতদিন যে দেহটাকে হাতের মুঠোয় পিষতে হচ্ছে করত ডাকাতটার, সেই দেহটাকে সে ফুটবলের মত লাথিয়ে লাথিয়ে ঘরের বার করে দিত।

সদুর যে রূপ আছে স্বাস্থ্য আছে, সে কথা সদু কারো মুখে কোনদিন শোনে নি।

তারপর গঙ্গায় কত জল বয়ে গেল, কত দিন রাত্রি মাস বছর পার হয়ে গেল, সদুর “যৌবন” নামক বস্তুটা কোন খবর না দিয়েই বিদায় নিল, তবু মাজা মাজা গড়নের দেহটা সদুর তেমন ভাঙে নি। এখন এক লালসাত্তর লুকু ধৌচের দৃষ্টি পড়েছে সেদিকে।

এ দৃষ্টি স্বামীর দৃষ্টি নয়, পরপুরুষের দৃষ্টি। পড়ে পাওয়া চোন্দ আনা, পরস্ত্রীর মতই দেখছে আজ মুখুয্যে তার যৌবনে বিভাড়িতা স্ত্রীকে।

তবু বিহ্বল হচ্ছে সৌদামিনী।

জীবনে একবারও বিহ্বলতার স্বাদ উপভোগ করতেই হতো।

কিন্তু নিজের বাড়িতে নিয়ে যেতে না পারলে জুং কোথায় সদুর বরের ? সন্ধ্যাবেলা নবীন নায়কের ভঙ্গী নিয়ে এসে বসে গল্পগুজব কিছুদিন বেশ ভাল লাগছিল, এখন আর শুধু তাতে মন উঠছে না। তা ছাড়া ছোটবৌটার সত্যিই বুঝি মরণদশা ঘনিয়ে এসেছে।

সময় অসময়ে বড় মেয়েটা শ্বশুরবাড়ি থেকে এসে ভাত-জল করত, কিন্তু সেও এখন আসন্নপ্রসবা। মেজটা তো এই বয়সেই মা-ঘণ্টীর বরণপুত্রী। তাদের এনে লাভ নেই।

তাই সদুর কাছে অনুনয়-বিনয় চলে।

সদু কিন্তু সহজে হ্যাঁ করে না।

বলে, “কেন, এই তো বেশ। আসছ, বসছ, চোখের দেখা দেখছি—”

মুখুয্যে চোখ টিপে বলে, “শুধু চোখের দেখাতে কি পেট ভরে গো ?”

“আর পেট ভরায় কাজ নেই।”

“তুমি তো বললে কাজ নেই। আমি যে এদিকে বছরভোর উপোসী! তা ছাড়া মাইরী বলছি বিশ্বাস কর, মাসের মধ্যে পাঁচদিন সত্যি পেটের উপোসে কাটে। লক্ষ্মীছাড়া মেয়েমানুষটা একবার যদি ‘পারছি না’ বলে গুলা তো কার সাধ্যি ওঠায়। বাজার থেকে মুড়ি চিড়ে এনে ওর রাবণের পুরীর পেট ভরাতে হয়।”

সদু ভুরু কুঁচকে বলে, “আর নিজে ?”

“নিজে ? নিজের ওই বামুনের হোটেল আছে একটা পাড়ায়, সেই গতি। নগদ চার গড়া পয়সা ফেলে—”

সদুর মনটা কি দুলে ওঠে ?

মনে হয় কি, চিরজীবনই তো ভাতের হাঁড়ি নাড়লাম, কিন্তু সার্থকের ভাত রাখলাম কই ? ভাত বেড়ে স্বামী-পুত্রের পাতের সামনে ধরে দিতে পেলাম কবে ?

স্বামী-পুত্রের কোলে ভাতের খালা এগিয়ে দিতে না পারলে আর—

পুত্র ? ও বাড়িতে যারা আছে তারা কি সদুর পুত্র ?

তা একরকম পুত্রই বৈকি। স্বামীরই সন্তান তো। ব্রতকথায় আছে— “জ্ঞাতির ভাত হোক, সতীনের পুত হোক।”

মরলে সতীনের ছেলেও মুখে আণ্ডন দেয়, গলায় “কাচা” নেয়। হ্যাঁ, এইসব চিন্তা সদুর মাথার মধ্যে পাক দেয়, তবু সদু সহজে মুখে থাকে না। বলে, “আমি এখন নবুর সংসার ভাসিয়ে দিয়ে কোন মুখে—”

“আহ-হা, ওর সংসার আবার ভাসাবে কী দুঃখে ? ওর কাজরী খুব ওস্তাদ। এ নেহাৎ তুমি আছ তাই ঘোড়া দেখে খোঁড়া হয়ে বসে আছে। তুমি চলে গেলে ঠিক সবই পারবে।”

তা সদু সে কথা বোঝে।

বোঝে বৌয়ের এই চূপচাপ বসে থাকা যতটা শরীরের দুর্বলতার জন্য, তার থেকে বেশী মনের অবসন্নতা। সেই হতচ্ছাড়া ছুঁড়িটা যেন প্রাণের পুতুল ছিল ওর। সেটা গেছে। তা ছাড়া নবু কড়া দিব্যি দেওয়ার সেখানে যেতে আসতেও পারছে না। যত শক্ত মেয়েমানুষই হোক, স্বামীর “মরা মুখ দেখার” দিব্যিটা তো আর ফেলতে পারে না ?

অমন যে একটি সোনার পুতুল মেয়ে হয়েছে, তাও যেন সাজাতে গোছাতে গা নেই। সদু চলে গেলে ঘাড় পড়লে আবার সব ঠিক হয়ে যাবে।

কিন্তু সদু ?

বড় লজ্জা! বড় লজ্জা!

নিজের কোটে বসে তামাক সেজে দেওয়া, পায়ে হাত বুলিয়ে দেওয়া এক, আর কেন্দ্রচ্যুত হয়ে সেই অজানা রাজ্যে গিয়ে পড়া আর এক। কেমন সেই সতীন, কেমন সেই ছেলেপুলে কে জানে!

তারা যদি সদুকে সহ্য করতে না পারে ? আবার যদি স্বামীর ঘরে গিয়ে লাঞ্ছনা অপমান জোটে ?

সেদিন কথার পিঠে এ সন্দেহ প্রকাশ করে সৌদামিনী, কিন্তু মুখুয্যের এক ফুঁয়ে উড়ে যায় সে দুশ্চিন্তা।

তিনি শবলস্বরে আশ্বাস দেন, “ছেলেমেয়ে ? তারাই তো রোজ আমায় খেয়ে ফেলছে, ‘বাবা বড়মাকে আনো, বড়মাকে আনো’ বলে। আর তোমার সতীন ? হুঁ, রাতদিন তো নিজের মরণ ডাকছে। বলে, ‘আনো একবার তোমার প্রথম পক্ষকে, তাঁর পায়ের ধুলোটা নিয়ে আর এই হতভাগাগুলোকে তাঁর হাতে ভুলে দিয়ে মরে বাঁচি’।”

কেন কে জানে, সদূর চোখে হঠাৎ জল আসে। সে জল মুছে সদু রুদ্ধস্বরে বলে, “তোমরা পুরুষজাত বড় নিষ্ঠুর! এতদিন ঘর করছ, প্রাণে একটু মায়া নেই?”

“কি মুশকিল! মায়া কি করছি না? না করি নি? এ যাবৎ কে তার এগারোটা আঁতুড় তুলল, কে তার ‘ভাওত’ করল? ওকে ঘরে আনার সময় থেকেই তো যে যার ভেল্ল। মা ছোট্টছেলের সংসারে থেকেছে, তার পর মরেছে। আমি চিরদুঃখী। নইলে বিয়ে করা পরিবার তুমি, তবু তোমার ওপর জোর খাটাতে পারি না, ভিখিরির মতন দয়া ভিক্ষে করি!”

“থাক থাক, আর আমার পাপ বাড়তে হবে না।” সদু বলে, “সতীন না হয় মরে বাঁচতে চায়, কিন্তু ছেলেপেলে সৎমাকে চায় কেন?”

“কেন আর? বুঝ না!” মুখ্যো কণ্ঠস্বর করুণ করেন, “একটু মাতৃস্নেহের আশায়। সময়ে দুটো ভাতজলের আশায়।”

তিল তিল জলে পাথর ক্ষয় হয়। আর এ তো আপনা থেকেই গলে থাকা বেলেমাটি। অবশেষে একদিন সদু মাথাটা নীচু করে ধরাগলায় বলে, “বেশ, বল নবুকে। আমি নিজমুখে বলতে পারব না।”

তা নবুরও বলতে বেধেছিল সত্যর কাছে। কোনরকমে খতমত খেয়ে বলে ফেলেছিল, “মুখ্যো মশাই তো আমায় খেয়ে ফেলছেন!”

সত্য চোখ তুলে তাকিয়েছিল শুধু।

তাতেই প্রশ্ন।

নবকুমার অতঃপর তড়বড় করে মুখ্যো মশাইয়ের সংসারের হাঁড়ির হালে’র বর্ণনা করে কথা সমাপ্ত করেছিল একটি বিবেচনার কথা বলে।

“এমন অবস্থায় দিদিকে না পাঠানো আমাদের পক্ষে গর্হিত হবে না? মনে হবে না বড্ড যেন স্বার্থপরের মত আটকে রেখেছি দিদিকে—”

সত্য শান্তভাবে উত্তর দিয়েছিল, “আটকে রাখার কথা উঠুকই বা কেন? ওখানে যাবার জন্যেই তো কলকাতায় এসেছেন ঠাকুরঝি।”

ওখানে যাবার জন্যে!

নবকুমার হতবাক হয়ে গিয়েছিল। সত্যর অকৃতজ্ঞতাকে ছি ছি করে ধিক্কার দিয়েছিল। ভেবেছিল, আর এই আঁতুড় তোলা, মুখে রক্ত তুলে সংসারের যাবতীয় খাটুনি খাটা এসব কিছুর না? দিদি আগে থেকে জানত মুখ্যো মশাইয়ের সঙ্গে সেখা হবে? তিনি অত খোশামোদ করবেন ওকে?

কিন্তু মনের মধ্যে ঠেলাঠেলি করে ওঠা এইসব কথাগুলো বলে উঠতে পারে নি নবকুমার। বলেছিল, “বেশ, তবে তাই বলে দিই গে। জানি তোমার একটু কষ্ট হবে—”

“আমার কষ্ট!”

সত্য বলেছিল, “আমার যে কিসে কষ্ট হয় আর না হয়, সে বোধ যদি তোমার থাকত! যাক গে, যেতে দাও ওসব কথা, মুখ্যো মশাইকে বলে দাও একটা ভাল দিন দেখতে।”

॥ চূয়াল্লিশ ॥



জগন্নাথের রথের চাকা গড়গড়িয়ে এগিয়ে চলে, কখনো বাগির গাদায় বসে যায়। বসে যাওয়া রথের রশিতে টান দিতে এগিয়ে আসে লক্ষ মানুষের হাত। শ্রেণীহীন নির্বিচার।

মানুষের হাতে জগন্নাথের মুক্তি।

রূপকের রূপে দেবতার রূপ।

জগন্নাথের রথ যুগের প্রতীক। যুগের চাকার গতিও কখনো উদ্দাম, কখনো মন্দুর। সেই মন্দুরতার মুক্তিও মানুষের হাতে। জনগণের জাগরণে যুগের জাগরণ।

তবু বলতেই হবে যুগের দেবতা একটু শহর-ঘেঁষা। শহর দ্রুত ছন্দে আবর্তিত হয়, গ্রাম ছায়াঙ্কন উঠানে পড়ে ঘুমোয়। “শহুরে হাওয়া” যখন তার কাছে এসে পৌছয় তখন শহর থেকে হাওয়াকে ত্যাগ করে আর এক নতুন হাওয়ার পিছনে ছুটছে।

কিন্তু শহর আর মফঃস্বল কি কেবলমাত্র মানচিত্রের বর্ণমালার ওপর নির্ভরশীল? একই ঘরের মধ্যে বাসা করে না কি শহর আর মফঃস্বল? জাগন্ত আর ঘুমন্ত? মানুষে মানুষের মনের গড়নে কি পার্থক্য নেই?

তা মনের গড়নেরও শহর মঞ্চস্থল আছে বৈকি। নইলে যুগচক্রের আবর্তনে সত্যবতী কেন এমন অধীর হয়, চঞ্চল হয়, আন্দোলিত হয়, আর নবকুমার কেন সে আবর্তন টেরও পায় না ?

সত্যবতী তো ঘরে থাকে।

নবকুমার তো বাইরে ঘোরে।

নবকুমার বাইরে ঘোরে। অর্থাৎ নবকুমার বাজারে যায়, মুদির দোকানে যায়, নিতাইয়ের বাসায় তাস খেলতে যায়, সদুর বাড়িতে তত্ত্বতল্লাস করতে যায়। এই বহির্জগৎ নবকুমারের।

কিন্তু সত্যবতীই বা এমন কি করে ?

সত্যবতীও তো কুটনো কোটে, বাটনা বাটে, রান্না করে, বাড়ি দেয়, মুড়ি ভাজে, আচার বানায়। শুধু অবসরকালে বই পড়ে সত্যবতী। পড়ে পত্র-পত্রিকা।

এইটুকু জানলা।

খোলা জানলা।

এই জানলাখানি সত্যকে বহির্জগতের বার্তা বয়ে এনে দেয়।

এই জানলাখানি খোলা রাখার সহায় ছোট ছেলে সরল। মায়ের সঙ্গে তার যত গল্প যত কথা। আর বই যোগাড়ের ব্যাপারে উৎসাহ যোল আনা। নবকুমার এ খবর রাখে না।

নবকুমার এক-একদিন তাসের আড্ডায় শোনা গল্প এনে উত্তেজিত ধিকার তোলে, “শুনেছ কেলেকারি ? মেয়েমানুষ বিলেত যাচ্ছে! কিনা এম.এ., বি.এ. পাশ করতে! বিদ্যের পাহাড়ের চূড়ায় ওঠা চাই!..... কালে কালে কতই হবে!..... শুনেছ কাণ্ড, পিরিলি বাড়ির কোন্ বৌ নাকি.....”

সত্য বলে ওঠে, “খাম, চুপ কর।”

নবকুমার বিচলিত স্বরে বলে, “বাবাঃ। বুড়ো হয়ে গেলাম, জীবনে কখনো মন খুলে দুটো গল্প করতে পেলাম না!”

সত্য বলে, “কেন, কর না গল্প! তোমার নাগালের উপযুক্ত গল্প কর! বাজারের দরদামের গল্প আছে, কয়েত-ঠাকুরপোর বৌ কী ঝাওয়াল তার গল্প আছে, আপিসের বড়বাবুর গল্প আছে.....”

নবকুমার ত্রুঙ্কগলায় বলে, “কেন, দেশের দেশের কথা বলা বুঝি আমার বারণ ?”

“বারণ নয়। বারণ কেন হবে ? নিজে জেনে নিয়ে কথা কও, তার মানে আছে, তুমি যে পরের মুখে ঝাল খাও!”

নবকুমার এবার অভিমানে ভারী হয়। “আমার জেনেও দরকার নেই, বুঝেও দরকার নেই। তুমি আর তোমার বিদ্বান ছেলেরা কথা কও..... আয় সুবর্ণ, আমরা গল্প করি।”

সুবর্ণ ? হ্যাঁ, সুবর্ণ!

সোনার পুতুলের মত মেয়েটাকে সুবর্ণলতা নামই তো মানায়। বছর চারেকের হয়ে উঠেছে মেয়েটা, বাপের ভারী সুযোগ হয়ে উঠেছে।

কথা কয় যেন পাখীর মত।

হাঁড়ি-কুড়ি নিয়ে রাঁধাবাড়া খেলতে শিখেছে ইতিমধ্যে। বলে, “এস বাবা, ভাত খাও।” বলে, “মার মতন রান্না করতে পারি আমি। পারি না বাবা ?”

নবকুমার সত্যকে শুনিয়ে শুনিয়ে বলে, “তা পেরো মা! কিন্তু মার মতন রাগী হয়ো না যেন!”

এইভাবেই চলছিল দিন, কিছুটা মন্থর ছন্দে।

সেই মন্থরতার মাঝখানে হঠাৎ একটা আলোড়ন এল একদিন। সে আলোড়ন এল সত্যর ‘ঘর পালানে বন্ধু’ নেড়ুর মূর্তি ধরে! তা নেড়ু তার বন্ধুই, দাদা আর বলেছে কবে তাকে সত্য ? ছ মাসের নাকি বড় নেড়ু সত্যর থেকে। সে কথা মানে না সত্য। এখনও মানে না।

রুদ্ধকণ্ঠে শুধু বলে উঠল, “নেড়ু, তুই ?”

নেড়ু হেসে উঠে বললো, “বিশ্বাস হচ্ছে না ? নেড়ুর ভূত মনে হচ্ছে ? তা সন্দেহ মোচন করতে চিমাটি কেটে দ্যাখ।”

“তা ভূত বললে অন্যায় হয় না—” সত্যর রুদ্ধ কণ্ঠে এবার উচ্ছ্বাস আসে, “রংটা অন্তত ভূতের মত করে তুলেছিস বাবা। হ্যাঁয়ে নেড়ু, তোর সেই বেলেপানার মত রংটা কী করলি রে ?”

নেড়ু হো হো হেসে ওঠে, “কি মনে হচ্ছে ? বেচে খেয়েছি ? তা মাঝে মাঝে যা অবস্থা যায়, “চুল নখ হাত পা বেচে খাই” এমনই মতি হয়। রংটা বেচতে পারলে নিশ্চয় বেচতাম, বেচবার নয়, এই যা! রোদে পুড়ে পুড়েই আর কি—”

নেড়ুর ওই কৌতুক— কথা কটির মধ্যে থেকেই নেড়ুর অবস্থাটা স্পষ্ট ধরা পড়ে যায়, আর ধরা পড়ার সঙ্গে সঙ্গেই চোখে জল এসে যায় সত্যর।

কিন্তু সে জল চোখেই আটকে রেখে সত্য সেই অতীতকালের মতই স্বাক্ষর দিয়ে ওঠে, “খুব তো ব্যাখ্যানা করছিস অবস্থার, বলি হঠাৎ এমন নিরুদ্দেশ হবার শখ হল কেন বল দিকি ? এমন হাঁড়ির হাল করে বেড়িয়ে লাভটা কি হচ্ছে তোর ?”

নেড়ুর বহু অবস্থার ছাপ পড়া কাঠ-কাঠ মুখটায় হঠাৎ একটা বিদ্যুৎদীপ্তি খেলে যায়। বিদ্যুৎ-উদ্ভাসিত মুখে উত্তর দেয় নেড়ু, “লাভ ? সে তোদের সংসারের কড়াক্রান্তির হিসেবে অবশ্য পড়বে না সত্য, সেটাকে বলতে পারিস ‘অদৃশ্য স্বকৃ’। তবে হয়েছে বৈকি লাভ। ভগবানের রাজ্যে এই পৃথিবীটা যে কেমন তার কিছুটা আনন্দ লাভ হয়েছে।”

সত্য কি নেড়ুর এই উত্তরে চমকে ওঠে ? সত্যর মুখটা কি হঠাৎ ছাইয়ের মত সাদাটে দেখায় ? সহসা কি একটা বিরাট লোকসানের খবর দিয়ে গেল কেউ সত্যকে ? সত্যর মুখে তাই দিশেহারা উদ্ভাস্তির ছায়া ?

সত্যর তাই কথা বলতে মুহূর্ত কয়েক দেরি হয়। বুঝি বড় একটা নিঃশ্বাস চাপে সত্য।

পরে বলে, “পায়ে হেঁটে পৃথিবীর কতটা দেখবি তুমি ?”

নেড়ু দু’হাত উল্টে বিশেষ একটা ভঙ্গী করে বলে, “নাও ঠালা! পৃথিবীর সব মাটি মাড়িয়ে মাড়িয়ে কি আর পৃথিবীটা দেখবার বায়না করেছে!.... আসল কথা চেনা-জানা সংসারের টৌহন্দিটার বাইরে পা বাড়াতে পারলেই আর এক জগৎ, বুঝলি ? তার মজাই আলাদা। সত্যি বটে ভেরা সংসারী লোকেরা বলবি হাঁড়ির হাল, কিন্তু আমি বাবা বলবো তোফায় কাটাচ্ছি। ‘ভোজনং যত্র তত্র, শয়নং হস্ত্র মন্দিরে’, এ কি সোজা মজা ? কোনদিন আহার জুটছে, কোনদিন জুটছে না, কোনদিন মাথার উপর আচ্ছাদন আছে, কোনদিন গাছতলা সার!.... কখনো কারো কাছে এক ঘটি জল চাইলে সব ব্যাজার মুখ করে, কখনো কেউ মুখের চেহারাটা দেখেই ক্ষুধার্ত ব্রাহ্মণ বলে অনুরোধ উপরোধ করে ডেকে নিয়ে গিয়ে ভোয়াজ করে খাওয়া। কত লীলাখেলা পৃথিবীর! কত চণ্ডের মানুষ, কত সজ্জের বাজার!”

সত্য যেন হাঁ করে গুনতে থাকে নেড়ুর এই অভিনব অস্তিত্বতার গল্প।.... আশ্চর্য! আশ্চর্য! সেই তার চিরকুপার পাতা বোকা নেড়ুটা হঠাৎ যেন সত্যর নাগালের বাইরে চলে গেছে।

সন্তর্পণে একটা নিঃশ্বাস ফেলে সত্য। আন্তে আন্তে বলে, “খুব ভাল লাগে, নারে নেড়ু ?”

নেড়ু তার রুদ্ধ চুলগুলো মুঠোয় চেপে ধরে সাপুতে চাপতে বলে, “ভাল লাগা মন্দ লাগা বুঝি না সত্য, একটা অন্যরকম জীবন, এই আর কি। কুসোরের চাকে গড়া হাঁড়ি-কলসীর মত এক ছাঁচের না হয়ে, নিজের হাতে গড়া যা হোক একটা গঠন পাওয়া, এই হচ্ছে কথা। তোরা বলবি, বাউণ্ডলে লক্ষ্মীছাড়া ভবঘুরে! বলবি ‘আহা কী কষ্ট’! আমি মনে মনে হাসবো। ভাববো ওই বাউণ্ডলে লক্ষ্মীছাড়া ভবঘুরে হয়ে দ্যাখো, বুঝবে তার রহস্য রস।”

সত্য আর একবার স্বাক্ষর দিয়ে ওঠে, “বলছিস তো খুব! বলি মেয়েমানুষে পারবে তোর মতন ভবঘুরে হতে ? ব্যাটাছেলে হয়ে জন্মেছিস, তাই যা খুশি করবার সুখ পেয়েছিস। বাবাও তো বাড়ি ছাড়া হয়ে বেরিয়ে গিয়েছিলেন—”

নেড়ু আঙুল তুলে বলে, “ওই তো, ওই কথাই তো বলছি— গিয়েছিলেন তাই একটা মানুষের মত মানুষ হতে পেরেছেন। গায়ে পড়ে থাকলে আমার বাবাটির মতন হতেন।”

“এই নেড়ু, পিতৃনিন্দে করছিস ?”

“নিন্দে-ফিন্দে বুঝি নে সত্য, আমার হচ্ছে হক কথা! যাক তুই কেমন আছিস বল ?”

সত্য ঈষৎ উদাস গলায় বলে, “আমার কথা ছেড়ে দে। মেয়েমানুষ হয়ে জন্মেছি—”

নেড়ু বলে ওঠে, “এই সেরেছে, তুইও যে দেখছি আক্ষেপ করতে শিখেছিস! আগে তো এমন ছিলি না! ‘মেয়েমানুষ মানুষ নয়’ একথা বললেই তো রেগে যেতিস—”

সত্য তেমনি গলায় বলে, “সে এখনো যাব। তবে তোকে দেখে যেন আক্ষেপটার সৃষ্টি হচ্ছে ভাই! কোথায় ছিলি তুই, কী বা ছিলি! মিথ্যে বলব না, তোকে ‘মাথামোটা’ ভেবে একটু কুপার চক্ষেই দেখতাম, কিন্তু এখন মনে হচ্ছে তোর মাথাটাই সব চেয়ে সফল। তাই তোকে ভক্তি ছেদার চোখে দেখছি।.. যাক বেশী বলব না, অহঙ্কার হবে। তবে এটা ঠিক, ভগবান যদি আমার মেয়েমানুষ না গড়ে বেটাছেলে করে তৈরি করতেন, তোর মতন ঘরই ছাড়তাম। যাক হই নি যখন, ভগবানের ডুলের খেসারত দিই বসে বসে। সে তো হল, কিন্তু তুই কিভাবে আমার বাড়ির খোঁজ পেলি বল দিকি ?”

হ্যাঁ, সেটাই কথা।

ঘরপালানে ছেলেটা এতদিন পরে হঠাৎ সত্যর বাড়ি এসে হাজির হয় কী করে ?

তা হল প্রায় দৈবের আনুকূল্যেই।

উত্তর প্রত্যন্তরের মধ্য দিয়ে যা বোঝা গেল তা হচ্ছে এই, ঘুরতে ঘুরতে কলকাতায় এসেছে নেড়ু কিছুদিন হল। আর ওই ঘোরার সূত্রেই কালীতলায় এসে বসেছিল আজ সকালে, দৈবক্রমে সভ্য গিয়েছিল সেই ঠাকুরতলায় পূজা দিতে।

যায় এমন সভ্য।

বারব্রত থাকলেই যায়।

আজ অষ্টমীর উপোস ছিল, গিয়েছিল। নেড়ু দেখতে পায়। কিন্তু পথের মাঝখানে বা মন্দিরের চাতালে তো একটা বৌমানুষকে ডেকে কথা কওয়া যায় না, তাই নেড়ু একটু দূরে দূরে থেকে সভ্যর সঙ্গে সঙ্গে এসে বাড়িটা বুঝে নিয়েছিল। সভ্যর সঙ্গে পাড়ার একটি গিন্নী ছিলেন। তিনি বিদায় নিতেই নেড়ু এগিয়ে গিয়েছিল এবং মহোৎসাহে কড়ানাড়া দিয়েছিল।

সভ্য সেইমাত্র পড়শী গিন্নীকে বিদায় সম্বাষণ জানিয়ে দরজায় খিল লাগিয়ে পিছন ফিরেছে, তখনো দাওয়ায় ওঠে নি। ভাবল সেই মহিলাই বোধ করি কিছু বলতে ভুলেছেন বা সভ্যর সঙ্গে তাঁর কোন বস্তু চলে এসেছে। নিশ্চিত চিন্তেই তাই ফের খিলটা খুলেছিল সভ্য, আর খুলেই থতমত খেয়ে দু পা পিছিয়ে গিয়েছিল।...

কিন্তু পিছিয়ে গিয়েই কি তাড়াতাড়ি দরজাটা বন্ধ করে দিয়েছিল সভ্য? তাই দেওয়াই তো উচিত ছিল। তা বলতেই হবে, উচিত কাজ সভ্য করে নি। সে যেন স্তব্ধ হয়ে গিয়ে সামনের মূর্তিটার দিকে দৃষ্টি নিবদ্ধ করে দাঁড়িয়ে থেকেছিল।

রুদ্ধ ধূসর মাথাভর্তি চুল, তামাটে কালচে রং, শীর্ণ পেশীবহুল মুখ, আর রোগা পাকসিটে চেহারা! দৈর্ঘ্যের তুলনায় প্রস্থটা নিতান্তই কম। আর ওই দৈর্ঘ্যের জন্যই পরনের ধুতিটা খাটো মনে হচ্ছে। গায়ের রং-জুলা গলাবন্ধ কোটটাও যেন মানুষটার নীচের দিকের অনেকখানি অংশকে বর্জিত করে সহসা খেমে পড়েছে।

হাতে একটা ক্যাশিসের পোটম্যাগেটো, সেটাকে দোলাচ্ছে দোলাতে মৃদু মৃদু হাসছে লোকটা। হঠাৎ কেউ সভ্যকে এই অবস্থায় দেখলে কী বলবে বা বলতে পারে, সে কথা স্বরণমাত্র না করে হাঁ করে দাঁড়িয়েই থাকে সভ্য। অতঃপর লোকটা হেসে উঠে বলে, “কী রে সভ্য, চিনতে পারলি নে তা হলে?”

অথচ চিনে ফেলেছে তখন সভ্য, ঠিক সেই মুহূর্তেই চিনে ফেলেছে। আর সেই আকস্মিকতার মুহূর্তে রুদ্ধকণ্ঠে উচ্চারণ করেছে, “নেড়ু তুই!”

উঠে এসে দাওয়ায় শুঁড়িয়ে বসে নেড়ু বলে, “যাক্ ভাগ্যি যে চিনতে পারলি, চোর ছ্যাচোড় বলে মুখের ওপর দরজা বন্ধ করে দিলি নে, এই চের!”

সভ্য তিরস্কারের সুরে বলে, “তা দিলেও তুই আমায় দোষ দিতে পারতিস না নেড়ু। চেহারাখানা যা বাগিয়েছিস, চোর ছ্যাচোড়ের অধম! তোকে দেখে আহ্লাদ করবো, না কাঁদবো তা বুঝছি না। বলে দিচ্ছি এখন থেকেই, সহজে তোর এখন থেকে যাওয়া হবে না, থাকবি আমার কাছে।”

নেড়ু হেসে ফেলে বলে, “তোর হাতের রান্না খেয়ে খেয়ে মোটা হবো?”

“হাবই তো! মিথ্যে নাকি?” সভ্য সতেজে বলে, “কিছুকাল খেয়ে ঘুমিয়ে স্বাস্থ্য শরীর ভাল কর্। এই তালে চললে বেশীদিন আর পৃথিবী দেখে বেড়াতে হবে না।”

তা সভ্যর কথাটা একেবারে অবহেলা করতে পারে নি নেড়ু। ছিল কয়েকটা দিন। ভারী খুশি খুশি মনেই ছিল। দুবেলা খেতে বসে রান্নার প্রশংসায় পঞ্চমুখ হত আর বলতো, “নাঃ, যতদূর বুঝছি বোনাই-বাড়ি থেকে আমাদের আর নড়তে দিবি না তুই সভ্য! তোর এই সুক্ত, মোচার ঘন্ট, এঁচড়ের ডালনা, মাছের ঝোলার বন্ধনেই বেঁধে রেখে দিবি...” বলতো, “জামাইবাবুর আমার এখনও শরীরটা যে কী কারণে এমন নাড় গোপালটির মত রয়ে গেছে, তা বুঝতে পারছি।” ... ছেলেনদের ডেকে বলতো, “বুঝলে হে বাপধনেরা, তোমরা যে জননী রত্নটি পেয়েছ, লাখে একটি এমন মেলে না!”

সভ্য মুগ্ধ বিগলিত চিন্তে ওর কথা শুনতো, চোটপাট উত্তর দিতেও ভুলে যেত মাঝে মাঝে।

বাড়ি ছেড়ে পথে পথে ঘুরে নেড়ুর কথার ধরনটা কী অদ্ভুত ভাবে বদলে গেছে! এ ভাষা এ সুর নিত্যানন্দপুরের নয়। বারুইপুরেই কি এমন সহজ কৌতুকের সুরের হালকা চালের কথা শুনেছে সভ্য? অথবা কলকাতায়?

নাঃ, শোনে নি।

সভ্যর দেখা মানুষরা সব যেন চোখের সামনে ভিড় করে আসে। কেউ চঞ্চল, কেউ গম্ভীর, কেউ ব্যস্ত, কেউ মন্থর। কেউ ভয়ঙ্কর, কেউ বা হাস্যকর। এমন হাসিতে উজ্জ্বল, কৌতুকে সহজ, অথচ ভারহীন নির্লিপ্ত কই কোথায়?

নেড়ুর “কথা” শুনবে বলেই সত্য তাড়াতাড়ি হাতের কাজ সেরে নিত, সত্যর ছেলেরা আগে আগে পড়া সেরে নিত.... হ্যাঁ, সত্যর ছেলেরাও সত্যর মতই মুগ্ধ বিমোহিত। নানান দেশ-বিদেশের গল্প ফাঁদতো নেড়ু, নানান অভিজ্ঞতার। রসিয়ে রসিয়ে গল্প করতো তার।

“ট্যাঁকে নেই পয়সা, পেটে নেই ভাত। অথচ মুখে হারছি না, বুঝলি ? ধর্মশালার সেই লোকটাকে জোর গলায় বলছি—আমি রাঁধছি না খাচ্ছি না তাতে তোমার কি হে বাপু ? তোমার এই ধর্মশালায় এমন কোন লেখাপড়া আছে যে রাঁধতেই হবে, খেতেই হবে ?’ লোকটা একেবারে গরুড়ের অবতার, বুঝলি ? হাত জোড় করে বলতো, ‘আজ্ঞে লেখাপড়া কিছু নেই, তবে আপনি ব্রাহ্মণসন্তান, চোখের সামনে না খেয়ে পড়ে থাকবেন, দেখি কি করে ? দেখছি তো আপনি রাঁধছেন না খাচ্ছেন না। বেরিয়ে গিয়ে পুরী-কচুরীও কিনে আনছেন না’—

বললাম, ‘আমার ব্রত আছে।’

‘তবু ব্যাটা নাছোড়বান্দা। বলে, ‘কী ব্রত ?’

আরো গম্ভীর হয়ে বলি, ‘সে তুমি বুঝবে না।’

‘তা এমন কি ব্রত যে দুধ গঙ্গাজল এসব খেতে মানা ?

“আমি রাগ দেখিয়ে বলি, ‘অত কৈফিয়ৎ তোমায় দিতে যাব কেন হে ? ঠিক আছে, চলে যাচ্ছি অন্য ধর্মশালায়।’ অথচ বুঝলি কিনা, মনে মনে ভাবছি, অত ‘কথা না শুধিয়ে এনেই দে না বাবা ছড়াখানেক মর্তমান, গোটাকতক মিষ্টি পুরুষ্ট আম, সেরটাক মালাই, আর গণ্ডা আষ্টেক মগা—”

কথার মাঝখানেই হেসে লুটোপুটি খেত সাধন সরল। সরল হয়তো বা যোগও দিত—“গণ্ডা বারো চমচম, এক চ্যাঙারি গরম জিলিপি...”

“তা মন্দ বলিস নি” নেড়ু বলতো, “তখন মনে হচ্ছে বিশ্বব্রহ্মাণ্ড শেষ করি। অথচ হ্যাংলা বামুন হতে রাজী নই। তাই বলবো কি, সত্যিই সেদিন এসে হাজির করলো লোকটা বড় লোটোর এক লোটো ক্ষীরের মত ঘন গরম দুধ, আর ইয়া বড় বড় গোটাচারেক কদলী। বলে ‘এ খেলে তোমার ব্রত নষ্ট হবে না—।’ আমি বুঝলি কিনা, তাকে যেন কতই কৃপা করছি, এইভাবে মেরে দিলাম সেগুলো। মারছি আর ভাবছি, আরো চারটি কিছু আনলি না কেন বাবা ?”

এরা হেসে ওঠে।

এ আসরে নবকুমারও এক-একদিন যোগ দিত। এই ভবঘুরে শালাটির প্রতি তারও বেশ একটু শ্রীতির সঞ্চর হয়েছিল। চুপি চুপি সত্যকে বলতো, “কায়দা করে আটকে ফেলে একটা কনেটনে যোগাড় করে বিয়ে দিয়ে ফেল না ? তখন দেখবে, বাছাধন কেমন বাউতুল হয়ে বেড়ায়!”

সত্য বলতো, “থাক গে, বেড়াক না। একটা মানুষ না হয় জগৎ-ছাড়া হল। সবাইকে বিয়ে করে ঘর-সংসার করতেই হবে, এমন তো কিছু লেখাপড়া নেই ?”

“আহা, সন্নিসী হত তো সে এক কথা। এ যে না গেকুয়া; না সংসারী!”

“তা হোক।”

নবকুমার বলতো, “তবে আর কি বলবো!” আসরে গিয়ে বলতো, “তারপর শালাবাবু, কোন কোন তীর্থ করেছে বল ?”

নেড়ু বলতো, “তীর্থ-টির্থ কিছু করি নি বাবা, তীর্থধর্ম নিয়ে মাথাও ঘামাই নি। তবে ভ্রমণ করতে গেলিই তীর্থ। পৃথিবীর যেখানে যত শোভা-সৌন্দর্যের জায়গা, সেখানেই তো মানুষ দিবি্য এক-একখানা তীর্থ বানিয়ে রেখেছে—”

সত্য প্রশ্ন করেছিল, “শেষ তুই কোথা থেকে ঘুরে এলি ?”

“কাশী। কাশী আগেও গিয়েছিলাম অবিশ্যি। প্রথম তো কাশীতেই যাই।”

“কাশী ? সম্প্রতি কাশী গিয়েছিলি তুই ?” সত্য রুদ্ধকণ্ঠে বলে, “বাবার সঙ্গে দেখা করেছিলি ?”

“বাবা মানে মেজকাকা ?” নেড়ু আশ্চর্য হয়ে বলে, “কাশী গেছেন বুঝি ?”

“গেছেন কি রে নেড়ু! বরাবরের জন্য গেছেন। বাবা কাশীবাসী হয়েছেন।”

“আঁ্যা! সে কি!”

“তবে আর বলছি কি!”

নেড়ু এই একটিমাত্র প্রসঙ্গে গম্ভীর হয়। আস্তে নিঃশ্বাস ফেলে বলে, “জানি না তো! জানলে খুঁজে নিয়ে দেখা করবার চেষ্টা করতাম। নিত্যানন্দপুরে মেজকাকা নেই, এ যেন ভাবাই যায় না, না রে সত্য ?”

সত্য কথার জবাব দেয় না।

সত্য চোখ তোলেন না। সুবর্ণকে কোলে চেপে বসে থাকে।

আবার কোনো এক সময় পুণ্যির প্রসঙ্গ ওঠে।

এক বেলার জন্যে শ্রীরামপুরে পুণ্যির বাড়িও গিয়েছিল নেড়ু। তা এক বেলার বেশী থাকতে পারে নি। পুণ্যি নাকি এমন গিন্গী হয়ে গেছে যে দেখে প্রাণ হাঁপিয়ে উঠেছিল নেড়ুর। যতটুকু সময় ছিল নেড়ু, ততটুকুই কেবল তাকে উপদেশ দিয়েছে আর ধিক্কার দিয়েছে পুণ্যি।

“জগৎটা কতই বদলে যাচ্ছে!” সত্য নিঃশ্বাস ফেলে বলে, “ছেটবেলায় কথা তোর মনে পড়ে না নেড়ু?”

“পড়ে। পড়বে না কেন? তবে কি জানিস সত্য, একে তো তুই মা-বাপের এক সন্তান, তায় আবার মেজকাকা মেজখুড়ীর মত বাপ-মা! তোর স্মৃতিতে আমার স্মৃতিতে তফাৎ আছে। চোদ্দটা ছেলেমেয়ের একটা আমি।”

“তা হলেই বা। তুই তো কোলের ছেলে।”

“দূর! দূর! মানুষ না হাঁস-মুরগী!”

এ ধরনের কথায় সত্য লজ্জিত হয়ে অন্য প্রসঙ্গ এনে ফেলতো। হয়তো পুণ্যির কথাই ফের তুলতো। সেই রকম রোগা আছে পুণ্যি, না মোটা হয়েছে? এখনো তেমনি চুলের রাশি আছে কিনা? “চুল?”

নেড়ু হেসে উঠেছে, “এই এতো বড় একখানি টাক! তার ওপর এতোখানি সিঁদুর লেপা। অবিকল সেজঠাকুমা। আমি বললাম, ‘মা শেতলা, গড় করি! আর নয়!’”

সত্য হেসে ফেলে বলে, “সেই তো বোকা-হাবা ছিল তুই নেড়ু এত কথা শিখলি কি করে?”

নেড়ু বলে, “হাওয়ায় বাতাসে! যত মানুষ দেখবি, তত বুদ্ধি বাড়বে!”

খুব স্কূর্তিতে ছিল নেড়ু।

আর সত্যি বলতে, দিন দশ-বারোতেই যেন চেহারা ফিরে যাচ্ছিল। রং ফিরছিল, গড়ন ফিরছিল। হয়তো মাস দেড় দুই থাকলে দশাসই হয়ে উঠতো রোগা লম্বা নেড়ু। কিন্তু থাকলো না। হঠাৎ বলে উঠলো, “আর নয় রে সত্য, তোর এখানে শেকড় গজিয়ে যাচ্ছে, এবার পলায়ন দিই!”

সত্য চমকে উঠেছিল।

সত্য বসে পড়েছিল।

“চলে যাবি?”

“এই দ্যাখো, চলে যাবো না তো কি? ধোনাই-বাড়িতে মৌরসীপাট্টা নিয়ে বাস করতে এসেছি? না, না, আর একদিনও না।”

সত্যর কাকুতি-মিনতি, সত্যর ছেলেদের দরদস্তুর আর নবকুমারের অনুরোধ উপরোধ, সব ঠেলে ক্যামবিশের ব্যাগটা গুছিয়ে নিয়ে পা বাড়ালো নেড়ু। ... শুধু যাত্রাকালে বললো, “দে বাবা তোর ওই নারকেলনাড়ু দিয়ে দে পুঁটলিখানেক। পচবার মাল নয়। চলবে বেশ কিছুদিন। যখনি খাবো, তোদের মনে পড়বে।”

তা শুধুই নারকেলনাড়ু নয়, চোখের জল মুছতে মুছতে একবেলায় মধ্যেই অনেক কিছু বানিয়ে ফেলেছিল সত্য। ...

তিলের নাড়ু, ক্ষীরের ছাঁচ, মুগের বরফি, কুচো গজা, মুড়কির মোয়া।

জবরদস্তি করে সব পুরে দিয়েছিল তার ব্যাগে। আগে মাথার দিব্যি দিয়ে লুকিয়ে দশ টাকা হাতে গুঁজে দিয়েছিল তার।

ভবঘুরে নেড়ুরও কি চোখ দুটো ভিজে এসেছিল?

এসেছিল কিনা চোখই জানে। তবে গলাটা যে ভিজে উঠেছিল তার, সেটা সত্য টের পেয়েছিল। টাকা কটা সেই রংচটা কোটের পকেটে রাখতে রাখতে ভিজে গলায় বলেছিল, “তুই তাই নিলাম সত্য। আর কারো সাধ্য ছিল না যে আমাকে—”

সুবর্ণকে কোলে তুলে নিয়ে অনেক লোফালুফি করে নামিয়ে দিয়ে বিদায় নিল নেড়ু।

সত্যর বর্তমানের নিস্তরঙ্গ জীবনে নেড়ু যেন বড় একটা তরঙ্গ তুলে দিয়ে গেল।

অনেকদিন পর্যন্ত নেড়ুর প্রসঙ্গ ধ্বনিত হতে থাকলো এ বাড়িতে।

অনেকদিন পর্যন্ত সত্য যেন আনমনা হয়ে রইল। সমবয়সী, বরং বা একটু বড়, এই ভাইটির ওপর সত্যর যে কেন বাৎসল্য-স্নেহের মত এমন একটা স্নেহ জেগে উঠেছিল কে জানে? অথচ তার মাঝখানেই যেন শ্রদ্ধা, সমীহ আর ভক্তি বিমিশ্রিত একটা অপূর্ব ভাব।

নেড়ু বেচারী!

নেড়ু অবোধ!

তবু নেড়ু যেন অনেকটা উঁচুতে, সত্যর নাগালের বাইরে।
ভবঘুরে নেড়ুর জীবনদর্শন নেড়ুকে সত্যর চোখে এক মহান নাটকের মহিমাম্বিত নায়করূপে
প্রতিষ্ঠিত করে রেখে গেছে।

॥ পয়তাল্লিশ ॥



কাটে দিন, কাটে রাত্রি।

সংঘর্ষটা আজকাল কম।

কারণ সত্যর একটা কাজ বেড়েছে, সে কাজ সুবর্ণর। সুবর্ণর মধ্যে
বুঝি নিজের জীবনের সম্পূর্ণতা দেখবে সত্য। তাই ছোট্ট থেকেই তার
ভাঙাচোরা খণ্ডগুলো জড়ো করে পালিশ করতে চায় সে, নত্না কাটতে
চায় তাতে।

এদিকে নবকুমারের প্রাণপতুল সুবর্ণ।

অতএব সুবর্ণই এখন দুজনের মাঝখানে একটি মনোরম সেতু।

নবকুমার ডাকে, “এই শুনছো তোমার মেয়ের বাক্যি?”

সত্য জ্বলঙ্গী করে বলে, “তুমি শোনো!”

নবকুমার হাসে, “আমার তো—মার বাক্যি শুনতে শুনতেই জীবন ওঠাগত! তাই না?”

সত্য হাসে, “তোমার জামাইয়ের কপালে আবার বিধাতা কি লেখন লিখেছে দেখো!”

নবকুমার রসিকতা করে বলে, “তা সে কপালে শ্বশুর ব্যাটার চাইতে কোন্ না এককাঠি সরেস!
মেয়েকে আবার মা মস্ত বড় বিদ্যেবতী করে তুলবে!”

তা এসব রসিকতাই।

সংঘর্ষ নয়।

সুবর্ণ যেন সংসারের তপ্ত বালুকায় একটুকরো সিঁধে ছায়া! আচ্ছা, এই ছায়াটুকু কি মেয়ে মাঝেই?

তাই কি মেয়েকে “লক্ষ্মী” বলে? “শ্রী” বলে? জন্তত সুবর্ণর ক্ষেত্রে এগুলো সফল হয়েছে।

তাই সত্যর জীবনে যেন কিছুটা স্তিমিত শান্তি এসেছে।

অবিশ্যি গুরই মধ্যে একবার—ছেলেদের ঝুলেজে পড়া নিয়ে একবার সংঘর্ষ উঠেছিল, তবে
সেটা টেকে নি। নবকুমার বলেছিল, “ছেলেরা এন্ট্রান্স পাস করেছে শুনে সায়েব তো মহাখুশি। বলে,
“দুই ছেলে একসঙ্গে পাস করেছে? ঝুঁ! তাদের, নবকুমারবাবু, আমি থাকতে থাকতে অফিসে
চুকিয়ে দিয়ে যাই—”

সত্য কথার মাঝখানে বলেছিল, “পাগল!”

“পাগল। পাগল মানে?” নবকুমার অবাধ হয়ে গিয়েছিল। ভেবেছিল খবরটা দেওয়ার পরই
সায়েবের মহানুভবতা নিয়ে বেশ কিছুক্ষণ আলোচনা করতে পারে। তার পর অফিসের সহকর্মীদের
নবকুমারের সৌভাগ্যে কতটা ঈর্ষান্বিত হবে, সে প্রশ্নে নিয়ে হাসাহাসি করবে।

কিন্তু চিরাচরিত বিরুদ্ধতার নীতিতে সত্য এই সৌভাগ্য-সংবাদের উপরও অগ্রাহ্যের ঝাপটা
মাঝে, বলে, “পাগল!”

নবকুমার বলে, “পাগল মানে?”

“মানে ওরা এখন চাকরি করবে না, পড়বে।”

“পড়বে! আবার কত পড়বে? আর চাকরির জন্যই তো পড়া! তাই যখন হয়ে যাচ্ছে—”

সত্য একবার নবকুমারের দিকে শীতল দৃষ্টিনিষ্ক্রেপ করে বলেছিল, “না, চাকরির জন্যে পড়া
নয়, মানুষ হওয়ার জন্য পড়া। তাছাড়া সাধন উকিল হবে, সরল ডাক্তার।”
সাধন উকিল হবে, সরল ডাক্তার!

নবকুমার তীব্রস্বরে বলে, ‘কোথায় দুজনে দু’মুঠো টাকা ঘরে আনবে তা নয়, ঘরের কড়ি খরচা
করে ওদের এখন বিদ্যোদিগ্গজ করে তুলতে হবে! লক্ষ্মীছাড়া বুদ্ধি আর কাকে বলে!”

“তোমায় ওদের পড়ার জন্যে এক পয়সাও খরচা করতে হবে না।”

“আমায় করতে হবে না? চমৎকার! টাকাটা তা হলে আসবে কোথা থেকে?”

সত্যবতী নিশ্চিন্ত স্বরে বলেছিল, “ওরা ছেলে পড়িয়ে কলেজের মাইনে যোগাড় করবে।”

সত্যবতী এই ঘোষণাটি উচ্চারণ করে কথায় পূর্ণচ্ছেদ টেনে চলে যাচ্ছিল, নবকুমার সব্যঙ্গ
বলে ওঠে, “ছেলে পড়িয়ে! গলা টিপলে দুধ বেরোয়, কে ওদের মাষ্টারির চাকরি দেবে?”

সত্য হঠাৎ হেসে ওঠে, “ওমা সে কি গো, আপিসে চাকরি দিতে চাইছিল—”

“সেটা ওদের মুখ দেখে নয়। আমার খাতিরে—”

“তা হলে ধরে নাও, আমারও কোথাও কিছু খাতির আছে।”

“তা আশ্চর্য্য নেই”, নবকুমার সক্রোধে বলেছিল, “তুমি যে তলে তলে কী করে বোড়াও তুমিই জান! সাতটা বেটাছেলের কান কাটতে পার তুমি!”

রেগেছিল, তবে পরাভব যে নিশ্চিত সেটাও বুঝে নিয়েছিল। শেষ চেষ্টা আক্ষেপ প্রকাশ।

“সাহেবকে যে কোন মুখে মুখ দেখাব তাই ভাবছি!”

“ভাববার কিছু নেই”, সত্য বলেছিল, “বলবে ওদের মায়ের ইচ্ছে আরো লেখাপড়া করে।”

“সে কথা বলা মানেনই বোঝানো, আমি পরিবারের কথায় চলি—”

“তা সে কথা ভাবলেও দোষ নেই”, সত্য হেসেই উঠেছিল, “ওদের সমাজে পরিবারই সর্বসর্বা। পরিবারের কথায় ওঠে বসে ওরা।”

“ও, তুমি ওদের দেশে গিয়ে ওদের সমাজ সংসার দেখে এসেছ যে—”

সত্য আর একটু হেসেছিল, “সবই কি আর চোখে দেখে তবে শিখতে হয়? চোখে না দেখে শেখা যায় না?”

অতঃপর ছেলেরা কলেজ ভর্তি হল এবং সুবর্ণ মায়ের কাছে ‘অ আ’ শিখতে শুরু করল।

সদু বেড়াতে আসে মাঝে মাঝে, দেখে গালে হাত দেয়, “এক ফৌঁটা মেয়েকে তুমি অক্ষর পরিচয় করাচ্ছ বৌ! পাঁচে পা না দিলে বিদ্যা ছুঁতে আছে!”

সত্য মৃদু হেসে বলে, “সে ছেলেদের ছুঁতে নেই। মেয়ের আবার নিয়ম! ওকে তো আর তোমরা হাতেখড়ি দিতে দেবে না?”

“তা তোমার বুড়ো বয়সের অহ্লাদীকে তাই দিতে বরং! তোমার তো সবই গা-জুরি!”

বলে সদুও হেসেছে। সদু চিরদিনই হাসে, এখনও তার হাসির কামাই নেই, তবে ধরন বদলেছে।

সদুর দেহে মেদের সঞ্চয় হয়েছে, সদুর মুখে পরিভ্রমণের মসৃণতা। সদু গল্প করে, “আমার বড় ছেলেটা, আমার সেজ মেয়েটা—”, বলে, “মেজ মেয়ে বোধ হয় শ্বশুরবাড়ি থেকে আসবে!”

সদুর সতীন তা হলে সত্যিই মরেছে?

নাঃ, তা নয়।

সদুর সতীন বেঁচে আছে, বরং ভালই আছে। রোগটা একটু সেরেছে, চেহারা একটু ফিরেছে। রাতদিন বলে, “দিদি, তুমি যাই এসেছিসে, তাই তরে গেলাম!” বলে, “ওই কসাইয়ের হাতে পড়ে সারা জীবনটা শুধু জ্বলেপুড়ে মরেছি দিদি, যত্ন যে কী বস্তু তা তুমি আসার আগে কখনো জানি নি। গরীবের ঘরে মা-বাপ-মরা মেয়ে, তারা পার করেছিল না দূর করেছিল, তুমি বোধ হয় আমার আর-জন্মের মা ছিলে।”

সদু হেসে বলে, “মরণ আর কি! কাকে কি বলতে হয় তা জানিস না? সতীনকে মা?”

কিন্তু সতীনকে সদু সত্যিই মেয়ের অধিক যত্ন করে। যে মানুষটা আন্ত এত বড় একটা সংসার সদুকে ভোগ করতে দিয়েছে, তার ওপর কৃতজ্ঞতা থাকবে না সদুর?

মুকুন্দ বলেন, “কী গো, তুমি যে দেখি অসাধ্য সাধন করতে পার! মড়াটাকে যে দিব্যি সারিয়ে তুললে!”

“মড়া কেন হবে? তোমার অছেদা-অযত্ন ঘুণ ধরে যাচ্ছিল।” বাঙ্কার দিয়ে ওঠে সদু নিজস্ব স্বভাবে, “শুকনো গাছটাতেও নিয়মিত জল দিয়ে ফুল ধরে, বুঝলে?”

“তা তো বুঝলাম—”, মুকুন্দ ভারী যেন এক ব্রহ্মস্যের ভঙ্গিতে বলেন, “সতীনকাঁটাকে জীইয়ে তুলছ, ফিরে উঠে তোমায় আবার বিধবে না তো?”

সদু বলে, “বৈধার ভয় সৌদামিনী করে না। হুঁ, কণ্টকশয্যাত্তেই তো জীবন গেল!”

মুকুন্দ বিগলিত মুখে বলেন, “এখন তাই ভাবি, কি কাজই করেছে এতকাল! এমন একখানা ঘরপী-গৃহিণী পরিবার থাকতে—”

সদু একটু আনমনা হয়।

বলে, “মামা-মামীর জন্যে একটু কষ্ট হয়। মামী তো গতরটি নাড়তে চাইত না, এখন হাঁড়ির হাল হচ্ছে আর কি!”

মুকুন্দ সতেজে বলেন, “তা তাঁদের বেটা বেটার-বৌ থাকতে হাঁড়ির হাল হয় তো বলতে হবে অভাগিণীর কপাল! সে দায়িত্ব আমার নয়!”

“নয়ই বা বলি কি করে ? অসময়ে আশ্রয়দাতা তো বটে ? মামী না টানলে কোথায় ভেসে বেড়াতাম, কে বলতে পারে ?”

এ কথাগুলো মুকুন্দর গায়ে লাগে।

অতএব আরো সতেজ উত্তর দেন তিনি, “টেনেছেন তোমার দরকারে নয়, নিজের দরকারে। তা ছাড়া যার হাঁড়িতে যার যতদিন অনু মাপা থাকে, কেউ রদ করতে পারে না, এ হচ্ছে শাস্ত্রের কথা!”

শাস্ত্রবাক্যের পর বোধ করি আর তর্কের সাহস হয় না সদূর। অথবা অনেক দুঃখের শেষের এই পাতার আশ্রয়টুকু হারাবার ভয়।

মামা-মামীর কথা মনে পড়লে মন কেমন করে না তা নয়, কিন্তু আবার সেখানে ফিরে যাবার কথা ভাবতেও গা শিউরায়।

তা গা শিউরায় সকলেরই।

নবকুমার পর্যন্ত এখন শহর-জীবনের সুবিধে-স্বাচ্ছন্দ্যে এমনই অভ্যস্ত হয়ে গেছে যে দেশে যাবার নাম করে না।

কিন্তু তার এই নিশ্চিত জীবন রইল না। হঠাৎ এল বিপর্যয়। খবর এল নীলাস্বর বাঁড়ুয়ে মৃত্যুশয্যা নিয়েছেন।

খেয়ে উঠে ঘাট থেকে আঁচিয়ে ফিরছিলেন, হঠাৎ ঘাড় ষটকে অজ্ঞান। কেউ বলছে সন্ধ্যাস রোগ, কেউ বলছে ভূতে পাওয়া। তবে বাঁচার আশা নেই আর।

খবর পেয়ে নবকুমার উথলে উথলে কাঁদতে থাকে এবং এযাবৎকাল যে কোনদিনই পুত্র-কর্তব্য পালন করে নি, সে কথা তুলে ইনিয়ে বিনিয়ে বিলাপ করতে থাকে। তার সঙ্গে এ আমেজটুকুও থাকে, পরিবারের প্ররোচনাতেই তার এই অকর্তব্য আর অকৃতজ্ঞতা।

সত্য একটা ছোট ভোরসে কয়েকটা কাপড়চোপড় পুরে নিচ্ছিল, নবকুমারের শোক উদ্দাম হয়ে উঠেছে দেখে উঠে এল। কঠিন গলায় বলে উঠল, “তা পুত্র পুরুষের তো এরকম হবেই। সে পুরুষের তুলনা ভেড়ার সঙ্গে। কেঁদে হাট বাধিয়ে আর কি হবে ? এখনি যাতে যাওয়াটা হয় সে ব্যবস্থা কর। কাঁদবার জন্যে অনেক সময় পাবে এর পরে।”

নবকুমার গলা বেড়ে নিয়ে বলে, “আমি ছেলে এখনি রওনা দিচ্ছি।”

“তুমি একা নও, আমিও যাব।”

“তুমি! তুমি ?”

“অবাক হচ্ছে কেন ? কথাটা খুব আশ্চর্য লাগছে ?”

“না, মানে তুমি এখন হঠাৎ যাবে কি করে ? সামনে ওদের একজামিন—”

“ওদের একজামিন, ওরা দেবে। তার জন্যে আমার আটকাচ্ছে কিসে ?”

“আহা, বলি ভাত-জল তো দিতে হবে ওদের ?”

“সে ওরা দু-ভাইয়ে দুটো ফুটিয়ে নিতে পারবে। সব শুছিয়ে বলে দিয়েছি।”

অর্থাৎ ব্যবস্থা যা করবার সব করে ফেলেছে সত্য এই ক-ঘণ্টার মধ্যে।

নবকুমার হাঁ-হাঁ করে ওঠে, “ওরা নিজেরা ? তার মানে আর একটা বিপদ ডেকে আনা ? সবভাতেই গা-জোর! তার থেকে সদূদির কাছে থাক কদিন—”

“না।”

“না ? কেন, না কেন ?”

“কেন, কী বিস্তারিত এত কথা কওয়ার আমার সময় নেই এখন—”

“বেশ, কুটুমবাড়িতে যদি আপত্তি থাকে, নিতাইয়ের বৌ ডাল-তরকারি দিয়ে যাক, ওরা শুধু দুটো ভাত সেদ্ধ করে—”

“আঃ, থাম তো তুমি! তুচ্ছ ব্যাপারকে এতখানি করে তুলো না। যে কদিন আমি না আসতে পারি, শুধু ভাতে-ভাতই খাবে, ব্যাস!”

নবকুমার আবার ডুকরে ওঠে, “কদিন থাকতে হবে জান তুমি ? বাবার যদি ডাল-মন্দ কিছু হয় ?”

“যা হবে তা হবেই। আগে থেকে ভেবে লাভ ?”

এর পর সদূ এল।

শুকনো মুখে বলল, “বৌ, আমিও যাই তোমাদের সঙ্গে—”

সত্য একবার সেই শুকনো মুখটার দিকে তাকাল।

ভাবল এই শুধুই নিকট আত্মীয়ের জীবনমরণ নিয়ে দুশ্চিন্তায় ? নাকি অন্য কিছু ?
সদু কি ভয় পাচ্ছে, এরা সদুকে রোগীর সেবার জন্যে ঠেলে দেবে ? ভয় পাচ্ছে, বাইরে কেউ
ঠেলা না দিলেও, ঠেলার হাত এড়াতে পারবে না সে! ভিতরের ঠেলায়—

সত্য কী বুঝল কে জানে ?

বলল, “না ঠাকুরঝি, তোমার আর এখন গিয়ে কাজ নেই। আমরাই তো যাচ্ছি।”

“তা হলেও আমার একটা কর্তব্য তো আছে ?”

সত্য বলে, “থাক ঠাকুরঝি, অনেক সমুদ্র পার হয়ে সবে একটু মাটি পেয়েছো, এখন আর
নড়াচড়ায় কাজ নেই।”

সদু অবাক হয়।

এ ধরনের কথা সত্যর মুখে যে বড় দুর্লভ। সদুর সতীনের ঘর করতে যাওয়াটা যে সত্যর
সমর্থন পায়নি, এ কি সদু বোঝে না ? তবে ?

তবেটা কী, সত্য নিজেও ভাবে। ভেবে ঠিক করতে পারে না, সদুর প্রতি সেই ঘৃণা আর
ধিকারের ভাবটা তার চলে গেল কী করে ? আর কবেই বা গেল ? এখন দেখছে সে জায়গায় এসেছে
যেন করুণা, মমতা।

চিরবঞ্চিত সদুর মুখের পরিতপ্তির ছাপটাই কি সত্যর পাথর মনকে গলিয়েছে ?

নাকি আজকের সদুর মাতৃমূর্তি দেখে উপলব্ধি করছে সত্য, কত বঞ্চিত ছিল সদু!

ভিতরের কথা ভিতরই জানে, তবে আজকাল সত্য সদুকে মমতা করে। এখনও করল।

সত্য তার বাকুইপুর যাওয়াটা সমর্থন করল না দেখে কৃতজ্ঞতায় চোখে জল এল সদুর। সেই
চোখ মুছে বলল, “মামী ভাববে সদু কত বড় বেইমান—”

সত্য মৃদুস্বরে বলে, ‘প্রাণ উজ্জ্বল করেও কেউ কারুর ভাবা আর বলা আটকাতে পারে না
ঠাকুরঝি, ও নিয়ে মন খারাপ করো না। ছেলে দুটো রইল, একটু দেখাওনো।’

সদু আক্ষেপের সুর তোলে, “দেখাওনোর আর পথ কোথায় রাখ্ছিস বৌ, স্বপাকের ব্যবস্থা করে
যাচ্ছিস গুনছি! কেন, পিসির কাছে দুদিন খেলে কি ওদের জাত যেত ?”

সত্য একটুক্ষণ চুপ করে থাকে। তারপর, অস্বস্তিতে আস্তে বলে, “জাত যাওয়ার কথা নয় ঠাকুরঝি,
নিজের ভার যে নিজে বইতে হয় এইটুকুই শুধু ওদের শেখাতে চাই আমি। ওরা যেন ওদের বাপের
মতন অসাড় না হয়।”

পাড়ার কয়েকজন প্রবীণ ব্যক্তি ঘর-বার করছিলেন এবং ভিতরে মহিলাকুল এলোকেশীর
পুত্রভাগ্যের নিন্দাবাদে পঞ্চমুখ হয়ে উঠেছিলেন।

এলোকেশীও নিঃসংশয় হয়েছিলেন, তাঁর গোবর-গণেশ ছেলেকে বৌ হারামজাদী আসতে দেবে
না। ছেলে থাকতে ছেলের হাতের আঙুন পাবে না মানুষটা, এই আক্ষেপে তৎপর হচ্ছিলেন
এলোকেশী, ‘মানুষটার দেহে প্রাণ থাকতেই।

এই সময় হঠাৎ একজন ছুটে এসে খবর দিল, “গুণো এসেছে!”

“কে ? কে ? আমার নবু এল ?”

“নবু বৌ দুজনেই এসেছে।”

“কে ? বৌ এসেছে ?”

এলোকেশী কি আশাভঙ্গ হন ? ঈশ্বর জানেন। তবে এলোকেশী রোগী ফেলে ঘরের বাইরের
এসে দাঁড়ান।

আর গরুর গাড়ি থেকে নেমে মানুষ দুটো বাড়ির উঠানে পা দিতেই চিৎকার করে কেঁদে
ওঠেন, “ওরে নবা লক্ষ্মীছাড়া হতভাগা, এই শেখাবস্থায় এলি তুই বাপের মরা মুখ দেখতে ? এলি
এলি, তুই একলা এলি না কেন ? ওই মায়াবিনী রাঙ্কুসীকে নিয়ে এলি কেন ? কী দেখতে এসেছে ও ?
মজা দেখতে ? চিরদিনের দাপটে শান্তড়ীর তেজ-দল্ল ভাঙা দেখতে এসেছে ? শাখা-সিদুর ঘোচা
দেখতে এসেছে ?”

সত্য গলায় আঁচল দিয়ে প্রণাম করছিল। উঠে দাঁড়িয়ে শান্ত গলায় বলে, “বিপদের সময় অর্ধৈর্ঘ্য
হারাতে নেই মা, ধৈর্ঘ্য ধরতে হয়।

কিন্তু সেযাত্রা নীলাম্বর মরলেন না। যম যেন বড় একটা কামড় বসিয়ে আবার ফেলে দিয়ে চলে
গেল। শুধু কামড়ের দাগটা রইল মোক্ষম। কোমর থেকে নীচের দিকটা সব পক্ষাঘাতে অসাড় হয়ে
গেল নীলাম্বরের।

কবিরাজ বললেন, “এ রোগের এই দস্তুর। ‘তড়ি-ঘড়ি’ গেল তো গেল, নচেৎ পক্ষাঘাত।”

কিন্তু পাড়ার লোক গালে হাত দিল। বলতে লাগল, ধনি বটে এলোকেশী বামনীর শাখা-সিন্দুরের জোর! নইলে “সন্নেস রোগ” হয়ে কেউ কখনো বাঁচে ?

হতাশও একটু হল কেউ কেউ।

শাশুড়ী বিধবা হলে ওই অহঙ্কারী শহুরে বৌ কী রকম ব্যাভার করবে এবং কলকাতার মোটা মাইনেওলা চাকরে ছেলে বাপের শ্রাদ্ধে কী রকম ঘট-পটাটা করবে এই জল্পনা-কল্পনা করছিল তারা, সেটা আপাতত দেখার সৌভাগ্য হল না। বুড়ো এখন এই ন্যাকড়ার ফালির মত লটপটে বা দুখানা আর অবশ কোমর নিয়ে কতকাল বাঁচবে কে জানে!

কবরেজ তো বলছে, এ অবস্থায় দীর্ঘকাল টিকে থাকতে দেখা যায়।

নবকুমারের ছুটি ফুরিয়ে গেছে, কামাইয়ে চলছে এখন। কিন্তু আর কতদিন চলবে ? আড়ালে আড়ালে কথাটা একদিন তুলল নবকুমার।

আড়ালেই, কারণ এখন আর রাত্রে একত্র হতে পারা যাচ্ছে না। সত্য সুবর্ণকে নিয়ে শ্বশুরের ঘরের পাশে ছোট্ট একটা ঘরে শুচ্ছে, দু’ঘরের মাঝখানের দরজা খুলে রেখে।

অতএব দিনের বেলাতেই—

ঘাটে যাচ্ছিল সত্য, পেয়ারাতলার ছোপটায় ধরল তাকে নবকুমার।

“এ কি! ছিঃ!”

সত্য হাত ছাড়িয়ে নেয়।

নবকুমার অপ্রতিভ হাস্যে বলে, “তুমি যে একেবারে ডুমুরের ফুল হয়ে উঠেছ। দরকারী কথাও তো আছে!”

সত্য বলে, “বল।”

“বলছি এবার তলপী গোটাও। ছুটি তো কবে শেষ হয়ে গেছে। নেহাত সায়েব সুনজরে দেখে, তাই সাহস করে এতদিন কামাই চলছে। কিন্তু মাত্রা রাখতে হবে তো?”

সত্য একবার আশশ্যাওড়ার বেড়া-ঘেরা আর কাঁটা-নর্সের জঙ্গলে ভরা উঠোনটায় চোখ বুলোয়, একবার ভরা আকাশটার দিকে তাকায়, তারপর নবকুমারের দিকে তাকিয়ে বলে, “তা বেমাত্রা কাজ করবেই বা কেন? দুর্গা বলে বেরিয়ে পড় এইবার!”

“বেরিয়ে পড় বললেই তো পড়া হচ্ছে না। পাজিপুঁথি দেখতে হবে, বাড়িতে মায়ের কাছে থাকতে একটা ঝিয়ের ব্যবস্থা করতে হবে। তোমাকে সেটা জানান দিচ্ছি। মায়ের কাছেও তো রয়েসয়ে পাড়তে হবে কথাটা?”

সত্য শান্ত গলায় বলে, “সায়েবের আপিসের চাকরি, ছুটি ফুরিয়ে গেলে অধিক দিন থাকা চলে না, এ কথা কচি ছেলেটাও বোঝে, মাকেই বা বোঝাতে হবে কেন?”

“হবে কেন! জানো না মা চিরকালে অবুঝ! তোমার দ্বারা যতটি হচ্ছে, ততটি ঝিয়ের দ্বারা হবে না সেটা তো সত্যি। কাজে কাজেই—”

“ঝিয়ের দ্বারা করাতে হবে কেন? সত্য স্থির গলায় বলে, “আমার তো আর আপিসের ছুটি ফুরোয় নি? আমি তো চলে যাচ্ছি না কোথাও?”

আমি তো যাচ্ছি না!

এ কী নিদারুণ বাণী!

নবকুমার আকাশ থেকে পড়ে।

“তুমি যাচ্ছ না?”

“না, আমি এক্ষেত্রে যাব কি করে?”

“বুঝলাম। মানলাম সেটা অকর্তব্য হবে। কিন্তু ওদিকে? ছেলে দুটো কতকাল হাত পুড়িয়ে খাবে?”

“তা যতকাল না তাদের ঠাকুরদার রোগ সারে—”

“ও রোগ আর সেরেছে—”, নবকুমার আক্ষেপে ডুকরে ওঠে, “ও কি সারবার রোগ? এখন শুধু পড়ে পড়ে দিন গোনা!”

সত্য সামান্য হেসে বলে, “তা সে দিন তো কেউ একা বসে গোনো না, দিন গোনার সঙ্গী হতে হয় আত্মীয় বন্ধু ছেলেমেয়েকে।”

“তার মানে তুমি থাকবে?”

নবকুমার চোখে অন্ধকার দেখে।

নবকুমার যেন অকূল সমুদ্রে পড়ে।

সত্য যে এমন একটা অদ্ভুত সংকল্প করে বসে আছে, এ কথা তো স্বপ্নেও ভাবে নি সে। বরং উন্টোটাই ভেবেছিল। ভেবেছিল সত্য কলকাতায় যাবার জন্যে এক পায়ে খাড়া আছে, প্রস্তাবটা উঠতে যা দেয়ি!

কিন্তু এ কী ?

প্রথমটা সত্যর সংকল্পকে “অবাস্তব” বলে উড়িয়ে দিতে চেষ্টা করে নবকুমার, অসম্ভব বলে অভিহিত করে, তারপর কাকুতি-মিনতি করতে থাকে। ছেলেদের মুখ চাইতে বলে, নিজের টাইমের ভাতের কথা তোলে এবং শেষ অল্প হিসাবে বলে ওঠে, “আর এই যে বলেছিলে সামনের মাস থেকে সুবর্ণকে ইকুলে ভর্তি করে দেবে, তার কি হবে ?”

“তার ?” সত্য স্থির অবিচল গলায় বলে, “হবে না।”

“হবে না ? শখ মিটে গেল ?”

“শখ ?”

সত্য কঠিন গলায় বলে, “তা শখই যদি বলছো তো বলতে হয়, কর্তব্যের কাছে শখ বড় নয়।” নবকুমার আবার মিনতি শুরু করে। বার বার বোঝাতে থাকে, “ভালমত একটা লোকের ব্যবস্থা করে দিতে পারলে মা ঠিক চালিয়ে নিতে পারবে—”

সত্য একবাবে বলে, “তা হয় না।”

“আর আমি যদি বলি সুবর্ণকে ছেড়ে আমি থাকতে পারব না—”

‘ওটা বাজে কথা! ছেড়ে থাকতে পারব না’ বলে কোনো কথা নেই জগতে। কত কারণেই ছাড়তে হয়।”

নবকুমার কান্দে কান্দে হয়।

“স্বামীপুত্রকে একেবারে ভাসিয়ে দেবে তুমি ? বাবা তুমি তো এখন—”

“পাগলামি করছো কেন ? ধরো রোগটা যদি আমিরই হত!”

অতঃপর যুক্তির পথ ত্যাগ করে—এলোমেলো পথ ধরে নবকুমার। বলে, “নবকুমারের কিংবা ছেলেদের যদি হঠাৎ অসুখ-বিসুখ করে ?”

সত্য মৃদু হেসে বলে, “সে যদি করে, কপালে যদি লেখা থাকে, আমি কি আটকাতে পারবো ?”

“আটকাতে না পারো সেবা করবে পারবে। সেটা ?”

“কি মুশকিল! অত কথাই বাড়াবছো কেন ? সহজ সুস্থ মানুষ, তিন বাপ-বেটায় থাকবে খাবে, এত ভাবনার কি আছে ? আর তেমন দরকার হয়, ঠাকুরঝি তো রয়েছেন—”

নবকুমার এবার মারমূর্তি হয়।

প্রায় খিচিয়ে উঠে বলে, “তা তোমার সেই ঠাকুরঝিটিই বা কলকাতায় বসে সুখ করবেন কেন ? তিনি এসে আমার সেবা করতে পারেন না ? চিরকালটা এখানে কাটল—”

সত্য বিরক্ত হয়।

“নিজের দায় অপরের ঘাড়ে চাপাব, অমন অন্যায় হচ্ছে কেন ? ঠাকুরঝির করার কথা, না আমার করার কথা ?”

নবকুমার অগ্নিশর্মা মুখে বলে, “তারও কিছু কম কর্তব্য নয়! যে মামা এতকাল ভাত-কাপড় দিয়ে পুষল—”

“খামো। নীচ কথাগুলো আর বোলো না। ভাত-কাপড়ের কথা যদি বললেই তো বলি— তার দামও উসুল করে নেওয়া হয়েছে। পরের বাড়ি খাটলে বরং ভাত-কাপড়ের ওপর মাইনে বলে হাতে কিছু জমতো।”

চিরকালের স্পষ্টবক্তা সত্য স্পষ্ট অভিমত প্রকাশে ভয় পায় না।

কিন্তু নবকুমার যে রাগ দেখাতে পারছে না। যতবারই ভাবছে যে একলা ফিরে যেতে হবে, আর সেই বাসাবাড়িটায় নিতান্ত বাসাড়ে হয়ে কাটাতে হবে কতকাল কে জানে, ততবারই বিশ্বভুবন অন্ধকার লাগছে তার।

এতর পরেও তর্ক করতে ছাড়ে না সে।

খোঁটা দিয়ে বলে, এতকাল তো স্বপ্ন-শাওড়ী-মুখো হতে হচ্ছে হত না সভাবতীর, হঠাৎ এত ছন্দা উথলে উঠল কেন ? বলল, আর কিছু নয়, টাইমের ভাত রেঁধে রেঁধে আলিসিয়া এসে গেছে, তাই গাঁয়ের বেটাইমের সংসার ভাল লাগছে।... ভয় দেখাল, ছেলেরা বড় হয়ে উঠেছে, এখন মায়ের

চোখছাড়া হয়ে বেশীদিন থাকলে স্বভাব-চরিত্র খারাপ করে বসতে পারে। আরো অনেক রকম বলতে লাগল উন্টোপাস্টা সামঞ্জস্যহীন। তবু সত্যবতী নিজ সংকল্পে অটল।

ছেলেদের স্বভাব-চরিত্রের কথা নিয়ে আতঙ্কিত হওয়া দেখে শুধু ভুরু কঁচুকে বলল, “তেমন ছেলে যদি মানুষ করে থাকি তো নিজের হাতে খাবারে বিষ মিশিয়ে মেরে ফেলব ছেলেকে, আর নিজে গলায় দড়ি দিয়ে ঝুলব।”

মোট কথা নবকুমারকে একাই ফিরতে হল। সুবর্ণ “বাবা বাবা” করে পথ অবধি ছুটে কাঁদতে কাঁদতে বাড়ি ফিরল।

নীলাধরকে নিয়ে এখন সদসর্বদা আর জীবনমরণ সমস্যা নেই, অতএব এলোকেশী পেয়ারাতলার উত্তপ্ত বাদ-প্রতিবাদটির মূল রহস্য ভেদ করতে ঘর থেকে বেরিয়ে কাঁঠালপাতার ঝরাপাতা পরিষ্কার করতে থাকেন। কিন্তু পোড়া বয়সের এমনি জ্বালা, কানটা ভোঁতা হয়ে গিয়ে শত্রুতা সাধে। ভাল বুঝতে দেয় না।

অগত্যাই জিজ্ঞেস করতে হয়, “অত কিসের রাগারাগি হচ্ছি নবার সঙ্গে?”

সত্য উত্তর দেয় না তা নয়, দেয়, বলে, “ছেলে ছেলের বৌয়ের ঘরোয়া কথা, ও আপনি শুনে কি করবেন মা?”

আপনি।

হ্যাঁ, কলকাতা থেকে ফিরে শাশুড়ীকে “আপনিই বলতে সত্য!

এলোকেশী এই “মেয়েমর্দানী” দেখে অবাক হয়েছিলেন। বলেছিলেন, “মেয়েমানুষের মুখে বৈঠকখানার বেটাছেলের মত আপনি! আপনি-টাপনি বোলো না বাছা, শুনে গা জ্বুলে যায়!”

সত্য বলেছিল, “যা সত্যতা সৌজন্য তা করতে দোষ কি? বেটাছেলেরই সত্য হতে আছে, মেয়েমানুষেরই নেই? গুরুজনকে আপনি বলাই তো ভাল।”

একে হাড়জ্বালানো কথা, তায় সে আপনি! এলোকেশী ব্রেখামাল হন। কোমরে কাপড় গুঁজতে গুঁজতে চিৎকার করেন, “ওরে তোর ভেতরটা চিনতে আর স্মরণর বাকী নেই! ওই আধমরা শ্বশুরকে ফেলে বাসায় যাবার জন্যে মরছিলি কোঁদল করে! বুঝি না আমি কিছু?”

সত্য প্রায় হাসির সুরে বলে, “তা আপনি আর বুঝিবেন না কেন, প্রাচীন হয়েছেন, জগতের কত দেখেছেন!”

“দেখেছি, তবে তোর মতন আর দুটো দেখিনি। আর আমার ওই ভ্যাড়াকান্ত ছেলের মতন ছেলেও দুটো দেখি নি। যাবে তো নিয়ে মাথায় করে!”

সত্য মৃদুস্বরে বলে, “না, একাই যাবেন।”

এলোকেশীর মুখে হাসির আভাস দেখা দেয়। কারণ এদিকে যত পাজীই হোক, কাজকর্মে যে চৌকস। ও এসে পর্যন্ত তো এলোকেশীকে কোনো দিকে তাকিয়ে দেখতে হচ্ছে না। অত বড় রুগী, এই সংসার, গরুবাছুর, গাছপালা হাকাম তো কম নয়!

তাছাড়া মেয়েটার ওপর মায়া পড়ে গেছে এলোকেশীর, চলে যাবে ভেবে হাত পা আছড়ানি আসছিল, যাবে না শুনে আহ্লাদ গোপন করতে পারলেন না। ছেলে যে তাঁর চিরকালের ‘পিতৃমাতৃভক্ত’ সেটি সত্যর কাছে সাড়ম্বরে ঘোষণা করে বাঙ্কবীদের কাছে বলে বেড়াতে লাগলেন, “যাবার জন্যে লাফিয়েছিল হারামজাদী! নবা কান করে নি! মুখে ‘নাথি’ মেরে একা চলে যাবে বলেছে! সেই নিয়ে ভাই কী ঝগড়া, কী ঝগড়া! কাক ওড়ে তো চিল পড়ে!”

সত্য অপ্রতিবাদে শুনে যায় এসব কথা, স্থির-ধৈর্যে আপন কাজ করে যায়। সত্যকে ঈর্ষা-বিদ্বেষ ও সমীহর দৃষ্টিতে দেখছিল, কিন্তু যখন দেখল নবকুমার চলে গেল সত্যকে রেখে এবং সত্য ঠিক তাদেরই মতন জীবনযাত্রার মধ্যে নির্ভুল চলছে, তখন সাহস সঞ্চয় করে হৃদ্যতা করতে এল।

অবিশ্যি তারাও নেহাত খুকী নয়, কারো দু-একটা জামাই হয়ে গেছে, কারো নাতি-নাতনী রয়েছে। সত্যর বেশী বয়সে সন্তান হয়েছে, তাও প্রথমটি নেই, দ্বিতীয় তৃতীয় দুটি ছেলে। কোলপোছা এই মেয়েটার কবে বিয়ে হবে কে জানে! তাই সত্যর জীবনে পরিণতি আসে নি।

ওরা ওদের পরিণত বুদ্ধি নিয়ে বলে, “বাবাঃ, দজ্জাল শাশুড়ী চের দেখছি, বৌ-কাঁটকী শাশুড়ীও দেখেছি, তোমার শাশুড়ীর মত এমনি আর দেখলাম না! কী অকথা কুকথা কহিতে পারে বাবা!”

সত্য বলে, “ভীমরতির বয়সে অমন কত আজববাজে কথা বলে মানুষ! আমরাও বুড়ো হলে অবিশ্যি বলব! রাগ করে লাভ কি?”

ওরা কিছুদিন পরে 'দেমাকী' বলে ভ্যাগ করে সত্যকে !

ধীরে ধীরে মাস গড়ায়, মাস গড়াতে গড়াতে বছর। নীলাশ্বর একই অবস্থায় আছেন, না জীবিত না মৃত। আর তার সঙ্গে আরও একটা মানুষ নিতান্ত কর্তব্যবোধে জীবনমৃত হয়ে পড়ে আছে। নবকুমার মাঝে মাঝে ছুটি-ছটায় আসে। ছেলেরাও আসে। কিন্তু নীলাশ্বরের জীবদ্দশায় যে সত্যকে নিয়ে যাওয়া যাবে এ বিশ্বাস আর নেই তাদের।

নবকুমার রায় দিয়েছে, "ভূতে পেয়েছে ওকে। ওই খিড়কির দরজায় রাতবিরেতে যাওয়া! বেলগাছ কাঁঠালগাছ ছিটি!"

সত্যি ভূতে না পেল কেউ এমন করে নিজের মাথা নিজে খায়? নিজের পায়ে নিজে কুড়ল মারে? সাধন-সরলও মায়ের দৃঢ়তায় অবাক হয়ে যায়।

তা এক হিসেবে ওই ভূতে পাওয়া কথাটাই হয়তো সত্যি। যে সত্য মেয়েকে জ্বলে দেবার জন্যে, মেয়ের বয়সটা অন্তত গোটা পাঁচেক হবার জন্যে একটি একটি করে দিন গুনছিল, সে হঠাৎ সে বিষয়ে এমন নির্বিকার হয়ে গেল কি করে?

কিন্তু সত্যি কি নির্বিকার?

ওই একটা কারণেই কি মাঝে মাঝে কর্তব্যবোধের বন্ধন ছিন্ন করে এখান থেকে ছুটে পালিয়ে যেতে ইচ্ছে করে না সত্যাবতীর?

সে তো ভেবে নিয়েছিল অবস্থাকে মানিয়ে নিয়ে চলতেই হবে। অতএব নিজেই পড়িয়ে পড়িয়ে দুটো ক্লাসের যুগি করত তুলবে সুবর্ণকে। কিন্তু এলোকেশী যেন ওইটিতেই বাগড়া দিতে বদ্ধপরিকর।

সত্যকে মেয়ে নিয়ে পড়াতে বসতে দেখলেই রেগে জ্বলে মরবেন তিনি, আর ছুতোয়নাতায় ডাক দিয়ে উঠিয়ে ছাড়বেন তাকে। সুবর্ণ যদি একবার পেসিফিক নিয়ে বসবে তো "দূর করে দে, ফেলে দে" ইত্যাদি তীব্র মন্তব্যে দিশেহারা করে তুলবেন বেচারীকে।

ক্রমশ আরো চালাকি চালাচ্ছেন, সুবর্ণ পড়তে বসলেই ডাকবেন, "সুবর্ণ, তোর ঠাকুন্দা তোকে ডাকছে!"

সুবর্ণ মায়ের মুখের দিকে দৃষ্টিনিষ্ক্রেপ করে, সত্য চোখের আঙ্গন চোখে চেপে বলে, "যাও। শুনে এসো।"

কিন্তু দু-এক ঘণ্টার মধ্যে আর ফেরত না মেয়ে। ফিরতে দেন না এলোকেশী।

ঠাকুন্দার গায়ে হাত বুলানোর কাজে তাকে নিযুক্ত করে, মেয়েমানুষের বিদ্যে শেখা যে কতদূর গর্হিত কাজ তাই বোঝাতে চেষ্টা করেন নাটনীকে। এতেও কাজ না এগোলে সারা দুপুর তাকে নিয়ে পাড়া বেড়াতে বেরোন।

সত্য এক-আধদিন বলে, "ঠাকুরকে ফেলে আপনি বেরোন, আমি কাজে থাকি, উনি একা পড়ে থাকেন—"

এলোকেশী অপ্রতিভতা ঢাকতে বিরক্তিতা বাড়ান, "তা থাকবেন না আর কি হবে? কথাতাই আছে 'নিত্যি নেই, দেয় কে? নিত্যি রুগী দেখে কে?' আর ওই মানুষের কাছে বসা না-বসা! কথা জড়িয়ে গেছে, রাতদিন মুখক দিয়ে নাল গড়াচ্ছে, কী কথা কইবে? কী সেবা করবে? আমার আর কচিও নেই। আজনা জ্বালিয়ে পুড়িয়ে খেলেন, এখন বিছানায় পড়েও জ্বালিয়ে খাচ্ছেন! কই, যে লক্ষ্মীছাড়া মেয়েমানুষটা চিরটাকাল দখল করে বসে থাকল, সে এসে সেবা করতে পাচ্ছে না?"

সত্য কখনো লজ্জা পেয়ে চুপ করে যায়, কখনো মৃদু প্রশ্ন করে, "করতে এলে আপনি বাড়িতে ঢুকতে দেবেন?"

এলোকেশী সমস্ত চিৎকার করেন, "চুকতে দেব? মুড়ো খ্যাংরা নেই বাড়িতে? ভাঙা আঁশবাটি? এই বুড়োর চোখের ওপর ঝেটিয়ে বিষ ঝাড়বে না? অঙ্গই পড়ে গেছে, চোখ দুটো তো আছে? দেখবে প্যাট-প্যাট করে!"

আর প্রশ্ন করে না সত্য। আর উত্তর দেয় না।

আড়ালে সত্য সুবর্ণকে পড়ার জন্যে ভাড়া করে।

সুবর্ণ কখনো কাঁদে, কখনো সতেজ জবাব দেয়, "আমি কী করবো? ঠাকুমা যে ডাকে! পড়লে গাল দেয়! ঠাকুমা যে রাগী!"

বলে, তবু সত্য দিনে দিনে অনুভব করে, ঠাকুমার দিকেই চল নামছে মেয়ের, ঠাকুমারই ন্যাওটা হচ্ছে।

এ লোকসান সওয়া বৃষ্টি কঠিন উঠছে ক্রমশ।

অথচ সুবর্ণকে দোষ দেওয়া যায় না। ঠাকুমার কাছেই যে সর্ববিধ প্রলোভনের বস্তু। ঠাকুমার সঙ্গে পাড়া বেড়ানো, ঠাকুমার সঙ্গে ঠাকুরতলায় গিয়ে বসে থাকা, ঠাকুমার কাছেই যত অপখি-কুপখি আর ঠাকুমার কাছেই যত গল্প।

গুণ রূপকথার গল্প নয়। এমনি গল্পও চলে।

এলোকেশী বলেন, “তোমার মার কি ইচ্ছে জানিস? কলকাতায় গিয়ে তোকে মেমের ইঙ্কলে পড়িয়ে আপিসে চাকরি করতে পাঠাবে। বিয়ে দেবে না, গয়না কাপড় দেবে না, খালি চোখ রাজাবে আর পড়াবে। আর যদি আমার কাছে থাকিস তো লাল টুকটুকে বর এনে বিয়ে দেব, এত এত গয়না দেব, লাল বানারসী শাড়ি দেব। তারপর সে বিয়েতে কতো ঘটী করবো!”

উৎসুক আগ্রহে অধীর শিশু ঠাকুমার কাছ ঘেঁষে বলে, “কি গয়না দেবে ঠাকুমা?”

এলোকেশী সোৎসাহে বলেন, “এই মাথার মটুক, গলায় চিক্, সাতনরী, দানার মালা, হাতে তাগা বাজুবন্ধ মুড়কি মাদুলি, নীচের হাতে বাউটি কঙ্কণ, বালা শীখা, পায়ে মল চরণপদ্ম—”

সুবর্ণ বিপ্লিত কণ্ঠে বলে, “আর খোঁপায় ফুল দেবে না ঠাকুমা? ও বাড়ির কাকীমার মতন?”

“হুঁ, তাও দেব। মাথায় ফুল, কানে টেঁড়ি বুমকো। এখন বন্ আমার কাছে থাকবি, না মার সঙ্গে কলকাতায় যাবি?”

বলা বাহুল্য সুবর্ণ সতেজে বলে, “তোমার কাছেই থাকবো।”

“তোমার মা থাকতে দিলে তো? মেরে মেরে নিয়ে যাবে!”

“ই! দেবে না বৈকি! যাবে বৈকি! আমি তা হলে এমন কাঁদবো, আকাশ ফেটে যাবে!”

এলোকেশী সহর্ষ চিন্তে বলে, “তা তুই পারবি। সে জোর আছে। ওই মায়ের মেয়ে তো! মা যেমন কুকুর, তার উপযুক্ত মুণ্ডর হবি তুই!”

তিলে তিলে কাজ এগোয়।

দিনে দিনে পূর্ণশরী রাহুসত্ত হতে থাকে। তা ছাড়া, মাঝে ঠিক একান্ত আপন হিসেবে দেখতেই বা পেল কবে সুবর্ণ?

নিতান্ত শৈশবটা তো কেটেছে পিসির কাছে, তার পর সত্যর উদাসীনতায় বাপের কাছেই বেশী বেশী। আবার বাপ চলে যাবার সময় বলে গেছে, “তোমার মা তোকে আমার সঙ্গে যেতে দিলে না!”

তার উপর মানেই পড়া-লেখা। যে পড়া-লেখাকে ঠাকুমা বিষ দেখে। আর সুবর্ণও কিছু মধু ঠেকে না।

অতএব মা সম্পর্কে একটু বৈরীভাবই গড়ে উঠছে সুবর্ণর। পরিপূরক হিসেবে ঠাকুমার প্রতি বন্ধুভাব।

সত্য এই ধ্বংসের ছবি দেখতে পায়।

তীব্র যন্ত্রণায় রাগে প্রায়ই ঘুম আসে না সত্যর। মাঝে মাঝে মনের মধ্যে এ প্রশ্নও আসে আমি কি ভুল করেছি? নবকুমারের প্রস্তাবেই কি রাজী হওয়া উচিত ছিল তখন?

কিন্তু কে জানতো মৃত্যু এমনভাবে কুটিল ব্যঙ্গ করবে সত্যর সঙ্গে? কে জানতো একটা অনুভূতিহীন মাংসপিণ্ডও পৃথিবীর মাটি কিছুতে ছাড়তে চাইবে না?

আবার ভাবে, ছি ছি এ কী ভাবছি আমি! এ রকম চিন্তাতেও যে প্রায়শ্চিত্তের প্রয়োজন!

অবশেষে একটা সিদ্ধান্তে পৌঁছায় সত্য। আর সেই সিদ্ধান্তের বশে নবকুমারকে চিঠি লেখে। “তুমি অবশ্য করে কয়েক দিনের ছুটি নিয়ে বাড়ি আসবে। সুবর্ণকে নিয়ে যাবে তুমি। নিয়ে গিয়ে ফুলে ভর্তি করে দেবে। যতদিন না আমি যেতে পারি, ঠাকুরঝির কাছেই থাকুক। এমন ভাবে ইহকাল পরকাল মাটি হতে দিতে পারব না মেয়েটার। ঠাকুরঝির কাছে ভালই থাকবে, বলতে গেলে সুবর্ণ তো তাঁবই।”

এই প্রথম নবকুমারকে চিঠি লেখা

এর আগে যা লিখেছে বা লেখে সবই ছেলেদের কাছে।

প্রথম পত্র, কিন্তু প্রেমপত্র নয়।

এ চিঠি নিয়ে নবকুমার সদুর কাছে গিয়ে সত্যর আক্কেল এবং নিবুদ্ধিতা সম্পর্কে খুব গলাবাজি করে। কিন্তু সদুই থামায়। বলে, “অন্যায়টা কি বলেছে বৌ? একদিকে জড় না-মনিষি রুগী, একদিকে সংসার, আর একদিকে ওই দামাল ছটফটে মেয়ে। তার ওপর আবার মামীর মধুমাখা বাক্যি তো আছেই। পেরে উঠবে কেন আর? ‘নয় নয়’ করে প্রায় দেড় বছর হয়ে গেল। না না, তুই তাকে নিয়েই আয়। আমি দেখবো। আহা, পড়া পড়া করে বাঁচে না বোটা!”

নবকুমারের মুখে আসে, “তার চাইতে তুমিই যাও না দুদিন— ও চলে আসুক!”

কিন্তু বলতে পারে না।

মুকুন্দ মুখ্যে সামনে আসীন। এখন ওই বাজখাই এবং রাশভারী পুরুষটির গিন্ধী সদু, মামার বাড়ি পড়ে থাকা হতভাগী ভাগ্নী নয়।

ঘাড় গুঁজে বলে, “বেশ, তাই যাবো।”

কিন্তু অলক্ষ্য দেবতা বোধ হয় তখন অলক্ষ্য উপস্থিত ছিলেন আর কৌতুকের মেজাজে ছিলেন। তাই—

তা বিধাতার কৌতুক ছাড়া আর কি ?

এতদিন যে জড় মাংসপিণ্ডটা শুধু পরমায়ু ফুরোনোর অভাবেই পৃথিবীর খানিকটা জায়গা জুড়ে থেকে ‘অজপা’র ঋণশোধ করছিল, সেই জড়পিণ্ডটা আচমকা এমন একটা মুহূর্তে তার বহু বছরের দখলীকৃত জমিটা ছেড়ে দিয়ে চলে গেল যেটা একটা চরম মুহূর্ত।

অনেক কাটখড় পুড়িয়ে অনেক নিন্দে কুড়িয়ে আর এলোকেশীর অনেক শাপমন্য উড়িয়ে দিয়ে সত্যবতী যখন কোন প্রকারে সুবর্ণকে নবকুমারের সঙ্গে বাড়ির বার করাতে সমর্থ হয়েছে, আর ফুঙ্ক ফুঙ্ক কর্তৃক নবকুমার মনে মনে প্রতিজ্ঞা করতে করতে পা বাড়িয়েছে, সুবর্ণকে নিয়ে গিয়ে ওই মায়ামমতামাতাশূন্য হৃদয়হীনা পাষণী মায়ের নাম ডুলিয়ে ছাড়বে, ঠিক সেই সময় বিধাতা সেই কৌতুকের হাসিটি হাসলেন। সে হাসির ফলে এলোকেশী সহসা প্রচণ্ড এক চিৎকারে গগন বিদীর্ণ করে ঘর থেকে আছড়ে এসে উঠেনে পড়লেন।

এত বিরাট চিৎকারের মধ্য থেকে কথা হৃদয়সম করা শক্ত, তবে করতে পারলে স্তনতে পাওয়া যেত, এলোকেশী সর্দমুতাকে উদ্দেশ্য করে চিৎকার করছেন, “ওগো, হাতে করে মেরে ফেলল তোমায়, বেটা বেটার বৌ হাতে করে মেরে ফেলল!”

হ্যাঁ, শেষ পর্যন্ত এই কলঙ্কই মাথায় বইতে হল সত্যবতী আর নবকুমারকে, হাতে করে মেরে ফেলেছে তারা নীলাধরকে। এলোকেশী আকাশ ঝাটিয়ে বোঝাচ্ছেন সবাইকে, “নাতনীটা তাঁর প্রাণপাখী ছিল, সেটাকে টেনেহিচড়ে বাড়ির ঝুর করে নিয়ে গেল স্বামী-স্ত্রীতে পরামর্শ করে। আর বাঁচে মানুষ ? যেই বার করে নিয়ে গেল, সেই ধরফড়িয়ে প্রাণটা বেরিয়ে গেল। যাবে না ? এত বড় দাগা বুক বুক সয় ? রোগজীর্ণ ঝাচারাম-মনের কষ্টে গুঁড়ো হয়ে গেল।”

যে স্তনল সে ‘ছিছিক্কার’ দিল-শুঁকুরে ছেলে-বৌয়ের হৃদয়হীনতাকে। কেউ এ প্রশ্ন তুলল না, ‘মন কেমন’ করবার মত মনটা নীলাধরের ছিল কোথায় ?

দীর্ঘকাল ধরে বোধহীন অনুভূতিহীন একটা জড় মাংসপিণ্ড মাত্র হয়ে পড়ে ছিল যে প্রাণীটা শুধু পরমায়ু ফুরোনোর অপেক্ষায়, তার প্রাণপাখীর খবরটা এলোকেশী জানলেন কোন উপায়ে ? নবকুমার এসে যখন ‘বাবা’ ‘বাবা’ করে সহস্র ডাক ডেকেছিল, এতটুকু চৈতন্যের স্করণও তো দেখা যায় নি সেই পিণ্ডটার মধ্যে। সুবর্ণ চলে যাচ্ছে এই ভয়াবহ ঘটনাকে কেন্দ্র করে কি তবে ঝলসে উঠল তার রোগ চৈতন্য অনুভূতি ?

না, এসব প্রশ্ন কেউ তোলেনি।

সত্যবতীর পাষণীতুটাই প্রধান হয়ে উঠেছিল।

কিন্তু সে যাক, নিন্দে তো সত্যবতীর সঙ্গে সাথী, সমস্যা অন্য। সমস্যা এল পরে। বাপের শ্রাদ্ধশান্তি তো নবকুমার সাধ্যের অতিরিক্ত করল। সত্যর প্রবল প্ররোচনায় অনিচ্ছাসত্ত্বেও অনেক খরচ করতে হল তাকে। ব্যাংকসর্গ, পণ্ডিত বিদায়, শত ব্রাহ্মণকে ছত্র পাদুকা দান, অনেক কিছুই বিধান বার করেছিল সত্য। সদু এসেছিল মামার শ্রাদ্ধর ঘটায় এবং একা আসে নি, বরকে আর দুই ‘ছেলে’কে সদু সঙ্গে নিয়ে এসেছিল। সদুর পাতাচাপা কপাল দেখে হাঁ হয়ে গিয়েছিল সবাই। তা ছাড়া নিতাই, নিতাইয়ের বৌও এই উপলক্ষে গ্রামে ঘুরে গেল একবার। এ পর্যন্ত সবই বেশ। গোল বাধল যাত্রাকালে।

এখন আর সত্যবতীর এখানে থাকার কারণ নেই, অন্তএব যাবে। কিন্তু এলোকেশীর একা থাকার প্রশ্নটাও ফেলনা নয়। সত্যবতী প্রস্তাব তুললো, “ঠাকরুণও এবার চলুন আমাদের সঙ্গে!”

এ প্রস্তাবের খবরে সদু অবশ্য আড়ালে বলেছিল, ‘মু’ নির্বুদ্ধির টেকি, নিয়ে যাওয়া মানে তো চিরকালের মত নিয়ে যাওয়া! তার মানে তোর সুখের সংসারে কুলকাঠের আংরা জেলে দেওয়া! এতগুলো দিন তো হাড়মাস কালি করলি, স্বামীপুত্রের হাঁড়ির হাল হল। তার পুরস্কার হল খানিক বদনাম। আবার এখন শাউড়ীকে মাথায় করে নিয়ে যা, আর ও তোর বুক ভাতের হাঁড়ি বসাক!’

বলেছিল সদু, কিন্তু নবকুমার হাতে চাঁদ পেল। মার যদি এত বড় একটা সুব্যবস্থা হওয়া সম্ভব হয়, আর ভাবনা কি? সত্যিই সত্যর বুদ্ধি আছে সাহসও আছে।

কিন্তু এলোকেশী এ সুব্যবস্থায় কর্ণপাত করলেন না। তিনি আর একবার ছেলেকে ধিক্কার দিলেন, বাপ মরতে না মরতে ভিটের সঙ্কোপিদ্দিম বন্ধ করার প্রস্তাবে।

সন্ধ্যাদীপ? তা তার জন্যে জ্ঞাতিদের কাউকে বলে কয়ে এলে?

গলায় দড়ি এলোকেশীর!

যাদের দেখলে বিষ ওঠে তাঁর, তাদের শরণাপন্ন হতে যাবেন? তা ছাড়া এই চিরকালের জায়গা ছেড়ে বন্ধ বয়সে শহুরে খাঁচায় দমবন্ধ হয়ে মরতে যাবেন তিনি, বিবি বোয়ের সুবিধে করতে? এসব দুর্ভাগ্য ছাড়ক নবকুমার!

তা হলে?

সমস্যার সমাধানটা কি?

কি আবার, রাতে আগলাতে একটা শক্তপোক্ত মেয়েলোক ঠিক রেখে যাক নবকুমার মায়ের জন্যে, আর মায়ের এই শোকাতাপা প্রাণ শীতল করতে মেয়েটাকে রেখে যাব। এখুনি গুঁজে ছিঁড়ে নিয়ে গেলে এলোকেশীও নির্ঘাত পতি-পদাঙ্ক অনুকরণ করবেন।

নবকুমার মাথায় হাত দিয়ে বলেন, “শুনলে কথা?”

সত্যবতী যাত্রাকালের গোছগাছ করছিল, সে গোছ বন্ধ না রেখেই বলল, “শুনলাম বৈকি।”

“এখন উপায়?”

“উপায় আর কি! মাকে দমবন্ধ করে মেরে ফেলার ব্যবস্থা করে তো লাভ নেই? তার থেকে একটা খিয়ের ব্যবস্থাই কর।”

“আর সুবর্ণ?”

“সুবর্ণ আমাদের সঙ্গে যাবে।”

সংক্ষেপে রায় দেয় সত্য।

“তা তো যাবে, কিন্তু একেই তো বাবার জন্যে বদনামের শেষ নেই, তার ওপর আবার যদি মা সত্যিই—”

“কি? যদি মন-কেমন করে মরে যান?” সত্য তীক্ষ্ণ একটু হেসে বলে, “তা হলে তো সহমরণের পুণ্যই হয়ে যায়। একই অনলে দহ হয়ে উভয়ের মৃত্যু!”

“তামাশা করছ?”

“পাগল! এ কী আবার তামাশার কথা?”

“আমি কিন্তু বলতে পারব না মাকে।”

“তোমায় বলতে হবে না। যা বলবার আমিই বলবো।”

কিংকর্তব্যবিমূঢ়, নবকুমার বুঝে উঠতে পারে না, এক্ষেত্রে কি করা উচিত। মা যেটা বলেছেন সেটা অযৌক্তিক, বৌ যেটা বলছে সেটা অকর্তব্য। তা হলে?

অবশ্য একটা কাজ আছে নবকুমারের। চিরকালের কাজ। প্রথমে একবার সত্যর কথার প্রতিবাদ করে নেওয়া। সেটাই করে, বলে, “পিতৃহত্যার পাতক হয়েছে, আবার মাতৃহত্যার পাতক হবো?”

সত্য অবিচল।

“উপায় কি? তোমার ললাটে যদি বিধাতা এই দণ্ড লিখে থাকে, তাই হবে!”

“সুবর্ণ তোমার একলার নয়। বাপ-ঠাকুমারও ওর ওপর দাবি-দাওয়া আছে!”

তা অবশ্যই আছে। তবে কতখানি আছে তার ফয়সালা করতে তো আবার তোমাদের আইন-আদালত করতে হয়।”

“কী বললে? কী বললে তুমি?”

“কিছু না।” সত্য হাতের কাজে মন রেখে বলে, “যা বলাচ্ছ তাই বলতে হচ্ছে।”

“শ্বশুরের সময় তো কর্তব্য উত্থলে উঠেছিল, আমাকে একেবারে পুলুর অধম করছিলে, এখন শাস্ত্রীর বেলায় এমন মারমূর্তির কারণ?”

“কারণ বোঝাতে বসি, এত ধৈর্য আমার নেই। সুবর্ণ আমার সঙ্গে যাবে, এই হচ্ছে কথা।”

সত্যর শেষ কথা।

অতএব এ কথার নড়চড় নেই।

তা ছাড়া ওদিকে ছেলে দুটো তালেবর হয়ে উঠেছে, আর মা-অস্ত-প্রাণ তাদের, বাপের সঙ্গে আদৌ বনে না। কাজেই পৃষ্ঠবল সত্যরই বেশী।

কলেজ কামাই হচ্ছে বলে চলে গেল ছেলেরা, কিন্তু যাবার সময় বলে গেছে, মা যা বললেন, নিশ্চিত তাই যেন করা হয়।

এ কী বেপরোয়া কথা! এ কি দুঃসাহসিক কথা! বাপ তুচ্ছ মা প্রধান ?

নবকুমার এ সমালোচনা তুলেছিল, কিন্তু সত্যর ব্যঙ্গ থামিয়ে দিয়েছে তাকে। সত্য বলে উঠেছিল, “আহা, তা ওতে রাগের কি আছে ? মাতৃভক্তির বংশ, মাতৃভক্ত হবো না ? কেন, মাতৃভক্তি কি খারাপ বস্তু ?”

যদিচ মেয়েকে আর বৌকে এই দীর্ঘকাল পরে নিয়ে যেতে পেরে কৃতার্থ হচ্ছে নবকুমার, তবু স্বভাববশেই এই তর্ক এই প্রতিবাদ। যথারীতি শেষ পর্যন্ত সত্যই হচ্ছেই জয়ী হল। প্রায় দু বছর পরে আবার স্বশ্রবণবাড়ির চৌকাঠ ডিঙোল সত্য, স্বামীর সঙ্গে মেয়ের হাত ধরে।

পিছনে মড়াকান্না কাঁদতে লাগলেন এলোকেশী আছড়ে আছড়ে, কপালে যা মেরে মেরে।

এবার কিন্তু গ্রামের লোক এলোকেশীর কাজকে তেমন সমর্থন করল না। বলতে লাগল, “ছেলে-বৌ নিয়ে যেতে চাইছিল গেলেই হত! কালী-গঙ্গার দেশ, কতবড় একটা তীর্থস্থান! যেতে বাধা কি ছিল ? সত্যি তো আর ছেলে অফিস ছেড়ে দিয়ে বসে থাকবে না ? আর বৌও চিরকাল স্বামী-পুত্রের সংসারকে ভাসিয়ে বসে থাকবে না! তবে ? একা ঘরে কোন দিন মরে থেকে পাড়ার লোকের হাড় জ্বালাবি! তা ছাড়া ছেলেটা যাত্রা করছে, মহাশুরু নিপাতের বছর পড়ল তার, মড়াকান্না কেঁদে এ কী অকল্যাণ করা ?”

এ যাবৎকাল এলোকেশীর সকল প্রকার আচার-আচরণই সমর্থনযোগ্য ছিল, এই প্রথম তাতে ডাঙন ধরলো।

কে জানে কেন ? কে বলতে পারে কারণ ?

এলোকেশী একা থাকায় পরোক্ষে পাড়ার লোকের ঝগড়ার কিছুটা দায়িত্ব পড়ল, তাই কি ?

অথবা বেশ কিছুটা “বেওয়ারিশ” জমিজমা ব্যঙ্গনি পুকুর গাছপাছলির সূক্ষ্ম লোভে বাগড়া পড়ল তাই ? ফলে-ভর্তি তিনটে বাগান এলোকেশীর কাছে-ভর্তি দুটো পুকুর। তাছাড়া এদিকে ওদিকে আরো কত সব!

নাকি অত লুক্কমনা নয় এলোকেশীর মাক্কাবীরা ? এ শুধু চিরাচরিত প্রভাব। বৈধব্যে স্ত্রীলোকের বাজারদর একটু পড়েই যায়। “কর্তার পিন্ধা”র দামই আলাদা। কর্তা গত হলে যা কিছু জোর গলার জোর।

সে যাই হোক, মোট কথা অবস্থাটা এই।

এমন কি নিতাইয়ের বৌ পর্যন্ত নবকুমারের মুখে ওই “মড়া কান্না”র গল্প শুনে সত্যবতীর পক্ষ হল। হল হয়তো মনের অবস্থা তার হঠাৎ একটা কারণে ভয়ানক খারাপ হয়ে গেছে বলেই। শ্রাদ্ধের নেমন্তন্ন সেরে বেশ উৎফুল্ল মনেই কলকাতায় ফিরেছিল বেচারী, এসেই মাথায় বাজ! অভাবনীয় কাণ্ড!

মায়ের কোলাপোঁছা একেবারে সব ছোট বোনটা— এই কিছুদিন আগে বিয়ে হয়েছিল, বেগোরে প্রাণ হারিয়েছে তার আগের দিন। এসে দেখল ভাই বসে হাউ হাউ করে কাঁদছে। জানালো, মেরে ফেলেছে তাকে শাওড়ীতে আর বরেতে মিলে। স্রেফ মেরে ফেলেছে। মেরে ফেলে রটিয়েছে রাত্রিকালে ঘাটে যেতে আছাড় খেয়ে পড়ে মরে গেছে।

মেরে ফেলেছে! হাঁ হয়ে গেল নবকুমার।

নবকুমার আর সত্যবতী দুজনেই এসেছিল ভাবিনীর এই শোকতাপ শুনে। ইদানীং ভাবিনী নবকুমারের সঙ্গে একটু আড়াল রেখে একরকম কথাই কয়। এখন শোকের সময় আরো বাঁধ ভেঙেছে।

“মেরে ফেলল!” নবকুমার বলে তীব্র স্বরে, “এ কি মগের মূলুক ?”

“তা ছাড়া আর কি,” ভাবিনী চোখ মুছতে মুছতে বলে, “সকল খুনের শাস্তি আছে, দেশে বৌ খুনের তো আর শাস্তি নেই! ওই ছেলের আবার এফুনি ড্যাংডেসিয়ে বিয়ে দেবে মাগী। যেতে আমাদেরই গেল। কচি বাচ্ছা, ন বছর পেরিয়ে এই সবে দশে পা দিয়েছে ভাই, কিছু জানে না কিছু বোঝে না। আর কী ভাল মানুষ! স্বশ্রবণবাড়ি যাবার নামে সাত দিন ধরে খায় নি দায় নি, শুধু কেঁদেছে। গেল আর একটা মাসও না যেতেই এই। মায়ের আমার অবস্থাটা ভাবো।”

আরো বহুবিধ আক্ষেপ করতে থাকে ভাবিনী।

বলে, নিজের তার পেটে একটা জন্মায় নি। মায়ের এই কোলপোছা মেয়েটাকে সন্তানতুল্য দেখত, যেতে কিনা সেটাই গেল! স্তব্ধ হয়ে বসে শুনছিল সত্য, সান্ত্বনা দেবার চেষ্টা করে নি, অনেকক্ষণ পরে আস্তে বলে, “মেরে ফেলেছে, সে কথা কে বললে? এমনি যা বলছে, হতেও তো পারে?”

“ওই ভাই, এ কথা কি চাপা থাকে? তাদের পাড়ার লোক এসে আমার বাবার কাছে চুপি চুপি খবর দিয়ে গেল!” ভাবিনী আর একবার ডুকরে কেঁদে ওঠে, “তারা নাকি বলেছে, একেবারে নিশংস কাণ্ড মশাই! নোড়া দিয়ে ছেঁচে মেরে ফেলেছে, মাথা ফেটে একেবারে ছাতু!”

সত্য হঠাৎ যেন কেমন হয়ে যায়, সত্যর চোখের মধ্যে যেন উন্মাদ মানুষের দৃষ্টি।

“নোড়া দিয়ে ছেঁচে মেরে ফেলেছে!”

নবকুমার সত্যর এ পরিবর্তনে ভয় পায়, কিন্তু ভাবিনী তেমন লক্ষ্য করে না, একই ভাবে বলে, “ও দিদি, সেই নিশংস কাণ্ডই করেছে। বেটা আগে মেরে আধমরা করেছিল, মা দেখলে ‘আধমরা’ হয়ে থাকায় বিপদ, তার চেয়ে পুরো শেষ করে দিই, আর কথা বলবে না। দিলে ঠুঁকে। বল ভাই, এরা মানুষ না রাক্ষস? ভদ্রলোকের সাজে সেজে বেড়ায়, ভেতরে বাঘ সিংহী!”

ভাবিনী আবার চোখ মুছতে থাকে।

সত্য হঠাৎ চিৎকার করে ওঠে, “বসে বসে কাঁদবে, এ অন্যায়ের কোন প্রতিকার করবে না?”

ভাবিনী একটু চমকায়।

সত্যর চোখের ওই দৃষ্টি এবার ওর দৃষ্টিপথে পড়ে। কেমন খতমত খেয়ে বলে, “আর প্রতিকারের কি আছে ভাই, যা হবার তা তো হয়েই গেছে—”

“যা হবার! এই হবার ছিল?”

“তা—তা ছাড়া আর কি! শেষ বয়সে মায়ের আমার এই স্মৃতি ছিল কপালে—”

“চমৎকার! আর ওদের কারুর কোনো শাস্তির দরকার নেই? ওই খুনে মা-বেটাকে ফাঁসিকাঠে ঝোলাবার চেষ্টা করবে না তোমরা?”

ভাবিনী কপালে করাঘাত করে বলে, “আর সে চেষ্টায় লাভ কি বল? পুঁটি তো আমাদের ফিরে আসবে না তাতে! মিথ্যে থানা পুলিশের ঝামেলা!”

মিথ্যে ঝামেলা!

মিথ্যে ঝামেলা!

সত্য কঠোর গলায় বলে, “দেশে আরো হাজার হাজার পুঁটি নেই? তাদের ওপর অত্যাচার নেই?”

হাজার হাজার পুঁটি! সেটা আবার কি?

ভাঙ্কব বনে যায় ভাবিনী।

সত্যকে হঠাৎ অমন পাগল দেখাচ্ছে কেন? না বুঝেই ভাবিনী ভয়ে ভয়ে বলে, “অত্যাচার তো আছেই ভাই জগৎ জুড়ে। মেয়েমানুষ তো পড়ে মার খেতেই জন্মেছে। তবে দুধের বাছাটা গেল সেটাই বড় কষ্টের। এখনকার যে একটু বয়স হয়ে বে হচ্ছে সেটা ভাল। তোমার সুবন্ধকে যে ইঙ্কলে ভর্তি করে দিয়েছ ভাল করেছে। তবু একটু বল-বুদ্ধি হোক। আহা, পুঁটিটা আমার নিপাট ভাল মানুষ ছিল ভাই!”

হঠাৎ দাঁড়িয়ে উঠে সত্য বলল, “বাড়ি যাব।”

বাড়ি যাব!

নবকুমার এই অসভ্যতায় অবাক হয়। মানুষটাকে দুটো সান্ত্বনার কথা বলা নেই কিছু না। ব্যস্ত হয়ে বলে, “যাবে তো! একটু রও না!”

“না বসতে পারছি না আমি। মাথার মধ্যে কেমন যাতনা হচ্ছে। কিছু মনে কোর না বৌ, শুধু একটা জিনিস চাই। তোমার ওই বোনের বরের নাম ধাম ঠিকানা আমায় দাও দিকি।”

নাম ধাম ঠিকানা!

নবকুমার চমকে এবং ধমকে বলে, “ওদের নাম ধাম ঠিকানা নিয়ে তুমি কি করবে? তোমার কি?”

“আছে কাজ। তুমি দাও তো বৌ!”

ভাবিনী শিথিল স্বরে বলে, “নাম তো রামচরণ ঘোষ, স্বস্তরের নাম ছিল তারাচরণ—”

“থাকে কোথায়? ঠিকানা কি?”

নবকুমার আর একবার ধমক দেয় “কী মুশকিল! তাদের ঠিকানায তোমার কাজ কি ? কড়া চিঠি লিখতে যাবে নাকি ?”

“কড়া চিঠি ? তাদের ? নাঃ!” সত্য একটু কঠোর কঠিন হাসি হেসে বলে “তাদের চিঠি লিখে কি হবে ? অনুতাপে খানখান হবে ?”

“তবে ?”

“আছে কাজ। তুমি বল বৌ।”

“ঠিকানা আর কি—” ভাবিনী যেন একটু অনিশ্চাসকেই বলে, “এই তো হাওড়া পঞ্চাননতলা। চৌমাথায় কোথায় একটা অস্থখ গাছ আছে—”

“ওসব যাক।” সত্য নবকুমারকে বলে, “তুমি যদি আর একটু বসো তো থাকো, আমি যাচ্ছি—”

নবকুমার ব্যস্ত হয়ে বলে, “না, না, আমি আর কি করবো, নিতাইও নেই, তোমরাই বরং গল্পসল্প করো, আমি যাই।”

হঠাৎ নিজেই সে তড়বড় করে পালায়।

যেন ভয় পেয়েছে।

সত্যকে ভয় সে চিরকালই করে, তবু তার মধ্যেও কোথায় যেন একটু ভরসা ছিল। কিন্তু এই দু'বছরকাল দূরে থাকা অবধি কেমন যেন ভরসাহাড়া ভয় গ্রাস করেছে নবকুমারকে। যেন সত্যর মুখের দিকে তাকাতে সমীহ আসে। যেন চট করে আড়াল পেয়ে হাতটা একবার চেপে ধরতে পারবে, নিজের ওপর এ আস্থা নেই।

নবকুমারের চলে যাওয়ার দিকে একটুকুণ কেমন একরকম তাকিয়ে থেকে আস্তে বলে সত্য, “পাড়ার লোক তো খবরটা বলে গেল, কারণটা কিছু বলল ? বৌয়ের কোন্ অপরাধে হঠাৎ মাথায় খুন চাপলো তাদের ?”

ভাবিনী আজ আর সত্যর প্রত্যেকটি কথাই পিঠে পিঠে উঠছে না। বোধ করি পারছে না বলে উঠছে না। এ কথাই উত্তরে আর একবার আঁচলে চোখ রগড়ে গলার স্বর নামিয়ে বলে, “অপরাধ ? সে আর কি বলবো ভাই, বলতে লজ্জা, শুনতে লজ্জা! তোমার ‘উনি’ বসেছিলেন তাই বলতে পাচ্ছিলাম না। অপরাধের মধ্যে একটু হৃদয়বৃত্তিও ছিল পুঁটি। তা ওই তো পাকাটির মতো মেয়ে, দেখেছ তো সেবার ? বিয়ের জল গায়ের পড়েও কিছুই সারে নি। সেই মেয়ে, আর দোজপক্ষের বর! সা-জোয়ান একটা ভাগড়া বেটাছেলে, কৌ মরে খাই-খাই’ অবস্থা! তার কাছে যেতে ওর সাহস হয় ? যেতে চায় না, মাটি ধরে পড়ে থাকে, সেই নিয়ে নাকি রোজ মায়ে-বেটায় দুজনে মিলে শতেক খোয়ার লাখি ঝাঁটা জুতো গলাধাক্কা! তাই বলি পুঁটিটাকেও, মুখ্যর অগ্রগণ্য! দেখছিস তো ওদের জোর আঠারো আনা, তোর কানাকড়িরও নেই, যা বলছে তাই শোন! তা নয়, মাটি ধরে উপুড় হয়ে পড়ে থাকবো, কিছুতেই বরের ঘরে ঢুকব না! পারলি লড়তে ? দুষমন রাফসের রাগ চড়ে উঠল। একেই তো এক্ষেত্রে বেটাছেলেদের মাথায় আঙন জ্বলে, দিগ্বিদিক জ্ঞান থাকে না, তার ওপর মা সহায়। সোনায় সোহাগা! অদেষ্ট, সবই অদেষ্ট!”

“তা তো বটেই”, সত্য রুচস্বরে বলে, “সবই অদেষ্ট বৈকি! এই হতম্ভাড়া দেশে মেয়েমানুষ হয়ে জন্মানোই এক দূরদিষ্ট! চোখের ওপর একখানা করে পুরু পর্দা বুলিয়ে বসে থাকবো আর অদেষ্টকে দোষ দেবো!”

ভাবিনী কাঁদতে কাঁদতে ভুরু কঁচকে বলে, “পর্দার কথা কি বললে ?”

“কিছু বলি নি বৌ। শুধু বলছি নোড়া কি শুধু তাদেরই ছিল ? তোমাদের ঘরে ছিল না ? ছুঁড়ে মেরে মাথা দু-চির করে দেওয়া যেত না সেই মা-ছেলের ? আর তো মেয়ে বিধবা হবার ভয় নেই, ভয় নেই মেয়ের লাঞ্ছনা হবার!”

ভাবিনী এবার একটু বিরক্ত হয়েছিল, “তোমার যে কী ছিটিছাড়া কথা দিদি!” আমরা সে কাজ করে পার পাবো ? হাতে দড়া পড়বে না ? বিয়ে করা পরিবারকে মারতে পারো, কাটতে পারো, ছেঁচতে পারো, কুটতে পারো, আর কাউকে করা যায় ?”

“আমি হলে করতাম। ওই জামাইয়ের মাথা ইটিয়ে গুঁড়ো করে দিতাম! তারপর ফাঁসিকাঠে ঝুলতাম!” সত্য আঙন মুখে বলে।

ভাবিনী আর একবার কেঁদে ফেলে, “মাও আমার রাতদিন ওই কথাই বলছে দিদি, বলছে আর কেঁদে মরছে। কিন্তু সত্যি তো আর তা হবার নয় ? বরং আমার এক জ্ঞাতি পিসি মাকেই দুষছিল। বলছিল, ‘যেমন ন্যাকা করে তৈরি করা, হবে না শাস্তি ? বিয়ে হয়েছে, বরের ঘরে যাব না! অহ্লাদ!

দোজপঙ্কের বর, শুধু তোকে পুতুল খেলনা কিনে দিতে বে করেছে!" কি বলবো দিদি, নির্ঘাত পিসির মতলব খারাপ! নিজের একটা বারো-তেরো বছরের খেড়ে খিনী মেয়ে আছে—"

সত্য কিন্তু ততক্ষণে যাবার জন্যে পা বাড়িয়েছে, "মাপ কর বৌ, আর থাকতে পারছি না, মাথার মধ্যে বড় যাতনা হচ্ছে।"

ভাবিনীর এত দুঃখও সাম্বনা দেয় না সত্য দেখে ভাবিনী মনে মনে বলে, "সত্যিই বটে কাঠপ্রাণ! পরের শোক-দুঃখ দেখলে ভাবিনীর তো প্রাণ ফেটে যায়! মানুষকে যে কতরকম করেই গড়েন ভগবান!"

॥ ছেচপ্লিশ ॥

নিতাইয়ের বাড়ি থেকে চলে এসেছিল সত্য "মাথার মধ্যে যাতনা হচ্ছে" বলে, কিন্তু সেই যাতনা থেকে যে এমন জোর জ্বর হবে, সেকথা কে জানত?

সত্য নিজেও যখন শুয়ে পড়েছিল, তখন বুঝতে পারে নি। উঠল না, রান্না করল না দেখে সরল এসে আস্তে কপালে হাত দিয়ে দেখল, জুরে গা পুড়ে যাচ্ছে! আর কি যেন বলছে বিড়বিড় করে!

ভয়ে প্রাণ উড়ে গেল বেচারার, বাবাকে ডাকল।

কিন্তু বাবাই বড় ভরসাদার!

সে তো বিপদ দেখলেই মেয়েমানুষের মত কপালে করাঘাত করে।

সে ডুকরে উঠে বলল, "ছুটে গিয়ে পিসিকে ডেকে আন!"

সদু এসে মাথায় জলপটি, পায়ে গরম গামছা ভিজিয়ে সেক ইত্যাদি প্রাথমিক চিকিৎসার ব্যবস্থা করল। এদের জন্য দুটো ভাতে-ভাতও ফুটিয়ে দিয়ে শাইয়ে-দাইয়ে বিদায় নিল অনেক রাতে।

না, রাতে থাকল না।

সতীনের ছোট ছেলেটা নাকি 'বড়মা'কে সহিলে ঘুমোয় না। আর মুখুয্যো মশাইয়েরও রাতে দশবার তামাক লাগে।

তবে আশ্বাস দিয়ে গেল সদু, ভোরেই আবার আসবে।

তখনো সত্য অজ্ঞান-অচৈতন্য।

নবকুমার মাথায় বাতাস দিচ্ছে।

অনেক রাতে হঠাৎ সত্য চোখ তাকিয়ে বলে উঠল, "শোনো, কাছে এসো, আমার গা-টা ছোঁও!"

শিউরে উঠল নবকুমার, কী এ? প্রলাপের ঘোর? না আসন্ন মৃত্যুর আভাস?

"ছোঁও, গা ছোঁও!"

নবকুমার ভয়ে ভয়ে গায়ে একটু হাত ঠেকাল।

সত্য উত্তেজিত স্বরে বলল, "গায়ে হাত দিয়ে দিব্যি করলে কি হয় জানো তো?... মনে রেখো।

শোন—আমি যদি মরে যাই, সুবর্ণকে তুমি সাতসকালে বিয়ে দেবে না। বল, বল, দিব্যি কর!"

রোগীর প্রলাপ।

এতে সায় না দিলে প্রকোপ বাড়বে। নবকুমার তাড়াতাড়ি বলে গুঠে, "হ্যাঁ, হ্যাঁ, করছি।"

"বল, মুখে বল, ষোলো বছর বয়েস না হলে বিয়ে দেবে না সুবর্ণর?"

ঘোলো?

মেয়ের বয়েস?

ঘোলো বছর পর্যন্ত আইবুড়ো রেখে দেবে?

নবকুমার ভাবল, হঠাৎ এত বড় জ্বর কেন হল সত্যর যে এতখানি ভুল বকা শুরু করেছে!

কিন্তু কারণ যাই হোক, ঠাণ্ডা রাখতে হবে।

নবকুমার ব্যস্ত সুরে বলে, "আচ্ছা আচ্ছা, তাই হবে।"

"তাই হবে বললে হবে না!" সত্য প্রায় ভেড়ে উঠে বসে, "নিজে মুখে বল, ষোলো বছরের

আপে সুবর্ণর বিয়ে দেব না!"

পাগলের সঙ্গে চাতুরিতে দোষ কি?



আর প্রলাপের রুগীর সঙ্গে পাগলের প্রভেদই বা কি ? টুক করে সত্যর গা থেকে হাতের স্পর্শটুকু তুলে নিয়ে নবকুমার বলে ওঠে, “এই তো বলেছি, তোমার ইচ্ছে ব্যতীত বিয়ে দেব না সুবর্ণর!”

“আসল কথাটাই বললে না তুমি ?” সত্য চোঁচিয়ে বলে ওঠে, “আসল কথায় ফাঁকি দিও না। সুবর্ণকে মেরে ফেলো না। ওকে বাঁচাতে হবে, হাজার হাজার সুবর্ণকে বাঁচাতে হবে।”

ধপ করে শুয়ে পড়ে সত্য।

নবকুমার পাখাটা আরো জোরে জোরে নাড়তে থাকে। হাজার হাজার সুবর্ণ ! ভগবান, এ যে ঘোর বিকার!

ভগবান, এ কী করলে তুমি ?

হে মা কালী, রাতটা পোহাতে দাও, আমি নিজে গিয়ে খাঁড়া-ধোয়া-জল এনে খাইয়ে দেব।

দেশের কালীর কাছেও মানত করে বসে নবকুমার। আবার হরির লুটও মানে। কী করবে ?

নবকুমার যে শুনেছে, বিকারের রক্ত মাথায় চড়লে ভুল বকতে বকতে আর মাথা চালতে চালতে মরে যায় মানুষ! লক্ষণ তো দেখাই দিয়েছে, রাক্তির মধ্যে যদি জ্বর না কমে, সেই পরিণতিই তো অনিবার্য।

মা কালীর দয়াই বলতে হবে।

খাঁড়া-ধোয়া-জল না খেয়েই জ্বর কমে গেল।

শেষ রাক্তিরের দিকেই কমে গেল। ঘামের তোড়ে বিছানার চাদর সপসপিয়ে বিজিয়ে দিয়ে জ্বর প্রায় বিদায় নিলই বলা যায়।

কিন্তু ঠাণ্ডা গায়ের রক্ত, পাঁচদিন জ্বর ছেড়ে যাওয়ার পরের রক্ত বিকারের তীব্রতা পেল কি করে ? বিকারের বেগ ? সেই তীব্রতার বেগ বিকারের বিকৃতি নিয়েই তো মাথায় চড়ে উঠল। নইলে ত্রিভুবনে কে কবে এমন কাণ্ড শুনেছে ?

কোনো বাঙ্গালীর মেয়ের, গেরস্থ ঘরের মেয়ের পক্ষে কখনো সম্ভব এমন ভয়ানক কাণ্ড করা ?

সত্যর চির অনুগত এবং চির সমর্থক ছেলেকো পর্যন্ত স্তম্ভিত হয়ে গেল মায়ের এই ধারণাতীত দুঃসাহসে।

খিড়কির দরজা দিয়ে বেরিয়ে গিয়ে ঈদুকে আর তার বরকে ডেকে আনল সাধন, তথাপি নবকুমার ব্যাকুল হয়ে সরলকে বলে রঙ্গল, “বিপদে পড়ের চক্ষুলজ্জা করতে নেই, শাস্ত্রের নির্দেশ, ভুই যা বাবা, একবার মাস্টার মশাইকে ডেকে নিয়ে আয়!”

“মাস্টার মশাইকে!”

সরল হাঁ হয়ে রইল।

বাবা ডাকতে বলছেন তাঁর মাস্টার মশাইকে! যার নাম করেন না, মুখ দেখেন না, সুহাসদি পর্যন্ত যার জন্যে চিরকালের মত পর হয়ে গেছে!

নবকুমার লজ্জাকে চাপা দেয় ব্যস্ততা দিয়ে।... হ্যাঁ হ্যাঁ, বলছি তো তাই! বললাম না, বিপদের সময় চক্ষুলজ্জা শাস্ত্রের বারণ! ভুই আমার নাম করেই ডেকে আন। বলগে ভয়ানক গুরুতর কাণ্ড, পুলিশ এসেছে বাড়িতে। বোধ হয় তোদের মার হাতে দড়ি পড়বে, এ শুনলে আর—”

দড়িটা মার হাতে পড়বে কেন, বিপদের সময় চক্ষুলজ্জার নিষেধটা কোন্ শাস্ত্রে আছে, সে প্রশ্ন করে না সরল, ফতুয়াটা গায়ে দিয়ে বেরিয়ে যায় রান্নাঘরের পিছনের দিকের দরজাটা দিয়ে।

এই দোরটা ছিল তাই রক্ষে।

নইলে সদর চেপে তো বসেছে বাধা এক সাহেব পুলিশ।... কল্পিত কলেবরে নবকুমারের এগিয়ে দেওয়া চেয়ারখানায় বসে সত্যকে জিজ্ঞাসাবাদ করছে।

হ্যাঁ, সত্যকেই প্রশ্ন করছে।

ছোটখাটো ইংরিজি-মিশেল হাস্যকর উচ্চারণ-সমৃদ্ধ বাংলায়। আর পাথর-বাঁধানো-বুক সত্য সেই প্রশ্নের উত্তর দিচ্ছে ঠায় দাঁড়িয়ে।

সাহেব পুলিশের নামে ডাকবুকো মুখ্যে মশাইও প্রথমে আসতে চান নি, কিন্তু সদর একান্ত ব্যাকুলতায় আসতে বাধ্য হয়েছেন। হয়েছেন বটে, তবে সদরমুখো হন নি, পৈতে হাতে ধরে দুর্গানাম জপ করতে করতে সদর পিছু পিছু সেই পিছন দরজা দিয়ে!

টোকা মাত্রই সুবর্ণ কেঁদে ওঠে, সদর হাঁটু জড়িয়ে ধরে বলে, “পিসি, মাকে ধরে নিয়ে যেতে গোরা এসেছে!”

“বালাই ষাট, দুগুণা দুগুণা, ধরে নেবে কেন ?” বলে মেয়েটাকে কোলে তুলে নিয়ে সদু ফিসফিসিয়ে বলে, “ঘটনাটা কিরে তুড়ু ? হল কি ?”

সাধন শুকনো মুখে যা বিবৃতি দেয়, তার সার অর্থ এই, সত্যবতী কারুর সঙ্গে কোনো পরামর্শ না করে, কারুকে না জানিয়ে পুলিশ সাহেবের কাছে একটি চিঠি পাঠিয়েছিল কারুর জবানীতে পর্যন্ত নয়, নিজের নামে। সেই চিঠির সূত্রে “এনকোয়ারিতে” এসেছে পুলিশ।

চিঠির কারণ ?

কারণ অজ্ঞত। কারণ অভাবনী।

নিতাইয়ের বৌ ভাবিনীর বোনের শোচনীয় অকালমৃত্যুই নাকি কারণ।

মেয়েটাকে তার স্বামী আর শাওড়ীতে মিলে কী রকম নৃশংসভাবে হত্যা করেছে, তা জুলন্ত ভাষায় বর্ণনা করে দৃষ্ট আবেদন জানিয়েছে সত্যবতী, এই দানবীয় অত্যাচারের সুবিচার হোক, সেই খুনি যুগলের উচিতমত শাস্তি হোক। তা যদি না হয়, বৃথাই তাদের ধর্মাবিকরণের নাম করে আদালত খুলে বসে থাকাক!

আসামীদের নাম ধাম ঠিকানা সবই জানিয়েছে সত্যবতী সেই আবেদনপত্রে।

সব শুনে সদু নিঃশ্বাস ফেলে বলে, ‘সেদিনের সেই বিকারেরই ঝোক এসব তুড়ু, দেহের রক্ত মাথায় চড়ে উঠেছিল জ্বরের ধমকে, সেই চড়া রক্তই বুদ্ধিসুদ্ধি বিগড়ে দিয়েছে। নচেৎ বাঙালী গেরত্বঘরের মেয়ের পক্ষে এ কাজ সম্ভব ? আমি তোকে নির্ধাৎ বলছি তুড়ু, তোর ওই মা একদিন মাথার শির ছিড়ে সন্মোহ রোগ’ হয়ে মরবে! চিরদিনই মেয়েমানুষের আধারে ও একটা দস্যি পুরুষমানুষ! তাই এই দূরন্ত রোগ!’

সাধন আরো শুকনো মুখে বলে, “রোগই বলব, তা ছাড়া আর কি! চিরদিন এই এক রোগ, কোথায় কেন্থানে কে কী অন্যায় করল, যেন মা’র ওপরই করেছে। সকলের জ্বালা-যন্ত্রণা নিজের ঘাড়ে নিয়ে কেবল কষ্ট-পাওয়া রোগ। বাড়ির বাসনমাজা কিটা একদিন তার ছেলেকে ‘মরে যা’ বলে গাল দিয়েছিল বলে মা তাকে তক্ষুনি ছাড়িয়ে দিলেন!”

“ছিষ্টিছাড়া, সবই ছিষ্টিছাড়া, চিরকেলে ছিষ্টিছাড়া! সার্থকি, ভগবান রূপ গুণ সবই দিয়েছিল, কিছু সার্থক করতে পারল না! এখন আবার নাকি স্মৃষ্টি সেদিন জ্বরের ঘোরে তোর বাপকে দিব্য গালিয়েছে, পঁচিশ বছর বয়েস না হলে সুবর্ণর বিষে দেওয়া চলবে না!”

দিব্যটা অবশ্য নিতান্তই হাস্যকর, অতএব এ নিয়ে মাথা ঘামায় না সাধন। প্রলাপের ঘোরে কী না বলে মানুষ!.... তবে ওরও মনে হয়, বুদ্ধিবিকই মাকে মা’র বিধাতা অনেক বুদ্ধিসুদ্ধি দিয়েছেন, শুধু জেদটা যদি ঝৎ কম দিতেন!

“আপনি একটু ওদিকে যাবেন পিসেমশাই ?” সাধনের এই প্রশ্নে মুখুয্যে মশাই বিচলিত স্বরে বললেন, “আমি আর কেন বুড়োমানুষ! এইমাত্র স্নান সেরেছি, এখনো আঙ্কিক হয় নি। এখন ওই স্নেহস্পর্শে—”

“না না, ছোবেন কেন ? এমনি—”

“এই দেখ পাগল ছেলের কথা! বাক্যবিনিময় মানেই তো ছোঁয়া। বাক্যের দ্বারা স্পর্শ, সেও বড় কম নয়। তা ছাড়া তোমরা কলেজে পড়েছ, ইংলিশ শিখেছ...”

শিখেছে।

শিখেছে সেটা সত্যি কথা।

কিন্তু এ তো লেখাপড়ার কথা নয়। সাহেব মাস্টার নয়। এ হল বিশ্রী একটা গোলমালে ব্যাপার। এফেক্টে প্রবীণ লোকই ভাল।

কিন্তু প্রবীণ লোক দ্বিতীয়বার স্নানের ভয়ে গেলেন না। শুধু উঁকিঝুঁকি মেরে দেখতে লাগলেন, সত্যি কিভাবে সাহেবের দিকে তাকিয়ে কথা বলছে!

হ্যাঁ, তখন সত্যই বলছে, “বলো তবে কী জন্যে আদালত খুলে বসে আছে তোমরা ? সতীদাহ করে মেয়েমানুষগুলোকে পুড়িয়ে মারতো আমাদের দেশ, তোমরাই সে পাপ থেকে উদ্ধার করেছো আমাদের। তবু এখনো কিছুই হয় নি। এখনো অনেক অনেক পাপ জমানো আছে। চারযুগ ধরে জমছে এই পাপের বোঝা। এই পাপ দূর করতে পারো, তবেই বলি শাসনকর্তা সেজে বসে থাকা শোভা পাচ্ছে।... নচেৎ পরের দেশে রাজগিরি কিসের ? জাহাজ বোঝাই হয়ে ফিরে যাও না ?”

“মা!”

সাধন এগিয়ে যায় মাকে নিবৃত্ত করতে। দেখছিল “বাংলা-নবীশ” সাহেব তার মা’র এই ওজস্বিনী বক্তৃতার সামনে পড়ে সমস্ত বাংলা জ্ঞান হারিয়ে “হোয়াট ? হোয়াট ?” করছে!

এই বক্তৃতার শ্রোতে দোভাষীর কাজ করতে এলে, তার এফ. এ পড়া বিদ্যে স্থূলকূল পাবে, এ ভরসা হল না। তাই মা” বলে ডেকে নিবৃত্ত করতে চাইলে।

কিন্তু সত্য বুঝি তখন সত্যিই পরিবেশ পরিস্থিতির জ্ঞান হারিয়েছে, তাই ছেলের এই ডাকের ইশারায় কর্ণপাত না করে বলতেই থাকে, “তোমার দেশে তো শুনি মেয়েমানুষের অনেক মান, অনেক সম্মান। সেই চোখ খুলে দেখতে পাও না, এই হতভাগা দেশে মেয়েমানুষকে কী অপমানের মধ্যে, কী লাঞ্ছনার মধ্যে ফেলে রেখেছে? আইন করে বন্ধ করতে পারো না এসব? নিতি নিতি অনেক আইন তো বার করছো—”

“বড়বৌ!”

নবকুমার আর থাকতে পারে না, চোঁচিয়ে ডেকে গুঠে, আর ঠিক এই সময় ভবতোষ মাষ্টার এসে দাঁড়ান সরলের সঙ্গে সঙ্গে।

চুকবার মুখেই বোধ করি সত্যর এই তীব্র ভাষা তাঁর কানে চুকেছে। তাই সত্যকেই উদ্দেশ্য করে শান্ত স্বরে বলে, “ভিন্ন দেশের লোক এসে আইন করে এদেশের সমাজের গ্লানি দূর করবে, এ আশা করো না বৌমা। দেশকেই করতে হবে।”

মাষ্টার মশাইকে এ বাড়িতে দেখে অবাক হতে গিয়েও, সঙ্গে সরলাকে দেখেই রহস্যভেদ হয়ে গেল সত্যর কাছে।

আন্তে মাথার কাপড়টা টেনে দিয়ে দূর থেকে আলগোছে একটা প্রণামের মত করে ঘরের মধ্যে ঢুকে গেল।

একটা নাকি প্রবাদ আছে, “বুক থেকে পাহাড় নামা”—ভবতোষ আসার পর নবকুমারের সেই অবস্থা। যাক বাবাঃ, আর তার করণীয় কিছু নেই! এবার সে ঘরে ঢুকে চৌকিতে শুয়ে পড়ে হাতপাখা নেড়ে হাওয়া খেতে পারে!

এখন অপেক্ষা মাষ্টার আর সাহেবটার বিদেয় হওয়া। আরপর একটা হেস্তনেস্ত করতেই হবে। বহু সহ্য করেছে সে, আর নয়। মুখ্যে মশাই এইমাত্র বলেছেন, “স্বৈত্র পুরুষের স্ত্রীরা এইরকমই হয়। সেই বাক্য-দাহ সর্বাস্তে জ্বালা ধরান্নাছে!

মাষ্টারের সঙ্গে কিন্তু বেশী কথা হল না সাহেবের, শুধু সত্যর প্রেরিত চিঠি দেখাল সাহেব এবং একটু পরেই ‘গুডবাই’ বলে বিদায় নিল সে। ভবতোষ তাকে রাত্তা পর্যন্ত পৌঁছে দিয়ে এসে, এদের উঠোনে আর একবার এসে দাঁড়ালেন। আরপর শান্ত গলায় বললেন, “তোমার মাকে বলো সাধন, সাহেব কথা দিয়ে গেছে দোষীকে খুঁজে বের করে যথোপযুক্ত শাস্তির ব্যবস্থা করবে।... আর—” মাষ্টার মশাই একটু হাসলেন, “আর তোমার মাকে অনেক অভিনন্দন জানিয়ে গেছে।”

এতক্ষণে মুকুন্দ মুখ্যের গলা নিজের কাজ করে। তিনি হুকো হাতে দাওয়া থেকে উঠে উঠোনে নেমে এসে বলেন, “শুনলাম আপনি একসময় নবকুমারের শিক্ষক ছিলেন, সে হিসাবে নমস্কার জানানো উচিত, তা জানাচ্ছি, কিন্তু ওই যে কি বললেন, সাধনের মাকে সাহেব কি দিয়ে গিছে—”

“অভিনন্দন” ইয়ে প্রশংসা—

“হঁ, বুঝেছি। তা প্রশংসাটা কিসের?”

ভবতোষ একবার এই গায়ে-পড়া অভব্য বুড়োটার দিকে দৃষ্টিপাত করেন, তারপর হয়তো ব্যঙ্গের খাদ মেশানো একটু পরিহাসের ধরনের হাসি হেসে বলেন, “বুঝতে তো খুব অসুবিধে হবার কথা নয়? সাহসের জন্য প্রশংসা করেছে। অন্যায়ের বিরুদ্ধে রুখে দাঁড়াবার সাহস কজনের থাকে বলুন?”

মুখ্যে মুখ বিকৃত করে বলেন, “লোকের ঘরে আগুন লাগাবার, লোকের মাথায় লাঠি বসাবার সাহসও একরকম সাহস, তা সকলের থাকে না স্বীকার করছি। তবে সাহস মানেই প্রশংসা পাবার যোগ্য সেটা স্বীকার করব না।”

“না করলেই বা কি করবার আছে!” বলে ঈষৎ হেসে চলে যেতে চান মাষ্টার। যাওয়া হয় না। নবকুমার তাড়াতাড়ি বেরিয়ে এসে বলে, “মাষ্টার মশাই, চলে গেলে চলবে না, একটু জল খেয়ে যেতে হবে।”

বোধ করি বিপদ্তারণ মধুসূদনরূপী মাষ্টার মশাইয়ের পরম উপকারের একটা প্রতিদান আবশ্যিক বলে মনে করার প্রতিক্রিয়া এই প্রস্তাব!

তবে মাষ্টার মশাই এ প্রস্তাবের জন্য প্রতৃত ছিলেন না। তাই চমকে স্তম্ভকালেন আর বোধ হয় ডাবলেন, ধৃষ্টতার কেন সীমা থাকে না!

কিন্তু একদা যে ভবতোষ মাষ্টার রামকালীকে তাঁর মেয়ের স্বগুরবাড়ির দুঃখদূর্দশা বর্ণনা করে

ওজস্বিনী ভাষায় চিঠি দিয়েছিলেন, সেই ছেলেমানুষ ভবতোষ জো আর নেই। তারপর অনেকগুলো দিন পার হয়ে গেছে। অনেক মানসিক দ্বন্দ্বের টানা-পোড়নে পোড়খাওয়া আর অনেক জ্ঞান-অর্জনে পরিণত হয়ে ওঠা শ্রৌট ভবতোষ ভয়ানক কিছু একটা জবাব দিয়ে বসলেন না। শুধু মৃদু হেসে বলেন, “পাগল!”

“পাগল কেন? বাঃ!” ঝগী থাকবো না এই বাসনাতেই হয়তো নবকুমার আবার জেদ করে, “এই রোদে তেতেপুড়ে এলেন। আপনার বৌমার মান-মর্যাদা রক্ষা করলেন, সে অমনি কেন ছাড়বে? আপনার বৌমা বলছে, একটু মিষ্টিমুখ না করিয়ে ছাড়বে না আপনাকে।”

ভবতোষ আর একবার ভয়ঙ্কর ভাবে চমকালেন। বোধ করি কোনও একখানে হিসাব মিলাতে পারলেন না, কেমন অসহায় ভঙ্গীতে বললেন, “কে? কে ছাড়বে না বলেছে?”

“এই যে, আপনার বৌমা!” চোখের ইশারায় ইতিমধ্যেই সাধনকে দোকানে পাঠিয়ে ফেলেছে নবকুমার, তাই বুকের বল আছে। অতএব জোর গলায় বলে, “সে এখন কলসীর জল ঢেলে আপনার জন্যে মিছরির পানা করছে—”

নবকুমার ভেবেছিল এই ইশারাতেই মিছরির পানা বানানো হয়ে যাবে। কিন্তু কথা শেষ করতে হয় নি নবকুমারকে।

‘কলসীর ঠাণ্ডা জলে’র ইশারা কাজে লাগানো না। সত্যবতী বেরিয়ে এসে দৃঢ়স্বরে বললো, “মিথ্যে কেন রোদে দাঁড়িয়ে পাগলের প্রলাপ শুনেছেন মাস্টার মশাই! বাসায় যান!”

ভবতোষ সহসা একবার স্পষ্ট চোখে সত্যর মুখের দিকে তাকালেন, তারপর আস্তে আস্তে বেরিয়ে গেলেন।

ঠিক সঙ্গে সঙ্গে নবকুমার একটা কিছুতকিমাকার কাজ করে বসলো। হঠাৎ দু হাতে ঠাস ঠাস করে নিজেই নিজের গালে চড়িয়ে বলে উঠলো, “আর কেন, এইবার একখানা জুতো এনে মুখে মারো! ষোলকলা সম্পূর্ণ হোক! ওইটুকুই তো বাকী আছে। শ্রেণী পুরুষের ওইটাই বোধ হয় শেষ শাস্তি।”

সামনে সদু সামনে মুকুন্দ মুখুয্যে, সামনে সরল, সেই মুহূর্তে সাধন সন্দেশের ঠাণ্ডা হাতে নিয়ে এসে দাঁড়িয়েছে।

সত্য কি কারো দিকে তাকিয়ে দেখে?

বোধ হয় না।

সত্য নিঃশব্দে রান্নাঘরে গিয়ে ঢোকে, আর বোধ করি ফেলে ছড়িয়ে চলে যাওয়া হাতের কাজটা আবার গুছিয়ে তুলতে থাকে।

সদুতে সদুর স্বামীতে একটা অর্থপূর্ণ দৃষ্টিবিনিময় হয়। তারপর সদু উত্তেজিত নবকুমারকে বসিয়ে একখানা হাতপাখা দিয়ে মাথায় বাতাস দিতে দিতে খাদে গলা নামিয়ে বলে, “আর ফেপে উঠে কি করবি ভাই? এতদিনে তো সবই পরিষ্কার হয়ে গেল। চিরদিন মাথাটা একটু ‘ইয়ে’ ছিল, এখন ক্রমশ বৃদ্ধি পাচ্ছে। তোর কপালে ভগবান এমন তেতুল গুলবেন, তা কখনো ভাবি নি।”

মামীর কাছে থাকতে সদুর যেমন ধারালো পরিষ্কার কথাবার্তা ছিল তেমন যেন আর নেই। সদু গেরস্থর গিন্নী হয়েছে। তাই গিন্নীদের মত কথা রঙ করেছে।

নবকুমার বলে, “এক ঘটি জল দাও সদুদি!”

সদু তাড়াতাড়ি জল এনে হাতে দিয়ে বলে, “খা, খেয়ে এইবার মনের বল করে কবরেজ ডেকে এনে চিকিৎসা করা। নেহাত হাতেপায়ে ছেকল না পরাতে হয়, সেটা তো দেখতে হবে!”

নবকুমারের বোধ করি জল খেয়েই বল বাড়ে। সে বীরবিক্রমে বলে, “পাগল না হাতী! সব বদমাইশি! লোকের সামনে আমাকে হেয় করাই ওর একমাত্র কাজ। জীবন-ভোর তাই দেখলাম।”

হ্যাঁ, বড় হয়ে পর্যন্ত ছেলেরাও তাই দেখছে। ছেলেবেলায় মায়ের প্রতি শ্রদ্ধা ছিল সহানুভূতি ছিল, মায়ের কথা বেদবাক্য বলে ভাবতো ছেলেরা এবং বাবাকে “অল্পবুদ্ধি” বলে মনে মনে করুণা করতো। কিন্তু বাবার ওপর করুণাটা বজায় থাকলেও, বড় হয়ে পর্যন্ত মায়ের ওপর থেকে যেন সহানুভূতি অনেকটা চলে যাচ্ছে, বিশেষ করে বড় ছেলেটার।

সে ভাবতে থাকে—

এ কী!

প্রত্যেকটা ব্যাপারে তাল ঠুকে লড়াই।

শান্তির সংসারে সেধে অশান্তি ডেকে আনা, আর বাবাকে হেয় করা!

এটা অন্যায়।

সুহাসকে নিয়ে কী কাণ্ডই করলেন! তবু তার পিছনেও না হয় একটা যুক্তি আছে। মানুষটার একটা গতি করার দরকার ছিল। কিন্তু নিতাই কাকার শালী যে মরে ভূত হয়ে গেছে, তার জন্যে এ কী কেলেঙ্কারী! নিজের স্বামী-পুত্রকে এইভাবে শাস্তি দিয়ে, সেই অদেখা অচেনা অপরাধীকে শাস্তি দেওয়াতে হবে ?

বাঁচবে তাতে মড়া ?

বাঁচবে না। শুধু নবকুমার আর তার ছেলের মৃত্যুতুল্য অপমান বয়ে বেড়াতে হবে। পাড়াসুদ্ধ সমস্ত লোক তো দেখলো সাহেব পুলিশ ঢুকলো তাদের বাড়িতে। সবাই জল্পনা-কল্পনা করবে না, হয়েছে কি ?

কে তাদের বোঝাতে যাবে ?

আর বোঝালেই বা কে বিশ্বাস করবে ? এরপর হয় এ পাড়ার বাস ওঠাতে হবে, নয় দু'গালে চুমকালি মেখে আর কানে তুলো দিয়ে পথে বেরোতে হবে। ... পিনী যা বলছে, তাই হয়তো সত্যি। মাথার মধ্যে কোনো গোলমালই আছে।

আশ্চর্য!

এত বুদ্ধি, এত বিদ্যা, এত কর্মদক্ষতা, তার মাঝখানে এ একটা কি বিটকেল বুদ্ধি ?

ছেলেবেলাকার মাকে মনে পড়ে।

কত উজ্জ্বল, কত আনন্দময় সেই স্মৃতি। অন্তত ছেলেরদেব কাছে সত্যর সেই উজ্জ্বল আনন্দময়ী মূর্তিটাই ছিল।

নবকুমারের আড়ালে চুপি চুপি ছেলেরদেব সঙ্গে কত জল্পনা-কল্পনা! ভবিষ্যতের ছবি একে কত রঙের তুলি বুলানো! দুই ছেলে সত্যবতীর দুই দিকপাল হবে, দেশ থেকে যত অনাচার কুসংস্কার আর কু-প্রথা দূর করবার চেষ্টায় লাগবে একজন, আর একজন দেশ স্বাধীন করবার কাজে আত্মনিবেদন করবে।

তবে সকলের আগে বিদ্যার্জন।

“বিদ্বান না হলে কোনো কাজেই লাগতে পারিনি না তুড়, কেউ তোকে পুঁছবে না। আর তা ছাড়া ভালমন্দ-বোধই বা আসবে কোথা থেকে ? ছেরা জজ হবি, ম্যাজিস্ট্রেট হবি, নয়তো ডাক্তার আর মাস্টার হবি। এমন গুণ দেখাবি, লোকে বহুই হ্যাঁ, ছেলেরদেব মানুষ করেছে বটে।”

শিশু-মনে এই চাকচিক্যের ছবি কি মনোরম প্রভাবই বিস্তার করতো! কিন্তু বড় হয়ে ক্রমশই দেখছে মায়ের ভিতরের সেই উজ্জ্বল যেন আশ্রয় হয়ে উঠছে।

দেড়-দু'বছর বাকুইপুরে থেকে এসে আরো যেন বদলে গেছে মা। এই মায়ের জন্যে ভালবাসার থেকে ভয় আসে বেশী।

ছোট ছেলেরা অবশ্য অনেকটাই মায়ের ভাবে অনুপ্রাণিত। কিন্তু এই সব চোঁচামেচি অশান্তিকে সে বড় ঘৃণা করে। ... সমাজের বিকৃতির বিরুদ্ধে লড়াতে লড়াতে মানুষ নিজে যেন বিকৃত না হয়ে যায়, সেটাও তো দেখতে হবে।

নিতাইকাকার শালীর মৃত্যুর জন্যে মা যা করে বসলেন, তার মধ্যে সাহসের পরিচয় আছে সত্যি, কিন্তু একটু যেন দুঃসাহসই! অন্তত ছেলেরদেব সঙ্গে তো পরামর্শ করে কাজটা করতে পারতেন। তাছাড়া সাহেবদের যদি তাড়াতেই চাই আমরা, অসুবিধেই পড়ে ওদের সাহায্য চাইতে যাব কেন ? মার যদি সহজ অবস্থা থাকতো, কথাটা জিজ্ঞেস করতো সে। কিন্তু মা এখন ক্ষেপে আছে।

কিন্তু সত্যর ছেলেরা যা ভাবছে তা নয়। সত্য এখন আর ক্ষেপে নেই। সত্য স্তব্ধ হয়ে আছে। আর সত্য এখানকার সমস্ত কিছু বিন্মুত হয়ে শুধু ভাবছে, সত্যর ছেলেরাও সাহেব দেখে ভয় পেয়ে পিছনে থাকলো, এগিয়ে গিয়ে কথা বলল না, মায়ের বক্তব্যটা বুঝিয়ে এবং শুছিয়ে বলবার জন্যে মায়ের পাশে এসে দাঁড়াল না!... যে ছেলেরদেব কলেজে পড়ানোর জন্যে জীবন পণ করছিল সত্য, যে ছেলেরদেব উপরই জীবনের সমস্ত আশা রেখে এসেছে সত্য!

হয় তো সত্যর আশাটা একটু বড়।

সত্য ছেলেরদেব ডিগ্রীটাই দেখছে, বয়েসটা দেখছে না। এই ব্যাপারটা ওদের বিচলিত করবার পক্ষে যথেষ্ট তা বুঝছে না।

কিন্তু সত্যিই বুঝছে না সত্য ?

সত্য ভেবে পাথর হয়ে যাচ্ছে, সরল কি বলে মাস্টার মশাইকে ডেকে নিয়ে এল ?

এতটুকু লজ্জা করল না ?

গুরা কী না জানে ?

দেখে নি মাষ্টার মশাইকে কী অপমানিত হয়ে চলে যেতে হয়েছে এ বাড়ি থেকে ?

হঠাৎ বিপদে পড়ে গিয়ে তাঁকেই ডেকে আনার মত প্রস্তাব নবকুমারের পক্ষে সম্ভব হতে পারে, কিন্তু সত্যর গর্ভের সন্তান স্বচ্ছন্দে সেই নিলজর্জ কাজটা করতে পারলো কি করে ?

সত্যর মাথাটা ধুলোয় লুটিয়ে দিল সত্যর ছেলে! আর কার কাছে ? যেখানে সব চেয়ে সন্ত্রম ছিল সত্যর!

সত্য তবে এখন কী করবে ?

কাকে জিজ্ঞাসা করবে, সারাজীবন আমি যে পথে চলে এলাম, সে পথ কি ভুল পথ ?

রান্নার কাজ শেষ হয়ে গিয়েছিল তবু চুপ করে বসেছিল সত্য রান্নাঘরে। ডেকে খেতে দেবার উৎসাহ পাচ্ছে না।

সদু চলে গেছে, কাজেই তাকেও ডেকে খেতে দিতে বলতে পারছে না। অনেকক্ষণ পরে সুবর্ণ খেলা ফেলে ছুটে এল। বলল, “আজ বুঝি খাওয়াদাওয়া নেই ? শুধু বসে বসে ‘চিন্তা’ করলেই চলবে ?”

এত কথা শেখার বয়সটা নয়, তবু সারাক্ষণ ঠাকুমা এলোকেশীর সঙ্গে থেকে থেকে কথার ওস্তাদ হয়ে উঠেছে, কথা বললে বোঝে কার সাধ্যি ছ-সাত বছরের মেয়ে!

অবশ্য কেবলমাত্র এলোকেশীর দোষ দেওয়াও অধর্ম। পাকা কথা, প্রচুর কথা এ তো সুবর্ণর ঐতিহ্য, অনুক্রম!

সত্য কি ভুলে গেল সেকথা ?

তাই সত্য মেয়ের দিকে জ্বলন্ত দৃষ্টিতে তাকিয়ে তীব্রস্বরে বলল, “ফের পাকা কথা ?”

সুবর্ণ মায়ের মূর্তিতে ভয় পেল। তাড়াতাড়ি বলে উঠল, “খিদে পায় না বুঝি ?”

সত্যর জ্বলন্ত দৃষ্টি ঈষৎ কোমল হয়ে এল। বলল, “দিকি ভাত, বাবার দাদাদের ঠাই করে দাও গে।”

হ্যাঁ, ঠাই করা কী এক ঘটি জল দেওয়া এ সুবর্ণ শিখেছে। আরো কাজ শিখেছে, বিছানা পাতা বিছানা তোলা, তাও টেনে টেনে পারে। পারে মায়েক সঙ্গে বসে শাক বেছে দিতে।

কাছে বসিয়ে কাজ শেখাতে শেখাতে বইয়ের পদ্যও শেখায় মেয়েকে। মুখে বানান শেখায়।

ঠাই করতে চলে গেল সুবর্ণ।

আর ওর পথের দিকে তাকিয়ে তাকিয়ে ভাবতে লাগল সত্য, এবার কি তবে শেষবারের মত এই মেয়েটার উপরই সব আশা রাখবে সত্য ? সুহাসের মত হবে সুবর্ণ ?

সুহাসকে সত্য গড়লো, ভোগ করতে পেল না।

অবিশ্যি মেয়েসন্তান ভোগ্যবস্তু নয়, তবু সুহাসের যদি এমন অদ্ভুত অঘটনের জীবন না হত, এমন করে তো চিরদিনের মত সব সম্পর্ক ছিন্ন করে ফেলতে হত না সত্যকে। সত্য তো তাকে দেখতে পেত।

নব নব রূপে বিকশিত হত সে সত্যর চোখের উপর। এ আর সত্যর দেখার উপায় রইল না, কেমন সংসার করছে সুহাস।

সুবর্ণ সত্যর চোখের সামনে বিকশিত হবে।

ছেলেরা শেষ অবধি বংশের ধারায় কাপুরুষই হবে। হবে স্ত্রী-বশ!...যেমন ছিলেন ঠাকুর্দা নীলাধর, যেমন নবকুমার!

নীলাধর অসৎচারিত্র, তবু স্ত্রীর ভয়ে কাঁটা। নবকুমারের তো কথাই নেই!

কিন্তু ?

সত্য আজ নিজেকে বিশ্লেষণ করে দেখছে... সত্য কি নবকুমারের এই বশ্যতার পরিবর্তে উল্টোটা হলে সুখী হত ?... অনেকবার মনের কোণে কোণে আলো ফেলে ফেলে দেখেছে সত্য, হত সুখী ? সত্যর স্বামী যদি সত্যর যুক্তি খণ্ডন করে স্বমতে প্রতিষ্ঠিত থেকে বিপরীত ভাবে নিজেকে চালাতে পারতো, তাতেও সত্য সুখী হত ?

নবকুমার তা নয়।

নবকুমার স্বামী কথার তাল ঠুকে স্ত্রীর কথার প্রতিবাদ করে। কিন্তু ওই পর্যন্তই। নিজের কোনো মত খাড়া করতে পারে না। শেষ পর্যন্ত সত্যই জয়ী।

কিন্তু কেবলমাত্র জয়ী হয়েই কি সুখ ? পরাজয়েও কি সুখ নেই ? যে পরাজয় দেখায় স্বীকার করে নেওয়া যায়, তেমন পরাজয়ের স্বাদ জীবনে কখনো পেল না সত্য।

তবে সুবর্ণই উঁচু হোক, মস্ত হোক। তাই ভাল, মেয়ের কাছে ছোট হবে সত্য। যেন অবাধ হয়ে বলতে পারে, “বাবা কত বুদ্ধি তোরা! এত কথা, এত তত্ত্ব, এত তথ্য শিখলি কি করে?” যেন বলতে পারে, “সুবর্ণ, তুই আমার মুখ রেখেছিস!”

বাপ-ভাইকে গিয়ে যখন জানালো সুবর্ণ, ভাত বাড়ি হয়েছে, তারা যেন হাতে চাঁদ পেল। যাক তা হলে সংসারটা আবার ছন্দে এলো। ওরা তো বসে বসে ভাবছিল আজ আর সত্য রান্নাবান্না করে নি!

এই “মূল কেন্দ্রে” বিশৃঙ্খলা ঘটলেই বড় মুশকিল।

ওরা কৃতার্থ হয়ে নিঃশব্দে এসে খেতে বসলো।

নবকুমার যে সাহেবের উপস্থিতির সময় মনে করেছিল, ওরা একবার চলে যাক, সে একবার হস্তনেস্তটা দেখে নেবে, সে কথা আর মনে পড়ে না। তখন নিজের গালে নিজে চড়ানোর পরই সমস্ত সাহস উঠে গেছে তার। এখন অবিরত সদূর কথাটাই মনে পড়ছে।

“মাথাটাই খারাপ বৌয়ের!”

খারাপ!

নচেৎ আচরণ এমন উষ্টোপাস্টো হয়? যাক, তার মধ্যে যেটুকু সোজা করে তাই মঙ্গল। খেতে বসতে পেয়ে ধন্য হল বাপ-ছেলেয়।

সুবর্ণ পাকা গিনীর মত বলতে লাগলো, “আর দুটি ভাত নাও না বাবা?”

তা নবকুমার আবার এখন সত্যের মন রাখতে ভাতও দুটি নিল চেয়ে। তারপর যখন খাওয়া হয়ে গেছে, তখন সত্য এসে তার সংকল্প ঘোষণা করলো।

সহজ গলায় বললো।

বললো, “অসুখটা হয়ে অবধি শরীরটা মোটে ভাল যাচ্ছে না, তাই ভাবছি কাশীতে বাবার কাছে গিয়ে কিছুদিন থাকবো। পশ্চিমের হাওয়ায় স্বাস্থ্য-শরীরটা একটু ভালো হতে পারে।”

নবকুমারের মনে হল, সত্য যেন হঠাৎ তাকে বর দিতে এলো!

বোধ করি মনের মধ্যে এই ধরনের একটা সুখই বাজছিল। কিছুদিন কোথাও ঘুরে আসুক সত্য।

তা হলে সেও সারবে, নবকুমারও বাঁচবে।

কিন্তু এক কথায় কি করে বলা যায়—হিস আচ্ছা, তাই যাও!

তাই আস্তে আস্তে ভয়ে ভয়ে বলে, “কাশীতে? বাবার কাছে? তাই কি সম্ভব? তিনি একা মানুষ, তাঁর কাছে গিয়ে কি থাকবে?”

সত্য সংক্ষেপে বলে, “সে যা হয় হবে। সাধন, তুই আমায় পৌঁছে দিতে পারবি না?”

সাধনকেই প্রশ্ন করেছিল সত্য, বড় ছেলে বলেই করেছিল। কিন্তু সাধন এ প্রশ্নের উত্তর দিতে অকূলপাথারে পড়লো। একা সে নিজের দায়িত্বে মাকে নিয়ে কাশী যাবে, এ হেন প্রস্তাবটাই যেন তার কাছে মার আর এক পাগলামি বলে মনে হল।

ছেলের এই বিপন্ন মুখের দিকে তাকিয়ে সত্যের মুখে হঠাৎ সূক্ষ্ম একটি হাসির রেখা ফুটে উঠল, আর তেমনই সূক্ষ্মভাবে সে বললে, “পারবি না বলেই মনে হচ্ছে, তবে থাক!”

অন্য সময় হলে এই হয়তো ছেলেকে তীব্র তিরস্কার করত সত্য, কিন্তু আজ আর করল না। ওইটুকু বলেই—হাতের কাজ সারতে লাগলো।

নবকুমারের চোখে ওই সূক্ষ্ম হাসিটুকু ধরা পড়ার কথা নয়, কিন্তু কেন কে জানে পড়লো। আর কেন কে জানে সে এতে একটা অপমানের জ্বালা অনুভব করলো। আর সেই অনুভূতির ফলেই ফট করে বলে বসলো, “কেন, সাধনই বা কেন, আমি পারি না?”

“আমি নিয়ে যাবো”, এ কথা বললো না অবশ্য, বললো, “আমি পারি না?” সত্য এবার ওদের অবাধ করে দিয়ে ভাল গলাতেই হেসে উঠল। হেসে বলল, “কী আশ্চর্য, পারবে না এ কথা কখন বললাম? তবে ওরা বড় হয়েছে, ওদের মায়ের ভার কিছু কিছু নেবে, এইটাই তো আশা।”

“বড় হয়েছে, ভারী লায়ক হয়েছে!” বলে কথায় যবনিকাপাত করে অন্য এক মতলব তাঁজতে থাকে নবকুমার।

তবে আর একটা ঝড়ের আশঙ্কা করে। কিন্তু ঝড় ওঠে না। নবকুমার আশ্বস্ত হয়, আবার আশ্চর্যও হয়।

সত্য কি হঠাৎ বদলে গেল?

ঝড় উঠল অন্যত্র।

উঠল পরদিন।

স্কুল থেকে ফিরে বইখাতা নামিয়ে সুবর্ণ ছুটে এসে হঠাৎ দু হাতে মাকে জড়িয়ে ধরে বলে ওঠে,
“মা মা, আমার একটা দিদি আছে ?”

সুবর্ণর প্রশ্নের উত্তর দেওয়ার আগে সত্য গালে হাত দিয়ে বলে, “ওমা, এই আমি কাচা কাপড়টা পরলাম, আর তুই ইকুলের জামায় ছুয়ে দিলি ?”

“যাক গে, হোক গে—,” সুবর্ণ মায়ের হাতে হাত ঘষতে ঘষতে বলে, “ইকুল কি কিছু খারাপ জায়গা ?”

কাপড়ের কাচাঘ্ন যখন ঘুচেইছে, তখন আর কি করা! সত্য সম্মেহে মেয়েকে কাছে টেনে বলে,
“দুর্গা দুর্গা! তাই কি বলেছি ? তবে বাইরের জামাকাপড়ে কত ধুলো-নোংরাও তো লাগে। সে যাক,
দিদির কথা কি বললি ?”

“সেই তো বলছি—” সুবর্ণ মহোৎসাহে বলে, “আমাদের ইকুলে একজন নতুন মাস্টারনী এসেছেন, তিনি আমার দিদি হন।”

“আঃ সুবর্ণ! আবার ওই রকম বিচ্ছিরি করে বলছিস ? কতদিন বলেছি মাস্টারনী বলবি না!”

“বাবা তো বলেন!” গৌভরে বলে সুবর্ণ।

“বলুন!” সত্য দৃঢ়স্বরে বলেন, “ছেলেমানুষদের ওসব কথা বলতে নেই। তোমরা কি ওঁদের মাস্টারনী বলে ডাকো ?”

“ধ্যাৎ, আমরা তো দিদি বলি! একজন নতুন দিদি এসেছেন, তিনি বললেন, তিনি আমার দিদি হন!”

সত্য অবাক হয়ে বলে, “কে রে ? নাম কি ?”

“নাম ? নাম হচ্ছে—নাম হচ্ছে—নাম হচ্ছে সুহাস দত্ত। উম্মির বিয়ে হয়েছে, কিন্তু সিংথেয় সিঁদুর নেই। একটা মেয়ে বললো, বেক তো, বেকদের সিঁদুর থাকে না—”

মেল ট্রেন চালিয়ে যায় সুবর্ণ।...হয়তো আরোই শেখা সত্য থামায়। রক্তিম মুখে বলে, “সুহাস দত্ত ? তুই ঠিক শুনেছিস ?”

“এই দেখ মা'র কাণ্ড! শুনবো না ? সবাই ঝুলছে। কী সুন্দর দেখতে! আমায় বললেন, জানো আমি তোমার দিদি হই ?”

সত্য রুদ্ধকণ্ঠে বলে, “তা তুই কি উল্লেখ দিলি ?”

“আমি ? আমি বললাম, দিদি হন তো আমাদের বাড়ি যান না কেন ? তা উনি বললেন, সময় পান না। সত্যি মা ? তোমার নিজের মেয়ে ?—আমার মায়ের পেটের বোন ?”

সত্য বিচলিত গলায় বলে, “কী বকিস বাজে ? অত বড় মেয়ে আমার হতে পারে ? ও আমার সম্পর্কে মেয়ে!”

“তবে যে উনি বললেন, “তোমার মা আমার মা”!

“বলেছে, এই কথা বলেছে ?” সত্য হঠাৎ কেমন উচ্ছ্বসিত হয়ে বলে, “তাতে তুই কি বললি ?”

“বললাম, আচ্ছা আজ মাকে শুধাবো—”

‘দূর বোকা, ওকথা বলতে নেই। বলতে হয়—”

কিন্তু কী বলতে হয় ?

সত্য নিজের কি জানে এক্ষেত্রে কি বলতে হয়! তবু সত্য বলে, ‘বলতে হয়, তবে চলুন আমাদের বাড়ি। ভারি বোকা তুই!’

সুবর্ণ লজ্জা পেয়ে বলে, “তাই বলবোই তো ভাবলাম। কিন্তু ভয় হল তোমাকে। তুমি পাছে রাগ করো।”

সত্য হঠাৎ মেয়ের হাতটা ধরে আরো কাছে টেনে কেমন একরকম হতাশ গলায় বলে, “ভয় হল ? আমাকে ভোদের ভয় হল ? আমি কেবল রাগই করি ?”

সুবর্ণ মায়ের এই স্বর-বৈচিত্র্যে বিশেষ বিচলিত হয় না, সুযোগ পেয়ে যাওয়ার ভঙ্গীতে অবলীলায় বলে ওঠে, “তা ভয় হয় না ? ভয়ে ভেে কাঁটা হয়ে থাকি। বাবা এন্তক সবাই। তোমার মুখের পানে চাইতে প্রাণ উড়ে যায়। আবার বলা হচ্ছে, ‘আমি কেবল রাগই করি ?’ রাতদিন রাগের ঠাকুর হয়েই তো আছ!”

রাগের ঠাকুর!

মেয়ের এই মনোহর নামকরণের ভঙ্গিমায় কি হেসে উঠল সত্য ? বলে উঠল কি, “আর তুই হচ্ছিস কথার ঠাকুর!”

না, তা বলল না সত্য।

সত্য হঠাৎ স্তব্ধ হয়ে গেল।

সত্য এই অবোধ শিশুর অবোধ উক্তির মধ্যে যেন নিজের বহিমূর্তিটা দেখতে পেল।

ঠাকুর!

তা ঠাকুরই যদি হয় তো গাছতলায় পড়ে থাকা রুম্ব দীর্ঘ রৌদ্রের তাপে ঝলসানো এক শ্রীহীন শোভাহীন ভয়ঙ্করী ঠাকুর!

স্বামী-সন্তানের কাছে অতএব এই পরিচয় সত্যর ?... প্রীতিকর নয়, ভীতিকর ? এলোকেশীর সঙ্গে তফাৎটা কোথায় সত্যর ?

নিজেকে এই পর্যায়ে তুলেছে সত্য ? স্নেহহীন সরসতাহীন পাতাবারা গাছের মত ? হঠাৎ কি যে হল, ভিতরটা মোচড় দিয়ে হু হু করে একরাশ জল উপচে পড়ল সত্যর জোড়া ভুরুষ নীচে বড় বড় গভীর কালো চোখ দুটির কোল বেয়ে।

সুবর্ণ অপ্রতিভ হয়ে গিয়ে তাকিয়ে থাকে সেইদিকে। সন্দেহ থাকে না তার মা'র সেই বড় মেয়ের জন্যে মন-কেমন করছে।

মুহূর্তেই অবশ্য নিজেকে সামলে নেয় সত্য। কান্নাবারা মুখে হাসির রেখা ফুটিয়ে বলে, “ওই সুহাস দত্ত কেমন পড়ায় রে ?”

সুবর্ণ লাজুক-লাজুক মুখে বলে, “আমাদের তো পড়ান না, উঁচু কেলাসের মেয়েদের পড়ান।”

উঁচু ক্লাসের মেয়েদের পড়ায় সুহাস!

বিধবা শঙ্করীর অবৈধ সন্তান সুহাস এত উঁচুতে তুলতে পেরেছে নিজেকে! কিসের জোরে ? শিক্ষা, সাহস ? শঙ্করীর নিজের এ জোর থাকলে গলায় দড়ি দিয়ে মরতে হত না তাকে।

সত্য কি নিজের সহিষ্ণুতা অসহিষ্ণুতাকে একটা প্রশংসা করে তুলে তার মেয়ের এই উন্নতির পথকে কলঙ্কিত করে তুলবে ? এই কচি মেয়েটাকে স্নিহাভূই বাপ-ভাইয়ের কাছে ফেলে রেখে দিয়ে সত্য নিজে কাশীযাত্রা করবে মন বদলাতে ? মনোস্তম্ভ স্বাস্থ্য ফেরাতে ?

সে বদল কি এখানে থেকে একেবারেই অসম্ভব ? মনের ওপর কি সেটুকু হাত নেই সত্যর ? ইচ্ছে করলে কি সত্য আবার সেই অনেকদিনের আগের সত্যর মূর্তিতে ফিরে যেতে পারে না ? যে সত্য হাসতে জানে, কৌতুক করতে জানে, নতুন নতুন রান্না করে আর খাবার করে স্বামী-পুত্রকে খাওয়াতে জানে! যে সত্য এই কিছুদিন আগের মেয়েকে কত স্তব স্তোত্র পদ্য মুখস্থ করিয়েছে, তার পড়া ধরেছে!

কতকাল সংসারের দিকে ভাল করে তাকিয়ে দেখে নি সত্য। এই ছোট সংসারের গণ্ডিটুকুর বাইরে চোখ ফেলতে গিয়ে চোখে তা শুধু জ্বালাই ধরেছে তার। সত্যর ছোট ছেলের কথাই কি তবে ঠিক ? সে যে বলে, “জগতে যেমন কোটি কোটি মানুষ, তেমনি কোটি কোটি অন্যায, সব দিকে তাকাতে গেলে যে চোখে ধাঁধা লেগে যাবে তোমার মা। নিজে তুমি কোন অন্যায করছ কিনা সেটুকু দেখ ভাল করে।”

সেটা তা হলে ঠিকই বলে ?

নবকুমার যে সত্যর আদর্শের অনুযায়ী নয়, সে সত্যর ভাগ্য। আর হয়তো সেটা আশা করাও ভুল। নিজের গর্ভজাত সন্তান, নিজের হাতেগড়া পুত্রুল, তাই বা নিজের আদর্শ অনুযায়ী হয় কই ? বড় ছেলেটা তো ঠিক তার বাপের ধারাতাই চলে যাচ্ছে।

সত্যর জীবন যদি এমন ছাঁচে-ঢালা সাধারণ না হয়ে খুব উল্টোফাল্টা অদ্ভুত কিছু হত! সুহাসের মত, শঙ্করীর—দুর্গা দুর্গা বলে শিউরে উঠল সত্য।

আর তার চোখের সামনে হঠাৎ ভুবনেশ্বরীর মুখটা ভেসে উঠল। ঘোমটায় ঘেরা কপালে বড় বড় করে সিঁদুরের টিপ আঁকা—ভীষণ নরম মুখ।

ভুবনেশ্বরী কোনদিন জগতের কোথায় কি অন্যায ঘটছে তা নিয়ে মাথা ঘামাতে যায় নি, ভাল ঠুকে লড়তে যায় নি। ভুবনেশ্বরীর মুখটা ভেসে উঠল। ঘোমটায় ঘেরা কপালে বড় বড় করে সিঁদুরের টিপ আঁকা—ভীষণ নরম মুখ।

ভুবনেশ্বরীর কোনদিন জগতের কোথায় কি অন্যায ঘটছে তা নিয়ে মাথা ঘামাতে যায় নি, ভাল ঠুকে লড়তে যায় নি। ভুবনেশ্বরী সবাইকে ভয় করেছে, সবাইকে ভালবেসেছে।

মায়ের মুখটা মনে পড়তেই হঠাৎ বাবার ওপর একটা ক্ষুব্ধ অভিমানের জ্বালা অনুভব করল সত্য। যেন মায়ের ওই অকালমৃত্যুর সঙ্গে বাবার কোনো অবিচার জড়িত আছে। সাহস করে একটা দিন একটা কথা বলতে পায় নি ভুবনেশ্বরী স্বামীর মুখের ওপর।

নিতান্ত আক্ষেপের সঙ্গে মনে এল সত্যার, ভুবনেশ্বরীর মেয়ে তার শোধ তুলেছে।

সত্য কি তবে জীবনকে নতুন মোড়ে বাঁক নেওয়াবে? সত্য শুধু তার সংসার-জীবনে উজ্জ্বল হয়ে জ্বলবে? সত্য সুখী হবার চেষ্টা করবে?

মেয়েটাকে নিতান্ত কাছে টেনে নিয়ে সত্য তার মাথার ওপর মুখ রেখে বলে, “আমি কাশী চলে গেলে তুই কাঁদবি সুবর্ণ?”

“তুমি চলে গেলে?”

সুবর্ণ মার স্নেহস্পর্শ থেকে ঠিকরে উঠে বলে, “আমি যাবো না বুঝি?”

“তুই?” সত্য হতবুদ্ধি। “তুই যাবি কি? তুই কি করে যাবি?”

“যে করে তুমি যাবে! আমি যাবো না তো কে যাবে?”

“দেখ মুশকিল! আমার সঙ্গে তোমার তুলনা? আমার ইচ্ছা আছে? সেই ইচ্ছা কামাই করে যাচ্ছি আমি?”

সুবর্ণ গোঁড়রে বলে, “কামাই করলে কী হয়? বাবা তো বলে, ছোট মেয়েরা ঢের কামাই করে—”

“বলেন বুঝি? ভাল! কিন্তু তোমার বাপের মত কামাই করাকে ভাল বলি না। ইচ্ছা কামাই করা চলবে না।”

সুবর্ণ দৃগুত্বরে বলে, “দেখো চলে কিনা! আমায় ফেলে রেখে চলে গেলে কী করি আমি দেখো!”

সত্য আর রাগ করবে না।

সত্য হেসে ফেলে বলে, “চলে গেলে আর দেখবো কি করে? তার থেকে বরং যাওয়া বন্ধ দিয়ে তুই কি করিস তাই দেখি বসে বসে!”

“ওমা, ওমা মাগো—” সুবর্ণ মাকে দু’হাতে জড়িয়ে ধরে কাঁখে মুখ ঘষতে ঘষতে বলে, “তুমি কী লক্ষ্মী!”

ঠিক এই মিলন-মুহূর্তে নবকুমার এসে দাঁড়াই পিছনে এক দীর্ঘাকৃতি উত্তর ভারতীয়। সাজসজ্জা দেখে চিনতে তুল হয় না, পাণ্ডজাতীয়।

এই!

এই নবকুমারের ভেঁজে নেওয়া মস্তক। কদিন আগে শুনেছিল তার অফিসের এক ভদ্রলোকের মা পিসি ইত্যাদি জনা যোলো মহিলা দল বেঁধে গয়া কাশী মথুরা বৃন্দাবন যাচ্ছেন, পথ-সঙ্গী এই পাণ্ডঠাকুর। তাই একে নিয়ে এসেছে।

সত্যবতী মাথায় ঘোমটা টেনে গলায় আঁচলটা জড়িয়ে দূর থেকে একটি প্রশ্নাম করে। আর নবকুমার উদাত্ত গলায় বলে, “এই যে, একে নিয়ে এলাম। কাশীর বিখ্যাত মানুষ ইনি—শ্রীরামেশ্বর পাণ্ডা। আমার এক বন্ধুর মা যাচ্ছেন এর সঙ্গে, তাই বলতে বলেছিলাম দয়া করে যদি তোমাকেও সঙ্গে নেন। তারপর তোমার বাবার ঠিকানায় ছেড়ে দেবেন তোমাকে। ইনি তাতে রাজী হয়েছেন। সামনের পূর্ণিমায় যাত্রা—”

সত্যার মাথার ঘোমটা নড়ে না, কিন্তু সত্যার গলা স্পষ্ট হয়ে ওঠে, “বৃথা পাণ্ডাজীকে কষ্ট দিলে, আমি এখন আর যাচ্ছি না।”

“এখন আর যাচ্ছি না?”

“না।”

নবকুমার ঈষৎ উষ্ণত্বরে বলে, “তা আবার যখন হঠাৎ যাবার বাসনা চাপবে তখন একে পাচ্ছে কোথায়?”

“না, ওঁকে আর কোথায় পাবো!” সত্য মৃদু স্বরে বলে, “তুমিই নয় কষ্ট করবে তখন!”

“ওঃ চালাকি! তা সেটা আগে বললেই হত। এভাবে ধাষ্ট্যমো করতাম না... পাণ্ডাজী আপনাকে মিছে কষ্ট দিলাম, ইনি যাবেন না।”

পাণ্ডাজী অবশ্য এই সামান্য বাধায় চট করে টলেন না, কাশীধামের মহিমা সম্পর্কে অবহিত করিয়ে দেবার জন্যে বহুবিদ বাক্যব্যয় করেন। কিন্তু সত্য বিনীত উত্তর দেয়, “বাবা টানেন নি বুঝতেই পারছি। যখন টানবেন তখন না গিয়ে উপায় থাকবে না।”

নবকুমার ত্রুঙ্ক প্রশ্ন করে, “হঠাৎ মত বদলাবার হেতু?”

সত্য এবারও বিনীত উত্তর দেয়, “সুবর্ণটা হয়তো ছাড়বে না, সঙ্গে যেতে চাইবে, তাতে অনেক ইঙ্কল কামাই হবে।”

নবকুমার তো চিরদিনই বিরহে কাতর, তবে হঠাৎ উল্টো সুরে গান ধরে কেন ? সত্য কাশী যাবে না শুনেই তো হাঁফ ছেড়ে বাঁচবার কথা তার, তবে চটে ওঠে কেন ?

তা নবকুমারেরও “মন” বলে একটা বস্তু আছে বৈকি, আর সে মনের তবুও আছে। সত্য কিছুদিন কাশী ঘুরে আসতে যাচ্ছে, এই ঘটনাটাকে সে মনের মধ্যে বেশ একটু খাপ খাইয়ে নিয়ে বিরহকালীন অবস্থাটা ছকে নিয়েছিল, তার মধ্যে প্রধান কাজ ছিল মাকে কিছুদিনের জন্য কলকাতায় এনে রাখা।

মনের মধ্যে কোথায় যেন একটু অপরাধ-বোধের কাঁটা বিধে আছে নবকুমারের বাপ মারা গিয়ে পর্যন্ত। মা আসতে চান নি সত্য, কিন্তু একেবারের জন্যেও অন্তত মাকে মহাতীর্থ কালীঘাট দর্শন করানো কর্তব্য ছিল বৈকি। যে কলকাতায় এতগুলো বছর কেটে গেল নবকুমারের, সেখানে একবারও তার মা এল না!

আগে এ চিন্তাটা এত প্রবল ছিল না, হয়েছে কিছুদিন আগে অফিসের এক বন্ধুর ধিক্কারে।

বন্ধু শুনে অবাধ হয়ে গেছে নবকুমারের মা কখনো কলকাতায় তার বাসায় আসেন নি শুনে। নবকুমারকে “স্ট্রেনী” বলে ধিক্কার দিয়েছে বন্ধু। সেই অবধি ওই চিন্তাটা পাক খাচ্ছিল মাথায়। আর এ কথাও পাক খাচ্ছিল, মাকে এনে স্বাধীনভাবে রাখতে হবে, বৌয়ের হাত-তোলায় নয়। তা ছাড়াও আছে কিছু কিছু মতলব।

যে সব আচার-আচরণগুলো মোটেই দোষণীয় নয়, অথচ সত্যর চোখে দোষণীয়, সে রকম কিছু কিছু করে নেওয়ার ইচ্ছে ছিল। সত্য থেকে গেলে তাও হয় না তাহলে। যেমন গড়গড়া খাওয়া। জগৎপ্রস্রাওে সবাই গড়গড়া খায়, শুধু সত্যর বরের খাওয়া চলবে না। এ কী জুলুম!

সত্যর অসাম্প্রদায়িকতা পাকা করে ফেলে যদি বলা যায় কবরেজ বলেছিল খেতে, আর এখন না খেলে পেটের মধ্যে গুণ্ণগোল শুরু হয়, তা হলে ওটা কায়ম হয়ে যায়। নবকুমারের একান্ত বাসনার একান্ত কামনার ওই নেশাটি।

আরও একটা আছে।

পরসার বাজী ধরে তাস খেলা।

তাকিয়ে ঠেসান দিয়ে শুধু ওই খেলা খেলে কত লোক কত রোজগার করে নিচ্ছে, অথচ নবকুমারের ওপর খাঁড়া উঁচিয়ে আছে সত্যর মাথার দিবি!

এত বাধা-বন্ধুর মধ্যে থাকতে প্রাণ হাঁপিয়ে আসে।

আচ্ছা সত্য যখন বারুইপুরে ছিল তখন তো নবকুমার নিরঙ্কুশ স্বাধীনতায় ছিল! তখন কেন এসব সাধ মেটায় নি ?

তা সেটাও মনস্তত্ত্ব।

তখন নবকুমারের মনোভাবটা অন্য রকম ছিল। তখন সদাসর্বদা বিরহের যন্ত্রণাটাই প্রাণকে খাঁ খাঁ করে তুলত। সত্যর অনভিপ্রেত কিছু করার ইচ্ছা হত না।

কিন্তু এখন নবকুমারের মন পাল্টেছে। সেই পুলিশের ঘটনা থেকেই পাল্টেছে। নবকুমার দেখছে সত্য যেন দিন দিন শুরু কাঠ হয়ে যাচ্ছে।

এখন সে যেন দেখতে পাচ্ছে, পুরুষ হয়েও সে চিরদিন পরাধীন। সত্যর ইচ্ছে-অনিচ্ছে, সত্যর ক্লটি-অক্লটি, সত্যর ভ্রুকুটির ভয় নবকুমারকে যেন আষ্টেপৃষ্ঠে বেঁধে রেখেছে। কেন রে বাবা, কেউ তো এমন বন্ধন-দশগ্রস্ত নয়!

ওই যে মুখুজ্যে মশাই!

কত তাঁর বায়নাঝু, কী তাঁর মেজাজ! সদুদি বুড়ো বয়সে ঘর করতে এসেও সব কিছুর ঠেলা সামলাচ্ছে, তোয়াজ করে চলছে। মুখুজ্যে মশাইয়ের বাড়িতেই তো তাসের জমজমাটি আসর।

সদুদি ডাবের ডাবের পান সেজে সেই আড্ডায় যোগান দিচ্ছে...কই, রাগ তো করছে না ? নবকুমার ওসব ভাবতে পারে ? পারে না।

এখন নবকুমারের তাই মুক্তির বাসনা জাগছিল। সত্যর আড়ালে শুরুটা করে ফেলে দেখাবে বিদ্রোহ, সে-গুড়ে বালি দিল সত্য।

তাও কারণটা কি ?

না, সুবর্ণর ইঙ্কল কামাই হবে!

এর চাইতে গার্দাহকারী কথা আর কী আছে ?

পাণ্ডা চলে যেতে আর একবার মেজাজটা প্রকাশ করল নবকুমার। বলল, “বন্ধুর কাছে মুখ থাকবে না তার। কারণটা শুনলে গায়ে ধুলো দেবে তারা।”

সত্য হাসলো।

বললো “ধুলো ঝেড়ে ফেলতে জানলে লেগে থাকে না!”

তারপর নবকুমার আসল কথায় এল।

“বলি মেয়েকে বিদ্যেবতী করে হবেটা কী? তোমার ওপর আরো ‘দশকাঠি বাড়ি’ হবে, এই তো? গাঁয়ের পাঠশালা পড়েই যদি মায়ের এই মেজাজ হয়ে থাকে, কলকাতা শহরে ফ্যাসানি ইস্কুলে পড়ে মেয়ের কী হবে সে তো দিব্যচক্ষু দেখতেই পাচ্ছি!”

সত্য তবুও হাসিমুখে বলল, “তোমার যে এমন একজোড়া দিব্যচক্ষু আছে, তা তো জানতাম না! তা হ্যাঁগো, ওই চক্ষুতে আরো কি কি দেখতে পাচ্ছ বল তো? আচ্ছ আমি কবে মরব বল দিকি!”

“সব কথা তামাশা করে উড়িয়ে দিলেই হয় না!” বলে রাগ করে উঠে যায় নবকুমার।

সেই রাগ-রাগ ভাবটাই বজায় থাকে।

সত্য যখন প্রতিজ্ঞা করেছে আর সে ‘রাগের ঠাকুর’ থাকবে না, তখন সত্যর বর উল্টো প্রতিজ্ঞা করে বসে।

এই রাগের পালা কতদিন চলত কে জানে, হঠাৎ একদিন অপ্রত্যাশিত এক ঘটনা ঘটলো। সন্ধ্যার সময় সদু এক ঘটকি নিয়ে এসে হাজির। নাচতে নাচতে বললেই হয়।

“ছেলের বিয়ে দিবি বৌ?”

সত্য আকাশ থেকে পড়ল না।

সত্য প্রতিক্ষণ এই আক্রমণের আশঙ্কায় কাঁটা হয়েই আছে। কখন না-জানি কথা ওঠে! তাই সাবধানে বলল, “পড়া-লেখাটা শেষ হলেই হবে ঠাকুরঝি।”

সদু বিরক্ত কণ্ঠে বলে, “তোমার ছেলের লেখাপড়া যেকোনো কালে শেষ হবে বৌ, এ বিশ্বাস তো রাখি নে! বিয়ের বয়স তো গড়িয়ে গেল ছেলের, বড়টা তিন-তিনটে পাস করে বেরোলো, হাঁফ ফেলতে না ফেলতে দিলি ওকালতি পড়তে, ছোটটাও তিনটে পাসের একজামিন দিচ্ছে, বেরোতে না বেরোতে আবার কিসে ঢুকিয়ে দিবি তুই-ই জানিস! তা মাথার চুল পাকিয়ে ফেলে টোপের মাথায় দেবে নাকি ছেলেরা?”

সত্য মুদু হেসে বলে, “ঠাকুরঝি বড় বেগেছ মনে হচ্ছে! কিন্তু ভেবে বল, একটা আয়-উপায়ের পথ না দেখে বিয়ে দেওয়াই কি ন্যায্য?”

সদু আকাশ থেকে পড়ে।

সদু ধিক্কার দিয়ে বলে, “নবকুমারের ঘরে কি ভাতের এমনি অভাব যে ছেলে উপায়ী না হলে আর ছেলের বৌ দুটো ভাত পাবে না?” বলে, “মা হয়ে এমন নির্লজ্জ কথা বললো, কি করে সত্য?” তার পর জোর করে বলে, “ওসব মেমিয়ানা ছাড় বৌ, এই ঘটকি ঠাকুরণ এসেছেন, মন দিয়ে শোন ওঁর কথা। দুটি মেয়েই ওঁর হাতে আছে, সৎ বংশ, দেবে-থোবে ভাল, মেয়েরা দেখতে সুন্দর, একসঙ্গে লাগিয়ে দে।...আর আমার মামীবুড়ীর কথাটাও ভাব। বুড়ীর জন্মের শোধ একটা সাদ মিটুক।”

নবকুমার আর ঘরের মধ্যে বসে থাকতে পারে না। বেরিয়ে আসে। এবং সঙ্গে সঙ্গে উদাস্ত কণ্ঠে বলে, “পাগলের অনুমতি নিয়ে কাজ করতে গেলে তো জগতের সব কাজ-কারবারই বন্ধ থাকে সদুদি! তুমি ঘটকি ঠাকুরণকে বল মেয়ের বিবরণ দিতে। মেয়ে আমরা দেখব।”

সত্যর প্রতিজ্ঞা, আর সে “রাদের ঠাকুর” থাকবে না। তাই হেসে মাথার কাপড়টা একটু টেনে গলাটা একটু খাটো করে বলে, “তা হলে তো হয়েই গেল ঠাকুরঝি! স্বয়ং বাড়ির কর্তা যখন ভার নিলেন!”

সদুর সামনে দুজনে মুখোমুখি কথা বলা শোভা পায় না, অতএব সদুর মাধ্যমে।

নবকুমার বলে, ‘হাসি-তামাশার কথা নয় সদুদি, ছেলের বিয়ে আমি শীঘ্রই দেব। বিয়ের বয়স হওয়া কি, বিয়ের বয়স গড়িয়ে গেল! আর সদুদি জিজ্ঞেস কর তোমাদের বৌকে, ছেলেরা যে বুড়ো হাতী হয়েও এখনো এক পয়সা ঘরে আনছে না সে কি ছেলের দোষ? ওদের গর্ভধারিণী দিয়েছে ওদের চাকরি করতে? আমি হতভাগা যতবার চাকরির সন্ধান এনে দিয়েছি, ততবারই অগ্রাহ্য করে ঠেলে দিয়েছে। তোমাদের বৌয়ের ছেলেরা জজ ম্যাজিস্ট্রেট উকিল ব্যারিস্টার হবে গো!”

সদু আপসের সুরে বলে, “তা হবে না কেন রে নবু ? ভাগ্যে থাকলে ঠিকই হবে। ওসব মানুষের ছেলেরা হয় বৈ আর কিছু আকাশ থেকে পড়ে না তারা! কিন্তু তার জন্য বিয়েয় বাধা কি ? আমি ঘটকি ঠাকুরগণকে বলছি তাহলে বৌ!”

সত্য নির্লিঙ্গ স্বরে বলে, “তোমার ওপর আর আমি কি কথা বলব ঠাকুরঝি!”

“আহা তুই মা, তুই বলবি না ?”

সত্য মুখ তুলে বলে, “আমার কথাটাই যদি জিজ্ঞেস করছ ঠাকুরঝি, আমার ইচ্ছে পাসটা হয়ে গেলে—”

এবার ঘটকি খনখনিয়ে ওঠে, “ওমা তোমার বেটার বৌ এসে কি বেটার বই কাগজ ছিঁড়ে দেবে? যেমন তেমন ঘর নিয়ে কাজ আমি করি না। এরা হল ঘাটালের মুখজ্যোতি। কত বড় বনেদী ঘর, চন্দরসূ্যি এদের ঘরের ঝি-বৌয়ের মুখ দেখতে পায় না। এ হচ্ছে জ্যোতি বোন।”

চন্দর-সূ্যি মুখ দেখতে পায় না!

সত্য একটু হেসে ফেলে বলে, “ঠাকুরঝি, ঘটক ঠাকুরগণকে বল, ওঁদের মেয়েদের জন্যে আরো মস্ত বনেদী ঘরের পান্তর পাবেন, আমরা ওঁদের যুগি় নই! চন্দর-সূ্যির মুখ দেখেছে এমন মেয়েই আমার প্রার্থনা!”

ভাই-বোন দুজনে একসঙ্গে চমকে উঠে বলে, “তার মানে ?”

“মানে তবে স্পষ্ট করেই বলি! একটু লেখাপড়া জানা মেয়ে আনার ইচ্ছে। ইকুলে পড়ে এমন মেয়ের সন্ধান যদি থাকে—”

“কী, কী বললে ?”

নবকুমার ঠিকরে উঠে বলে, “শুধু মেয়েকে বিদ্যেবতী করে সাধ মিটেছে না, আবার বৌ আনতে হবে তাই ? কেন, বৌ এসে তোমার ছেলের পড়া বলে দেবে ?”

ঘটক ঠাকুরগণ একটু টেপা-হাসি হেসে বলেন, “আহা, সে তো দেবেই গো! পরিবারের কাছে ‘পড়া মুখস্থ’ না করে আজকের বাজারে কোন্ পুরুষমানুষটা আর উত্তরাচ্ছে ? একালে পরিবারই মাষ্টার। সেই মাষ্টারের শিক্ষেই শিরোধার্য। তবে আমরা হাতে তেমন মাষ্টার মেয়ের সন্ধান নেই। এ হল একেবারে নবাবী আমলের বনেদী বংশ। এদের শিক্ষে-দীক্ষেই আলাদা। তা হলে আর কি করা! উঠি দিদি ?”

ঘটকির সঙ্গে সঙ্গে সদুও বিদায় নেয়।

কারণ যদিও একটা গলিপথ পার হয়ে গিয়া নিয়ে কথা, তবু সন্ধ্যার পর একা যাওয়া চলে না। আবার তবে নবুকে কি ছেলেদের পৌঁছাতে যেতে হয়। থাক।

ওরা চলে যেতে নবকুমার ফেটে পড়ে, “বাড়ীটাকে কী বানাতে চাও তুমি ? বিদ্যার বিন্দাবন ? ছেলেদের এত বিদ্যেয় হবে না, আবার বৌয়েরও চাই ?”

সত্য আস্তে বলে, “চেচামেচিতে কাজ কি, ওরা ঘরে পড়া করছে, গলা তো তোমার দোতলা কোঠায় গিয়ে পৌঁছচ্ছে। তবে এই কথাটাই বলি—আমার মতামত ইচ্ছে-বাসনার কথা যদি শুধোও তো বলব—কানা অঙ্ক বৌ আমার ইচ্ছে নয়!”

“কানা অঙ্ক!”

নবকুমার আকাশ থেকে পড়ে।

সত্য দৃঢ় স্বরে উত্তর দেয়, “তা বৈ আর কি! ক-অঙ্কর যে না চিনল সে অঙ্করই সামিল! চোখ থাকতে অঙ্ক!”

সত্যর এই রায় দেওয়ার পর খুব একটা ঝড় ওঠে বাড়িতে। রাগের সঙ্গে হাসিরও। সত্যর ওই ‘অঙ্ক’ কথাটার ব্যাখ্যাটা সবাইকে ডেকে ডেকে শোনায় নবকুমার এবং নিতাই ও নিতায়ের বৌ, মুখ্যো মশাই, তাঁর জীইয়ে-ওঠা ছোট গিন্নী, তার বড় মেয়ে, সবাই এই নতুন ব্যাখ্যার রসে মশগুল হয়ে হাসি-তামাশা করে।

শুধু সদুই হঠাৎ স্তব্ধ হয়ে যায়।

আর একসময় নিঃশ্বাস ফেলে বলে, “কথাটা বৌ মিথ্যে বলে নি নবু, চোখ থাকতেই অঙ্ক! এই তোর সদুদিরই যদি একখানা পস্তর লেখবার জ্ঞান থাকত, তা হলে হয়তো সারাজীবনটা তার বরবাদ হয়ে যেত না!”

অতঃপর সদুই আশ্বাস দেয়, “কলকাতা শহরে ইকুলে-পাঠশালায় পড়া মেয়ে পাওয়া অসম্ভব হবে না মনে হয়!” বলে, “আমি অন্য ঘটকি ধরছি!”

অর্থাৎ ভাইপোর বিবাহ-তরণীর হাল সে এবার ধরবেই! দেখছে কাগরী বিহনে নৌকা বানচাল।

তুড়ুর কানেও অবশ্য এ আশ্বাস ঢোকে। এবং অবশ্যই সে আশার স্বপ্ন দেখতে থাকে। কারণ তার সহপাঠীদের সকলেরই বিয়ে হয়ে গেছে, দু-একজন তো ছেলের বাপ হয়ে বসে আছে। তার বিয়ের কথা উঠছে না কেন, এ কথা সে ভেবেছে মাঝে মাঝে।

তবে খোকা এক অসমসাহসিক কথা বলে বসেছে। বলেছে অবশ্য পিসির কাছে। “দাদার হস্লে হোক, আমায় নিয়ে টানাটানি কোর না বাবা, আমি ওসবের মধ্যে নেই!”

“নেই? তুই তবে সন্নিসী হবি নাকি?” ঝঙ্কার দিয়ে বলেছিল সদ্।

খোকা সহাস্যে বলেছিল, “কী যে হবো তা জানি না! সাপও হতে পারি, ব্যাঙও হতে পারি, তবে গলায় গন্ধমাদন নিয়ে যে কিছুই হওয়া যায় না এটা দেখে দেখে শিখেছি!”

“এত তুই দেখলি কোথায়? রাতদিন তো বই মুখে পড়ে থাকিস!”

“ওই গুর মধ্যে থেকেই সব দেখেছি!”

সদ্ অবশ্য এ কথা গ্রাহ্য করে না—

সদ্ ভেবে নেয়, একসঙ্গে তাড়াহুড়োর দরকার নেই, দুটো তো মাস্তুর ছেলে। দুবারই ঘট হবে, দাদার বিয়েটা হোক, রাঙা টুকটুকো বৌ আসুক, দেখব কেমন সন্নিসী হবার সাধ বজায় থাকে!

অতএব সেই রাঙা টুকটুকোর সাধনাই করতে থাকে সদ্। তবে ছেলের বয়েস গড়িয়ে গেছে, ঘেটের তেইশ বছরেরটি হয়েছে, ও ছেলের যুগিয়ে মেয়ে নিতে হলে কোন্ না বারো! অত বড় ধাড়ী মেয়ে সোন্দর পাওয়া শক্ত! সোন্দর মেয়ে কি পড়ে থাকে? তবু চেষ্টা করতে থাকে সদ্।

তা চেষ্টায় বাঘের দুধ মেলে, সাধনায় ভগবান মেলে।

পাঁচটা দেখতে দেখতে তুড়ুর বৌও মিলল।

বারো বছর বয়েস, দেখতে ভাল, আবার লিখতে-পড়তেও জানে, মেমের ইকুলে পড়েছে তিন-তিনটে বছর।

এরপর আর সত্য আপত্তি করবে কোন্ পথ দিয়ে?

না, সত্য আপত্তি করল না, সত্য তার বড় ছেলের মন বুঝেছে। কিন্তু আপত্তি এল অন্য দিক থেকে। আপত্তি করলেন এলোকেশী।

বড় ছেলের বিয়ে ভিটে থেকেই হওয়া উচিত, এ কথা সবাই জানে। সেই সব ব্যবস্থা করতে দিন দশকের ছুটি নিয়ে নবকুমার দেশের বাড়িতে গেল। সঙ্গে নিয়ে গেল সুবর্ণকে। সুবর্ণই বায়না ধরলো, গুর গরমের ছুটি পড়েছে।

সত্যর ইচ্ছে হচ্ছিল না এতদিন মেয়েটা কাছছাড়া হয়, তা ছাড়া ছুটির মধ্যে পড়া তো তাহলে গাছে উঠল! এই দশ দিন এমনি কাটবে, তারপরই ভাইয়ের বিয়ে!

তবু না করাও শক্ত।

নবকুমার হয়তো বলে বসবে, “হিংসে করে তুমি ওকে একবারও ঠাকুমার কাছে যেতে দাও না!”

কাজেই হেসে মেয়েকে বলল, “যা তবে, গাছের আম খেয়ে খেয়ে মোটা হয়ে আয়। দাদার বিয়েয় খাটতে হবে মনে রাখিস।”

নবকুমার বলে, “দেখ তোমার মেয়ের ওই ঘাগরা-টাগরাগুলো দিও না, ও থাক। কাপড়-চোপড় যা আছে তাই দাও সঙ্গে।”

সত্য বুঝল পরামর্শটা সমীচীন।

নাতনীর পরনে ঘাগরা দেখলে এলোকেশী রসাতল করবেন। অতএব মায়ের দরফন একখানি পুরনো নীলাম্বর জামদানী পরে আর নিজের শাড়ির সফলগুলি নিয়ে মহোৎসাহে বাপের সঙ্গে রওনা দিল সুবর্ণ। আর সেটাই বোধ করি “কাল” হল!

ভিটেয় পা দিতে না দিতেই ঘটলো বিপত্তি। এলোকেশী সেই শাড়ি জড়ানো নাতনী দেখে হৈ-হৈ করে বলে উঠলেন, “বেটার বে’র তো তোড়জোড় করছিস নবা, বলি এত বড় দিগ্গি ধাড়ী মেয়ে ঘরে পুষে কেউ বেটার বে দেয়?”

আর একটি মহিলা সভা উজ্জ্বল করে বসেছিলেন, তাঁকে “চিনি চিনি” করেও চিনতে পারে না নবকুমার। তিনিও বলে ওঠেন, “কী ঘেন্নার কথা, এত বড় মেয়ে নবুর! ওমা, আর নবু ছেলের বিয়ের ভাবনা ভাবছে?”

এলোকেশী অতঃপর তাঁর ছেলের বৌয়ের যথেষ্টাচার এবং ছেলের 'ভেড়ুয়া' অবস্থা নিয়ে তীব্র আলোচনা করে বলেন, "আমি এই তোকে বলে রাখছি মুক্ত, ওই বৌয়ের বুদ্ধির দোষেই এ বংশের চৌদ্দপুরুষ নরকস্থ হবে!"

নবকুমার মৃদুকণ্ঠে বোঝাতে চেষ্টা করে, "মেয়েটার বয়স আর কত, আট বৈ তো নয়, গড়নটা ওর মার মত বাড়ন্ত বলেই—ছেলেরই বরং বয়স গড়িয়ে গেছে!"

দুই মহিলার প্রবল কণ্ঠ-প্রত্যাপে সে কথা দাঁড়ায় না। ওঁরা বলেন, ওই মেয়ে আট ? কেউ তো আর ঘাসের বীচি খায় না! আশ্চর্যের কথা, এলোকেশীও নাভিনির জন্মকাল বিস্মৃত হন। আর নাভির বয়স তেইশ হল, সে কথা মানতে চান না!

কিছুক্ষণের পর নবকুমার টের পায়, মহিলাটি নবকুমারের 'সইমা'র কন্যা মুক্তকেশী। দিন কয়েকের জন্যে তিনি তাঁর সইমার কাছে এসে অবস্থান করছেন।

বেচারী সুবর্ণ ভেবেছিল, এসেই পেয়ারা গাছে উঠবে, পুকুরে ছুটবে, পাড়া বেড়াবে, ফুল তুলবে, সে জায়গায় কিনা এইসব আলোচনা!

থতমত খেয়ে দাঁড়িয়ে থাকে বেচারী।

এলোকেশী অবশেষে রায় দেন, "ছেলের বে দিচ্ছে দাও, তোড়জোড় করে মেয়ের পাস্তুর খোঁজো, যাতে এক যজ্ঞিতে কাজ হয়। পাঁচজনে না খিসি আইবুড়ো মেয়ে দেখে পাঁচকথা বলতে পারে।"

মুক্তকেশী মহোৎসাহে বলেন, "এ মেয়ের পাস্তরের অভাব হবে না সইমা, রূপের ডালি মেয়ে। আজ বললে কাল হবে। আমি দেখছি।"

কিন্তু ঠিক এইখানে হঠাৎ এক বজ্রপাত হয়।

সুবর্ণ ঝট করে বলে ওঠে, "ইস্, এমুনি বিয়ে হলেই হল! মা তাহলে বাবাকে মেরে ফেলবে না ? আমি বলে এখন নতুন কেলাসে—"

কথা শেষ হল না।

তীব্র তীক্ষ্ণ একটা আর্তনাদ যেন ঝড়ের বেগ নিয়ে আছড়ে পড়ল সুবর্ণের ওপর।

"কী বললি ? কী বললি ? মা বাবাকে মেরে ফেলবে ? ওরে নবা, একথা শোনার আগে আমার কেন মরণ হল না রে ? ওরে ইকুলে পড়িয়ে এই বিদ্যে করছিস ভোর মেয়ের ? অ মুক্ত, এক ঘটি জল এনে আমার মাথায় খাবড়া। নইলে 'সম্মতেলো' ফেটে মরে যাব। কোন্ কামরূপ কামিখ্যের ডাইনির হাতে আমার একটা পাস্তুর সন্তানকে সঁপে দিয়ে বসে আছি, তুই দেখ মুক্ত!"

মার এই আক্ষেপোক্তিতে দিশেহারা নবকুমার হঠাৎ আর কিছু না পেয়ে মেয়েটার গালে ঠাস করে চড় বসিয়ে দেয়।

॥ সাতচল্লিশ ॥

ছেলের বিয়ের জন্য মনটা প্রস্তুত ছিল না, কিন্তু প্রস্তুত করে ফেলার পর হঠাৎ অনুভব করল সত্য, খুব খুশি-খুশি লাগছে।

ছেলের ওই পুলক গোপন করা লাজুক মুখটা ভারী কৌতুকজনক, মাঝে মাঝে বিয়ে সংক্রান্ত এক-একটা কথা ফেলে সেই পুলকটা দেখে নিচ্ছে আর মনে মনে মুখ টিপে হাসছে সত্য।

সত্যর মনের উপরে যে অনেকগুলো বয়সের ভার জমে উঠেছিল, তার থেকে কি কতকগুলো বছর ঝরে পড়ে গেল! তার ইদানীংয়ের স্তিমিত আর তিক্তস্বাদ দিনগুলো যেন চাপা পড়ে যাচ্ছে। মধুর এক কৌতুকরসে চঞ্চল হয়ে উঠছে দিনের চেহারা রাতের চিন্তা।

বিয়ের গোছের সঙ্গে সঙ্গে এ কথাও ভাবতে শুরু করেছে সত্য, সম্পর্কে এমন কাউকে দেখতে পাচ্ছি না যে ওদের ফুলশয্যের ঘরে আড়ি পাতবে। সত্যর সঙ্গে সম্পর্কটা যে বড়ই সাংঘাতিক, একেবারে "মা" বলে কথা। তবু ভাবতে থাকে সত্য, তাদের বাকুইপুরের বাড়ির যে ঘরটায় বরকবের ফুলশয্যে হবে, সেই ঘরের জানলা-দরজায় কোথাও একটা ছাঁদা করে রাখতে হবে। কেউ কি আর সেটা কাজে লাগাতে পারবে না ? সত্যর বাপের বাড়ির অনেকেই তো আসবে। এই চিন্তাটাতেই মনটা যেন উৎসাহে উদ্বেল হয়ে উঠেছে। প্রথম সন্তান যদি মেয়ে হত, হয়েও তো ছিল, থাকল না তাই, যদি থাকতো কোন্ কালে তার বিয়ে-খাওয়া হয়ে যেত, শাওড়ী হয়ে যেত সত্য।



কিন্তু সে ঘটনাটা ঘটে উঠতে পায় নি। এতখানি বয়সে সত্যর এই প্রথম কাজ। আর সে কাজ কন্যাদায় উদ্ধার নয়, ছেলের বিয়ে। ছেলের মামার বাড়ি থেকে সবাইকে না এনে ছাড়বে নাকি সত্য? কারুর কোনো গুজর-আপত্তি শুনবে না।

নবকুমার যে আবার ঠিক এই সময়ে চলে গেল, তা নইলে এখনই তাকে দিয়ে নেমন্তন্ন পত্র লিখিয়ে ফেলতো সত্য। দিন স্থির করে পাকাপাকি নেমন্তন্ন করবার আগে একখানা জানান, চিঠি দিতে হবে বৈকি। জানানো কোথায় বিয়ে হচ্ছে, কী বস্ত্র, তাছাড়া তাদের একটু প্রস্তুত করেও রাখা। ছেলের বিয়ে বলে ব্যাপার, অন্তত পাঁচ-সাতদিন তা থাকতেই হবে সবাইকে।

সারদাকে তো অবিশ্যি আসতে হবে, বড়দার দ্বিতীয় পক্ষকেও আসতে না বললে ভাল দেখাবে না। রাসুর আরো সব ভাইদেরও বিয়ে হয়েছে, তাদেরও বলা দরকার। নতুন ঠাকুমা এখনো রয়েছে সিংথেয় সিঁদুর নিয়ে “ভাগ্যবানি এয়ারাণী”! কিছু না পারুন, বসে বসে এয়েলক্ষণগুলো করতে পারবেন তিনি।

মায়ের জন্যে একটা নিঃশ্বাস পড়ল সত্যর। ওঁদের থেকে কত ছোট ছিলেন মা, অথচ কতকাল হল হারিয়ে গেছেন! আজ যদি মা থাকতেন?

একটুকু চুপ করে বসে থেকে আবার মনে মনে তালিকা গড়তে লাগল সত্য। ছেলেপুলের সংখ্যা যে এখন তার বাপের বাড়িতে কটি, কার কতগুলি, সে সব সঠিক জানে না ভেবে মনে মনে লজ্জিত হল, ভাবলো এমন কৌশল করে লিখতে হবে যাতে কেউ না সত্যর সে অজ্ঞতাটি টের পায়।

তুড়ুর সঙ্গে ঠাট্টা-তামাশার সম্পর্কের আছে অবিশ্যি একজন। সে-জন হচ্ছে বড়দার বড় ছেলের বন্ধুর বৌ। যার বিয়ের সময় সত্যকে নিয়ে যাবার জন্যে অনেক বলাকওয়া করেছিল রাসু।

কিন্তু সত্যর তখন অবস্থা শোচনীয়।

সুবর্ণ জন্মাবার পরের অবস্থা সেটা। প্রায় শয্যাগত সত্য, বিয়েবাড়ি যাবার সাহস সঞ্চয় করে উঠতে পারে নি। তাছাড়া মনেও সে উৎসাহ ছিল না। বড়লোকবৌ অবিশ্যি সত্যর সে ক্রটি ধরবে না। সত্যকে সত্যিকার ভালবাসে ওরা।

একথা সেকথা ভাবতে ভাবতে হঠাৎ একটা অপ্রাসঙ্গিক কথা মনে পড়ে যাওয়ায় একা-একাই হেসে উঠল সত্য। মনে পড়ে গেল, সেই সারদার মূর্থে শেকল তুলে দিয়ে জন্ম করার কথা।

সত্যি, কী হাঁদাই ছিল সত্য তখন!

পরে একদিন সে কথা তুলে হাসি-ঠাট্টা করেছিল সারদা। যেবার সত্য প্রথম সন্তান হতে বাপের বাড়ি গিয়ে অনেকদিন ছিল। তখন আর সারদা বয়সের পার্থক্য ধরত না, ননদ-ভাজ সম্পর্কটা দেখত। সারদার কাছে অনেক ধরনের সাংসারিক গল্প শুনছে তখন সত্য, মাঝে মাঝে তর্ক তুলেছে, মাঝে মাঝে প্রতিবাদ। সারদা বলেছে, “আচ্ছা বাবা, দেখবো পরে! তোমার এই একবর্ণা বুনোমি কেমন বজায় রাখতে পারো! সংসার এমন জাঁতা না, মুগ মুসুর অড়র ছোলা সব এক করে পিষে ছাড়ে!”

সত্যকে কি পেছাই করতে পেরেছে সংসার?

মাঝে মাঝে নিজেই ভাবে সত্য।

কিন্তু এখন মনটা উদ্বল। এখন ওসব ভাবনা দাঁড়াচ্ছে না। এখন সত্য ভাবে, তখন নিত্যানন্দপুরের সংসারটা কী ভালোই ছিল। সে বাড়িতে এখন বাবা নেই।

না জানি কেমন সেই চেহারাটা সংসারের!

নেড়ুর কথা ভেবেও দুঃখ হয়, আবার কোথায় যে আছে সে এখন! সেই একবার কদিনের জন্যে এসে থেকে মায়া বাড়িয়ে দিয়ে পালিয়ে গেল। আর পাত্তা নেই। কে বলবে সেই পড়া ফাঁকি দেওয়া নিরীহ-নিরীহ ছেলেটার মধ্যে এমন একটা ঘরছাড়া খামখেয়ালি মন ছিল লুকানো!

নিত্যানন্দপুরের খবর পায় সত্য মাঝে মাঝে বড়দাকে চিঠি লিখে। খুবই দূরে দূরে অবশ্য। বড়দা যখন মনটা কেমন করে তখন। রাসুর উত্তরগুলো অবশ্য সংক্ষিপ্ত, তবু খবরগুলো দেয়।

রামকালী তো চিঠি দিলে উত্তরই দেন না।

একবার শুধু লিখেছেন, “পত্র না পেলে দুঃখিত হয়ো না।” কিন্তু কেন সেই না পাওয়ার অবস্থা ঘটবে তা লেখেন নি।

সত্য বোঝে ইচ্ছে করেই আর লিখবেন না চিঠি।

মায়াযুক্ত করছেন নিজেকে।

তবু ছেলের বিয়ে উপলক্ষে বাবাকে একবার পায়ের ধুলা দিতে আসতে বলবেই সত্য। বলবে, বাবা, আপনার আশীর্বাদ না পেলে ওদের বিয়েটাই তো বৃথা!

ছেলের বিয়ে উপলক্ষ করে চিত্তসমুদ্রের অনেক নিচের ঢেউ উপরে উঠে আসছে সত্যর, অনেক ধুলোর স্তরে চাপা পড়ে যাওয়া অনুভূতি তীব্র হয়ে সাড়া তুলছে।

একদা যে পুণ্ড্র সত্যর প্রাণের বন্ধু ছিল, সেই পরম মূল্যবান কথাটাও যেন ডুলতে বাসেছিল সত্য। কত কাল কত যুগ যে দেখা হয় নি! অথচ বেশী দূরে থাকে না পুণ্ড্র, শ্রীরামপুরে তার শ্বশুরবাড়ি। নৌকায় চেপে বসতেই যা দেরি, একদণ্ডেই পৌঁছে যাওয়া যায়। সত্যও কখনো ভাবে নি যাওয়া যায়, পুণ্ড্রও কখনো ভাবে নি আসা যায়।

তা সত্য অবিশ্যি না ভাবতে পারে, পুণ্ড্রের শ্বশুরবাড়িটা কুটুমবাড়ি, মেলাই লোক তাদের, বিনা উপলক্ষে যাওয়ার কথা ওঠে না। কিন্তু সত্যর এই বাসাবাড়িটায় তো সে বাধা নেই? পুণ্ড্র তো একবার কালীদর্শনের ছুতোয় আসতে পারতো?

আসল কথা, সংসার মানুষকে চেপে পিয়ে ফেলে, বিশেষ করে মেয়েমানুষকে।

তার ভিতরকার যা কিছু মাধুর্য, যা কিছু কোমলতা, যা কিছু হাঁচ, সব যেন ঘষে ক্ষইয়ে ভেঁতা করে শুকিয়ে চারটি ধুলাবালি করে ছেড়ে দেয়। নইলে পুণ্ড্রের বৈধব্য-সংবাদেও তো একবার গিয়ে দেখা করে উঠতে পারে নি সত্য!

পুণ্ড্রকে আনতেই হবে তুড়ুর বিয়েতে।

হঠাৎ মনটা ভারী চঞ্চল হয়ে ওঠে, একটা দোয়াত কলম আর একখানা কাগজ নিয়ে পুণ্ড্রকে চিঠি লিখতে বসে সত্য।

‘শ্রীচরণকমলেশু’ পাঠাই দেয়, যতই হোক পিসি। তুড়ুর বিয়ের সংবাদ জানিয়ে আবেদন জানায়, পিসি যেন ছেলে, ছেলের বৌ ও মেয়েদের নিয়ে নিশ্চয় করে আসার ব্যবস্থা করে, সম্মতিপত্র পেলেই আনতে লোক পাঠাবে সত্য।

লোক পাঠাতে হবে বৈকি।

নইলে অত দূর-কুটুম আসবে কেন? সমাজ-সামাজিকতার মধ্যে ‘বন্ধুত্ব’ কথাটার কোনো মূল্য নেই।

চিঠি লেখা হলেও এখন ডাকে দেওয়া চলেবে না। নবকুমার এখন অনুপস্থিত, তাকে না দেখিয়ে এত কর্তৃত্ব ফলানো ঠিক নয়। সংসারে যতই ডাকাতুকো হোক সত্য, এসব নিয়মগুলো মানে বৈকি। নিত্যেনন্দপুরেও নিজে সে বিশদ একখানি পত্রে সবাইকে আহ্বান জানালেও, মূল পত্রটা নবকুমারকে দিয়েই লেখাতে হবে, সেটাই ভাব্যতা।

বাড়িসুদ্ধ সকলকে ঢালা নেমন্তন্ন করলেও, কাকে কাকে বিশেষ জানাতে হবে তারও একটা তালিকা বানিয়ে ফেলে সত্য।

এসব কাজ যতটা লিখিত-পড়িতের মধ্যে হয় ততই ভাল, দৈবাৎ যদি কারো নামোল্লেখে ভুল হয়ে যায়, লজ্জার শেষ থাকবে না।

নবকুমারের দিকে আত্মীয়ের পাট নেই।

দূর সম্পর্কে কে নাকি এক পিসি আছে, আর জ্ঞতি মামাতো ভাইয়েরা আছে। আর তো কখনো কারো নাম শোনে নি সত্য। আর আছেন শাশুড়ীর এক সই, তাঁকেই দেখেছে দু-একবার। পুজোর তাঁর নামে শাড়ি যায়, পালা পার্বণে তত্ত্ব যেতে দেখেছে।

আর কই? এলোকেশীর সব কিছুই পড়শীদের নিয়ে।

তবে একটা বড়সড় ঘর এখন হয়েছে।

সে ঘর সদূর।

সদূর ‘সংসারটি’ বড় ছোট্ট নয়।

তা সে ভাবলে চলবে না। ছেলের বিয়ে-ব্যাপারটিও তো ছোট্ট নয়।

নিজের সেই বালা-কথা মনে পড়ে যায় সত্যর।

কত বড় বড় যজ্ঞি হত এক-একটা কাজে! ভাত পৈতে বিয়ে তো দূরের কথা, ঠাকুমার ‘অনন্তচতুর্দশী ব্রত’ উদ্‌যাপনেই যা ঘটাই হয়েছিল সেবার, উঃ!

ভাতমাছের যজ্ঞি নয়, সবই লুচিমিষ্টির ব্যাপার, তবু সে কী কাণ্ড ভিয়েন! ‘জুলি’ কেটে কেটে উন্ন বানিয়েছিল, হালুইকর ঠাকুরদের একটা ‘মেলা’ বসে গিয়েছিল। মাছের অভাব পূরণ করতে দই ক্ষীর ছানার পায়সের নদী সমুদ্র বইয়ে দিয়েছিলেন রামকালী, মিষ্টির পাহাড় বানিয়েছিলেন।

‘যজ্ঞি’ ভাবতে গেলেই সেই সব দৃশ্য চোখের উপর ভেসে ওঠে। ‘উৎসব’ মনে করতে গেলেই সেই সেকালটার ছবি ফুটে ওঠে।

তেমন ধরনের না করতে পারলে মন উঠবে না সত্যর।

একটু-আধটু কথা তুলতে গিয়েছিল সত্য, নবকুমার ভয়ে চোখ কপালে তুলেছে। বলেছে, “পয়সাকুড়ির জন্য বলছি না, ভগবানের ইচ্ছেয় পয়সাকুড়ির কথা ভাবি না, কিন্তু করবে কে ? লোকবল কোথা ? কথায় বলে—ধনবল জনবল আর মনোবল। তিনটেই দরকার। আছে তোমার তা?”

এ ধরনের কথা যে শুনতে হবে, সে আন্দাজ সত্যর ছিল, তাই তার প্রকৃতিও ছিল। অতএব সঙ্গে সঙ্গেই উত্তর দিয়েছিল সত্য, ‘ধনবলই জনবলকে ডেকে আনে, আর মনোবল ওই দুটোকেই চালায়, তা সে বস্তু তোমার না থাক আমার আছে।’

“তোমার তো সব কথাই লম্বাচওড়া, পেদ্রায় একটা যজ্ঞি ফেঁদে শেষ অবধি লোক হাসাবে আর কি!”

সত্য দৃঢ়কণ্ঠে বলেছিল, “লোকই বা হাসাবো কেন ? বরাবর যেমন কাজকর্ম দেখে এসেছি, সেইভাবেই ভাবতে শিখেছি। লোক হাসবে এ কথা ভাববও না।”

সত্যিই সে কথা ভাবতেই পারে না সত্য।

যাতে না কোন বিশৃঙ্খলা ঘটে, সেই প্রতিজ্ঞাই গ্রহণ করেছে সে।

কাজটা কলকাতায় করতে পেলো অবিশ্যি সুবিধের অবধি থাকত না, কলকাতা শহরে কড়ি ফেললে অর্ধেক রাত্রে বাঘের দৃশ্য মেলে। কিন্তু সেই সুখসুবিধাময় মধুর কল্পনাটিকে সবলেই নির্বাসন দিয়েছে সত্য মন থেকে। প্রথম ছেলের বিয়ে, বাসাবাড়ি ঠিক হওয়ার কথা ভাবাও অসম্ভব। আর শুধু প্রথম ছেলেই বা কেন, ছেলে-মেয়ে কারো বিয়েই ভিটের বাইরে দেওয়া উচিত নয়। নান্দীমুখ শ্রদ্ধ হবে, সাতপুরুষ জলপিণ্ড পাবেন, সে কাজ কি যেখানে সেখানে করতে আছে ?

তাই দেশের বাড়িটার ওপরই সব ছবি আঁকছে সত্য, সব চিন্তা রাখছে। এ ব্যাপারে সত্যর বন্ধু, উপদেষ্টা, সাহায্যকারী সব হচ্ছে বটে ছেলে-বন্ধুর।

গ্রীষ্মের ছুটি চলছে, তাই সুবিধেও আছে। যখন তখনই সত্য ডাক পাড়ছে, “খোকা, দোয়াত কলমটা একবার পাড় তো বাবা, কটা কথা মনে এসেছে এই বেলা লিখে নে, নচেৎ ভুলে যাবো।”

সরল হাসে, “তুমি আবার ভুলে যাবে! জ্যেষ্ঠপুত্রের বিয়ে বিয়ে করে তো তোমার মাথার মধ্যে রাতদিন রেলগাড়ির ইঞ্জিন চলছে!”

সত্যও হেসে ওঠে, ‘তোমার বুকি হিংসে হচ্ছে ? তা তোমার বিয়ের সময়ও কম যাবো না, মাথায় জাহাজ চালাবো!’

“নমস্কার মা। দেখেই আমার বাসনা মিটে যাচ্ছে।”

হ্যাঁ, সরলের এই রকমই কথাবার্তা।

‘গুরুজন’ বলে শিহরিত-কলেবর কোনো সময়ই নয় সে। বাবার কথায় অনায়াসেই সে আড়ালে হেসে হেসে বলে, “বাড়ির কর্তার ‘রায়’ দেওয়া হয়ে গেল ?” বলে “যাক, কর্তার কর্তব্য সমাপন করা হয়ে গেছে—”

সত্য হাসি চেপে বলে, “এই পাজী ছেলে! কী কথার ছিঁরি! গুরুজন না ?”

সরল সভয়ের ডান করে বলে “কী সর্বনাশ! তাতে কোনো সন্দেহ দেখিয়েছি আমি ? তবে হ্যাঁ, হাসির ব্যাপারে না হেসে থাকতে পারি না আমি।’

সরলের যত কথা মায়ের সঙ্গে।

রান্নাঘরে জলটোকিতে বসে হাঁড়ি কড়া বোগুনো যা পায় একখানা নিয়ে ‘তবলা’ ঠোকে আর গল্প করে, “বুঝলে মা, আজ রাস্তায় এক তাজ্জব গাড়ি বেরিয়েছে। গাড়িও অনাসৃষ্টি, নামও অনাসৃষ্টি—‘ট্রাম গাড়ি’। ফোড়ায় টানছে। উঃ, সেই ট্রামগাড়ি দেখবার জন্যে কী ভিড়টাই হয়েছে! রাস্তার দু ধারে কাভারে কাভারে লোক দাঁড়িয়ে পড়েছে—”

বলে, “বুঝলে মা, আজ হেদোর ধারে একটা বন্ধুর সঙ্গে কথা কইতে কইতে হয়ে গেল এক চোট! সে বলে কিনা, ‘বাজালি জাতটার কিছু হবে না! ভগ আর ছজুগে জাত একটা!’ .. চড়ে গেল রাগ। খুব শুনিয়ে দিলাম।” ...

সত্য আর্থহভরা মখে বলে, “কী শোনালি ?”

এবার সরল লজ্জিত হয়, হেসে ফেলে বলে, “কী আর! বললাম, জাতের কলঙ্ক ঘোচাবার চিন্তা নেই, হেসে হেসে নিন্দে করতে লজ্জা করে না? গলায় দড়ি দাওগে। নচেৎ এই হেদোর জলে বাঁপ দাও গিয়ে।”

সন্ধ্যাবেলা রান্নার সময়টা হচ্ছে সত্যর আনন্দের সময়, এই সময়ই সরল এসে বসে।

সাধন বরাবরই অন্য ধরনের। চূপচাপ মুখবোজা লাজুক। তা ছাড়া একটু বিজ্ঞ-বিজ্ঞ। রান্নাঘরে এসে বসার কথা সে ভাবতেই পারে না। এক গ্লাস জল গড়িয়ে খাবার ক্ষমতাও তার নেই। যা কিছু কাজ সরল করে। সরল সত্যর ডান হাত।

এখনও ভূমিকালিপি পূর্ববৎ, শুধু সংলাপের সুর অন্য।

সরল বলে, “বাবা তো শুনেছি, ভেলভেটের চোগা-চাপকান-টুপি পরে বিয়ে করতে গিয়েছিলেন, দাদা কি পরে যাবে মা?”

সত্য তাড়া দেয়, “বটে রে ফাজিল কেঁট ছেলে, ভেলভেটের চোগা-চাপকান পরা সেই মূর্তি তুই দেখেছিস বুঝি?”

সরল বলে, “আহা, পূর্বাংহেই তো বলছি, “শুনেছি!”

“কায় কাছে শুনলি শুনি?”

“কেন, পিসির কাছে। পিসির কাছে তোমার ছোটবেলার কথা, বাবার ছোটবেলার কথা সব শুনেছি।”

“হঁ, পিসি তা হলে তোকে বাপের বিয়ে দেখাচ্ছে!” সত্য হাসে। তারপর বলে, “তুডু কি পরে বিয়ে করতে গেলে মানায় তুই-ই বল!”

“আমি কি বলবো? আর বললেই বা শুনেছে কে? চোগা না চাপাও, সেই বেগুনরঙা চেলির জোড় তো চাপাবেই তার ঘাড়ের! তবে? বিয়ে করা মানেই সং সাজা। বাস্বা!”

“আজ্ঞা তোকে আর বিয়ের মানে ব্যাখ্যা করতে হবে না”, সত্য তাড়া দেয়, “মিষ্টির ফর্দটা বরং শোনা আর একবার, দেখি শুনতে কেমন লাগছে! ছাঁদার মিষ্টি-আলাদা ধরেছিস তো?”

কলকাতা থেকে কারিগর যাবে, মিষ্টি তারাই করবে। আজ সরলকে পাঠিয়েছিল সত্য তাদের কাছে পাকা কথা কইতে। সরল সব সন্ধান রাখে।

সরল বাড়ি নেই, সাধন তো থেকেও নেই।

নবকুমার আর সুবর্ণ আজ কদিনই বাড়ি ছাড়া, দুপুরবেলা হঠাৎ মনটা বড় খালি-খালি লাগলো। নেহাৎ নাকি ফর্দ লেখার উন্মাদনার স্রষ্টা রয়েছে ক’দিন সত্য, তাই সুবর্ণর অনুপস্থিতিটাও সয়ে গেছে। নইলে সেই কথার রাজা মেয়েটা কাছে না থাকা সত্যর পক্ষে কম শূন্যতার নয়।

দশ দিন বলে গিয়ে বারো-তেরো দিন করছে নবকুমার। এদিকে বিয়ের দিন এগিয়ে আসছে। সব সময় মানুষটা দায়িত্বজ্ঞানহীন।

খুচরো কাজ আপাতত হাতে কিছু নেই। বিয়ের ভোজের সুপরি কাটবার ভার নিয়েছে নিতাইয়ের বৌ, সদু বলেছে বড়ির ভার তার। এক মণ ডালের বড়ি সে দিচ্ছে রোজ কিছু কিছু করে। সলতে পাকাবে সদুর সতীন।

উৎসাহ সকলেরই।

তা ছাড়া বিয়ের কাজে সবাইয়ের সাহায্য নেওয়াই সামাজিকতা, না নেওয়াই নিন্দে। কনের বাড়ি খুব দূরে নয়। তাদের কাছ থেকেও নানা ব্যাপারে লোক আনাগোনা করছে, নমস্কারী শাড়ি কথানা দিতে হবে, ননদঝাঁপি কটা, এয়োডালায় কি কি দিতে হয় আপনাদের, এই সব নানা কথা।

নবকুমার কিনা এই সময় দেশে গিয়ে বসে রইল!

অভাববোধ এবং অভিমানবোধটা হঠাৎ চাড়া দিয়ে উঠে মনটা কেমন খাঁ খাঁ করে তুলেছে আজ। হঠাৎ খেয়াল হল—“ছেলের ঘরটা” সাজিয়ে ফেলি।

বারুইপুর থেকে ফিরে তো এই বাসা-বাড়িতেই বাস করতে হবে বৌ নিয়ে! বয়েসওলা মেয়ে, তাকে আর ‘ঘরবসতে’র অপেক্ষায় এক বছরের মত বাপের বাড়ি রাখতে ইচ্ছে নেই সত্যর। আজকাল কলকাতায় পাড়াপড়শীদের মধ্যে একটা ব্যবস্থার চল দেখেছে সত্য—“ধুলোপায়ে ঘরবসত”!

অষ্টমঙ্গলার মধ্যে একবার বাপের বাড়ি ঘুরিয়ে এনে ফের বরকনেকে গাঁটছড়া বাঁধিয়ে দাঁড় করিয়ে বরণ করে তোলা হয়, তার নাম “ধুলোপায়ে ঘরবসত”। তাতে নাকি আর বছরের মধ্যে বৌ আনতে দোষ নেই।

সত্য এ ব্যবস্থাটি নেবে।

ছেলের তার 'বৌ-বৌ' মন হয়েছে, এ বার্তাটুকু মনে মনে টের পেয়েছে সত্য।

বৌকে তাড়াতাড়িই আনতে হবে।

তা আজকে ঘরটাই বরং ঠিক করে ফেলা যাক।

দোতলায় দুখানা ঘর।

তার একটায় সাধন সরল দুই ভাই শোয়, আর একটায় সংসারের নানাবিধ জিনিস জমানো আছে। সত্য নীচের ঘরে শোয় একটা চৌকিতে সুবর্ণকে নিয়ে। আর একটা চৌকিতে নবকুমার।

যে বাসায় সুহাসকে নিয়ে থেকেছে, একতলা সেই বাসাটায় ঘর ছিল কম, জায়গা ছিল স্বল্প, নবকুমার বেচারী অনেক বঞ্চিত হয়েছে। এখনকার এ ব্যবস্থা সত্যরই। মানুষটার বয়েস হচ্ছে, রাতে একা পড়ে থাকবে? এক ঘটি জলও তো হাতে এগিয়ে দেবার কেউ থাকবে না একা থাকলে! ছেলেদের বারো মাস রাত জেগে লেখাপড়া, সে ঘরে নবকুমারের অসুবিধে। অতএব এই ব্যবস্থা। এখন আর এ ব্যবস্থা চলবে না।

এখন দোতলায় ওই জিনিসের ঘরটা খালি করে সুবর্ণকে নিয়ে সত্যকে আড্ডা গাড়তে হবে, সকলকে চালান করতে হবে নীচে নবকুমারের ঘরে। এ ছাড়া উপায় নেই। ছেলের বৌয়ের সামনে স্বামীর সঙ্গে 'এক ঘরে' শোওয়াটা ভব্যতার আইনে বাধে। অন্তত সত্যর কাছে।

ছেলেদের ঘরটা সত্যর ভাল করেই সাজানো।

দেয়ালে দেয়ালে দেব-দেবীদের এবং মহাপুরুষদের ছবি, দেয়াল-আলমারিতে সারি সারি বই, এক কোণে পড়ার টেবিল, তার সামনে দুটি টুল, টেবিলে লেখাপড়ার সরঞ্জাম। বড় চওড়া চৌকিতে দুই ভায়ের বিছানা।

এ-ঘরের পরিবর্তন সাধন করতে করতে মনে মনে একটু হাসে সত্য, ব্রহ্মচারী এবার সংসারী হবেন! পাশে ভাইয়ের বদলে বৌ!...

ভাবতে ভাবতে হঠাৎ একটা রোমাঞ্চ জাগে সত্যর। নেহাৎ ছেলেমানুষের মত ভাবতে বসে, ওই লাজুক ছেলে না জানি কেমন করে বৌয়ের সঙ্গে ভাব করবে, কেমন করে বৌকে আদর করবে!

তারপর ভাবে, এই যে একটু বয়েস হয়ে বিয়ে হুঙ্কার, এ কত সুন্দর! কী অদ্ভুত "কাল" ছিল সত্যদের! কনের বরের নামে গায়ে জ্বর, বরের স্ত্রীর নামে কালঘাম। সত্য যখন ঘরবসতে এসেছে, তখন অবিশিা "ঘর-বর" পায় নি, কিন্তু যখন পেয়েছে, তখন মানসিক অবস্থা ওর থেকে উন্নত নয়। আর বিয়ে?

মানে জেনেছে তখন তার? ছি! সে বিয়ে যেন ছেলেমেয়েগুলোকে নিয়ে বড়দের পুতুল খেলার সাধ মেটানো!

মস্ত মস্ত এক লোভ দেখিয়ে রাখা হয়েছে, "গৌরীদান" "কন্যাদান" "পৃথিবীদান"! আর কিছুই নয়, মেয়েগুলোর চোখ-মুখ ফোটার আগাই হাড়িকাঠে গলা দিয়ে রেখে দেওয়া!

সত্যর মতন এত দজ্জাল আর কটা মেয়ে হয়?

ভয়ে জড়সড়, সর্বদা অপরাধিনী, এই তো অবস্থা সবাইয়ের!

আবার একটু হাসি ফুটে ওঠে সত্যর মুখে। নবকুমারের মত এমন তদগতপ্রাণ বঁর না হলে অশিশি; সত্য কি হঠাৎ তা জানে? মনের অগোচর কিছু নেই, স্বামী স্বপ্নকে ভিতরে ভিতরে অনেক অবজ্ঞা আছে সত্যর, তবু হঠাৎ আজ এই গ্রীষ্মের দীর্ঘ দুপুরে ঝাঁ ঝাঁ করা মনে সেই অবজ্ঞার মানুষটার জন্যেই হঠাৎ আজ এই গ্রীষ্মের দীর্ঘ দুপুরে ঝাঁ ঝাঁ করা মনে সেই অবজ্ঞাত মানুষটার জন্যে হঠাৎ বড় বেশী মন-কেমন করে উঠল তার। নবকুমার বেচারাই কি সুখী হতে পেল? নিজেকে একটু অপরাধিনীই মনে হতে থাকলো।

সত্য যদি নেহাৎ সাধারণ একটা "সংসারসর্বস্ব" মেয়ে হত! বেচারী নবকুমারের জীবনটা অনেক বেশী সুখের হত তাতে আর সন্দেহ নেই।

এই তো আজই তো সত্য সেই বেচারার শেষ সুখটুকুও কাড়তে বসেছে। কিছু নয়, তবু এক ঘরেও তো থাকতো, দুটো গল্পগাছার সময়ই তো রান্তির। সত্যর মনমেজাজ ভাল থাকলেই তো নবকুমারের "আপিসের গল্প আর আপিসের বন্ধুদের গল্প" চেগে ওঠে। সে সুখটুকু থেকে বঞ্চিত হবে এবার।

ছেলের বৌয়ের সামনে এক ঘরে বাসের নীতি যে দুর্নীতি এ কথা নবকুমারকে বোঝানো শক্ত। এলোকেশী তো স্বামীর মৃত্যুকাল পর্যন্ত ঘর আঁকড়ে থেকেছেন। সোনাটা চিরদিনই হাতছাড়া বলেই হয়তো আঁচলে গেরো দেওয়ার তত ঘটা ছিল।

অবিশ্যি দৃষ্টান্ত আরো অনেক আছে।

একা এলোকেশীকেই দোষ দিলে উচিত হবে কেন ?

কাকার থেকে ভাইপো বড়, এ তো হামেশাই দেখা যায়। গিন্গীর কনিষ্ঠ পুত্রটি পৌত্রদের কাঁথা কাজললতার প্রসাদে মানুষ হয়।...

হয় সত্য জানে।

কিন্তু সত্যর ভাতে বড় বিতৃষ্ণা।

তবু সত্য আজ নিজের বিছানাটা দোতলায় আনার কথা ভাবতে নবকুমারের জন্যে মন কেমন করে উঠছে।ছেলেপুলে কাছে কাছে থাকাই ভালো। তাতে মনে এসব পাগলামি চাগে না। সুবর্ণটা নেই বলেই বোধ করি এমন 'হু হু' করে ভাব আসছে।

যে জন্যেই যা হোক বাস্তবতোরঙ্গ টানটানি আর ভাল লাগল না। হাতের কাজ অসমাপ্ত রেখে জানলার ধারে এসে দাঁড়ালো সত্য।

ঝাঁ-ঝাঁ করা রোদে আকাশটা যেন ফাটছে, রাস্তার ধারের গাছটা, রাস্তার ওপারের বাড়িগুলো সেই দাহে যেন পুড়ে থাক হচ্ছে।... পাশের রাস্তাটা দিয়ে বোধ করি কোন বাসনওলা যাচ্ছে, চং চং কাঁসর পিটিয়ে, শব্দটা ক্ষীণ থেকে প্রখর এবং প্রখর থেকে ক্ষীণ হয়ে গেল।

দূরে কোথায় একটা গরুর গাড়ি চলেছে, তার চাকার কাঁচ শব্দের সঙ্গে গরুর গলার ঘণ্টিটা বেজে চলেছে একতালে।...

আরো দূরে কোথায় ঘুঘুর ডাক শুক্ক প্রকৃতির গায়ে করুণ আর্তনাদের ছুরি বিধোচ্ছে।

ঘুঘুর ডাক কি কখনো শোনে নি সত্য ?

জীবনভোরই তো শুনেছে।

তবে হঠাৎ কেন আজ ঘুঘুর ওই কান্নাটার মত কাঁদছে ইচ্ছে করছে সত্যর ? কেন মনে হচ্ছে তার কেউ কোথাও নেই, চিরদিন সে একা, চিরদিন নিঃশব্দ। তার উপর কারো মায়া নেই, মমতা নেই, ভালোবাসা নেই। সেই স্নেহ-ভালবাসাহীন কৃষ্ণ মরুভূমির পথ ধরে একা সে চলছে আর চলছে!...

রোদের আঁচ আর আঙুন ঝলসানো বাস্তবের হলুকা চোখেমুখে এসে লাগছে, তবু জানলার বাইরের ওই দৃশ্যটা যেন নেশার বস্তুর মত আটকে রেখেছে সত্যকে। সে নেশার সঙ্গে মিশে রয়েছে একটা বিধুর বিষণ্ণ বেদনা।

এ বেদনা কেন ?

এ শূন্যতা কিসের ?

বিছানায় পড়ে অকারণ কান্নার মত অদ্ভুত একটা কবিত্ব করতে বসবে কি সত্য ?

হয়তো তাই করতো, হয়তো করতো না, হঠাৎ চোখে পড়লো সদু আসছে রাস্তা দিয়ে ভিজে গামছা মাথায় চাপিয়ে, পায়ের তলা বাঁচাতে প্রায় লাফিয়ে লাফিয়ে।...

একটা অশুভ আশঙ্কায় বুক কেঁপে উঠল।

এ কী! হঠাৎ এমন সময়ে কেন ?

চমকে উঠে নেশা কাটলো।

জানলা থেকে সরে এসে দ্রুত পায়ে নেমে এল সত্য।

আর নীচে আসতেই সদু শুকনো গলায় বলে উঠল, "এই যে বৌ! ছেলেরা কেউ নেই ?"

সত্য মাথা নাড়লো, বসতে বলতে ভুলে গিয়ে।

সদু একটু ইতস্তত করে কাছের চৌকিটায় বসে পড়ে বলে ওঠে, "একটা খবর আছে বৌ, বলছি সব। আগে এক ঘটি জল দে দিকি।"

ঢক ঢক করে এক ঘটি জল শেষ করে, থেমে জিরিয়ে—অগোছালো এলোমেলো করে সদু যা বললো তার সারমর্ম এই, সত্যকে বারুইপুরে যেতে হবে।

বারুইপুরে যেতে হবে ?

সে তো জানেই সত্য, যাবেই তো! এই তো কদিন পরেই—

না না, সেই কদিন পরের কথা পরে হবে, এখন এই দণ্ডে যাওয়া দরকার। আজ হলেই ভালো হত, তবে নাকি গাড়ি-পালকির ব্যবস্থা করতে কিছু-কিঞ্চিৎ সময় তো লাগবে। অতএব কাল। আগামীকাল, একেবারে উষাকালে। মুখুজ্যে মশাই দিচ্ছেন সবই ব্যবস্থা করে, শুধু সত্যর বড়ছেলে একবার তাঁর সঙ্গে বেরোক।

খুব গুছিয়ে আর খুব হালকা করে বলতে চেষ্টা করে সদু, তবু কেমন যেন উল্টোপাল্টা লাগে কথাগুলো, আর সদুকে অদ্ভুত রকমের বোকা-বোকা দেখতে লাগে।

কী যেন রেখে-ঢেকে বলছে সদু, অথচ যেন উদ্ঘাটিত হয়ে পড়ছে সেই গোপন করার চেষ্টা।

সদুর মুখচোখের যে বিবর্ণতা সে শুধু এই রোদ্দুরে হেঁটে আসার বিবর্ণতা? সদুর গলার স্বরে যে উত্তেজনার কাঁপন, সে কি শুধু সত্যকে অভয় দেবার ব্যাকুলতায়?

হ্যাঁ, বার বার অভয় দিচ্ছে সদু সত্যকে, “ভয় করিস নে বৌ, ভয়ের কিছু নেই।”

কিন্তু এই অভয় দানের মধ্যেই ভয়ের বাসার সন্ধান পাচ্ছে সত্য। তাই সত্যর বুকের ভিতরটা হিম হয়ে গেছে, হাত-পা বারকড়ক কেঁপে কেঁপে হঠাৎ বুঝি কাঁপবার ক্ষমতাতুঁকুও হারিয়ে অবশ হয়ে আসছে।

একবারও প্রশ্ন করে নি সত্য, শুধু বিহ্বল চোখে তাকিয়ে আছে সদুর মুখের দিকে। সদু কি তরে আর রেখে-ঢেকে বলবে না? সহসা খুলে বলবে সব?

না, সে সাহস নেই সদুর।

সদু তাই শুধু ফাঁকা-ফাঁকা সাহসের কথাই বলছে, “ভাবনা করিস নে বৌ, মন উচাটন করিস নে, গিয়ে সব ভালই দেখবি। আমিও তো যাচ্ছি তোর সঙ্গে।”

সদুও যাচ্ছে সত্যর সঙ্গে!

আর তবে সন্দেহের কী আছে?

সর্বনাশের কালো ছায়াটা চোখের সামনেই দেখতে পাচ্ছে সত্য।

এতক্ষণে সত্যর কণ্ঠ থেকে স্থলিত হয়ে পড়ে একটা শব্দ।

“ঠাকুরবি!”

এ স্বর সত্যর?

এ হালছাড়া স্বর?

এবার কি তবে সে তার হাতের হালখানা নামিয়ে রাখছে? যে হালখানাকে শক্ত মুঠোয় বাগিয়ে ধরে অনেক সমুদ্র চলে এই এতখানি এল সত্য?

কিন্তুতেই হার মানবে না পণ করে এতদিন চলে এসে এইবার ভাগ্যের হাতে হার মানবে?

সত্য কি ভিতরে ভিতরে এত ক্লান্ত হয়ে উঠেছিল?

সদু বলে, “এই দেখ কাণ্ড! তুই যে একেবারে বসে পড়লি বৌ! তুই তো কখনও এমন নয়? কোনো কিছুতেই তো হেলিস না, দুলিস না। আজ হঠাৎ এত ঘাবড়াচ্ছিস কেন?”

সত্য হঠাৎ সচকিত হয়ে ওঠে।

নিজের এ অধঃপতনে লজ্জিত হয়। কিন্তু তবু শিথিল স্বরটাকে সামলাতে পারে না। তেমনি শিথিল স্বরেই বলে, “কি জানি ঠাকুরবি, হঠাৎ মনটা কেমন ‘কু’ গাইছে, মনে হচ্ছে সব যেন ফুরিয়ে যেতে বসলো!”

“দুর্গা দুর্গা, ষাট ষাট।”

সদু ব্যস্ত হয়ে ষাট বানায়, “আমি তোকে বলছি বৌ, ভাল ভিনু মন্দ কিছু ঘটে নি। তবে অকস্মাৎ তলবটা কেন এল ভাল বুঝতে পারছি না!”

হ্যাঁ, তলব এসেছে। বারুইপুর থেকে নাকি লোক এসেছে। এসেছে সদুর কাছে। শুধু এদের সবাইকে তাড়াতাড়ি নিয়ে যেতে বলেছে সদুকে। আজ বেরোতে পারলে আজ, না পারলে কাল যত ভোর সন্ধর!

সত্য একটা নিঃশ্বাস ফেলে বলে, “পষ্ট কথা আমার মনই বলছে ঠাকুরবি, মনে হচ্ছে যেন বিসর্জনের বাজনা শুনতে পাচ্ছি। সেবার ওর অত বড় অসুখেও এমন হয়নি আমার।”

হ্যাঁ, মনের মধ্যে নবকুমারের কথাই তোলপাড় করে উঠছে সত্যর।

হয়তো ক্ষণপূর্বকালের সেই মন-কেমনটার সঙ্গে এক আকস্মিক সংবাদের একটা যোগসূত্র ধরা পড়েছে সত্যর মনের মধ্যে।

ধরা পড়েছে বুঝি নিজের মনের দুর্বলতাও।

নইলে নবকুমারের জন্যে যাবার সাহেব ডাক্তার ডেকে দেখিয়েছিল সত্য, সেদিনের কথাই বা হঠাৎ মনে পড়বে কেন? সেদিন যে ‘নিকিন্ত সর্বনাশ’ জেনেও লড়বার শক্তি সংগ্রহ করেছিল সত্য, সে কথাটা ভেবে আশ্চর্য লাগছে এখন তার।

যাক, বিসর্জনের বাজনা তবে সত্যিই বাজলো এবার। সত্যের তেজ আসপর্দা দাপট সব কিছুই যে সেই মেরুদণ্ডহীন মানুষটাকে মেরুদণ্ড করে, এ কথা কি এখন টের পেল সত্য? যখন মানুষটা—

“ঠাকুরবি, চলে যাচ্ছ তুমি?”

সত্য ব্যাকুলভাবে সদুর হাত ধরে।

সদু বিচলিত হয়।

সদু এই ভয়ানক একটা অমঙ্গল আশঙ্কায় কষ্টকিত মানুষটাকে কি ওই ভয়ঙ্কর মানসিক অবস্থা থেকে উদ্ধার করবে? বলবে—

না, বেশী কিছু বলে না সদু। শুধু সত্যের হাত থেকে হাতটা ছাড়িয়ে নিয়ে ব্যস্তভাবে বলে, “কেন অমন উতলা হচ্ছিল বৌ, আমি বলছি নবু ভাল আছে, মঙ্গলে আছে—” বলতে বলতেই দাওয়া ছেড়ে উঠোনে নামে সদু। বলে, “যাই, আমারও তো যাত্রার গোছগাছ আছে একটু—তুইও যেমন পারিস গুছিয়ে নে। তুড়ু ফিরলেই আমার ওখানে পাঠিয়ে দিস।”

সদু যেন একপ্রকার পালিয়েই যায়।

আর সত্য সদুর সেই যাওয়ার পথের দিকে নিখর হয়ে তাকিয়ে থাকে। অনেকক্ষণ তাকিয়ে থাকে।

এবার নবকুমারকে ছেড়ে আর এক আশঙ্কা বুকটাকে করাট দিয়ে কাটছে। সদুর শেষ কথাটা কানে বাজছে... “নবু ভাল আছে। মঙ্গলে আছে...”

তবে?

কে তবে মঙ্গলে নেই?

‘সুবর্ণ’ নামটা মনে আনতেও মন শিউরে উঠছে। তবু মনের চিন্তা কে ঠেকাতে পারে?... শতবার সরিয়ে রাখতে চেষ্টা করলেও যে সেই ঠেলে রাখা দৃষ্টান্তকে সহস্রবার ডেকে আনে মন।

এবার বোঝা গেছে।

সুবর্ণের ভয়ানক একটা কিছু হয়েছে, খুলে বলল না সদু!

কী সেই ভয়ানক?

খুব মারাত্মক কোনো অসুখ?

নাকি একেবারেই চরম দণ্ড দিয়ে দিয়েছেন ভগবান?

সুবর্ণ—সুবর্ণ নামটা সত্যের জীবন থেকে মুছে যাবে?

বিসর্জনের বাজনাটা সত্যিই বুঝি বাজতে থাকে সত্যের প্রতিটি রক্তকণিকায়।

তবু কিছু গোছ করতেই হয়।

ছেলেরা এলে বলতেও হয় সদুর বার্তা।

এবং তারা যখন পিসিমার বাড়ি ঘুরে এস জানায় গাড়ির ব্যবস্থা হয়ে গেছে, ঘোড়ার গাড়ি এবং গোরুর গাড়ির সাহায্যে ঘণ্টা কতকের মধ্যেই পৌঁছে যাওয়া যাবে, তখন তাদের মুখের দিকে তাকতে সাহস করে না সত্য।

কিন্তু শুধুই কি সত্য?

হঠাৎ উতলা হয়ে যাওয়া, হাল ছেড়ে দেওয়া সত্য?

সত্যের ছেলেরাই কি মুখ দেখাতে সাহস করছে মাকে? তাদের সেই ভয়-খাওয়া কালিমাড়া শুকনো মুখ?

বাড়ি চাবি দিয়ে যেতেই হবে। ঘরে ঘরে চাবিগুলো লাগাতে থাকে সত্য, আর ওর মনে হতে থাকে, তার জীবনের সমস্ত দরজাগুলোও বুঝি বন্ধ করে ফেলছে সে।

এই বন্ধ দরজাগুলো খুলে খুলে আর যেন সংসার করবে না সত্য।

সত্যের বড়ছেলের বিয়ে না ক’দিন পরে?

সে বিয়ে কি সত্য দেখবে?

হবে কি সে বিয়ে?

সব যেন ঝাপসা হয়ে যাচ্ছে.. অলীক মনে হচ্ছে।

গতকালই যে সকালে নিতাইয়ের বৌয়ের কাছ থেকে আসা কাটা সুপুরির গাদা বেতের ঝাঁপিতে ঢালতে ঢালতে আল্লাহে উৎফুল্ল হয়েছে সত্য, সুপুরিগুলো দিব্যি সন্ন সন্ন কুচনো হয়েছে বলে, সে কথা কি কিছুতেই এখন বিশ্বাস করতে পারা যাবে?

অকারণে কী এমন হয়?

হয় না।

মন আগে থেকে টের পায়।

আর যদি অকারণেই হবে, ওরা এমন স্তব্ধ কেন? গাড়িতে যারা চলেছে সঙ্গে?

সাধন, সরল, সদু?

অন্য যে কোনো দিন হলে নিশ্চয় সত্য ওদের ওই স্তব্ধতা ভাঙিয়ে ছাড়তো। দৃঢ় গলায় বলতো, “অত লুকোছাপা করে লাভ নেই, যা হয়েছে তা তো জানতেই পাচ্ছি, বেঁধে মেয়ে দরকার কি? যা হয়েছে শুনবো, শুনতে প্রস্তুত হচ্ছি—”

কিন্তু আজ পারছে না।

কাল দুপুর থেকে সত্যর মনটা অকারণেই হঠাৎ বিকল হয়ে গেছে।

নির্দিষ্ট জায়গায় ঘোড়ার গাড়ি ছেড়ে গরুর গাড়িতে উঠতে হল। আর উঠে বসার পর সদু একবারে স্তব্ধতা ভাঙলো। সত্যকে উদ্দেশ্য করে নয়, ছেলদের উদ্দেশ্য করে বলে উঠলো, “তোদের পিসেমশাইয়ের আসার ইচ্ছে ছিল, শুধু এই গো-গাড়ির ডয়ে পিছিয়ে গেলেন। বয়েস হয়েছে তো! আর চিরটাকাল কলকাতায়—”

শেষের কথাগুলো শুনতে পায় না সত্য।

শুধু কানে বেজে উঠেছে ‘ইচ্ছে ছিল’!

ইচ্ছে ছিল মানে কি? কর্তব্য ছিল নয়, ইচ্ছে!

কোন দৃশ্যের মুখোমুখি হবার ইচ্ছে হচ্ছিল আয়েসী আত্মসুখী লোকটার?

নীরবতাই ভীতিকর।

কথাই সাহসের জন্মদাতা।

কথার পর তাই আবার কথা কইতে পারছে সদু, “তাছাড়া বললেন, কদিন পরেই যেকালে তুড়ুর বিয়েতে যাচ্ছি, তখন পালকিতে যাবো এ পথটা—”

তুড়ুর বিয়েতে যাচ্ছে!

কদিন পরে তুড়ুর বিয়েতে যাচ্ছি!

ওরা তা হলে সে আশা পোষণ করছে এখনও? তুড়ুর বিয়ে যথাদিনে হবে, লোকজন সবাই যাবে নেমন্ত্নে?

সত্য এবার যেন একটু লজ্জিত হয়।

সত্য একটু বেশী বিচলিত হয়ে পড়েছে। আর সেই বিচলিত ভাবটা ধরা পড়িয়ে ফেলেছে সবাইয়ের কাছে। ছি ছি, কী লজ্জা!

হয়তো সামান্য কিছু অসুখবিসুখ করেছে সুবর্ণর। যে লোকটা খবর দিতে এসেছিল সেই লোকটাই বোকা হাঁদা, কি বলতে কি বলেছে!

তাই সত্য এবার কথা বলে।

বলে, “তুমি চলে এলে, ঠাকুরজামাইয়ের একটু অসুবিধে হল—”

হঠাৎ সদুর মুখে একটা হাসির আলো খেলে যায়। ... হাসতেও পারছে তা হলে সদু?

তা পারছে।

মুচকি হেসে বলছে, “তা যা বলেছিস! এখন এমন হয়েছে, উঠতে বসতে এই সদু বামনী! তাই তো বলে এলাম, এই ক’বছরেই এত! চিরটাকাল তো আমি বিহনে কাটলো!” তা উত্তর হল, “আর সম্পর্কটা যে জন্ম-জন্মান্তর কালের। মাঝের ওই কটা দিনের ভুলত্রান্তির জন্যে কি আর সে বাঁধন টিলে হবে?”

সদুর ওই হাসি দেখে সত্যরও বৃষ্টি বৃকের বল বাড়ে। তাই সত্যও প্রায় হাসির মত করে বলে, “সম্পর্ক যদি জন্ম-জন্মান্তরের, তা হলে তো স্বর্গে গিয়েও তোমার সতীন-জ্বালা ঠাকুরঝি...! তার সঙ্গেও তাহলে জন্ম-জন্মান্তরের বাঁধন! কে জানে সেখানে গিয়ে অন্য কোনো জন্মের স্বর্গলাভ হওয়া আরো চারটি সতীন এসে কাড়াকাড়ি লাগাবে কিনা!”

প্রায় হেসেই ফেলল সত্য।

জন্ম-জন্মান্তর শব্দটাকে কী এমন কৌতূকের খোরাক পেল সে?



হিহি হিহি হিহি হিহি!

অনেকগুলো মেয়ের গলার উল্লসিত হাসি একত্র হয়ে উছলে উঠলো গ্রীষ্মের দুপুরের দাবদাহকে পরাস্ত করে।

কনেকে পাঁজাকোলা করে ধরে তুলে বরের কোলে বসিয়ে দিতে গিয়েছিল ওরা, সেই ধাক্কায় বর ধরাশায়ী হয়েছে এবং বিদ্রোহিণী কনে ওদের হাত ছাড়িয়ে ঠিকরে উঠে পালাতে গিতে গাঁটছড়ার টানে হুমড়ি খেয়ে পড়েছে, তাই এই হাসি উল্লসিত লহরিত!

দুটো পতনই তো বাসরের বিছানার ওপর, লাগে নি তো দুজনের একজনেরও তবে আর হাসিতে বাধা কি? এমন একটা বিয়েটিয়ে ছাড়া তো গলা খুলে হাসবার ছাড়পত্র মেলে না! আজকের গলায় গলা মেলানোর দরুন সঠিক ধরাও পড়ে না গলাটা বৌয়ের না মেয়ের! অতএব এই তো সুযোগ। যারা শুধু শাসনের ভয়ে লজ্জাশীলতার ভূমিকা অভিনয় করে চলে, তারা এমন সুযোগটা ভাল মতেই নেয়।

আজও নিচ্ছিল।

চুটিয়েই নিচ্ছিল।

সুবিধে যখন পেয়েছে।

বরকর্তার হুকুম মানতে হলে, হত না সারাদিন ধরে এমন আমোদ-আহ্লাদ। সেই কোন্ সকালে বরকনেকে বিদেয় দিতে হত। বারবেলা পড়বার আগেই নিয়ে যেতে চেয়েছিলেন তিনি। কেবলমাত্র কন্যাকর্তার কাতর আবেদন আর করুণ মিনতিতেই বারবেলা বাদে যাত্রা করতে রাজী হয়েছেন।

কন্যাকর্তা করজোড়ে জানিয়েছেন, “বাসি বিয়েটিরই সন্ধান খুঁজাট, পেরে উঠবে না মেয়েরা, অনুগ্রহ করে এ বেলাটা—”

অতএব অনুগ্রহ করে এ বেলাটা কন্যাকর্তাকে কুটুম্ব-সেবার পুণ্য অর্জন করবার সুযোগ দিতে সৈন্যে রয়ে গেলেন বরকর্তা। খানিকটা দূরে মেয়েদের বৈঠকখানা বাড়িতে তাঁদের থাকার ব্যবস্থা করে দেওয়া হয়েছে, কনের বাড়ির মেয়েদের কলহাস্য সেখানে পৌঁছবার ভয় নেই। সারা বেলাটা বাসি বাসরে বসে আমোদ-আহ্লাদ করছে মেয়েরা, বারবেলা কাটলে তখন বাসি বিয়ে। ততক্ষণে হয়তো আসল মানুষটা এসে যাবে। বরকনে বিদেয় দেরি হলেও ভাবনা কিছু নেই। বরের বাড়ি কলকাতায় হলেও, আপাতত বিয়েটা হচ্ছে এ পাড়া ওপাড়ায়, এ বিয়ের প্রধানা ঘটকিনীর বাড়ি থেকে। সুবিধে যৎপরোনাস্তি।

এই হুল্লোড়কারিণীরা বেশীর ভাগই পাড়ার বৌ-ঝি। তবে নিতান্ত তরুণী নয়, কিছুটা মাঝবয়সী।

যদিও জ্যেষ্ঠের দুপুর, তবু বিয়েবাড়ি বলে কথা। চেলি বালুচরী, পার্শী জামদানী, যার যা আছে পরে এসেছে এবং গলদঘর্ম হচ্ছে। যদিও একখানা করে ফুল কোঁচানো সূতি শাড়ি এনেছে হাতে করে, খেতে বসবার সময় পরতে। তা খাওয়ার এখন বিলম্ব আছে। বরযাত্রীদের ভোগরাগ মিটলে তবে তো!

কিন্তু নিরঙ্কুশ সুখ কোথায়?

ওদের হিহি ধ্বনিতে বিরক্তচিত ক্ষ্যান্ত ঠাকরুণ রঙ্গমঞ্চে এসে আবির্ভূত হন। এবং বলাই বাহুল্য মুহূর্তে সে মঞ্চে শ্বশানের নীরবতা নামে। ক্ষ্যান্ত ঠাকরুণ সেই নীরবতার প্রতি একবার তীব্র দৃষ্টি বুলিয়ে নিয়ে বলে ওঠেন, “হাসির ঘণ্টাবাদি হে হাটতলা অবধি পৌঁছোচ্ছে, একটু রয়েসয়ে আমোদ করলে ভাল হয় না?”

নীরবতা আরও গভীর হয়।

ক্ষ্যান্ত ঠাকরুণের দৃষ্টি পড়ে মূল নায়ক-নায়িকার ওপর। একজন ধরাপড়া চোরের মত হেঁটমুণ্ড অবনতনেত্র, আর একজন রোরুদ্যমান। কুণ্ডলী পাকানো চেলিমোড়া শরীরটা তার কান্নার উচ্ছ্বাসে কেঁপে কেঁপে উঠছে।

দৃশ্যটি অবলোকন করে ক্ষ্যান্ত ঠাকরুণ সস্মিত মুখে বলেন, “ছুড়ি যে কেঁদে কেঁদে আধখানা হয়ে গেল কাল থেকে! তোরা একটু বুঝ দিচ্ছি না? আপন্যরাই হাসি-মক্করায় মত্ত!”

এবার নীরব মঞ্চে শব্দ ওঠে।

একটি ঝিউরি মেয়ে বলে ওঠে, “এ কান্না কি আর বুঝ দিলে খামে পিসি! তায় আবার ওর—”

পিসি ঝঙ্কার দিয়ে ওঠেন, “নাও রঙ্গ! তোরা যে আবার মনসায় ধুনোর ধোঁয়া দিতে বসলি। কেঁদে কেঁদে মুখ-চোখের চেহারা যে খোলতাই হচ্ছে একেবারে। শ্বশুরবাড়িতে আর বৌ দেখে কেউ বলবে না সোন্দর মেয়ে। নে এবার ওঠা, মুখে-চোখে জল দেওয়া, এবার তোর বারবেলা কেটে এল, বাসি বে'র তোড়জোর কর। মেয়েজন্ম শ্বশুরবাড়ির জন্যে—”

মেয়েটা ফিফ করে হেসে ফেলে বলে, “তুমি আর বলবে না কেন পিসি? শ্বশুরবাড়ি যে কী বস্তু তা তো আর জানলে না কখনো!”

“আমি? আমার সঙ্গে তুলনা? মরণদশা দেখো ছুঁড়ির! আমার মতন অবস্থা যেন অতি বড় শক্ররও না হয়।নে আদিখ্যেতা রাখ, যোগাড়ে মন দে।”

“আর একবার কড়ি খেলানো হবে না পিসি?”

“হবে, হবেই তো! বারবেলা গেল। দেখ ততক্ষণে যদি কলকাতার মানুষরা এসে পড়ে। ছুঁটুককার এক বে! সবই বিচ্ছিরি! তোল তোল ছুঁড়িকে, চলির গরমে ভিরমি না যায়।”

ক্ষ্যান্ত ঠাকরুণ প্রস্থান করেন।

মেয়েরা কনেকে টেনে সোজা করে বসাবার চেষ্টা করে, কিন্তু সফলকাম হয় না। কেঁদে প্রাণ বিসর্জন দেবে এই যেন তার পণ। বাস্তবিকই আর তাকে “সুন্দর মেয়ে” বলে চেনা সম্ভব হচ্ছে না।

কিন্তু তাতে কি!

এটা তো স্বাভাবিক ঘটনা। বিয়ের কনে কাঁদবে না?

আমোদকারিণীরা এতে বিচলিত হবে কেন? তারা আর একবার সেই ব্যর্থ চেষ্টার পুনরাভিনয় করতে বসে। জনাচারেক মিলে তুললে আর ওই ছোট মেয়েটাকে কায়দা করতে পারবে না? ছুঁটুক না সে হাত-পা, করুক না দাপাদাপি, ওরা কেন স্কুর্তি ছাড়বে? হিহি হিহি হিহি!

ক্ষ্যান্ত ঠাকরুণের নিষেধের সম্মানার্থে হাসিটা শুধু এবার ঝুং ঝুং চাপা।

ওদিক থেকে তোড়জোড়ের সুর উঠছে, “দৈ—দৈ কোথায়? যাত্রার দৈ দেখছি না তো?... কী অব্যবস্থা বাবা, কী অব্যবস্থা! ঘট আছে তো পান নেই, পান আছে তো দৈ নেই...ওগো অ জেঠি—” প্রশ্নকারিণী তৃণভর্তি প্রশ্রবান নিয়ে নিক্ষেপ করতে করতে এগিয়ে যান, “আসল মানুষের তো দর্শন নেই, কনকাজুলিটা দেবে কে? হ্যাঁগা, বাসিবিয়ের স্বরণে তোমাদের পানের বরণ আগে না জলের বরণ আগে?... ওমা, নতুন গামছা দিয়ে তোমরা ‘সোহাগ আঁচল’ নুটোও? কী অনাচ্ছি বাবা! আমাদের তো হলুদ ছোপানো সুতোর গোছা দিয়ে—”

কে কাকে বলে এখন থেকেই বোঝায়, কারণ সবই পাড়ার লোক নিয়ে কাজ।

প্রশ্নকারিণী যে ক্ষ্যান্ত ঠাকরুণের ভাইঝি অনু, বুঝতে বাকী থাকে না কারো। অনুর গলাই বুঝিয়ে ছাড়ে। কিউড়ি মেয়ে গলা তুলবে বৈকি, যত ইচ্ছে তুলবে।

অনুর প্রশ্নের উত্তর আসে কোনো নারী-কণ্ঠের ভারী স্বরের মাধ্যমে।...

“আমাদের ওই গামছার খুঁই সোহাগ আঁচল, যে বাঁশের যে ধারা!... জলের বরণ আগে না পানের বরণ আগে তোর পিসিকে জিজ্ঞেস কর, সেই ঠিক বিধেন দেবে।”

সঙ্গে সঙ্গে ক্ষ্যান্ত ঠাকরুণের ব্যাজার কণ্ঠ বেজে ওঠে, “হ্যাঁ, চিরকাল ওই বিধেন দিয়ে এলো ক্ষ্যান্ত বামনী! হাত দিয়ে তো আর ‘পশ্য’ করবার আইন নেই। আমার কেবল গলাবাজির চাকরি। শাঁখাউলি এয়ো সোহাগীরা হাত নেড়ে সুয়ো! চল দেখি—”

ওদিকে খাটো গলায় কে একজন বলে ওঠে, “দেখ দেখ, ত্রয়োদের শাঁখা সিঁদুরে দিষ্টি দেওয়া দেখ! দুগুগা দুগুগা, দিষ্টি তো নয়, বিষের দৃষ্টি। শনির নজর! নিজে আজন্ম বোগুনো বেড়ি নাড়লেন কিনা, তাই খাওয়া-পরা দেখে হিংসেয় চোখ জ্বলে মরে।”

ঝট করে উঠে যায় একজন।

বোধকরি ক্ষ্যান্তর সুয়ো সে। অথবা “সুযোগিরি” করাই তার পেশা। টাটকা-টাটকা লাগিয়ে দিয়ে যদি একটা ধুকুমার কাণ্ড ঘটানো যায় সেটাই লাভ। কাজকর্মের বাড়িতে এমন হয়েই থাকে। বহুবিধ কথার চাষ চলে, এবং সেই চাষের ফসল রাম-রাবণের পালা ভেনে আনে। সে পালায় শুধু ‘পক্ষ’ নেওয়ার অপরাধেও অনেক মান-অভিমানের গান হয়, অনেক সখী-বিচ্ছেদ ঘটে যায়।

তবে এ সমস্তই মেয়েমহলের ব্যাপার। পুরুষদের কানে এসব পৌঁছায় না। পৌঁছলেও তাঁরা কান দেন না। তাঁদের কর্মক্ষেত্রে অন্যত্র। তাঁদের কর্মক্ষেত্রে ব্যাপক। কোনো একটা ঘেঁট তুলে বিয়েটা পণ্ড করা যায় কিনা, সেই চিন্তার মাথা খাটে তাঁদের।.....

বিশেষ করে মেয়ের বিয়ের!

তা বলে সকলের কি আর?

কি করে কুটুমের কাছে কন্যাকর্তার মুখটা থাকবে, কি করে বরযাত্রীদের সঙ্গে সম্প্রীতি সম্বন্ধ থাকবে, এর জন্যেও অনেকেই তৎপর হন। পরের কাজে প্রাণপাত করতে এগিয়ে আসে, এমন লোকও আছে বৈকি জগতে। নইলে আর জগৎটা এখনো টিকে আছে কিসের জোরে ?

হয়তো সংখ্যায় এরাই বেশী।

কিন্তু জলের থেকে আগুনের, সুধার থেকে বিষের এবং হিতের চেয়ে অহিতের দাপটটা বেশী বলে এদের সংখ্যাই কম মনে হয়। প্রতিভার প্রাবল্য না থাকলে তো আর পাদপ্রদীপের সামনে আসা যায় না। সে যাক, হিতৈষীর সংখ্যা যত বেশীই থাকুক, কার্যকাল কন্যাকর্তার মাথা ঘোরেই। এ বাড়ির কন্যাকর্তার মাথাও ঘুরছে, বন্বন্ব করে ঘুরছে।

কিন্তু সে মাথা ঘোরা কি কেবলমাত্র কুটুমের কাছে সম্মানস্কার চিন্তায় ?

নাঃ, তার মাথা ঘোরার কারণ অন্য!

তা ছাড়া ভয়ের তো খানিকটা কেটেই গেছে, বরযাত্রীদের মানসম্মান রক্ষা করে বিয়ে তো মিটেই গেছে, আজ বাসিবিয়ে। এই তো মেয়েরা কনেকে আঁচলে ঢেকে ঘিরে খিড়কিপুকুর স্নান করিয়ে নিয়ে এল। এখন শুধু বরপক্ষকে 'নম নম' করে কনেকে বিয়ে করে ফেলতে পারলেই আপাতত ভয় যায়। অবিশ্যি তেমন শত্রুজন থাকলে বরপক্ষের কান ভারী করে শেষরক্ষ করত দেয় না। বরকর্তা চোখ গরম করে শুধু বর নিয়ে চলে যাবার হুমকি দেখায়...হয় অনেক কিছু।

কিন্তু এক্ষেত্রে সে সব কিছুই আশঙ্কা নেই। এখানে শত্রুজনের আশঙ্কা নেই।

তবু কন্যাকর্তা সকাল থেকে হন্যে হয়ে ঘরবার করছে। ঘর থেকে দাওয়া, দাওয়া থেকে উঠান, উঠান থেকে বাড়ির বাইরে। ক্রমশ এগোতে এগোতে বকুলতলার মোড়।

জ্যেষ্ঠের দুপুর, রোদ যেন গিলে খেতে আসছে, ওই বকুলতলাটুকুই যা ছায়াময়। তবু আগুনের হলুকা ছিটানো বাতাস তো বইছেই। তাকে তো আর রোধ করা যায় না।

তবু নেশাগ্রস্তের মত দাঁড়িয়েই আছে মানুষটা, নড়ছে না। কেবল মাঝে মাঝে গলা বাড়িয়ে ডিডি মেরে দূরের কি যেন দেখবার চেষ্টা করছে।

সন্দেহ নেই কোন কিছুর প্রতীক্ষা করছে। কিন্তু কিসের ? আল্লাদজনক কিছুর বলে তো মনে হচ্ছে না। ক্রমশই একটা আতঙ্কিত উদ্বেগের ছাপ ফুটে উঠছে ওর মুখে। এখন কোনো কবরেজ যদি ওর নাড়ি দেখতো তো নাড়ির চাঞ্চল্যে উদ্ভিগ্ন হুটু।

কাঠগড়ায় এসে দাঁড়ানোর পূর্ব-মুহূর্তে কি আসামীর নাড়িতে এই চাঞ্চল্য জাগে ?

কিন্তু প্রতীক্ষার তো শেষ হচ্ছে না।

ওই দূরবর্তী পথের শেষে কী আছে ? কী আসবে ?

একটা লালডুরে পরা ছোট মেয়ে ছুটে এসে ডাক দিল, "অ বামুনকাকা, বামুন ঠাকুমা ডাকছে তোমায়!"

বামুনকাকা বিরক্ত স্বরে বলে, "কেন ?"

"জানি না। বলছে যে 'লগন' উত্তীরনো হয়ে যাচ্ছে, এরপর কালবেলা না কি পড়ে যাবে।"

"যাক।" বরে কনের বাবা চোখটাকে তীক্ষ্ণ করে আরো একবার দূর প্রান্তরের ওপারে দৃষ্টিটাকে পাঠাবার চেষ্টা করে। এই জ্বলন্ত মাঠের দাবদাহের ওপারে কি একমুঠো ধোঁয়াটে ছায়ায় আভাস পাওয়া যাচ্ছে ?

নাকি দৃষ্টির ভ্রম ?

ভ্রম নিরসন পর্যন্ত অপেক্ষা করা যায় না, মেয়েটা আরও একবার বলে ওঠে, "এসো তাড়াতাড়ি! ভটচায় মশাই নাকি রাগারাগি করছে!" ডেকে নিয়ে মেয়েটা আবার ছুটে ভিতরে চলে যায়। আর কেন কে জানে, সেই দিকে তাকিয়ে কনের বাবার বুকের মধ্যোটা লঙ্কাবাটের জ্বালার মত 'হ-হ' করে জ্বলে ওঠে।

কেন ?

প্রায় ওইই কাছাকাছি বয়সী নিজের সদ্য উৎসর্গীকৃত বালিকা কন্যার মুখটা স্মরণ করে ? আর দণ্ড দুই পয়েই মেয়েটাকে বিদায় দিতে হবে, নির্বাসন দিতে হবে একটা অপরিচিত অন্তঃপুরের অন্তরালে, স্তব্ধ হয়ে যাবে তার উচ্ছল কলকাকলী, হয়তো বাপের কাছেও অপরিচয়ের অবগুপ্তন টানবে ?

এতে যে বিচলিত হবার কিছু নেই, এটাই যে চিরাচরিত নীতি, ওর মাও তাই করেছে, দিদিমা-ঠাকুমাও করেছে, এ যুক্তি জ্বালা কমাতে পারল না, বুকের মধ্যোটা মোচড় দিয়ে উঠতে লাগলো।

আবার হয়তো শুধুই কন্যা-বিবাহ-ব্যাকুল পিতৃহৃদয়ের জ্বালাটাই সব নয়, ভয়ানক একটা অপরাধবোধও বুকের ভিতরটায় খাবল মারছে বুঝি।

অপরাধ না করেও তার বোধ কেন ?

'ন্যায়' কাজ করেও আতঙ্ক কেন ?

লোকটা যাচ্ছেতাই রকমের ভীতু তাতে আর সন্দেহ নেই।

ভিতর থেকে আবার ছুটে আসে মেয়েটা, ভীত-ব্রন্ত গলায় বলে, “অ বামুনকাকা, তোমার মা যে রসাতল করছে গো! বলছে, মহারাণী না আসা অবধি কি রাজকার্য বন্ধ থাকবে?”

নাঃ, এরপর আর দাঁড়িয়ে থাকা চলে না। দ্রুতপায়েই ছুটতে হয় বামুনকাকাকে।

অথচ আর একটু দাঁড়ালেই হয়তো প্রতীক্ষারত মূর্তিটা দেখানো যেত। কারণ রক্ষতগু জ্বলন্ত প্রান্তরের ওপর থেকে ধোঁয়া-ধোঁয়া ছায়াটা ক্রমেই এগিয়ে আসছে, একটা অবয়ব নিচ্ছে।

ওই জ্বলন্ত অনলের প্রকাশেই গরুগুলো গড়গড়িয়ে এগিয়ে আসতে পারছে না। গাড়োয়ান যতই কটুক্তি ব্যাক্যের সঙ্গে সঙ্গে তাদের ল্যাজমোড়া দিক, তারা যেন পিছিয়েই পড়ছে।

সদু ছাইয়ের ভিতর থেকে গলা বাড়িয়ে বার বার উদ্বিগ্ন গলায় বলছে, “অ ছেলে, তোমার বলদরা যে পিছুনে বাড়ছে গো! আমাদের যে বড্ড তাড়া—!”

গাড়োয়ান ফুঙ্ক কণ্ঠে বলে, “কী করবো বলেন ঠাকরেন, দেখছেন তো, চেষ্টা তো করছি সাধ্যমত। ব্যাটারা নৌড়ুচ্ছে কই? সূখ্য ঠাকুর একেবারে আগুন হানছে কিমা!”

ফুঙ্ক ব্যাক্য উচ্চারণের সঙ্গে সঙ্গেই গাড়োয়ান প্রবল একটা বাড়ি হানে বদল দুটো হড়বড়িয়ে এগিয়ে যায় খানিকটা। সাধন সরল এই অতিক্রান্ত আক্রমণে টাল রাখতে না পেরে কাত হয়ে যায়, আর সত্য ছাইয়ের বাঁশটা শক্ত করে চেপে ধরে শ্রান্ত গলায় বলে, “খাক ঠাকুরঝি, আর সত্য ছাইয়ের বাঁশটা শক্ত করে চেপে ধরে শ্রান্ত গলায় বলে, “খাক ঠাকুরঝি, আর তাড়া দিয়ে কাজ নেই। শেষকালে কি গো-হতো হবে?”

সদু দুর্গা দুর্গা করে ওঠে।

গাড়ি এবার একটু দ্রুত বেগ নেয়, পরিচিত পথের স্পর্শ পাওয়া যায়।

কিন্তু আজও এমন ঘুঘু ডাকে কেন?

সত্যর সঙ্গে হঠাৎ এমন শত্রুতা সাধবার হেতু কি ওদের?

আচ্ছা ‘ঘুঘু’র ডাক না মানুষের কান্না?

অনেকগুলো নারীকণ্ঠের ‘হঁ হঁ’ ধ্বনি না?

এ কান্নার উৎস কোন্ দিকে? গাড়ি যত বাড়ির নিকটবর্তী হচ্ছে, শব্দটা ততই স্পষ্ট হয়ে উঠছে যে!

না, সত্য আর কিছু শুনেবে না, ভাববে না।

যতক্ষণ না শ্মশানক্ষেত্রে গিয়ে পৌঁছেছে, ততক্ষণ পর্যন্ত কানকে আর মনকে নিষ্ক্রিয় রাখবার সাধনা করবে।

উলু, উলু উলু! মুহূর্মুহ উলু পড়ছে।

সমবেত নারীকণ্ঠের উলুধ্বনি বিয়ের ঘটনার অভাবটা পূর্ণ করতে চাইছে যেন।

বাসিবিয়ের সবই টাটকার উল্টো।

বাসিবিয়ের কড়িখেলার সময় আগে বর কড়ি চালে, পরে কনে। ‘বরণ’ আগে কনেকে করতে হয়, পরে বরকে। বরণকর্ত্রীও বদল হওয়া রীতি। যিনি গতকাল বিয়ের বরণকার্য সমাধা করেছেন, তিনি আজ আর মঞ্চে নেই। নতুন নায়িকার সন্ধান হচ্ছে।

“কে করবে তবে? অনু? তা অনুই আয় মা! একখানা চেলি-টেলি জড়িয়ে আয়, বরনডালাটা ধর!... বাজুবন্ধ নেই তোর? ঝুমকোদার তাবিজ? না থাকে, আর কারুর নে’ পর একজোড়া বরণ করবার সময় তাবিজ বাজু পরলে শোভা ছড়ায়।”...

কে একজন সঙ্ক্ষেতে বলে ওঠে, “আহা, মা-মাগী কিছু দেখতে পেল না! কিছু করতে পেল না! মরে যাই! এখনা এসে পড়লে বাসি-বরণটা করতে পারতো!... কপালে নেই!”

কপাল!

তা ‘কপাল’ ছাড়া আর কোন্ সাগরে গিয়ে আত্মসমর্পণ করবে আক্ষেপের নদীরা?

‘কপালে’ গিয়েই তো সব প্রশ্নের পরিসমাণ্ডি।

তাই ‘কপালে’র হাতে সমস্ত ঘটনাকে নিবেদন করে আক্ষেপকারিণী অন্নর বাজুবন্ধের ঝুমকোর ফাঁস টেনে শক্ত করে দিতে এগিয়ে আসে।

আবার উলু ওঠে, ক্ষুদে একটা মেয়ে গিল্লীদের থেকেও প্রবল দাপটে শাঁখে ফুঁ দেয়, গিল্লীরা সকলে একত্রে কথা শুরু করেন, আর সহসাই সেই প্রবল কলকল্লোল ছাপিয়ে একটা রব ওঠে, “এসেছে, এসেছে, এসে গেছে!”

অনেকগুলো কণ্ঠ আহাদের রোল তুলে গাড়ির ধারে এসে দাঁড়ায়, এতক্ষণে আসা হল ?... বাবা, সকাল থেকে পথপাশে চাইতে চাইতে বাড়িসুদ্ধ লোকের চোখ ক্ষয়ে গেল! আর একটুখানি আগে এসে পড়লে 'জামাই'-বরণটা হতো শাশুড়ীর হাত দিয়ে! যাক—তবু মন্দের ভালো, শেষমেষ চোখের দেখাটাও হবে একবার!”

কে এরা ?

কি বলতে চাইছে ? কাকেই বা বলছে ?

শেষে একটিবারের জন্যে “চোখে দেখার” মত করুণতম সুখের আশ্বাসের সঙ্গে এই উৎসব-মুখরতা কি মানানসই ?

সত্য কেন এমন অমঙ্গলের ভয়ে কাঁটা হয়ে আছে ? চারিদিকে সবই তো মঙ্গলচিহ্ন !... দোরে মঙ্গলঘট, বার-উঠোনে আলপনার ছাপ, ভিতর-উঠোনে সামিয়ানা টাঙানো। সব কিছুই প্রখর রোদে সাদা আলোর জ্বলজ্বল করে জ্বলছে।

সব শুভ চিহ্ন!

কিন্তু কেন ? সাধন তো সত্যর সঙ্গেই রয়েছে। ‘পাকা দেখা’র মত আরও কোনো ঘটনা আছে নাকি এদের কুলপ্রথায় ? তারই আয়োজন, প্রতুতি.... সদু শুধু মজা দেখবার জন্যে এমন ছড়িয়ে নিয়ে চলে এলো!

উৎকট একটু মজা!

কিন্তু উল্লুর শব্দগুলো এত বিশ্রী লাগছে কেন ? ঘুঘুর ডাকের মত কান্না-কান্না! চিরকালই তো মেয়েমানুষের এই বুনো উল্লাসধ্বনি শুনে এসেছে সত্য। খারাপ লাগে, খারাপ লেগেছে, কিন্তু শুনে বুকের ভেতরটা এমন ফোঁপরা ফোঁপরা তো লাগে নি!

সেই একটা আলোক-ঝলকানো মুখ কই ? সত্যর আঁসার খবরে ব্যগ্র দুখানা পুঁটনিটোল কচি হাত কেন দ্বিধাদিক জ্ঞানহারা ভঙ্গীতে ছুটে এসে সত্যকে জড়িয়ে ধরছে না ?

আর....আর সেই চিরপরিচিত মুখটা ? যে মুখ চিরকাল বিরাগ আর অনুরাগ—এই পরস্পর-বিরোধী দুটো আকর্ষণে নিজেকে অপরিহার্য করে রেখেছে সত্যর কাছে ?

ঝাপসা-ঝাপসা ছায়া-ছায়া একটা অনুভূতি নিয়ে এলোকেশীর উঠোনে এসে ঢোকে সত্য। অথবা পায়ে হেঁটে ঢোকেও না। অনেকগুলি মহিলা এবং বালক-বালিকার ঠেলাঠেলির ধাক্কায় এসে পৌঁছে যায়।

আর পৌঁছেই পাথরের চোখ নিয়ে দাঁড়িয়ে পড়ে।

আজন্নের দেখা বাঙ্গালি ঘরের চিরপরিচিত সেই ছবিখানা কে ঐকে রেখেছে সত্যর দেখার জন্যে ? কিন্তু কে ও ? কে ?

বরকনে, কলাতলা, কুলো ডালা মাথায় এয়োর দল, এইসব চিরপরিচিত দৃশ্যের মাঝে কে ওই অপরিচিতা ?

যার লাল চেলির ঘোমটা খসে পড়েছে নীতি-নিষেধ ভুলে ?

ও মুখ কি কখনো দেখেছ সত্য ? দেখেছে ওই একজোড়া আহত পশুর চোখ ?

দেখে নি, জীবনে কখনো দেখে নি। এই অপরিচয়ের আঘাতে সত্যর চোখও তাই পাথর হয়ে গেছে।

কিন্তু কানটাও একেবারে পাথর হয়ে গেল না কেন সত্যর ? কেন এত সব অচেনা গলার কথা কানে আসছে ?

“নবু, নবু এখন আবার কোথায় গেলি ? এতক্ষণ তো ‘বৌ-বৌ’ করে ঘরবার করছিলি!...কনকাজুলির টাকাটা কাকে দিলি ? হাতে মুখে একটু জ্বল দাও বৌমা, গাড়ির কাপড়টা ছেড়ে এসে মেয়ে-জামাইকে আশীর্বাদ করো।...আহা, কাল এসে পৌঁছতে পারলে না বৌমা! একটা মাস্তুর মেয়ে, বেঁটা দেখতে পেলো না! আসবেই বা কি, খবর তো পেলো না সময়ে ? তোমার শাউড়ী এত ছুঁটককারি করে দিলে বিয়েটা, যেন বিয়ে পালিয়ে যাচ্ছিল।... তা যাক, বিনি খাটনিকে সোনার চাঁদ জামাই পেয়ে গেলো! দুটিতে কেমন মানিয়েছে দেখো!... বিয়ে খাসা হয়েছে, জ্বালুয়ামান সংসার জানাশুনোর মধ্যে!”

সত্যর মাথার মধ্যে ইঞ্জিন চলছে—কথাগুলো ক্রমশ যন্ত্রের শব্দের মত ঠন্ ঠন্ করে বাজছে...“যাই ভাগ্যিস নবুর সঙ্গে মেয়েটাকে পাঠিয়েছিলে, আর ঠিক সেই সময় তোমার শাউড়ীর সেইয়ের মেয়ে মুক্ত এসেছিল বেড়াতে, তাই না যোগাযোগ হয়ে গেল! তোমার রূপসী মেয়ে দেখে মুক্ত একেবারে গলে গেল! বলে এ মেয়ে আমি বৌ না করে ছাড়ব না! ছেলের বুঝি আষাঢ় মাসে জন্মাস, তাই এই জ্যোষ্টিতেই সেরে ফেলে বাঁচালো। তোমার শাউড়ীও তো মেয়ের আগে ছেলের বে দেওয়া নিয়ে নবুকে না ভুতো ন ভবিষ্যতি করছিল। নবু ভয়ে ভয়ে...ও কি অ সদু, বৌমা অমন নিশিতে পাওয়ার মত পিঠ ঘুরিয়ে চলে যাচ্ছে কোথায়? শরীর তো ভাল দেখাচ্ছে না, নাই বা গেল এখন ঘাটে। বাড়িতে এক ঘটি জল নিয়ে....ওমা ওমা, অ সদু, বৌমা যে বকুলতলার দিকে চললো! ওদিকে কি? অ নবু—ওরে অ খোকারা, খোকারা তোদের মা ফের গাড়িতে গিয়ে উঠতে চায় নাকি?”

পালিয়ে বেড়ানো নবু এতক্ষণে সমাজে দেখা দেয়। দেয় সদুর সামনে। ভয়-ভরা গলায় বলে ওঠে, “বিয়ের কথা জানাও নি তোমাদের বৌকে?”

কে জানে কেন, সদু হঠাৎ এখন কঠিন হয়। কঠিন গলায় বলে, “না, জানাই নি!”

“তাই! তাই বুঝি! না বলে নিয়ে এসেই এইটি হল!” ... নবকুমার রাগ রাগ গলায় বলে, “এ কী আশ্চর্য! আগে এলে বিয়েয় বাধা দিত, তাই জানানো হয় নি, এখন না বলে নিয়ে আসার মানে? বলতে কী হয়েছিল?”

চিরদিনের সহিষ্ণু সদু হঠাৎ এমন অসহিষ্ণু হয়ে উঠল কেন? সদু যেন আরো কঠিন হচ্ছে। কঠিন আর কঠোর গলায় বলছে, “বলতে কী হয়েছিল সে বোঝবার ক্ষমতা তোর থাকলে তো বলবো? ঢের দিন ঢের অনু খেয়েছি তোদের, তার ঋণ শুধতে বৌকে সঙ্গে এনে পৌঁছে দিয়ে গেলাম তোদের হাতে! তবে কসাইয়ের কাজটা করি নি কেন, এ বলে আর চোখ রাঙাসনে! মুখ দেখে বুঝি আর এ ভিটেয় জলস্পর্শ করবে না ও, ফিরে যাবে! আমিও চললাম ওর সঙ্গে—”

সদুও দ্রুতপায়ে বেরিয়ে যায়।

বকুলতলার দিকেই যায়।

আর বিয়ের কেনেটাও একটা অদ্ভুত পরিস্থিতি ঘটিয়ে বসে। হঠাৎ সেই কলতলাতেই বসে পড়ে বরের সামনেই হাউ হাউ করে কেঁদে ওঠে, “কেন তুমি এখানে এই সব করলে আমার! মা আমায় মেরে ফেলবে!” মার পিছু পিছু যাবে তার উপায় নেই, স্ট্রীটলের সঙ্গে গাঁটছড়া বাঁধা।

অমোঘ অচ্ছেদ্য বন্ধন! অনন্তকালের ওপূর্ণ পর্যন্ত নাকি যার ক্ষমতা...ক্ষেত্র বিস্তৃত!

সমস্ত পশ্চিম আকাশটা জুড়ে লালের সমারোহ, সেই লাল ছড়িয়ে পড়েছে মাঠে পুকুরে গাছপালায়।

....লটকে পড়া গরু দুটো ঘাসজল আর পড়ন্ত বিকালের স্নিগ্ধ হাওয়া পেয়ে আবার সতেজ হয়ে গড়গড়িয়ে টেনে নিয়ে যাচ্ছে গাড়িখানাকে।

আজকের সন্ধ্যার মধ্যে বামুনপাড়ার এই বড় মাঠটা পার করে নিয়ে যেতে হবে এই নির্দেশ। তারপর যদি চলা নিতান্ত অসুবিধে হয়, হাটতলার ওদিকে বিশ্রাম নিলেই হবে। ঘোড়ার গাড়ি জুটে গেলে মজল।

অনেক দিন আগে একদিন রামকালী কবরেজ এ গ্রাম থেকে ধুলোপায়ে বিদায় নিয়েছিলেন।

আজ রামকালী কবরেজের পিতভক্ত মেয়ে বাপের সেই কাজের অনুকরণ করলো।

রামকালী কবরেজের সঙ্গে ছিল নিজের পালকি। তাঁর মেয়ের তা নেই। তাই অনিচ্ছুক গাড়োয়ানটাকে ঘুষ দিতে হয়েছে। বা হাতটাকে তাই তার এখন শুধু শাখা আর লোহা। মোটা হাঙরমুখে বালাগাছটা নেই।

ওটাই ছিল হাতের কাছে, হাতছাড়া হয়েছে।

কিন্তু কতই বা দাম ওটার? সত্যকে সেই তার “অনন্তকালের বন্ধন” থেকে ছাড়িয়ে নিয়ে যাবার পক্ষে কি খুব বেশী?

ছাড়িয়ে নিয়ে, গ্রাম ছেড়ে চলেছে সত্য।

কিন্তু এই ছাড়িয়ে নিয়ে যাওয়াটা কি নিতান্ত সহজে হয়েছিল?

না, তাই কি হয়? হয় না। প্রায় গ্রামসুদ্ধ সবাই এসে গাড়িখানাকে ঘিরে ধরে নিবৃত্ত করতে চেষ্টা করেছিল বৈকি।

সত্য তাদের কথা রাখে নি।

সত্য শুধু শান্ত স্বরে একই কথা বলেছে।

বলেছে, “বৃথা কেন কষ্ট করছেন! যে উপরোধ রাখতে পারবো না—”

শেষ পর্যন্ত এলোকেশীও এসেছিলেন। হাতজোড়ের ভঙ্গী করে বলেছিলেন, “রাখতে পারবে না মানে রাখবে না, এই তো! তা আমি এই শান্তভাবে হয়ে তোমার কাছে হাত জোড় করে ঘাট মানছি বৌমা, অপরাধ মাঝ্জনা করো। অন্যাই হয়েছে আমার, একশোবার অন্যাই হয়েছে স্বীকার পাচ্ছি সে কথা। বুঝতে পারি নি মেয়ে নবার নয়, একা তোমার, না বুঝে তাই ঠাকুমাগিরি করে ওর উৎসাহ করতে গিয়েছিলেন!.... যাক যা হবার তা তো হয়ে গেছে, বে’ তো আর ফিরবে না, কেন আর গেরাম জানিয়ে কেলেঙ্গারটা করছো?”

সত্য স্থির হয়ে বসেছিল, সত্য নিজেকে সংযত রেখেছিল। সত্য শুধু অন্য দিকে মুখ ফিরিয়ে নিয়েছিল।

আর নবকুমার ?

এলোকেশীর ছেলে ?

সে কি আসে নি মান কুইয়ে মান ভাঙাতে ? নবকুমার আসবে বৈকি! নবকুমার আসবে না, এ কি হয় ? শেষ অবধি এসেছিল। নবকুমারও প্রায় হাতজোড় করেছিল, “যা হয়ে গেছে তার তো চারা নেই, তবে কেন—”

এলোকেশীর সঙ্গে না হোক, এলোকেশীর ছেলের সঙ্গে কথা বলেছিল সত্য। বলেছিল, “চারা আছে কিনা সেইটাই শুধু ভাববো বসে বসে বাকী জীবনটা ধরে।”

বাকী জীবনটা ধরে!

“বাকী জীবনটা ধরে শুধু এই কথাটা ভাববে তুমি ?”

সত্য সেই ক্ষুর হতাশ ভিক্ষুক চোখ দুটোর দিকে তাকিয়েছিল নিজের পাথর হয়ে যাওয়া চোখ দুটো দিয়ে।

তাকিয়ে থেকে কেমন একটা অনুভূতিহীন গলায় বলেছিল, “বাকী জীবনটুকু কি খুব বেশী হল ? অনেকগুলো জন্ম ধরে ভাবলেই কি সে ভাবনার শেষ হবে ? উত্তর পাওয়া যাবে ?”

নবকুমার হতাশ গলায় বলেছিল, “তোমার স্ত্রী কথার মানে আমি কোন কালেই বুঝতে পারি না, এসবও বুঝতে পারছি না, কিন্তু একটা কথা জিজ্ঞেস করি, সুবর্ণই তোমার সব ? তুড়ু খোকা এরা কেউ নয় ?”

“কে কতখানি, সেটাও তো ভেবে ধরতে হবে!”

“চিরদিনই দেখলাম মায়া মমতা তোমার কাছে কিছুই নয় জেদটাই বড়। তবু মিনতি করে বলছি, এই একবারের জন্যে অন্তত সে জেদ ছাড়ো আমার মুখ চেয়ে।”

“আমায় মাপ করো।”

সত্য মাথার কাপড়টা একটু টেনে নিয়েছিল।

নবকুমার কান্নায় ভেঙে পড়েছিল।

কোঁচার খুঁট তুলে চোখ মুছেছিল।

কিন্তু সত্য তো চিরদিনই নিষ্ঠুর। “আর আমি ‘রাগের ঠাকুর’ থাকবো না” প্রতিজ্ঞা করলেই কি স্বভাবটা বদলাতে পারবে ?

সত্য তাই নবকুমারের মুখ থেকে চোখ না নামিয়েই বলে, “তিরিশ বছর ধরে তো তোমার মুখ চেয়ে এলাম, শেষটায় একবার নিজের দিকে চাইবার ইচ্ছে হয়েছে!”

“তোমার সুবর্ণকে একবার আশীর্বাদও করে যাবে না ?”

সত্য কি বিদ্যুতের আঘাত পেল ?

সত্যর মা ভুবনেশ্বরী একবার ঠিক এই রকম একটা প্রশ্নে বিদ্যুতের মত কেঁপে উঠেছিল না ? সেই তার শেষ দিনে ?

সত্য এবার নবকুমারের চোখ থেকে চোখ সরিয়ে নেয়। ধীর গলায় বলে, “চিরকালের মতন চলে যাচ্ছি, বিদেয়কালে আর কেন মুখ দিয়ে কটু কথা বার করাতে চাও ?”

গাড়ি প্রায় এগোতে শুরু করে, তবু নবকুমার সঙ্গে সঙ্গে এগোয়, “তোমার বাবা এত বিচক্ষণ ব্যক্তি, তিনিও তোমাকে আট বছরে গৌরীদান করেছিলেন, সে কথা তো কই মনে করছো না!”

হঠাৎ সত্যর সেই পাথরের চোখে আশ্রয় খালসে উঠেছিল।

“মনে করছি না, এ কথা কে বলেছে তোমায় ? জীবনভোর মনে করে আসছি। আর এবার বাবার কাছেই গিয়ে তার উত্তর চাইব!”

নবকুমার তবু গাড়ির বাঁশ চেপে ধরে আছে, “তোমায় আমি কথা দিচ্ছি তুড়ুর মা, তুমি যদি বল, কুটুমবাড়ির সঙ্গে একটা বিরোধ ঘটিয়ে সুবর্ণকে আবার তোমার কাছেই ফিরিয়ে এনে দেব—”

সত্য হঠাৎ একটা কাজ করে বসে। এই খোলা মাঠে এর ওর সামনে হাতটা বাড়িয়ে নবকুমারের সেই গাড়ির বাঁশ চেপে ধরা হাতটা চেপে ধরে। উদ্ভ্রান্ত গলায় বলে ওঠে, “সত্যি বলছো? ফিরিয়ে এনে দেবে? এই পুতুল খেলার বিয়েটা মুছে ফিরিয়ে দেবে আমার সেই সুবর্ণকে?”

সদু গাড়ির ছইয়ের মধ্যে বসে ছিল।

চূপ করেই বসেছিল এতক্ষণ।

এবার আস্তে বলে, “মুছে ফেলব বললেই কি মুছে ফেলা যায় বৌ? এ কি মুছে ফেলার জিনিস? নারায়ণ সাক্ষীর বিয়ে—”

সত্য নবকুমারের হাতটা ছেড়ে দেয়। কেমন এক রকমের হাসি হেসে বলে, “সব বিয়েতেই নারায়ণ এসে দাঁড়ান কিনা, সব গাঁটছড়াই জন্ম-জন্মান্তরের বাঁধন কিনা, এই প্রশ্ন নিয়ে বাবার কাছে যাচ্ছি ঠাকুরঝি!”

সদু নবকুমারের দিকে তাকিয়ে শান্ত গলায় বলে, “সে প্রশ্নের উত্তরও তো একজন্মে মিলবে না!...তুই আর কেন দেপি করিস নবু? তুই বাড়ি যা, কাজের পাহাড় পড়ে আছে তোর। আরো দেপি করে চেষ্টা করে আর কুটুমের সঙ্গে বিরোধ বাধাতে হবে না!”

তবু শেষ চেষ্টা করে নবকুমার।

ফিরে যেতে গিয়েও বলে, “আমি অপরাধী, আমায় শাস্তি দাও, তুড়ু তো কোন অপরাধ করে নি? ওর বিয়েটা দেখবে না?”

“নাই বা দেখলাম, দূর থেকে আশীর্বাদ করবো।”

আর এগোনো যাচ্ছে না।

সব মিনতি ব্যর্থ করে দিয়ে গাড়িটা যাচ্ছে এগিয়ে।

সব অনুভূতির আলোড়ন ওঠে, আর সেটা ফেটে বেরিয়ে পড়ে, “জানি, জানতাম কথা থাকবে না! কারুর উপরোধ রাখবার পাত্র তুমি নও! কিন্তু এই বৃত্তি রাখছি, কেউ তোমায় ঘাড়ে করে কাশী পৌঁছতে যাবে না!”

সত্য কি তবে বাঁচলো?

শেষ মুহূর্তে হেসে চলে যাবার পথ পেয়ে সেই বাঁচার গলায় তাই ওর সেই পরিচিত ভঙ্গীতে হেসে উঠলো, “ওমা, আমি তা বলতেই বা যাবো কেন? ঘাড় থেকেই যখন নেবে যাচ্ছি চিরকালের মত! কারুর ঘাড়ে না চড়ে শুধু নিজের দুখানার ভরসায় মা বসুমতীর মাটি ছোঁয়া যায় কিনা, সেটাও তো আমার আর এক প্রশ্ন!”

গাড়িকে দাঁড় করিয়ে রাখতে পারছে না গাড়ির চালক, গরুগুলো এগোতে চায়। নবকুমার যেতে গিয়ে ফিরে এসে হঠাৎ লাফিয়ে সেই গাড়ির মধ্যে উঠে পড়ে ক্ষিপকণ্ঠে বলে ওঠে, “এইজন্যই বলে মেয়েমানুষের বিষয়-সম্পত্তি থাকতে নেই! বাপের দলিলের ভরসা রয়েছে তাই স্বামীর অনু ত্যাগ দিয়ে চলে যাবার সাহস! মেয়েমানুষের এত সাহস ভাল নয়। এই আমি বলে দিচ্ছি, অশেষ দুঃখ আছে তোমার কপালে। স্বামী হয়ে এই অভিশাপ দিচ্ছি তোমায় আমি।”

এ অভিশাপ যে নিতান্তই ক্রোধ, ক্ষোভ, হতাশা, অপমান, লোকলজ্জা আর অপমানবোধ থেকে উদ্ভূত তা বুঝতে পারে বৈকি সত্যবতী, তাই নিজে সে এত বড় অভিশাপেও বিচলিত হয় না। বরং প্রায় হেসে ফেলেই বলে, “তাই তো দিয়ে আসছো তোমরা আবহমান কাল থেকে। স্বামী হয়ে, বাপ হয়ে, ভাই হয়ে, ছেলে হয়ে। ওটা নতুন নয়। অভিশাপেরই জীবন আমাদের। তবে ওই যে দলিলের কথা বললে, জেনো ওই ছেড়া কাগজটার কথা আমার মনেও ছিল না। মনেই যখন করিয়ে দিলে তো বলি, বাবার দেওয়া বস্তু ফেলে দেওয়া বাবার অপমান। সাধন সরল যদি মানুষ হয়, ওরা যেন বিষয়টুকু থেকে ওই ত্রিবেণীতে মেয়েদের একটা ইঞ্চল খুলে দেয়। আর... আর নাম দেয় যেন “ভুবনেশ্বরী বিদ্যালয়”।...একটু থামো” —বলে সত্য আঁচলটা গলায় জড়িয়ে স্বামীকে একটা প্রণাম করে বলে, “জীবনভোর অনেক অকথা-কুকথা বলেছি তোমায়, অনেক জ্বালাতন করেছি। পার তো মাপ করো।”

সদু মৃদু ধমকের সঙ্গে বলে, “নবু, বাড়ি যা! বৌর পিছু পিছু ছুটে এসে কোনো লাভ নেই। ওর নাগাল তুই কোনো দিনই ধরতে পারিস নি, আজও পারবি না। শুধু এইটুকুই বলতে ইচ্ছে করছে, মুখ্যই না হয় হয়েছিলি, কিন্তু ‘মমতা’ বস্তুটা কি এক কণাও থাকতে নেই রে? মাতৃ-আজ্ঞায় মেয়ে পার করতে বসবার সময় বৌর মুখটা একবার মনে পড়ল না? তিরিশ বছর একত্র ঘর করলি, বনের পশুপক্ষীর প্রতি যে মায়া জন্মায়, তা জন্মায় নি তোর?”

নবকুমার দীপ্তকণ্ঠে বলে, “এই বললে তুমি সদুদী ? ওর কথা আমার মনে পড়ে নি ? অবস্থাটা বুঝেছ আমার ? দশচক্রে ভগবান ভূত হয়ে—”

“নবু, নেবে যা। মেয়ে জামাই এখনো ঘরে, কুটুম্ব ক্ষেপে বসে আছে, অনেক কাজকর্তব্য আছে, সেখানে না গেলে চলবে না। মেয়েটার কথা ভাব।”

“মেয়েটা! আমি মেয়েটার কথা ভাববো”... নবকুমার পাগলের মত করে, “স্নেহময়ী মা যে তার বুকে মুণ্ডর মেরে রেখে এল সেটা তো কই ভাবছ না ? এই যে সে কাঠ হয়ে দাঁড়িয়ে রইল, আর মা তার দিকে দৃষ্টিমাত্র না দিয়ে ঠিকরে চলে এল, বুক ফেটে গেল না তার ? তার কোন অপরাধ আছে ?”

সত্যবতী আর কথা বলে না, শান্তভাবে ছইয়ের ধারের বাঁশে মাথাটা ঠেকিয়ে চোখ বুজে বসে থাকে। সদু এবার দৃঢ়ভাবে বলে, “নবু, তুই নাববি ?”

নেমে পড়ে নবকুমার।

পিছন দিকে না তাকিয়ে হন হন করে হেঁটে যায় কোঁচার খুঁটে চোখ মুছতে মুছতে।

গাড়ি এগোতে থাকে।

মাঠ পার হয়ে হাটতলায় এসে পৌঁছালো বলে। এখানে ঘোড়ার গাড়ি মিলবে। সরল দেখবে তার ব্যবস্থা। সাধন মার প্রতি বিরক্তবশত আসে নি সদুে।....বাবা যত বড় গর্হিত কাজ করে থাকুন, মার নির্লজ্জ কেলেকারিও তার কাছে অধিক অসহ্য!...

গরুর গাড়ির মেয়াদ ফুরিয়ে আসছে, আকাশের দিক থেকে তাই চোখ ফেরাতে ইচ্ছে করছে না। সমস্ত পশ্চিম আকাশটা ছুড়ে লালের সোনা।...

আকাশের ওপারে কি সত্যই আছে আর এক জগৎ ? তারা ওখানে কারো চিতা জ্বলেছে ? ...এ তারই অগ্নি-আলো ?

নাকি আগুন নয়, শুধু রং ?

সেখানের কোনো নববধু তার লাল চেলিখানা মেলে দিয়েছে শেষ রোদুরে!...

একসময় সদু একটা নিঃশ্বাস ফেলে বলে, “বিস্ত্র হয়েছ বলেই সব আশা ফুরিয়ে যাবে বৌ ? একেবারে ত্যাগ দিয়ে চলে আসবে তুমি সুবর্ণকে ? তুমিও তো বিয়ের পরই এতখানিটা হয়েছ!”

সত্য সদুর মুখের দিকে তাকিয়ে দেখে উত্তর না দিয়ে পারে না। আন্তে বলে, “আমি যে কতখানিটা হয়েছি ঠাকুরঝি, তার প্রমাণ কই এই দেখছো!”

“এ তো মানুষের বিশ্বাসঘাতকতা বৌ। এ নিয়ে বিচার চলে না। কিন্তু সুবর্ণকে মানুষ করে তোলার যে বড্ড আশা ছিল তোমার!”

সত্য আকাশের দিকে চোখ ফেলে। সেখানে কি সুবর্ণর মুখটাই বোজে ?... সুবর্ণকে কি দেখতে পায় সত্য ? তাই অমন আচ্ছন্নের মত বলে, “সুবর্ণ যদি মানুষ হবার মালমশলা নিয়ে জনে থাকে ঠাকুরঝি, হবে মানুষ।.... নিজের জোরেই হবে। তার মাকে বুঝবে। নইলে ওর বাপের মতন ভাবতে বসবে, মা নিষ্ঠুর! সে ভাবনা বন্ধ করি এ উপায় আমার হাতে নেই!”

“কিন্তু বৌ, তালুই মশাই সংসার ত্যাগ করে কাশীবাসী হয়েছেন, তাঁর ওপর আবার এই অশান্তির বোঝা চাপানোই ঠিক হবে তোমার ?”

সত্য এবার যেন তার নিজস্ব দৃঢ় ভঙ্গীতে ফিরে আসে। নিজস্ব ধরনে বলে, “না ঠাকুরঝি, সে অন্যায় আমি করবই বা কেন ? বাবার বোঝা হবো কেন ?” তারপর একটু হেসে বলে, “অনেকদিন আগে সুবর্ণ যখন জন্মায় নি, পাঠশালা খুলে পড়ানো-পড়ানো খেলা করতাম মনে আছে তোমার ঠাকুরঝি! আবার দেখবো, সে খেলা ভুলে গেছি না মনে আছে ? একটা মেয়েমানুষের ভাতকাপড় চলে যাবে না তাতে ?”

“নিজের পেট নিজে চালাবি বৌ ? এই সাহস নিয়ে ঘর ছাড়ছিস!” সদু একটা নিঃশ্বাস ফেলে বলে, “পায়ের ধুলো নেবার সম্পর্ক নয় বৌ, তবু নিতে ইচ্ছে হচ্ছে, কিন্তু তখন যে বললি কাশীতে—”

“হ্যাঁ, যাবো কাশীতে বাবার কাছে। সারাজীবন ধরে অনেক প্রশ্ন জমিয়ে রেখেছি, আগে তার উত্তর চাইতে যাবো।”

সহসা স্তব্ধতা নামে। গাড়ি ধীরে ধীরে হাটতলায় এসে থামে। গরুর গাড়ির পথ শেষ হয়।

